


Chyoiyúng
chyumlaiká:
dangshikaq asik; Zaiwa



New Testament in Zaiwa

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
23f9fc55-a8a4-59ef-9513-707ec336b0ee

Contents

Mahte	1
Markuq	55
Lukaq	90
Yohan	148
Lagyo	192
Romaq	244
1 Korinhtuq	268
2 Korinhtuq	291
Galatiq	307
Ehpesu	315
Hpilipi	323
Kolose	329
1 Htesaloni	335
2 Htesaloni	340
1 Timohti	343
2 Timohti	349
Tituq	354
Hpilemon	357
Hebre	359
Yakuq	377
1 Petruq	383
2 Petruq	390
1 Yohan	394
2 Yohan	401
3 Yohan	402
Yude	403
Shing-rán	405

MAHTE é Gabú Danglù Laiká (The Gospel of Matthew)

Yesuq É Byùxik Shap Kyô É Hkyô
Luk 3:23-38

¹ Abraham é awut ashín, Dawiq é yhangzo yhangshu,* Yesuq Hkrisduq é byùxik labaù gi, a-ô mâ é eq rajung za nghut lhê.

² Abraham gi, Isak lé hkû;
Isak gi, Yakup lé hkû;
Yakup gi, Yudaq eq yhanggu yhangmâng pé lé hku é nghut lhê;

³ Yudaq gi, Hparet eq Zera lé hkû, haú nhik é yhângnu gi, Tamar nghut ri.

Hparet gi, Hesrun lé hkû;
Hesrun gi, Ram lé hkû;

⁴ Ram gi, Aminada lé hkû;
Aminada gi, Nashon lé hkû;
Nashon gi, Salamun lé hkû;

⁵ Salamun gi, Buaq lé hkû;
Buaq é yhângnu gi, Rahap nghut ri.

Buaq gi, Obet lé hkû;
Obet é yhângnu gi, Ruhtaq nghut ri.

Obet gi, Yese lé hkû;
⁶ Yese gi, Hkohkâm Dawiq lé hkû;
Dawiq gi, Sholumon lé hkû; Sholumon é yhângnu gi, Uriaq yhangmyi dut wú sù nghut ri.

⁷ Sholumon gi, Rehoboam lé hkû;
Rehoboam gi, Abiyaq lé hkû;
Abiyaq gi, Asa lé hkû;

⁸ Asa gi, Yehoshaphat lé hkû;
Yehoshaphat gi, Yoram lé hkû;
Yoram gi, Uzi-aq lé hkû;

⁹ Uzi-aq gi, Yohtam lé hkû;
Yohtam gi, Ahaza lé hkû;
Ahaza gi, Hezekiaq lé hkû;

¹⁰ Hezekiaq gi, Manase lé hkû;
Manase gi, Amon lé hkû;
Amon gi, Yosiaq lé hkû;

¹¹ Yosiaq gi, Babelon má shúm dut huí é hkûn, Yehkoniaq eq yhanggu yhangmâng pé lé hku é nghut ri.

¹² Babelon má shúm dut huí é htâng má,
Yehkoniaq gi, Shalahtila lé hkû;
Shalahtila gi, Zerubabelaq lé hkû;

¹³ Zerubabelaq gi, Abiut lé hkû;
Abiut gi, Eliakim lé hkû;

Eliakim gi, Azor lé hkû;
¹⁴ Azor gi, Zaduk lé hkû;

Zaduk gi, Ahkim lé hkû;
Ahkim gi, Eliut lé hkû;

¹⁵ Eliut gi, Eliaza lé hkû;
Eliaza gi, Mahtan lé hkû;
Mahtan gi, Yakup lé hkû;

¹⁶ Yakup gi, Mariq é yhanglâng Yosep lé hku é nghut ri;
Mariq gi, Hkrisduq gâ é Yesuq lé hku é sù nghut ri.

¹⁷ Haú mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq† é pyat jé shoq gi, byùxik raxe myi xik nghut ri.

Yesuq Hku Lé Lo É Hkyô
Luk 2:1-7

¹⁸ Yesuq Hkrisduq hku lé lo é hkyô gi, a-ô mâ é eq rajung za nghut ri: Yesuq é yhângnu Mariq gi, Yosep eq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woi-nyí mai zogúng dut bê nghut ri. ¹⁹ Yhâng é yhumsíng hpó Yosep gi, dingmán sù nghut luí, yhang lé byu pê hí má hoq a kâm lhoq hpu nau é yanmai, tsik za lhoq kâng pyám râ dê ri.

²⁰ Nghut kôlhang, yhang haú su myit nyi é hkûn, yhupmoq má, haú Yhumsing é maumang lagyo gi, yhang lé, lé htoq shit luí, "Dawiq é yhangzo yhangshu Yosep é, haú náng é yhumsíng myhí Mariq lé hâng yù

* **1:1** Awut ashín eq yhangzo yhangshu gâ é lé, Chyúmdang ra-am má, "yhangzo" ga le bo tô lhê.

† **1:17** Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaia gâ é eq rajung za nghut lhê.

râ hkyô lé, hkâm-myit chiq; haî mù gâ le, yhang wun tô é zoshâng gùng gi, Chyoiyúng Woi-nyí dông lo é nghut lhê. ²¹ Yhang gi, yuqzo rayuq hkû râ nghut luî, nâng gi, zoshâng haú lé, Yesuq nghû myìng myhíng byi ra râ nghut lhê; hkâsu mù gâ le, Yhang gi, Yhâng é byu pé lé, yhangmoq é yubak mara mai hkyi yù râ sù nghut lhê." ga taî ri.

²² Shí hkyô banshoq gi, Garai Gasâng eq, haú myiqhtoi dông taî é dang lé lhoq dik é nghut ri. ²³ Myiqhtoi dang haú gi, "Haú zomyi gyíng gi, zogûng dut luî, yuqzo rayuq hkû râ nghut lhê; Yhâng é myìng lé gi, Emanuelaq ga kó râ nghut lhê."* gâ ri. Hau é lichyúm gi, "Garai Gasang gi, nga-nhúng eq rahá nghut nyi lhê." gâ é nghut lhê.

²⁴ Yosep gi, yhup bûn lo é hkûn, haú Yhumsing é maumang lagyo taî é eq rajung za, Mariq lé, yhangmyi dông yhúm má shuí yù bê nghut ri. ²⁵ Nghut kôlhang, yhang gi, yuqzo haú hku é hkûn jé shoq, Mariq eq gungsho a zùm nghut ri. Yuqzo haú lé, yhang gi, Yesuq ga myhíng byí ri.

2

Buihtoq Hkyam Mâ É Hpaqchyî Bò Bang

¹ Herut hkohkâm up nyi é u lé, Yuda mau mâ é Betlehem wà má Yesuq lé hku é nghut ri. Hau htâng, buihtoq hkyam mâ é hpaqchyî bò bang gi, Yerusalem wà mó má jé lé kômù, ² "Haú hku lé lô bê Yudaq byu pé é Hkohkâm gi, hkâmá nghut lhê lhú? Yhâng é kyî lé, buihtoq hkyam má ngamoq myàng luî, Yhang lé noq râ matú jé lé é nghut lhê." ga luî, myí akô nghut ri.

³ Herut hkohkâm gi, haú hkyô lé wó gyo jáng myit myô nyi ri; hau htoq agó, Yerusalem wà mó mâ é lhunglhang bang le, myit myô bum akô nghut ri. ⁴ Haú mù luî, yhang gi, byu pé é hkyangjong agyi pé eq tarâ sará pé banshoq lé, ji tsíng yù mù, haú

Hkrisduq hkâmá hku lé lô râ nghut é hkyô lé myí ri. ⁵ Haú hkûn, yhangmoq gi, "Yuda mau Betlehem wà má nghut lhê. Hkâsu mù gâ le, shí hkyô eq séng luî, haú myiqhtoi kê tô é má,

⁶ 'Yudaq mau mâ é Betlehem wà ê, nâng gi, Yudaq mau mâ é wà pé má, je tiq sù a nghut; hkâsu mù gâ le, ngá é Israelaq byu pé lé upzúng râ Zau gi, nâng chyáng mai htoq lô râ nghut lhê.*

ga bo tô ri." ga tû taî akô.

⁷ Hau htâng, Herut gi, haú hpaqchyî bò bang lé haq ji yù mù, kyî lé htoq shit é ahkyíng lé, yhangmoq chyáng mai hkyak wó myí sê yù bê nghut ri. ⁸ Haú mù, yhang gi, "Nungmoq, zoshâng haú lé rago é ho wú keq. Ngò le, Yhang lé é wó noq râ matú, Yhang lé nungmoq é myâng eq yhang, ngo lé lo shit kyo keq." ga taî luî, haú bang lé Betlehem wà shut nhang kat bê nghut ri.

⁹ Yhangmoq gi, haú hkohkam é dang lé gyô yu é htâng má, htoq e ló bekô nghut ri. Haú buihtoq hkyam má yhangmoq myang é kyî gi, haú zonú nyi é ahtoq ang ang má ló nô é jé shoq, yhangmoq é hí má e ló byí ri. ¹⁰ Yhangmoq gi, kyî haú lé myàng jáng, gyai yhang gabú bum akô nghut ri. ¹¹ Yhangmoq gi, haú yhúm má wang e ló kê é hkûn, zonú eq yhângnu Mariq lé myàng kômù, hkyihput htuq luî, haú zonú lé noqkuq akô; hau htâng, yhangmoq é sutdek pé lé le hpóng luî, hîng, namngón jung loban eq mura* pé lé yù mù, Yhang lé chyunghuq byí akô nghut ri. ¹² Yhangmoq gi, Herut chyáng a dum taú ló râ matú, yhupmoq má, yhangmoq lé sidiq byí é hui kômù, hkyô gó hkat dông yhangmoq é mau shut taú ló bekô nghut ri.

Egutuq Ming Shut Hpaq E É Hkyô

¹³ Yhangmoq ló byuq é htâng má, haú Yhumsing é maumang lagyo rayuq gi, Yosep lé yhupmoq má htoq

* 1:23 Esai 7:14 * 2:6 Mihka 5:2 * 2:11 Mura gi, chi wó kut jung xù nghut lhê.

shit mù, "Toq aq! Haû zoshâng eq yhangnu lé, Egutuq ming shut shuî h pang ê aq. Ngò, nang lé dum ji yu é ahkyíng jé shoq, haú má nyi nyi keq. Haî mù gà le, Herut gi, zoshâng haú lé sat râ matú, ho nyi bê nghut ri." ga taî ri.

¹⁴ Haû mù, yhang gi, toq luî, myín lé yhang, zôshang me lé shuî chûng mù, Egutuq ming shut e ló bê nghut ri. ¹⁵ Yhangmoq gi, Herut shi é jé shoq, haú má nyi nyi akô. Haû gi, "Ngá zo lé, ngò, Egutuq ming mai wut htoq yû bê nghut lhê."* ga, haû Yhumsing eq myiqhtoi dông taî é dang lé lhoq dik é ru nghut lhê.

¹⁶ Herut gi, yhang lé, hpaqchyî bò bâng eq mhaû pyâm tô é lé sé jáng, nhikmo-yo bê nghut ri; haû mù, yhang gi, haû hpaqchyî bò bâng chyáng mai wó sê yu é ahkyíng lé sôn wú mù, Betlehem wà eq hau é awui ayàm mâ é wà pé má nyi é, í zân mai a-ô mâ é yuqzo pé banshoq lé, sat pyám nhang ri. ¹⁷ Haû gi,

"Ramaq gà é jowò má, yón kuq é eq ngau garû é htê lé wó gyô ri; Rahkelaq gi, yhang zô pé a nyi byuq lo kô é yanmai, ngau nyi é eq nhik a wó tít dut ri."*

ga luî, ¹⁸ myiqhtoi Yerimaq dông taî tô é dang lé lhoq dik é nghut ri.

Nazaret Wà Má Dum Taû Lo É Hkyô

¹⁹ Herut shi byuq é htâng, Egutuq ming má, haû Yhumsing é maumang lagyo gi, Yosep chyáng yhapmoq dông lé htoq shit mù, ²⁰ "Toq aq, haû zôshang me lé shuî chûng mù, Israelaq ming má taû ló aq; hkâsu mù gà le, haû zoshâng lé sat naû bang shi byuq bekô nghut ri." ga taî ri.

²¹ Haû mù, Yosep gi, zôshang me lé shuî chûng mù, Israelaq ming shut taû ló bê nghut ri. ²² Nghut kôlhang, yhang gi, Yuda mau má, Arhkela-uq, yhangwa Herut é hkó má xoq up nyi é hkyô lé wó gyo jáng, haú má a wám ló lo nghut ri. Yhapmoq má sidiq byî

é huî é eq rajung za, yhang gi, Galile mau shut e ló mù, ²³ Nazaret gà é wà má ló nyi nyi bê nghut ri. Haû mù, "Yhang lé, Nazaret wà byù ga râ nghut lhê." ga luî, haû myiqhtoi pé dông taî tô é dang lé lhoq dik é nghut ri.

3

Wui-myhup Sará Yohan Shui Hen É Hkyô

Mrk 1:1-8; Luk 3:1-18; Yhn 1:19-28

¹ Haú yoq má, Wui-myhup Sará Yohan htoq lô mù, Yuda mau má é yoso má hko kyô é gi, ² "Myit lhíng keq; hkâsu mù gà le, mauhkûng mingdán gi, chyâng lò bê* nghut ri." gà ri. ³ Haú yuq gi,

"Haû yoso má, byù rayuq garû taî é htê gi,

'Haû Yhumsing é matú, hkyô hen to keq; Yhâng é matú, hkyô lhoq nyhang to keq.' gà ri."*

ga myiqhtoi Esai-aq taî tô é sù yuq nghut ri.

⁴ Yohan gi, gola-uq shomaú eq saî é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dítgám eq yosô byo-î pé nghut ri. ⁵ Yerusalem wà mó mâ é bang, Yuda mau banshoq mâ é bang eq Yodan làng awui ayàm lhungháng mâ é bang gi, yhâng chyáng htoq e bum akô. ⁶ Yhangmoq gi, yhumsing é mara lé yín yû kôluî, yhâng chyáng mai Yodan làng má wui-myhup hkâm yu bum akô nghut ri.

⁷ Nghut kôlhang, yhang gi, yhang wui-myhup hkâm byî é jang má, Hparishe pé eq Saduke pé myo myo lé lo nyi kô é lé myàng jáng, yhangmoq lé taî é gi, "Duq htân lhangmuì amyû pé ê, jé lô râ yubak dam mai wó h pang lut kó sháng gaq ga, nungmoq lé ó yuq taî pûn é lhú? ⁸ Myit lhíng hkyô eq gíngdán é ashi pé zui keq. ⁹ 'Ngamoq gi, Abraham é yhangzo yhangshû pé nghut lhê.' nghû luî, yhumsing é i-myit unghkaû má hkâlum to kó.

* 2:15 Hos 11:1 * 2:17 Yer 31:15 * 3:2 Mauhkûng mingdán gi, chyâng lò bê gà é lichyúm gi, Garai up râ ahkyíng chyâng lò bê gà é nghut lhê. * 3:3 Esai 40:3

Hkâsu mù gâ le, ngò, nungmoq lé tai kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. ¹⁰ Ahkuí lháng, Garai Gasang gi, Yhâng é wazung lé haú sikkâm wang pé má tô to bê nghut ri; haú mù, ge é ashi a zuí é agàm hkangmó lé gi, htuq lhêng pyám mù, myi má dú kat pyám râ nghut lhê.

¹¹ Ngò gi, nungmoq myit lhîng kó sháng gaq nghû, wui èq za wui-myhup hkám byí lhê. Nghut kôlhang, ngá htoq má wum-o a-tsam je bo é sú rayuq, ngá htâng má jé lé lô shirâ nghut luí, ngò gi, Yhâng é hkyî-tsung chûng byi râ lháng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkám byi râ nghut lhê. ¹² Yhang gi, loq má byò chung to mù, guq chyarâng mâ é guq bùm lé hik sân pyám luí, já é guq cham lé gi, guqchyí má tsîng kat to mù, guqsôm lé kúm gi, hkâ-nhâm le shi byuq a sê é myí èq nyhê hkyô pyám râ nghut lhê." gâ ri.

Yesuq, Wui-myhup Hkâm Yu É Hkyô

Mrk 1:9-11; Luk 3:21-22

¹³ Haú hkûn, Yesuq gi, Yohan chyáng wui-myhup hkám yù râ ga, Galile mau mai Yodan làng má jé lé lo ri. ¹⁴ Nghut kôlhang, Yohan gi, "Ngò sheq Náng chyáng wui-myhup hkám yù râ sú ru nghut lhê nhîng! Náng sheq ngá chyáng lé lo lhê lhú?" ga luí, lhom tai hkûm ri.

¹⁵ Haú hkûn, Yesuq gi, "Dingmán hkyô banshoq lé, nga-nhúng lhoq dik râ é yanmai, Ngo lé wui-myhup hkám byi laq." ga tú tai ri. Haú mù, Yohan le, gyo byi bê nghut ri.

¹⁶ Yesuq gi, wui-myhup hkám yù eq yhang, wui mai htoq lo ri. Haú hkûn, mauhkûng bóng lô mù, Garai Gasâng é Woi-nyí gi, hpûngkyui gunghkyâng sú é đông mai, Yhâng ahtoq má lé gyó nô tô é lé, Yhang myang kat ri.

¹⁷ Haú hkûn, "Shí yuq gi, Ngò chyt-dap é Ngá zo nghut lhê; Yhâng é ahtoq

má Ngò gabú myit ngón nyi lhê." ga mauhkûng mai danghtê htoq lo ri.

4

Yesuq, Gúnglaú Huí É Hkyô

Mrk 1:12-13; Luk 4:1-13

¹ Hau htâng má, Chyoiyúng Woi-nyí gi, Yesuq lé, nat Tsadán èq gunглаú é hui nhâng râ matú, yoso shut shuí ê ri. ² Yesuq gi, zoshuq gám é myi xê nyí myi xê myìn jé jáng, zòmut hui bê nghut ri. ³ Haú hkûn, gunглаú sú gi, Yhâng chyáng lé mù, "Náng, Garai Gasâng é Yhangzo nghut le gi, luqgok shí pé lé muk dut nhâng aq." ga tai ri.

⁴ Haú jáng, Yesuq gi, "Byù gi, muk èq za asak duì râ a nghut; Garai Gasâng é nhut mai htoq lo é mung-dang hkangmó èq sheq asak duì râ nghut lhê."* ga luí, Chyúmdang má kê tô ri." ga yhang lé tú tai ri.

⁵ Haú hkûn, nat Tsadán gi, Yesuq lé, chyoiyúng myuq* má shuí ê mù, noqkuq yhum je myhang é shúhtâng htoq má yap nhang to luí, ⁶ "Náng, Garai Gasâng é Yhangzo nghut le gi, byam gyó kat wú aq. Hkâsu mù gâ le, 'Náng é matú, Garai Gasang gi, Yhâng é maumang lagyô pé lé tai to râ nghut mù,

luqgok má Náng é hkyî a ló htung shoq,

yhangmoq é loq èq Nang lé lhom bún yú kó râ nghut lhê."* ga luí,

Chyúmdang má kê tô ri." ga tai ri.

⁷ Nghut kôlhang, Yesuq gi, "Haú Yhumsîng, nungmoq é Garai Gasang lé, wó chyam wú râ a nghut."* ga luí le, Chyúmdang má kê tô ri." ga, yhang lé tú tai ri.

⁸ Nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq eq haú pè é hkikhkâm hkyô lé tûn shit ri. ⁹ Hau htâng, yhang gi, "Náng hkyihput htuq mù, ngo lé noq é nghut jáng, shí pé

* 4:4 Tarâ Pun 8:3 * 4:5 chyoiyúng myuq gi, Yerusalem lé gâ lhê. * 4:6 Hkya-on 91:11-12 * 4:7 Tarâ Pun 6:16

banshoq, Nang lé ngò byi râ." ga, Yesuq lé taî ri.

¹⁰ Haú hkûn, Yesuq gi, "Tsadán nàng, ló byuq aq! Hkâsu mù gâ le, 'Haú Yhumsîng nàng é Garai Gasang lé za, nàng noqkuq dojaú ra râ nghut lhê.'^{*} ga luî, Chyúmdang má kê tô ri." ga, yhang lé taî ri.

¹¹ Haú mù, nat Tsadán gi, ló byuq bê nghut luî, maumang lagyô pé gi, Yesuq lé, lé dojaú nyi akô nghut ri.

*Yesuq Mungdang Hko Hi Lô É Hkyô
Mrk 1:14-15; Luk 4:14-15*

¹² Yesuq gi, Wui-myhup Sará Yohan htóng gyó é hkyô lé wó gyo jáng, Galile mau shut dum taú ló bê nghut ri.

¹³ Yhang gi, Nazaret wà mai htoq ló mù, Zebulun eq Nahtali mau mâ é nhông yàm má joq é Kaperna-um wà má ló nyi nyi ri. ¹⁴ Haú gi, myiqhtoi Esai-aq laiká má,

¹⁵ "Zebulun mau eq Nahtali mau, wuimau mâ é hkyô, Yodan làng yàm, tungbaù pé nyi é Galile mau ê,

¹⁶ mauchut hkaú má nyi nyi é bang, maubó mó lé myàng bê nghut ri;

shî wup hkaú má nyi to bâng é matú, maubó lô bê nghut ri."^{*} ga kê tô é dang lé lhoq dik râ matú nghut ri.

¹⁷ Haú hkûn mai, Yesuq gi, "Myit lhîng keq! Mauhkûng mingdán gi, chyâng lò bê nghut ri." ga, mungdang hko hi e ló bê nghut ri.

Yesuq É Chángzo Hí Dut Bang

¹⁸ Yesuq gi, Galile nhông yàm má hkyô sô wún é hkûn, Petruq gâ é Simun eq yhanggu Andre nhiktâng lé myang ri. Yhangnhik tâng gi, ngozo kóng zo su nhik nghut mù luî, nhông má gùn dú nyi akô nghut ri. ¹⁹ Haú mù, Yhang gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng rá nghut lhê." ga taî ri. ²⁰ Haú hkûn, yhangnhik gi, radá dâm, gùn pé lé tô

pyâm to luî, Yhang htâng cháng bekô nghut ri.

²¹ Yesuq gi, jowò haú mai xoq sô e ló le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhângwa Zebedi eq rahá, lhaî hkaú má gùn hpo nyi akô. Yhangnhik lé, Yesuq wut kat jáng, ²² yhangnhik gi, radá dâm, yhangnhik é yhângwa eq lhaî haú lé, tô pyâm to kôluî Yesuq htâng cháng bekô nghut ri.

Nò Bang Lé, Yesuq Lhoq Gê Byî É Hkyô

Luk 6:17-19

²³ Yesuq gi, Galile mau ramau gón má htoq é mù, tarajong pé má, mhoqshit luî, mauhkûng mingdán eq sêng é gabú danglù lé, hko kyo uchyang, byu pé chyáng má é nòhpyo ajung jung hui bang eq nolì nojàng amyù myù dap bang lé, lhoq gê byî wún ri. ²⁴ Yesuq eq sêng é hkyô ludang gi, Suriq ramau gón má byo myín ló mù, byu pé gi, awáng nòhpyo ajung jung huî é bang, hkê-nhò jamjaú nyi é bang, nat gang wang júng é bang, mhûngtuq tuq é bang, gùngjum shi é bang lé, shuí lé lô kôluî, Yhang gi, haú bang lé lhoq gê byî ri. ²⁵ Galile mau, Dekapoli,[†] Yerusalem, Yuda mau eq, Yodan làng tû tap mâ é byù moq mó gi, Yesuq htâng châng bum akô nghut ri.

5

Hkungsô Wó É Tarâ

Luk 6:20-23

¹ Yesuq gi, byù moq mó lé myàng jáng, bùm má doq ló luî, ló zung tô ri. Haú hkûn, Yhâng é chángzô pé gi, Yhâng chyáng lé lô kôjáng, ² Yhang nhut hkum hpóng luî, yhangmoq lé mhoqshit é gi:

³ "Woi-nyí má, asho awui dut é bang gi, hkungsô wó nyi ri; hkâsu mù gâ le, mauhkûng mingdán gi, yhangmoq é mingdán nghut nyi ri.

^{*} 4:10 Tarâ Pun 6:13 ^{*} 4:16 Esai 9:1-2 [†] 4:25 Dekapoli gâ é gi, Grik đông myuq raxê lé gâ lhê.

- ⁴ Myit iyon huî é bang gi, hkungsô wó nyi ri; hkâsu mù gâ le, yhangmoq gi, nhik lhoq tîng é hui kó râ nghut lhê.
- ⁵ I-myyit nú-nhâm é bang gi, hkungsô wó nyi ri; hkâsu mù gâ le, yhangmoq gi, mingkan lé wó sîng kó râ nghut lhê.
- ⁶ Dingmán hkyô lé mut shit nyi é bang gi, hkungsô wó nyi ri; hkâsu mù gâ le, yhangmoq gi, nhik dik shoq myàng zo kó râ nghut lhê.
- ⁷ Shogyo nhikmyin myit bo é bang gi, hkungsô wó nyi ri; hkâsu mù gâ le, yhangmoq gi, shogyo nhikmyin yu é hui kó râ nghut lhê.
- ⁸ Myit sansêng é bang gi, hkungsô wó nyi ri; hkâsu mù gâ le, yhangmoq gi, Garai Gasang lé myàng kó râ nghut lhê.
- ⁹ Nguingón hkyô sô xoq byî é bang gi, hkungsô wó nyi ri; hkâsu mù gâ le, yhangmoq gi, Garai Gasang é yhangzô pé gâ é hui kó râ nghut lhê.
- ¹⁰ Dingmán hkyo é yanmai zing-ri huî é bang gi, hkungsô wó nyi ri; hkâsu mù gâ le, mauhkûng mingdán gi, yhangmoq é nghut nyi ri.
- ¹¹ Ngá é yanmai, byu pé èq, nungmoq lé rhoi é, zing-rî é, a teng a mán é dông agè ashop é dang amyû myû taí tso kô é hkûn, nungmoq hkungsô wó nyi ri. ¹² Nguingón gabú nyî keq, hkâsu mù gâ le, nungmoq é matú kô é chyunghuq gi, mauhkûng mingdán má joq tô ri. Nungmoq é hí lhê é myiqhtoî pé lé le, yhangmoq gi, haú dông zing-rî lai lo wú bekô nghut ri.

Xo Eq Maubó

Mrk 9:50; Luk 14:34-35

¹³ Nungmoq gi, myidàm htoq mâ é xo nghut nyi lhê. Nghut kôlhang, xo gi, mán kân byuq jáng, haú lé hai èq dum wó lhoq ngam yù râ lú? Shinggan shut dú pyám mù, byu pé èq nâng

pyeq pyâm é mai lai luî, hai akyû le bò râ a nghut lo.

¹⁴ Nungmoq gi, mingkân é maubó nghut akô; bùm htoq mâ é myuq lé gi, wó nghop to râ a nghut. ¹⁵ Myibung lé tap mù, mûng èq nghop tô é ó a kut wú kó; haú su kut râ malaî, yhúmkaû má lúng tô é bang yuq hkangmó myoq wó myâng râ matú, tsungjang má kúm tsung to râ nghut lhê. ¹⁶ Haú eq rajung za, byu pé gi, nungmoq é ge é muzó pé lé byu-myàng luî, mauhkûng htoq mâ é nungmoq é Îwa lé hkya-on kó sháng gaq, nungmoq é maubó lé yhangmoq é hí má duq nhang to keq.

Tarâ Lhoq Dik É Hkyô

¹⁷ Ngò gi, myiqhtoî pé é dang eq jep é tarâ lé lhoq hpyoq pyám râ matú, jé lé é nghut nhô hkâ-ngâm kó; haú pé lé lhoq dik râ matú sheq jé lé é ru nghut lhê. ¹⁸ Ngò, nungmoq lé teng za taí kôlé, mauhkûng eq myigùng byuq byuq le lhang, haú pé a ban lhoq dik dik gi, jep é tarâ mâ é tiq dik é dangjí eq myihkyet zo ralhum lhang byuq byuq râ a nghut. ¹⁹ Jep é tarâ shí pé mâ é tiq dik é dang rahkun lé lu lai luî, góbang lé le, haú su kut râ matú mhoq byî é sù ó yuq nghut kôle, mauhkûng mingdán má tiq dik sù gâ é hui râ nghut lhê; nghut kôlhang, jep é tarâ shí pé lé châng kut luî, mhoq byi sù kúm gi, mauhkûng mingdán má, hkik sù gâ é hui râ nghut lhê. ²⁰ Ngò, nungmoq lé taí kôlé, nungmoq dingmán é hkyô má, haú Hparishe pé eq tarâ sará pé dingmán é htoq je a gyaú le gi, mauhkûng mingdán má, nungmoq wó wâng kó râ a nghut.

Byù Hkâsat

²¹ 'Byù hkâsat, * sat é sù gi, jéyáng é hui râ nghut lhê' ga, hí hpyang lhê é bang lé taí tô é dang, nungmoq wó gyô wú bê nghut lhê. ²² Nghut kôlhang, Ngò, nungmoq lé taí kôlé, gumang rayuq yuq lé nhikjum yô é sù gi, jéyáng é hui râ nghut lhê. Hau htoq agó, gumang hpó lé, 'Byù gang'* ga

* 5:21 Htoq Ló 20:13 * 5:22 Byù gang gâ é lé, Grik dông "Raka" gâ lhê.

taí é sù gi, Yudaq byìn tú wapdoq má jéyáng é hui râ nghut lhê; 'Byù bam ê' ga wut é sù gi, ngaraî myi eq gingdán nyi ri.

²³ Haù mù, hkungga gyap má, nàng hkungga nhông râ dâ é hkûn, náng é gumang rayuq yuq, nang lé mara hun é hkyô rajung jung joq é lé, myit bûn kat é nghut jáng, ²⁴ náng é hkungga lé, haù hkungga gyap hí má tô pyâm to mù, náng é gumang hpó haù yuq eq hí nguingón hkyô ló yù luí sheq, hkungga lé nhông byi aq.

²⁵ Nang lé yui tsuq sù gi, nang lé tarâ rûng má dé e ló é hkûn, hkyô má ru nghut nyi ashî u lé, yhang eq nguingón hkyô hí hân yù aq. Haù a nghut jáng, haù yuq gi, nang lé, tarâ agyi chyáng ê ap pyám mù, haù tarâ agyi gi, nang lé htóng hkyô pyám râ matú, htóng suwún hpô é loq má ap pyám râ nghut lhê. ²⁶ Ngò, nang lé teng za taí lé, yuichyîn haù a ban xap xap gi, htóng haù mai nàng wó htoq ló râ a nghut.

Su-myi Sulàng Lú É Hkyô Eq Séng Luí Mhoqshit É Dang

²⁷ 'Su-myi sulàng hkâlú'☆ gâ é dang lé, nungmoq wó gyo wú bê nghut lhê. ²⁸ Nghut kôle, Ngò, nungmoq lé taí kôlé, myiwe rayuq lé shut nau é myit èq wú é sù gi, yhâng é myit hkaù má, myiwe haù yuq eq su-myi sulàng lú hkyô kut é sù nghut bê. ²⁹ Haù mù, náng é loqyo myoq èq, nang lé mara kut shut nhang é nghut le gi, haù lé lap choq yù mù, dú pyám aq. Hkâsu mù gâ le, náng é ragùngdu gón ngaraî ming gyó râ htoq má, náng é gungsho rajung jung za htên byuq é nghut le gi, náng é matú je ge ri. ³⁰ Haù eq rajung za, náng é loqyo loq èq, nang lé mara kut shut nhang é nghut le gi, haù lé hpyit yù mù, dú pyám aq. Hkâsu mù gâ le, náng é ragùngdu gón ngaraî ming gyó râ htoq má, náng é gungsho rajung jung za htên byuq é nghut le gi, náng é matú je ge ri.

Myi Làng Gâng É Hkyô Eq Séng Luí Mhoqshit É Hkyô

Mht 19:9; Mrk 10:11-12; Luk 16:18

³¹ 'Yhumsing é yhangmyi lé kâng é sù gi, lhoq kang laiká byi râ dut lhê.'☆ gâ é dang joq lhê. ³² Nghut kôlhang, Ngò, nungmoq lé taí kôlé, myiwe dông mai làng shut é a nghut é za, yhumsing é yhangmyi lé kâng é sù gi, myiwe haù lé sulàng lú sù dut nhâng bê nghut ri; hau htoq agó, yhumsing yhanglâng eq gang bê myiwe lé hâng yu é sù le, su-myi lú é sù dut bê nghut ri.

Danggidiq

³³ Hau htoq agó, 'Danggidiq a zùng hkâmû; Yhumsing lé byi tô é danggidiq eq rajung za cháng aq.' ga luí, hí hpyang lhê é bang lé, taí tô é dang lé nungmoq wó gyô wú bê nghut lhê. ³⁴ Nghut kôlhang, Ngò, nungmoq lé taí kôlé, hai èq le hkâdakâm kó: mauhkûng lé lang luí le, hkâdakâm kó; hkâsu mù gâ le, haù gi, Garaî Gasâng é zùng tanghkuq nghut lhê; ³⁵ myigùng lé lang luí le, hkâdakâm kó; hkâsu mù gâ le, haù gi, Garaî é hkyi nang jang nghut lhê; Yerusalem lé lang luí le, hkâdakâm kó; hkâsu mù gâ le, haù gi, Hkohkâm mó é myuq nghut lhê. ³⁶ Hau htoq agó, yhumsing é ulhùm èq le, hkâdakâm kó; hkâsu mù gâ le, xâm rahkat lé lhang hpyû shoq noq shoq, nàng wó kut é a nghut. ³⁷ Náng é dang lé, 'nghut lhê' lé gi, 'nghut lhê' nghû, 'a nghut é' lé gi, 'a nghut' nghû, taí aq; haù mai lai é gi, haù agè ashop su chyáng mâ é nghut ri.

Lató Hpuq É Hkyô

Luk 6:29-30

³⁸ 'Myoqjí matú myoqjí xap, zui matú zui xap'☆ gâ é dang lé, nungmoq wó gyô wú bê nghut lhê. ³⁹ Nghut kôlhang, Ngò, nungmoq lé taí kôlé, agè ashop kut é sù lé lató hkâhpuq. Náng é loqyo bowâm má pyuq byi sù lé, loqpaî hkyam le hkâm byi shi aq. ⁴⁰ Byù rayuq yuq, nang lé mara tsuq mù, náng é buzo lé yu pyám byi é

nghut jáng, bumó lé le, hkyut byi shi aq. ⁴¹ Byù rayuq yuq, nang lé zik mù, radéng ê nhâng jáng, yhang eq rahá í déng châng ê byi aq. ⁴² Nang lé dung sù lé, byi aq; náng chyáng mai chyí naù sù lé le, nunghtáng hkâlhik pyám.

Gyè Lé Chyitdap Râ É Hkyô

Luk 6:27-28, 32-36

⁴³ 'Náng é chyangnâm mâ é bang lé gi, chyitdap mù, náng é gyè lé gi, a jú kut aq'✧ gâ é dang lé, nungmoq wó gyô wú bê nghut lhê. ⁴⁴ Nghut kôlhang, Ngò, nungmoq lé taí kôlé, nungmoq gi, mauhkûng htoq mâ é nungmoq é Íwâ é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyûdung byi keq; ⁴⁵ hkâsu mù gâ le, Yhang gi, agè ashop bâng é ahtoq má le, gè bâng é ahtoq má le, bùi tsô byi nhâng mù, dingmán bâng é ahtoq má le, a dingmán bâng é ahtoq má le, mau wô byi nhâng Sù nghut ri. ⁴⁶ Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó râ lú? Kang guq bang lhang, haù su kut lhê a nghut kó lú? ⁴⁷ Hau htoq agó, nungmoq é gumang wuì lé za shi-kyám kô le gi, nungmoq kut é muzó gi, góbâng htoq má hai wá laklaí râ lú? Tungbaù pé lhang haù su kut lhê a nghut kó lú? ⁴⁸ Haù mù, mauhkûng htoq mâ é nungmoq é Íwâ gumjup é su, nungmoq le gumjup nyì keq.

6

Alu Byí É Hkyô

¹ Nungmoq dingmán é hkyô lé, byu pé myàng sháng gaq nghû, byu pé hí má a kut shit loshoq, sidiq nyì keq. Haù su kut é nghut jáng, mauhkûng htoq mâ é nungmoq é Íwâ chyáng mai, chyunghuq wó yù kó râ a nghut.

² Haù mù, haù gegùn labyoq kut bang gi, byu pé èq shigyaù é hui sháng gaq ga, tarajong pé hká, hkyô pé hká kut é su, náng gi, alu byí é hkûn, tut htê su hkâlhoq htoq. Ngò, nungmoq lé

teng za taí kôlé, haù bang gi, yhangmoq é chyunghuq lé hkûm shoq wó yù bekô nghut lhê. ³ Ra châ to bang lé náng alu byí é hkûn, náng é loqyo loq kut é hkyô lé, loqpaì loq lé lhang hkâsé nhâng. ⁴ Haù hkûn, náng alu byí é lé, ó a châng sé râ nghut lhê. Haù jáng sheq, ó a sé loshoq kut é hkyô lé myang é sù, náng é Íwâ gi, nang lé chyunghuq shigyaù râ nghut lhê.

Kyûdung É Hkyô

Luk 11:2-4

⁵ Nungmoq kyûdung le, gegùn labyoq kut bang su hkâkut kó; hkâsu mù gâ le, yhangmoq gi, byu pé byu-myàng shoq ga, tarajong pé eq hkyô kang pé má yap mù, kyûdung râ ô nau akô. Ngò, nungmoq lé teng za taí kôlé, haù bang gi, yhangmoq é chyunghuq lé wó yù bekô nghut ri. ⁶ Nghut kôlhang, náng kyûdung le, náng é gok hkaù má wang ló mù, hkum myhî pyám luí, a byu-myang é náng é Íwâ chyáng dung aq. Haù jáng, ó a byu-myang é lé myàng sù, náng é Íwâ gi, nang lé jeju dum tau byi râ nghut lhê. ⁷ Haù mù, kyûdung le, tungbaù pé su kut luí, dang puq hkâhtau kó; hkâsu mù gâ le, yhangmoq gi, dang hing chín luí dung jáng sheq, gyo byi nhô ngam akô nghut ri. ⁸ Haù bang su hkâkut kó; hkâsu mù gâ le, nungmoq é Íwâ gi, nungmoq râ é hkyô lé, nungmoq a dung shi mai sê to Sù nghut lhê.

⁹ Haù mù, nungmoq kyûdung le, 'Mauhkûng htoq tsáng myhâng mâ é ngamoq é Áwâ ê,

Náng é myìng gi, chyoiyúng nyì sháng gaq,

¹⁰ Náng é mingdán jé lô sháng gaq, Náng ô nau é hkyô, mauhkûng htoq má dik é su, myigùng htoq má le dik sháng gaq ô.

¹¹ Ngamoq nyì wuì râ é zoshuq lé, ngamoq lé hkû-nyì byi laq.

¹² Ngamoq lé shut é bâng é mara lé ngamoq hkyut pyám byí é su,

✧ 5:43 Nhung 19:18

ngamoq é mara lé le hkyut pyám byi laq.

¹³ Ngamoq lé, agúng alau hkyô má a wàng nhang é za,

agè ashop jang mai hkyi yù laq ô.

(Hkâsu mù gâ le, kô dik é up sîng hkyô, a-tsam eq hpungwup shîngkang gi, pyat dedu ahtum abyuq Náng chyáng ru joq nyi ri ô! Amen.)^{*}

ngû dung keq. ¹⁴ Supê èq, nungmoq lé kut shut é mara lé, nungmoq hkyut pyám byi é nghut le gi, mauhkûng htoq mâ é nungmoq é Îwa le, nungmoq lé mara hkyut pyám byi râ nghut lhê. ¹⁵ Nghut kôhang, haú bang é mara lé, nungmoq a hkyut pyám byi é nghut le gi, nungmoq é Îwa le, nungmoq é mara lé hkyut pyám byi râ a nghut.

Zoshuq Gám É Hkyô

¹⁶ Nungmoq gi, zoshuq gám é hkûn, gegùn labyoq kut bang su myoqdong hkâlhoq nyhui kó; hkâsu mù gâ le, haú bang gi, yhangmoq zoshuq gám é hkyô lé, tún shit râ matú myoqdong lhoq nyhui shit akô nghut ri. Ngò, nungmoq lé teng za taí kôlé, haú bang gi, yhangmoq é chyunghuq wó yû bekô nghut ri. ¹⁷ Nungmoq kúm gi, zoshuq gám é hkûn, nungmoq zoshuq gám é hkyô lé, byu pê hí má de de a dut é za, nungmoq a byu-myang é Îwa za myàng sháng gaq, myoq chî pyám luí, u xû but keq; ¹⁸ haú jáng sheq, ó a sé loshoq kut é hkyô lé myang é Sû, nungmoq é Îwa gi, nungmoq lé chyunghuq shigyaú râ nghut lhê.

Mauhkûng Htoq Mâ É Sutzè

Luk 12:33-34

¹⁹ Jàngkon, jogyik èq wó lhoq htên pyâm é eq hkaú su èq le wó wang hkaú yu pyám byi é myigùng htoq má, nungmoq é matú, sutzè lé hkâhkong to kó. ²⁰ Jàngkon, jogyik èq le a wó lhoq htên pyâm é eq, hkaú su èq le a wó wang hkaú yu pyâm byi é mauhkûng htoq má sheq, nungmoq é matú sutzè

hkonq to keq. ²¹ Hkâsu mù gâ le, náng é sutzè joq jang má, náng é i-myt le jé nyi râ nghut lhê.

²² Myoqjí gi, gungdû é myibung nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê. ²³ Nghut kôhang, náng é myoqjí a ge é nghut le gi, náng é gungdu gón gi, mauchut tuq dut nyi râ nghut lhê. Náng chyáng bo é maubó gi, mauchut byuq é nghut jáng, mauchut haú gi, hkâ-í yhang htû râ lhê!

²⁴ Ó yuq nghut kôle, yhumsîng í yuq lé wó dojaú râ a nghut. Hkâsu mù gâ le, yhang gi, rayuq lé a jú kut mù, rayuq lé gi, chyitdap râ nghut lhê; haú a nghut jáng, rayuq lé lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut.

Hkâ-myt Chiq Kó

Luk 12:22-31

²⁵ Haú mù luí, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdû matú haí wut haí tsang râ lé, hkâ-myt chiq kó. Asak gi, zoshuq htoq má, gungdu gi, mebû htoq má, je ahkyak lhê a nghut kó lhú? ²⁶ Maulat mâ é nghoqzô pé lé wú wú keq; yhangmoq gi, kyô hkyó kyô shu a kut é htoq agó, chyî pé má le haí a tsîng kat to kô é nghut le lhang, mauhkûng htoq mâ é nungmoq é Îwa gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpau nyi lhê a nghut kó lhú? ²⁷ Nungmoq má, ó yuq wá, myit chiq é èq, yhumsîng é asak lé radúng kô wó jat yù kó râ lhú?

²⁸ Haú nghut le nhîng, haí mù, mebû matú myit chiq akô lhú? Myigùng má yuq tô é htutbó ban pé hkâsu kut kô lo é lé, myit wú keq. Haú pé gi, mù le a zui, hkyîng le a duí kó nghut ri. ²⁹ Nghut kôhang, Ngò, nungmoq lé taí kyo kôlé, hkohkâm Sholumon hpung kô dik u lé wut é

^{*} **6:13** Chyúmlaiká ra-am má, shí túm a bo é nghut lhê.

mebu lhang, ban haû rabó lé a hkyit nghut ri. ³⁰ Lumjîng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haû su kut hut é nghut le gi, nungmoq lé je riyhang hut râ a nghut kó lhú? ³¹ Haû mù, 'Haî zo râ lhi?' 'Haî shuq râ lhi?' 'Haî wut râ lhi?' nghû hkâ-myit chiq myhîng kó. ³² Tungbaù pé kúm gi, haû pé banshoq lé châng hkat ho nyi akô; nghut kôlhang, mauhkûng htoq mâ é nungmoq é Îwa gi, haû pé lé nungmoq râ é hkyô, sé byî nyi lhê. ³³ Nghut kôlhang, Yhâng é mingdán eq dingmán hkyô lé hí hô keq, haû jâng, haû pé banshoq, nungmoq lé puq byi râ nghut lhê. ³⁴ Haû mù, napmá lhê é matú hkâ-myit chiq kó; hkâsu mù gâ le, napmá gi, yhâng é yhang myit chiq râ nghut lhê. Hkû-nyí é wuîhke hkyô gi, hkû-nyí é matú gé bê nghut ri.

7

A Jéyáng Râ Hkyô *Luk 6:37-38, 41-42*

¹ Nungmoq jéyáng é a hui kó sháng gaq, ó lé le, hkâjéyáng kó. ² Hkâsu mù gâ le, nungmoq jéyáng é su, nungmoq le, jéyáng é hui kó râ nghut é htoq agó, nungmoq lik byî é bung èq, nungmoq lé dum lik byi râ nghut lhê.

³ Yhumsing myoq hkaû má lúng tô é siktúm lé lhang a myit wú é nhîng, haî mù luî, nunggu nungmâng é myoqwàng lé myang lhê lhú? ⁴ Yhumsing é myoq má siktúm lhûng to luî nhîng, 'Náng myoq má lúng tô é myoqwàng lé, ngò choq pyám byi lé.' nghû luî, náng é gumang hpó lé hkâsu wó tai râ lhú? ⁵ Gegùn labyoq kut sù ê, náng é myoq má lúng tô é siktúm lé hí choq pyám aq. Haû jâng sheq, nunggu nungmâng é myoq má wang tô é myoqwàng choq pyám byi râ matú, nàng san za myàng râ nghut lhê.

⁶ Hkuî pé lé, yunglhô é zê hkâbyi kó; waq pé hí má, nungmoq é palhé

wuizo lé hkâdú byi kó. Haû su kut jâng, haû bang gi, zè haû pé lé nâng pyeq pyám mù, nungmoq lé dum taû ngat lò râ nghut lhê.

Dung Keq, Hô Keq, Hkum Má Kok Keq

Luk 11:9-13

⁷ Dung keq, haû jâng, nungmoq lé byi râ nghut lhê; hô keq, haû jâng, nungmoq myàng kó râ nghut lhê; hkum má kok keq, haû jâng, nungmoq lé hpóng byi râ nghut lhê.

⁸ Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

⁹ Nungmoq má, ó yuq wá, yhumsing yhangzo muk dúng le, luqgok byi kó râ lhú? ¹⁰ Ngozo dúng le, lhangmuî* byi kó râ lhú? ¹¹ Agè ashop é bang nungmoq lhang gi, nungmoq é zo wuîlé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é Îwa gi, Yhang lé dúng é bang lé, je riyhang ge é chyunghuq byi râ nghut lhê! ¹² Haû mù, hai hkyô má nghut kôlhang, nungmoq gi, yhumsing ô nau é dông supé lé kut nhâng nau é su, yhangmoq lé le kut byi keq. Haî mù gâ le, haû gi, jep é tarâ eq myiqhtoî pê é dang lo jup tô é nghut ri.

Chyap É Hkúmdong Eq Lam É Hkúmdong

Luk 13:24

¹³ Chyap é hkúmdong mai wàng keq. Hkâsu mù gâ le, lam é hkúmdong eq hkyô mó gi, htên byoq hkyô shut shuí e é nghut mù luî, haû dông wàng bang gi, myô akô nghut ri. ¹⁴ Chyap é hkúmdong eq hkyô zo kúm gi, asak hkyô shut shuí e é nghut mù luî, haû lé myang ho é bang gi, shaû akô nghut ri.

Agàm Eq Ashi

Luk 6:43-45

¹⁵ Nungmoq chyáng jé lé lo é myiqhtoî pyoq pé lé, sidiq nyi keq; yhangmoq gi, sau-kuq wut mù, nungmoq chyáng jé lé kôlhang, myaq zo myaq

* **7:10** Garai Gasang gi, lhangmuî a zo râ matú, Yudaq byu pé lé hkunmó hkyô tô é nghut lhê.

shuq nau é wamhkuî pé nghut akô.
¹⁶ Yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê. Zubypap mai tsibiyiq shi, zugâm mai maihpáng-shi wó yu wú akô lhú? ¹⁷ Ge é agàm gi, ge é ashi zui mù, a ge é agàm gi, a ge é ashi za dat zui ri. ¹⁸ Ge é agàm gi, a ge é ashi a wó zui, a ge é agàm le, ge é ashi a wó zui nghut ri. ¹⁹ Ge é ashi a zuí é shigâm hkanmó lé gi, htuq pyám mù, myi má dú kat pyám râ nghut lhê. ²⁰ Haú mù, yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê.

²¹ Ngo lé, 'Yhumsîng ê, Yhumsîng ê,' ga, wut é bang yuq hkanmó gi, mauhkûng mingdân má myang wàng kó râ a nghut; haú mauhkûng htoq mâ é Ngá Wa ô nau é dông kut sù za sheq, myang wàng râ nghut lhê. ²² Haú buinyi má, byù myo myo gi, 'Yhumsîng ê, Yhumsîng ê, Náng é myîng mai, ngamoq gi, myiqhtoi le htoi bê; nat gang lé hkat htoq bê; laklaí kumlhá ajung jung lé, kut bê a nghut lhú?' ga luí, Ngo lé myi kó râ nghut lhê. ²³ Haú hkûn, Ngò gi, 'Nungmoq lé, Ngò hkâ-nhám le a sé; agè ashop hkyô kut é bang nungmoq, Ngá chyáng mai gâng ló byuq keq.' nghú, yhangmoq lé san za tû taí kat râ nghut lhê.

Hpaqchyí Bò Sù Eq Ngok Sù

Luk 6:47-49

²⁴ Haú mù, Ngá é dang shí pé lé wó gyô yù luí, châng kut é sù gi, hpaqchyí bò mù, lunghtân htoq má, yhûm saí é sù eq wuí nyi ri. ²⁵ Mau wô, wuî je, laidun lò mù, yhûm haú lé lo htung kôlhang, yhûm haú gi, a htên byoq byuq râ nghut lhê; hkâsu mù gâ le, yhûm haú gi, lunghtân htoq má tsuq tô é yanmai nghut ri. ²⁶ Nghut kôlhang, Ngá é dang lé, wó gyô yù mù, a cháng sù gi, semuí-jàng má, yhûm saí é byù ngok eq wuí nyi râ nghut lhê. ²⁷ Mau wô, wuî je, laidun wò yup dut lò mù, yhûm haú lé lo htung jàng, yù whuí a mù loshoq htên byoq byuq râ nghut lhê." gâ ri.

²⁸ Yesuq mungdang ban taí é hkûn, shiwa byu pé gi, Yhang mhoqshit é hkyô lé maúhong bum akô; ²⁹ hkâsu mù gâ le, Yhang gi, yhangmoq é tarâ sará pé eq a pung é za, ahkáng ayá wó sù rayuq su, mhoqshit é yanmai nghut ri.

8

Manggâm Dap É Byù Rayuq

Mrk 1:40-45; Luk 5:12-16

¹ Yesuq gi, bùm htoq mai gyó lo é hkûn, byù moq mó gi, Yhâng htâng châng bum akô nghut ri. ² Haú hkûn, manggâm dap é byù rayuq gi, Yhâng é hí má, lé mù, hkyihput htuq luí, "Yhumsîng ê, Nàng dông é nghut le gi, ngo lé Nàng wó lhoq sân-yúng byi râ nghut lhê." ga taí ri.

³ Yesuq gi, loq lhâm kat mù, haú yuq lé é záng luí, "Ngò dông lhê, sân-yúng aq hkoi." ga taí kat ri. Haú hkûn jàng, haú yuq é manggâm gi, ge byuq bê nghut ri. ⁴ Haú hkûn, Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tûn shit mù, yhangmoq é matú saksé dut sháng gaq, Mosheq taí tô é eq rajung za, hkungga ló nhông byi aq." ga haú yuq lé taí kat ri.

Gyezau Hpô É Lumjîng Myit

Luk 7:1-10; Yhn 4:43-54

⁵ Yesuq, Kaperna-um wà má wang e ló le, Romaq gyezau hpô rayuq gi, Yhâng chyáng lé jé mù, ⁶ "Yhumsîng ê, ngá é dui-nhâng zoshâng gi, gùngjum shi é htoq agó, yhûm má gyaí no jam-jaû leq tô ri." ga garúm lé dung ri.

⁷ Haú hkûn, Yesuq gi, yhang lé, "Ngò, lé lhoq gê byi râ." ga taí kat ri.

⁸ Gyezau hpô haú, Yhang lé dum tû taí é gi, "Yhumsîng ê, Nàng, ngá é laishîn-htâng má, lé nang râ lhang ngò má a gingdân. Nàng, dang rahkun za taí kat laq; haú hkûn, ngá é dui-nhâng zoshâng ge ló râ nghut lhê. ⁹ Hkâsu mù gâ le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê; rayuq lé, 'Ê

aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jûn lé le, 'Shî kut aq!' nghu le, yhang kut lhê." gâ ri.

¹⁰ Yesuq gi, dang haú lé wó gyo jáng, maú byuq luí, Yhâng htâng cháng bang lé, "Ngò, nungmoq lé teng za taí kôlé, Israelaq amyû má lháng, shî í lumjín é sù lé, Ngò, rayuq lé le a myàng wú é nghut lhê. ¹¹ Ngò, nungmoq lé taí kôlé, buihtoq buiwàng hkyam má é byu pé myo myo gi, mauhkûng mingdán má, Abraham, Isak, Yakup pé eq rahá, zoshuq poi mó má myang zùng kó râ nghut lhê. ¹² Nghut kôlhang, mingdán haú má wàng âng é bang kúm gi, shinggan mauchut hkaú shut dú pyâm é hui luí, haú jowò má ngaubyi ngaù nhap eq zuí kyik kyik shoq hpuzô nyi bùm bekô râ nghut lhê." ga taí ri.

¹³ Hau htâng, Yesuq gi, gyezau lé, "Ló aq hkoi! Nàng lumjín é eq rajung za, dut râ nghut lhê." ga taí ri. Haú-u má yhang, haú dui-nhâng zoshâng gi, ge byuq bê nghut ri.

Byù Myo Myo Lé Lhoq Gê Byî É Hkyô

Mrk 1:29-34; Luk 4:38-41

¹⁴ Yesuq gi, Petruq é yhûm má jé wang e é hkûn, Petruq é yhâng-aumó gyai yhang no leq tô é lé, é myang ri. ¹⁵ Yesuq gi, yhâng é loq má é záng kat é hkûn, Petruq yhâng-aumó gi, nõhpyo ge byuq mù, toq luí, Yhang lé wó gaí tso gaí huq bê nghut ri.

¹⁶ Myinhâng mauchut lô jáng, nat gang wang júng nyi é bang myo myo lé, Yhâng chyáng shuî lé lo akô. Yhang gi, agè ashop é nat gâng pé lé dâng eq hkat htoq pyám mù, nõhpyo huí é bang banshoq lé lhoq gê byî ri. ¹⁷ Haú gi,

"Yhang gi, nga-nhûng é noli nojàng lé yu pyám byi mù, nga-nhûng é noli nojàng lé, wùn waq pyám byi bê nghut ri."☆

ga, myiqhtoi Esai-aq taí tô é dang lhoq dik râ matú nghut ri.

Yesuq Htâng Cháng Râ Bang

Luk 9:57-62

¹⁸ Yesuq gi, Yhâng é lhîngkhyuq má byù moq mó zup míng nyi é lé myàng jáng, Yhâng é chángzô pé lé, nhông hé hpoq shut gû dap ê sháng gâ ri. ¹⁹ Haú hkûn, tará sará rayuq gi, lé lô mù, "Sarâ ê, ngò gi, Nàng hká e le hká cháng râ nghut lhê." ga Yhang lé lé taí ri.

²⁰ Haú jáng, Yesuq gi, "Wamhkuí pé gi, hkyûng wó akô; nghoq pé le, nghoqsut wó akô. Nghut kôlhang, haú Byu Yhangzo gi, u nghê jowò lháng a wó nghut ri." ga lhom taí kat ri.

²¹ Haú hkûn, chángzo rayuq gi, "Yhumsîng ê, ngá wa lé ló yhûm pyám râ ahkáng hí byi shilaq." ga taí kat ri.

²² Nghut kôlhang, Yesuq gi, "Shî bê bang gi, shî bê bang yhangchang yhûm lhum kó sháng gaq, nàng gi, Ngá htâng cháng aq." ga dum taú taí ri.

Laidun Lhoq Zîm É Hkyô

Mrk 4:35-41; Luk 8:22-25

²³ Hau htâng, Yesuq lhai hkaú má wàng mù, Yhâng é chángzô pé le, Yhâng htâng châng wàng bekô nghut ri. ²⁴ Haú hkûn, nhông má byodantik laidun mó lò mù, wuìlhêng pé gi, lhai má bat ùm lò bê nghut ri. Nghut kôlhang, Yesuq gi, yhup myhî tô ri. ²⁵ Chángzô pé gi, Yhâng chyáng jé ê mù, Yhang lé nhaú pun luí, "Yhumsîng ê, hkyi yù laq ô! Nga-nhúng myup ló nyi ri." ga taí akô.

²⁶ Yhang gi, "Lumjín myit shaú é bang ê! Haí mù, haú-í gyuq bum akô lhú?" ga taí kat ri. Hau htâng, Yhang gi, toq luí, laidun eq wuìlhêng pé lé tân kat jáng, banshoq zîm byuq bê nghut ri.

²⁷ Byù haú bang gi, maúhong byuq kômù, "Shí yuq gi, hkasû é byù lhà? Lai eq wuìlhêng pé lháng gi, Yhâng é dang lé gyo byî ri myhi-nhung!" ga luí, rayuq eq rayuq myî lhûm bum akô nghut ri.

Nat Wang Júng Su Nhik Lé, Lhoq Gê Byî É Hkyô

Mrk 5:1-20; Luk 8:26-39

☆ 8:17 Esai 53:4

28 Yesuq gi, Gadara byu pê é mau hpoq má jé dap ló jáng, nat gang wang júng é byù í yuq gi, lupdùng mai htoq lé lo kômù, Yhang lé lé huí akô. Haú nhik gi, haú hkyô mai ó lhang a wám lai loshoq wuî é su nhik nghut akô. 29 Yhangnhik gi, Yesuq lé, "Garai Yhangzo ê, Nang, ngamoq eq haî sêng lê lú? Ahkyíng a jé shimá, ngamoq lé zing-ri rá matú jé lé lo é nghut lê lú?" ga taî garú akô.

30 Haú mai a lûm wê é jowò má, waq rajùm mó gi, myì dù but zô nyi bum akô nghut ri. 31 Nat gâng pé gi, Yesuq lé, "Nang, ngamoq lé hkat htoq rá nghut jáng, hê waq pê chyáng wàng nhâng laq." ga dúng akô.

32 Yesuq gi, "Htoq ló keq!" ga taî kat ri. Haú mù, yhangmoq gi, htoq ló luí, waq pê chyáng wàng mù, waq haú jûm gi, gampyoq mai nhông hkaú shut din yán wang ló kôluí, wuî hkaú má myup shi byuq bekô nghut ri. 33 Waq zúng bang gi, myuq hkaú shut hpang din wang ló kômù, dut lai lo é hkyô banshoq lé le, nat gang wang júng huí su nhik hkâsu dut é hkyô lé le, ló taî kyo akô nghut ri. 34 Haú mù, rawa bang gi, Yesuq lé hui rá matú htoq lé lo bùm kômù, Yhang lé myàng jáng, yhangmoq é mau mai htoq ló byuq rá matú, chôm dúng tôngbán akô nghut ri.

9

Gungjum Shî Sû Lé Lhoq Gê Byî É Hkyô

Mrk 2:1-12; Luk 5:17-26

1 Yesuq gi, lhai má wàng mù, yhum-sing é wà shut jî dap ló bê nghut ri. 2 Byù ra-am gi, gùngjum shî sù rayuq lé, taphkang mai Yhâng chyáng waq lé lo akô. Yesuq gi, yhangmoq é lumjîng myit lé byu-myàng jáng, haú gùngjum shî sù lé, "Ngá zo ê, nhikhkâ-ngê; náng é yubak mara lé hkyut pyám byi bê." ga taî ri.

3 Haú hkûn, tarâ sará pé ra-am gi, yhangmoq é i-myit hkaú má, "Byù shí

yuq gi, Garai Gasang lé rhoî dang taî nyi ri." ga myit nyi bum akô nghut ri.

4 Yesuq gi, yhangmoq myit nyi é hkyô lé sé mù, "Nungmoq é i-myit hkaú má, haú su agè ashop é dông haî mù myit nyi akô lú? 5 'Náng é yubak mara lé hkyut pyám byi bê.' nghû taî rá eq 'Toq luí, hkyô so aq.' nghû taî rá má, hká hkun je taî lui lê lú? 6 Nghut kôlhang, haú Byu Yhangzo gi, mingkan htoq má, mara hkyut byi rá ahkáng wó Sû nghut é lé, nungmoq lé sé nhâng nau lê." ga taî luí, haú gùngjum shî sù lé, "Toq aq, náng é taphkang yu chùng luí, yhûm taú ló aq hkoî." ga taî kat ri. 7 Haú mù, haú yuq gi, toq mù, yhûm shut ló byuq bê nghut ri. 8 Byù hpûng mó gi, haú hkyô lé myàng kôjáng, gyuq maú kômù, byu pé lé haú su é ahkáng ayá byi tô é Garai Gasang lé hkya-on kungton bum akô nghut ri.

Mahte lé shû yu é hkyô

Mrk 2:13-17; Luk 5:27-32

9 Yesuq gi, haú jowò mai sô e ló é hkûn, kang guq zúm má zung tô é Mahte ga sù lé myàng mù, "Ngá htâng cháng aq." ga taî jáng, haú yuq gi, toq luí, Yhâng htâng cháng bê nghut ri.

10 Yesuq gi, Mahte é yhûm má my-inzang zô nyi é hkûn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô.

11 Haú lé, Hparishe pé myàng kôjáng, Yhâng é chángzô pé lé, "Nungmoq é sará gi, haî mù luí, kang guq bang eq yubak dap bang eq rahá zo shuq nyi lê lú?" ga myî akô.

12 Yesuq gi, haú su ga kô é lé wó gyo jáng, "Wángzán bang gi, chi sará a ra kó; nõhpyo hui bang za sheq ru rá lê. 13 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lê.'* gâ é lichyúm lé mhoq yú keq. Hkâsu mù gâ le, Ngò gi, dingmán bang lé wut yù rá matú jé lé é a nghut, yubak dap bang lé jì yù rá matú sheq jé lé é ru nghut lê." ga taî kat ri.

* 9:13 Hos 6:6

Zoshuq Gám É Eq Sêng É Hkyô
Mrk 2:18-22; Luk 5:33-39

¹⁴ Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lhê; nghut kôle, Náng é chángzô pé gi, haí mù a gám kô é lhú?" ga luí, lé myí akô.

¹⁵ Haú mù, Yesuq tû taí é gi, "Bíng pé gi, lusik eq rahá nghut nyi to ashí hkûn, hkâsu ge yón kó rá lhú? Lusik lé, yhangmoq chyáng mai shuí yu pyâm é hkyíng jé rá nghut lhê; haú hkûn kúm gi, yhangmoq zoshuq gám kó rá nghut lhê.

¹⁶ Ó yuq le, mebu xau má pán sik èq a lhaq hpo wú kó; hkâsu mù gà le, pán sik kun byuq jáng, mebu xau le je lhoq cheq pyám rá nghut lhê. ¹⁷ Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik soq htân luí, htûng buq goq byuq mù, tsibiyiq wing le yui shun byuq, htûng le htên byuq, dut rá nghut lhê. Haú mù, tsibiyiq wing asik lé, shokuq htûng sik má kat jáng sheq, haú íjûng é a hten rá nghut lhê." gà ri.

Shí Bê Myiwe Zo Eq No É Myiwe Myhí

Mrk 5:21-43; Luk 8:40-56

¹⁸ Yesuq haú su ga taí nyi é hkûn, suwún rayuq jé lé lô mù, Yhâng é hí má hkyihput htuq luí, "Ngá zo byizo gi, ahkuí za shí byuq bê. Nghut kôlhang, Náng lé mù, yhâng é ahtoq má loq lé ke byi laq, haú jáng, yhang, asak dum dui lò rá nghut lhê." ga taí ri. ¹⁹ Yesuq gi, toq mù, Yhâng é chángzô pé eq rahá, haú yuq htâng châng e lô akô.

²⁰ Haú hkûn, raxe í zân yhang, suí yui nyi é myiwe myhí rayuq gi, Yhâng é nunghtáng má huí lé mù, Yhâng é bushi htâng má ê záng kat ri. ²¹ Myiwe myhí haú gi, yhang gûng yhang, "Ngò, Yhâng é buhtáng má ê wó záng jáng gi, ge byuq rá nghut lhê." ga, wó myit é yanmai nghut ri.

²² Yesuq gi, lhing wú kat luí, yhang lé myàng jáng, "Ngá zo ê, nhik hkângê, náng é lumjíng myit gi, nang lé

lhoq gê byi bê nghut ri." ga taí ri. Haú hkûn jáng yhang, myiwe myhí haú gi, ge byuq bê nghut ri.

²³ Yesuq gi, suwún hpô é yhûm má jé wang lô é hkûn, sampyí mut bang eq garu garín dut nyi é bang lé, ê myâng mù, ²⁴ yhangmoq lé, "Húi keq. Myiwe zo gi, shí byuq é a nghut, yhup myhí tô é sheq ru nghut lhê." ga taí jáng, yhangmoq gi, Yhang lé wuizui kut pyám byí akô. ²⁵ Yesuq gi, byù hpûng lé, shinggan shut htoq lô nhâng mù, Yhang wang ê luí, myiwe zo haú lé loq èq zuí kat jáng, myiwe zo haú gi, dum dui toq lo ri. ²⁶ Haú hkyo é danglù gi, ramau gón yhang jam lô byuq bê nghut ri.

Myoqjit Í Yuq Eq Nhut Jit Sû Rayuq Lé, Lhoq Gê Byí É Hkyô

²⁷ Yesuq gi, haú jowò mai xoq e lô nyi le, Yhâng é htâng má, myoqjit í yuq gi, châng dìn uchyang, "Dawiq é Yhangzo ê, ngá-nhik lé shogyô yù laq ô!" ga wut taí akô.

²⁸ Yesuq gi, yhúmhaú má jé wang lô é hkûn, myoqjit su nhik châng wang lò kômù, haú nhik lé, "Ngò wó kut byí é lé, nungnhik lumjíng akô luq?" ga myí ri.

Haú hkûn, yhangnhik gi, "Lumjíng lhê ô, Yhumsíng ê." ga tû taí akô.

²⁹ Hau htâng, Yhang gi, haú nhik é myoqjí má ê záng htung luí, "Nungnhik lumjíng é eq rajung za dut sháng gaq." ga taí ri. ³⁰ Haú mù, yhangnhik gi, myoq wó myâng bekô nghut ri. Yesuq gi, "Shí hkyô, ó lé le hkâsé nhâng kó." ga, yhangnhik lé htân htân sidiq byí ri. ³¹ Nghut kôlhang, yhangnhik gi, haú hkyô lé, haú mau ramau gón yhang taí pyo lô bekô nghut ri.

³² Haú nhik htoq lô nyí kô é hkûn, nat gang wang júng luí, dang a wó nyô sù rayuq lé, Yesuq chyáng shuí lé lo akô. ³³ Nat gang lé hkat htoq pyâm é hkûn, nhutjit sù haú gi, dang wó nyô bê nghut ri. Byù hpûng mó gi, haú lé wú maú byuq kômù, "Shí su dut é hkyô lé, Israellaq amyû má radàm lháng a myang wú." ga taí bum akô.

³⁴ Nghut kôlhang, Hparishe pé kúm gi, "Nat gâng pé é zaû é wum-o a-tsam eq za, nat gâng pé lé hkat htoq pyâm é nghut ri." ga taí bum akô nghut ri.

Mû Zui Byù Shaû Ri

³⁵ Yesuq gi, myuq pé eq wà pé banshoq má wàng luí, haú pé má é tarajong pé má mhoqshit é eq, mauhkûng mingdán hkyô eq sêng é gabú danglù lé hko kyo uchyang, nõhpyo ajung jung eq noli nojàng hui bang yuq hkanmó lé, lhoq gê byi wún ri. ³⁶ Yesuq gi, byù moq mó lé myàng jáng, wú shogyô nyi ri. Hkâsu mù gâ le, yhangmoq gi, sau zúng sù a nyi é sau pé su, awui ahke dut é eq byo myín bùm kô é yanmai nghut ri. ³⁷ Haú mù, Yhang gi, Yhâng é chángzô pé lé, "Kyôshû yù râ myo shoq joq kôlhang, mù zui râ byù gi, shaû nyi ri. ³⁸ Haú mù, haú kyô Yhumsîng lé, Yhâng é kyô yô má, kyô shu byù myo myo nhâng byi râ matú, dung keq." ga taí ri.

10

Raxe Í Yuq Lé Nhang Htoq Kat É Hkyô

Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17

¹ Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq râ eq, noli nojàng eq nõhpyo ajung jung lé wó lhoq gê râ ahko ahkáng yhangmoq lé byi ri.

² Haú lagyo raxe í yuq é myìng gi, (Petruq ga sù) Simun eq yhanggu Andre; Zebedi é yhangzô nhiktang Yakuq eq yhanggu Yohan; ³ Hpilip eq Barhtolome; Htomaq eq kang guq sù Mahte; Alhpe é yhangzo Yakuq, Htade, ⁴ Zelutuq* dut é Simun eq, Yesuq lé ap pyám râ sù, Yudaq Iskarut pé nghut akô.

⁵ Yesuq gi, haú bang raxe í yuq lé dangsâng mù, nhang htoq kat ri. Yhang sang kat é dang gi, "Tûngbaù pé

chyáng le hkâ-ê kó; Samariq wà rawà má le hkâwâng kó. ⁶ Haú byuq byuq é sau pé su nghut nyi é Israelaq byu pé chyáng sheq é keq. ⁷ Nungmoq gi, è mù, 'Mauhkûng mingdán gi, chyâng lò bê nghut ri.' nghu é danglù lé hko kyo keq. ⁸ Nò bang lé lhoq gê byi, shî bê bang lé lhoq dui toq, manggâm dap bang lé lhoq san lhoq yúng byi, nat gâng pé lé hkat htoq pyám, kut keq. Laí laí wó é lé, laí laí byi keq. ⁹ Nungmoq é hpyihit má, hîng, ngùn eq gyi pé hkâkat chûng kó; ¹⁰ hkyowui é matú, etap, mebu htaí, hkyî-tsung eq dumbáng pé hkâyü chûng kó; hkâsu mù gâ le, mù zui sù gi, zoshuq wó gíng lhê.

¹¹ Hká wâ hká dum má jé wang ló le le, haú mâ é gingdán é byù lé hô mù, haú mai htoq ló é hkûn jé shoq, haú yuq é yhûm má za nyi nyi keq. ¹² Haú yhûm má wang é hkûn, shichyên yù keq. ¹³ Haú yhûm gi, gingdán é nghut jáng, nungmoq shimân byi é hkyô, yhangmoq chyáng joq nyi sháng gaq; a gingdán é nghut jáng, nungmoq chyáng dum taù lò sháng gaq. ¹⁴ Nungmoq lé a lhom hap yu é eq nungmoq é dang lé a lhom gyo byi kô é nghut jáng, haú yhûm haú wâ mai htoq ló é hkûn, nungmoq é hkyiwa má dap é hpuilhaù lé ko hkyô pyâm to keq. ¹⁵ Ngò, nungmoq lé teng za taí kôlé, tarâ jéyáng é buinyi má, haú wâ gi, Sodom eq Gomoraq myuq htoq má je hpuzo râ nghut lhê. ¹⁶ Wamhkui hpúng má nhang hâng kat é sau pé lé su, Ngò, nungmoq lé nhang kat é nghut lhê. Haú mù, lhangmuì su hpaqchyî bò luí, hpûngkyui su nú-nhâm nyi keq.

¹⁷ Byu pé lé sidiq keq; hkâsu mù gâ le, yhangmoq gi, nungmoq lé, tarâ rûng pé má ê ap pyám kó râ nghut é htoq agó, yhangmoq é tarajong pé má, nungmoq lé nhuq bat kó râ nghut lhê. ¹⁸ Nungmoq gi, Ngá é yanmai, mauzau wuì eq hkohkam pé é hí má shuì jé é hui luí, yhang-

* **10:4** Zelutuq gâ é lichyúm gi, yhumsîng zui saí é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

moq é hí má le, tûngbaù pê é hí má le, saksé myang hkám kó râ nghut lhê. ¹⁹ Nghut kôlhang, nungmoq lé ap pyám kô é hkûn, nungmoq hkâsu taí râ eq haí taí râ lé, hkâ-myit chiq kó. Haú hkûn taí râ dang, nungmoq wó kó râ nghut lhê. ²⁰ Hkâsu mù gâ le, haú gi, nungmoq é dang a nghut, nungmoq é Yhângwâ é Woi-nyí sheq, nungmoq dông taí râ ru nghut lhê.

²¹ Nhiktâng gi, nhiktâng yhangchang, îwa gi, yhangzo lé, shî shoq ap pyâm lhum kó râ nghut lhê; zo wuí gi, mó wuí lé gumlau toq mù, sat pyám nhâng kó râ nghut lhê. ²² Byù lhunglhang bang gi, Ngá é yanmai, nungmoq lé a nguì kut kó râ nghut lhê; nghut kôlhang, jihtûm jé shoq wó hkam jân nyí é sù gi, hkyi yu é hui râ nghut lhê. ²³ Rawò má zing-ri é hui jáng, rawò shut hpang ê keq. Ngò, nungmoq lé teng za taí kôlé, Israelaq byu pê é myuq pé má, nungmoq a ban wang ngap shimá, haú Byu Yhangzo jé râ nghut lhê.

²⁴ Jongzo gi, sará htoq, dui-nhâng zoshâng gi, yhumsing htoq, gyaú rá a nghut. ²⁵ Jongzo gi, yhâng é sará su, dui-nhâng zoshâng gi, yhâng é yhumsing su, wó dut jáng gé bê. Yhumsing hpó lé lhang Bezebulaq† ga kô le gi, Yhâng é yhumbyù wuí lé gi, je riyhang nghû kó râ a nghut l hú?

²⁶ Haú mù, yhangmoq lé hkâgyuq kó. A byông htoq loshoq wó zaú nghop tô é haí le a joq râ nghut lhê; a sé loshoq wó haq tô é le, haí a joq râ nghut lhê. ²⁷ Ngò, nungmoq lé mauchut hkaú má taí é hkyô lé, myoq myàng maubó má taí kyo keq; Ngò, nungmoq lé dangsoq soq kyo é hkyô lé, yhumhkûng htoq mai taí pyô keq. ²⁸ Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraí ming má wó lhoq htên é Sù lé sheq, gyuq nyí keq. ²⁹ Johkyáng í du lé, gyi htingchap rachap èq wó ùng pyâm lhê

a nghut kó l hú? Nghut kôlhang, haú radu lhang, nungmoq é Íwâ é myit èq a nghut jáng, myigùng má wó byit gyó râ a nghut. ³⁰ Nungmoq é ulhum mâ é xâm banshoq lé lhang, nghap to gù nghut lhê. ³¹ Haú mù, hkâgyuq kó; nungmoq gi, haú johkyáng myo myô htoq má lhang gù je bo é bang nghut lhê.

³² Byu pê hí má, Ngo lé lhom yín yu é sù ó yuq lé nghut kôle, mauhkûng htoq mâ é Ngá Wâ é hí má, Ngò lhom yín yù râ nghut lhê. ³³ Byu pê é hí má, Ngo le he-ngik pyâm é sù ó yuq lé nghut kôle, mauhkûng htoq mâ é Ngá Wâ é hí má, Ngò he-ngik pyám râ nghut lhê.

³⁴ Ngo lé, haú myidàm htoq má simsaq hkyô byi râ matú lé lo é sù su hkângâm kó. Ngò gi, simsaq hkyô byi râ matú lé lo é a nghut, shâm byi râ matú sheq lé lo é ru nghut lhê.‡ ³⁵ Hkâsu mù gâ le,

'Yuqzo gi, yhângwa eq, byizo gi, yhângnu eq, dumó gi, yhângmhoí eq, byoq lhum kó râ nghut lhê.

³⁶ Yhumsing é yhumbyù wuí gi, yhumsing é gye taù dut râ nghut lhê.✧

gâ tô é matú sheq, Ngò jé lé é ru nghut lhê.

³⁷ Ngo lé chyt é htoq yhumsing é înu îwa lé je chyt é sù ó yuq nghut kôle, Ngá é chángzo kut râ gingdán sù a nghut; Ngo lé chyt é htoq yhumsing é zo wuí lé je chyt é sù ó yuq nghut kôle, Ngá é chángzo kut râ gingdán sù a nghut; ³⁸ Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo kut râ gingdán sù a nghut. ³⁹ Yhumsing é asak lé ha bûn é sù ó yuq nghut kôle, asak sum râ nghut lhê; Ngá é yanmai, yhumsing é asak sùm pyâm é sù ó yuq nghut kôle, asak wó râ nghut lhê.

⁴⁰ Nungmoq lé hap yù sù gi, Ngo lé hap yu é sù nghut bê; Ngo lé hap

† 10:25 Bezebulaq gâ é gi, Tsadán é myíng raja nghut lhê. ‡ 10:34 Yesuq gi, simsaq hkyô byi sù nghut lhê. Nghut kôlhang, Yhang é yanmai, byu pé mabyoq htoq râ nghut é hkyô lé sé mù, haú su ga taí é nghut lhê. ✧ 10:36 Mihka 7:6

yù sù gi, haù Ngo lé nhang kat Sù lé hap yu é sù nghut bê. ⁴¹ Myiqhtoi rayuq lé, myiqhtoi dông lhom hap yu é sù ó yuq nghut kôle, myiqhtoi rayuq é chyunghuq lé wó yù râ nghut lhê; dingmán sù rayuq lé, dingmán sù dông lhom hap yu é sù ó yuq nghut kôle, dingmán sù rayuq é chyunghuq lé wó yù râ nghut lhê. ⁴² Shí, tiq bang mâ é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taí kôlé, yhâng é chyunghuq lé hkyak myang hkam yù râ za nghut lhê." gâ ri.

11

Yesuq Eq Wui-myhup Sará Yohan Luk 7:18-35

¹ Yesuq gi, Yhâng é chángzo raxe í yuq lé dang ban pying é htâng má, Galile mau mâ é wà pé má mhoqshit rá matú eq hko kyo rá matú, haù jowò mai htoq e ló bê nghut ri.

² Wui-myhup Sará Yohan gi, Hkrisduq kut nyí é hkyô lé, htóng hkaú má wó gyo jáng, ³ "Nàng gi, haù jé lé lô râ Sù nghut lhê lhú? Haù a nghut jáng, ngamoq gi, góyuq lé lánng ra shirâ lhú?" ga, yhâng é chángzô pé lé myí nhang kat ri.

⁴ Yesuq tâi é gi, "Nungmoq wó gyo wó myang é hkyô, Yohan lé ló tâi kyo keq; ⁵ myoqjit bang, myoq wó myâng bekô; hkyî hten bang le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyí bê nghut lhê. ⁶ Ngá é yanmai, Ngo lé lum shut é hkyô a bò sù gi, hkungsô wó nyí ri." ga tâi ri.

⁷ Yohan é chángzô pé taù ló kô é u lé, Yohan eq séng luí, byù moq mó lé Yesuq tâi é gi; "Nungmoq gi, haì lé hpuq wú râ matú, haù yoso shut e akô lhú? Laì eq hik nhùn é jamgàm lé wú râ matú nghut akô lhú? ⁸ Haù a nghut jáng, haì lé wú râ matú e akô

lhú? Nú-nhâm é mebu wut sù lé wú râ matú e akô lhú? A nghut. Nú-nhâm é mebu wut bang gi, hkohkâm-wâng pé má sheq rù nyí lhê. ⁹ Haù nghut lé gi, haì lé wú râ matú ê kô é lhú? Myiqhtoi rayuq lé lhú? Haù kúm nghut ri; Ngò, nungmoq lé taí kôlé, Yohan gi, myiqhtoi htoq lánng gyaú sù nghut lhê. ¹⁰ Haù yuq é hkyô lé, Chyúmdang má kâ tô é gi,

'Wú aq, Náng é hkyô lajang lánng rá matú, Ngá é lagyo lé, Náng é hí má Ngò nhang kat râ nghut lhê.'*

gâ ri. ¹¹ Ngò, nungmoq lé teng za taí kôlé, myiwe wui mai hku kat é bang má, Wui-myhup Sará Yohan htoq je kô é rayuq lánng a htoq wú shí; nghut kôlhang, Garai Gasâng é mauhkung mingdán má je tiq dik sù gi, Yohan htoq je kô lhê. ¹² Wui-myhup Sará Yohan é buinyí mai ahkuí jé shoq, mauhkung mingdán gi, lú chyín wang nyí é hui mù, sarhé pé gi, haù lé wó yù bekô nghut ri. ¹³ Hkâsu mù gâ le, Yohan é ahkyíng jé shoq, haù myiqhtoi pé banshoq eq tarâ gi, haù hkyô eq séng luí, myiqhtoi htoi to gù nghut lhê. ¹⁴ Nungmoq hap yù nau é nghut jáng, Yohan gi, haù jé lé lô râ ga sù Eliyaq nghut lhê.* ¹⁵ Gyô yù râ nohkyap dap sù gi, gyô yù sháng gaq.

¹⁶ Shí ipyat lhê é byu pé lé, Ngò, hai eq tâi kê wú râ lhú? ¹⁷ Yhangmoq gi, 'Nungmoq é matú, ngamoq sampyí mut byi kôlhang, nungmoq gi, a gó kó;

ngamoq, ngaù hkyangsâng kôlhang, nungmoq gi, a ngaù kó.'

ga luí, gài pé má zùng mù, góbang lé wut tâi lhùm nyí é zoshâng wui eq wui akô. ¹⁸ Hkâsu mù gâ le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga tâi akô. ¹⁹ Haù Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum tâi akô. Nghut kôlhang,

* 11:10 Mal 3:1 * 11:14 Mal 4:5

hpaqchyî byéng-yá gi, yhang é muzó eq saksé tân shit nyi ri." gâ ri.

Myit A Lhing É Wà Mó Pê Hkyô

Luk 10:13-15

²⁰ Hau htâng, Yesuq gi, laklai kumhá pé je myo kut shit bê nghut kôlhang, myit a lhing é myuq pé lé tân é gi, ²¹ "Kurazin và mó ê! Nàng dینگnyé wó ri! Bet-saida và mó ê! Nàng dینگnyé wó ri! Nungmoq chyáng lé kut shit é laklai kumhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhing mù, jimê tú wut lhê, myiwap kyaq gyûn lhê kut bekô râ nghut lhê. ²² Ngò, nungmoq lé tái kôlé, tarâ jéyáng é buinyi má, nungmoq gi, Turuq myuq eq Sidun myuq htoq má je hpuzo kó râ nghut lhê. ²³ Dum mù, Kaperna-um và nàng ê, nàng gi, mauhkûng jé shoq waq toq é hui râ lú? A nghut, mosumhkung má sheq gyó râ nghut lhê. Nàng chyáng kut shit é laklai kumhá lé, haû Sodom và má kut shit é ru nghut le gi, myuq haû hkû-nyí jé shoq joq nyi râ nghut lhê. ²⁴ Ngò, nungmoq lé tái kôlé, tarâ jéyáng é buinyi má, Sodom và hpuzô é gi, nàng htoq shau râ nghut lhê." gâ ri.

Ngú Nyi Bàng É Matú Bánno Jang

Luk 10:21-22

²⁵ Haû u lé, Yesuq tái é gi, "Mauhkûng eq myigung é Yhumsîng, Áwa ê, Nàng gi, haû pé lé, hpaqchyî byéng-yá bò bang eq myit hpaqchyî sé bâng é hí má nghop to luí, zoshâng wui lé tân shit bê nghut é yanmai, Ngò, Nàng lé hkya-on lhê ô. ²⁶ Nghut bê, Áwa ê, haû gi, Nàng ô nau é hkyô nghut ri.

²⁷ Ngá Wa gi, lhunglhang lé Ngá é loq má ap byi to bê. Haû Zo lé, Áwa mai lai luí ó le a sé; Áwa lé le, haû Zo eq haû Zo mai sé nhâng râ matú hkyin yu é bang mai lai luí ó a sé.

²⁸ Ngú é eq wòlai wun é lhunglhang bang ê, Ngá chyáng lé keq; Ngò, nungmoq lé bánno nhâng râ nghut lhê.

²⁹ Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yû keq; haû hkûn, nungmoq é asak woi-nyí bánno kó râ nghut lhê.

³⁰ Haû mù gâ le, Ngá é kandang gi, waq lui é htoq agó, Ngá é wò le sôm lhê." gâ ri.

12

Bánno Buinyi É Yhumsîng

Mrk 2:23-28; 3:1-6; Luk 6:1-5, 6-11

¹ Haû yoq lhê é Bánno buinyi ranyí má, Yesuq gi, Yhang é chángzô pé eq rahá yò hkaû mai sô lai ló nyi ri. Yhang é chángzô pé gi, zòmut é yanmai, kyôshi ratsuí langshap yû mù, zô akô nghut ri. ² Hparishe pé gi, haû lé myàng kôjáng, "Wú aq! Nàng é chángzô pé gi, Bánno buinyi má a ge kut jung lé kut nyi akô." ga tái kat akô.

³ Haû hkûn, Yesuq tái tái é gi, "Dawiq lhang gi, yhang htâng châng é bang eq rahá zòmut huí é hkûn hkâsu kut é hkyô lé, nungmoq a ng-hap wú kó lú? ⁴ Dawiq gi, Garai Gasâng é yhúmhaû má wang ê mù, hkyangjông pé mai lai luí, ó le a ge zô é, kyâng tô é muk lé, yhang eq yhang htâng châng é bang yù zo kô é a nghut kó lú? ⁵ Hau htoq agó, Bánno buinyi má, hkyangjông pé gi, noqkuq yhúmhaû má Bánno buinyi é tarâ lé shut kôlhang mara a wó é lé, haû tarâ laiká má nungmoq a ng-hap wú kó lú? ⁶ Ngò, nungmoq lé tái kôlé, haû noqkuq yhúm htoq je ko sù gi, shí má nghut nyi lhê. ⁷ Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê" gâ é lichyúm lé nungmoq sé kô é ru nghut le gi, mara a bò bang lé mara hùn kó râ a nghut. ⁸ Hkâsu mù gâ le, haû Byu Yhangzo gi, haû Bánno buinyi é Yhumsîng nghut lhê." gâ ri.

⁹ Hau htâng, Yhang gi, haû jowò mai e ló mù, yhangmoq é tarajong má wang e ló ri. ¹⁰ Loq rahkyam ajum shi byuq é byù rayuq le, haû má nyi tô ri. Yhangmoq gi, Yesuq lé, "Bánno

buinyi má, nòhpyo lhoq gê byi le, tarâ wang lê lú?" ga myi é dông, Yhang lé mara hùn râ hkyô ho akô nghut ri.

¹¹ Haú hkûn, Yesuq gi, "Nungmoq chyáng mâ é ó yuq wá, yhumsing é sau radu, Bánno buinyi má dong gyó tô le, a xe htoq yu é nyi kó râ lú?"
¹² Byù gi, saú htoq má hpaudap dik é nghut lê! Haú mù, Bánno buinyi má ge é hkyô kut le, tarâ wang lê." ga yhangmoq lé tâ tâ ri.

¹³ Hau htâng, Yhang gi, haú loq jum shí sù lé, "Náng é loq nyhang kat aq." ga tâ kat jáng, haú yuq gi, loq nyhang kat jáng, loq haú gi, a no é loq su ge byuq bê nghut ri. ¹⁴ Hparishe pé kúm gi, htoq ló kômù, Yesuq lé hkâsu kut wó sat pyám râ hkyô lé, chôm hpyê lhùm bum akô nghut ri.

Garai Hkyin Tô É Dui-nhâng Zoshâng

¹⁵ Yesuq gi, haú hkyô lé sé jáng, haú jowò mai htoq ló bê nghut ri. Byù myo myo le, Yhâng htâng châng bùm kômù, Yhang gi, nòhpyo hui bang banshoq lé lhoq gê byi lú, ¹⁶ Yhang ó yuq nghut é hkyô lé, a tâ byông htoq râ matú, yhangmoq lé tâ hkûm tô ri. ¹⁷ Haú gi, myiqhtoi Esai-aq é nhut dông mai tâ tô é dang lé lhoq dik râ matú nghut ri. Dang haú pé gi,

¹⁸ "Shí yuq gi, Ngò chyt, Ngò myit nguì lú, hkyin tô é Ngá é dui-nhâng zoshâng nghut lê; Ngò gi, Ngá é Woi-nyí, Yhang lé kat byi râ nghut mù, Yhang gi, tarâ dingmán é hkyô lé byù myú banshoq pé má tâ kyo râ nghut lê.

¹⁹ Yhang gi, haí a hpuq tâ é htoq agó, a garu râ nghut lê; Yhâng é htê lé, hkyô mó pé má wó gyo râ a nghut.

²⁰ Yhang gi, tarâ dingmán é hkyô lhoq ung é hkûn jé shoq, nâng chap pyám bê jàm gàm lé le, lhoq hkyui râ a nghut, myihkau za htoq nyi bê myi lé le, lhoq sat pyám râ a nghut.

²¹ Byù myú chângjup gi, Yhâng é myìng má myit myoqbyù kó râ nghut lê."*

gâ ri.

Yesuq Eq Bezebulaq

Mrk 3:20-30; Luk 11:14-23; 12:10; 6:43-45

²² Hau htâng, agè ashop é nat gang wang júng lú, myoqjit nhutjit é byù rayuq lé, Yesuq chyáng shuí lé lô kôjáng, Yesuq gi, haú yuq lé lhom lhoq gê byi ri; haú mù, haú yuq gi, dang le wó nyô, myoq le wó myâng dut bê nghut ri. ²³ Byù hpûng mó gi, haú lé wú maú byuq kômù, "Shí yuq, Dawiq é Yhangzo za gi, nghut lê laq?" ga tâ bum akô.

²⁴ Nghut kôlhâng, Hparishe pé gi, haú lé wó gyo kôjáng, "Shí yuq gi, nat gâng pê é zau Bezebulaq* é wum-o a-tsam èq za nat gâng pé lé wó hkat htoq é nghut ri." ga tâ bum akô nghut ri.

²⁵ Yhangmoq myit nyi é hkyô lé Yesuq sé mù, yhangmoq lé tâ é gi, "Hká mingdán nghut kôle, ahkaú má byoq gâng lhùm nyi kô é nghut jáng, htên byoq byuq râ za nghut lê; haú eq rajung za, myuq ralhum nghut nghut, yhumhtu ralhum nghut nghut, yhangchang byoq lhùm nyi kô é nghut jáng, haú gi, wó gîng nyi râ a nghut. ²⁶ Tsadán gi, Tsadán lé hkat htoq pyám é nghut jáng, yhumsing gùng yhumsing lhoq hpyoq nyi gù bê nghut ri. Haú su nghut jáng, yhâng é mingdán gi, hkâsu kut wó gîng to râ lú?" ²⁷ Haú mù lú, Ngò gi, Bezebulaq é wum-o a-tsam èq za nat gâng pé lé hkat htoq é nghut jáng, nungmoq é byu pé gi, ó yuq é wum-o a-tsam èq hkat htoq pyám kô é nghut lê lú? Haú su nghut jáng, haú bang gi, nungmoq lé tarâ jéyáng bang dut kó râ nghut lê. ²⁸ Nghut kôlhâng, Ngò gi, Garai Gasâng é Woi-nyí èq nat gâng pé lé hkat htoq pyám é nghut jáng, Garai Gasâng é mingdán gi, nungmoq chyáng jé bê nghut ri.

* **12:21** Esai 42:1-4 * **12:24** Bezebulaq gâ é gi, Tsadán é myìng rajà nghut lê.

²⁹ Ó yuq nghut kôle, wum-o bò sù lé hí tuí zing pyâm é a nghut le gi, yhâng é yhûm má lú wâng mù, yhâng é sutzè lé hkâsu wó lú yú râ lú? Haú yuq lé hí tuí zing pyâm jáng sheq, yhâng é sutzè lé wó lú yú râ nghut lhê.

³⁰ Ngá hkyam shut a dap sù gi, Ngo lé gye kut sù nghut lhê; Ngò eq rahá a shûm tsing sù gi, lhoq pyo pyâm é sù nghut nyi ri. ³¹ Haú mù, Ngò, nungmoq lé taí kôlé, byu pê é yubak mara hkanmó eq Garai Gasang lé rhoi dang taí pyâm é lhunglhang gi, mara hkyut byí é wó hui râ nghut lhê. Nghut kôlhang, haú Chyoiyúng Woinyí lé rhoi dang taí pyâm é gi, mara hkyut byí é hui râ a nghut. ³² Haú Byu Yhangzo lé dang dông shut é sù gi, mara hkyut byí é wó hui râ nghut lhê; nghut kôlhang, haú Chyoiyúng Woinyí lé dang taí shut é sù gi, shí ipyat má le, htang pyat má le, mara hkyut byí é hui râ a nghut.

³³ Ashi lé wú luí, agàm lé sé râ nghut é yanmai, agàm lé lhoq gè jáng, ashi le gè râ nghut lhê; agàm lé a lhoq gè jáng, ashi le gè râ a nghut; ³⁴ Duq htân lhangmuí amyû ê, nungmoq gi, agè ashop é bang nghut to kôluí nhing, dang gè hkâsu wó taí kó râ lú? Hkâsu mù gâ le, i-myt unghkaú má bying mui tô é lé za, nhut mai taí htoq lo é nghut lhê. ³⁵ Ge é sù gi, yhumsing é i-myt unghkaú má é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myt unghkaú má é agè ashop é sutdò mai, agè ashop é zè pé lé lhoq htoq shit lhê. ³⁶ Ngò, nungmoq lé taí kôlé, byù gi, yhumsing taí kat é akyû a bo é dang pê é matú, tarâ jéyang é buinyi má taí sân kyo ra kó râ nghut lhê. ³⁷ Hkâsu mù gâ le, yhumsing mara lut râ le, ó le ó taí é dang pé mai; mara byí é hui râ le, ó le ó taí é dang pé mai, nghut râ nghut lhê." gâ ri.

Limik Kumhá Lé Dung Kô É Hkyô
Mrk 8:11-12; Luk 11:29-32; 11:24-26

³⁸ Hau htâng má, Hparishe pé eq tarâ sará pé ra-am gi, "Sarâ ê, ngamoq

gi, Nang, limik kumhá kut shit râ lé myàng nau ri." ga Yhang lé dúng akò.

³⁹ Haú mù, Yhang tù taí é gi, "Agè ashop é eq lhum a zuí é ipyat shí gi, limik kumhá dung nyi ri myihinung! Myiqhtoi Yonaq é kumhá mai lai luí, gotû haí le tûn shit râ a nghut. ⁴⁰ Hkâsu mù gâ le, Yonaq gi, ngo mó é wamdau hkaú má sum nyí sum myín lúng é su, haú Byu Yhangzo le, myigùng káng má sum nyí sum myín lúng râ nghut lhê. ⁴¹ Ninewe wà byù wuì gi, Yonaq mungdang hko kyô é hkûn myit lhing kô é nghut mù, tarâ jéyang é buinyi má, ipyat shí má é bang eq rahá toq lò luí, ipyat shí má é bang lé mara hûn kó râ nghut lhê; haú Yonaq htoq ko sù gi, ahkuí shí má jé nyi to bê. ⁴² Maupyí má é hkohkâm myhí gi, maumyí ló htâng é mai lé lô mù, Sholumon é hpaqchyí dang lé, lé gyô yù bê nghut mù, haú tarâ jéyang é buinyi má, ipyat shí má é bang eq rahá toq lò luí, ipyat shí má é bang lé mara hûn râ nghut lhê; haú Sholumon htoq ko sù gi, ahkuí shí má jé nyi to bê.

⁴³ Haú agè ashop é nat gi, byù rayuq chyáng mai htoq ló mù, kyuy huí é jowò pé má sô yông e ló luí, no râ jowò hkat ho wú le, a myang hô nghut ri. ⁴⁴ Haú hkûn, yhang gi, 'Ngò nyi lai lo é yhûm má dum taú ló wú râ.' ga taí ri. Yhang dum taú jé ló wú le, yhûm haú lé, ó le a sing yu hpyuq é htoq agó, san za rago dut to lánng é lé ló myang ri. ⁴⁵ Haú jáng, yhang gi, dum taú é mù, yhâng htoq je wuí é nat nyhit nat lé shuí lò luí, haú má lo wang nyi to bekò. Haú mù, haú yuq é nyi yap sâmlai gi, hí lhê htoq má je wuí lò bê nghut ri; agè ashop é ipyat shí le, haú eq rajung za dut râ nghut lhê." gâ ri.

Yesuq É Yhângnu Eq Yhanggu Pé
Mrk 3:31-35; Luk 8:19-21

⁴⁶ Yesuq, shiwa byu pé lé dang rû nyo nyi ashí hkûn, yhângnu eq yhanggu pé gi, Yhang lé nyò nau kômù, shinggan má lé yap tô akò nghut ri. ⁴⁷ Haú mù, Yesuq lé, "Náng nu eq nunggu pé gi, Nang lé nyò nau

mù, shinggan má láng yap bum akô." ga taí kyô akô.

⁴⁸ Haú hkûn, Yhang gi, "Ô pé gi, Ngá nu eq Ngá gu pé nghut akô lú?" ga tû taí kat ri. ⁴⁹ Hau htâng, Yhang gi, Yhâng é chángzô pé lé loq tun luí, "Wú keq, shí bang gi, Ngá nu eq Ngá é gumang wui nghut bê. ⁵⁰ Hkâsu mù gà le, mauhkûng htoq mâ é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê." ga xoq taí ri.

13

Kyôshi Sân É Dangtú
Mrk 4:1-20; Luk 8:4-15

¹ Haú nyí má yhang, Yesuq gi, yhúmkaú mai htoq ló mù, wui nhông yàm má ê zung tô ri. ² Byù hpûng mó gi, Yhâng é lêngkyuq má zup zîng lé bûm kô é yanmai, Yhang gi, lhai hkaú má doq zùng tô ri. Shiwa byu pé kúm gi, gin-gau htoq má yap tô bum akô. ³ Hau htâng, Yhang gi, haú bang lé, dangtú pé dông myo myo taí é má, "Kyô hkyó sù rayuq gi, kyôshi san râ ga htoq e ló ri. ⁴ Yhang, kyôshi sân kat é hkûn, ra-am gi, hkyô má gyó ang mù, nghoq pé èq lé hte zô pyám ri. ⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle, ⁶ amyit a wó chîn hing é nghut mù, bui htoq lô jáng, lhap kyuq pyám bê nghut ri. ⁷ Dum ra-am gi, zugyóm hkaú má gyó ang luí, zubyap haú pé kô lò mù, wup pyâm ri. ⁸ Ra-am dum nghut jáng, mylhpún bo é jang má gyó ang luí, ashí zuí lo é gi, sân kat é htoq rashô tú, hkyuq xê tú, sum xê tú, myô jat lo é nghut ri. ⁹ Gyô yù râ nohkyap dap sù gi, gyô yù sháng gaq." ga le taí ri.

¹⁰ Haú hkûn, chángzô pé gi, Yhâng chyáng lé mù, "Nàng gi, hai mù, shí bang lé, dangtú dông taí lhê lú?" ga myí akô.

¹¹ Haú jáng, Yhang tû taí é gi, "Mauhkûng mingdán eq sêng é sê gyo

wuî é hkyô pé lé sê gyo râ ahko ahkáng, nungmoq lé byí to bê, nghut kôlhang, yhangmoq lé gi, a byi shí é nghut lhê. ¹² Wó to sù lé gi, yhang agùn agó wó râ matú, jat byi shirâ nghut lhê. A wó su chyáng mai kúm gi, yhang wó tô é lé lhang yu pyám byi shirâ nghut lhê. ¹³ Yhangmoq gi, wú to kôlhang, a myàng kó; gyô nyí kôlhang, a wó gyo, a sê gyo kó nghut é yanmai, yhangmoq lé Ngò dangtú dông taí râ é nghut lhê. ¹⁴ Haú gi,

'Nungmoq gi, wó gyô tô nyí kôlhang, sê gyo kó râ a nghut; myang tô nyí kôlhang, wú sé kó râ a nghut.

¹⁵ Hkâsu mù gà le, byù shí bang gi, myit nhikshi jit byuq bê; yhangmoq é nohkyap gi, a wó gyo kó, myoqjí le chûm byuq bekô nghut ri.

Haú su a nghut le gi, yhangmoq, myoq myàng no gyo mù, i-myt bun bóng luí, lêng lò kômù, Ngò, yhangmoq lé yâ gè byi berâ nghut lhê.✠

gâ é, Esai-aq é myiqhtoi dang lé lhoq dik é nghut ri. ¹⁶ Nghut kôlhang, nungmoq é myoq gi, wó myâng mù, nungmoq é nohkyap gi, wó gyô é yanmai, nungmoq gi, hkungsô wó nyi ri. ¹⁷ Hkâsu mù gà le, Ngò, nungmoq lé teng za taí kôlé, nungmoq wó myâng, wó gyô é pé lé, myiqhtoí pé eq dingmán bang myo myo gi, myàng naù gyo naù kôlhang, a wó myâng, a wó gyo kó nghut ri.

¹⁸ Ahkuí, kyôshi san sù eq sêng é dangtú é lichyúm lé rago gyô wú keq; ¹⁹ Hkyô má gyó âng é kyôshi gi, mauhkûng mingdán eq sêng é danglú lé wó gyo kôlhang, a sê gyô é yanmai, haú agè ashop sù lé lò mù, yhâng é i-myt hkaú má san kat tô é kyôshi lé, lé yu pyám byí é hui sù lé gá nau é nghut lhê. ²⁰ Luqgok yò pé má gyó âng é kyôshi gi, mungdang lé wó gyo jáng, radá dâm gabú myit èq hap yù kôlhang, ²¹ amyit a wó chîn é yanmai,

✠ 13:15 Esai 6:9-10

razup zo za yuq mù, mungdâng é yan-mai, wuîhkê é eq zing-rî é hui kôjáng, hân hân htak ló byuq é sù lé gá nau é nghut lhê. ²² Zuggyóm má gyó âng é kyôshi gi, haû mungdang lé wó gyô yù kôlhang, shí ipyat lhê é myit wui myit hke hkyô pé eq hkyô shuí nghoq jung ngùn hîng zèhkoq èq hup pyâm é yanmai, ashi a wó zuí é sù lé gá nau é nghut lhê. ²³ Nghut kôlhang, myihpún bo é jang má gyó âng é kyôshi kúm gi, mungdang lé wó gyo mù, sê gyô yu é sù lé gá nau é nghut lhê. Haû yuq ashi zuí é gi, san kat é htoq rashô tú, hkyuq xê tú, sum xê tú, myô jat lo é nghut ri.

Myoqgàm Dangtú

²⁴ Yesuq, yhangmoq lé dangtú dông xoq taí kyô é gi, "Mauhkûng mingdán gi, ge é kyôshi lé, yò má san kat sù rayuq eq du ri. ²⁵ Byu pé yhup myhî tô bum é u lé, yhâng é gyè gi, lé jé mù, guq gàm gyoro má, myoqshi lé sân to hkó luî, taû ló byuq bê nghut ri. ²⁶ Guq gàm yuq lò mù, guq nhâm htoq lo é hkûn, myoqgàm le bo yuq htoq lo ri.

²⁷ Yhumsîng hpô é dui-nhâng zoshâng wuî gi, yhâng chyáng lé jé mù, 'Yhumsîng ê, ge é kyôshi lé za yò má sân tô é a nghut lhú? Myoqgàm pé gi, hkâmai htoq lo é lhú?' ga myi kôjáng, ²⁸ haû yhumsîng hpó gi, 'Gumlau gye èq kut é nghut ri.' ga tû taí ri.

Haû jáng, dui-nhâng zoshâng wuî gi, 'Ngamoq, myoq haû pé lé è nut pyám râ lé, nàng ô nau ri lhú?' ga myi akô.

²⁹ Haû hkûn, yhang gi, 'Hká nut pyám kó; hkâsu mù gá le, nungmoq, myoq haû pé lé nut é hkûn, guq gàm pé lé le bo záng nut pyám kó râ nghut lhê. ³⁰ Kyôshu yoq jé shoq rahá yuq to kó sháng gaq; haû hkûn, myoqgàm pé lé hí hkyîn tsîng yù mù, nyhê hkyô pyám râ matú hkyom dîng to luî, guq lé kúm gi, shú yù mù, ngá é chyî má tsing kat to râ matú, kyô shu bang lé ngò taí râ nghut lhê.' ga tû taí ri." ga ri.

Angshi Cham Eq Múnchi Dangtú *Mrk 4:30-34; Luk 13:18-21*

³¹ Hau htâng, Yesuq gi, yhangmoq lé gotú dangtú ralhum dum xoq taí é gi; "Mauhkûng mingdán gi, byù rayuq eq, yhâng hkyâm má hô tô é angshi cham eq wuí ri. ³² Angshi cham haû gi, kyômyui jí banshoq htoq má je tiq é nghut kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gâ ri.

³³ Yhang, gotú dangtú dum xoq taí é gi, "Mauhkûng mingdán gi, myiwe rayuq èq sungso mún sum bûng má yu nyhó luî, haû pé banshoq lé wó lhoq dau nhang é múnchi eq wuí ri." gâ ri.

³⁴ Yesuq gi, byù moq mó lé, haû pé banshoq dangtú dông mai chyat taí ri; yhangmoq lé, dangtú a bo é haî lháng a taí wú nghut ri. ³⁵ Haû gi, "Ngá nhut lé hpóng mù, dangtú dông mai taí râ; mingkan lé sân-hi hpan é mai zaú tô é hkyô pé lé taí sân kyo râ nghut lhê."✧
ga, myiqhtoi dông taí tô é dang lo dik é nghut ri.

Myoqgàm Dangtú Lé Taí Sân Kyô É Hkyô

³⁶ Hau htâng má, Yesuq gi, byù moq mó mai htoq ló mù, yhúmhkaû má wang ló ri. Haû hkûn, Yhâng é chángzô pé gi, Yhâng chyáng lé lô kômù, "Yò mâ é myoqgàm dangtú eq sêng é hkyô lé taí sân kyo laq." ga taí akô.

³⁷ Haû jáng, Yhang tû taí é gi, "Ge é kyôshi san sù gi, haû Byu Yhangzo nghut ri. ³⁸ Yò gi, mingkan nghut ri; ge é kyôshi gi, mauhkûng mingdán é yhangzô pé nghut akô. Myoqgàm pé kúm gi, haû Tsadán é yhangzô pé nghut akô; ³⁹ haû lé châng hkat sân é gumlau gyè gi, nat Tsadán nghut ri. Kyôshu yoq gi, mingkan htúm é ahkyíng nghut ri; kyô shu bang gi, maumang lagyô pé nghut akô.

✧ 13:35 Hkya-on 78:2

⁴⁰ Haú myoqgàm pé lé, nut yù mù, myi má nyhê pyâm é su, haú mingkan htâm é ahkyíng má dut râ nghut lhê.

⁴¹ Haú Byu Yhangzo gi, Yhâng é mau-mang lagyô pé lé nhâng râ nghut lhê; haú mù, haú bang gi, hkyô lhoq nghoq nhang é bang banshoq eq agè ashop hkyô kut é bang lhunglhang lé, Yhâng é mingdán mai hkyin she htoq yù mù, ⁴² gyúng nyi é myi-bung hkyûng hkaú má dú kat pyâm kó râ nghut lhê; hau má, ngaubyi ngaù nhap eq zùi kyik kyik shoq hpuzô nyi kó râ nghut lhê. ⁴³ Haú hkûn, dîngmán bang gi, yhangmoq Yhângwâ é mingdán má bui su duqbó nyi kó râ nghut lhê. Nohkyap dap sù gi, gyô yù sháng gaq.

Haq Tô É Sutzè Dangtú

⁴⁴ Mauhkûng mingdán gi, yò má haq tô é sutzè eq wuí ri. Sutzè haú lé myang é sù gi, haú lé saí haq to mù, gabú myit èq taú ló luí, yhang wó é banshoq lé ùng pyâm mù, yò haú lé wui yu ri.

⁴⁵ Dum, mauhkûng mingdán gi, réng é palhé lé châng ho wún é hpugá hpó eq wuí ri. ⁴⁶ Yhang gi, gyai hpaú é palhé lé myàng jáng, yhang wó é banshoq lé ló ùng pyâm mù, haú lé wui yu ri.

Gùn Lé Dangtú Yu É Hkyô

⁴⁷ Mauhkûng mingdán gi, nhông má, ngozo ajà jà lé wó dú nghop yu é gùn eq le wuí ri. ⁴⁸ Gùn haú má ngozo byíng jáng, ngo kóng bang gi, wui yàm má she htoq yù mù, zung to luí, ge é pé lé gi, ngo-pyap má guq kat yù luí, a ge é pé lé gi, dú pyâm akô.

⁴⁹ Haú eq rajung za, mingkan htâm é ahkyíng má le, maumang lagyô pé gi, gyó lé lô mù, agè ashop é bang lé, dîngmán bâng chyáng mai gam htoq yù luí, ⁵⁰ ngaubyi ngaù nhap eq zùi kyik kyik shoq hpuzô nyi râ nghut é, gyúng nyi é myibung hkyûng hkaú má dú kat pyâm kó râ nghut lhê.

⁵¹ Shí hkyô banshoq lé nungmoq sê gyo bekô lú?" gâ ri.

Haú hkûn, yhangmoq gi, "Sê gyo bê." ga tú taí akô nghut ri.

⁵² Hau htâng, Yesuq gi, yhangmoq lé, "Mauhkûng mingdán eq séng luí mhoq yù bê é tarâ sará ó nghut kôle, yhang mhoq é hkyô gi, yhumsing é sut-púnglhung hkaú mai zè sik zè xau lé yu htoq é yhumsing hpó rayuq eq wuí ri." ga dum taí ri.

Myiqhtoi, Myoqdong A Wó Dut É Jang

Mrk 6:1-6; Luk 4:16-30

⁵³ Yesuq gi, dangtú haú pé lé ban taí jáng, haú jowò mai htoq e ló bê nghut ri. ⁵⁴ Yhang gi, Yhâng é yhummau má jé ló jáng, byu pé lé, yhangmoq é tarajong má mhoqshit ri; haú hkûn, yhangmoq gi, gyô maú byuq kôluí, "Byù shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lhê lhà?"

⁵⁵ Yhang gi, laksîma hpô é yhangzo a nghut lú? Yhângnû é myìng gi, Mariq gâ lhê a nghut lú? Yhanggú pé gi, Yakuq, Yosep, Simun eq Yudaq gâ é bang a nghut kó lú? ⁵⁶ Yhâng nhammó pé le, nga-nhung eq rahá nghut nyi lhê a nghut kó lú? Haú su nghut le nhîng, haú pé banshoq lé, Yhang hkâmai wó yu é nghut lhê lhà?" ga myí bùm kômù, ⁵⁷ Yesuq lé myit a ngón dut bùm bekô nghut ri.

Yesuq kúm gi, yhangmoq lé, "Myiqhtoi rayuq gi, yhumsing é yhummau eq yhumsing é yhûm má za, myoqdong a lhaq wó wú é nghut lhê." ga tú taí kat ri.

⁵⁸ Yhangmoq lumjîng myit a bò kô é yanmai, Yesuq gi, haú má, laklaí kumlhá myo myo a kut shit lo nghut ri.

14

Wui-myhup Sará Yohan Shi Byuq É Hkyô

Mrk 6:14-29; Luk 9:7-9

¹ Haú hkûn, mauzau Herut gi, Yesuq eq séng é ludang lé wó gyo jáng, ² yhâng a-ô mâ é bang lé, "Shí yuq gi, Wui-myhup Sará Yohan nghut rin-hung; Yhang gi, shi é mai dum dui

toq lo é nghut mù, hpungwup a-tsam haú pé lé wó kut é nghut ri." ga taí ri.

³ Herut haú su gâ é gi, yhanggu Hpilip é yhangmyi Herudiaq é yanmai, Yohan lé chyup tuí yù mù, htóng hkyô pyâm é yanmai nghut ri. ⁴ Hkâsu mù gâ le, Yohan gi, yhang lé, "Nàng, myiwe haú lé hâng yu é gi, tarâ a wang é nghut lhê." ga taí byí nyi é yanmai nghut ri. ⁵ Herut gi, Yohan lé sat pyám naú kôlhang, mingbyû wuì lé gyuq é yanmai, a wám sat nghut ri; haí mù gâ le, yhangmoq gi, Yohan lé myiqhtoí tsuq nyí kô é yanmai nghut ri.

⁶ Nghut kôlhang, Herut é hkû ladu hkyúm buinyí má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú myit nguì mù, ⁷ byizo haú lé, yhang haí dung le haí byi râ ga dakam é danggidiq byí ri. ⁸ Byizo haú gi, yhangnu hpaqchyí byí é lé gyô yù mù, "Shí, bó má, Wui-myhup Sará Yohan é ulhum lé, kat byi laq." ga, Herut lé dúng ri. ⁹ Mauzau hpó gi, myit a ngón dut byuq kôlhang, yhang dakam tô é danggidiq é yanmai le, bíng pé é myoqdong lé tê nau é yanmai le, yhang dúng é lé, byi râ matú, ¹⁰ htóng hkaú má lúng tô é Yohan é ulhum lé hpyit râ hkunmó hkyô kat bê nghut ri. ¹¹ Yohan é ulhum lé bó má kat luí, myiwe zo haú lé byi jáng, myiwe zo haú gi, haú lé yhangnú chyáng yu ló byí ri. ¹² Haú mù, Yohan é chángzô pé gi, yhang é mâng lé lé yû luí, myhup pyám bekô nghut ri. Hau htâng, yhangmoq gi, Yesuq lé ló taí kyô akô nghut ri.

Byù Ngo Hkyíng Lé Byi Tsô É Hkyô
Mrk 6:30-44; Luk 9:10-17; Yhn 6:1-14

¹³ Yesuq gi, haú hkyô lé wó gyo jáng, haú mai lhai ji mù, tsím tsâm é jowò shut Yhang baú e ló ri. Haú lé, byu pé wó gyô bùm kôjáng, wà mó pé mai htoq lé lô kômù, hkyí hkyô Yhâng htâng châng e ló akô nghut ri. ¹⁴ Yesuq gi, lhai mai gyó dap ló é hkûn, byu moq mó nyi to lánng é lé myàng jáng,

yhangmoq lé wú shogyo luí, nò bang lé lhoq gê byí ri.

¹⁵ Myinhâng jé lô jáng, haú chángzô pé gi, Yhâng chyáng lé kômù, "Shí má gi, tsím tsâm é jowò nghut é htoq agó, buì le gyum ló bê nghut mù, shiwa byu pé gi, wà pé shut ló luí, yhangmoq é matú zôjung ló wó wuì kó sháng gaq, yhangmoq lé nhang kat aq hkoi." ga taí akô.

¹⁶ Haú hkûn, Yesuq gi, "Yhangmoq ló a ra. Nungmoq, yhangmoq lé rajung jung byi tso keq." ga tú taí kat ri.

¹⁷ Haú su ga jáng, yhangmoq gi, "Muk ngo long eq ngozo í du za ru wó lhê." ga dum tú taí akô.

¹⁸ Haú jáng, Yesuq gi, "Yu lò keq." ga tú taí mù, ¹⁹ shiwa byu pé lé, wàhu yò má zùng nhang ri. Hau htâng, Yhang gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpê gàm mù, chángzô pé lé byí ri. Haú chángzô pé gi, shiwa byu pé lé gàm byí akô nghut ri. ²⁰ Yhangmoq banshoq bang zô gyí bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsíng yu ashí kô nghut ri. ²¹ Haú má zô é bang gi, myiwe wuì eq zoshâng wuì lé a nghap lhôm é za, yuqgè baú ngo hkyíng kô bo ri.

Yesuq, Wuì Htoq Má Sô É Hkyô
Mrk 6:45-56; Yhn 6:15-21

²² Yesuq gi, haú shiwa byu pé lé byo ló nhang nyi é hkûn jáng, chángzô pé lé lhai má wang ji nhâng mù, tú tap shut dap ló lánng nhâng ri. ²³ Shiwa byu pé lé nhang pyâm é htâng má, Yhang gi, kyúdung râ ga, Yhang baú bùm shut doq e ló ri. Myinhâng chutshúm zó jé shoq, Yhang baú haú má nyi nyi ri. ²⁴ Haú u lé, lhai gi, gin-gau mai tsómra wê é jowò má jé é hkûn, laí tau mut é yanmai, wuìheng eq gyai yhang lo bat nhùn é hui zô ri.

²⁵ Htang napsún maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri. ²⁶ Haú mù, chángzô pé gi, Yesuq nhông htoq má

sô nyi é lé myàng kôjáng, gyuq dàn kômù, "Sobyô ô!" ga gyuq nán é èq taí garû akô nghut ri.

²⁷ Haú jáng yhang, Yesuq gi, yhang-moq lé, "Hkâgyuq kó! Ngò ru nghut lhê; myit wum lhoq kíng keq." ga nyo kat ri.

²⁸ Haú hkûn, Petruq gi, "Yhumsîng ê, Nàng yhang ru nghut le gi, ngo lé, wuì htoq mai sô lé lô nhâng laq." ga taí kat ri.

²⁹ Haú jáng, Yesuq gi, "Lé lô aq." ga tû taí kat ri.

Haú mù, Petruq gi, lhaí mai gyó mù, wuì htoq mai Yesuq chyáng sô e ló ri. ³⁰ Nghut kôlhang, yhang gi, laidun htan é lé myang kat jáng, wú gyuq luí, wuì má nop ló nyí mù, "Yhumsîng ê, ngo lé hkyí yù laq." ga wut garû kat ri.

³¹ Yesuq gi, radá dâm yhâng é loq lhâm kat luí, Petruq lé lîng zing to mù, "Lumjîng myit shau sô ê, nàng haí mù úng-âng lhê lú?" ga taí ri.

³² Yhangnhik, lhaí má wàng kôjáng, laidun le zîm byuq bê nghut ri. ³³ Hau htâng, haú lhaí má lúng tô é bang gi, Yhang lé paí gop mù, "Nàng gi, gè gè yhang, Garai Gasâng é Yhangzo nghut bê." ga taí akô nghut ri.

³⁴ Yhangmoq gi, gû dap ló kômù, Genesarat mau má jé wang ló bekô nghut ri. ³⁵ Haú mau mâ é bang gi, Yesuq lé wú sé kôjáng, awuì ayâm mâ é bang banshoq lé kyô kat akô. Haú mù, byu pé gi, nòhpyo hui bang lhunglhang lé, shuì lé lô kômù, ³⁶ nòhpyo hui bang lé, Yhâng é bushi htâng má za lhang záng nhâng râ matú dúng tóngbán akô; Yhang lé záng é lhunglhang bang gi, lhoq gè byí é huí bekô nghut ri.

15

Sansêng É Hkyô Eq A Sansêng É Hkyô

Mrk 7:1-23

¹ Hau htâng má, Hparishe pé eq tarâ sará pé ra-am gi, Yerusalem wà mó mai Yesuq chyáng jé lé lô kômù,

² "Náng é chángzô pé gi, haí mù luí, îchyí îwa pé é htûnglí lé a cháng kut akô lú? Yhangmoq gi, loq hí a chí é zang zô akô nghut ri." ga, lé taí akô.

³ Haú jáng, Yesuq tû taí é gi, "Nung-moq gi, haí mù, nungmoq é htûnglí é yanmai, Garai Gasâng é hkunmó lé a cháng kô é lú? ⁴ Hkâsu mù gâ le, Garai Gasang gi, 'Nungmoq é înu îwa lé, hkungga keq.'* ga le, 'Înu îwa lé, nhîng é sô ó yuq nghut kôle, sat pyâm é hui râ lhê.'* ga le, taí tô é nghut lhê. ⁵ Nghut kôlhang, nungmoq taí é gi, 'byù rayuq yuq, yhumsîng é yhângnu yhângwa lé byi âng é zè lé, Garai Gasang lé byi râ chyunghuq nghut lhê ga taí é nghut jáng, ⁶ haú yuq gi, yhângwa lé hkungga nó a ra.' gâ akô nghut ri. Haú dông mai, nung-moq gi, nungmoq é htûnglí é yanmai, Garai Gasâng é mungdang lé he-ngik pyâm akô nghut ri. ⁷ Gegùn labyoq kut bang ê! Nungmoq eq séng luí, myiqhtoi Esai-aq htoí tô é dang gi, têng ri. ⁸ Myiqhtoi dang haú gi,

'Byù shí bang gi, nhut htoq mai za Ngo lé hkunggâ akô; yhangmoq é myit nhiklhum gi, Ngò eq wê gân nyi akô.

⁹ Yhangmoq, Ngo lé noqkuq nyi kô é gi, akôm má za nghut nyi ri; hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.* gâ é nghut lhê." gâ ri.

¹⁰ Hau htâng, Yesuq gi, shiwa byu pé lé, Yhâng chyáng wut yù luí, "Gyô yù mù, sé lo keq. ¹¹ Nhut má wang lo é haí jung le, byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lhê." ga taí ri.

¹² Haú hkûn, haú chángzô pé gi, Yhâng chyáng lé lô kôluí, "Hparishe pé gi, shí hkyô lé wó gyo mù, nhik-yô nyi bùm kô é lé, Nàng sê lhê lú?" ga myi kôjáng,

¹³ Yhang gi, "Mauhkûng htoq tsáng myhâng mâ é Ngá Wa a hô tô é agàm

hkanmó gi, apûn eq roq nut pyâm é hui râ nghut lhê. ¹⁴ Yhangmoq é yanmai, myit hkâ-myo kó; yhangmoq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yhangchang hkyô-u she lhûm é nghut le gi, í yuq é yhang dongkong má byit gyó kó râ za nghut lhê." ga tû taí ri.

¹⁵ Haú hkûn, Petruq gi, "Ngamoq lé, dangtú hau é lichyúm taí sân kyo laq." ga taí jáng, ¹⁶ Yesuq gi, "Nungmoq, ahkuí le haú-í yhang go nyi ashi kô luq? ¹⁷ Nhut má wang lo é haí jung le, wamdau hkaú má jé wang ló mù, gungdu mai dum htoq ló é nghut lhê. ¹⁸ Nghut kôlhang, nhut mai htoq lo é gi, myit nhiklhûm mai htoq lo é nghut mù, byù lé a sanséng dut nhang ri. ¹⁹ Hkâsu mù gâ le, myit nhiklhûm mai htoq lo é gi, agè ashop é dông myit é hkyô pé, byù sat é hkyô, su-myi sulàng lú hkyô, ashop é dông gungsho zùm yap é hkyô, hkaú é hkyô, a tengmán é saksé hkâm é hkyô, lumù gansang é hkyô pé nghut ri. ²⁰ Haú pé gi, byù lé a sanséng dut nhang é hkyô pé nghut ri; loq a chí e za zo shuq é gi, byù lé a sanséng a dut nhang é nghut lhê." ga taí ri.

Hkanan Myiwe Myhí Rayuq É Lumjîng Myit

Mrk 7:24-30

²¹ Hau htâng, Yesuq gi, haú mai Turuq eq Sidun mau shut htoq e ló bê nghut ri. ²² Haú hkûn, haú mau má nyi é Hkanan myiwe myhí rayuq gi, Yhâng chyáng lé jé mù, "Dawiq é Yhangzo, Yhumsîng ê, ngo lé shogyô yù laq ô! Ngá byizo gi, nat gang wang júng mù, gyai yhang nò gyîn nyi ri." ga taí garú ri.

²³ Nghut kôlhang, Yesuq gi, dang rahkun le a tû taí nghut ri. Haú mù, Yhâng é chángzô pé gi, Yhâng chyáng lé jé kômù, "Myiwe myhí haú lé ló nhang pyám aq; haí mù gâ le, yhang gi, nga-nhûng é htâng má châng garú nyi ri." ga taí akô.

²⁴ Yesuq gi, "Byuq byuq é sau pé su nghut nyi é Israelaq byu pé chyáng

sheq, Ngo lé nhang kat é ru nghut lhê." ga taí ri.

²⁵ Haú hkûn, myiwe myhí haú gi, Yhâng é hí má lé mù hkyihput htuq luí, "Yhumsîng ê, ngo lé garúm yù laq ô!" ga taí ri.

²⁶ Yesuq gi, "Zô wui chyáng má é zoshuq lé yù mù, hkuí pé lé byi tsô é jung a nghut." ga tû taí jáng, ²⁷ myiwe myhí haú gi, "Yhumsîng ê, haú kúm nghut ri; nghut kôlhang, hkuí pé lháng, yhumsîng hpô é zoh-poq mai gyó é zang cham zang htâng lé, zô akô mhaí." ga dum taí ri.

²⁸ Haú mù, Yesuq gi, "Myiwe zo ê, náng é lumjîng myit gi, kô nyi ri! Náng dúng é hkyô lé gyo byi bê nghut lhê." ga tû taí ri. Haú hkûn jáng, myiwe myhí hau é byizo le ge byuq bê nghut ri.

Byù Myi Hkyîng Lé Byi Tsô É Hkyô Mrk 8:1-10

²⁹ Yesuq gi, haú mai htoq ló luí, Galile nhông yàm má ê jé mù, bùm shut doq ló luí, ló zung nyi ri. ³⁰ Haú hkûn, byù moq mó gi, hkyî hten bang, myoqjit bang, gung-yùn bang, nhut jit bang eq nò bang gotú myo myo lé shuí lé lô kômù, Yhâng é hkyî wang má lé nyhi to kô é nghut luí, Yhang gi, haú bang lé lhoq gè byi ri. ³¹ Haú shiwa byu pé gi, nhut jit bang dang wó nyò kô é lé le, gung-yùn bang ge byuq é le le, hkyî hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkya-ôn bum akô nghut ri.

³² Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yhangmoq gi, Ngò eq rahá nghut nyi é sum nyí bò bê, haí le a myàng zo kó nghut ri. Yhangmoq, hkyolat má mut yut ló yut kó abe, yhangmoq zòmut to gû lé, Ngò a nhang kat naù." ga taí ri.

³³ Haú hkûn, Yhâng é chángzô pé gi, "Isù é yoso má nhîng, byù shí myhò bang lé luq shoq byi tso râ zoshuq gi, hkarâ é wó râ lhú?" ga myí akô.

³⁴ Yhang gi, "Nungmoq, muk hkâ-myhó long wó akô lúhú?" ga tau myi jáng, yhangmoq gi, "Muk nyhit long eq ngo-nú zo ratsuí wó lhê." ga tû taí akô.

³⁵ Haú mù, Yhang gi, byù hpûng lé, myigùng htoq má zùng nhang ri.

³⁶ Hau htâng, Yhang gi, haú muk nyhit long eq ngozo lé yù mù, jeju ban hkya-on jáng, myhik hpé luí, haú chángzô pé lé byi jáng, yhangmoq gi, byù hpûng lé gâm byí akô nghut ri.

³⁷ Yhangmoq lhunglhang bang zô gyí bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsíng yu ashí kô nghut ri.

³⁸ Haú hkûn zô é bang má, myiwe wuì eq zoshâng wuì lé a nghap lhôm é za, yuqgè wuì baú myi hkyíng yuq bo ri. ³⁹ Yesuq gi, byù hpûng lé ló nhang pyâm é htâng má, lhaí má wang ji mù, Magadan mau shut dap e ló bê nghut ri.

16

Kumhá Dung Kô É Hkyô *Mrk 8:11-13; Luk 12:54-56*

¹ Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mauhkûng má é kumhá kut shit râ matú, dúng akô.

² Haú mù, Yhang gi, yhangmoq lé, "Nungmoq gi, myinhâng jé jáng, 'Mau hpong râ nghut lhê, hkâsu mù gâ le, mauhkûng ne ri.' ga le, ³ napkyó lé nghut jáng, 'Hkû-nyí laidun lò râ nghut lhê, hkâsu mù gâ le, mauhkûng nè mù, noq ri.' ga le, lhaq taí akô. Nungmoq gi, mauhkung é isâm lé wú mù sê gam hkoq yû kô é nghut kôlhang, shí ipyat lhê é kumhá lé gi, a sê gam hkoq yû kó nghut ri. ⁴ Agè ashop é eq lhum a zuí é ipyat shí gi, limik kumhá lé ho nyi akô; nghut kôlhang, Yonaq é kumhá mai lai luí, gotû haí le tûn shit râ a nghut." ga taí ri. Hau htâng, Yesuq gi, yhangmoq chyáng mai htoq ló bê nghut ri.

Hparishe Pé Eq Saduke Pé É Múnchi *Mrk 8:14-21*

⁵ Yhangmoq, nhông hé hpoq shut gû dap ló kô é hkûn, haú chángzô pé gi, muk yu chûng râ lé tô-myhí pyâm akô. ⁶ Haú hkûn, Yesuq gi, "Hparishe pé eq Saduke pé é múnchi lé, sidiq luí, koi pyâm nyi keq." ga, yhangmoq lé taí kat ri.

⁷ Yhangmoq gi, "Nga-nhúng, muk a yu chung é yanmai, haú su ga taí é nghut ri." ga luí, taí lhum bum akô nghut ri.

⁸ Yhangmoq haú su taí lhum nyi kô é lé Yesuq sé jáng, yhangmoq lé, "Lumjín myit shaú é bang ê, muk a bo é hkyô lé, haí mù taí lhum nyi akô lúhú? ⁹ Ahkuí jé shoq, nungmoq gi, a sê gyo shi kó lúhú? Muk ngo lông èq byù ngo hkyíng lé byi tsô é htâng, nungmoq hkâ-myhó mung wó dum guq tsíng yù kô é lé le, ¹⁰ muk nyhit lông èq byu myi hkyíng lé byi tsô é htâng, nungmoq hkâ-myhó mung wó dum guq tsíng yù kô é lé le, nungmoq a myit bun kó lúhú? ¹¹ Ngò gi, muk eq séng luí taí é a nghut é lé, nungmoq, hkâsu mù a sê gyo kô é lúhú? Hparishe pé eq Saduke pé é múnchi lé koi pyâm keq nghû taí é ru nghut lhê." ga taí ri. ¹² Haú hkûn sheq, Yhang taí é gi, muk má chung é múnchi lé koi pyâm râ matú taí é a nghut e za, Hparishe pé eq Saduke pé é mhoqshit hkyô lé koi pyâm râ matú taí é ru nghut é lé, yhangmoq sê gyô akô nghut ri.

Yesuq Lé, Petruq Yín Yu É Hkyô *Mrk 8:27-30; Luk 9:18-21*

¹³ Yesuq gi, Kesare-Hpilipi wà mó nâm má é mau má jé é hkûn, Yhâng é chángzô pé lé, "Haú Byu Yhangzo gi, ó yuq nghut lhê ga, byu pé taí akô lúhú?" ga myí ri.

¹⁴ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotû myiqhtoi rayuq yuq nghut ri ga, taí akô." ga tû taí kôjáng, ¹⁵ Yhang gi, "Haú jáng, nungmoq gi, Ngo lé ó yuq nghut lhê nghu akô lúhú?" ga, yhangmoq lé xoq myí ri.

¹⁶ Haú hkûn, Simun Petruq gi, "Nàng gi, rû dui nyi é Garai Gasâng

é Yhangzo, Hkrisduq nghut ri." ga tâ ri.

¹⁷ Haû mù, Yesuq tâ taí é gi, "Yonaq é yhangzo Simun ê, nàng gi, hkungsô wó nyi ri; hkâsu mù gâ le, nang lé haú hkyô tân shit é gi, byù mai a nghut, mauhkûng htoq má nyi é Ngá é Îwa mai tân shit é ru nghut lhê.

¹⁸ Ngò, nang lé taí lé, nàng gi, Petruq* nghut luí, luqgok shî má, Ngò, Ngá é noqkuq hpúng lé xuq to râ nghut mù, haû moming hkúmdong pé gi, hpúng haú lé wó ûng râ a nghut.

¹⁹ Mauhkûng mingdán é zoqshi pé lé, Ngò, nang lé ap byi râ nghut lhê; myigùng htoq má, nàng tuí to má tuí to lé, mauhkûng htoq má le, tuí to râ nghut lhê; myigùng htoq má, nàng lhoq lhut má lhoq lhut lé, mauhkûng htoq má le, lhoq lhut byi râ nghut lhê." gâ ri. ²⁰ Hau htâng, Yhang Hkrisduq nghut é hkyô lé, ó lé le a tâi kyo râ matú, Yhâng é chángzô pé lé tâi hkûm kat ri.

Yesuq Gi, Yhang Shî Râ Lé Hí Te Tai É Hkyô

Mrk 8:31—9:1; Luk 9:22-27

²¹ Yesuq gi, Yhang Yerusalem wà mó má ló mù, suwún wui, hkyangjong agyi pé eq tarâ sará pé é loq má, zing-rî é myo myo hui zo luí, sat pyâm é hui ra râ nghut kôle, sum nyí nghû râ buinyi má, lhoq toq yu é hui râ nghut é hkyô lé, haú hkûn mai, Yhâng é chángzô pé lé tâi kyo hi ló bê nghut ri.

²² Haû mù, Petruq gi, Yhang lé rahkyam shut shuí htoq yû mù, "Yhumsing ê, haú hkyô Náng chyáng hkâ-nhám le a dut sháng gaq." ga Yhang lé tân ri.

²³ Yesuq gi, lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut mù, Ngá é matú myit leqbat jowò nghut ri." ga tâ ri.

²⁴ Hau htâng, Yhang gi, Yhâng é chángzô pé lé, "Ngá htâng cháng naú

sù ó yuq nghut kôle, yhumsing gùng yhumsing he-ngik pyâm mù, yhumsing é tapzîng lé waq chûng luí, cháng ra râ nghut lhê. ²⁵ Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sùm pyâm é sù kúm gi, asak wó yû râ nghut lhê. ²⁶ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, hai akyû bò râ lú? Byù gi, yhumsing é asak woi-nyí lé, hai èq wó htaí yù râ lú? ²⁷ Haû Byu Yhangzo gi, Yhâng Wâ é hpungwup shing kang bo é èq, Yhâng Wâ é maumang lagyô pé eq rahá jé lé lô râ nghut lhê; haú hkûn, Yhang gi, yuq hkangmó lé, yhumsing kut lai bê eq rajung za akyû byi râ nghut lhê. ²⁸ Ngò, nungmoq lé teng za taí kôlé, ahkuí shí má yap to bang ra-am gi, haû Byu Yhangzo, Yhâng é mingdán eq jé lé lo é lé, a myang é za shí kó râ a nghut." ga tâ ri.

17

Yesuq, Isâm Htaí Lo É Hkyô

Mrk 9:2-13; Luk 9:28-36

¹ Hkyuq nyí lai htâng má, Yesuq gi, Petruq lé le, Yakuq eq yhanggu Yohan nhiktâng lé le, shuí chûng mù, yhangmoq baú myhang é bùm ralhum má doq ló akô. ² Haú má, yhangmoq é myoq hí tê má, Yesuq é ihpyô isâm htaí byuq mù, Yhâng é myoqdong gi, bui su duqbó tô é eq, Yhâng é mebu gi, maubó su hpyu zan tô ri. ³ Haú hkûn jáng, Mosheq eq Eliyaq gi, yhangmoq é hí má htoq shit mù, Yesuq eq dáng nyo lhùm nyi akô.

⁴ Haû mù, Petruq gi, Yesuq lé, "Yhumsing ê, shí jowò má nga-nhúng nyi le ge ri. Nàng ô nau é nghut le gi, Náng é matú ralhum, Mosheq é matú ralhum, Eliyaq é matú ralhum kut, ngò zúm sùm lhum saí bá." ga tâ ri.

⁵ Petruq dang ru tâi nyi ashî le, duqbó é mhut gi, yhangmoq lé htup zing lô mù, mhut hkaú mai htoq lo é

* **16:18** Grik đông Petruq gâ é gi, luqgok lé gâ é nghut lhê.

htê gi, "Shí yuq gi, Ngò chytidap é Ngá Zo nghut lhê; Yhang má Ngò myit dik nyi lhê. Yhâng é dang gyo keq." gâ ri.

⁶ Haû su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekô nghut ri. ⁷ Nghut kôlhang, Yesuq gi, yhangmoq chyáng jé lé lô mù, yhangmoq lé loq èq záng kat luí, "Toq keq, hkâgyuq kó." ga taí ri. ⁸ Yhangmoq tu wú kat kô le, Yesuq mai lai luí, ó lé le a myàng lo kó nghut ri.

⁹ Bùm mai taû gyó lô kô é hkûn, Yesuq gi, "Ahkuí nungmoq myang é hkyô lé, haû Byu Yhangzo shí é mai lhoq dui toq yu é a hui hui gi, ó lé le hkâtaí kyo kó." ga, yhangmoq lé taí hkûm tô ri.

¹⁰ Haû jáng, chángzô pé gi, "Eliyaq hí lé ra râ nghut lhê ga, tarâ sará pé haí mù taí kô é lhú?" ga, Yesuq lé myí akô.

¹¹ Haû hkûn, Yesuq gi, "Eliyaq hí lé luí, lhunglhang lé hen lajâng to râ gâ é gi, têng lhê. ¹² Nghut kôlhang, Ngò, nungmoq lé taí kôlé, Eliyaq gi, jé lé bê nghut lhê; nghut kôle, yhangmoq gi, yhang lé a lhom wú sé kômù, yhangmoq ô nau é dông banshoq kut bekô nghut ri. Haû eq rajung za, haû Byu Yhangzo le, yhangmoq é loq má hpuzo râ nghut lhê." ga tú taí ri. ¹³ Haû hkûn sheq, Yhang taí nyi é gi, Wui-myhup Sará Yohan eq sêng é hkyô nghut é lé, haû chángzô pé sé gyô akô nghut ri.

Nat Wang Júng Sû Lé Lhoq Gê Byí É Hkyô

Mrk 9:14-32; Luk 9:37-45

¹⁴ Yhangmoq, byù moq mó pé chyáng dum taú jé lô kô é hkûn, byù rayuq gi, Yesuq chyáng lé jé mù, hkyihput htuoq luí, ¹⁵ "Yhumsîng ê, ngá é yuqzo lé shogyô yù laq; yhang gi, mhûngtuq tuq luí, gyai yhang jamjaû nyi ri. Myihkyóm má le, wui má le, anum num lêng wàng wàng dut nyi ri. ¹⁶ Yhang lé, Náng é chángzô pé chyáng shuí ê kôlhang, yhangmoq a wó lhoq gê byi kó nghut ri." ga taí ri.

¹⁷ Haû mù, Yesuq gi, "Lumjîng myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haú lé, Ngá chyáng shuí lé lô keq." ga tú taí kat ri. ¹⁸ Yesuq gi, nat gang lé tân kat jáng, nat gang haû gi, yuqgè zo haú yuq chyáng mai htoq ló byuq bê nghut mù, haú hkûn jáng, yuqgè zo haû gi, ge byuq bê nghut ri.

¹⁹ Hau htâng, chángzô pé gi, ó a nyi é u má, Yesuq chyáng lé lô kômù, "Ngamoq gi, haí mù, nat haú lé a wó hkat htoq é lhú?" ga, lé myi kôjáng, ²⁰ Yhang gi, "Nungmoq é lumjîng myit shaû é yanmai nghut ri. Ngò, nungmoq lé teng za taí kôlé, nungmoq é lumjîng myit angshi cham í za hkâlháng bò kô é nghut le gi, bùm shí lé, 'Hé shut htot ló aq.' ga taí le, htot râ nghut lhê. Nungmoq a wó kut é haí lhang joq râ a nghut. ²¹ Shí jung gi, kyûdung é eq zoshuq gám é dông za a nghut jáng, a htoq ló é nghut lhê.*" ga dum tú taí ri.

²² Yhangmoq, Galile mau má rahá zup nyi kô é hkûn, Yesuq gi, yhangmoq lé, "Haû Byu Yhangzo gi, byu pé é loq má ap pyâm é hui zo râ nghut lhê. ²³ Haû bang gi, Yhang lé sat pyám kó râ nghut lhê; nghut kôlhang, Yhang gi, shí é htâng sum nyi nghû râ nyi má lhoq dui toq é hui râ nghut lhê." ga taí ri. Haû mù, haû chángzô pé gi, gyai yhang gyô yón nyi bekô nghut ri.

Noqkuq Yhûm Hkansê Kat É Hkyô

²⁴ Yesuq eq Yhâng é chángzô pé gi, Kaperna-um wà má jé kô é hkûn, noqkuq yhûm hkansê hkyuî bang gi, Petruq chyáng lé jé kômù, "Nungmoq é sará gi, noqkuq yhûm hkansê a kat lhú?" ga myí akô.

²⁵ Petruq gi, "Kat lhê." ga tú taí ri.

Hau htâng, Petruq yhûmhkaû má wang ló le, Yesuq hí lhom taí é gi, "Simun ê, mingkan hkohkam pé gi, kang eq hkansê pé lé, ô pé chyáng mai guq yu akô lhú? Yhumsîng byu pé chyáng mai lhú? Haû a nghut jáng,

* **17:21** Chyûmbun shí gi, chyûmding myo myo má a bo é nghut lhê.

góbâng chyáng mai l hú? Nàng, hkâsu wó myit lê l hú?" gâ ri.

²⁶ Haû mù, Petruq gi, "Góbâng chyáng mai nghut ri." ga tû taí jáng, Yesuq gi, "Haû su nghut le gi, yhum-sing byu pé gi, lut akô nghut ri. ²⁷ Nghut kôlhang, yhangmoq é i-myit a ngón a dut kó sháng gaq, nhông má ê mù, ngo-nhe ê hkyô aq. Sâng-hi wó nhê yu é ngozô é nhut lé lêng há kat jáng, ngùn htingchap rachap lé myàng rá nghut lê. Haû lé yù mù, Ngá é matú eq náng é matú, yhangmoq lé ló byi aq." ga taí ri.

18

Kô Dik Sû Gi, Ó Yuq Nghut Lê L hú?
Mrk 9:33-37, 42-48; Luk 9:46-48; 17:1-2

¹ Haû hkûn, haû chángzô pé gi, Yesuq chyáng lé jé kômù, "Mauhkûng mingdán má, kô dik sû gi, ó yuq nghut lê l hú?" ga myí akô.

² Yesuq gi, zoshâng zo rayuq lé wut yù mù, yhangmoq é gung gûng má shap to luí, ³ taí é gi, "Ngò, nungmoq lé teng za taí kôlé, nungmoq gi, myit htaí lhik luí, zoshâng zo wuî su dut kô é za a nghut jáng, mauhkûng mingdán má hkâ-nhám le wó wâng kó rá a nghut. ⁴ Haû mù, zoshâng zo shí yuq su, yhum-sing é i-myit wó lhoq nyhum é sù ó yuq nghut kôle, mauhkûng mingdán má, kô dik sû nghut ri.

⁵ Shí sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù nghut bê. ⁶ Nghut kôlhang, Ngo lé lumjìng é zoshâng wuî mâ é rayuq yuq lé, mara kut shut nhang é sù gi, yhâng é lingzing má luqluí long mó tuí hut byi luí, nik é wuimau má, dú hkyô pyâm é huí é nghut le gi, yhâng é matú je gè rá nghut lê.

⁷ Haû mingkan gi, byu pé lé mara kut shut nhâng jang joq é yanmai, dingnyé wó ri. Haû mara kut shut nhâng hkyô gi, htoq lugù bê; nghut kôlhang, haû lé lhoq htoq sù gi, dingnyé wó ri. ⁸ Náng é loq èq, a nghut

jáng, náng é hkyi èq, nang lé mara kut shut nhang é nghut le gi, haû lé hpyit dú pyám aq. Ahtum abyuq é myi má, hkyí hkúm loq hkúm gû dú hkyô pyâm é hui rá htoq má, hkyí loq a hkúm é za, asak wó yu é nghut le gi, náng é matú je ge ri. ⁹ Náng é myoqjí èq, nang lé mara kut shut nhang é nghut le gi, haû lé lap choq yù mù, dú pyám aq; myoqjí í jí dap gû ngaraí myi má dú hkyô pyâm é hui rá htoq má, myoq rají eq za, asak wó yu é nghut le gi, náng é matú je ge ri.

Byuq Byuq É Sau

Luk 15:3-7

¹⁰ Shí sù é zoshâng zo wuî mâ é rayuq lé l háng a wú tiq rá matú, sidiq nyi keq. Hkâsu mù gâ le, Ngò, nungmoq lé taí kôlé, mauhkûng mâ é yhangmoq é maumang lagyô pé gi, mauhkûng htoq mâ é Ngá Wâ é myoq-dong lé, hkâ-nhám le myang nyi akô. ¹¹ (Hkâsu mù gâ le, haû Byu Yhangzo gi, byuq byuq bê bang lé hkyi yù rá matú, jé lé é nghut lê.)*

¹² Byù rayuq gi, sau rashô du wó é nghú sháng, sau haû gû mâ é radu byuq byuq é nghut jáng, haû gaú xe gaú du lé, bùm pé má nyhi pyâm to luí, byuq byuq é sau lé a châng ho é nyi rá l hú? Haû lé, nungmoq hkâsu wó myit ngam akô l hú? ¹³ Ngò, nungmoq lé teng za taí kôlé, yhang gi, haû byuq byuq é sau haû lé myang ho é hkûn, a lám byuq é sau gaú xe gaú dû é matú gabú é htoq má, haû dù matú je riyhang gabú ri. ¹⁴ Haû eq rajung za, mauhkûng htoq mâ é nungmoq é Íwa gi, shí tiq bang mâ é rayuq htên byoq byuq rá lé l háng, ô nau é a nghut.

Mara Kut Shut É Gumang Hpó Lé Hkâsu Kut Rá Hkyô

¹⁵ Náng é gumang hpó, nang lé mara kut shut é nghut jáng, yhâng chyáng ê mù, nungnhik baú za nghut é hkûn, yhâng é mara lé tûn shít aq. Yhang, náng é dang lé gyô é nghut jáng, nàng gi, gumang rayuq dum wó bê nghut ri. ¹⁶ Nghut kôlhang, yhang,

* **18:11** Bun zo shí gi, chyúmding myo myo má a bo é nghut lê.

náng é dang lé a gyô é nghut jáng, 'Mara hun é hkyô hkangmó lé, saksé í yuq sum yuq lóm jáng, wó lhoq teng sháng gaq.'* gâ tô é eq rajung za, nàng, gotû byù ra-í yuq lé shuí chûng aq. ¹⁷ Yhang gi, haú bâng é dang lé le a lhom yu é nghut jáng, haú hkyô lé, noqkuq hpúng má shit kyo aq; hpúng é dang lé le a gyô é nghut jáng, yhang lé, a lumjínng é byù rayuq dông le, kang guq sù rayuq dông le sôn pyám aq.

¹⁸ Ngò, nungmoq lé teng za taí kôlé, myigùng htoq má, nungmoq tuí to má tuí to lé, mauhkûng htoq má le, tuí to râ nghut lhê; myigùng htoq má, nungmoq lhoq lhut má lhoq lhut lé, mauhkûng htoq má le, lhoq lhut byi râ nghut lhê.

¹⁹ Ngò, nungmoq lé dum taí kôlé, myigùng htoq má, nungmoq mâ é í yuq myit hui luí, haí lé dung kôlhang, mauhkûng htoq mâ é Ngá Wa gi, haú nhik lé gyo byi râ nghut lhê. ²⁰ Hkâsu mù gâ le, Ngá myîng lé lang luí, í yuq sum yuq zup zîng é jang hkâmá nghut kôlhang, haú bâng é gyoro má Ngò nyi lhê." gâ ri.

Shogyo Nhkmyin A Sê É Jùn Hpô É Dangtú

²¹ Haú hkûn, Petruq gi, Yesuq chyáng huí ê mù, "Yhumsîng ê, ngá é gumang, ngo lé mara kut shut é nghut le, yhang lé hkâ-myhó dâm mara hkyut byi ra râ lhú? Nyhit dâm jé shoq hkyut byi ra râ lhí?" ga myî ri.

²² Haú jáng, Yesuq tû taí é gi, "Ngò, nang lé taí lé, nyhit dâm za a nghut, nyhit xe nyhit tú dâm hkyut byi râ lhê.

²³ Mauhkûng mingdán gi, yhumsîng é dui-nhâng zoshâng wui é jihpán lé jep nau é hkohkâm rayuq eq du ri. ²⁴ Yhang gi, jihpán lé jep hi ló é u lé, yhâng chyáng ngùn wan myo myo chyín dap to sù lé shuí lé lo akô. ²⁵ Haú yhumsîng hpó gi, haú yuq chyín a wó xap é yanmai, chyín wó yú râ matú, yhang lé le, yhangmyi lé le, yhangzo

banshoq eq yhang wó é zèhkoq banshoq lé le, ûng pyám râ hkunmó hkyô kat ri.

²⁶ Haú mù, dui-nhâng zoshâng haú yuq gi, yhâng é hí má hkyihput htuoq luí, 'Ngo lé myit hîng byi shi laq; banshoq lé, ngò xap râ.' ga dung tôngbán ri. ²⁷ Haú dui-nhâng zôshang é yhumsîng hpó gi, haú yuq lé wú shogyo luí, chyín banshoq lhut pyám byi mù, nhang kat ri.

²⁸ Nghut kôlhang, dui-nhâng zoshâng haú gi, htoq ló mù, yhang lé, denari† rashô chyín dap tô é dui-nhâng zoshâng luzúm rayuq lé myàng jáng, haú yuq é lingzing má gyaq myhik zing to mù, 'Ngo lé dap tô é chyín hân xap aq!' ga taí ri.

²⁹ Haú hkûn, yhâng é luzúm dui-nhâng zoshâng haú gi, yhâng é hí má hkyihput htuoq luí, 'Ngo lé myit hîng byi shi laq; ngò xap râ.' ga dung tôngbán ri.

³⁰ Nghut kôlhang, yhang gi, a gyo byi e za, yhâng é chyín dum wó xap é hkûn jé shoq, haú yuq lé htóng hkyô pyám nhâng ri. ³¹ Gotû dui-nhâng zoshâng wui gi, haú hkyô lé myàng kôjáng, i-myit wú nô kôluí, yhangmoq é yhumsîng hpó lé, haú hkyô banshoq ló taí kyô akô.

³² Haú mù, haú yhumsîng hpó gi, dui-nhâng zoshâng haú lé wut hâng yù mù, 'Agè ashop é dui-nhâng zoshâng ê, nàng, ngo lé dung tôngbán é yanmai, nàng, ngo lé dap é chyín banshoq lé, ngò lhut pyám byi bê nghut lhê mhaí. ³³ Haú su é nhîng, ngò, nang lé shogyô yu é su, náng é luzúm dui-nhâng zoshâng lé, nàng ge shogyô yu lhê a nghut lhú?' ga taí luí, ³⁴ yhang gi, nhikjum yo mù, yhâng é chyín ban xap é hkûn jé shoq, jamjau hui zo râ matú, yhang lé, htóng suwún pè chyáng ap byi pyám bê nghut ri.

³⁵ Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkûng htoq tsáng myhâng mâ é Ngá Wa le,

* 18:16 Tarâ Pun 19:15 † 18:28 Denari rachap gi, ra-nyí lhê é byù rayuq é zuihpau eq wui ri.

nungmoq lé haú dông kut râ nghut lhê." gâ ri.

19

Myi Làng Gâng É Hkyô

Mrk 10:1-12

¹ Yesuq gi, mhoqshit é dang haú pé lé ban tái jáng, Galile mau mai htoq ló mù, Yodan làng tũ tap mâ é Yuda mau má ê jé ri. ² Byù moq mó gi, Yhâng htâng cháng kô é nghut mù, Yhang gi, haú bang mâ é nôhpyo hui bang lé, haú má lhoq gê byi ri.

³ Haú hkûn, Hparishe pé ra-am gi, Yhâng chyáng lé jé kômù, Yhang lé chyam wú é dông, "Byù rayuq gi, hai hkyô mai nghut nghut, yhumsing é yhangmyi lé lhoq kâng pyâm le, tarâ wang lhê lhú?" ga myi akô.

⁴ Haú jáng, Yhang tũ tái é gi, "A-nham sâng-hi lé, Hpân Sũ, 'byu hpan é hkûn, yuqgè eq myiwe lé hpan é nghut lhê.^{1*} ⁵ 'Hau é yanmai, yuqgè gi, yhumsing é inu iwâ chyáng mai htoq luí, yhangmyi eq rahá rading ralhum za kut nyi mù, yhangnhik gi, gungsho ralhum za dut byuq kó râ nghut lhê.^{1*} ga kâ tô é lé, nungmoq a nghap wú kó lhú? ⁶ Haú mù luí, yhangnhik gi, í yuq a nghut lô e za, rayuq za dut bê nghut ri. Haú mù luí, Garai Gasang lhoq tsũm tô é lé, byù gi, a lhoq kang sháng gaq." gâ ri.

⁷ Haú hkûn, yhangmoq gi, "Haú lé nhing, yuqgè rayuq gi, lhoq kang laiká za ká byi mù, yhangmyi lé wó nhang pyâm lhê ga, hai mù, Mosheq, hkunmó hkyô tô lhê lhú?" ga, Yhang lé dum taú myi akô.

⁸ Haú mù, Yesuq gi, "A-nham sâng-hi mai gi, haú dông a nghut. Nghut kôlhang, nungmoq é myit nhiklum htân kô é yanmai, nungmoq é yhangmyi pé lé lhoq kang râ ahkáng, Mosheq byi tô é ru nghut lhê. ⁹ Ngò, nungmoq lé tái kôlé, sulàng lú é za a nghut jáng, yhumsing é yhangmyi lé kâng pyâm mù, myiwe gotũ dum hâng yu é sũ ó yuq nghut kôlé, su-myi lú é

sũ dut bê." ga, yhangmoq lé dum tũ tái ri.

¹⁰ Haú hkûn, haú chángzô pé gi, "Myi làng hkyô má haú dông ru nghut le gi, a yu le lhang je ge nyo ri." ga tái akô.

¹¹ Haú mù, Yesuq gi, "Yuq hkangmó gi, dang haú lé wó hap yu é a nghut, wó hkâm râ jeju wó é bang za sheq, wó hap yu é nghut lhê. ¹² Byù ra-am gi, inu unghkaú mai yhang, yuqgè a jé gũ hku lé lo é bang nghut akô; ra-am gi, góbâng èq kut é yanmai, yuqgè a jé dut byuq akô; ra-am nghut jáng, mauhkung mingdán é matú, yuqgè a jé râ dông kut yu pyâm akô nghut ri. Shí hkyô lé wó hap yu sũ gi, hap yu sháng gaq." ga dum tái ri.

Zoshâng Wui Eq Yesuq

Mrk 10:13-16; Luk 18:15-17

¹³ Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shuí lé lo akô. Haú chángzô pé kúm gi, haú shuí lé lô bang lé lhom tân hkũm akô nghut ri.

¹⁴ Nghut kôlhang, Yesuq gi, "Haú zoshâng wui lé, Ngá chyáng lé nhâng keq; yhangmoq lé hkâhkũm zing to kó; hkâsu mù gâ le, mauhkung mingdán gi, haú sũ é bâng é mingdán ru nghut lhê." ga tái kat ri. ¹⁵ Yhang gi, zoshâng wui htoq má loq ke shimân byi mù, haú jowò mai htoq ló bê nghut ri.

Sùt Wó É Zorâm Rayuq É Hkyô

Mrk 10:17-31; Luk 18:18-30

¹⁶ Byù rayuq gi, Yesuq chyáng lé jé mù, "Sarâ ê, ahtum abyuq é asak wó yũ râ matú, ge é muzó hai kut ra râ lhú?" ga myi ri.

¹⁷ Haú jáng, Yesuq gi, "Ge é hkyô eq séng luí, hai mù Ngo lé myi lhê lhú? Ge é Sũ gi, rayuq za nyi lhê. Nang, asak dui é má wàng nau é nghut le gi, jep é tarâ pé lé cháng aq." ga tũ tái ri.

¹⁸ Haú yuq gi, "Hká gũ lé lhú?" ga dum myi jáng, Yesuq gi, "'Byù hkâsat, su-myi hkâlú, hkâhkau, a teng

a mán é saksé hkâhkám, ¹⁹ nánngu nánnga lé hkungga aq, [☆] ga le, 'náng gûng lé nàng chyttdap e su, náng é chyangnâm mâ é bang lé le chyttdap aq. [☆] ga le bo tô ri." ga taí kat ri.

²⁰ Haú hkûn, zorâm hpó haú gi, "Haú pé banshoq lé, ngò cháng bê nghut lhê; haí kut râ ashí lhú?" ga dum taú myí ri.

²¹ Yesuq gi, "Nàng, gumjup sù dut nau le gi, ló mù, nàng wó é sutzè pé lé ûng pyám luí, myùng bang lé byí pyám aq; haú jáng, nàng, mauhkûng htoq má sutzè wó râ nghut lhê; haú mù, Ngá htâng lé cháng aq." ga tũ taí ri.

²² Zorâm hpó haú gi, sutzè gyai wó sù nghut é yanmai, dang haú lé wó gyo jáng, gyai yhang myit a ngón é èq ló byuq bê nghut ri.

²³ Hau htâng, Yesuq gi, Yhâng é chángzô pé lé, "Ngò, nungmoq lé teng za taí kôlé, sutzè wó bang gi, mauhkûng mingdán wó wâng râ gyai yhang wuí ri. ²⁴ Hau htoq agó, Ngò, nungmoq lé taí kôlé, sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." ga taí ri.

²⁵ Haú chángzô pé gi, haú su gâ é lé wó gyo kôjáng, haú ru nghut le gi, ó yuq za hkyi yu é hui râ nghut lhê lhú?" ga Yhang lé myí akô nghut ri.

²⁶ Haú hkûn, Yesuq gi, yhangmoq lé wú kat mù, "Haú hkyó lé byú mai gi, wó kut râ a nghut; nghut kôlhang, Garai Gasang gi, lhunglhang lé wó kut é Sù nghut lhê." ga taí ri.

²⁷ Haú hkûn, Petruq gi, Yhang lé, "Ngamoq gi, wó é gû lhunglhang lé tô pyám to luí, Náng htâng cháng bê nghut lhê. Ngamoq, haí wá wó râ nghut lhê lhú?" ga myí kat ri.

²⁸ Haú mù, Yesuq tũ taí é gi, "Ngò, nungmoq lé teng za taí kôlé, lhunglhang lé asik dum saí dut nhang é má, haú Byu Yhangzo gi, Yhâng é hpungwup bo é hkohkâm-tanghkuq

má zùng tô é hkûn, Ngá htâng châng é bang nungmoq le, hkohkâm-tanghkuq raxe í lhûm htoq má zùng to kômù, Israelaq amyû raxe í hú lé jéyáng kó râ nghut lhê. ²⁹ Ngá é yanmai, yhumsing é yhûm, nhiktâng wuì, înu îwa, zo dù wuì eq yò pé rajung jung lé tô pyám tô é sù ó yuq nghut kôle, rashô tú akyû myo jat shoq wó râ nghut é htoq agó, ahtum abyuq é asak le, wó yû râ nghut lhê. ³⁰ Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyí bang yuq gi, hí bekô râ nghut lhê.

20

Tsibiyiq Hkyâm Mû Zui Bang Lé Dangtú Yu É Hkyô

¹ Hkâsu mù gâ le, mauhkûng mingdán gi, yhumsing é tsibiyiq hkyâm má mû zui nhâng râ langchyáng ê lûng râ ga, napsûn noq le htoq e ló é hkyâm yhumsing eq du ri. ² Yhang gi, ra-nyí é matú denari rachap byi râ dông, haú bang eq myit huí yù mù, yhangmoq lé, yhâng é tsibiyiq hkyâm má nhang hâng kat ri.

³ Napkyó gau hkyíng* kô má, yhang gi, htoq e ló le, hai mû le a kut é za, gài má yap tô é bang ra-am lé ê myang ri. ⁴ Haú mù, yhang gi, haú bang lé, 'Nungmoq le, ngá é hkyâm má mû ê zui keq; byí âng é ahpau, ngò, nungmoq lé byi râ nghut lhê.' ga taí jáng, yhangmoq gi, e ló bekô nghut ri.

⁵ Hau htâng, yhang gi, raxe í hkyíng má le, myinhtâng sum hkyíng kô má le, dum htoq ê mù, haú eq rajung za langchyáng pé é lung kat ri.

⁶ Myinhtâng ngo hkyíng kô má, yhang dum htoq e ló wú le, góbang ra-am le yap tô bum é lé, ê myâng mù, haú bang lé, 'Nungmoq gi, haí le a kut é za, ra-nyí buí haí mù shí má yap tô bum akô lhú?' ga myi jáng, ⁷ haú bang gi, 'Ngamoq lé, ó yuq eq le a lûng kô é yanmai nghut lhê.' ga tũ taí akô.

☆ 19:19 Nhung 19:18 * 20:3 Chyúmdang ra-am má, sum hkyíng ga chung tô é gi, Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai nghap hi lhê.

Haú hkûn, yhang gi, 'Nungmoq le, ngá é hkyâm má mù ê zui keq.' ga taí ri.

⁸ Myinhêng jé jáng, tsibiyiq hkyâm yhumsing gi, yhang é mù shuí u sù lé, 'Haú langchyang pé lé ji yù mù, je htang má lung yu é bang mai hí luí, sâng-hi lung yu é bang jé shoq, mù zui hpau byi aq.' ga taí ri.

⁹ Myinhêng ngo hkying má mù wàng bang le, denari rachap chap wó yu bum akô. ¹⁰ Haú mù, je hí má mù wàng bang gi, yhangmoq je myo wó nhô ngam akô. Nghut kôhang, yhangmoq le, rayuq denari rachap chap za wó akô nghut ri. ¹¹ Yhangmoq gi, haú myhó za wó yu bùm kô é yanmai, haú hkyâm yhumsing lé, ¹² 'Shí bang gi, je htang má mù lé wâng mù, nayí rahkum za mù zui kôhang, nàng gi, ra-nyí buigyùm chap buí htân yò má mù zuí é bang ngamoq eq rajung za byí ri.' ga mara hûn dang taí akô.

¹³ Nghut kôhang, haú hkyâm yhumsing gi, haú bang mâ é rayuq lé, 'Buinùm hpó ê, ngò, nang lé a tarâ é dông kut é a nghut. Denari rachap byi rá nghú, nàng eq ngò myit huí to bê a nghut lú? ¹⁴ Nàng wó âng é lé yu chûng mù, ló aq. Je htang má mù lé wang é sù lé le, nang lé byí é myhó, ngò byí nau ri. ¹⁵ Ngá é ngùn lé, ngò kut nau é su a ge kut lú? Ngò, ge é kut le, nàng manôn ri lú?' ga taí ri.

¹⁶ Haú mù luí, htang gyó nyí bang gi, hí bekô rá nghut mù, hí nghut nyí bang gi, htang gyó byuq kó rá nghut lhê." gâ ri.

Yesuq Gi, Yhang Shí Râ Hkyô Lé Dum Taí Ri

Mrk 10:32-34; Luk 18:31-34

¹⁷ Ahkuí, Yesuq gi, Yerusalem wà mó shut doq ló nyí é u lé, haú chángzo raxe í yuq lé, gotû kut wut yù mù, ¹⁸ "Nga-nhúng gi, Yerusalem wà mó shut doq ló nyí lhê; haú Byu Yhangzo gi, hkyangjong agyi pé eq tarâ sará pé é loq má ap byí pyâm é hui rá nghut lhê; haú bang gi, Yhang lé, shí rá mara byi kó rá nghut é htoq agó,

¹⁹ jóng pyâm é, nhuq bat é eq tapzîng má jén sat pyâm é hui rá matú, haú tûngbaù pé é loq má ap pyâm kó rá nghut lhê. Nghut kôhang, Yhang gi, sum nyí nghú rá buinyí má, lhoq dui toq é dum hui rá nghut lhê." ga taí ri.

Zô Njik Matú Ênu Êq Dung Byí É Hkyô

Mrk 10:35-45

²⁰ Hau htang má, Zebedi é yhangzô nhiktang é yhangnu gi, yhangzô njik eq rahá jé lé lô kômù, rajung dung rá matú, Yesuq é hí má hkyihput htuoq nyi ri.

²¹ Haú mù, Yesuq gi, "Nàng, haí ô nau ri lú?" ga yhang lé myi jáng, yhang gi, "Nàng é mingdán má, shí ngá zô nhiktang lé, Nàng é loqyò hkyam má rayuq, loqpaí hkyam má rayuq kut, zùng rá ahkáng byi laq." ga taí ri.

²² Haú hkûn, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq rá góm† lé, nungnhik wó shuq kó rá lú?" ga myi jáng, yhangnhik tâng gi, "Wó shuq lhê." ga tû taí akô nghut ri.

²³ Haú mù, Yesuq gi, yhangnhik lé, "Ngò shuq rá góm lé, nungnhik shuq ra kó rá za nghut lhê. Nghut kôhang, Ngá é loqyò, loqpaí hkyam má zùng rá ahkáng lé gi, Ngò byí jung a nghut. Jowò haú pé gi, Ngá Wa hen to byi bâng é matú za ru nghut lhê." ga taí ri.

²⁴ Gotû chángzo raxê yuq gi, haú hkyô lé wó gyo kôjáng, haú nhiktang lé njik-yô akô nghut ri. ²⁵ Haú mù, Yesuq gi, yhangmoq banshoq bang lé wut tsing yù luí, "Tûngbaù pé lé uphkan é ga bang gi, tûngbaù pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chûng mù, up zô nyi kô é hkyô lé le, nungmoq sê lhê. ²⁶ Nungmoq chyáng gi, haú su a dut kó sháng gaq; haú Byu Yhangzo lhang gi, dojaú é lé hkam yù rá matú jé lé é a nghut é za, dojaú rá matú eq byù myo myô é matú, shíhtaí

† 20:22 Góm gâ é gi, Yesuq, jamjau hui rá hkyô eq shí rá hkyô lé, taí nau é nghut lhê.

gunglik hkungga dông, Yhâng é asak lé byi pyám râ matú sheq, jé lé é ru nghut é su, ²⁷ nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra râ nghut lhê. ²⁸ Hau htoq agó, nungmoq má ushuq dut naù sù ó yuq nghut kôle, nungmoq é jùn dut ra râ nghut lhê." ga taí ri.

Myoqjit Í Yuq Myoq Dum Myang É Hkyô

Mrk 10:46-52; Luk 18:35-43

²⁹ Yesuq eq Yhâng é chángzô pé gi, Yerihko myuq mai htoq ló nyí kô é hkûn, byù moq mó gi, yhangmoq é htâng má châng e ló bum akô. ³⁰ Haù hkyô yàm má zung tô é myoqjit í yuq gi, Yesuq lai ló nyí é hkyô lé wó gyo kôjáng, "Dawiq é Yhangzo, Yhumsing ê, ngá-nhik lé shogyô yù laq ô!" ga, wut garú kat akô nghut ri.

³¹ Byù moq mó gi, yhangnhik zím byuq râ matú tân hkúm kôlhang, yhangnhik gi, "Dawiq é Yhangzo, Yhumsing ê, ngá-nhik lé shogyô yù laq ô!" ga, je riyhang htê mó eq wut garú kat akô nghut ri.

³² Haù mù, Yesuq gi, yap kat mù, "Ngò, nungnhik lé hai kut byi râ ô nau akô lhú?" ga, yhangnhik lé wut myí kat ri.

³³ Haù hkûn, yhangnhik gi, "Yhumsing ê, ngá-nhik myoq myàng nau ri." ga tú taí akô.

³⁴ Yesuq gi, yhangnhik lé wú shogyo luí, yhangnhik é myoqjí má é záng byí ri. Haù hkûn jáng, yhangnhik gi, myoq wó myâng kômù, Yhâng htâng cháng bekô nghut ri.

21

Yesuq, Yerusalem Wà Mó Má Wang E Ló É Hkyô

Mrk 11:1-11; Luk 19:28-38; Yhn 12:12-19

¹ Yesuq eq Yhâng é chángzô pé gi, Yerusalem wà mó eq chyâng lo nyí kô é hkûn, Tsanlun Bùm má é Bethpage

wà má jé ló kôjáng, Yesuq gi, chángzo í yuq lé, ² "Nungnhik, hí má é wà má ê keq; wà haù má, logúng zîng radu lé, logúng zo eq rahá tuí to lánq é lé, ê myâng kó râ nghut lhê; haù lé hpyi yù mù, Ngá chyáng she lò keq. ³ Byù rayuq yuq, nungnhik lé rajung jung gâ lò jáng, 'Shí í du lé, haù Yhumsing chùng râ ri.' gâ nghú tú taí keq; haù jáng, yhang, radá dâm nhâng byi râ nghut lhê." ga Yesuq taí luí, nhang kat ri.

⁴ Haù gi, myiqhtoi dang lhoq dik râ matú dut lo é nghut ri. ⁵ Myiqhtoi dang haù gi,

"Zi-un byizo* lé, shí su nghú keq; 'Wú aq, náng é hkohkâm gi,

nú-nhâm é myit eq logúng htoq má ji mù, nghut bê, logúng zo htoq má ji mù, náng chyáng lé lô bê nghut ri.'"☆

gâ ri.

⁶ Haù chángzô nhik gi, e ló mù, Yesuq taí kat é eq rajung za ê kut bekô nghut ri. ⁷ Yhangnhik gi, logúng me lé she lò mù, yhangnhik é buhîng pé lé, haù logúng mê é htoq má ke byi kôjáng, Yesuq gi, doq jî ri. ⁸ Byù moq mó má é myo myo gi, yhangmoq é buhîng lé, hkyô má hkyut hkang byí akô; ra-am gi, mhandíng pé lé zân hkyô yù mù, hkyô má hkang byí akô nghut ri. ⁹ Yhâng é hí má htâng má châng sô nyi bum é bang gi,

"Dawiq é Yhangzo gi, hosana† nghut nyí sháng gaq ô!"

"Haù Yhumsing é myìng mai jé lé lô Sù gi, hkungsô wó nyí sháng gaq ô!"☆

"Htoq tsáng myhâng má, hosana nghut nyí sháng gaq ô!" ga luí, taí garú bum akô nghut ri.

¹⁰ Yesuq, Yerusalem wà mó má wang ló é hkûn, rawà gón é bang gi, gabyông lo bùm kômù, "Shí yuq gi, ó wá nghut lhê lhà?" ga luí, myi lhum bum akô.

* **21:5** Zi-un byizo gâ é lichyúm gi, Yerusalem byu pé gâ é nghut lhê. ☆ **21:5** Zhk 9:9 † **21:9** Hebre dang má, hosana gâ é gi, "ahkuí hkyi yù laq" gâ é nghut lhê. Nghut kôlhang, bun zo 9 má gi, hkya-on dang dông chung é nghut lhê. ☆ **21:9** Hkya-on 118:26

11 Haú hkûn, byù moq mó gi, "Shí yuq gi, Galile mau, Nazaret wà byù Yesuq gâ é myiqhtoi nghut lhê." ga taí akô nghut ri.

Yesuq, Noqkuq Yhûm Lé Lhoq Sansêng Pyâm É Hkyô

Mrk 11:15-19; Luk 19:45-48; Yhn 2:13-22

12 Yesuq gi, noqkuq yhûm má wang ê mù, haú má é zè ung zè wuì kut nyi é bang banshoq lé, hkat htoq pyám luí, ngùn htaí zo bâng é si-boí pé eq hpûngkyui ung zo bâng é tanghkuq pé lé, tu mhuc pyám byí ri.

13 Haú hkûn, Yhang gi, "Ngá yhûm gi, kyûdung yhûm ga râ nghut lhê."* ga kâ to kôlhang, nungmoq gi, jowò shí lé 'damaq hkyûng'* kut nyi akô." ga, yhangmoq lé taí ri.

14 Yesuq, noqkuq yhûm má nyi tô é hkûn, myoqjit bang eq hkyí hten bang Yhâng chyáng lé lô kômù, Yhang gi, haú bang lé lhom lhoq gê byí ri. 15 Nghut kôlhang, hkyangjong agyi pé eq tarâ sará pé gi, Yhang kut é mauhpo muzó pé lé le, "Dawiq é Yhangzo gi, hosana nghut sháng gaq." ga, noqkuq yhûm má zoshâng wuì garû nyi bùm kô é lé le, myàng kôjáng, wú nhik-yô bum akô nghut ri.

16 Haú mù, yhangmoq gi, "Zoshâng shí bang haí taí nyi kô é lé, Nang wó gyô lhê lhú?" ga, Yesuq lé myi kôjáng, Yhang gi, "Wó gyô ri. Nungmoq gi, 'Zoshâng wuì eq nyheqnú pé é nhut mai hkya-on kungtôn râ matú, nang lajâng to bê nghut ri.'* ga kâ tô é lé, Chyúmdang má a nghap wú kó lhú?" ga yhangmoq lé taí ri.

17 Hau htâng má, Yhang gi, haú bang lé nyhi to luí, wà hkaú mai htoq ló mù, Behtani wà má é jé luí, haú myîn, haú má bíng yu ri.

Maihpáng Gâm Nyhuí Kyuq Shi Byuq É Hkyô

Mrk 11:12-14, 20-24

18 Yhang gi, htang napkyó noq le, Yerusalem wà mó shut dum taú ló é hkûn, hkyô má zòmút hui bê nghut ri.

19 Haú mù, Yhang gi, hkyô yàm má yuq tô é maihpáng gâm lé myang kat mù, chyâng e wú le, ahaq mai lai luí, haí lé le a myàng nghut ri. Haú mù, Yhang gi, shigâm haú lé, "Nang má, hkâ-nhâm le ashi a zui sháng gaq." ga taí kat ri. Haú hkûn jáng, agâm haú gi, nyhuí kyuq shi ló byuq bê nghut ri.

20 Haú chángzô pé gi, haú lé myàng kôjáng, maú byuq kômù, "Maihpáng gâm shí gi, haí mù haú-í hân nyhuí kyuq shi ló lhê lhà?" ga myi akô.

21 Yesuq gi, "Ngò, nungmoq lé teng za taí kôlé, nungmoq, úng-âng é myit a bo é za, lumjîng kô é nghut le gi, maihpáng gâm má Ngò kut é muzó lé, nungmoq wó kut kó râ nghut é htoq agó, bùm shí lé, 'Htot mù, wuimau má ló gyó wâng aq.' ga taí jáng, taí é eq rajung za dut râ nghut lhê. 22 Nungmoq, lumjîng myit èq dung kô é nghut jáng, haí dúng le le wó yú kó râ nghut lhê." ga tû taí ri.

Yesuq É Ahkáng Ayá Lé Myi Chyam É Hkyô

Mrk 11:27-33; Luk 20:1-8

23 Yesuq gi, noqkuq yhûm wàng hkaú má wang ê mù, mhoqshit nyi é hkûn, hkyangjong agyi pé eq ming-byu é suwún wuì gi, Yhâng chyáng lé jé kômù, "Hai ahko ahkâng èq, Nang, shí pé lé kut nyi lhê lhú? Ahko ahkáng shí, Nang lé ó yuq byí é lhú?" ga myi akô.

24 Haú hkûn, Yesuq gi, "Ngò le, nungmoq lé rajung myi wú kôlé, nungmoq wó tû taí kô é nghut jáng, hai ahko ahkâng èq, Ngò, shí pé kut é hkyô lé taí kyo râ nghut lhê.

25 Yohan byí é baptyisma gi, ó yuq é ahko ahkáng mai nghut lhê lhú? Mauhkûng mai lhú? A nghut jáng, byu chyáng mai lhú?" ga taú myi kat ri.

Haú hkûn, yhangmoq, chôm hpyê lhum kô é gi, "Mauhkûng mai nghut lhê." nghû, nga-nhúng taí jáng le, 'Haú nghut le nhîng, haí mù, yhang lé a lumjîng kô é lhú?' ga râ nghut; 26 'Byu chyáng mai nghut lhê.' nghû jáng

le, yhangmoq lhunghâng bang gi, Yohan lé, myiqhtoi rayuq ga lumjîng bûm kô é nghut lhê yanmai, haú bang lé, nga-nhûng gyuq râ lhê nghut." ga akô.

²⁷ Haú mù, yhangmoq gi, Yesuq lé, "Ngamoq a sé." ga tû taí akô.

Haú hkûn, Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

Yuqzô Nhiktâng Lé Dangtú Yu É Hkyô

²⁸ Yesuq xoq taí é gi, "Nungmoq hkâsu wó myit akô lhú? Byù rayuq gi, yuqzo í yuq wó ri. Yhang gi, ko sù yuq chyáng è mù, 'Ngá zo è, nàng, hkûnyí tsibiyiq hkyâm má mù é zui aq.' ga taí jáng, ²⁹ yuqzo haú gi, 'Ngò a kâm è.' ga tû taí ri; nghut kôlhâng, htâng má, yhang gi, myit dum lhîng mù, è bê nghut ri.

³⁰ Hau htâng, yhângwa gi, yhang zo tiq sù yuq chyáng è mù, rajung za ga è dum taí jáng, yuqzo haú gi, 'È râ, âwa!' ga yín yú kôlhâng, a è kut ri.

³¹ Haú nhiktâng mâ é hká yuq sheq, yhângwa ô nau é hkyô lé kut sù nghut ri lhú?" ga ri.

Haú hkûn, yhangmoq gi, "Ko sù nghut ri." ga tû taí akô.

Haú mù, Yesuq gi, yhangmoq lé, "Ngò, nungmoq lé teng za taí kôlé, kang guq bang eq shiwa myhí pé gi, Garai Gasâng é mingdán má, nungmoq a wàng shimá, wang ló nyi bùm kó râ nghut lhê. ³² Hkâsu mù gâ le, Yohan gi, nungmoq chyáng lé jé mù, dingmán hkyô lé tûn shít kôlhâng, nungmoq gi, yhang lé a jîng kut akô nghut ri; nghut kôlhâng, haú kang guq bang eq shiwa myhí pé gi, yhâng dang lé jîng akô nghut ri. Nungmoq gi, haú hkyô lé myang é nghut kôlhâng, myit a lhîng kô é htoq agó, yhang lé a lumjîng shi kó nghut ri.

Tsibiyiq Hkyâm Saí Bang Lé Dangtú Yu É Hkyô *Mrk 12:1-12; Luk 20:9-19*

³³ Gotû dangtú lé gyô wú shi keq; hkyâm yhumsîng rayuq gi, tsibiyiq hkyâm ralhûm saí to mù, lhîngkhyuq kyâm to luí, tsibiyiq wing pyik htoq râ donghkong dú to mù, machya ralhûm saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byí to mù, gó ming shut e ló byuq bê nghut ri. ³⁴ Kyôshu yoq jé jáng, yhang gi, yhang eq sêng é tsibiyiq shi è yú râ matú, yhâng é dui-nhâng zoshâng wuì lé, haú hkyâm saí zo bâng chyáng nhang kat ri.

³⁵ Haú hkyâm saí zo bang gi, dui-nhâng zoshâng wuì lé, lhom chyup yú kômù, rayuq lé gi, lhom nhuq bat, rayuq lé gi, lhom sat pyám, rayuq lé gi, luqgok èq lhom dú sat pyám, kut akô nghut ri. ³⁶ Hau htâng má, yhang gi, hí dam lhê htoq je myo shoq gotû dui-nhâng zoshâng wuì lé dum nhang kat le le, haú hkyâm saí zo bang gi, hí lhê bang lé su lhom dum kut akô nghut ri. ³⁷ Ló htâng má, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhang zo lé, haú bâng chyáng nhang kat ri.

³⁸ Nghut kôlhâng, haú hkyâm saí zo bang gi, yhang zo lé myàng kôjáng, 'Shí yuq gi, silí wunlí sing yù râ sù nghut lhê; lé keq, yhang lé sat pyám mù, yhâng é silí wunlí lé yu pyám byi sháng.' ga, rayuq eq rayuq taí lhûm bum akô nghut ri. ³⁹ Haú mù, yhangmoq gi, yhang lé, chyup yú luí, hkyâm shinggan shut dú htoq kômù, sat pyám bekô nghut ri.

⁴⁰ Haú mù luí, tsibiyiq hkyâm yhumsîng lé jé é hkûn lé, haú hkyâm saí zo bang lé hkâsu kut nhô ngam akô lhú?" ga Yesuq myí ri.

⁴¹ Haú hkûn, haú hkyangjong agyi pé eq suwún wuì gi, "Haú agè ashop bang lé gi, agè ashop é dông sat pyám râ nghut lhê. Haú tsibiyiq hkyâm lé gi, kyô shu yoq má, yhâng é gambùm lé byi râ bang lé, htot ngho byí pyám râ nghut lhê." ga, tû taí akô nghut ri.

⁴² Haú jáng, Yesuq dum taí é gi, "Chyúmdang má,

'Yhûm saí bâng eq hkyin htoq pyâm é luqgok gi, htungchyûn mâ é ahkyak dik é luqgok dut bê. Shí hkyô gi, haû Yhumsing kut é nghut luí, nga-nhûng é myoq hí má mauhpo dut bê nghut ri.'[✧] ga bo tô é lé, nungmoq a nghap wú kó lhú?

⁴³ Haû mù, Ngò, nungmoq lé taí kôlé, Garai Gasâng é mingdán lé, nungmoq chyáng mai yù mù, hau é ashi wó zui râ byuhú lé byí pyám râ nghut lhê. ⁴⁴ Luqgok haú má gyó záng é sù gi, gyûi gyop byuq râ nghut lhê. Luqgok hau eq gyó nhê záng é sù le, nhê pyeq pyâm é hui râ nghut lhê." gâ ri.

⁴⁵ Hkyangjong agyi pé eq Hparishe pé gi, haû Yesuq taí é dangtú pé lé wó gyo kôjáng, yhangmoq lé taí nyi é hkyô lé, sê gyô akô nghut ri. ⁴⁶ Haû mù, yhangmoq gi, Yhang lé chyup yû râ hkyô ho nyi akô; nghut kôlhang, byu pé gi, Yhang lé, myiqhtoi rayuq ga myit lum to kô é yanmai, yhangmoq gi, haú bang lé gyuq akô nghut ri.

22

Myiháng Poí Dangtú Pé *Luk 14:15-24*

¹ Yesuq, dangtú pé dông yhangmoq lé dum taí é gi, ² "Mauhkûng mingdán gi, yhumsing yhangzô é matú myiháng poí hen lajâng to byí é hkohkâm rayuq eq du ri. ³ Hkohkâm hpó haû gi, yhang ji tô é bang, haû poí má lé lô râ matú, yhâng é dui-nhâng zoshâng wui lé é tsing taí nhang ri; nghut kôlhang, haú bang gi, a lé kut akô nghut ri.

⁴ Hau htâng má, yhang gi, gotû dui-nhâng zoshâng wui lé, 'Ngò haí le hen to bê; ngá é no eq xu-myum é gau-nyhaú pé lé sat mù, jung hkangmó rì rì nghut to bê. Myiháng poí má lé lò keq hkoí nghû, haû ji tô é bang lé é taí keq.' ga pyîng luí, nhang kat ri.

⁵ Nghut kôlhang, haû ji to huí é bang gi, dang haú lé haí su a gyô ngàm kômù, rayuq gi, yohtung shut, rayuq gi, hpugá dînggá hkyô shut é byuq

bekô nghut ri. ⁶ Ra-am dum nghut jáng, yhâng é dui-nhâng zoshâng wui lé lhom chyup yû kômù, nhuq bat luí, sat pyám byí akô nghut ri. ⁷ Haû mù, hkohkâm gi, nhikjum yo luí, yhâng é gyezô pé lé, haû byù sat bang lé sat pyám nhâng mù, yhangmoq é myuq lé nyhê hkyô pyám nhang ri.

⁸ Hau htâng má, yhang gi, yhâng é dui-nhâng zoshâng wui lé, 'Myiháng poí gi, rì rì nghut to bê; nghut kôlhang, haû ji to huí é bang gi, lé râ a gingdán kó nghut ri. ⁹ Haû mù, hkyô kang pé má é luí, myang é yuq hkangmó lé, poí má lé râ matú é jî keq.' ga taí ri. ¹⁰ Haû jáng, dui-nhâng zoshâng haú bang gi, hkyô kang pé má htoq é luí, myang é byù gè byù gang lhunglhang lé ji tsîng yù kô é nghut mù, myiháng poí gi, bíng pé zung byîng bùm bê nghut ri.

¹¹ Nghut kôlhang, bíng haú bang lé, hkohkâm hpó, lé wang wú é hkûn, myiháng poí wàng hking a wut tô é byù rayuq lé, yhang byu-myang ri. ¹² Haû mù, yhang gi, haú yuq lé, 'Buinum hpó é, nàng gi, myiháng poí wàng hking le a wut é nhîng, shí má hkâsu kut wang lo é lhú?' ga myi jáng, haú yuq gi, haí le a dat tû taí lo nghut ri.

¹³ Haú hkûn, hkohkâm hpó gi, yhâng é dui-nhâng zoshâng wui lé, 'Yhâng é hkyî loq má tui luí, haû ngaubyi ngaù nhap eq zui kyik kyik shoq hpuzô nyi râ nghut é shinggan mauchut hkaû má, dú htoq pyám keq.' gâ ri.

¹⁴ Hkâsu mù gâ le, byù myo myo gi, ji yu é hui kôlhang, hkyin yù huí é bang gi, shaû ri." gâ ri.

Kehtaq Lé Kang Kat Byí É Hkyô *Mrk 12:13-17; Luk 20:20-26*

¹⁵ Hau htâng má, Hparishe pé gi, htoq ló kômù, Yhâng é dang pé má mara chyup râ hpaqchyí dâ akô nghut ri. ¹⁶ Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Haú bang gi, Yesuq chyáng lé jé kômù,

✧ 21:42 Hkya-on 118:22-23

"Sarà ê, Nàng gi, tengmán sù nghut é eq, Garai Gasâng é hkyô lé, tengmán é dông mhoqshit é sù nghut é lé le, Nàng gi, ó haí ga râ lé le haí su a ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê. ¹⁷ Haú mù, hkoséng Kehtaq lé kang kat byi le gi, ge lhê lú? A gè lú? Nàng, hkâsu wó myit é hkyô taí kyô wú aq." ga taí akô nghut ri.

¹⁸ Yesuq kúm gi, yhangmoq é agè ashop hkyô lé sé byi mù, "Gegùn labyoq kut bang ê, nungmoq gi, haí mù, Ngo lé lé chyam wú akô lú? ¹⁹ Kang kat râ ngùn htingchap rachap, Ngo lé byi wú keq." ga taí kat ri. Haú hkùn, yhangmoq gi, denari rachap yù byi akô. ²⁰ Haú mù, Yhang gi, yhangmoq lé, "Shí má, ó yuq é alhô eq masat laiká dap tô ri lú?" ga myi jáng, ²¹ yhangmoq gi, "Kehtaq é nghut ri." ga tú taí akô. Haú mù, Yhang gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí kat ri.

²² Haú su gâ é lé, wó gyo kôjáng, haú bang gi, maú byuq kômù, Yhâng chyáng mai htoq ló byuq bekô nghut ri.

Saduke Pé, Yesuq Lé Myi Chyam É Hkyô

Mrk 12:18-27; Luk 20:27-40

²³ Haú nyí má yhang, haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myi akô. ²⁴ Yhangmoq myi kô é gi, "Sarà ê, 'Myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê.' ga, nga-nhúng lé, Mosheq taí tô é nghut lhê. ²⁵ Hí hpyang lé, ngamoq chyáng, gumang nhiktâng wui nyhit yuq nyi akô. Lagám yuq gi, myiwe yù luí, zo dù a dap é za yhangmyi lé shi lhuí pyâm to bê nghut ri. ²⁶ Haú eq rajung za, Lanong, Lalaq mai Lahká jé shoq, chuimó haú lé gon luí, ó le zo dù a

dap é za shi ló byuq bùm bekô nghut ri. ²⁷ Ló htáng má, myiwe myhí haú le châng shi ló byuq bê nghut ri. ²⁸ Haú mù luí, haú dum dui toq é buinyi má, myiwe myhí haú gi, haú nhiktâng wui nyhit yuq mâ é hká yuq é yhangmyi nghut râ lú? Hkâsu mù gâ le, yhang gi, haú nhiktâng wui banshoq bâng é yhangmyi dut wú bê sù nghut ri." gâ akô.

²⁹ Haú hkùn, Yesuq gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri.

³⁰ Haú dum dui toq é buinyi má gi, myi byi myi yú hkyô joq lo râ a nghut; yhangmoq gi, mauhkúng htoq mâ é maumang lagyô pé su dut byuq kó râ nghut lhê. ³¹ Shi é mai dum dui toq bang eq séng luí, ³² Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'* ga, nungmoq lé taí tô é lé, nungmoq a nghap wú kó lú? Yhang gi, shi to bâng é Garai Gasang a nghut; dui nyi bâng é Garai Gasang sheq ru nghut lhê." ga taí ri.

³³ Byù moq mó gi, dang haú wó gyo kôjáng, Yhang mhoqshit é hkyô lé maú byuq bum akô nghut ri.

Ahkyak Dik É Jep É Tarâ

Mrk 12:28-34; Luk 10:25-28

³⁴ Saduke pé lé, Yesuq lhoq zîm pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zîng lé bum akô. ³⁵ Yhangmoq má bo é tarâ sará rayuq gi, Yesuq lé chyam wú é dông, ³⁶ "Sarà ê, jep é tarâ má, hká lhum gi, je ahkyak dik lhê lú?" ga myi ri.

³⁷ Haú mù, Yesuq gi, "'Haú Yhumsing náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq èq, chyitdap râ lhê.'* gâ é nghut lhê. ³⁸ Tarâ haú gi, je hí lhum eq je ahkyak dik é lhum nghut lhê. ³⁹ Hau htang lhum le haú eq du é nghut mù, 'Náng gung lé nàng

chyitdap é su, náng é chyangnâm mâ é bang lé le chyitdap aq. [☆] gâ é nghut lhê. ⁴⁰ Tarâ haû í lhum gi, jep é tarâ banshoq eq myiqhtoi laiká banshoq é dangchyûng nghut lhê." ga, yhang lé taî kat ri.

Hkrisduq Gi, Ô Yuq É Yhangzo?

Mrk 12:35-37; Luk 20:41-44

⁴¹ Hparishe pé zup zîng to kô é hkûn, Yesuq gi, yhangmoq lé, ⁴² "Nungmoq gi, Hkrisduq eq séng luî hkâsu myit ngam akô lhú? Yhang gi, ó yuq é yhangzo nghut lhê lhú?" ga myi jáng, yhangmoq gi, "Dawiq é yhangzo nghut ri." ga tû taî akô.

⁴³ Haû mù, Yhang gi, yhangmoq lé, "Haû hkûn, Dawiq gi, Woi-nyí dông mai, Yhang lé, 'Yhumsîng' ga, haî mù wut lhê lhú? Hkâsu mù gâ le, Dawiq taî é gi,

⁴⁴ 'Haû Yhumsîng Garai gi, ngá é Yhumsîng lé, "Ngò, náng é gum-lau gye pé lé, náng é hkyiwa ô má tô pyâm é hkyîng jé shoq,

Ngá é loqyo hkyam shut zung nyi shi aq." ga taî ri. [☆]

gâ ri. ⁴⁵ Haû mù, Dawiq yhang lháng, Hkrisduq lé, 'Yhumsîng' gâ é nghut le gi, yhangzo za hkâsu ge nghut râ lhú?" ga taî ri. ⁴⁶ Haû mù, ó yuq le, dang rahkun lháng a wó tû taî lo kô é nghut mù luî, haû nyí mai, ó yuq lháng Yhang lé dangmyi a wám myi lo kó nghut ri.

23

Tarâ Sará Pé Eq Hparishe Pé Lé Sidiq Râ Hkyô

Mrk 12:38-40; Luk 11:37-52; 20:45-47

¹ Hau htâng, Yesuq gi, byù moq mó eq Yhâng é chángzô pé lé taî é má, ² "Tarâ sará pé eq Hparishe pé gi, Mosheq é tanghkuq má zung akô. ³ Haû mù, yhangmoq mhoqshit é hkyô chângjup lé, nungmoq châng kut ra kó râ nghut lhê. Nghut kôlháng, yhangmoq kut é dông gi, hkâkut kó;

hkâsu mù gâ le, yhangmoq gi, yhangmoq taî é dông a kut kó nghut ri.

⁴ Yhangmoq gi, byu pé é goqsân má wòlai ke byi kôlháng, yhangmoq yhang gi, wò haû pé lé bo waq râ matú, loqnyhui lháng a kâm lhoq tû kó nghut ri.

⁵ Yhangmoq kut é hkyô lhunglháng gi, byu pé myàng râ matú za kut shit é nghut akô; haû chyúmbun bo é showuî-htûng pé lé lhoq kô yù kômù, buhîng pé mâ é banbyaú pé lé lhoq hing yu akô nghut ri; ⁶ yhangmoq gi, poî pé mâ é réng é jowò pé eq tarajong pé mâ é ahkyak dik é zûng jang pé má, myang zûng râ lé ô nau nyi akô; ⁷ yhangmoq gi, gâi pé má lhom shikyâm yù kó râ eq, byu pé mai, yhangmoq lé, 'Rabai' ^{*} ga lhom wut kó râ lé ô nau nyi bum akô.

⁸ Nungmoq kúm gi, 'Rabai' ga wut râ lé hkâ-ô naù kó; hkâsu mù gâ le, nungmoq gi, sará rayuq za wó lhê nghut é htoq agó, nungmoq banshoq bang gi, gumang chyat ru nghut lhê. ⁹ Haû mù, myidâm htoq má, ó yuq lé le, 'âwa' hkâ-nghû kó; hkâsu mù gâ le, mauhkûng htoq mâ é Îwa rayuq za, nungmoq é Îwa nghut lhê. ¹⁰ Hau htoq agó, 'sarâ' ga wut râ lé, hkâ-ô naù kó; hkâsu mù gâ le, Hkrisduq za, nungmoq é Sará nghut lhê. ¹¹ Nungmoq mâ é je gyaú sù gi, nungmoq é dui-nhâng zoshâng dut râ nghut lhê. ¹² Hkâsu mù gâ le, yhumsîng gùng lé waq toq sù ó yuq nghut kôle, lhoq nyhum pyâm é hui râ nghut lhê, yhumsîng gùng lé lhoq nyhûm sù kúm gi, waq toq é hui râ nghut lhê.

¹³ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byu pé hí má, mauhkûng mingdán hkyô lé xaù tô akô; nungmoq yhang le a wàng kó, wàng nau nyi bang lé le a wàng nhâng kó nghut ri. ¹⁴ (Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le,

[☆] 22:44 Hkya-on 110:1 * 23:7 Aramaik dang dông rabai gâ é gi, sará gâ é lichyúm nghut lhê.

nungmoq gi, chuimó pé é yhûm-yò pé lé hpyoq zo hpyoq shuq é eq kyû hîng hîng dîng shît mhaû é bang nghut akô; haû mù, dam byî é je myo hui zo kó râ nghut lhê.)†

¹⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, byù rayuq lé nungmoq é noqkuq htûng má wó lhoq lhik yû râ matú, myî hkyô, wuî hkyô, châng jón wún kômù, wó lhoq lhik yu é sù lé gi, nungmoq su ngaraî byù í tú shuî dut akô nghut ri.

¹⁶ Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhûm lé lang luî dakam é sù gi, haî a ra; noqkuq yhûm mâ é hîng lé lang mù dakam é sù kúm gi, châng ra bê.' ga lhaq taî akô. ¹⁷ Myoqjit é byù nâ pé ê! Haû hîng eq hîng lé lhoq yúnglhô é noqkuq yhûm gi, hká lhum je ahkyak lhê lhú? ¹⁸ Hau htoq agó, nungmoq gi, 'Haû hkungga gyap lé lang luî dakam é sù gi, haî a ra, nghut kôlhang, haû hkungga zè lé lang mù dakam é sù gi, châng ra bê.' ga le, lhaq taî akô nghut ri. ¹⁹ Myoqjit pé ê! Haû hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê lhú? ²⁰ Haû mù, haû hkungga gyap lé lang luî dakam é sù gi, haû hkungga gyap eq hau é ahtoq má ke tô é zè banshoq lé lang luî dakam é sù dut bê nghut ri. ²¹ Noqkuq yhûm lé lang luî dakam é sù gi, haû noqkuq yhûm eq haû má nyî é Sù lé lang luî dakam é sù dut bê nghut ri. ²² Hau htoq agó, mauhkûng lé lang luî dakam é sù gi, Garai Gasâng é tanghkuq eq haû má zung é Sù lé lang luî dakam é sù dut bê nghut ri.

²³ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, xunmân nghut é gau-tsáng shingtón, bantsaî, hpakkyí pé mâ é xê gambùm ragambùm lé gi, byî nyî kômù, je ahkyak é tarâ nghut é, tarâ rap-rá hkyô, shogyo nhikmyin hkyô

eq lhumzui hkyô pé lé gi, lhaî pyâm tô akô nghut ri. Hî lhum lé kut é su, htang lhum lé le kut râ lhê. ²⁴ Hkyô-u she é myoqjit pé ê! Nungmoq, pyup lé gi, jân pyám kômù, gola-uq lé gi, myui pyâm akô nghut ri.

²⁵ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, zo hkoq shuq góm pé lé ahtoq shut za chî yúng mù, ahte má gi, lú zo lú shuq é eq yhumsing maiwáng zat é myit byíng zan tô ri. ²⁶ Hparishe myoqjit pé ê! Zo hkoq shuq góm é ahte lé hí chî yúng pyám keq, haû jáng, ahtoq le sân-yúng râ nghut lhê.

²⁷ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, but hpyu tô é lup pé eq du akô; haû pé gi, ahtoq má wú yúng kôlhang, ahkaû má gi, mâng bup showui pé eq achay achyut é chângjup byíng tô é nghut ri. ²⁸ Haû eq rajung za, nungmoq gi, byu pé hí má, ahtoq pyâm dingmán é su kut shît kôlhang, ahkaû má gi, gegùn labyoq kut é eq agè ashop é hkyô pé byíng zan tô ri.

²⁹ Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, myiqhtoî pé é lup lé luptsuq tsuq kômù, dingmán bâng é lup pé lé mhón byi kôluî, ³⁰ 'Ngamoq gi, ngamoq é îchyí îwa pé é ipyat má nyî âng é ru nghut le gi, haû myiqhtoî pé é sui lhoq shun é bang má, ngamoq bo lôm râ a nghut.' ga lhaq taî akô. ³¹ Haû su mù, nungmoq gi, haû myiqhtoî pé lé sat pyám bâng é awut ashín pé nghut é hkyô lé, nungmoq gùng nungmoq saksé hkam yu nyî akô nghut ri. ³² Haû mù, nungmoq é îchyí îwa pé hi tô é muzó lé, banshoq châng kut pán keq!

³³ Lhangmuî pé ê, duq htân lhangmuî amyû pé ê! Ngaraî mîng é dam byi hkyô mai, hkâsu wó h pang lut kó râ lhú? ³⁴ Hau é yanmai, myiqhtoî pé, hpaqchyî bò bang eq chyúm

† 23:14 Chyúmding ra-am má gi, bun zo 14 shî a bo é nghut lhê.

sará pé lé, Ngò, nungmoq chyáng nhang kat râ nghut lhê. Haú bang má é ra-am lé gi, nungmoq lhom sat pyám mù, tapzing má jén pyám kó râ nghut lhê; ra-am lé gi, nungmoq é tarajong pé má, nhuq bat kômù, ra-myuq htâng ra-myuq châng hkat zing-rî wún kó râ nghut lhê. ³⁵ Hau é yanmai, haú dingmán sù Abelaq é sui mai hî luî, noqkuq yhûm eq hkungga gyap gyoro má nungmoq sat pyâm é, Berehkiq é yhangzo Zahkariq é sui jé shoq, myidàm htoq má shun pyâm é dingmán bang banshoq é sui gi, nungmoq é ahtoq má jé lô râ nghut lhê. ³⁶ Ngò, nungmoq lé teng za taí kôlé, shí hkyô banshoq gi, ipyat shi é ahtoq má jé râ nghut lhê.

³⁷ Yerusalem ê, Yerusalem ê, myiqhtoî pé lé sat pyám pyám kut mù, náng chyáng nhang kat é bang lé luq-gok eq dú sat sat kut é myuq nàng ê, woqzing gi, yhangzô pé lé, yhâng é dùng hkaú má tsîng lhûng yu é su, nungzô pé lé, Ngò, hkâ-myhó dâm shuí tsîng yù nàu kôlhang, nàng a dóng nghut ri. ³⁸ Wú keq, nungmoq é yhûm gi, nungmoq é matú chamchyuiyui dut pyâm to berâ nghut lhê. ³⁹ Hkâsu mù gâ le, Ngò, nungmoq lé taí kôlé, 'Yhumsing é myîng mai jé lé lo é Sù gi, hkungsô wó nyî sháng gaq.'* ga, nungmoq a taí taí gi, Ngo lé wó myâng kó râ a nghut lo." gâ ri.

24

Ló Htâng Buinyì Má Dut Lò Râ Hkyô

Mrk 13:1-31; Luk 21:5-33

¹ Yesuq gi, noqkuq yhûm mai htoq e ló é u lé, Yhâng é chángzô pé gi, Yhâng é nàm má huî lé lô kômù, haú noqkuq yhum é loqmú pé lé tûn shit akô. ² Haú hkûn, Yesuq gi, yhangmoq lé, "Haú pé banshoq lé, nungmoq myang lhê a nghut kó lú? Ngò, nungmoq lé teng za taí kôlé, luqgok haú pé gi, rachâm htoq racham lhang a kê lhum loshoq, hpyoq hpyi pyâm é hui râ nghut lhê." ga taí ri.

³ Yesuq gi, Tsanlun Bùm má zung tô é hkûn, haú chángzô pé gi, yhangmoq baú Yhâng chyáng lé jé kômù, "Haú hkyô pé gi, hkâ-nhám dut lò râ lú? Nàng gyó lé râ hkûn eq ló htâng buinyì má, hkasù é kumlhá htoq lô râ nghut lhê lú? Ngamoq lé taí kyô wú laq." ga, Yhang lé myî akô.

⁴ Haú hkûn, Yesuq, yhangmoq lé tû taí é gi, "Nungmoq lé, ó yuq eq le a wó shuí nghoq sháng gaq, sidiq nyi keq. ⁵ Hkâsu mù gâ le, 'Ngò gi, haú Hkrisduq nghut lhê.' ga, Ngá myîng lé lêng é byù myo myo pô htoq lô mù, byù myo myo lé hkyô shuí nghoq kó râ nghut lhê. ⁶ Nungmoq gi, majan dut nyi é hkyô eq majan eq sêng é danglám pé lé, wó gyo kó râ nghut lhê; nghut kôlhang, hkâgyuq dàn kó. Haú hkyô pé gi, dut lò râ za nghut lhê; nghut kôlhang, ló htâng é buinyì gi, a nghut shi. ⁷ Byù ra-myû eq ra-myû, mingdán ralhûm eq ralhûm majan zân lhûm lò kó râ nghut lhê. Jowò myo myo má, mutmó gyó é pé eq layàng nún é pé dut lò râ nghut lhê. ⁸ Haú pé gi, wuîhke jamjau hkyo é apûn awang za ru nghut ashî.*

⁹ Haú hkûn, nungmoq gi, zing-rî é eq sat pyâm é hui zo râ matú, ap pyâm é hui kó râ nghut lhê. Byù myû lhunglhang bang gi, Ngá é yanmai, nungmoq lé a ngui kut kó râ nghut lhê. ¹⁰ Haú u lé, byù myo myo gi, lumjing myit lé tô pyám kômù, rayuq eq rayuq a ngui lhum dut é htoq agó, rayuq eq rayuq ap pyâm lhum kó râ nghut lhê. ¹¹ Hau htoq agó, myiqhtoî pyoq pé myo myo pô htoq lô kômù, byù myo myo lé hkyô shuí nghoq kó râ nghut lhê. ¹² Agè ashop é hkyô myô jat lo é yanmai, byù myo myô é chyitdap myit gi, kân ló byuq râ nghut lhê; ¹³ nghut kôlhang, jihûm jé shoq wó hkam jân nyi é sù gi, hkyi yu é huî râ nghut lhê. ¹⁴ Byù myû banshoq má saksé dut râ matú, haú mingdán eq sêng é gabú danglù lé, mingkan gón má hko kyo râ nghut lhê. Hau htâng má sheq, ló htum buinyì jé râ nghut

* 23:39 Hkya-on 118:26 ✦ 24:8 Esai 19:2

lhê.

¹⁵ Haû mù luî, myiqhtoi Danielaq dông mai taî tô é eq rajung za, 'haû lhoq hten lhoq hpyoq é achag achyut hkyô[☆] gi, chyoiyúng jowò má shap tô é lé, nungmoq myàng kó râ nghut lhê. (Chyúmlaika nghap sù gi, sê gyo sháng gaq). ¹⁶ Haû hkûn, Yuda mau má nyi é bang gi, bùm pé shut hpang doq ló kó sháng gaq. ¹⁷ Yhumhkûng htoq má nyi tô é sù gi, yhúmkaû mã é zè haî lé le, a ló gyó wang yù lo sháng gaq. ¹⁸ Yò má nyi tô é sù gi, yhâng é buhîng lé a ló taû yu nyi lo sháng gaq. ¹⁹ Haû buinyi pé má, zogûng dut é myiwe eq naú huq ashî nghut é înu wuî gi, gyai yhang wuîhke jamjau kó râ nghut lhê. ²⁰ Haû nungmoq hpâng râ buinyi gi, gyoqmyò, * a nghut jáng, Bánno buinyi má a ang râ matú, kyúdüng nyi keq. ²¹ Hkâsu mù gâ le, mingkan lé joq é hkûn mai ahkuî jé shoq, hkâ-nhám le a dut wú shî é wuîhke jamjau mó gi, haû buinyi pé má dut lò râ nghut lhê; haû sù é hkyô gi, htàngnùng má hkâ-nhám le dum dut lo râ a nghut. ²² Buinyi haû pé lé lhoq shaû pyâm é za a nghut le gi, ó yuq le asak wó lut râ a nghut; nghut kôlhang, Garai Gasang èq hkyin yù hui bâng é matú gi, buinyi haû pé lé, lhoq shaû pyâm byi râ nghut lhê. ²³ Haû ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haû a nghut jáng, 'Wú keq, Yhang hê má nyi ri.' ga taí jáng, nungmoq hkâjîng kó. ²⁴ Hkâsu mù gâ le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá mó pé eq laklaî kumlhá pé lé kut shit kó râ nghut lhê. ²⁵ Gyo keq, shí hkyô a dut shimá, Ngò, nungmoq lé taî kyô nyi gù nghut lhê.

²⁶ Haû mù, rayuq yuq èq, nungmoq lé, 'Yhang gi, yoso má nyi ri.' gâ jáng le, hkâ-ê kó; 'Yhang gi, shî gok hkaû

má lúng tô ri.' ga jáng le, hkâjîng kó. ²⁷ Hkâsu mù gâ le, bui htoq hkyam má lhap hpyat é gi, bui wang hkyam má lhang jé shoq duqbó é su, haû Byu Yhangzo jé lé é hkûn le, dut râ nghut lhê. ²⁸ Màng leq é jang má, langdâ pé, lé zîng bùm râ nghut lhê.

²⁹ Buinyi haû pé má é wuîhke jamjau lai eq yhang,

'Bui gi, noq byuq mù, lhamó gi, a tsô dut byuq râ nghut lhê;

kyî pé gi, mauhkûng mai byit gyó lo bùm mù, mauhkûng mã é wum-o a-tsam pé gi, lhoq nhûn é huî bùm kó râ nghut lhê.[☆]

³⁰ Haû hkûn, haû Byu Yhangzô é kumlhá gi, mauhkûng má htoq shit lô râ nghut mù, myidâm htoq mã é byù myû lhunglhang gi, yón ngau bùm kó râ nghut lhê. Haû Byu Yhangzo gi, mauhkûng mai, mhut ji mù, hpungwup a-tsam mó eq le, hpungwup shingkâng eq le, gyó lé lo é lé, yhangmoq byu-myàng kó râ nghut lhê. ³¹ Hau htâng má, Yhang gi, Yhâng é maumang lagyô pé lé, tut htê mó èq nhang kat luî, yhangmoq gi, maumyî chyûn myi chyûn eq mauhkûng rahkyam mai, gó hkyam htum shoq mã é, Yhang hkyin yu tô é bang lé shuí tsîng yù kó râ nghut lhê.

³² Maihpáng gâm lé wú mù, mhoq yû keq; agâm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê. ³³ Haû eq rajung za, shí hkyô banshoq[†] lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyî bê hkyô lé, nungmoq sé lo keq. ³⁴ Ngò, nungmoq lé teng za taí kôlé, shí pyat mã é byu pé a ban shi byuq shimá, haû hkyô pé[‡] banshoq dut byuq râ nghut lhê. ³⁵ Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyî râ nghut lhê.

☆ **24:15** Dan 9:27; 11:31; 12:11 * **24:20** Israelaq mau má gi, gyoqmyò lé hkyô htoq le gyai wuîhke é ahkyíng nghut lhê. ☆ **24:29** Esai 13:10; 34:4 † **24:33** Shí hkyô banshoq gâ é gi, Yesuq jé lé râ hí má dut râ hkyô pé lé taî é nghut lhê. ‡ **24:34** Haû hkyô pé gâ é gi, Yerusalem noqkuq yhûm htên byoq râ lé taî é nghut lhê.

Haû Buinyi Eq Ahkyíng Lé, Ó Le A Sé
Mrk 13:32-37; Luk 17:26-30, 34-36;
12:35-48

³⁶ Buinyi eq ahkyíng haû lé gi, ó yuq le a sé; mauhkûng htoq mâ é mau-mang lagyô pé lháng a sé; haû Zo le a sé; haû Îwa za ru sê lhê. ³⁷ Noaq é tsîn pyat má dut é su, haû Byu Yhangzo lé lo é hkûn le, dut râ nghut lhê. ³⁸ Hkâsu mù gâ le, dowuî a dîng shî é buinyi pé má, byu pé gi, Noaq, wuî-sanghpo mó hkaû má wang é hkûn jé shoq, zo zo shuq shuq, myi byi myi yû, kut nyi bum akô nghut ri; ³⁹ yhangmoq gi, dowuî dîng lô mù, yhangmoq banshoq lé ûm sat pyâm é hkûn jé shoq, haû dut lò râ lé, a sé kó dut bùm é su, haû Byu Yhangzo lé lo é hkûn le, dut râ nghut lhê. ⁴⁰ Haû hkûn, yò má rahá nyi tô é byù í yuq mâ é rayuq gi, shuí yu é hui mù, rayuq gi, myit gyó to râ nghut lhê. ⁴¹ Luqluí chôm lãng nyi é myiwe í yuq mâ é rayuq gi, shuí yu é hui mù, rayuq gi, myit gyó pyâm to râ nghut lhê.

⁴² Haû su mù, haû nungmoq é Yhumsîng gi, hká nyi jé lé lô râ lé, nungmoq a sê kô é yanmai, sidiq machya nyi keq. ⁴³ Myín hká u má hkau sù jé lé lô râ lé, yhumsîng sê é ru nghut le gi, yhâng é yhûm má a wó hput wâng nhâng loshoq, yhang machya nyi râ nghut é lé, nungmoq sê gyô nyi keq. ⁴⁴ Haû mù, nungmoq le rì rì nghut nyi keq; hkâsu mù gâ le, haû Byu Yhangzo gi, a bûn nùng má jé lé lô râ nghut lhê.

⁴⁵ Yhumsîng hpô é dui-nhâng zoshâng wuî lé, uphkâng râ eq ahkyíng jé jáng zoshuq gãm byi râ matú, yhumsîng hpô eq mù nhang tô é, lhumzui luî, hpaqchyî bo é dui-nhâng zoshâng gi, ó yuq nghut râ lú? ⁴⁶ Yhumsîng hpó dum taû lo é hkûn, haû su kut nyi lãng é dui-nhâng zoshâng gi, hkungsô wó nyi ri. ⁴⁷ Ngò, nungmoq lé teng za taí kôlé, yhumsîng hpó haû gi, yhâng é sutzè banshoq, dui-nhâng zoshâng haû yuq lé ap to râ nghut lhê. ⁴⁸ Nghut kôlhâng, laqmá mù, dui-nhâng zoshâng haû

yuq gi, agè ashop sù nghut luî, 'Ngá é yhumsîng hpó jé lô râ gyai myáng ashî.' ga, yhâng é i-myit unghkaû má myit yù mù, ⁴⁹ gotû dui-nhâng zoshâng luzúm wuî lé nhuq bat é htoq agó, î shuq wut bang eq rahá zo zo shuq shuq kut nyi é nghut le gi, ⁵⁰ dui-nhâng zoshâng hau é yhumsîng hpó gi, yhang a myitngam tô é buinyi eq yhang a sê tô é ahkyíng má jé lô mù, ⁵¹ yhang lé jap pyám luî, gegùn labyoq kut bang hkâm zô é, ngaubyi ngaû nhap eq zuì kyik kyik shoq hpuzô nyi râ jowò má hkyô pyám râ nghut lhê.

25

Zomyi Raxê Yuq Lé Dangtú Yu É
Hkyô

¹ Haû hkûn, mauhkûng mingdán gi, myibung yu chûng mù, lusik lé te yù râ ga, htoq e ló é zomyi raxê yuq eq pûng râ nghut lhê. ² Haû bang má, ngo yuq gi, nhik a gyíng kó; ngo yuq gi, nhik gyíng akô nghut ri. ³ Haû nhik a gyíng é bang gi, myibung yu chûng kôlhâng, xû a yu chûng kó nghut ri. ⁴ Nghut kôlhâng, haû nhik gyíng é bang kúm gi, yhangmoq é myibung lé le, xû bo é bòng lé le yu chung akô nghut ri. ⁵ Lusik jé lé lô râ myáng nyi é yanmai, yhangmoq banshoq bang gi, yhup mui lò kômù, yhup myhí byuq bekô nghut ri.

⁶ Myín gunggãm jé jáng, 'Lusik jé bê ô! Yhang lé te yù râ matú, htoq lé lô keq hkoi ô!' ga, garû é htê htoq lo ri.

⁷ Haû hkûn, zomyi haû bang banshoq gi, toq lô mù, yhangmoq é myibung lé hen lajâng akô nghut ri. ⁸ Haû nhik a gyíng bang gi, 'Ngamoq lé, xû ratsuí byi kó laq; hkâsu mù gâ le, ngamoq é myibung shi ló nyi ri.' ga, haû nhik gyíng bâng chyáng dúng akô.

⁹ Haû hkûn, haû nhik gyíng bang gi, 'Nungmoq eq ngamoq é matú ga jáng, luq râ a nghut. Haû mù, nungmoq é matú, xû ung bâng chyáng é wui yù keq.' ga tû taí kat akô.

¹⁰ Yhangmoq, xû wuî e ló kô é hkûn, lusik gi, jé lé lô mù, haû rì rì hen tô é zomyi wuî gi, yhang eq rahá myiháng

poí má wang ló bekô. Hkum le myhi byuq bê nghut ri.

¹¹ Hau htâng má, hau htâng gyó tô é zomyi wui gi, tau jé lô kômù, 'Yhumsîng ê! Yhumsîng ê! Ngamoq lé, hkum hpóng byi laq ô!' ga taí akô.

¹² Nghut kôlhang, haú lusik gi, 'Ngò, nungmoq lé teng za taí kôlé, nungmoq lé ngò a sé.' ga tú taí kat ri.

¹³ Haú mù luí, haú Byu Yhangzo jé lé râ buinyi eq ahkyíng lé, nungmoq a sé kô é yanmai, sidiq machya nyi keq.

Dui-nhâng Zoshâng Sum Yuq Lé, Dangtú Yu É Hkyô

Luk 19:11-27

¹⁴ Mauhkûng mingdán gi, byù rayuq byìn we htoq râ hen nyi é nghut mù, yhâng é dui-nhâng zoshâng wui lé wut yù luí, yhâng é sutzè lé ap byi to sù eq pung ashí nghut ri. ¹⁵ Yhang gi, yhangmoq é a-tsam má cháng luí, rayuq lé gi, ngùn ngo jói, rayuq lé gi, í jói, htâng rayuq lé gi, rajoí kut byi to mù, byìn we shut htoq ló byuq bê nghut ri. ¹⁶ Ngùn ngo jói wó yù sù gi, haú hkûn jáng htoq ló mù, hpugá gá luí, ngùn ngo jói wó myat yù bê nghut ri. ¹⁷ Haú eq rajung za, ngùn í jói wó yù sù le, í jói wó myat yù bê nghut ri. ¹⁸ Nghut kôlhang, rajoí za wó yù sù gi, htoq e ló mù, myigùng má du luí, yhâng yhumsîng hpô é ngùn lé haq myhup tô ri.

¹⁹ Hau htâng tsómra myáng jáng, dui-nhâng zoshâng haú bâng é yhumsîng hpó gi, dum taú jé lô mù, yhangmoq é ngùn chyarâng lé, lo jep ri. ²⁰ Ngùn ngo jói wó yù sù gi, amyat ngo jói lé le yu lé lô mù, 'Yhumsîng ê, nàng, ngo lé, ngùn ngo jói ap tô é nghut lhê. Wú aq, amyat ngo jói wó ho jat yù bê.' ga taí ri.

²¹ Haú hkûn, haú yhumsîng hpó gi, 'Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lhê. Náng yhumsîng hpô é gabú hkyô má bo wang lóm aq hkoi!' ga tú taí ri.

²² Haú eq rajung za, í jói wó yù sù le, lé lô mù, 'Yhumsîng ê, nàng, ngo lé ngùn í jói ap tô é nghut lhê. Wú aq, amyat í jói wó ho jat yù bê.' ga, lé taí ri.

²³ Haú hkûn, haú yhumsîng hpó gi, 'Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lhê. Náng yhumsîng hpô é gabú hkyô má bo wang lóm aq hkoi!' ga tú taí ri.

²⁴ Hau htâng, rajoí wó yù sù le, lé lô mù, 'Yhumsîng ê, nàng gi, byù wui nghut mù, yhumsîng a hô tô é jang mâ é shù yù nau é htoq agó, yhumsîng, kyôshi a sân hkyô tô é jang mâ é tsíng yù naù sù nghut é lé, ngò sê lhê.

²⁵ Haú mù, ngò gi, gyuq luí, htoq ê mù, náng é ngùn lé, myigùng má ê haq myhup tô é nghut lhê. Wú aq, shí gi, nàng é ngùn nghut lhê.' ga taí ri.

²⁶ Haú mù, yhumsîng hpó gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsîng a hô tô é jang mâ é shù yù nau é eq, yhumsîng, kyôshi a sân hkyô tô é jang mâ é tsíng yù naù sù nghut é lé, nàng sê to gù nghut le nhîng, ²⁷ ngá é ngùn lé, ngò dum taú jé lô jáng, aráng eq amyat wó yù shoq, ngùn hpún kat jang má, haí mù a kat tô é lhú?

²⁸ Haú mù, haú ngùn rajoí lé, náng chyáng mai yù luí, raxê jói wó to sù lé, byí pyám nhâng râ nghut lhê. ²⁹ Hkâsu mù gâ le, wó sù ó yuq lé nghut kôle, yhang agùn agó wó râ matú, jat byi râ nghut lhê. A wó su chyáng mai kúm gi, yhang wó tô é lé lhang yu pyám byi shirâ nghut lhê. ³⁰ Haú mù, haú akyû a bo é dui-nhâng zoshâng lé gi, ngaubyi ngàu nhap eq zuí kyik kyik shoq hpuzô nyi râ jowô nghut é, shinggan mauchut hkaú má dú htoq pyám keq.' gâ ri.

Sau Eq Bainám

³¹ Haú Byu Yhangzo gi, Yhâng é hpungwup shingkang mai, mau-mang lagyo lhunglhang bang eq rahá jé lé lo é hkûn, Yhâng é hpungwup

shingkang bo é hkohkâm-tanghkuq htoq má zùng râ nghut lhê. ³² Haú hkûn, byù myû chângjup gi, Yhâng é hí má zîng lé lo bùm kó râ nghut mù, Yhang gi, sau zúng sũ mai, sau eq bainám lé gotû tû kut gam hkoq é su, byu pé lé gam hkoq pyám râ nghut lhê. ³³ Yhang gi, sau pé lé, loqyo hkyam shut, bainám pé lé, loqpaî hkyam shut kut, nyhi to râ nghut lhê.

³⁴ Hau htâng má, haú Hkohkâm gi, Yhâng é loqyo hkyam shut mâ é bang lé, 'Ngá Wâ chyáng mâ é shimân jeju hkam yu é hui bang ê, lé keq; mingkan lé hpan é hkûn mai, nungmoq é matú ga hen lajâng tô é muí mingdán má wang ló keq. ³⁵ Hkâsu mù gâ le, Ngò zòmút é u lé, nungmoq, Ngo lé byi tso kô é nghut lhê; Ngò wuìshit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut lhê; ³⁶ Ngò gùngchîn dut é u lé, nungmoq, Ngo lé byi hut kô é nghut lhê; Ngò nòhpyo huí é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga taí râ nghut lhê.

³⁷ Haú hkûn, haú dingmán bang gi, Yhang lé, 'Yhumsîng ê, Nàng zòmút huí é lé, ngamoq, hkâ-nhám myàng luí, byi tsô wú é lhú? Nàng wuìshit é lé, ngamoq, hkâ-nhám myàng luí, byi huq wú é lhú? ³⁸ Nàng bíng kut wún é lé, ngamoq, hkâ-nhám myàng luí, lhom hkulum wú é lhú? Nàng gùngchîn dut é hkûn, ngamoq, hkâ-nhám byi hut wú é lhú? ³⁹ Nàng nòhpyo huí é lé le, htóng lúng é lé le, ngamoq, hkâ-nhám myàng luí, lé gon lé kum wú é lhú?' ga myi kó râ nghut lhê.

⁴⁰ Haú hkûn, haú hkohkâm gi, 'Ngò, nungmoq lé teng za taí kôlé, shî, Ngá gumang wuì mâ é je tiq sũ lé, nungmoq kut byi é hkyô haí le, Ngo lé kut byi é nghut bê.' ga tû taí râ nghut lhê.

⁴¹ Hau htâng má, Yhang gi, Yhâng é loqpaî hkyam shut mâ é bang lé, 'Dingnyé wó é bang ê, Ngá chyáng mai

gâng ló mù, nat Tsadán eq yhâng é maumâng pê é matú hen tô é, ahtum abyuq é myi má wang ló keq. ⁴² Hkâsu mù gâ le, Ngò zòmút é u lé, nungmoq, Ngo lé a byi tso kó; Ngò wuìshit é u lé, nungmoq, Ngo lé a byi huq kó; ⁴³ Ngò bíng kut wún é u lé, nungmoq, Ngo lé a lhom hkulum yù kó; Ngò gùngchîn dut é u lé, nungmoq, Ngo lé, mebu a byi hut kó; Ngò nòhpyo huí é eq htóng lúng é u lé, nungmoq, Ngo lé a gon kó nghut ri.' ga taí râ nghut lhê.

⁴⁴ Haú hkûn, yhangmoq gi, 'Yhumsîng ê, nàng zòmút wuìshit é, bíng kut wún é, gùngchîn dut é, nòhpyo huí é eq htóng lúng é lé, ngamoq, hkâ-nhám myàng luí, a wú gon kut wú é lhú?' ga taú myi kó râ nghut lhê.

⁴⁵ Haú hkûn, Yhang gi, 'Ngò, nungmoq lé teng za taí kôlé, shí bang mâ é je tiq sũ lé, nungmoq, a kut byi é hkyô haí le, Ngo lé a kut byi é nghut bê.' ga, yhangmoq lé tû taí râ nghut lhê.

⁴⁶ Haú mù luí, haú bang gi, ahtum abyuq mara dam byi é má wang ló kó râ nghut lhê; haú dingmán bang kúm gi, ahtum abyuq é asak má wang ló kó râ nghut lhê." ga Yesuq taí ri.

26

Yesuq Lé, Sat Râ Da Kô É Hkyô

Mrk 14:1-2; Luk 22:1-2; Yhn 11:45-53

¹ Yesuq gi, haú hkyô pé lé ban taí é htâng má, Yhâng é chángzô pé lé, ² "Nungmoq sê tô é eq rajung za, í nyí lai é htâng má, Lhoqlhai Poí jé râ nghut mù, haú Byu Yhangzo gi, tapzîng má jén sat é hui râ matú, ap pyâm é hui râ nghut lhê." ga taí ri.

³ Haú u lé, hkyangjong agyi pé eq suwún wuì gi, Kayahpaq gâ é hkyangjong mó rayuq é yhumwàng má zup zîng to kômù, ⁴ Yesuq lé haq chyup yú râ eq sat pyám râ hkyô lé, hpyê lhùm bum akô nghut ri. ⁵ Nghut kôlhang, yhangmoq gi, "Byu pé gabyông lò kó abe, poí gyoro má gi, a kut shi sháng." ga, taí lhùm akô nghut ri.

Yesuq, Xû Hut Gyun Huî É Hkyô
Mrk 14:3-9; Yhn 12:1-8

⁶ Yesuq gi, Behtani wà má nyi é manggâm dap wú sù Simûn é yhûm má nyi tô é hkûn, ⁷ myiwe myhí rayuq gi, gyai hpaû é namngón xû bo é luq hpyû bông yu lé lô mù, Yesuq zo shuq nyi é hkûn, namngón xû haú lé, Yhâng é ulhum má hut gyun byî ri.

⁸ Haú hkyô lé, haú chángzô pé myàng kôjáng, wú nhik-yo kômù, "Haî mù luî, haú lé aha agó kut pyâm lhê lú? ⁹ Xû haú lé, ahpau myo myô èq ùng pyám mù, myùng bang lé byî le ge lhê mhaî!" ga taí kat akô.

¹⁰ Yesuq gi, haú hkyô lé sé luî, "Haî mù, myiwe zo haú lé, i-myt lhoq myô nyi akô lú? Yhang gi, Ngá é ahtoq má ge é hkyô kut bê nghut ri.

¹¹ Haú myùng bang gi, nungmoq eq rahá hkâ-nhám le nyi rá nghut lhê; nghut kôlhang, Ngò gi, nungmoq eq rahá ayang nyi nyi rá sù a nghut.

¹² Yhang, Ngá gûng má namngón xû hut gyûn é gi, Ngá gûng lé yhum rá matú, hen lajâng é hkyô nghut ri.

¹³ Ngò, nungmoq lé teng za taí kôlé, haú gabú danglù lé, mingkan gón hko kyô é jowò hkangmó má, yhang lé myit bún é dông, yhang kut é hkyô shî lé, taí kyo bekô rá nghut lhê." ga taí kyo ri.

Yesuq Lé, Yudaq Èq Ung Zô Pyâm É Hkyô

Mrk 14:10-11; Luk 22:3-6

¹⁴ Hau htâng, haú chángzo raxe í yuq má bo é Yudaq Iskarut ga sù gi, hkyangjong agyi pé chyáng ê mù, ¹⁵ "Ngò, Yesuq lé nungmoq é loq má ap byî é nghut jáng, nungmoq, ngo lé haî byi kó rá lú?" ga myî ri. Haú mù, yhangmoq gi, yhang lé ngùn denggá sum xê chap nghap byî akô. ¹⁶ Haú hkûn mai, Yudaq gi, Yesuq lé ap pyám rá hkyô ho nyi bê nghut ri.

Yhumsing É Myinzang

Mrk 14:12-26; Luk 22:7-23; Yhn 13:21-30

¹⁷ Múnchi a kat é Muk Zo Poî sâng-hi nyí má, haú chángzô pé gi, Yesuq

chyáng lé lô kômù, "Nàng zo rá Lhoqlhai Poî zoshuq lé, ngamoq hkâmá món to rá lú?" ga myî akô.

¹⁸ Haú mù, Yhang gi, "Myuq hkaû shut wang ló mù, byù rayuq chyáng ê luî, haú yuq lé, 'Ngá é ahkyíng chyáng bê; Ngá é chángzô pé eq rahá, Ngò, náng é yhûm má Lhoqlhai Poî kut rá nghut lhê.' gâ Sará taí ri nghû, è taí keq." ga pying kat ri. ¹⁹ Haú mù, haú chángzô pé gi, Yesuq pying kat é eq rajung za è taí kômù, Lhoqlhai Poî lé món to bekô nghut ri.

²⁰ Myinhtâng jé lô jáng, Yesuq gi, haú chángzo raxe í yuq eq rahá, zoh-poq má zung tô ri. ²¹ Yhangmoq zô nyi bùm kô é u lé, Yesuq gi, "Ngò, nungmoq lé teng za taí kôlé, nungmoq má é rayuq sù gi, Ngo lé ap pyám rá nghut lhê." ga taí ri.

²² Haú hkûn, yhangmoq gi, gyai gyô yón kômù, rayuq htâng rayuq, "Yhumsing ê, ngò a nghut hkaî?" ga, Yhang lé chôm myî akô.

²³ Haú hkûn, Yesuq gi, "Ngò eq rahá, hkoq shí má loq lap bê sù gi, Ngo lé ap pyám rá sù nghut lhê. ²⁴ Haú Byu Yhangzo gi, Yhang eq séng luî kâ tô é eq rajung za, shî rá za nghut lhê. Nghut kôlhang, haú Byu Yhangzo lé ap pyâm é sù gi, dingnyé wó ri; haú yuq gi, a hku lé le lhang, je ge ri." ga dum taí kat ri.

²⁵ Hau htâng, Yhang lé ap pyám rá sù, Yudaq gi, "Rabai ê, ngò a nghut hkaî?" ga myi jáng, Yesuq gi, "Nàng nghut ri." ga tû taí kat ri.

²⁶ Yhangmoq zô nyi kô é u lé, Yesuq gi, muk lé yù mù, jeju hkya-on luî, muk lé myhik hpé mù, "Shî gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gâm byî ri.

²⁷ Hau htâng, Yhang gi, góm lé le, yù mù, jeju hkya-on luî, yhangmoq lé byi mù, taí é gi, "Nungmoq ban-shoq bang, shuq keq. ²⁸ Shî gi, yubak mara hkyut pyám byi rá, byù myo myô é matú htoq pyâm é, dangshikaq eq sêng é Ngá sui nghut lhê. ²⁹ Ngò, nungmoq lé taí kôlé, ahkuî mai gi,

Ngò, Ngá Wâ é mingdán má, nungmoq eq rahá tsibiyiq wing asik lé shuq é buinyi a jé jé, tsibiyiq wing lé dum shuq râ a nghut lo." ga taí ri.

³⁰ Yhangmoq gi, hkya-on mahkôn ralhum ban hkôn jáng, Tsanlun Bùm shut htoq e ló bekó nghut ri.

Petruq He-ngik Râ Lé, Te Tai É Hkyô

Mrk 14:27-31; Luk 22:31-34; Yhn 13:36-38

³¹ Hau htâng má, Yesuq gi, yhangmoq lé, "Nungmoq lhunglhâng bang gi, hkû-myîn yhang jáng, Ngá é yanmai, myit lingbat kó râ nghut lhê; hkâsu mù gâ le,

'Haû sau zúng sù lé, Ngò bat sat pyám mù, sau hpúng mâ é sau pé gi, lhoq pyo pyám é hui kó râ nghut lhê.'[✧]

ga kê tô ri. ³² Nghut kôlhâng, Ngò gi, lhoq dui toq é huí htâng má, Galile mau shut, nungmoq é hí má e ló lángrâ nghut lhê." gâ ri.

³³ Haú hkûn, Petruq gi, "Náng é yanmai, góbang banshoq myit lingbat kôlhâng, ngò gi, hkâ-nhám le myit lingbat râ a nghut." ga tû taí ri.

³⁴ Yesuq gi, "Ngò, nang lé teng za taí lé, hkû-myîn yhang jáng, woq a tûn shimá, nang, Ngo lé sum dâm he-ngik pyám râ nghut lhê." ga tû taí ri.

³⁵ Nghut kôlhâng, Petruq gi, "Ngò, Nang eq rahá shí râ dut kôlhâng, Nang lé ngò he-ngik pyám râ a nghut." ga saí taí ri. Haû chángzô pé góbang banshoq le, haû su ga châng taí bum akô nghut ri.

Get-samane Gâ É Jowò Má Kyûdûng É Hkyô

Mrk 14:32-42; Luk 22:39-46

³⁶ Hau htâng má, Yesuq gi, Yhâng é chángzô pé eq rahá Get-samane gâ é jowò má é kômù, yhangmoq lé, "Ngò, hé má é mù, kyûdûng nyi é u lé, nungmoq shí má zúng lángrâ keq." ga taí ri.

³⁷ Yesuq gi, Petruq eq Zebedi yhangzô nhik lé shuí chûng ri. Yhang gi, myit gyai a ngón é eq myit wui nhik hkyik

dut lò bê nghut ri. ³⁸ Hau htâng, Yhang gi, yhangmoq lé, "Ngò gi, shí râ í yhang myit yón nyi ri; nungmoq gi, Ngò su machyâ luí, shí má lángrâ nyí keq." ga taí ri.

³⁹ Yesuq gi, haû mai ratsuí zo sô é mù, myigùng má ngóm gop to luí, "Áwa ê, wó dut é nghut le gi, góm* shí lé, Ngá chyáng mai lhai pyám byi laq. Nghut kôlhâng, Ngò ô nau é dông a nghut, Nang ô nau é dông sheq nghut sháng gaq." ga kyûdûng ri.

⁴⁰ Hau htâng, Yhang gi, Yhâng é chángzô pé chyáng dum taú lo le, yhangmoq yhup myhî to kô é lé lo myàng ri. Haû mù, Yhang gi, Petruq lé, "Nungmoq gi, hkyíng hkum rahkum za lángrâ, Ngò eq rahá a wó machyâ nyi kó lhú? ⁴¹ Gunglaú é a hui sháng gaq, machyâ luí, kyûdûng nyi keq. Haû woi-nyí gi, kâm nyi kôlhâng, gungsho gi, wum nyhôm nyi ri." ga taí ri.

⁴² Yhang gi, radàm dum ê mù, "Áwa ê, góm shí lé, Ngò a shuq é a wó lai râ nghut jáng gi, Nang ô nau é dông nghut sháng gaq hkoi." ga kyû dum dûng ri.

⁴³ Yhang dum taú lo le, yhangmoq gi, myoqkuq lai kô é yanmai, yhup myhî to lángrâ kô é lé, lo dum myàng ri. ⁴⁴ Haû mù, Yhang gi, yhangmoq lé tô pyám to mù, sum dâm nghú râ dàm dum ê luí, hí lé dûng é dang lé roq é dum dûng ri.

⁴⁵ Haû mù, Yhang gi, haû chángzô pé chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lhú? Wú keq! Haû ahkyíng gi, jé bê nghut luí, haû Byu Yhangzo gi, yubak dap bâng é loq má ap pyám é hui râ nghut bê. ⁴⁶ Toq keq! Ló losháng hkoi! Ngo lé ap pyám râ sù gi, jé lé bê nghut ri." ga taí ri.

Yesuq, Chyup Yû Huí É Hkyô

Mrk 14:43-50; Luk 22:47-53; Yhn 18:3-12

⁴⁷ Yesuq, dâng nyo nyi ashí u lé, haû chángzo raxe í yuq má bo é Yudaq gi,

✧ 26:31 Zhk 13:7 * 26:39 Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

jé lé lo ri; haù hkyangjong agyi pé eq mingbyu é suwún wui chyáng mai nhang kat é bang nghut é, sâm eq dumbáng pé chung tô é byù moq mó le, yhang eq rahá nghut akô. ⁴⁸ Yesuq lé ap pyám râ sù gi, haù bang lé, "Ngò, bopuq puq é sù gi, haù yuq nghut bê; Yhang lé chyup yù keq." ga kumlhá byi tô ri. ⁴⁹ Yudaq gi, Yesuq chyáng hkyê za ê mù, "Rabai ê, wángzán nyi lhé lhú?" ga taí luí, Yhang lé bopuq puq byi ri.

⁵⁰ Haù hkûn, Yesuq gi, "Buinùm hpó ê, nàng kut râ muzó lé kut aq hkoi." ga tû taí kat ri.

Hau htâng, yhangmoq gi, hí shut huí ê luí, Yesuq lé chôm zuí zìng mù, chyup yù bekô nghut ri. ⁵¹ Haù mù, Yesuq eq rahá nyi bang mâ é rayuq gi, sâm she htoq yù mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁵² Haù jáng, Yesuq gi, haù yuq lé, "Náng é sâm lé, xâng pyám aq; hkâsu mù gà le, sâm shê sù gi, ó yuq nghut kôle, sham èq shí râ nghut lhé. ⁵³ Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byi râ nghut é lé, nungmoq a sé kó lhú? ⁵⁴ Nghut kôlhang, haù su nghut é nghut jáng, shí hkyô dut lò râ nghut lhé ga Chyúmdang pé má bò tô é hkyô gi, hkâsu wó dik lò râ lhú?" ga taí kat ri.

⁵⁵ Hau htâng, Yhang gi, byù moq lé, "Nungmoq gi, damyaq rayuq lé chyup é su, Ngo lé chyup râ matú, sâm eq dumbáng pé chùng mù, lé lo akô lhú? Ngò gi, nyí wuí, no-qkuq yhùm má zùng mù, mhoqshit nyi kôlhang, nungmoq, Ngo lé a chyup yù kô é nghut lhé. ⁵⁶ Nghut kôlhang, shí su dut é hkyô pé banshoq gi, haù myiqhtoí pé kâ tô é hkyô pé lo dik râ matú dut é nghut ri." ga taí ri. Haù hkûn, haù chángzô pé banshoq gi, Yesuq lé tô pyám to kôluí, hpang byo byuq bekô nghut ri.

Yudaq Byìn Tú Wapdoq Má Jep Huí

É Hkyô

Mrk 14:53-65; Luk 22:54-55, 63-71; Yhn 18:13-14, 19-24

⁵⁷ Yesuq lé chyup yu é bang gi, haù tarâ sará pé eq suwún wui zup zìng nyi é jang, hkyangjong mó Kayah-paq é yhùm má, Yhang lé shuí e akô. ⁵⁸ Petruq gi, hkyangjong mó é yhumwàng hkaù má châng jé wâng shoq, we we mai Yesuq htâng châng tô ri. Yhang gi, hkâsu dut lò râ lé myàng naù luí, wâng hkaù má wang ê mù, zúng bang eq rahá zung tô ri.

⁵⁹ Haù hkyangjong agyi pé eq Yudaq byìn tú wapdoq mâ é góbang gi, Yesuq lé sat pyám nhâng râ matú, a têng é saksé ho nyi akô. ⁶⁰ A têng é saksé myo myo htoq lô kôlhang, wó sat râ î é saksé a myàng kó nghut ri.

Ló htáng má, byù í yuq gi, lé lô kômù, ⁶¹ "Shí yuq gi, 'Ngò gi, haù Garai Gasâng é noqkuq yhùm lé lhoq hten pyám mù, sum nyí gyoro má dum wó saí lhé,' ga taí sù nghut ri." ga taí akô.

⁶² Haù hkûn, haù hkyangjong mó gi, toq yap mù, "Nàng, haí le a tû taí luq? Shí bang, Nang lé mara hun nyi é saksé gi, hká dông nghut lhé lhú?" ga, Yesuq lé myí ri. ⁶³ Nghut kôlhang, Yesuq gi, jit le a ga nyi tô ri.

Haù mù, hkyangjong mó gi, Yhang lé, "Haù rú dui nyi é Garai Gasâng é myìng lé lang luí, ngò, Nang lé myí wú lé: Nàng gi, Garai Gasâng é Yhangzo, Hkrisduq nghut lhé luq, ngamoq lé taí kyô wú aq." ga taí jáng, ⁶⁴ Yesuq gi, "Nàng taí é eq rajung za nghut lhé. Ngò, nungmoq banshoq lé taí kôlé, nungmoq gi, ahkuí mai htâng hpyang má, haù Byu Yhangzo gi, a-tsam bo dik Su é loqyo hkyam má zung tô é lé le, mhuthtui ji mù, mauhkûng mai lé lo é lé le, nungmoq myàng kó râ nghut lhé." ga taí ri.

⁶⁵ Haù hkûn, hkyangjong mó gi, yhâng é bu lé lãng cheq pyám mù, "Yhang gi, Garai Gasang lé rhoí dang taí bê nghut ri! Nga-nhúng, hai saksé râ ashí lhú? Yhang, Garai Gasang lé rhoí dang taí é lé, nungmoq, ahkuí wó gyo bekô nghut lhé. ⁶⁶ Nungmoq

hkâsu wó myit akô lúhú?" ga myi jáng, yhangmoq gi, "Yhang gi, shí gíng sù nghut lhê." ga tû taí akô nghut ri.

⁶⁷ Hau htâng má, yhangmoq gi, Yesuq é myoqdong má sôkan byé gyun luí, loqtsup eq htui byi akô nghut ri. Góbang gi, Yhang lé bo-pyuq pyuq byi luí, ⁶⁸ "Hkrisduq Nàng, Nàng lé bat sù ó yuq nghut é lé, myiqhtoi htoí wú aq." ga taí akô.

Yesuq Lé, Petruq He-ngik Pyâm É Hkyô

Mrk 14:66-72; Luk 22:56-62; Yhn 18:15-18, 25-27

⁶⁹ Petruq gi, wâng hkaú má nyi tô é u lé, dui-nhâng zoshâng myhí rayuq gi, yhâng chyáng lé jé mù, "Nàng le, haú Galile byù Yesuq eq rahá nyi sù nghut ri." ga taí ri.

⁷⁰ Nghut kôlhang, Petruq gi, haú bang banshoq é hí má yhang, "Nàng haí taí nyi é lé, ngò a sé." ga he kat ri.

⁷¹ Hau htâng, yhang gi, wâng hkúmdong shut htoq e ló le, haú jowò má, dui-nhâng zoshâng myhí góyuq le, yhang lé myàng mù, "Shí yuq gi, Nazaret wà byù Yesuq eq rahá nyi sù nghut ri." ga, haú má é bang lé taí kat ri.

⁷² Haú hkûn, yhang gi, "Byù haú yuq lé, ngò a sé!" ga dakam é dông he pyâm ri.

⁷³ Hau htâng razup zo má, haú jowò má yap to bang gi, Petruq chyáng huí é kômù, "Nàng le, haú bang má bò sù yhang nghut ri; náng é danghtê lé sê gyô ri." ga taí akô.

⁷⁴ Haú hkûn, yhang gi, yhânggùng yhang nhing luí, "Haú yuq lé, ngò a sé." ga dakâm dang taí ri.

Haú-u yhang, woq tân bê nghut ri.

⁷⁵ Haú mù, Petruq gi, "Woq a tân shi má, nàng, Ngo lé sum dâm he pyám rá nghut lhê." ga, Yesuq, yhang lé taí é dang lé, myit bûn kat mù, shinggan shut htoq ê luí, gyai yhang ê ngau ri.

27

Yudaq Juíshi É Hkyô

Mrk 15:1; Luk 23:1-2; Yhn 18:28-32

¹ Napsûn noq le, hkyangjong agyi pé banshoq bang eq mingbyu é suwún wui gi, Yesuq lé sat pyám nhâng rá matú chôm myit hpyit yú bekô nghut ri. ² Haú mù, yhangmoq gi, Yhang lé tuí yù luí, shuí htoq é kômù, mauzau Pilat chyáng ê ap byi akô nghut ri.

³ Yesuq lé ap pyâm é sù Yudaq gi, Yesuq lé jéyáng doqđân é hkyô lé myang sé jáng, nungngham wó mù, haú ngùn sum xê chap lé, hkyangjong agyi pé eq suwún wui chyáng ló dum taú byi ri. ⁴ Haú mù, yhang gi, "Mara a bò Su é sui lé, ngò ap pyám bê nghut é yanmai, ngò mara wó bê." ga taí jáng, yhangmoq gi, "Haú hkyô, ngamoq eq haí sêng lhê lúhú? Haú gi, nàng eq sheq ru sêng lhê." ga lhom taí kat akô nghut ri.

⁵ Haú mù, Yudaq gi, ngùn haú lé, noqkuq yhúmhkaú má dú pyâm to luí, htoq ló mù, yhang gùng yhang ê juíshi byuq bê nghut ri.

⁶ Haú hkyangjong agyi pé gi, ngùn chap haú pé kui yù luí, "Shí gi, sui hpau ngùn nghut lhê yanmai, alu sidek má a ge kat." ga taí akô.

⁷ Haú mù, yhangmoq gi, tûngbaù pé é lupdùng kut rá matú, au saí zo su é maumyí lé, ngùn hau eq wui hpyit yú rá dông, chôm myit hpyit to bekô nghut ri. ⁸ Hau é yanmai, ahkuí jé shoq, haú jowò lé, sui myigùng ga myhíng tô akô nghut ri. ⁹ Haú gi, "Haú Israelaq byu pé mai, Yhang lé gù hpyit tô é ngùn sum xê chap lé, yhangmoq yù mù, haú Yhumsîng Garai, ngo lé pying tô é eq rajung za, ¹⁰ haú au saí zo su é maumyí lé, yhangmoq wui yù bekô nghut ri." ga myiqhtoi Yermiaq taí tô é dang lo dik é nghut ri.

Yesuq Lé, Pilat Myí Jep Wú É Hkyô

Mrk 15:2-15; Luk 23:3-5, 13-26; Yhn 18:33—19:16

¹¹ Haú u lé, Yesuq gi, mauzau hpô é hí má yap tô é nghut mù, haú mauzau hpô gi, Yhang lé, "Nàng gi, Yudaq byu pé é hkohkâm nghut lhê lúhú?" ga myi jáng, Yesuq gi, "Nàng taí é eq rajung za nghut lhê." ga tû taí ri.

12 Haû hkyangjong agyi pé eq suwún wuî gi, Yhang lé, mara hûn kôjáng, Yhang gi, haî le a tû taí nghut ri. 13 Haú hkûn, Pilat gi, Yhang lé, "Yhangmoq, Nang lé mara hûn saksé haû-í hkâm nyî kô é lé, Nang a wó gyo lú?" ga saî myî ri. 14 Nghut kôlhang, Yesuq gi, dang rahkun lhang a tû taí é yanmai, haû mauzau hpó gi, gyai maú byuq bê nghut ri.

15 Haû Lhoqlhai Poî u lé, ming-byû wuî ô nau é má cháng luî, haû mauzau hpó gi, htóng byû rayuq yuq lé nhâng byî é htung joq ri. 16 Haú u lé, a gè myîng htoq é htóng byû, Barabaq ga sù rayuq nyi ri. 17 Haû mù, byû moq mó zup zîng lò kô é hkûn, Pilat gi, yhangmoq lé, "Nungmoq é matú, hká yuq lé lhut byi nhâng nau akô lú? Barabaq luq? Haú a nghut jáng, Hkrisduq gâ é Yesuq lé luq?" ga myî ri. 18 Yhang haû su ga myî é gi, yhangmoq, Yesuq lé manôn kôluî, yhang chyáng lé ap byi kô é hkyô lé sé é yanmai nghut ri.

19 Pilat gi, tarâ jéyáng tingnyâng htoq má zung tô ashî hkûn, yhangmyi gi, "Haû mara a bò Sù lé, haî le hkâkut; hkâsu mù gâ le, hkû-nyî za lhang, yhupmoq má, haú yuq é yanmai, ngò tsómra hpuzô pyám bê nghut lhê." ga, yhang chyáng dang pying kat ri.

20 Nghut kôlhang, haû hkyangjong agyi pé eq suwún wuî gi, Barabaq lé dúng htoq yû râ eq Yesuq lé sat pyám nhâng râ matú, shiwa byu pé lé wum byi bekô nghut ri.

21 Haû mauzau hpó gi, "Shî í yuq mâ é hká yuq lé, nhâng byi nhâng nau akô lú?" ga myi jáng, yhangmoq gi, "Barabaq!" ga tû taí akô nghut ri.

22 Haû mù, Pilat gi, "Haû jáng gi, Hkrisduq gâ é Yesuq lé, ngò hkâsu kut râ lú?" ga dum myî kat jáng, yhangmoq banshoq bang gi, "Yhang lé tapzîng má jén sat pyám aq!" ga dum tû taí akô nghut ri.

23 Nghut kôlhang, yhang gi, "Haî mù luî lú? Yhang gi, hai mara kut shut bê lú?" ga dum myi jáng, yhangmoq gi, htê mó èq, "Yhang lé tapzîng má

jén sat pyám aq!" ga je riyhang garû lo bum akô nghut ri.

24 Pilat gi, hká dông le a dat kut lô é eq byu pé gabyông lò kó râ nghut é hkyô lé myàng luî, uchyam yû mù, shiwa byu pé hí má loq chi luî, taí é gi, "Shî yuq é sui gi, ngò eq haî a séng; nungmoq eq za ru sêng lhê." gâ ri.

25 Haû shiwa byû lhunglhang bang gi, "Yhang é sui gi, ngamoq eq ngamoq é yhangzo yhangshú pé htoq má joq nyî sháng gaq." ga, dum tû taí kat akô nghut ri.

26 Haú hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám râ matú ap byi kat bê nghut ri.

*Yesuq Lé, Gyezô Pé Rhoi É Hkyô
Mrk 15:16-21; Yhn 19:2-3*

27 Hau htâng, mauzau hpô é gyezô pé gi, Yesuq lé, mauzau hpô é yhumwàng mó hkaû má shuí wang ló kômù, Yhang é lhinghkyuq má, gyedap gón lé ji tsîng tô akô. 28 Yhangmoq gi, Yesuq é mebu hkyut pyám byi kôluî, zam zam ne é buhîng hut byi kômù, 29 zujanmaú ralhum saî yû kôluî, Yhang é ulhum má tsung byi akô nghut ri. Yhangmoq gi, jàm-yang rahkat lé, Yhang é loqyo loq má kat byi kômù, Yhang é hí má hkyihput htuq kôluî, "Yudaq byu pé é hkohkâm hpó ê! Chyung hîng xê hîng nyî sháng gaq ô!" ga, jihpoi dang taí akô. 30 Yhangmoq gi, Yhang lé sôkan byé gyun luî, Yhang é loq mai jàm-yang lú yû mù, Yhang é ulhum má dum bat bat kut akô nghut ri. 31 Yhangmoq gi, Yhang lé rhoi jihkyoî ban kut yû kôjáng, Yhang wut tô é buhîng lé hkyut yû kômù, Yhang é mebu lé dum hut byi luî, tapzîng má jén sat pyám râ matú, Yhang lé shuí htoq e ló bekô nghut ri.

*Yesuq Lé Jén Pyâm É Hkyô
Mrk 15:22-32; Luk 23:27-43; Yhn 19:17-27*

32 Yhangmoq htoq e ló nyi le, Kuruni myuq byû nghut é Simun ga sù lé myàng kômù, yhang lé, zik

luí tapzîng waq nhang akô nghut ri. ³³ Yhangmoq gi, Golgahta gâ é jowò má jé e ló bekô nghut ri. Golgahta gâ é lichyúm gi, ugyap joq é jowò lé gâ é nghut lhê. ³⁴ Haú má jé jáng, yhangmoq gi, Yesuq lé, hkô jung eq nyhò tô é tsibiyiq wing lé byi huq akô; nghut kôlhang, Yhang gi, haú lé chyam wú mù, a shuq byi kut pyâm ri. ³⁵ Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyîn shosé shé é dông gam yu pyâm byi akô. ³⁶ Hau htâng, yhangmoq gi, haú jowò má zung to mù, Yhang lé zúng nyi akô nghut ri. ³⁷ Yhâng é u htoq má, "SHÍ YUQ GI, YUDAQ BYU PÊ É HKOHKÂM, YESUQ NGHUT LHÊ." ga, Yhang lé mara hun é laiká kê tap tô akô. ³⁸ Haú hkûn, Yhang eq rahá, damyaq í yuq lé le, Yhâng é loqpaí hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri. ³⁹ Hkyô sô laí ló é bang gi, nyhap é dông u-ngut nut mù, taí kô é gi, ⁴⁰ "Noqkuq yhûm lé hpyoq pyám luí, sum nyí gyoro má dum wó saí lhê ga Sû ê! Nàng, Garai Gasâng é Yhangzo nghut le gi, Náng gûng nàng hkyi yù luí, tapzîng mai gyó lo wú aq mhai!" ga akô nghut ri.

⁴¹ Haú eq rajung za, hkyangjong agyi pé, tará sará pé eq suwún wuí le, Yhang lé rhoí jihkyoi kut mù, taí kô é gi, ⁴² "Shí yuq gi, góbang lé hkyi yù sù nghut kôlhang, Yhânggûng yhang gi, a wó hkyi yù nghut ri myhi-nhung! Yhang gi, Israelaq byu pé é hkohkâm nghut lhê lhà! Ngamoq wó lumjîng râ matú, Yhang, tapzîng mai gyó lo wú sháng gaq. ⁴³ Yhang gi, Garai Gasang lé lumhkaú sù nghut lhê mù, Garai ô nau é sù nghut le gi, ahkuí Yhang lé hkyi yù sháng gaq; hkâsu mù gâ le, Yhang gi, 'Ngò, Garai Gasâng é Yhangzo nghut lhê.' ga taí ri." ga bum akô nghut ri. ⁴⁴ Haú eq rajung za, Yhang eq rahá tapzîng má jén to huí é damyaq í yuq le, Yhang lé rhoí dang

taí akô nghut ri.

Yesuq Soqkâng Byit É Hkyô

Mrk 15:33-41; Luk 23:44-49; Yhn 19:28-30

⁴⁵ Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri. ⁴⁶ Myinhâng sum hkyíng kô má, Yesuq gi, "Eloi, Eloi, lama sabakhtani?" ga, htê mó eq garú kat ri. Hau é lichyúm gi, "Ngá Garai ê, Ngá Garai ê, Nàng, haí mù, Ngo lé tô pyâm tô lhê lhú?" gâ é nghut ri.*

⁴⁷ Haú nâm má yap tô é bang ra-am gi, haú lé wó gyo kôjáng, "Yhang gi, myiqhtoi Eliyaq lé wut nyi ri." ga taí akô.

⁴⁸ Haú hkûn jáng, yhangmoq má é rayuq gi, din e ló mù, wuimaù lé ê yu ri. Yhang gi, haú lé tsibiyiq wing chyîn má jum yù luí, jàm-yang má tuí tap mù, Yesuq shuq râ matú yhun byi ri. ⁴⁹ Góbang gi, "Yhang lé, Eliyaq, lé hkyi yu lhê laq, nga-nhung chôm láng wú sháng." ga taí akô nghut ri.

⁵⁰ Haú hkûn, Yesuq gi, htê mó eq dum garú kat luí, Yhâng é soqkâng byit bê nghut ri.

⁵¹ Haú u lé, haú noqkuq yhûm má é pán-gyang gi, ahtoq mai a-ô í hkyam byáng goq byuq bê nghut ri. Myigûng le nún lô mù, luqgok pé le goq byuq bê nghut ri. ⁵² Lup pé gi, bóng lô mù, shi byuq bê é chyoiyúng bang myo myo gi, lhoq dui é huí akô. ⁵³ Haú bang gi, Yesuq dum dui toq é htâng, lup mai htoq lô kômù, chyoiyúng myuq* má wang ê luí, byù myo myô hí má htoq shit akô nghut ri.

⁵⁴ Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô ban-shoq lé myàng kôjáng, gyuq dân kômù, "Yhang gi, gè gè yhang, Garai Gasâng é Yhangzo nghut ri-nhung!" ga taí akô nghut ri.

⁵⁵ Myiwe wuí myo myo le, we we mai wú nyi bum akô. Haú bang gi, Yesuq râ é má garúm râ matú, Galile

* 27:46 Hkyá-on 22:1 * 27:53 Chyoiyúng myuq gâ é gi, Yerusalem wà mó lé gâ é nghut lhê.

mau mai Yhang htâng châng lé é bang nghut akô. ⁵⁶ Haú bang má, Magadalaq wà mâ é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnú pé le bo akô nghut ri.

Yesuq Lé, Myhup Pyâm É Hkyô

Mrk 15:42-47; Luk 23:50-56; Yhn 19:38-42

⁵⁷ Myinhâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé lo ri. ⁵⁸ Yhang gi, Pilat chyáng ê mù, Yesuq é gungsôm lé ê dung jáng, Pilat gi, yhang lé byi râ matú hkunmó hkyô kat bê nghut ri. ⁵⁹ Yosep gi, gungsôm lé yù mù, pán yúng eq htop yup luí, ⁶⁰ luqgok lé kyúng tô é, yhâng é lup sik hkaú má é kat tô ri. Hau htâng, yhang gi, luphkum má, luqlông eq lhêng chí pyâm to luí, ló byuq bê nghut ri. ⁶¹ Magadalaq wà mâ é Mariq eq goyuq Mariq gi, lup hí má zung tô akô nghut ri.

Lup Zúng É Hkyô

⁶² Haú Hên Lajang Buinyi lai é htâng nyí lé, hkyangjong agyi pé eq Hparishe pé gi, Pilat chyáng ê mù, ⁶³ "Yhumsing é, Yhang, asak dui nyi ashí hkún, 'Sum nyi nghú râ buinyi má, Ngò dum dui toq lô râ.' ga, haú byù mhaú taí é dang lé, ngamoq bün nyi lhê. ⁶⁴ Haú mù, haú sum nyi nghú râ buinyi jé shoq, lup lé rago za zúng nhang to aq. Haú a nghut jáng, Yhâng é chángzô pé, mâng lé lé hkaú yu ló mù, Yhang shi é mai dum dui toq lô bê ga, byu pé lé taí kó râ nghut lhê. Shí, ló htâng dàm mhaú é hkyô gi, sâng-hi dàm htoq je wui râ nghut lhê." ga, lé taí akô nghut ri.

⁶⁵ Haú hkún, Pilat gi, "Nungmoq sê é dông, lup lé haí a dut loshoq, gyezô pé lé zúng nhang to keq." ga tú taí kat ri. ⁶⁶ Haú mù, yhangmoq gi, ê luí, lup lé gau shoq ga, luqgok má dizik htung mù, lup zúng byù nyi to bekô nghut ri.

28

Dum Dui Toq Lo É Hkyô

Mrk 16:1-8; Luk 24:1-12; Yhn 20:1-10

¹ Bánno buinyi lai jáng, rabat é sâng-hi nyí maubó zó má, Magadalaq wà mâ é Mariq eq goyuq Mariq gi, lup má é wú râ ga, e ló akô.

² Haú hkún, layàng mó nún lo ri; hkâsu mù gâ le, Yhumsing Garaí é maumang lagyo rayuq gi, mauhkung mai gyó lé lô mù, lup má é luí, haú luqlong lé tu lheng mù, hau ahtoq má zung tô ri. ³ Yhâng é isâm gi, lhap su duqbó mù, Yhâng é mebu gi, gyo su hpyu zan tô ri. ⁴ Zúng nyi é bang gi, yhang lé lúm wú gyuq kômù, pyik pyik nán luí, shí gùng su dut bùm bekô nghut ri.

⁵ Haú maumang lagyo gi, myiwe haú nhik lé, "Hkâgyuq kó! Haú tapzing má jén sat huí é Yesuq lé, nungnhik ho nyi kô é lé, ngò sê lhê. ⁶ Yhang gi, shí má a nyi lo; Yhang taí tô é eq rajung za, lhoq dui toq é hui bê nghut ri. Yhang lé lheq é jowò lé, lé wú keq. ⁷ Haú mù, hân taú ló luí, Yhâng é chángzô pé lé, 'Yhang, shi é mai lhoq dui toq é hui bê nghut ri; nungmoq é hí má, Galile mau shut ló lánng berâ. Nungmoq, Yhang lé, haú má ló myâng kó râ nghut lhê.' nghú ló taí kyo keq. Nungnhik lé, ngò taí é lé matsing chung keq." ga taí kat ri.

⁸ Haú mù luí, myiwe myhí haú nhik gi, gyuq kôlhang, gyai gabú é myit eq lup mai hân taú ló mù, Yhâng é chángzô pé lé ló taí kyo râ matú, din ló bê nghut ri. ⁹ Haú hkún, Yesuq gi, radá dâm yhangnhik lé lhom tê mù, "Wángzán nyi kó sháng gaq." ga taí ri. Haú mù, yhangnhik gi, huí ê luí, Yhâng é hkyí má po zing to mù, Yhang lé noqkuq akô. ¹⁰ Haú hkún, Yesuq gi, yhangnhik lé, "Hkâgyuq kó. Ngá é gumang wui lé, Galile mau shut e ló keq nghú ló taí kyo keq; haú má, yhangmoq, Ngo lé myàng kó râ nghut lhê." ga taí kat ri.

Zúng Nyi É Gyezô Pé Taí É Danglù

11 Myiwe haú nhik hkyô má ru nghut nyi ashî le, lup zúng é gyezô pé ra-am gi, myuq hkaú má wang ló mù, dut lai lo é hkyô banshoq lé, haú hkyangjong agyi pé lé ló taí kyo akô nghut ri. 12 Haú hkyangjong agyi pé gi, suwún wuî eq huî lhum luî, hpyê lhûm é htâng má, haú gyezô pé lé, ngùn myo myo tsup byi mù, 13 "Myín lé, ngamoq yhup myhî tô é hkûn, Yhâng é chángzô pé lé lô mù, mâng lé, lé hkaú yu ló bekô nghut ri.' nghû taí keq. 14 Shí hkyô lé, haú mauzau hpó wó gyô é nghut jáng, yhang myit ngón shoq, ngamoq taí râ nghut lhê; haú hkûn, nungmoq gi, hai manghkáng a htoq râ nghut lhê." ga taí kat ri. 15 Haú mù, gyezô pé gi, ngùn haú pé lé yù luî, yhangmoq lé taí kat é eq rajung za kut bekô nghut ri. Haú su mù, haú hkyô gi, Yudaq byu pé má taí pyo myhîn ló bê nghut mù, ahkuí jé shoq taí nyi bum akô nghut ri.

Chángzô Pé Kut Râ Sasana Muzó

Mrk 16:14-18; Luk 24:36-49; Yhn 20:19-23; Lagyo 1:6-8

16 Hau htâng má, haú chángzo raxe rayuq gi, yhangmoq lé, Yesuq ê nhang tô é Galile mau mâ é bùm shut e ló bekô nghut ri. 17 Yhangmoq gi, Yesuq lé myàng kôjáng, noqkuq akô; nghut kôlhang, ra-am gi, a dê jíng kó nghut ri. 18 Hau htâng, Yesuq gi, yhangmoq chyáng lé lô mù, "Mauhkûng eq myigùng htoq mâ é ahkáng ayá banshoq, Ngo lé byî to bê nghut lhê. 19 Haú mù, nungmoq gi, htoq ê luî, byù myû chângjup lé, Ngá é chángzô pé dut nhâng mù, haú Íwa, Yhangzo, Chyoiyúng Woi-nyí é myìng lang luî, wui-myhup hkám byi mù, 20 nungmoq lé, Ngò hkunmó hkyô tô é lhungháng lé châng kut râ matú, yhangmoq lé mhoqshit keq. Ngò gi, mingkan pyat htûm é hkûn jé shoq lhang, nungmoq eq rahá ru nghut nyí râ nghut lhê." ga pying tô ri.

MARKUQ é Gabú Danglù Laiká (The Gospel of Mark)

Yesuq É Matú Hkyô Htong Byî É Hkyô

Mht 3:1-12; Luk 3:1-18; Yhn 1:19-28

¹ Haû Garai Gasâng é Yhangzo, Yesuq Hkrisduq eq sêng é gabú danglù hi é hkyô gi, ² haû myiqhtoi Esai-aq laiká má:

"Náng é hkyô lajang lángrâ matú, Ngá é lagyo lé, Náng é hí má Ngò nhang kat râ nghut lhê."✧

ga luî le,

³ "Haû yoso má, byù rayuq garû taî é htê gi,

'Haû Yhumsing é matú, hkyô hen to keq; Yhâng é matú hkyô lhoq nyhang to keq."✧

ga luî le, kê tô é eq rajung za nghut lhê. ⁴ Haû mù, Wui-myhup Sará

Yohan gi, yoso hkaû má jé lé luî, wui-myhup hkám byî nyi é eq, yubak mara hkyut pyám byî é hui râ matú myit lhîng mù, wui-myhup hkâm yù râ hkyô lé, hko kyô nyi ri. ⁵ Haû hkûn, Yuda mau jowò hkangmó má é bang eq Yerusalem wà mó má é banshoq bang gi, yhâng chyáng htoq e bum akô. Yhangmoq gi, yhumsing é mara lé yín yû kôluî, yhâng chyáng mai Yodan làng má wui-myhup hkâm yu bum akô nghut ri. ⁶ Yohan gi, gola-uq shomaú èq saî é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosô byo-î pé lé zo sù nghut ri. ⁷ Yhang taî kyô é dang gi, "Ngá htoq má wum-o a-tsam je bo é sù rayuq, ngá htâng má jé lé râ nghut lhê; ngò gi, yhâng é hkyî-tung tui lé hpyî râ lhang a gingdán é nghut lhê. ⁸ Ngò gi, nungmoq lé, wui èq za wui-myhup wó hkám byî lhê; nghut kôlhang, Yhang gi, Chyoiyung Woi-nyí má nungmoq lé wui-myhup hkám byî râ nghut lhê." gâ ri.

✧ 1:2 Mal 3:1 ✧ 1:3 Esai 40:3

Yesuq, Wui-myhup Hkâm Yu É Hkyô Eq Gunlaú Huî É Hkyô

Mht 3:13-17; 4:1-11; Luk 3:21-22; 4:1-13

⁹ Haû yoq má, Yesuq gi, Galile mau Nazaret wà mai lé jé mù, Yohan chyáng Yodan làng má wui-myhup hkâm yu ri. ¹⁰ Yesuq gi, wui mai htoq lo é u lé, mauhkûng bóng lo é lé le, Woi-nyí gi, hpûngkyui gunghkyâng sù é dông mai, Yhang ahtoq má gyó lé lo é lé le, Yhang myang kat ri. ¹¹ Haû hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

¹² Haû hkûn jáng, Woi-nyí gi, Yhang lé yoso shut wang e ló nhang ri.

¹³ Haû mù, Yhang gi, yoso má myi xê nyí nyi luî, Tsadán èq gunlaú é huî ri; tân jung yosô zè pé le, Yhang eq rahá nghut nyi ri; maumang lagyo pé gi, Yhang lé, lé dojaú nyi akô nghut ri.

Sâng-hi Lhê É Chángzô Pé

Mht 4:12-22; Luk 4:14-15; 5:1-11

¹⁴ Yohan htóng gyó é htâng má, Yesuq gi, Galile mau má ló jé mù,

¹⁵ "Ahkyíng gi, jé bê; Garai Gasâng é mingdán gi, chyâng lò bê nghut ri; myit lhîng mù, haû gabú danglù lé lumjíng keq hkoi." ga luî, Garai Gasâng é gabú danglù lé hkô kyo wún ri.

¹⁶ Yesuq gi, Galile nhông yàm mai sô laî ló le, Simun eq yhanggu Andre nhiktâng, nhông má gùn dú nyî kô é lé, myang ri; haû nhik gi, ngozo kóng zo su nhik nghut akô. ¹⁷ Haû mù, Yesuq gi, haû nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taî ri. ¹⁸ Haû hkûn, yhangnhik gi, radá dâm, gùn pé lé tô pyám to luî, Yhang htâng cháng bekô nghut ri.

¹⁹ Yesuq gi, radun zo dum sô e ló é hkûn, Zebedi é yhangzo, Yakuq eq yhanggu Yohan nhiktâng, lhai hkaû má gùn hpo nyi kô é lé, myang ri. ²⁰ Haû hkûn, Yhang gi, radá dâm, yhangnhik tâng lé wut kat

jáng, yhangnhik tâng gi, yhangnhik é yhângwa Zebedi eq langchyâng pé lé, lhaî hkaû má nyhi pyâm to kôluî, Yhang htâng cháng bekô nghut ri.

Nat Lé, Yesuq Hkat Htoq Pyâm É Hkyô

Luk 4:31-37

²¹ Yhangmoq gi, Kaperna-um wà má e akô; Bánno buinyî nyî jé jáng, Yesuq gi, tarajong má wang ê mù, mhoqshit hi ló bê nghut ri. ²² Shiwa byu pé kúm gi, Yhang mhoqshit é hkyô lé mauhong bum akô; hkâsu mù gâ le, Yhang gi, tarâ sará pé eq a pung é za, ahkáng ayá wó sù rayuq su, yhangmoq lé mhoqshit é yanmai nghut ri. ²³ Haú u lé, agè ashop é nat wang júng é byù rayuq tarajong má bo lom nyî luî, wut garû kat é gi, ²⁴ "Nazaret wà byù Yesuq ê, ngamoq gi, Nàng eq haî sêng lhê lhú? Ngamoq lé lhoq hten râ matú, Nàng jé lé é nghut lhê lhú? Nàng gi, Garaî Gasâng é Chyoiyúng Sù nghut é lé, ngò sê lhê." gâ ri.

²⁵ Haú hkûn, Yesuq gi, "Hkâjop, yhâng chyáng mai htoq ló aq." ga yhang lé tân kat ri. ²⁶ Haú hkûn, agè ashop é nat haú gi, byù haú yuq lé wum kat langhtân nhâng luî, htê mó eq garu uchyang htoq ló byuq bê nghut ri.

²⁷ Shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasû é dang wá nghut lhê lhú? Ahko ahkáng bo é dông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyô jáng, haú bang lháng gyo byî akô nghut ri." ga luî, taî lhûm bum akô nghut ri. ²⁸ Yesuq eq sêng é ludang gi, Galile mau jàm shoq, yang é dông byo myín ló bê nghut ri.

Byù Myo Myo Lé, Yesuq Lhoq Gê Byî É Hkyô

Mht 8:14-17; Luk 4:38-41

²⁹ Yhangmoq gi, tarajong mai htoq luî, haú hkûn jáng, Yakuq eq Yohan nhik le mù, Simun eq Andre nhiktâng é yhûm má wang e ló bekô nghut ri.

³⁰ Simûn é yhâng-aumó gi, gyai yhang nò leq tô é nghut mù luî, yhangmoq gi, Yesuq lé haú yuq no é hkyô lhom taî kyô akô nghut ri. ³¹ Haú mù luî, Yesuq gi, yhâng chyáng huî é mù, yhâng é loq má zui luî tu tsung ri; haú hkûn jáng, nò ge byuq luî, yhang gi, yhangmoq lé gaî tso gaî huq bê nghut ri.

³² Haú nyî buiwang é htâng má, byu pé gi, no é bang eq nat gang wang júng nyî é bang banshoq lé, Yesuq chyáng shuî lé lo bum akô nghut ri. ³³ Rawa bang, hkúmdong nàm má lé zup zing tô akô. ³⁴ Haú mù, Yesuq gi, awáng nòhpyo ajung jung huî é bang myo myo lé lhoq gê byî ri; nat gang myo myo lé le, hkat htoq pyâm ri; nghut kôlhâng, Yhang ó nghut é lé nat gang haú bang sé kô é yanmai, nat gang haú bang lé dang a taî nhâng nghut ri.

³⁵ Yesuq gi, htang napkyó mau lháng a bó shimá, toq mù, gaú é jowò ralhum má htoq ê luî, kyû é dúng ri. ³⁶ Simun eq yhâng é luzúm wuî kúm gi, Yhang lé châng hô kômù, ³⁷ Yhang lé myang hô kôjáng, "Yuq hkangmó gi, Nang lé châng hkat ho nyi akô." ga luî, taî kyô akô nghut ri.

³⁸ Haú hkûn, Yesuq gi, yhangmoq lé, "Awui ayàm mâ é wà pé má le, ngò, mungdang wó hkô râ matú ê sháng, hau é matú ngò lé é ru nghut lhê." ga tû taî ri. ³⁹ Haú mù luî, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyâm byî wún ri.

Manggâm Dap Sù Lé, Yesuq Lhoq Gê Byî É Hkyô

Mht 8:1-4; Luk 5:12-16

⁴⁰ Manggâm dap é byù rayuq gi, Yesuq chyáng lé mù, hkyihput htuq luî, "Nàng dóng é nghut le gi, ngò lé Nàng wó lhoq sân-yúng byî râ nghut lhê." ga dung wut ri.

⁴¹ Haú hkûn, Yesuq gi, yhang lé wú shogyo luî, loq lhâm kat mù, haú yuq lé é záng luî, "Ngò dóng lhê, sân-yúng aq hkoi." ga taî ri. ⁴² Haú hkûn jáng,

manggâm ana byuq byuq lui, yang gi, gè bê nghut ri.

⁴³⁻⁴⁴ Yesuq gi, "Nàng, shí hkyô ó lé le hkâtaî kyo. Nghut kôlhang, náng é gungdu lé, hkyangjong hpô chyáng ló tún shit mù, náng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yang lé gyai yang sidiq byi mù, radá dâm nhang kat bê nghut ri. ⁴⁵ Nghut kôlhang, haú yuq gi, htoq ló mù, haú hkyô lé je taî pyo myhîn ló bê nghut ri. Hau é yanmai, Yesuq gi, wà hkaú má de de a ge wang ló lo mù, shinggan má é chamchyuiyui dut é jowò má za nyi nyi ri. Nghut kôlhang, byu pé gi, jowò hkanqmó mai Yhâng chyáng ru zîng lé nyi bum ashî kó nghut ri.

2

Gùngjum Shî Sû Lé, Yesuq Lhoq Gé Byî É Hkyô

Mht 9:1-8; Luk 5:17-26

¹ Buinyi hkâ-myháng a myáng má, Yesuq gi, Kaperna-um wà má dum wang lò jáng, Yang yhûm dum taú jé lô bê gâ é hkyô lé, byu pé wó gyô bum akô nghut ri. ² Haú mù, byù myo myo zîng lé lô kôluî, yhûmhkaú má jowò a joq lô é htoq agó, hkumtot má lhang a joq lo nghut ri; Yesuq gi, yangmoq lé mungdang hko kyô nyi ri. ³ Haú hkûn, byù myi yuq gi, gùngjum shî sù rayuq lé chôm dang waq lui, Yhâng chyáng lé lo akô. ⁴ Yhangmoq gi, byù lûm myô chyîn chyap to mù, byù haú yuq lé Yesuq chyáng a wó shuí jé ê kô é yanmai, Yesuq é u htoq má é yhumhkûng lé dong htông yù lui, gùngjum shî sù lé taphkang eq roq hkyô kat akô nghut ri. ⁵ Yesuq gi, yangmoq é lumjîng myit lé byu-myàng jáng, gùngjum shî sù lé, "Ngá zo ê, náng é yubak mara lé hkyut pyám byi bê." ga taî ri.

⁶ Haú hkûn, tarâ sará pé ra-am gi, haú má zung to kôluî, yangmoq é i-myit unghkaú má, ⁷ "Byù shí yuq gi,

haí mù lui haú su gâ lhê laq? Yang gi, Garai Gasang lé rhoi dang taî nyi ri; Garai Gasang mai lai lui, ó yuq wá mara wó hkyut byi râ lhu?" ga lui, myit són wuí nyi bum akô nghut ri.

⁸ Yesuq gi, yangmoq é unghkaú má myit wú nyi kô é hkyô lé, radá dâm Yang é myit mai sé mù, "Nungmoq é i-myit hkaú má, haí mù haú su nghû myit són wuí nyi bum akô lhu?" ⁹ Haú gùngjum shî sù lé, 'Náng é yubak mara lé hkyut pyám byi bê.' nghû taí é dang eq, 'Toq aq, náng é taphkang lé yù mù, hkyô so aq.' nghû taí râ má, hká hkun je taí lui lhê lhu? ¹⁰ Nghut kôlhang, haú Byu Yhangzo* gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lhê." ga, yangmoq lé taî kat ri. ¹¹ Hau htâng, Yang gi, haú gùngjum shî sù lé, "Ngò, nang lé taí bá, toq aq, náng é taphkang lé yu chûng lui, yhûm taú ló aq hkoî." ga taî ri. ¹² Haú yuq gi, toq mù, yhâng é taphkang lé yu chûng lui, yangmoq banshoq bang wú tsuq tô é myoq hí mai sô htoq ló byuq bê nghut ri. Hau é yanmai, yuq hkanqmó gi, mauhong bùm kômù, "Isû é hkyô gi, hkâ-nhám lhang a myàng wú shî." ga, Garai Gasang lé hkya-on kungton bum akô nghut ri.

Lewiq (Mahte) Lé Wut Yu É Hkyô
Mht 9:9-13; Luk 5:27-32

¹³ Yesuq gi, nhông yàm má radàm dum htoq e ri. Haú hkûn, byù moq mó gi, Yhâng chyáng jé lé lo bùm kômù, Yang gi, haú bang lé lhom mhoqshit nyi ri. ¹⁴ Yang gi, sô yông ló nyi é hkûn, kang guq zúm má zung tô é, Alhpe yangzo Lewiq lé myang kat lui, "Ngá htâng cháng aq." ga taî ri. Haú hkûn, Lewiq gi, toq lui, Yang htâng cháng bê nghut ri.

¹⁵ Yesuq gi, Lewiq é yhûm má my-inzang ê zô nyi é hkûn, kang guq bang myo myo eq yubak dap bang le, Yang eq Yhâng é chángzô pé eq rahá zo shuq bum akô. Hkâsu mù gâ le, Yang htâng châng é bang gi, ajùm

* **2:10** Byu Yhangzo gâ é gi, Yesuq Yhânggùng yang lé le taí é nghut lhê, Mesaia lé le taí é nghut lhê.

ayò nghut é yanmai nghut ri. ¹⁶ Tará sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yhang gi, haí mù luí, kang guq bang eq yubak dap bang eq rahá zo shuq nyi lhê lú?" ga myí bum akô nghut ri.

¹⁷ Haú su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chi sará a ra kó, nòhpyo hui bang za sheq ru râ lhê. Haú eq rajung za, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê." ga taí kat ri.

Zoshuq Gám É Eq Sêng É Hkyô
Mht 9:14-17; Luk 5:33-39

¹⁸ Yohan é chángzô pé eq Hparishe pé gi, zoshuq gám nyi akô nghut ri. Haú mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pé é chángzô pé gi, zoshuq gám akô; nghut kôlhang, náng é chángzô pé gi, haí mù a gám kô é lú?" ga luí, myí akô nghut ri.

¹⁹ Haú hkûn, Yesuq tû taí é gi, "Bíng pé gi, lusik eq rahá nghut nyi tô ashí hkûn, zoshuq hkâsu wó gám râ lú? Yhangmoq gi, lusik eq rahá nghut nyi é u lé, zoshuq gám kó râ a nghut. ²⁰ Nghut kôlhang, lusik lé yhangmoq chyáng mai shuí yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê.

²¹ Ó yuq le, mebu xau má pán sik èq a lhaq hpo wú kó; haú su kut é nghut jáng, pán sik gi, kun byuq mù, mebu xau le je lhoq cheq pyâm râ nghut lhê. ²² Haú eq rajung za, tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng luí, tsibiyiq wing eq shokuq htûng htên byuq râ nghut lhê. Haú mù, tsibiyiq wing asik gi, shokuq htûng sik má za ge kat é nghut lhê.

Bánno Buinyi É Yhumsîng
Mht 12:1-14; Luk 6:1-11

²³ Bánno buinyi ra-nyí má, Yesuq gi, Yhâng é chángzô pé eq rahá yò hkaú mai sô lai ló é hkûn, Yhâng é chángzô pé gi, kyôshi ratsuí langshap yu akô nghut ri. ²⁴ Haú mù, Hparishe pé gi, Yesuq lé, "Wú aq, Bánno buinyi má a ge kut jung lé, haí mù, náng é chángzô pé kut nyi akô lú?" ga taí akô.

²⁵ Haú hkûn, Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut hui luí, zoshuq râ tô é hkûn, hkâsu kut é hkyô lé, nungmoq hkâ-nhám le a nghap wú kó lú? ²⁶ Abiahta, hkyangjong mó kut nyi é u lé, Dawiq gi, Garai Gasâng é yhúmhkaú má wang ê mù, hkyangjong pé mai lai luí, ó le a ge zô é, kyâng tô é muk lé yù zo mù, yhang htâng châng é bang lé le ratsuí tsuí byi tso é nghut lhê." ga tû taí ri.

²⁷ Hau htâng, Yhang gi, yhangmoq lé, "Bánno buinyi gi, byù é matú kut tô é nghut lhê; byù gi, Bánno buinyi é matú a nghut. ²⁸ Haú mù, haú Byu Yhangzo gi, haú Bánno buinyi é Yhumsîng lháng nghut lhê." ga xoq taí ri.

3

¹ Yesuq gi, tarajong má radàm dum wang e le, loq raloq ajum shi byuq é byù rayuq nyi to lánng ri. ² Haú hkûn, haú má nyi tô é bang ra-am gi, Bánno buinyi má, Yesuq mai haú yuq lé lhoq gê byi râ lú ga, mara hûn râ matú gyám wú nyi akô nghut ri. ³ Yesuq gi, haú loq jum shí sù lé, "Banshoq bâng é hí má, toq yap shit aq." ga taí kat ri.

⁴ Hau htâng, Yhang gi, haú má nyi tô é bang lé, "Bánno buinyi má, ge é muzó kut râ, a ge é muzó kut râ, byù asak hkyî râ eq byù sat râ hkyô pé má, hká lhum kut le sheq tarâ wang lhê lú?" ga myí kat jáng, yhangmoq kúm gi, jit le a ga kó nghut ri.

⁵ Haú mù, Yhang gi, nhik-yô nau é myit èq haú bang lé lhîng wú mù, yhangmoq myit htan é hkyô lé, wú yón luí, haú loq jum shí sù lé, "Náng é loq nyhang kat aq." ga taí kat jáng,

haú yuq gi, loq nyhang kat luí, yhang é loq gi, shoq za ge byuq bê nghut ri. ⁶ Hau htâng má, Hparishe pé gi, htoq ló kômù, Yesuq lé hkâsu kut wó sat pyám râ hkyô lé, Herut é byu pé eq chôm hpyê lhùm bum akô nghut ri.

Byù Ajùm Ayò, Yesuq Htâng Cháng Kô É Hkyô

⁷ Yesuq gi, Yhang é chángzô pé eq rahá, nhông shut dum e ló le, Galile mau má é byù ajùm ayò gi, Yhang htâng châng e ló bum akô nghut ri. ⁸ Hau htoq agó, Yuda mau má é bang, Yerusalem wà mó má é bang, Idu-mia mau má é bang, Yodan làng hé hpoq má é bang, Turuq myuq eq Sidun myuq awui ayàm jé shoq má é bang, ajùm ayò gi, Yhang kut nyi é hkyô banshoq lé wó gyo kôjáng, Yhang chyáng jé lé bum akô nghut ri. ⁹⁻¹⁰ Yesuq gi, byù myo myo lé lhoq gê byí é yanmai, nòhpyo hui to bang gi, Yhang lé wó záng shoq ga, chyín chyap wang ló bum akô. Byù lúm myo luí, Yesuq gi, Yhang lé a nhê pyet pyám sháng gaq ga, Yhang é chángzô pé lé lhaí ralhú hen to nhang ri. ¹¹ Agè ashop é nat pé gi, Yhang lé myàng hkangmó, Yhang é hí má lêng ngop to luí, "Nàng gi, Garai Gasâng é Yhangzo nghut ri." ga luí, taí garú akô. ¹² Nghut kôlhang, Yesuq gi, Yhang ó yuq nghut é hkyô lé a taí byông htoq râ matú, tân hkúm kat ri.

Lagyo Kut Râ Byù Raxe Í Yuq Hkyin Yu É Hkyô

Mht 10:1-4; Luk 6:12-16

¹³ Yesuq gi, bùm shut doq ló mù, Yhang ô nau é bang lé ji kat luí, haú bang gi, Yhang chyáng jé lé lo bum akô nghut ri. ¹⁴ Haú hkún, Yesuq gi, byù raxe í yuq lé hkyin yù luí, lagyo ayá byí ri; haú bang gi, Yhang eq rahá nyi râ matú le, mungdang hkô râ matú Yhang nhang htoq kat râ eq, ¹⁵ nat gâng pé lé hkat htoq râ ahko ahkáng wó râ matú le, nghut akô nghut ri.

¹⁶ Haú raxe í yuq gi, Simun (Yesuq mai Petruq ga myìng myhíng byi sù); ¹⁷ Zebedi é yhangzô nhiktâng Yakuq eq yhanggu Yohan (Yháng nhiktâng lé Yesuq mai Buanerga ga myìng myhíng byí ri; hau é lichyúm gi, maugum zô nhik gâ é nghut lhê.); ¹⁸ Andre, Hpilip, Barhtolume, Mahte, Htomaq, Alhpe é yhangzo Yakuq, Htade, Zelutuq* dut é Simun eq, ¹⁹ Yhang lé ap pyám râ sù, Yudaq Iskarut pé nghut akô.

Yesuq Eq Bezebulaq

Mht 12:22-32; Luk 11:14-23; 12:10

²⁰ Hau htâng, Yesuq gi, yhùm má wang ló le, byù ajùm ayò dum zìng lé lô kômù, Yhang eq Yhang é chángzô pé gi, zang zo hkyíng lhang a wó kó nghut ri. ²¹ Yhang é yhumbyù wui gi, haú hkyô lé wó gyo kôjáng, "Yhang, myit a gyìng lo nghut ri." ga luí, Yhang lé hung shuí yù râ matú, e akô nghut ri.

²² Yerusalem wà mó mai gyó lé lo é tarâ sará pé gi, "Shí yuq gi, Bezebulaq gâ é nat gâng pê é zau lúng sù nghut ri-nhung! Yhang gi, nat zaú é wum-o a-tsam èq za, nat gâng pé lé hkat htoq pyám é nghut ri." ga taí bum akô nghut ri.

²³ Haú mù luí, Yesuq, yhangmoq lé wut yù mù, dangtú dong taí é gi, "Tsadán gi, Tsadán lé hkâsu kut wó hkat htoq râ lú? ²⁴ Mingdán ralhú gi, ahkaú má byoq gâng lhùm nyi kô é nghut jáng, mingdán haú wó gíng nyi râ a nghut. ²⁵ Yhumhtu ralhú má le, ikun byù yhangchang byoq gâng lhùm nyi é nghut le gi, yhumhtu haú wó gíng nyi râ a nghut. ²⁶ Haú eq rajung za, Tsadán le, yhanggùng yhang lhoq hpyoq luí, gam hkoq nyi é nghut le gi, yhang wó nyi nyi râ a nghut, htúm byuq râ za nghut lhê. ²⁷ Ó yuq nghut kôle, wum-o bò sù lé hí tui zing pyám é a nghut le gi, yhang é yhùm má lú wâng mù, yhang é sutzé lé wó lú yù râ a nghut: Haú yuq lé hí tuí zing

* **3:18** Zelutuq gâ é lichyúm gi, yhumsíng zui saí é hkyô má gyai yhang myit lòm shirong é sù lé gâ lhê. Hau u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

pyám jáng sheq, yhâng é sutzè lé wó lú yû râ nghut lhê. ²⁸ Ngò, nungmoq lé teng za taí kôlé, byu pé kut shut é mara banshoq eq rhoi dang taí pyám é pé lé gi, mara wó hkyut pyám byí lhê. ²⁹ Nghut kôlhang, haû Chyoiyúng Woi-nyí lé rhoi dang taí pyám é sù gi, hkâ-nhám le, mara hkyut byí é wó hui râ a nghut; haû yuq gi, ahtum abyuq yubak wó sù nghut nyi ri." gâ ri.

³⁰ Yhang haû su ga taí é gi, yhang-moq mai, "Yhang gi, agè ashop é nat wó sù nghut ri." ga kô é yanmai nghut ri.

*Yesuq É Yhângnu Eq Yhanggu Pé
Mht 12:46-50; Luk 8:19-21*

³¹ Hau htâng, Yesuq é yhângnu eq yhanggu pé gi, jé lé mù, yhûm hkun má yap to kôluí, Yesuq htoq lô râ matú, byù rayuq lé wang taí nhang akô nghut ri. ³² Byù ajùm ayò gi, Yhâng é lhîngkyuq má zung tô akô; haû bang gi, Yhang lé, "Wú aq, náng nu eq nunggu pé gi, nang lé hui naû luí, shinggan má láng bum akô." ga taí kyô akô nghut ri.

³³ Haû hkûn, Yhang gi, "Ô pé gi, Ngá nu eq Ngá gu pé nghut akô lhú?" ga myi kat ri.

³⁴ Hau htâng, Yhang gi, Yhâng é lhîngkyuq má zung hkyuq tô é bang lé wú mù, taí é gi, "Shí bang gi, Ngá nu eq Ngá é gumang wui nghut bê!

³⁵ Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê." gâ ri.

4

*Kyôshi Sân É Dangtú
Mht 13:1-23; Luk 8:4-15*

¹ Yesuq gi, nhông yàm má radàm dum mhoqshit hi lô bê nghut ri. Haû hkûn, Yhâng é lhîngkyuq má byù moq mó lûm yán zîng lé lo bùm kô é yanmai, Yhang gi, nhông hkaû má é lhai má wang zung tô ri; haû u lé, byù moq mó gi, nhông yàm gin-gau htoq má nyi míng bum akô nghut ri. ² Yhang gi, haû bang lé, dangtú pé dông myo myo

mhoqshit byí nyi ri; Yhang mhoqshit é má, ³ "Gyo wú keq! Kyô hkyô sù rayuq gi, kyôshi san râ gâ htoq e lô ri. ⁴ Yhang, kyôshi sân kat é hkûn, ra-am gi, hkyô má gyó ang mù, nghoq pé èq lé hte zô pyám ri. ⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle, ⁶ amyit a wó chîn hing é nghut mù, bui htoq lô jáng, lhap kyuq pyám bê nghut ri. ⁷ Dum ra-am gi, zugyóm hkaû má gyó ang luí, zubyap haû pé kô lò mù, wup pyám é yanmai, ashi a wó zui nghut ri. ⁸ Nghut kôlhang, ra-am gi, myihpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú lhang, zui myô lo é nghut ri." gâ ri.

⁹ Hau htâng, Yesuq dum taí é gi, "Gyo yù râ nohkyap dap sù gi, gyô yù sháng gaq." gâ ri.

¹⁰ Yhang baú za nghut nyi é hkûn, haû lagyo raxe í yuq eq Yhang nàm má nyi tô é bang gi, dangtú haû eq sêng é hkyô lé, lé myi akô. ¹¹ Haû hkûn, Yhang, yhangmoq lé taí kyô é gi, "Garai Gasâng é mingdán eq sêng é sê gyo wui é hkyô lé sé gyo râ ahko ahkáng, nungmoq lé byí to lugù nghut bê. Nghut kôlhang, góbâng é matú gi, jung hkangmó lé dangtú dông chyat taí é nghut lhê. ¹² Haû mù luí,

"Yhangmoq gi, myang nyi kôlhang, a wú sé kó, gyô nyi kôlhang, a sê gyo kó;

sé wú sê gyo kô é ru nghut le gi, lhîng taù lò mù, mara hkyut pyám byí é hui kó râ nghut lhê!✠

gâ ri." ga tô ri.

¹³ Hau htâng, Yhang, yhangmoq lé dum xoq taí é gi, "Nungmoq, dangtú shí lé a sê gyo kô é nghut le gi, gotú dangtú pé lé hkâsu kut ung sê gyo kó râ lhú? ¹⁴ Yò mù zui sù san kat é kyôshi gi, mungdang nghut lhê. ¹⁵ Byù ra-am gi, hkyô má gyó âng é kyôshi eq wui akô; yhangmoq gi, mungdang lé wó gyô yu é hkûn yhang, Tsadán gi,

✠ 4:12 Esai 6:9-10

lé mù, yhangmoq chyáng mà é mungdang lé lé yù pyám byi ri. ¹⁶ Ra-am gi, luqgok yò pé má gyó âng é kyôshi eq wuí akô; yhangmoq gi, mungdang lé wó gyo jáng, radá dâm gabú myit eq hap yù akô. ¹⁷ Nghut kôlhang, yhangmoq gi, amyit a wó chîn é yanmai, razup zo za yuq kômù, mungdâng é yanmai, wuîhke é eq zing-rî é pé hui kôjáng, hân hân htak ló byuq kó râ nghut lhê. ¹⁸ Dum ra-am nghut jáng, zugyóm hkaû má gyó âng é kyôshi eq wuí akô; yhangmoq gi, mungdang lé wó gyô yù kôlhang, ¹⁹ shí ipyat lhê é myit wui myit hke hkyô, hkyô shuí nghoq jung ngùn hîng zêhkoq eq gotû zè pé lé ô nau é hkyô pé, yhangmoq chyáng wang lò jáng, haû mungdang lé hup pyâm é yanmai, ashi a wó zui dut kó râ nghut lhê. ²⁰ Ra-am kúm gi, myihpún bo é jang má gyó âng é kyôshi eq wuí akô; yhangmoq gi, haû mungdang lé gyô yù mù, lhom yù luî, sân kat é htoq sum xê tú, hkyuq xê tú, rashô tú lháng myo shoq ashi zui lò kó râ nghut lhê." gâ ri.

Myibung Htûn É Hkyô
Luk 8:16-18

²¹ Yesuq, yhangmoq lé xoq taî é gi, "Nungmoq gi, myibung lé yù mù, tsungjang má a tsung e za, mûng eq nghop tô é, a nghut jáng, yhupchong ô má tsung tô é, ó yuq wá kut wú akô lhú? ²² Hkâsu mù gâ le, haq tô é zè haí jung le htoq ze lò râ eq, zaú tô é pé haí jung le byông htoq lô râ nghut lhê. ²³ Gyô yù râ nohkyap dap sù ó yuq nghut kôle, gyô yù sháng gaq." gâ ri.

²⁴ Hau htoq agó, Yhang dum taî é gi, "Nungmoq gi, wó gyô yu é hkyô lé rago myit wú keq; nungmoq lik byi é bung eq, nungmoq lé dum lik byi râ nghut lhê; hau htoq lháng myo shoq wó kó râ nghut lhê. ²⁵ Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lháng yu pyám byi shirâ nghut lhê." gâ ri.

Kyôshi Yuq Kô Lo É Dangtú

²⁶ Hau htâng, Yhang dum xoq taî é gi, "Garai Gasâng é mingdán gi, byù rayuq mai, myigùng má sân kat é kyôshi eq wuí ri. ²⁷ Byù haú yuq gi, myín lé yhup tô é nghut nghut, nyí lé toq lo é nghut nghut, kyôshi gi, zui htoq lô mù, yuq kô lo nyi ri; nghut kôlhang, yhang gi, hkâsu kut yuq lo nyi é hkyô lé a sé nghut ri. ²⁸ Myigùng gi, yhang baú yhang, kyôshi lé, sâng-hi má abum bum nhâng, hau htâng má a-nhâm htoq nhâng mù luî, ashi zui shoq kut é nghut lhê. ²⁹ Kyôshi myhíng jáng, kyô shu yoq jé bê nghut é yanmai, yhang gi, zaiyik eq yâm yù râ nghut lhê." gâ ri.

Angshi Cham Lé Dangtú Yu É Hkyô
Mht 13:31-32; Luk 13:18-19

³⁰ Yesuq dum xoq taî é gi, "Garai Gasâng é mingdán lé, hai eq lhoq wui wú râ lhú? Haí jung dangtú yù mù, shit wú râ lhú? ³¹ Garai Gasâng é mingdán gi, angshi cham eq wuí ri. Angshi cham haû gi, myigùng má hô é kyômyui jí pé má je tiq é nghut lhê. ³² Nghut kôlhang, ho mù, yuq kô lô jáng, xun hkyâm má hô é mhan-haq hpoqnoq gâm banshoq htoq má je kô é agâm dut lò mù, akoq kô lò luî, hau é buishûm hkaû má, maulat nghoq zô pé lé wó zung nô nyi é nghut lhê." gâ ri.

³³ Haû sù é dangtú myo myo dông mai, Yesuq gi, yhangmoq wó sê gyô é myhó, mungdang hko kyô nyi ri. ³⁴ Yhang gi, yhangmoq lé, dangtú a bo é haí lháng a taî wú nghut ri; nghut kôlhang, Yhang eq chángzô pé baú nghut nyi é hkûn kúm gi, jung hkangmó é lichyúm lé taî sân kyô ri.

Laidun Mó Lé, Yesuq Lhoq Zîm
Pyâm É Hkyô

Mht 8:23-27; Luk 8:22-25

³⁵ Haû nyí, myinhâng lé, Yesuq gi, Yhâng é chángzô pé lé, "Nga-nhung nhông hé hpoq shut dap e ló sháng." ga taî ri. ³⁶ Haú hkûn, chángzô pé gi, byù moq mó lé nyhi pyâm to luî, Yhang zung tô é lhai mai yhang, Yhang lé shuí gû dap ló bekô; gotû

lhaî pé le, yhangmoq eq rahá bo gú dapló akô nghut ri. ³⁷ Haú ulé, laidun mó jé lô mù, wuìlhêng hta toq lô luí, lhaî má lo bat hâng é yanmai, wuì byíng lô bê nghut ri. ³⁸ Haú hkûn, Yesuq gi, lhaî htâng má uhkuq hkuq mù yhup myhî tô ri; haú chángzô pé gi, Yhang lé nhaû pun luí "Sarâ ê, nganhúng myup shi lô râ dut é lé, nàng a chiq byi lhu?" ga taí akô nghut ri.

³⁹ Yesuq gi, toq mù, laidun lé tan luí, wuìlhêng lé, "Zim aq." ga taí kat jáng, haú laidun num lô byuq luí, banshoq zím byuq bê nghut ri.

⁴⁰ Hau htâng, Yhang gi, Yhâng é chángzô pé lé, "Haî mù, haû-í gyuq bum akô lhu? Nungmoq gi, lumjǐng myit a bò shi kó lhu?" ga taí ri.

⁴¹ Yhangmoq gi, gyai yhang gyuq dan bùm kômù, "Shí yuq gi, hkasû é byù nghut lhê lhà? Làì eq wuìlhêng pé lhang gi, Yhâng é dang lé gyo byí ri-nhung!" ga luí, rayuq eq rayuq myí lhum bum akô nghut ri.

5

Nat Gang Hkat Htoq Pyâm É Hkyô Mht 8:28-34; Luk 8:26-39

¹ Yhangmoq gi, hông hé hpoq mâ é Gerase byu pé é mau má jé dap e lô akô. ² Yesuq lhaî mai htoq lô é hkûn, agè ashop é nat wang júng é byù rayuq gi, lupdùng mai htoq lé lô mù, Yhang lé lhom huí ri. ³ Haú yuq gi, lupdùng má za nyi é sù nghut ri; yhang lé, ó yuq eq le, shamtoq-tuì eq lhang a wó tuì zing wú kó nghut ri. ⁴ Hkâsu mù gâ le, adàm dàm, yhâng é loq eq hkyî má shamtoq-tuì eq tuì tô wú kôlhang, yhang gi, loq mâ é shamtoq-tuì pé lé lhang hpyit pyám pyám kut mù, hkyî mâ é shamtoq kyum lé lhoq hkyop pyám pyám kut ri. Yhang lé, ó yuq eq le a wó hkuq yù kó nghut ri. ⁵ Yhang gi, nyí myín aga lupdùng eq bùm pé má puk garu uchyang, yhumsing gùng lé luqgok eq dún cheq wún ri.

⁶ Yhang gi, Yesuq lé, we mai myang kat jáng, din e lô mù, Yhâng é hí má hkyihput htuoq ngop luí, ⁷ htê mó

eq, "Myhang htâng é Garaî Yhangzo Yesuq ê! Nàng gi, ngò eq haî sêng lhê lhu? Nàng gi, ngo lé a zing-ri râ matú, Garaî Gasâng hí má danggidiq byi laq." ga taí garû ri. ⁸ Haî mù gâ le, Yesuq gi, yhang lé, "Agè ashop é nat nàng ê, byù shí yuq chyáng mai htoq lô aq." ga taí kat é yanmai nghut ri.

⁹ Hau htâng, Yesuq gi, "Náng myíng haî gâ lhê?" ga, yhang lé myi jáng, yhang gi, "Ngamoq gi, myo myo nghut é yanmai, Legio gâ lhê." ga tû taí ri. ¹⁰ Hau htâng, yhang gi, haú jowò mai yhangmoq lé a kôn pyám râ matú, Yesuq lé dum dung dung kut nyi ri.

¹¹ Haú u lé, waq rajùm mó gi, bùm yàm má dû but zô nyi bum akô nghut ri. ¹² Haú mù luí, nat gâng pé gi, "Ngamoq lé, waq pé chyáng nhang kat luí, yhangmoq chyáng wàng nhâng laq." ga luí, Yesuq lé dung akô. ¹³ Haú hkûn, Yesuq gi, yhangmoq lé ahkáng byí kat jáng, haú agè ashop é nat pé gi, haú yuq chyáng mai htoq lô kôluí, waq pé chyáng wang lô byuq bekô nghut ri. Haú mù, haú í hkyíng kô bo é waq hpúng gi, gampyoq mai hông hkaú shut rut din yán wang lô kôluí, myup shi byuq bekô nghut ri.

¹⁴ Waq zúng bang gi, hfang din wang lô kômù, myuq hkaú mâ é bang eq awui ayàm mâ é bang lé, haú hkyô lô shit kyo kô é yanmai, byù haú bang gi, dut lai lò bê hkyô lé, ê htoq wú akô nghut ri. ¹⁵ Yhangmoq gi, Yesuq chyáng jé lé kô é hkûn, nat gang myo myo wang júng wú é sù, mebu wut luí, byù gè rayuq su zung to lánng é lé myàng kômù, gyuq dan bùm bekô nghut ri. ¹⁶ Haú hkyô lé myang é bang gi, nat gâng pé wang júng sù eq waq pé chyáng hkâsu dut é hkyô, góbang lé taí kyo akô nghut ri. ¹⁷ Hau htâng, byu pé gi, Yesuq lé yhangmoq é mau mai htoq lô byuq râ matú, chôm dúng tóngbán akô nghut ri.

¹⁸ Yesuq lhaî hkaú má wang lô é u lé, haú nat gâng pé wang júng lai lò bê sù gi, Yesuq htâng cháng râ matú, Yesuq lé dung tóngbán ri. ¹⁹ Nghut

kôlhang, Yesuq gi, yhang lé ahkáng a byi e za, "Nàng, yhûm shut sheq ló mù, haú Yhumsîng, nang lé hkâ-í kut byi bê hkyô eq hkâsu kut shogyo nhik-myin yu é hkyô lé, náng é yhumbyù buinùm ji-myi wui lé ló taí kyo aq." ga taí kat ri. ²⁰ Haú mù, byù haú yuq gi, ló luí, yhang lé Yesuq hkâ-í kut byi bê hkyô lé, Dekapoli* mau bang lé ló taí kyô ri. Haú hkûn, wó gyô é bang banshoq gi, mauhong bum akô nghut ri.

Shi Byuq Bê Myiwe Zo Eq No É Myiwe Myhi Rayuq É Hkyô Mht 9:18-26; Luk 8:40-56

²¹ Yesuq gi, lhaí ji mù, nhông he hpoq shut dum dap jé ló mù, Yhang, nhông yàm má nyi tô é u lé, byù ajùm ayò gi, Yhâng é lhîngkhyuq má lé zîng bum akô nghut ri; ²² haú hkûn, Ya-iruy gâ é, tarajong má up bang mâ é rayuq gi, haú má lé luí, Yesuq lé myang kat jáng, Yhâng é hkyî wang má paí gop to mù, ²³ "Ngá zo byizo gi, kâng byit ló nyi ri; yhang ge lò mù asak dum duì shi sháng gaq, náng lé mù, yhâng é ahtoq má loq lé ke byi laq." ga, wum kat dúng tôngbán nyi ri. ²⁴ Haú mù, Yesuq gi, haú yuq htâng châng e ló ri; byù ajùm ayò le, Yhâng é awui ayàm má châng chyîn chyap wún bum akô.

²⁵ Haú hkûn, raxe í zân suí yui nyi é myiwe myhí rayuq le haú hpúng má bo tô ri. ²⁶ Yhang gi, chi sará myo myô pê chyáng yhang wó é ngunzè banshoq lhoq pán mù, nò hkâm luí yâ wú kôlhang, ge é hkyô a joq é htoq agó, je lhang wuîhke lò ri. ²⁷ Yhang gi, Yesuq é hkyô lé wó gyo jáng, byù hpûng mai Yesuq é nunghtáng má huí lé mù, Yhâng é bu má ê záng kat ri. ²⁸ Haí mù luí gâ le, yhang gi, "Ngò, Yhang é bu má za lhang ê wó záng é nghut le gi, ge byuq râ nghut lê." ga wó myit é yanmai, haú su kut é nghut ri. ²⁹ Haú hkûn jáng, yhâng chyáng suí yui é kân byuq luí, yhang

gi, hpuzô nyi é mai wó lut bê hkyô lé, yhânggùng má sê gyô kat bê nghut ri.

³⁰ Yesuq gi, Yhâng é gùng mai hpungwup a-tsam htoq ló é lé, radá dâm châng sê kat luí, byù moq mó shut lhing wú mù, "Ngá é bu má ó yuq záng bê lhú?" ga myi kat ri.

³¹ Haú hkûn, Yhâng é chángzô pé gi, "Náng é lhîngkhyuq má byù ajùm ayò chyîn chyap nyi é lé, myang to luí nhîng, 'Ngo lé, ó yuq záng bê lhú?' nghû myi lê lhú?" ga tû taí kat akô.

³² Nghut kôlhang, Yesuq gi, Yhang lé lé záng sù lé myàng râ matú, ho lhing wú nyi ashî nghut ri. ³³ Haú hkûn, myiwe myhí haú gi, yhâng chyáng hkâsu dut lai lò bê hkyô lé sê é yan-mai, Yesuq é hí má lé mù, gyuq nán é èq Yhang é hkyî wang má ngóm gop to luí, yhâng chyáng dut lai lò bê hkyô banshoq lé taí kyô ri. ³⁴ Haú mù, Yesuq gi, myiwe myhí haú lé, "Byizo é, náng é lumjîng myit gi, náng lé lhoq gê byi bê nghut ri; náng é nôhpyo ge byuq bê nghut ri; ngón za ló aq hkoi!" ga taí ri.

³⁵ Yesuq gi, dang ru taí nyi ashî hkûn, tarajong má up sù Ya-iruy é yhûm mai byù ra-am jé lé mù, "Nang é byizo gi, shi byuq bê; haí mù luí, haú sará lé lhoq hkyik nyi lê lhú?" ga luí, lé taí kat akô.

³⁶ Yesuq gi, haú bang taí é dang lé gyô lhaí pyám mù, "Hkâgyuq, za lumjîng aq." ga, haú tarajong má up sù lé taí kat ri.

³⁷ Hau htâng, Yhang gi, Petruq, Yakuq eq Yakuq é yhanggu Yohan pé mai lai luí, ó yuq lé le, Yhang htâng a châng nhâng nghut ri. ³⁸ Yhangmoq, haú tarajong má up sù é yhûm má jé lé kô é hkûn, Yesuq gi, byu pé garu garín ga yón ngau gabyông nyi bum é lé, myàng ri. ³⁹ Yhang gi, yhúmkaú shut wang ló mù, haú bang lé, "Haí mù, yón ngau gabyông nyi bum akô lhú? Haú zoshâng gi, shi byuq é a nghut, yhup myhí tô é sheq ru nghut lê." ga taí ri. ⁴⁰ Nghut kôlhang,

* 5:20 Dekapoli gâ é gi, Grik đông myuq raxê lé gâ lhê.

yangmoq gi, Yhang lé wuizui kut pyám byi akô.

Yhang kúm gi, haú bang banshoq lé hkat htoq pyám mù, zoshâng é yhângnu yhângwa nhik eq Yhâng é chángzô pé lé za shui luí, zoshâng lé lheq tô é gok má wang e akô nghut ri. ⁴¹ Yesuq gi, myiwe zo hau é loq má zuí to mù, "Talihta ku-mi" (haú é lichyúm gi, "Myiwe zo é, ngò, nang lé taí bá, toq aq." gâ é nghut lhê.) ga taí ri. ⁴² Myiwe zo haú gi, haú hkún jáng, toq luí, sô wún ri (yang gi, asak raxe í zân bò bê sù nghut ri.). Yhangmoq gi, haú sù dut é hkyô lé gyai yang maú byuq bùm bekô nghut ri. ⁴³ Yhang gi, haú hkyô ó lé le a sé nhâng râ matú, yangmoq lé taí hkúm kat luí, myiwe zo haú lé, zô jung byi tso râ matú le, yangmoq lé taí ri.

6

Yhumsing Wà Má Myoqdong A Wó É Hkyô

Mht 13:53-58; Luk 4:16-30

¹ Yesuq gi, haú jowò mai htoq e ló mù, Yhâng é yhum mau shut taú ló ri; Yhâng é chángzô pé le, Yhang eq rahá bo châng ló akô nghut ri. ² Banno buinyi jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôluí, "Byù shí yuq gi, haú pé lé hkâmá mhoq yu é lhà? Yhang wó yu é hpaqchyí byéng-yá gi, hkasú é wá nghut mù luí, laklaí kumlhá lé lháng kut lhê laq? ³ Shí yuq gi, Mariq é yangzo, laksíma hpó nghut lhê, a nghut lhú? Yhang gi, Yakuq, Yose, Yudaq, Simun pé é yangmang nghut lhê, a nghut lhú? Yhâng nhammó pé le, nga-nhúng eq rahá nghut nyi lhê, a nghut kó lhú?" ga luí, Yhang lé myit a ngón dut bùm bekô nghut ri.

⁴ Yesuq, yangmoq lé taí é gi, "My-iqhtoi rayuq gi, yhumsing é yhum mau, yhâng é buinùm ji-myi wui eq yhumsing é yhùm má za, myoqdong a lhaq wó wú é nghut lhê." gâ ri. ⁵ Yhang gi, nò byù ra-am lé loq ke byi mù, lhoq gê byi é mai lai luí, gotú

laklaí kumlhá haí le, haú má a wó kut shit nghut ri. ⁶ Haú mù, Yesuq gi, yangmoq lumjín myit a bò kô é hkyô lé, maú nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

Lagyo Raxe Í Yuq Lé Nhang Htoq Kat É Hkyô

Mht 10:5-15; Luk 9:1-6

⁷ Yesuq gi, haú lagyo raxe í yuq lé wut yù mù, agè ashop é nat pé lé úng râ a-tsam byi luí, í yuq yuq kut nhang htoq kat ri.

⁸ Yhang, yangmoq lé châng py-ing kat é dang gi, "Hkyowui é matú má, dumbáng mai lai luí, zoshuq le, etap le, ngùn le, gotú haí le, hkâyú chùng kó; ⁹ hkyî-tsung kúm gi, tsúng chùng keq; nghut kôlháng, bu í dung hkâwut chùng kó. ¹⁰ Hká má nghut kôlháng, rayhùm yhùm má nungmoq wang bíng kô é nghut le gi, haú wá mai dum htoq ló é buinyi jé shoq, haú yhùm má za nyi nyi keq. ¹¹ Jowò rawò wò mâ é bang, nungmoq lé a lhom hap yù, a lhom gyo byi kô é nghut jáng, nungmoq lé yangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyám to mù, haú jowò mai htoq ló keq." gâ ri.

¹² Haú mù, yangmoq gi, htoq e ló luí, myit lhîng râ é hkyô, byu pé lé hkô kyô akô. ¹³ Hau htoq agó, yangmoq gi, nat gâng pé myo myo lé hkat htoq pyám byi mù, no é bang myo myo lé le xú but byi luí, lhoq ge byi akô nghut ri.

Yohan, Ulhum Hpyit Huí é Hkyô

Mht 4:1-12; Luk 9:7-9

¹⁴ Yesuq é myìng hù lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, "Shí yuq gi, haú shi byuq bê Wui-myhup Sará Yohan dum dui toq lo é nghut lhê abe, hau é yanmai, yang gi, hpungwup a-tsam haú pé lé wó kut é nghut ri." ga luí, taí bum akô nghut ri.

15 Ra-am gi, "Yhang gi, Eliyaq nghut ri." ga taí akô nghut ri.

Dum, ra-am taí kô é gi, "Yhang gi, hí hpyang lhê é myiqhtoí pé su, myiqh-toí rayuq nghut ri." gâ ri.

16 Herut kúm gi, haú lé wó gyo jáng, "Ngò, ulhum hpyit pyám byí é Yohan gi, shi é mai dum dui toq bu-nhung!" ga taí ri.

17 Herut gi, yhanggu Hpilip é yhangmyi Herudiaq lé hâng yu pyám é hkyô é yanmai, Yohan lé chyup tuí yù nhâng mù, htóng hkyô pyám nhang wú é sù nghut lhê. 18 Hkâsu mù gâ le, Yohan gi, Herut lé, "Nàng, nunggu é yhangmyi lé hâng yu é gi, tarâ a wang é nghut lhê." ga luí, taí byí nyi é yanmai nghut ri. 19 Haú mù, Herudiaq gi, Yohan lé gyai a jú dut byuq luí, sat pyám nau kôlhang, a wó sat dut nyi ri. 20 Haí mù gâ le, Herut gi, Yohan, dingmán chyoiyúng é sù nghut é lé sé mù luí, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhúng nhâng byuq kôlhang, yhang taí é dang pé lé ru gyô nau nyi ashí nghut ri.

21 Nghut kôlhang, Herut gi, yhâng é hkû ladu hkyúm buinyi má, byù mó pé, gyezau pé, Galile mau suwún wui pé lé, ji yù mù zoshuq poí mó kut é yanmai, haú nyi gi, Herudiaq é matú, buinyi gè dut bê nghut ri. 22 Herudiaq é yhangzo byizo gi, wang lé lô mù, gó shit é hkûn, Herut eq yhâng é bíng pé gi, myit ngón bum akô nghut ri.

Haú mù, hkohkâm gi, myiwe zo haú lé, "Nàng ô nau é haí nghut kôle, dung aq, ngò nàng lé byi râ nghut lhê." ga, dakam é danggidiq byí ri. 23 Hau htoq agó, yhang gi, myiwe zo haú lé, "Nàng dung é haí nghut kôle, ngò byi râ; ngá é mingdán rawuí gû lháng, byi râ nghut lhê." ga, dakam é danggidiq byí ri.

24 Haú hkûn, myiwe zo haú gi, htoq ló mù, yhâng nu lé, "Haí dúng le gè râ laq?" ga myi jáng, yhângnu gi, "Wui-myhup Sará Yohan é ulhum dung aq." ga tû taí kat ri.

25 Myiwe zo haú gi, radá dâm hân hân wang ló mù, hkohkâm lé, "Ahkuí yhang, Wui-myhup Sará Yohan é ulhum lé, bó má kat mù byi laq." ga, dúng tôngbán ri.

26 Haú su ga jáng, hkohkâm gi, myit gyai yhang a ngón dut byuq kôlhang, yhang dakam tô é danggidiq é yanmai le, bíng pé é myoqdong lé tê nau é yanmai le, myiwe zo haú taí é dang lé a kâm he pyám lo nghut ri. 27 Haú mù, hkohkâm gi, zúng é gyezo rayuq lé, Yohan é ulhum é hpyit lô râ matú, radá dâm hkunmó hkyó mù nhang kat ri. Haú mù, haú yuq gi, htóng hkaú má é luí, Yohan é ulhum lé, é hpyit mù, 28 bó má kat luí, myiwe zo haú lé lo byí ri; myiwe zo haú gi, ulhum haú lé, yhângnu chyáng yu ló byí ri. 29 Yohan é chángzô pé gi, haú hkyô lé wó gyo kôjáng, yhâng é mâng lé lé yù luí, lup má ló myhup pyám bekô nghut ri.

Byù Ngo Hkyîng Lé Byi Tsô É Hkyô Mht 14:13-21; Luk 9:10-17; Yhn 6:1-14

30 Lagyo pé gi, Yesuq chyáng dum jé zîng lò kômù, yhangmoq kut lai lo é hkyô pé eq mhoqshit bê hkyô pé ban-shoq, Yhang lé taí kyô akô nghut ri.

31 Hau htâng, byù myo myo gi, yhangmoq chyáng htoq htoq wàng wàng kut nyí kô é yanmai, yhangmoq gi, zang zo ahkyíng lháng a wó kó nghut ri. Haú mù, Yesuq gi, chángzô pé lé, "Nga-nhúng, tsím tsâm é jowò ralhum má é mù, é nô yù sháng." ga taí ri.

32 Haú mù, yhangmoq gi, yhangmoq baú lhai racham má ji mù, tsím tsâm é jowò shut e ló akô nghut ri.

33 Nghut kôlhang, yhangmoq e ló é lé châng myang é bang myo myo gi, yhangmoq lé wú sé kôluí, wà hkangmó mai hkyí hkyô châng din é kômù, yhangmoq é hí má jé to lánng akô nghut ri. 34 Yesuq gi, lhai mai gyó dap ló é hkûn, byù moq mó nyi to lánng lé myàng jáng, yhangmoq gi, zúng sù a nyi é sau pé su dut kô é yanmai, yhangmoq lé wú shogyo luí, myo myo mhoqshit byí hi ló bê nghut ri.

³⁵ Buì gyum ló yâm jé jáng, Yhang é chángzô pé gi, lé lô kômù, Yhang lé, "Shí má gi, tsím tsâm é jowò nghut é htoq agó, buì le gyum ló bê; ³⁶ yhangmoq gi, awui ayàm mâ é yhùm pé eq wà pé má, zoshuq ló ho wuì zo kó sháng gaq, yhangmoq lé ló nhâng aq hkoi." ga taí akò nghut ri.

³⁷ Haú hkûn, Yhang gi, "Nungmoq, yhangmoq lé rajung jung byi tso keq." ga tú taí jáng, yhangmoq gi, "Shí myhò é bang zo râ matú, ngamoq gi, ê luí, denari* í sho èq muk é wuì byi ra râ luq?" ga dum taú myí akò nghut ri.

³⁸ Nghut kôlhang, Yhang gi, "Nungmoq chyáng muk hkâ-myhó wó akò? Ê wú wú keq." ga myí ri. Haú mù, yhangmoq gi, myang hô jáng, "Muk ngo long eq ngozo í du wó lhê." ga, dum tú taí akò nghut ri.

³⁹ Hau htâng, Yesuq gi, banshoq bang lé ahpúng hpúng kut wàhu yò má zùng nhâng râ matú, Yhâng é chángzô pé lé taí kat ri. ⁴⁰ Haú mù, shiwa byu pé gi, rashô shô kut le, ngo xê xê kut le, ahpúng hpúng zung tô bùm bekò nghut ri. ⁴¹ Yesuq gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpê gam ri. Hau htâng, Yhang gi, byu pé hí má châng hkat to byi râ matú, Yhâng é chángzô pé lé byí ri. Ngozo í du lé le, Yhang yù mù, banshoq bang lé gàm byí ri. ⁴² Yhangmoq banshoq bang gi, zô gyí bùm bekò nghut ri. ⁴³ Hau htâng, haú chángzô pé gi, zô myhit tô é muk eq ngozo lé, raxe í mung byíng shoq wó guq tsíng yu ashí kó nghut ri. ⁴⁴ Haú hkûn, zô é bang gi, yuqgè wuì baú lháng, byù du ngo hkyíng nghut ri.

*Yesuq, Wuì Htoq Má Sô É Hkyô
Mht 14:22-33; Yhn 6:15-21*

⁴⁵ Yesuq gi, haú shiwa byu pé lé byo ló nhang nyi é hkûn jáng, Yhâng é chángzô pé lé lhai má wang ji nhâng mù, tú tap mâ é Bet-saida wà mó shut dap ló lángh nang ri. ⁴⁶ Yhangmoq lé shi-kyâm kat é htâng, Yhang gi,

kyûdung râ ga, Yhang baú bùm shut doq e ló bê nghut ri.

⁴⁷ Buigyum htâng, lhai gi, nhông gùng má jé tô é u lé, Yesuq gi, Yhang baú za myì htoq má nyi tô ashí nghut ri. ⁴⁸ Lài tau mut é yanmai, haú chángzô pé gi, lhai lhu wuìhkê nyi kô é lé, Yesuq myang ri. Napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut e ló luí, yhangmoq é nàm mai lai ló râ dâ ri. ⁴⁹ Nghut kôlhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyeq garû bum akò nghut ri. ⁵⁰ Hkâsu mù gâ le, yhangmoq banshoq bang gi, Yhang lé myàng kôluí, gyuq dân kô é yanmai nghut ri.

Nghut kôlhang, Yhang, radá dâm yhangmoq lé dánh nyo kat é gi, "Hkâgyuq kó. Ngò ru nghut lhê; zim za nyi keq." gâ ri. ⁵¹ Hau htâng, Yhang gi, lhai htoq má yhangmoq eq rahá é doq ji jáng, lai gi, zím byuq bê nghut ri; haú mù, yhangmoq gi, gyai yhang mauhong byuq bùm bekò nghut ri. ⁵² Hkâsu mù gâ lé, yhangmoq gi, muk gam é laklai kumlhá eq séng luí a sê gyo kô é htoq agó, myitbun a bóng kô é yanmai nghut ri.

⁵³ Yhangmoq gi, gû dap ló kômù, Genesarat mau má jé wang lò jáng, lhai lé haú má ló shap tô akò nghut ri. ⁵⁴ Yhangmoq lhai mai gyó é hkûn jáng, byu pé gi, Yesuq lé lhom wú sê akò nghut ri. ⁵⁵ Haú mù, yhangmoq gi, haú mau ramau gón má din jón mù, nò bang lé taphkang mai waq luí, Yesuq nyi rí gâ é jowò hkanmó má, shuí lé lo bum akò nghut ri. ⁵⁶ Yesuq jé é wà hkanmó, myuq hkanmó, awui ayàm mâ é wà hkanmó pé má, yhangmoq gi, nò byù lé gai pé má lé lhez to kôluí, Yhâng é bushi htâng má za lháng, haú bang lé byi záng nhâng râ matú, Yhang lé dúng tôngbán akò. Yhang lé záng é lhunglhang bang gi, lhoq gè byí é huì akò nghut ri.

* **6:37** Denari rachap gi, byù rayuq é ra-nyí lhê é zuihpau eq wuì ri.

7

*A Sanséng Dut Nhang É Hkyô Pé
Mht 15:1-20*

¹ Haú Hparishe pé eq tarâ sará pé ra-am gi, Yerusalem wà mó mai jé lé lô kômù, Yesuq é nàm má lé zup zîng bum akô. ² Haú hkûn, Yhâng é chángzô pé ra-am gi, htûngli dông a chí pyâm é, a sanséng é loq èq zo shuq nyí kô é lé, yhangmoq myang akô nghut ri. ³ (Hparishe pé eq Yudaq byù banshoq bang gi, yhangmoq é îchyí îwâ pê é htûngli lé châng é bang nghut lê mù luí, loq hí a chí é gi, haí le a zô wú kó nghut ri. ⁴ Yhangmoq gi, gài pé mai taú lò jáng le, gùng hí a chí pyâm é, zojung a zo kó nghut é htoq agó, góm pé, hkoq pé, gyi chônkon pé lé chí é htûngli gotû pé lé le, châng akô nghut ri.)

⁵ Haú mù, Hparishe pé eq tarâ sará pé gi, Yesuq lé, "Náng é chángzô pé gi, haí mù luí, îchyí îwâ pê é htûngli lé a châng e za, a sanséng é loq èq zo shuq nyi akô lúh?" ga myí akô.

⁶ Haú hkûn, Yesuq gi, yhangmoq lé, "Gegùn labyoq kut bang ê, nungmoq eq séng luí myiqhtoi Esai-aq htoí tô é dang má,

'Byù shí bang gi, nhut htoq mai za Ngo lé hkunggâ akô; yhangmoq é myit nhiklum gi, Ngò eq wê gâng nyi akô.

⁷ Yhangmoq gi, akôm má za, Ngo lé noqkuq nyi akô; hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.✠

ga kâ tô é gi, têng ri. ⁸ Nungmoq gi, Garai Gasang tô tô é hkunmó lé tô pyám luí, byu é htûngli lé za, myhik zing tô akô nghut ri." ga luí tú taí ri.

⁹ Hau htâng, Yhang xoq taí é gi, "Nungmoq gi, yhumsing é htûngli lé za châng râ matú, Garai Gasâng é hkunmó lé he-ngik pyâm é má, hpaqchyí gyaí bo akô nghut ri.

¹⁰ Hkâsu mù gâ le, Mosheq gi, 'Nungmoq é înu îwâ lé, hkungga keq.✠ ga

le, 'Înu îwâ lé, nhîng é sù ó yuq nghut kôle, sat pyâm é hui râ lê.✠ ga le, kâ tô é nghut lê. ¹¹ Nghut kôhang, nungmoq taí é gi, byù rayuq yuq, yhumsing é yhângnu yhângwa lé byi âng é zè lé, Korban za (Garai Gasang lé byi râ chyunghuq) nghut lê gá nhang akô. ¹² Haú mù, haú yuq lé, yhângnu yhângwâ é matú, haí a kut byi nhâng lô é dông dut bê nghut ri. ¹³ Haú dông mai, nungmoq gi, nungmoq chung gyó lo é htûngli é yanmai, Garai Gasâng é mungdang lé he-ngik pyâm akô; haú sù é hkyô myo myo lé le, nungmoq kut akô nghut ri." gâ ri.

¹⁴ Yesuq gi, shiwa byu pé lé Yhâng chyáng dum wut yù mù, taí é gi, "Nungmoq banshoq bang, ngò taí é lé gyô yù mù, sé lo keq; ¹⁵ Shinggan mai wang lo é haí jung le, byù lé a sanséng dut nhang é a nghut, nghut kôhang, byu é unghkaú mai htoq ló é zè kúm gi, byù lé a sanséng dut nhang lê." gâ ri. ¹⁶ (Gyo râ nohkyap dap é sù gi, gyô yù sháng gaq.)" ga taí ri.*

¹⁷ Yhang gi, byù moq mó mai htoq ló mù, yhúmhkaú má jé wang ló é hkûn, Yhâng é chángzô pé gi, dangtú haú eq séng luí, Yhang lé lhom myí akô nghut ri. ¹⁸ Haú mù, Yhang gi, yhangmoq lé, "Nungmoq gi, haú-í yhang go akô luq? Shinggan mai wang lo é haí jung le, byù lé a sanséng nhâng wó dut râ a nghut é hkyô lé, a sé kó lúh? ¹⁹ Hkâsu mù gâ lé, haú gi, byu é myit nhiklum hkaú má wang ló é a nghut e za, wamdau hkaú má sheq wang ló é nghut mù, shinggan shut dum lhoq htoq pyâm é nghut lê." ga taí ri. (Yhang isu ga taí é gi, zoshuq lhunglhang sanséng lê gá nau é dông nghut ri.)

²⁰ Hau htoq agó, Yhang xoq taí é gi, "Byù mai htoq ló é haí jung le, byù lé a sanséng nhâng wó dut é nghut lê. ²¹ Hkâsu mù gâ lé, ahkaú mai htoq lo é gi, byu pé é myit mai htoq ló é nghut mù, agè ashop é dông myit é hkyô

✠ 7:7 Esai 29:13 ✠ 7:10 Htoq Ló 20:12 ✠ 7:10 Htoq Ló 21:17 * 7:16 Bun zo shí gi, Chyúmlaiká ra-am má bo lê, ra-am má a bò.

pé, ashop é dông gungsho zùm yap é hkyô, hkaû é hkyô, byù sat é hkyô, su-myi sulàng lú hkyô, ²² myoqnoq é hkyô, agè ashop é hkyô, mhaú zô é hkyô, achag achyut zùm yap lhùm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê; ²³ Agè ashop é hkyô shí pé banshoq gi, byu é unghkaû mai htoq lo é nghut mù, byù lé a sanséng dut nhang ri." gâ ri.

Tungbau Myiwe Myhi Rayuq É Lumjng Myit

Mht 15:21-28

²⁴ Yesuq gi, haú jowò mai htoq lò mù, Turuq eq Sidun maukyo shut e lò luí, yhùm ralhum má wang ê ri; Yhang nyi é hkyô lé, ó yuq lé lé a sé nhâng nau kôlhang, a wó zaú to nghut ri. ²⁵ Haú mù, agè ashop é nat wang júng tô é myiwe zo rayuq é yhangnu gi, Yhang nyi tô é hkyô lé wó gyô é hkùn jáng, Yhâng chyáng jé lé mù, Yhâng é hkyô wang má lé paí gop to luí, ²⁶ yhang zô chyáng mai nat gang lé hkat htoq pyám byi râ matú, Yhang lé dúng tôngbán ri. Myiwe haú gi, Suru-Hpiniki mau mâ é Grik byuhú nghut ri.

²⁷ Yesuq gi, "Zo wuít† hí zô gyi kó sháng gaq; haí mù gâ le, zô wui chyáng mâ é zoshuq lé yù mù, hkuí pé‡ lé byi tsô é jung a nghut." ga yhang lé taí kyô ri.

²⁸ Haú hkùn, yhang gi, "Yhumsing ê! Haú kúm nghut ri; nghut kôlhang, siboí ô mâ é hkuí lhang, zô wui é zô myhit shuq htâng lé, ge zo lhê a nghut lhu?" ga dum tú taí ri.

²⁹ Haú mù, Yesuq gi, yhang lé, "Nàng tú taí é dang hau é yanmai, lò lo aq hkoi; haú nat gang gi, nung zô chyáng mai htoq lò byuq bê nghut ri." ga taí kat ri.

³⁰ Myiwe myhi haú gi, yhùm má dum taú jé lo é hkùn, yhang zo chong htoq má leq to lánq é lé le, nat gang htoq byuq bê nghut é lé le, lo myang ri.

† 7:27 Zo wuít gâ é gi, Yudaq byu pé lé gâ é nghut lhê. ‡ 7:27 Hkuí pé gâ é gi, tungbau pé lé gâ é nghut lhê.

Nojit É Eq Dang A Hkyang É Sù Lé Lhoq Gê Byi É Hkyô

³¹ Yesuq gi, Turuq mau mai dum htoq lò mù, Sidun mai sô lai lò luí, Dekapoli mau hkaû dông lai byit mù, Galile nhông shut gyó jé lò ri. ³² Haú hkùn, byù ra-am gi, nojit é eq dang a hkyang é byù rayuq lé, Yhâng chyáng shuí lé lô kômù, haú yuq é ahtoq má loq ke byi râ matú, Yhang lé dúng tôngbán akô nghut ri.

³³ Yesuq gi, haú yuq lé baú za byù hpúng mai shuí htoq yù mù, yhâng é nohkyung má loqnyhui htaú háng byi luí, sôkan byé tik yù mù, haú yuq é shô má htau byi ri. ³⁴ Hau htâng, Yhang gi, mauhkung shut tu wú mù, soq mó shé luí, "Ehpahta!" (Lichyúm gi, "Bóng aq hkoi!") ga luí, haú yuq lé taí kat ri. ³⁵ Haú hkùn, haú yuq é nohkyap le bóng byuq luí, shô le nyhôm byuq mù, balang hkyâng hkyâng dang wó nyô bê nghut ri.

³⁶ Yesuq gi, haú hkyô ó lé le a taí kyo râ matú, yhangmoq lé hkúm kôlhang, yhangmoq gi, je hkúm le, je taí pyo akô nghut ri. ³⁷ Byu pé gi, gyai yhang mauhong byuq bùm kôluí, "Yhang gi, haí lé le, ge é dông chyat kut ri; nojit sù lé, wó gyo shoq, dang a hkyâng sù lé, wó nyô shoq, kut byi bê nghut ri." ga luí, taí bum akô nghut ri.

8

Byù Myi Hkying Lé Byi Tsô É Hkyô
Mht 15:32-39

¹ Haú yoq má, gotú byù moq mó gi, lé zing bum akô; haú bang zoshuq langhpyut to kô é yanmai, Yesuq gi, Yhâng é chángzô pé lé wut yù mù, ² "Ngò, shí bang lé wú shogyo ri; yhangmoq gi, Ngò eq rahá nghut nyi é sum nyí bò bê, haí le a myàng zo kó nghut ri. ³ Yhangmoq chyáng mâ é ra-am gi, mau we mai lé é bang nghut é yanmai, yhangmoq lé, zòmut gû yhùm shut nhang kat é nghut le gi, hkyolat má mutyut yut é lò hui kó râ nghut lhê." ga taí ri.

⁴ Haú hkûn, Yhâng é chángzô pé gi, Yhang lé, "Îsu é yoso má nhîng, shî myhò bang lé luq shoq byi tso râ zoshuq gi, hkâmá ê yû râ lhú?" ga taí akô.

⁵ Yesuq gi, "Nungmoq, muk hkâ-myhó long wó akô lhú?" ga taú myi jáng, yhangmoq gi, "Nyhit long." ga, dum tû taí akô nghut ri.

⁶ Haú mù, Yhang gi, byù hpûng lé myigùng htoq má zùng nhang to luí, muk haú nyhit long lé yù mù, jeju ban hkya-on jáng, myhik hpé luí, haú bang lé gàm byi râ matú, Yhâng é chángzô pé lé byí kat ri; haú mù, yhangmoq gi, haú bang lé gàm byí akô nghut ri. ⁷ Yhangmoq gi, ngo-nú zo ratsuí le wó akô nghut ri; haú mù, Yhang gi, ngozo haú pé é matú jeju hkya-on luí, chángzô pé lé dum gàm byí nhang ri. ⁸ Yuq hkangmó zô gyí bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsíng yu ashí kó nghut ri. ⁹ Zô é bang gi, byù myi hkyíng kô nghut ri; Yesuq gi, haú bang lé, nhang kat luí, ¹⁰ Yhâng é chángzô pé eq rahá, lhaí má wang ji mù, Dalamanuhta mau má ê jé akô nghut ri.

¹¹ Hparishe pé gi, lé mù, Yesuq eq dang htíng htíng lhûm akô; hau htoq agó, yhangmoq gi, mauhkûng mâ é kumlhá lé dúng é dông, Yhang lé chyam wú akô nghut ri. ¹² Yesuq gi, myit nò-kying kying luí, yhangmoq lé taí é gi, "Haí mù luí, shí ipyat lhé é byu pé gi, limik kumlhá dúng akô lhú? Ngò teng za taí kôlé, shí ipyat mâ é bang lé, hai kumlhá le tûn shit râ a nghut." gâ ri. ¹³ Hau htâng, Yhang gi, yhangmoq lé pyâm to mù, lhaí má dum taú wang ló luí, tû tap shut gû dap e ló bê nghut ri.

Hparishe Pé Eq Herut É Múnchi Mht 16:5-12

¹⁴ Haú chángzô pé gi, muk yu chûng râ lé tô-myhî pyám kôluí, lhaí hkaú má muk ralong za ru wó akô nghut ri.

¹⁵ Yesuq gi, yhangmoq lé, "Nungmoq

gi, Hparishe pé eq Herut é múnchi* lé, sidiq luí, koi pyâm nyi keq." ga taí ri.

¹⁶ Haú hkûn, yhangmoq gi, "Nga-nhûng chyáng muk a bo é yanmai, haú su ga taí é nghut ri." ga luí, rayuq eq rayuq taí lhûm bum akô nghut ri.

¹⁷ Haú su ga taí lhûm nyi kô é lé Yesuq sé jáng, yhangmoq lé, "Nungmoq gi, muk a bo é hkyô lé, haí mù taí lhûm nyi akô lhú? Ahkuí jé shoq, nungmoq gi, a byu-myàng, a sê gyo shi kó lhú? Nungmoq é myit nhiklhum gi, ru htan nyi ashí kó lhú?

¹⁸ Myoq dap to kôluí nhîng, a myàng kó lhú? Nohkyap dap to kôluí nhîng, a wó gyo kó lhú? ¹⁹ Ngò, muk ngo long lé myhik hpé mù, byù ngo hkyíng lé byi tsô é hkûn, zô myhit shuq htâng lé, nungmoq hkâ-myhó mung wó guq tsíng yu é lé, bun ashí kó lhú?" ga myi jáng, yhangmoq gi, "Raxe í mung." ga tû taí akô.

²⁰ Dum, Yesuq gi, "Ngò, muk nyhit long lé myhik hpé mù, byù myi hkyíng lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsíng yù kô é lhú?" ga myi jáng, yhangmoq gi, "Nyhit mung." ga dum tû taí akô.

²¹ Haú hkûn, Yesuq gi, "Haú nghut le nhîng, ahkuí le, a sê gyo shi kó lhú?" ga, yhangmoq lé myí ri.

Myoqjit Sû Rayuq Lé Lhoq Gê Byí É Hkyô

²² Yhangmoq gi, Bet-saida wà mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuí lé lô mù, haú yuq lé záng byi râ matú, dúng tóngbán akô. ²³ Yesuq gi, myoqjit sù haú yuq é loq lé zui mù, wà shinggan shut shuí htoq ló luí, yhâng é myoq má sôkan byé tik byi mù, loq ke byi luí, "Nàng, rajung jung lé myang ri lhú?" ga myí kat ri.

²⁴ Haú jáng, yhang gi, tu wú kat luí, "Byu pé gi, sîkgâm su dut luí, hkyô sô wún é lé, ngò myang ri." ga taí ri.

²⁵ Hau htâng, Yesuq gi, haú yuq é myoq má Yhâng é loq dum ke byí ri;

* **8:15** Shî má taí é múnchi gi, Hparishe pé eq Herut é mhoqshit hkyô lé, lhoq pyo é lé gâ lhê.

haú hkûn, haú yuq é myoq gi, bóng lô mù, ge byuq luí, haí lé le san za myàng bê nghut ri. ²⁶ Yesuq gi, haú yuq lé, "Wà hkaú má hkâwang ló lo." ga taí luí, yhâng é yhûm shut ló nhang kat bê nghut ri.

Hkrisduq Ga, Petruq Yín Yu É Hkyô Mht 16:13-20; Luk 9:18-21

²⁷ Yesuq eq Yhâng é chángzô pé gi, Kesare-Hpilipi wà mó awui ayàm má é wà pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, taí akô lhú?" ga myí ri.

²⁸ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoí rayuq yuq nghut ri ga taí akô." ga, Yhang lé tú taí akô.

²⁹ Yesuq gi, "Nungmoq gi, ngo lé ó yuq nghut lhê nghu akô lhú?" ga, yhangmoq lé xoq myí jáng, Petruq gi, "Nàng gi, Hkrisduq† nghut ri." ga tú taí ri.

³⁰ Yesuq gi, haú hkyô ó lé le a taí kyo râ matú, yhangmoq lé taí hkúm ri.

Byu Yhangzo Gi, Sat Pyâm É Hui Luí, Dum Dui Toq Râ Hkyô

Mht 16:21-28; Luk 9:22-27

³¹ Hau htâng, Yhang gi, yhangmoq lé mhoqshit é má, "Haú Byu Yhangzo gi, zing-rí é myo myo hui zo luí, suwún wuí, hkyangjong agyi pé, tará sará pê èq he-ngik pyâm é hui mù, sat pyâm é hui ra râ nghut lhê; nghut kôlhang, sum nyí nghû râ buinyí má, dum dui toq râ nghut lhê." gâ ri.

³² Yesuq gi, haú hkyô lé san za dut shoq taí nyí é yanmai, Petruq gi, Yhang lé rahkyam shut shuí htoq yû mù, Yhang lé tân ri.

³³ Nghut kôlhang, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut ri." ga tân kat ri.

³⁴ Hau htâng, Yhang gi, byù moq mó eq Yhâng é chángzô pé lé wut yù mù, taí é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyám mù, yhumsing é tapzîng lé waq chùng luí, cháng ra râ nghut lhê. ³⁵ Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai le, haú gabú danglù é yanmai le, yhumsing é asak sùm pyâm é sù kúm gi, asak hkyi yu é hui râ nghut lhê. ³⁶ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhâng é matú, hai akyû bò râ lhú? ³⁷ Byù gi, yhumsing é asak woi-nyí lé, hai èq wó htaí yù râ lhú? ³⁸ Yubak mara myô é eq su-myi sulàng shut é ipyat shí má, Ngò eq Ngá é dang lé hoq pyâm é sù ó yuq lé le, haú Byu Yhangzo gi, Yhâng Wâ é hpungwup shingkang bo é èq, haú chyoiyúng maumang lagyô pé eq rahá jé lé é hkûn, hoq pyám râ nghut lhê."* gâ ri.

9

¹ Hau htâng, Yesuq gi, yhangmoq lé, "Ngò, nungmoq lé teng za taí kôlé, shí má yap tô é bang ra-am gi, Garai Gasâng é mingdán, hpungwup a-tsâm èq jé lé lo é lé, a myang é za shí kó râ a nghut." ga taí ri.

Yesuq É Ihpyô Isâm Htaí Lo É Hkyô Mht 17:1-13; Luk 9:28-36

² Hkyuq nyí laí htâng má, Yesuq gi, Petruq lé le, Yakuq eq Yohan lé le, shuí chùng mù, yhangmoq baú myhang é bùm ralhum má doq ló akô; haú hkûn, yhangmoq é myoq hí tê má, Yesuq é ihpyô isâm htaí lo ri.

³ Hau htoq agó, Yhâng é mebu gi, wik wik duq hpyu zan lo ri; myidàm htoq má, ó yuq le haú-í hpyû shoq a wó xaú hpyu wú é nghut lhê. ⁴ Eliyaq eq Mosheq gi, yhangmoq é hí má htoq shit mù, Yesuq eq dáng nyo lhûm nyí akô.

† **8:29** Grik dong Hkrisduq gâ é gi, xú but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê. * **8:38** Yer 3:8; Ezk 23:37; Hos 2:2-10

⁵ Haú mù, Petruq gi, Yesuq lé, "Rabai ê, shí jowò má nga-nhúng nyi le ge ri; haú mù, Náng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhum saí nhâng laq." ga taí ri.
⁶ Hkâsu mù gâ le, yhangmoq gi, gyai yhang gyuq dan bùm kô é yanmai, Petruq gi, haí taí râ le a sé mù, haú su gâ é nghut ri.

⁷ Hau htâng, mhut htoq lô luí, yhangmoq lé htup zíng lô mù, mhut hkaú mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhâng é dang gyo keq." gâ ri.

⁸ Haú hkûn jáng, chángzô pé gi, lhîngkhyuq má wú kat le, Yesuq za yhangmoq eq rahá nghut nyi é mai lai luí, ó lé le, a myàng lo kó nghut ri.

⁹ Yhangmoq, bùm mai taú gyó lô kô é hkûn, Yesuq gi, haú Byu Yhangzo shi é mai a dum dui toq toq gi, yhangmoq myang é hkyô lé, ó lé le a taí kyo rá matú taí hkûm tô ri. ¹⁰ Chángzô pé gi, dang haú lé myit má kat to kôluí, "Shi é mai dum dui toq râ." gâ é lichyúm lé, rayuq eq rayuq myí lhùm bum akô nghut ri.

¹¹ Hau htâng, yhangmoq gi, "Eliyaq hí lé ra râ nghut lhê ga, tarâ sará pé haí mù taí kô é lhú?" ga, Yesuq lé myí akô.

¹² Haú hkûn, Yesuq gi, "Eliyaq hí jé lé é gi, teng bê nghut luí, lhunglháng lé dum lajâng tô é nghut ri. Nghut kôlháng, haú Byu Yhangzo gi, myo myo hpuzo luí, he-ngik pyâm é hui ra nghut lhê ga le, Chyúmdang má kê to ashí, a nghut kó lhú? ¹³ Ngò, nungmoq lé taí kôlé, Eliyaq gi, jé lé bê nghut mù, yhang eq séng luí Chyúmdang má kê tô é eq rajung za, yhangmoq gi, ô nau é dông banshoq kut bekô nghut ri." ga tû taí ri.

Nat Dap É Yuqgè Zo Rayuq Lé Lhoq Gê Byí É Hkyô

Mht 17:14-20, 22-23; Luk 9:37-45

¹⁴ Yhangmoq gi, chángzô pé chyáng dum taú jé lô kô é hkûn, haú bâng é lhîngkhyuq má byù moq mó zîng lé é lé le, tarâ sará pé, haú bang eq dang

htíng htíng lhùm nyi kô é lé le, myang akô. ¹⁵ Haú má nyi tô é lhunglháng bang gi, Yesuq lé myang kat é eq, maú byuq kôluí, din é mù, é shi-kyâm akô nghut ri.

¹⁶ Haú hkûn, Yesuq gi, yhangmoq lé, "Nungmoq gi, yhangmoq eq haí lé dang htíng htíng lhùm nyi akô lhú?" ga myí ri.

¹⁷ Byù hpúng hkaú má é rayuq tû taí kat é gi, "Sarâ ê! Nhut jit nhang é nat wang júng tô é ngâ é yuqzo lé, Náng chyáng shuí lé lo lhê. ¹⁸ Nat haú gi, yhâng chyáng wàng hkangmó, yhang lé myí htoq má lhoq leqbat nhang ri; haú mù, yhang gi, nhut mai guttsû htoq lhê, zuí kyik kyik lhê, langhtan lô lhê, dut ri; hau é yanmai, nat haú lé hkat htoq pyám byi râ matú, Náng é chángzô pé lé dúng wú kôlháng, yhangmoq a wó dut kó nghut ri." gâ ri.

¹⁹ Haú hkûn, Yesuq gi, "Lumjín myit a bo é amyú pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haú lé, Ngá chyáng shuí lé lô keq." ga taí kat ri.

²⁰ Haú mù, yhangmoq gi, yuqgè zo haú lé shuí lé lo akô; nat haú gi, Yesuq lé myang kat é eq yhang, yuqgè zo haú lé langhtân nhang ri; yuqgè zo haú gi, myigùng má lêng leq luí goleng leng mù, nhut mai tsû-myup htoq nyi ri.

²¹ Haú hkûn, Yesuq gi, yhângwa lé, "Yhang, isu dut é hkâ-myháng myáng bê lhú?" ga myi jáng, yhâng wa gi, "Zoshâng hkûn mai nghut bê. ²² Nat haú gi, yhang lé lhoq sat pyám naú mù, myi má le, wui má le, anum num lêng wàng nhang wú bê nghut lhê; nghut kôlháng, Nàng, rajung jung wó kut byí é nghut le gi, ngá hpe lé shogyo yù laq, garúm yù laq." ga tû taí ri.

²³ Yesuq gi, "'Nàng, wó kut byí é nghut le gi,' nghú, haí mù taí lhê lhú? Lumjín myit bò su é matú gi, haí le wó dut lhê." ga, yhang lé taí ri.

²⁴ Haú zôshang é yhângwa gi, radá dâm, "Ngò lumjín lhê; nghut kôlháng,

ngá é lumjínng myit gi, shaû ashî nghut é yanmai garúm yû laq." ga taî garû ri.

²⁵ Yesuq gi, byû hpúng din zîng lé lô kô é lé, myàng jáng, haû agè ashop é nat lé, "Nojit, nhutjit nhang é nat ê! Ngò, nang lé hkunmó hkyô lhê, yhâng chyáng mai htoq ló aq; hkâ-nhám le, yhâng chyáng hkâdum wàng lo." ga tân kat ri.

²⁶ Haû hkûn, nat haû gi, garu mù, zoshâng haû lé wum kat langhtân nhâng luî, htoq ló byuq bê. Zoshâng haû gi, shî mâng gùng su dut byuq é yanmai, byû myo myo gi, "Yhang shî bê nghut ri." ga taî akô. ²⁷ Nghut kôlhang, Yesuq gi, zôshang é loq má zui luî, tu toq kat ri; haû mù, zoshâng gi, yap to bê nghut ri.

²⁸ Yesuq, yhúmhkaû má wang ló é htâng, Yhâng é chángzô pé gi, "Ngamoq gi, haî mù, nat haû lé a wó hkat htoq é lú?" ga, tsik za Yhang lé myî akô.

²⁹ Yesuq gi, "Haû jung nat lé gi, kyûdûng é dông za a nghut jáng, wó hkat htoq râ a nghut." ga, yhangmoq lé tû taî ri.

³⁰ Yhangmoq gi, haû jowò mai htoq ló mù, Galile mau mai lai ló akô; nghut kôlhang, Yesuq gi, ó lé le a sé nhâng naù nghut ri. ³¹ Haî mù gâ le, Yhang gi, "Haû Byu Yhangzo gi, byu pé é loq má ap pyâm é huî râ nghut lhê; haû bang gi, Yhang lé sat pyâm kó râ nghut lhê; nghut kôlhang, Yhang gi, shi é htâng sum nyí nghû râ nyí má, dum dui toq râ nghut lhê." ga, Yhâng é chángzô pé lé mhoqshit byî nyi é yanmai nghut ri. ³² Yhâng é chángzô pé gi, dang haû lé a sê gyo kôlhang, Yhâng chyáng a wám myi kó nghut ri.

*Kô Dik Sû Gi, Ó Yuq Nghut Lhê Lú?
Mht 18:1-5; Luk 9:46-48*

³³ Yhangmoq gi, Kaperna-um wà má jé e akô nghut ri. Yesuq gi, yhúmhkaû má nyi tô é hkûn, chángzô pé lé, "Hkyô má, nungmoq, hai hkyô lé dang chyin chyîn lhum kô é lú?" ga myî ri. ³⁴ Nghut kôlhang, yhangmoq gi, zim za nyi tô akô; hkâsu mù gâ le, ko dik sù gi, ó yuq nghut lhê nghû é

hkyô lé, hkyolat má, yhangmoq dang chyin chyîn lhum kô é yanmai nghut ri.

³⁵ Yesuq gi, zùng mù, haû chángzo raxe í yuq lé, wut yù luî, "Kô dik naù sù ó yuq nghut kôle, tiq dik sù eq banshoq bâng é dui-nhâng zoshâng dut ra râ nghut lhê." ga taî ri.

³⁶ Hau htâng, Yhang gi, zoshâng rayuq lé shuí yù mù, yhangmoq é gung gung má shap to luî, dum bún yù mù, yhangmoq lé taî é gi, ³⁷ "Shî sù é zoshâng lé, Ngá é myîng mai hap yu é sù ó yuq nghut kôle, Ngo lé hap yu é sù nghut bê; Ngo lé hap yu é sù ó yuq nghut kôle, Ngo lé za hap yu é a nghut, Ngo lé nhang kat é Sù lé hap yu é le nghut lhê." gâ ri.

*Nga-nhúng Lé Gyè A Kut É Sù Gi,
Nga-nhúng É Hkyam Shut Nghut Lhê
Gâ É Hkyô*

Luk 9:49-50

³⁸ Haû hkûn, Yohan gi, "Sarâ ê! Náng é myîng lang luî, nat gâng pé lé hkat pyâm byî wún é byû rayuq lé, ngamoq myang ri. Yhang gi, nga-nhúng chyáng a lóm sù nghut é yanmai, yhang lé ngamoq hkûm pyâm é nghut lhê." ga taî ri.

³⁹ Yesuq kúm gi, "Yhang lé hkâhkúm kó; Ngá myîng lé lang luî, laklai kumlhá kut é sù gi, razup za má, Ngò eq séng luî, a ge é hkyô pé lé taî râ a nghut; ⁴⁰ Hkâsu mù gâ le, nga-nhúng lé gyè a kut é sù gi, nga-nhúng é hkyam shut nghut lhê. ⁴¹ Ngò, nungmoq lé teng za taî kôlé, nungmoq gi, Hkrisduq eq séng é bang nghut lhê gâ é yanmai, ngá é myîng lé lang luî, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù râ za nghut lhê.

Mara Shut Nhang É Hkyô

Mht 18:6-9; Luk 17:1-2

⁴² Ngo lé lumjínng é zoshâng wui mâ é rayuq lé, mara kut shut nhang é sù gi, yhâng é lingzing má luqluí long mó tuî hut byi luî, wuimau má ê dú hkyô pyâm é huî é nghut lé gi, yhang é matú je gè râ nghut lhê. ⁴³ Náng é loq èq,

nang lé mara kut shut nhang é nghut le gi, haú lé hpyit dú pyám aq; loq í loq dap luí, hkâ-nhám le, myiduq a dat shum é ngaraí ming wàng râ htoq má, loq raloq eq za ahtum abyuq é asak wó râ shut wàng le gi, náng é matú je ge ri. ⁴⁴ (Haú ngaraí ming gi, 'yhangmoq lé hkê nyi é luq le a shí, myiduq le a shúm' é jowò nghut lhê.)* ⁴⁵ Náng é hkyi eq, nang lé mara kut shut nhang é nghut le gi, haú lé hpyit dú pyám aq; hkyi í hkyi dap luí, hkâ-nhám le, myiduq a dat shum é ngaraí ming má dú hkyô pyám é hui râ htoq má, hkyi rahkyi za dap luí, ahtum abyuq é asak wó râ shut wang le gi, náng é matú je ge ri. ⁴⁶ (Haú ngaraí ming gi, 'yhangmoq lé hkê nyi é luq le a shí, myiduq le a shúm' é jowò nghut lhê.) ⁴⁷ Náng é myoqjí eq, nang lé mara kut shut nhang é nghut le gi, haú lé lap choq pyám aq; myoqjí í jí dap gú, ngaraí ming má dú hkyô pyám é hui râ htoq má, myoq rají eq za, Garai Gasang é mingdán má wang le gi, náng é matú je ge ri.

⁴⁸ (Haú ngaraí ming gi, 'yhangmoq lé hkê nyi é luq le a shí, myiduq le a shúm' é jowò nghut lhê.)*

⁴⁹ Hkâsu mù gâ le, hkungga sho lé xo kat luí lhoq sanséng é su, myi gi, yuq hkanmó lé lhoq sanséng râ nghut lhê.*

⁵⁰ Xo gi, ge lhê. Nghut kôlháng, xomân kân byuq jáng gi, hkâsu kut dum wó lhoq ngam yù râ lhú? Nungmoq gi, xo su ngam nyi mù, rayuq eq rayuq nguínón nyi keq." ga tái ri.

10

Myi, Làng Gâng É Hkyô *Mht 19:1-12; Luk 16:18*

¹ Hau htâng má, Yesuq gi, Kapernaum mai htoq ló mù, Yuda mau má é maukyo má ê jé luí, Yodan làng tú tap má dap ló bê nghut ri; byù myo myo gi, Yhâng chyáng dum zing lé lô kôluí, Yesuq gi, Yhang lhaq kut nyi é

eq rajung za, haú bang lé mhoqshit byi ri.

² Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyám le, tarâ wang lhê lhú?" ga myi é dong, Yhang lé chyam wú akô.

³ Yesuq gi, "Mosheq gi, nungmoq lé, hkâsu ga hkunmó hkyô tô é lhú?" ga tái ri.

⁴ Haú hkûn, yhangmoq gi, "Yuqgè rayuq gi, lhoq kang laiká ká mù, yhangmyi lé wó nhang pyám lhê ga, Mosheq, ahkáng byi tô ri." ga tái tái akô.

⁵ Yesuq dum tú tái é gi, "Nungmoq é myit nhiklum htân kô é yanmai, Mosheq gi, tarâ haú lé ká tô é nghut lhê. ⁶ Nghut kôlháng, mau htoq xâng hkun lé, Garai Gasang gi, 'yuqgè eq myiwe lé hpan é nghut lhê'.* ⁷ 'Hau é yanmai, yuqgè gi, yhumsing înu îwâ chyáng mai htoq luí, yhangmyi eq rahá rading ralhum za kut nyi mù, ⁸ yhangnhik gi, gungsho ralhum za dut byuq kó râ nghut lhê'.* Haú mù luí, yhangnhik gi, í yuq a nghut lo é za, rayuq za dut bê nghut ri. ⁹ Haú mù luí, Garai Gasang lhoq tsúm tô é lé, byù gi, a lhoq kang sháng gaq." gâ ri.

¹⁰ Yhumhkaú má, yhangmoq nyi tô é hkûn lé, chángzô pé gi, haú hkyô eq séng luí, Yhang lé dum saí myi akô.

¹¹ Haú hkûn, Yhang gi, "Yhumsing é yhangmyi lé kâng pyám mù, myiwe gotú dum hâng yu é sù ó yuq nghut kôle, su-myi lú é sù dut bê nghut mù, yhangmyi lé shut é sù nghut bê. ¹² Myiwe rayuq le, yhumsing é yhanglâng lé kâng pyám mù, yuqgè góyuq eq dum hâng é nghut le gi, sulàng lú é hkyô lé kut bê nghut ri." ga tái tái ri.

Zoshâng Wuì Eq Yesuq É Hkyô *Mht 19:13-15; Luk 18:15-17*

¹³ Byu pé gi, zoshâng wuì lé Yesuq záng byi sháng gaq ga, Yesuq chyáng shuí lé lo akô; nghut kôlháng, chángzô

* **9:44** Bun zo 44, 46, gi, Chyúmlaiká myo myo má a bo é nghut lhê. ✧ **9:48** Esai 66:24 ✧ **9:49** Nhung 2:13 ✧ **10:6** Apûn 1:27 ✧ **10:8** Apûn 2:24

pé gi, yhangmoq lé lhom tân hkâm akô nghut ri. ¹⁴ Haú lé Yesuq myàng jáng, Yhang gi, wú nhik-yo naú luí, "Haú zoshâng wuì lé, Ngá chyáng lé nhâng keq; yhangmoq lé hkâhkâm zing to kó; hkâsu mù gâ le, Garai Gasâng é mingdán gi, haú su é bâng é mingdán ru nghut lhê. ¹⁵ Ngò, nungmoq lé teng za taí kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haú má wó wâng râ a nghut." ga yhangmoq lé taí ri. ¹⁶ Hau htâng, Yesuq gi, zoshâng wuì lé bún yû mù, yhangmoq ahtoq má loq ke luí, shimân byî ri.

*Sùt Wó É Zorâm Rayuq É Hkyô
Mht 19:16-30; Luk 18:18-30*

¹⁷ Yesuq gi, hkyô dum so xoq e ló é hkûn, byù rayuq gi, din lé lô mù, Yhâng é hí má hkyihput htuq luí, "Ge é Sará ê, ahtum abyuq é asak wó yû râ matú, ngò haí kut ra râ lú?" ga myí ri.

¹⁸ Haú mù, Yesuq gi, "Haí mù, Ngo lé ge é Sará nghu lhê lú? Garai Gasang mai lai luí, ge é ó yuq le a nyi.

¹⁹ Jep e tarâ má, 'Byù hkâsat, su-myi sulàng hkâlú, hkâhkau, a teng a mán é saksé hkâhkám, hkâmô zo, nángnu nángwa lé hkungga aq! ✧ ga bo tô é lé, nàng sê lhê." ga tú taí ri.

²⁰ Haú hkûn, haú yuq gi, "Sará ê, haú pé banshoq lé, ngò, zoshâng hkûn mai cháng bê nghut lhê." ga taí ri.

²¹ Yesuq gi, haú yuq lé wú tsuq to mù, yhang lé chyitdap luí, taí é gi, "Nàng kut râ rajung râ tô ashí; lô mù, nàng wó miwó lé ûng pyám luí, myùng bang lé byî pyám aq; haú jáng, nàng, mauhkûng htoq má sutzè wó râ nghut lhê; haú mù, Ngá htâng lé cháng aq." gâ ri.

²² Haú yuq gi, dang haú lé wó gyo jáng, sutzè gyai wó sù nghut é yanmai, myoqdong shum byuq mù, gyai yhang myit a ngón é èq lô byuq bê nghut ri.

²³ Yesuq gi, lhinghkyuq byu wú mù, Yhâng é chángzô pé lé, "Sutzè wó bang

gi, Garai Gasâng é mingdán má wàng râ matú, haú-í yhang wuì ri-nhung!" ga taí ri.

²⁴ Chángzô pé gi, Yhang taí é dâng é yanmai, mauhong bum akô nghut ri. Nghut kôlhang, Yesuq dum xoq taí é gi, "Zo wuì ê, Garai Gasâng é mingdán má wàng râ matú, haú-í yhang wuì ri-nhung! ²⁵ Sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je luí râ nghut lhê." gâ taí ri.

²⁶ Haú hkûn, chángzô pé gi, je riyhang maú byuq kômù, rayuq eq rayuq, "Haú su ru nghut le gi, ó yuq za hkyi yu é hui râ nghut lhê lú?" ga, taí lhum bum akô nghut ri.

²⁷ Haú hkûn, Yesuq gi, yhangmoq lé wú kat mù, "Haú hkyô lé, byù mai gi, wó kut râ a nghut; nghut kôlhang, Garai Gasang gi, wó dut lhê; hkâsu mù gâ le, Garai Gasang gi, lhunglhang lé wó kut é Sù nghut lhê." ga taí ri.

²⁸ Haú hkûn, Petruq gi, Yhang lé, "Ngamoq gi, wó é gû lhunglhang lé tô pyâm to luí, Náng htâng cháng bê nghut lhê." ga taí ri.

²⁹ Haú mù, Yesuq tú taí é gi, "Ngò, nungmoq lé teng za taí kôlé, Ngá é yanmai le, gabú danglu é yanmai le, yhumsing é yhûm, gumang gu-nhá, înu îwa, zo dù wuì eq yò pé lé tô pyâm tô é sù ó yuq nghut kôle, ³⁰ shí pyat lhê é yhûm pé, gumang gu-nhá wuì, înu pé, zo dù wuì eq yò pé lé, rashô tú wó hkam yù luí, zing-rî é hkyô pé lé le hui kó râ nghut é htoq agó, htang pyat má le, ahtum abyuq é asak wó yû râ nghut lhê. ³¹ Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyi bang yuq gi, hí bekô râ nghut lhê." gâ ri.

*Yesuq, Yhang Shî Râ Hkyô Lé Dum
Taí É Hkyô*

Mht 20:17-19; Luk 18:31-34

³² Yhangmoq gi, Yerusalem wà mó shut doq lô nyi kô é u lé, Yesuq gi, yhangmoq é hí má sô tô ri; haú hkûn, htâng má sô é bang gi, gyuq nyi bùm

✧ 10:19 Htoq Lô 20:12-16

kô é u lé, haû chángzô pé gi, maú byuq bum akô nghut ri; Yesuq gi, haû chángzo raxe í yuq lé gotû kut dum wut yù mù, Yhâng chyáng dut lò râ hkyô, yhangmoq lé taí kyô é gi, ³³ "Wú keq, nga-nhúng gi, Yerusalem wà mó shut doq ló nyi lhê; haû Byu Yhangzo gi, hkyangjong agyi pé eq tarâ sará pé é loq má ap byî pyâm é hui râ nghut lhê; haú bang gi, Yhang lé, shî râ mara byi luî, tungbaù pé é loq má ap byî pyám kó râ nghut lhê. ³⁴ Haú bang gi, Yhang lé, wuizui kut pyâm é, sôkan byé gyûn é, nhuq bat é kut yû mù, sat pyám kó râ nghut lhê. Hau htâng sum nyí má, Yhang dum dui toq lô râ nghut lhê." gâ ri.

*Yakuq eq Yohan nhik dung é hkyô
Mht 20:20-28*

³⁵ Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, "Sará ê, ngá-nhik dúng é gû banshoq, Nang kut byi râ lé, ngá-nhik ô nau ri." ga taí akô.

³⁶ Haú hkûn, Yhang gi, "Ngò, nungnhik lé haí kut byi râ ô naû akô lhú?" ga myî ri.

³⁷ Yhangnhik gi, "Náng é hpung-wup shing kang hkaû má, ngá-nhik tâng lé, Náng é loqyò hkyam má rayuq, loqpaí hkyam má rayuq kut, zùng nhâng laq." ga tû taí akô.

³⁸ Nghut kôlhang, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq râ góm* lé, nungnhik wó shuq kó râ lhú? Ngò hkam yù râ baptisma lé, nungnhik wó hkam yù kó râ lhú?" ga yhangnhik lé tû taí ri.

³⁹ Haú hkûn, yhangnhik gi, "Nga-nhik wó dut lhê." ga tû taí kôjáng, Yesuq gi, "Ngò shuq râ góm lé, nungnhik shuq kó râ nghut lhê; ngò hkam yù râ baptisma lé le, nungnhik hkam yù kó râ nghut lhê. ⁴⁰ Nghut kôlhang, Ngá é loqyò, loqpaí hkyam má zùng râ ahkáng lé gi, Ngò byî jung a nghut. Jowò haú pé gi, hen to byî é hui bâng

matú za nghut lhê." ga yhangnhik lé taí ri.

⁴¹ Haû su gâ é hkyô lé, haû gotû chángzo raxê yuq wó gyo kôjáng, yhangmoq gi, Yakuq eq Yohan nhik lé nhik-yô akô nghut ri. ⁴² Yesuq gi, yhangmoq banshoq bang lé wut tsing yù luî, "Tungbaù pé lé uph kang é ga bang gi, tungbaù pé lé up zô nyi kô é hkyô lé le, haû eq rajung za, yhangmoq é ming up suwún wuî le, yhum-sing é ahkáng ayá lé chùng mù, up zô nyi kô é hkyô lé le, nungmoq sê lhê.

⁴³ Nghut kôlhang, nungmoq chyáng gi, haû su a dut kó sháng gaq, nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra râ nghut lhê. ⁴⁴ Hau htoq agó, nungmoq má ushuq dut naù sù ó yuq nghut kôle, banshoq bâng é jùn dut ra râ nghut lhê. ⁴⁵ Hkâsu mù gâ le, haû Byu Yhangzo lháng gi, dojaú é lé hkam yù râ matú jé lé é a nghut e za, dojaú râ matú eq byù myo myô é matú, shîhtaí gunglik hkungga dông, Yhâng é asak lé byi pyám râ matú sheq, jé lé é ru nghut lhê." ga, yhangmoq lé taí ri.

*Myoqjit Sû Barateme, Myoq Dum
Myang É Hkyô*

Mht 20:29-34; Luk 18:35-43

⁴⁶ Hau htâng, yhangmoq gi, Yerihko wà má jé ló akô nghut ri. Yesuq eq Yhâng é chángzô pé gi, byù moq mó eq rahá, wà maí htoq ló nyi kô é hkûn, Barateme (Teme é yhangzo) gâ é myoqjit sù rayuq gi, hkyô yàm má dung zô zung tô ri. ⁴⁷ Yhang gi, Nazaret wà byù Yesuq laí ló é lé wó gyo jáng, "Dawiq é Yhangzo Yesuq ê, ngo lé shogyo yù laq ô!" ga garû kat ri.

⁴⁸ Haû mù, byù myo myo gi, zim za nyi râ matú yhang lé tân hkûm akô; nghut kôlhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang garû kat ri.

⁴⁹ Haû mù luî, Yesuq gi, yap nô kat mù, "Yhang lé ji kat keq." ga taí jáng, yhangmoq gi, "Myit ngón aq hkoî;

* **10:38** Góm eq baptisma gâ é gi, jamjau hui râ eq shî râ lé, taí nau é nghut lhê.

Yhang, nàng lé ji nyi ri; toq aq." ga myoqjit sù haù lé taì akô. ⁵⁰ Haù hkùn, haù yuq gi, yhâng é buhîng lé hkyut pyám mù, byam chy luì, Yesuq chyáng lé jé ri.

⁵¹ Yesuq gi, yhang lé, "Ngò, nang lé haì kut byi râ ô nau ri lú?" ga myi jáng, yhang gi, "Sarà ê, ngò myoq myàng nau ri." ga tû taì ri.

⁵² Yesuq gi, "Ló aq hkoì, náng é lumjîng myit gi, nàng lé lhoq gê byi bê nghut ri." ga taì kat é hkùn jáng, yhang gi, myoq wó myâng mù, Yesuq e ló é hkyô shut cháng e ló bê nghut ri.

11

*Yesuq, Yerusalem Wà Mó Má Wang
Ló É Hkyô*

Mht 21:1-11; Luk 19:28-40; Yhn 12:12-19

¹ Yesuq eq Yhâng é chángzô pé gi, Yerusalem wà mó eq chyâng lo nyi kô é hkùn, Tsanlun Bùm mâ é Bethpage wà eq Behtani wà má jé ló kôjáng, Yesuq gi, Yhâng é chángzo í yuq lé, ² "Nungnhik, hí mâ é wà má ê keq; wà haù má wang é hkùn jáng, ó le a jî wú shî é logúng zo tû to láng é lé, é myâng kó rá nghut lhê; haù lé hpyi yù mù, Ngá chyáng she lò keq. ³ Byù rayuq yuq mai, 'Haì mù, haù su kut nyi akô lú?' ga nungnhik lé lhom myi jáng, 'Shí du lé, haù Yhumsîng râ ri ga, razup má dum taù dé byi râ nghut lhê.' nghû tû taì keq." ga pyîng luì, nhang kat ri.

⁴ Haù nhik gi, e ló mù, hkyô mó yâm mâ é hkumdong nàm má tû tô é logúng zo radu lé, é myâng kôluì, haù lé tuì hpyi nyi akô. ⁵ Haù hkùn, haù má yap tô é bang ra-am gi, "Haì mù, logúng tuì hpyi nyi akô lú?" ga myi akô. ⁶ Haù jáng, yhangnhik gi, Yesuq pying kat é eq rajung za taì kyo kôjáng, yhangmoq gi, she ló râ ahkáng byi kat akô nghut ri. ⁷ Yhangnhik, logúng zo haù lé Yesuq chyáng she jé lo é hkùn, logúng hau é gùng htoq má, yhangmoq é buhîng pé bui jáng, hau

é ahtoq má, Yesuq doq jî ri. ⁸ Byù myo myo gi, yhangmoq é buhîng pé lé, hkyô má hkyut hkang byi akô; ra-am gi, yò pé má zân yu é mhandíng lé hkang byi akô nghut ri. ⁹ Hí má sò bang eq htâng má châng é bang gi, "Hosana!"

Haù Yhumsîng é myîng mai jé lé lô Sù gi, hkungsô wó nyi sháng gaq ô!

¹⁰ Jé lé lô râ nghut é, nga-nhûng é îwa Dawiq é mingdán gi, hkungsô wó nyi sháng gaq ô!

Htoq tsáng myhâng má hosana nghut sháng gaq ô!"*

ga luì, taì garú bum akô nghut ri.

¹¹ Yesuq gi, Yerusalem wà mó má jé mù, noqkuq yhûm má wang ê luì, lînghkyuq mâ é jung hkangmó lé wú ri; nghut kôlhang, bui gyum ló bê nghut é yanmai, Yhâng é chángzo raxe í yuq eq rahá, Behtani wà shut htoq e ló bekô nghut ri.

*Maihpáng Gâm Ashi A Zui Râ Matú
Taì É Hkyô*

Mht 21:18-19

¹² Hau htang nyi, yhangmoq, Behtani wà mai htoq ló kô é hkùn, Yesuq gi, zo mut bê nghut ri. ¹³ Yhang gi, ahaq wúm é maihpáng gâm ragàm lé, we we mai byu-myang kat jáng, agàm haù má ashì zui lhê laq ga ê jé wú le, ahaq mai lai luì, haì le a myàng nghut ri. Haì mù gâ le, maihpáng-shi zui yâm a nghut é yanmai nghut ri. ¹⁴ Haù mù, Yesuq gi, shigâm haù lé, "Ahkuì mai gi, náng chyáng mâ é ashì, ó yuq le a myàng zo lo kô sháng gaq." ga taì ri. Yhâng é chángzô pé gi, haù su ga taì é dang lé wó gyô yu akô nghut ri.

*Yesuq, Noqkuq Yhûm Lé Lhoq
Sansêng Pyâm É Hkyô*

Mht 21:12-17; Luk 19:45-48; Yhn 2:13-22

¹⁵ Yhangmoq, Yerusalem wà mó má jé é hkùn, Yesuq gi, noqkuq yhûm má wang ê mù, haù mâ é zè ung zè wuì kut nyi é bang lé, hkat htoq pyám luì, ngùn htaì zo bâng é siboì pé eq

* **11:9** Hebre dang má, hosana gâ é gi, "ahkuì hkyi yù laq" gâ é nghut lhê. Nghut kôlhang, bun zo 9, 10 má gi, hkya-on dang dông chung é nghut lhê. ✨ **11:10** Hkya-on 118:25-26

hpûngkyui ung zo bâng é tanghkuq pé lé tu mhuq pyám byî ri. ¹⁶ Hau htoq agó, Yhang gi, ó yuq lé nghut kôle, ung zê lé noqkuq yhûm mai a waq lai nhâng kut pyám ri. ¹⁷ Yesuq, yhangmoq lé mhoqshit é gi,

"Ngá yhûm gi, byû myû lhunglhâng bâng é matú, kyûdung yhûm ga râ nghut lhê."*

ga kê tô é a nghut kó lhú? Nghut kôlhâng, nungmoq gi, 'damaq hkyûng' kut pyám bekô nghut ri." gâ ri.*

¹⁸ Hkyangjong agyi pé eq tarâ sará pé gi, haú lé wó gyo kômù, Yhang lé hkâsu kut wó sat pyám râ hkyô ho nyi akô; nghut kôlhâng, shiwa byu pé gi, Yhang mhoqshit é hkyô má, myit zìng zuq bùm kô é yanmai, yhangmoq gi, Yhang lé gyuq bum akô nghut ri.

¹⁹ Myinhâng jé jáng, Yesuq eq Yhâng é chángzô pé gi, wà hkaú mai htoq ló bekô nghut ri.

Maihpáng Gâm Nyhuí Shi Byuq É Hkyô

Mht 21:20-22

²⁰ Htang napkyó, yhangmoq sô lai ló le, maihpáng gâm gi, amyit mai yhang nyhuí kyuq shi byuq é lé myang akô. ²¹ Petruq gi, myit bûn kat luí, "Rabai ê, wú aq! Nang nhîng pyám é maihpáng gâm gi, nyhuí shi byuq bê nghut ri." ga luí, Yesuq lé taí ri.

²² Haú hkûn, Yesuq gi, "Garai Gasang lé lumjîng keq. ²³ Ngò, nungmoq lé teng za taí kôlé, ó yuq nghut kôle, i-myit má úng-âng é hkyô a bo é za, yhumsîng taí é hkyô gi, dut lò râ nghut lhê ga lumjîng kô é nghut le gi, bùm shí lé, 'Htot mù, wuimau má ló gyó wâng aq.' ga taí le lháng, haú hkyô dut byi râ nghut lhê. ²⁴ Haú mù luí, Ngò, nungmoq lé taí kôlé, nungmoq haí dúng le le wó yû râ nghut lhê nghû lumjîng kô é nghut le gi, wó yû kó râ za nghut lhê. ²⁵ Mauhkûng htoq mâ é nungmoq é Îwa gi, nungmoq é mara lé hkyut pyám byi sháng gaq, nungmoq

gi, kyûdung yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyám byi keq; ²⁶ (Nghut kôlhâng, nungmoq mai mara a hkyut pyám byi é nghut le gi, mauhkûng htoq mâ é nungmoq é Îwa le, nungmoq é mara lé hkyut pyám byi râ a nghut.)" ga tâ taí ri.†

Yesuq É Ahko Ahkáng Lé Myí Chyam É Hkyô

Mht 21:23-27; Luk 20:1-8

²⁷ Yhangmoq, Yerusalem wà mó má dum jé mù, Yesuq gi, noqkuq yhûm wàng hkaú má sô yông wún é u lé, hkyangjong agyi pé, tarâ sará pé eq suwún wuí gi, Yhâng chyáng lé jé kômù, ²⁸ "Hai ahko ahkâng èq, Nang, shí pé lé kut nyi lhê lhú? Haú su kut râ ahko ahkáng, Nang lé ó yuq byi é lhú?" ga myí akô.

²⁹ Haú jáng, Yesuq gi, "Ngò le, nungmoq lé rajung myí wú kôlé, tú taí wú keq; haú hkûn, hai ahko ahkâng èq, Ngò, shí pé kut é hkyô lé taí kyo râ nghut lhê. ³⁰ Yohan byi é baptyisma gi, mauhkûng mai lhú? A nghut jáng, byu chyáng mai lhú? Taí wú keq!" ga taú myí kat ri.

³¹ Haú hkûn, yhangmoq chôm hpyê lhum kô é gi, "Mauhkûng mai nghut lhê' nghû nga-nhúng taí jáng le, 'Haú nghut le nhîng, haí mù, yhang lé a lumjîng kô é lhú?' ga râ nghut; ³² 'Byu chyáng mai nghut lhê.' nghû jáng le..." gâ ri. (Yohan gi, myiqhtoi rayuq gè gè nghut lhê ga, lhunglhâng bang lumjîng bùm kô é yanmai, yhangmoq gi, haú byu pé lé gyuq bum akô nghut ri.)

³³ Haú mù, yhangmoq gi, Yesuq lé, "Ngamoq a sé." ga tâ taí akô.

Haú hkûn, Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

* 11:17 Esai 56:7 * 11:17 Yer 7:11 † 11:26 Bun zo shí gi, Chyúmlaika ra-am má za bo lhê.

12

Tsibiyiq Hkyâm Saí Bang Lé Dangtú Yu É Hkyô

Mht 21:33-46; Luk 20:9-19

¹ Hau htâng, Yesuq, dangtú dông yhangmoq lé taí é gi, "Byù rayuq gi, tsibiyiq hkyâm rahkyam saí to mù, lnhngkyuq kyâm to luí, tsibiyiq wing pyik htoq rá donghkong dù to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byí to mù, gó ming shut e ló byuq bê nghut ri. ² Kyôshu yoq jé jáng, yhang gi, yhang yù âng é tsibiyiq shi é yú rá matú, dui-nhâng zoshâng rayuq lé, hkyâm saí zo bâng chyáng nhang kat ri. ³ Nghut kôlhang, haú bang gi, haú yuq lé lhom chyup bat luí, loq kôm taú nhang kat akô. ⁴ Haú mù, yhang gi, gotú dui-nhâng zoshâng rayuq lé, yhangmoq chyáng dum nhang kat ri; yhangmoq gi, haú yuq lé le, ulhum má lhom bat cheq byi kôluí, hoq lhoq hpû kat akô nghut ri. ⁵ Hau htâng, rayuq lé dum nhang kat jáng, haú yuq lé gi, lhom sat pyâm akô; Yhang gi, góbang myo myo lé le, yhangmoq chyáng nhang kat ashî nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

⁶ Ló htáng má, yhang gi, yhang chyitdap é zo lé nhang kat rá za ru nghut alô; haú mù, yhang gi, 'Ngá zo lé gi, yhangmoq lhom hkungga kó rá nghut lhê.' ga, yhangzo lé nhang kat ri.

⁷ Nghut kôlhang, haú bang gi, 'Shí yuq gi, silí wunlí sing yù rá sù nghut lhê; lé keq, yhang lé sat pyám sháng, haú jáng sheq, silí wunlí pé lé nga-nhúng wó yú rá nghut lhê.' ga rayuq eq rayuq taí lhûm bum akô. ⁸ Haú mù, yhang lé chyup yú luí, sat pyám mù, hkyâm shinggan shut dú htoq pyâm akô nghut ri.

⁹ Haú jáng, tsibiyiq hkyâm yhumsîng gi, yhangmoq lé hkâsu kut rá lhú? Yhang gi, ê mù, haú hkyâm saí zo

bang lé sat pyám luí, hkyâm haú lé, góbang lé htot ngho byí pyám rá nghut lhê. ¹⁰ Chyúmdang má,

'Yhûm saí bâng eq hkyin htoq pyâm é luggok gi, htungchyûn mâ é ahkyak dik é luggok dut bê.

¹¹ Shí hkyô gi, haú Yhumsîng kut é nghut luí, nga-nhúng é myoq hí má mauhpo dut bê nghut ri.' ga bò tô é lé, nungmoq a nghap wú kó lhú?"[☆]

gâ ri.

¹² Hau htâng, yhangmoq gi, dangtú haú, yhangmoq lé lhoq ang luí taí é hkyô lé, sé kô é yanmai, Yhang lé chyup yú rá matú hkyô ho nyi akô. Nghut kôlhang, yhangmoq gi, byù moq mó lé gyuq kô é yanmai, Yhang lé nyhi pyâm to luí, htoq ló byuq bekô nghut ri.

Kehtaq Lé Kang Kat Byí É Hkyô*

Mht 22:15-22; Luk 20:20-26

¹³ Hau htâng má, yhangmoq gi, Yesuq é dang má mara hô luí Yhang lé chyup yú rá matú, Hparishe pé ra-am eq Herut é byu pé ra-am lé, Yesuq chyáng nhang kat akô. ¹⁴ Haú bang gi, Yhâng chyáng lé jé kômù, "Sarâ ê, Nàng gi, tengmán sù nghut é lé, ngamoq sê lhê. Nàng gi, ó haí ga rá lé le haí su a ngàm sù nghut é yanmai, ó yuq é myoqdong lé le a tê byí é za, Garai Gasâng é hkyô lé, tengmán é dông mhoqshit é sù nghut ri. Haú mù, Kehtaq lé kang kat byí le gi, ge lhê lhú? ¹⁵ Ngamoq kat ra rá lhú? A kat ra rá lhú?" ga Yhang lé taí akô.

Yesuq kúm gi, yhangmoq, gegùn labyoq kut nyí kô é lé sé mù, "Nungmoq gi, haí mù, Ngo lé lé chyam wú akô lhú? Denari ngùn rachap yu lé keq, ngò wú wú bá." ga taí kat ri.

¹⁶ Haú hkûn, yhangmoq yu jé lô jáng, Yhang gi, "Shí má, ó yuq é alhô eq masat laiká dap tô ri lhú?" ga myí ri.

Yhangmoq gi, "Kehtaq é nghut ri." ga tú taí akô.

¹⁷ Haú mù, Yesuq gi, yhangmoq lé, "Kehtaq é lé gi, Kehtaq lé byi keq;

☆ 12:11 Hkya-on 118:22-23 * 12:12 Kehtaq gâ é gi, "hkoséng" gâ é nghut lhê.

Garai Gasâng é lé gi, Garai Gasang lé byi keq." ga taí jáng, yhangmoq gi, maú byuq bùm bekô nghut ri.

Saduke Pé, Yesuq Lé Myî Chyam É Hkyô

Mht 22:23-33; Luk 20:27-40

¹⁸ Haû dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô. ¹⁹ Yhangmoq myi kô é gi, "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmang é awut ashín xoq byi râ matú, yhang rhat lé chui gon ra râ nghut lhê ga, nga-nhúng lé, Mosheq kê to byî ri. ²⁰ Hí hpyang lé, gumang nhiktâng wuì nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. ²¹ Lanong yuq gi, yhangmang mó é chui lé gon mù, zo dù a dap é za shi ló byuq bê. Lalaq yuq le, haû eq rajung za dut byuq bê nghut ri. ²² Haû nhiktâng wuì nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myhí haû le châng shi ló byuq bê nghut ri. ²³ Haû mù luí, haû dum dui toq é buinyi má, myiwe myhí haû gi, hká yuq é yhangmyi nghut râ lhú? Hkâsu mù gâ le, yhang gi, haû nyhit yuq é yhangmyi dut wú bê sù nghut ri." gâ akô.

²⁴ Yesuq gi, yhangmoq lé, "Nungmoq hkyô nghoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lhú? ²⁵ Haû shi byuq bê bang dum dui toq é hkûn gi, myi byi myi yû hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê. ²⁶ Shi é mai dum lhoq dui toq é hkyô eq séng luí, Mosheq kê tô é laiká má lhang, haû nyé duq nyi é mhanpúng mai, Garai Gasang gi, yhang lé, 'Ngô gi, Abraham é Garai Gasang, Isak é Garai Gasang, Yakup é Garai Gasang nghut lhê.'* ga kê tô é lé, nungmoq a nghap wú kó lhú? ²⁷ Garai Gasang gi,

shi bê bang é Garai Gasang a nghut, dui nyi bang é Garai Gasang sheq ru nghut lhê. Nungmoq gi, shut dik bekô nghut ri." ga taí ri.

Ahkyak Dik É Jep É Tarâ

Mht 22:34-40; Luk 10:25-28

²⁸ Tarâ sarâ rayuq gi, lé lô mù, yhangmoq taí htíng lhum nyi kô é lé, lé wó gyô ri. Yhang gi, haû bang lé, Yesuq rago tû taí nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lhú?" ga myî ri.

²⁹ Haû jáng, Yesuq gi, "Ahkyak dik é jep é tarâ gi, 'Israelaq byu pé ê, gyo wú keq! Nga-nhúng é Yhumsîng Garai Gasang za, Garai Gasang nghut lhê.

³⁰ Haû Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, náng myit é hkyô banshoq, náng é wum-o banshoq eq, chyitdap râ lhê.* gâ é nghut lhê. ³¹ Hau htang lhum gi, 'Náng gûng lé náng chyitdap é su, náng é chyangnâm mâ é bang lé le chyitdap aq.* gâ é nghut lhê. Shí í lhûm htoq kô é tarâ gotû a joq lo." ga yhangmoq lé tû taí ri.

³² Haû hkûn, tarâ sarâ haû yuq gi, "Gyo naû bê, Sarâ ê! Garai Gasang rayuq za nghut lhê, gotû a nyi lo ga náng taí é gi, têng ri. ³³ Garai Gasang lé, náng é myit nhiklhum banshoq eq le, náng é sê gyo é nyan banshoq eq le, náng é wum-o banshoq eq le, chyitdap râ lhê gâ é eq, náng gûng lé náng chyitdap é su, náng é chyangnâm mâ é bang lé le chyitdap râ lhê gâ é gi, myi nyhé hkungga eq gotû hkungga pé banshoq htoq má, je ahkyak lhê." ga taí ri.

³⁴ Yesuq gi, yhang hpaqchyî bo é dông tû taí nyi é lé myàng jáng, "Náng gi, Garai Gasâng é mingdán eq a we lo nghut ri." ga yhang lé taí kat ri. Haû hkûn mai gi, ó yuq le, Yhang lé dangmyi a wám myi lo kó nghut ri.

Hkrisduq Gi, Ó Yuq É Yhangzo?

Mht 22:41-46; Luk 20:41-44

³⁵ Yesuq, noqkuq yhûm má mhoqshit nyi é hkûn lé taí é dang gi, "Haú mù, haú tarâ sará pé gi, Hkrisduq lé, Dawiq é yhangzo za nghut lhê gê akô lhú? ³⁶ Dawiq gi, Chyoiyúng Woi-nyí èq taí nhang é má,

'Haú Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga taí ri. ³⁷ Haú mù, Dawiq yhang lhang, Hkrisduq lé, Yhumsîng gê é nghut le gi, yhangzo za hkâsu ge nghut râ lhú?" gê ri.

Byù hpûng mó gi, Yhâng é dang lé, gabú myít èq gyô nyi bum akô nghut ri.

³⁸ Yesuq gi, mhoqshit uchyang taí é má, "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luí, gai pé má lhom shi-kyâm yù râ lé le, ³⁹ tarajong pé mâ é ahkyak dik é zûng jang pé eq poi pé mâ é réng é zûng jowò pé má myang zûng râ lé le, ô nau nyi bum akô. ⁴⁰ Yhangmoq gi, chuimó pé é yhûm-yò pé lé hpyoq zo hpyoq shuq kôluí, kyû hîng hîng dûng shit mhaú é bang nghut akô. Haú su é bang gi, dam byí é je riyhang hui zo kó râ nghut lhê." gê ri.

*Chuimó Myhí Kat É Alu Ngùn
Luk 21:1-4*

⁴¹ Yesuq gi, alu sidek nàm má zung to mù, noqkuq yhûm mâ é alu sidek haú má, byù moq mó ngùn kat nyi é lé wú nyi ri. Sùt wó bang myo myo gi, ngùn ga-myhó myhó kat bum akô.

⁴² Haú hkûn, myung é chuimó myhí rayuq gi, lé mù, gyi htingchap ngùn zo í chap lé kat ri.

⁴³ Yesuq gi, Yhâng é chángzô pé lé wut yù mù, "Ngò, nungmoq lé teng za taí kôlé, shí myung é chuimó myhí gi, góbang banshoq htoq má je myo kat bê nghut ri. ⁴⁴ Haú góbang banshoq gi, yhumsîng agùn agó wó é mâ é lé,

lé kat akô; yhang kúm gi, myùng sù nghut kôle, yhâng é asak lé baú râ ngùn banshoq lé, kat bê nghut ri." ga taí ri.

13

Ló Htâng Buinyí Má Dut Lò Râ Hkyô

Mht 24:1-21, 29-35; Luk 21:5-33

¹ Yesuq, noqkuq yhûm mai htoq ló é hkûn, Yhâng é chángzo rayuq gi, "Sará ê, wú aq; hkâ-í ko é luggok pé! Hkâ-í hkik é yhûm pé!" ga Yhang lé taí kat ri.

² Haú hkûn, Yesuq gi, "Nàng, yhûm mó shí pé lé myàng lhê a nghut lhú? Luggok shí pé gi, rachâm htoq racham lhang a kê lhum loshoq, hpyoq hpyi pyâm é hui râ nghut lhê." gê tâ tâ ri.

³ Yesuq gi, Tsanlun Bùm má, noqkuq yhûm shut hù mù zung tô é hkûn, Petruq, Yakuq, Yohan eq Andre pé gi, Yhâng chyáng lé jé kômù, ⁴ "Haú hkyô pé gi, hkâ-nhám dut lò râ lhú? Haú dut lò râ hkûn, hkasû é kumlhá htoq lô râ nghut lhê lhú? Ngamoq lé taí kyô wú laq." ga Yhang lé baú myí akô nghut ri.

⁵ Haú mù, Yesuq gi, yhangmoq lé, "Nungmoq lé, ó yuq èq le a wó shuí nghoq sháng gaq, sidiq nyi keq.

⁶ Hkâsu mù gê le, 'Ngò gi, haú yuq* nghut lhê.' ga, Ngá myîng lé llang é byù myo myo pô htoq lô mù, byù myo myo lé shuí nghoq kó râ nghut lhê.

⁷ Nungmoq gi, majan dut nyi é hkyô eq majan eq sêng é danglám pé lé, wó gyo kôjáng, hkâgyuq dàn kó. Haú hkyô pé gi, dut lò râ za nghut lhê; nghut kôlhang, ló htâng é buinyí gi, a nghut shi. ⁸ Byù ra-myú eq ra-myú, mingdán ralhum eq ralhum majan zân lhûm lò kó râ nghut lhê. Jowò myo myo má, layàng nún é, mutmó gyó é pé dut lò râ nghut lhê. Haú pé gi, wúhke jamjau hkyo é apûn awang za ru nghut ashí.

⁹ Nungmoq gùng nungmoq sidiq nyi keq. Hkâsu mù gê le, yhangmoq

* 12:36 Hkya-on 110:1 * 13:6 Haú yuq gê é gi, Hkrisduq lé gê é nghut lhê.

gi, nungmoq lé, tarâ rûng pé má ê ap pyám kó râ nghut é htoq agó, tarajong pé má nungmoq lé nhuq bat kó râ nghut lhê. Hau htoq agó, nungmoq gi, Ngá mying é yanmai, mauzau wui eq hkohkam pé é hí má, saksé dông yap ra kó râ nghut lhê. ¹⁰ Haû gabú danglù gi, amyû banshoq lé hí hko kyo ra râ nghut lhê. ¹¹ Nungmoq gi, chyup yu é hui luí, jep huí é hkûn, haí taí râ lé, hkâ-myit chiq kó. Ahkyíng jé jáng, nang lé myit htoq lô nhang é dong za taí aq; hkâsu mù gâ le, dang haú pé gi, nungmoq taí é a nghut, haû Chyoiyúng Woi-nyí èq taí nhang é ru nghut lhê.

¹² Nhiktâng gi, nhiktâng yhangchang, îwa gi, yhangzo lé, shî shoq ap pyâm lhum kó râ nghut lhê; zo wui gi, mó wui lé gumlau toq mù, sat pyám nhâng kó râ nghut lhê. ¹³ Byù lhunglhang bang gi, Ngá é yanmai, nungmoq lé a nguì kut kó râ nghut lhê; nghut kôhang, jihtûm jé shoq wó hkam jân nyi é sù gi, hkyi yu é hui râ nghut lhê.

¹⁴ 'Haû lhoq hten lhoq hpyoq é achag achyut hkyô'✧ gi, yhang a nyi âng é jowò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyi é bang gi, bùm pé shut hpanq doq ló kó sháng gaq. ¹⁵ Yhumhkûng htoq má nyi tô é sù gi, yhúmhaû má é zè haí lé le, a ló gyó wang yù lo sháng gaq. ¹⁶ Yò má nyi tô é sù gi, yhang é buhîng lé a ló taû yu nyi lo sháng gaq. ¹⁷ Haû buinyi pé má, zogùng dut é myiwe wui eq naú huq ashî nghut é înu wui gi, hkâ-í yhang wuihke bekó nghut ri myhi-nhung. ¹⁸ Haû hkyô gi, gy-oqmyò má a dut sháng gaq, kyûdûng nyi keq. ¹⁹ Hkâsu mù gâ le, Garai Gasang, mingkan lé hpan tô é hkûn mai ahkuí jé shoq, hkâ-nhám le a dut wú shî é wuihke jamjau mó gi, haû buinyi pé má dut lò râ nghut lhê; haû su é hkyô gi, htàngnùng má hkâ-nhám le dum dut lo râ a nghut. ²⁰ Buinyi haú pé lé, haû Yhumsîng Garai mai

a lhoq shaû é nghut le gi, ó yuq le asak wó lut râ a nghut. Nghut kôhang, Yhang hkyin yù bê nghut é, hkyin yù hui bâng é matú gi, buinyi haú pé lé, Yhang lhoq shaû pyám byi bê nghut ri. ²¹ Haû ahkyíng má, byù rayuq yuq mai, nungmoq lé, 'Wú keq, shî má Hkrisduq nyi ri.' ga le, 'Wú keq, Yhang hê má nyi ri.' ga le, taí jáng, nungmoq hkâjîng kó. ²² Hkâsu mù gâ le, Hkrisduq apyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá pé eq laklaí kumlhá pé lé kut shit kó râ nghut lhê. ²³ Haû mù, nungmoq sidîq nyi keq; ahkyíng a jé shi mai, ngò, nungmoq lé, jung hkangmó taí kyô nyi gù nghut lhê.

²⁴ Buinyi haú pé má, wuihke jamjau haú pé lai é htâng, 'Bui gi, noq byuq mù, lhamó gi, a tsô dut byuq râ nghut lhê;

²⁵ kyí pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é huí bùm kó râ nghut lhê.'✧

²⁶ Haû hkûn, haû Byu Yhangzo gi, mhut ji mù, hpungwup a-tsam mó eq le, hpungwup shîngkang eq le, gyó lé lo é lé, byu pé byu-myàng kó râ nghut lhê. ²⁷ Hau htâng má, Yhang gi, Yhâng é maumang lagyô pé lé nhang kat mù, maumyí chyûn hkangmó eq myigùng htum shoq, mauhkûng htâng shoq mai, Yhang hkyin yu tô é bang lé shuí tsîng yù nhâng râ nghut lhê.

²⁸ Maihpáng gâm lé wú mù, mhoq yú keq; agâm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê. ²⁹ Haû eq rajung za, shí hkyô pé dut nyi é lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyi bê hkyô lé, nungmoq sé lo keq. ³⁰ Ngò, nungmoq lé teng za taí kôlé, shí pyat mâ é byu pé a ban shi byuq shimá, haû hkyô pé banshoq dut byuq râ nghut lhê. ³¹ Mauhkûng eq myigùng gi, a joq lo dut byuq râ

nghut lhê; nghut kôlhang, Ngá é dang gi, ru joq nyî râ nghut lhê.

Haû Buinyî Eq Ahkyíng Lé, Ó Le A Sé Mht 24:36-44

³² Buinyî eq ahkyíng haû lé gi, ó yuq le a sé; mauhkûng htoq mâ é maumang lagyô pé lháng a sé; haû Zo le a sé; haû Íwa za ru sê lhê. ³³ Haû mù, nungmoq gi, ahkyíng haû hkâ-nhám jé râ lé, a sé kô é yanmai, sidiq nyî keq! Machya nyî keq! ³⁴ Haû gi, byù rayuq, yhâng é dui-nhâng zoshâng wui lé, ó le ó eq sêng é mù lé gàm byî to mù, hkum zúng sù lé le, machya nyî râ matú pying to luî, yhâng yhúm lé, haû dui-nhâng zoshâng wui chyáng ap pyâm to mù, byìn we shut htoq ló byuq é sù eq pung ri.

³⁵ Haû mù, haû Yhumsîng hpó gi, myinhâng laq, myín gunggàm laq, woqtún hkun laq, maubó zó laq, hkâ-nhám jé lô râ lé nungmoq a sê kô é yanmai, sidiq machya nyî keq. ³⁶ Haû a nghut jáng, Yhang, dàn loq tung tau jé lo é hkûn, nungmoq yhup myhî tô é lé, lo myang pyám râ nghut lhê. ³⁷ Ngò, nungmoq lé, 'sidiq machya nyî keq,' nghû taí é eq rajung za, yuq hkanmó lé le, taí é nghut lhê." ga taí ri.

14

Yesuq, Xû But Byî Huí É Hkyô Mht 26:1-16; Luk 22:1-6; Yhn 11:45-53; 12:1-8

¹ Ahkuí, haû Lhoqlhai Poî eq múnchi a kat é Muk Zo Poî jé râ í nyî za ru ra alô hkûn, hkyangjong agyi pé eq tarâ sará pé gi, Yesuq lé hkâsu kut wó haq chyup yû mù, sat pyám râ matú, hkyô hó nyî akô nghut ri.

² Nghut kôlhang, yhangmoq gi, "Byu pé gabyông lô kó abe, poî gyoro má gi, a kut shî sháng." ga taí akô.

³ Yesuq gi, Behtani wà má nyî é manggâm dap wú sù Simûn é yhúm, siboî má nghe zung tô é hkûn, myiwe myhî rayuq gi, nardu amyit mai za saî yu é, gyai hpaû é namngón xû bo é alabasta (luq hpyû) bông yu lé lô mù,

bông haû lé lêng hkyui luî, namngón xû haû lé Yesuq é ulhum má hut gyun byî ri.

⁴ Haû má nyî tô é bang ra-am gi, wú nhik-yô é myit èq, rayuq eq rayuq taí lhum kô é gi, "Haî mù, namngón xû lé aha agó kut pyâm lhê laq?" ⁵ Haû namngón xû lé, denari* sùm sho èq ung luî, myùng bang lé byî le ge lhê mhaî!" gâ akô. Yhangmoq gi, myiwe myhî hau lé le, gyai chôm tân akô.

⁶ Nghut kôlhang, Yesuq gi, yhangmoq lé, "Myiwe zo haû lé, hkâtân nyî kó; haî mù, yhang lé i-myit lhoq myo nhang nyî akô lhú? Yhang gi, Ngá é ahtoq má ge é hkyô kut bê nghut ri. ⁷ Haû myùng bang gi, nungmoq eq rahá hkâ-nhám le nyî râ nghut lhê mù, nungmoq garúm nau é hkûn, yhangmoq lé wó garúm lhê. Nghut kôlhang, ngò gi, shî má nungmoq eq rahá ayang nyî nyî râ sù a nghut.

⁸ Yhang gi, yhang wó dut é í kut bê nghut ri. Yhang, Ngá gûng má, namngón xû hut gyûn é gi, Ngá gûng lé yhum râ matú, hí hen lajâng tô é ru nghut lhê. ⁹ Ngò, nungmoq lé teng za taí kôlé, haû gabú danglù lé mingkan gón hko kyô é jowò hkanmó má, yhang lé myit bûn é dông, yhang kut é hkyô shî lé, taí kyo bekô râ nghut lhê." ga taí kyo ri.

¹⁰ Hau htâng, haû chángzo raxe í yuq má bo é Yudaq Iskarut gi, Yesuq lé ap pyám râ ga, hkyangjong agyi pé chyáng e ri. ¹¹ Haû bang gi, haû hkyô lé lhom wó gyo kôjáng, gyô gabú luî, yhang lé ngùn byî râ ga, danggidiq byî akô. Haû mù, yhang gi, Yesuq lé ap pyám râ hkyô ho nyî bê nghut ri.

Yhumsing É Myinzang

Mht 26:17-30; Luk 22:7-23; Yhn 13:21-30

¹² Haû htûngli joq é eq rajung za, Lhoqlhai Poî hkungga sauzo jaú byî é, múnchi a kat é Muk Zo Poî sâng-hi nyî má, Yesuq é chángzô pé gi, Yesuq lé, "Nàng zo râ Lhoqlhai Poî lé, ngamoq hkâmá ê món to râ lhú?" ga myî akô.

* **14:5** Denari rachap gi, byù rayuq é ra-nyî lhê é zuihpau eq wuí ri.

13 Haú mù, Yhang gi, chángzo í yuq lé, "Nungnhik, myuq hkaú shut wang ló keq, wuì yambú waq é byù rayuq lhom hui râ nghut lhê; haú hkûn, nungnhik gi, yhang htâng cháng keq. 14 Haú yuq, wang ló é yhûm mâ é yhumsîng lé, 'Ngò, Ngá é chángzô pé eq rahá, Lhoqlhai Poî lé zo râ bîng wap hkâmá nghut lhê lhú ga, Sará myí nhang kat ri.' nghú taí keq. 15 Haú hkûn, hen to gû nghut é, ahtoq mâ é wap mó lé lhom tûn shit râ nghut lhê. Wap haú má, nga-nhûng é matú ê hen to keq." ga taí luí, nhang kat ri.

16 Chángzo haú nhik gi, htoq e ló mù, myuq hkaú má wang e ló le, Yesuq taí kat é eq roq za ê myâng kômù luí, Lhoqlhai Poî lé, món to bekô nghut ri.

17 Myinhêng jé lô jáng, Yesuq gi, haú chángzo raxe í yuq eq rahá, haú má lé jé bekô nghut ri. 18 Yhangmoq gi, siboí má nghê mù, zô nyi bùm kô é u lé, Yesuq gi, "Ngò, nungmoq lé teng za taí kôlé, Ngò eq rahá zô nyi é bang nungmoq mâ é rayuq sù gi, Ngo lé ap pyám râ nghut lhê." ga taí ri.

19 Haú hkûn, yhangmoq gi, gyô yón kômù, rayuq htâng rayuq, "Ngò, a nghut hkaí?" ga Yhang lé myí akô.

20 Haú hkûn, Yhang gi, "Haú yuq gi, haú raxe í yuq mâ é rayuq nghut lhê. Ngò eq rahá, hkoq shí má muk jùmzo sù nghut lhê. 21 Haú Byu Yhangzo gi, Yhang eq séng luí kê tô é eq rajung za, shí râ za nghut lhê. Nghut kôlháng, haú Byu Yhangzo lé ap pyám é sù gi, dîngnyé wó ri; haú yuq gi, a hku lé le lháng, je ge ri.

22 Yhangmoq zo nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shî gi, Ngá é gungsho nghut lhê; yù mù zo keq." ga taí uchyang, Yhang é chángzô pé lé gâm byí ri.

23 Hau htâng, Yhang gi, góm lé le, yù mù, jeju hkya-on luí, yhangmoq lé byí ri; yhangmoq banshoq bang gi, haú lé yù shuq akô nghut ri.

24 Yesuq gi, yhangmoq lé, "Shî gi, byù myo myô é matú htoq pyám é, dangshikaq eq sêng é Ngá sui nghut lhê. 25 Ngò, nungmoq lé teng za taí kôlé, Ngò, Garai Gasâng é mingdán má, tsibiyiq wing asik lé shuq é buinyì a jé jé, tsibiyiq wing lé dum shuq râ a nghut lo." ga taí ri.

26 Yhangmoq gi, hkya-on mahkôn ralhum ban hkôn jáng, Tsanlun Bùm shut htoq e ló bekô nghut ri.

Petruq He-ngik Râ Hkyô Lé, Te Tai É Hkyô

Mht 26:31-35; Luk 22:31-34; Yhn 13:36-38

27 Yesuq gi, yhangmoq lé, "Nungmoq lhunglháng bang gi, myit lingbat kó râ nghut lhê; hkâsu mù gâ le,

'Haú sau zúng sù lé, Ngò bat sat pyám mù, sau pé gi, lhoq pyo pyám é hui kó râ nghut lhê.'[☆]

ga kê tô ri. 28 Nghut kôlháng, Ngò gi, lhoq dui toq é huí htâng má, Galile mau shut, nungmoq é hí má e ló lánng râ nghut lhê." ga taí ri.

29 Haú hkûn, Petruq gi, "Góbang banshoq myit lingbat kôlháng, ngò gi, myit lingbat râ a nghut." ga taí kat ri.

30 Haú mù, Yesuq gi, "Ngò, nàng lé teng za taí lé, hkû-nyí, hkû-myîn yhang jáng, woq í dâm a tûn shimá, nàng, Ngo lé sum dâm he-ngik pyám râ nghut lhê." ga tû taí ri.

31 Nghut kôlháng, Petruq gi, "Ngò, Nàng eq rahá shí râ dut kôlháng, Nang lé ngò he-ngik pyám râ a nghut." ga zuq zuq taí ri. Góbang banshoq le, haú su ga châng taí bum akô nghut ri.

Get-samane Gâ é Jowò Má Kyûdûng É Hkyô

Mht 26:36-46; Luk 22:39-46

32 Yhangmoq gi, Get-samane gâ é jowò má jé ló kômù, Yesuq gi, Yhang é chángzô pé lé, "Ngò, kyû ê dîng nyi é u lé, shí má zùng lánng keq." ga taí ri. 33 Yesuq gi, Yhang eq rahá Petruq, Yakuq, Yohan pé lé, shuí chûng ri. Haú hkûn, Yhang gi, myit gyai a ngón é eq myit wuîhke é hui mù,

☆ 14:27 Zhk 13:7

³⁴ yhangmoq lé, "Ngò gi, shî râ í yhang myit yón nyi ri; nungmoq gi, machyâ luí, shí má láng nyi keq." ga taí ri.

³⁵ Yesuq gi, haú mai ratsuí zo sô ê mù, myigùng má gop byên to luí, ahkyíng haú lé ge lhoq lhaí pyám byi le gi, Yhâng chyáng mai lhoq lhaí pyám byi râ matú, ³⁶ "Aba,† Áwa ê, Nàng gi, haí le wó dut é Sû nghut lhê. Góm‡ shí lé, Ngá chyáng mai yu pyám byi laq. Nghut kôlhang, Ngò ô nau é dông a nghut, Nàng ô nau é dông sheq nghut sháng gaq." ga kyûdûng ri.

³⁷ Hau htâng, Yhang gi, Yhâng é chángzô pè chyáng dum taú lo le, yhangmoq yhup myhî to kô é lé lo myang ri. Haú mù, Yhang gi, Petruq lé, "Simun, nàng yhup ngón nyi lhê lú? Razup za lháng a wó machya nyi lú? ³⁸ Gunglaú é a hui sháng gaq, machyâ luí, kyûdûng nyi keq. Haú woi-nyí gi, kâm nyi kôlhang, gungsho gi, wum nyhôm nyi ri." ga taí ri.

³⁹ Yesuq gi, radàm dum ê mù, hí lé dúng é dang lé za, ê dung ri. ⁴⁰ Yhang dum taú lo le, yhangmoq gi, myoqkuq lai kô é yanmai, yhup myhî to láng kô é lé, lo dum myang ri. Yhangmoq gi, Yhang lé haí taí râ a sé dut byuq akô nghut ri.

⁴¹ Yesuq gi, sum dâm nghû râ lhîng má, yhangmoq chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashí kô lú? Gé bê! Haú ahkyíng gi, jé bê nghut luí, haú Byu Yhangzo gi, yubak dap bâng é loq má ap pyâm é hui râ nghut bê. ⁴² Toq keq! Lô lo sháng hkoí! Ngo lé ap pyám râ sù gi, jé lé lô bê nghut ri." ga taí ri.

Yesuq, Chyup Yú Huí É Hkyô

Mht 26:47-56; Luk 22:47-53; Yhn 18:3-12

⁴³ Yesuq, dâng nyo nyi ashí u lé, haú chángzo raxe í yuq má bo é Yudaq gi, haú hkyangjong agyi pé, tarâ sará pé eq suwún wui chyáng mai nhang kat é bang nghut é, shâm eq dumbáng pé

chung tô é byù moq mó eq rahá jé lé lo ri.

⁴⁴ Yesuq lé ap pyâm râ sù gi, yhangmoq lé, "Ngò bopuq puq é sù gi, haú yuq nghut bê; Yhang lé chyup yú mù, zúng shuí ló keq." ga kumlhá byi to bê nghut ri. ⁴⁵ Yudaq gi, Yesuq chyáng hkyê za ê mù, "Rabai ê." ga taí luí, Yhang lé bopuq puq byi ri. ⁴⁶ Haú hkûn, yhangmoq gi, Yesuq lé chôm zuí zing mù, chyup yú bekô nghut ri. ⁴⁷ Haú mù, nàm má yap tô é byù rayuq gi, yhâng é shâm lé she htoq yú mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁴⁸ Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chùng mù, lé lo akô lú?

⁴⁹ Ngò gi, nyí wuí, nungmoq eq rahá nyi luí, noqkuq yhûm má mhòqshit byi nyi kôlhang, nungmoq, Ngo lé a chyup yú kô é nghut lhê. Nghut kôlhang, Chyúmdang pé gi, dik ra râ nghut lhê." ga taí ri. ⁵⁰ Haú hkûn, haú chángzô pé gi, Yesuq lé tô pyâm to kôluí, hpang byo byuq bekô nghut ri.

⁵¹ Buhîng za wut é zorâm rayuq gi, Yesuq htâng cháng wún ri. Yhangmoq gi, haú yuq lé, wó kyaq zui kô é hkûn, ⁵² yhang gi, buhîng lé hkyut hkyô pyâm to mù, gùngchîn hpang ló byuq bê nghut ri.

Yudaq Byìn Tú Wapdoq Má Jéyáng Huí É Hkyô

Mht 26:57-68; Luk 22:54-55, 63-71; Yhn 18:13-14, 19-24

⁵³ Yhangmoq gi, Yesuq lé, hkyangjong mó chyáng shuí e akô; haú hkyangjong agyi pé lhunglhâng bang, suwún wuí eq tarâ sará pé le, lé zup zîng bum akô. ⁵⁴ Petruq gi, hkyangjong mó é yhumwàng hkaú má châng jé wâng shoq, we we mai Yesuq htâng châng tô ri. Yhang gi, haú má, zúng bang eq rahá, myihkyóm yâm má gyoq gang zung tô ri.

† **14:36** Aba gâ é gi, Aramaik dang dông "Áwa" gâ é lichyúm nghut lhê. ‡ **14:36** Góm gâ é gi, Yesuq, jamjau hui râ hkyô eq shî râ hkyô lé, taí nau é nghut lhê.

⁵⁵ Haû hkyangjong agyi pé eq Yudaq byìn tú wapdoq gón gi, Yesuq lé sat râ saksé hô kôlhang, haî le a myàng kó nghut ri. ⁵⁶ Byù myo myo gi, a têng é saksé hkám kôlhang, yhangmoq é dang gi, a tsûng lhum kó nghut ri.

⁵⁷ Hau htâng, ra-am gi, toq yap mù, a têng é saksé hkám kô é gi, ⁵⁸ "Yhang gi, 'Byu loq èq saî é noqkuq yhûm shî lé, Ngò hpyoq hpyi pyám mù, sum nyí gyoro má, byu loq èq a saî é, gotû ralhum dum saî râ nghut lhê.'" ga taî é lé, ngamoq wó gyô ri." ga akô. ⁵⁹ Nghut kôlhang, yhangmoq é saksé gi, a tsûng lhum kó nghut ri.

⁶⁰ Hau htâng má, hkyangjong mó gi, yhangmoq é hí má toq yap mù, "Nàng, haî le a tú taî luq? Shí bang, Nang lé mara hun nyi é saksé gi, hká dông nghut lhê lhú?" ga luî, Yesuq lé myî ri. ⁶¹ Nghut kôlhang, Yesuq gi, jit le a ga nyi tô ri.

Haû mù, hkyangjong mó gi, Yesuq lé, "Nàng gi, hkungsô wó Su é yhangzo, Hkrisduq nghut lhê lhú?" ga dum myî ri.

⁶² Haú hkûn, Yesuq gi, "Nghut lhê, haû ngò Byu Yhangzo gi, a-tsam bo dik Su é loqyo hkyam§ má zung tô é lé le, mhuthtui ji mù, mauhkûng mai lé lo é* lé le, nungmoq myàng kó râ nghut lhê." ga taî ri.

⁶³ Haú hkûn, hkyangjong mó gi, yhang é bu lé lêng cheq pyám mù, "Nga-nhúng, hai saksé râ ashî lhú?" ⁶⁴ Yhang, Garai Gasang lé rhoî dang taî é lé nungmoq wó gyo bê nghut lhê. Nungmoq hkâsu wó myit akô lhú?" ga myî ri; yhangmoq banshoq bang gi, shî gíng sù nghut ri ga, chôm myit huî akô. ⁶⁵ Haû mù, ra-am gi, Yhang lé sôkan byé gyun é eq, myoq má nghop pyám byi luî, loqtsup èq htui byî lhê kut mù, "Nang lé ó yuq htui é, myiqhtoi htoî wú aq." ga taî akô. Haû zúng bang gi, Yhang lé shuí yù mù, nhuq bat akô nghut ri.

§ 14:62 Loqyo hkyam gâ é gi, ahko ahkáng wó é jowò lé gâ é nghut lhê. * 14:62 Mhuthtui ji mù, mauhkûng mai lé lo é gâ é gi, Danielaq 7:14 má bò lhê. † 14:68 Chyúmding ra-am má Haú hkûn jáng, woq tún bê nghut ri gâ é le bo ri.

Yesuq Lé, Petruq He-ngik Pyâm É Hkyô

Mht 26:69-75; Luk 22:56-62; Yhn 18:1-18, 25-27

⁶⁶ Petruq gi, wàng hkaû má nyi tô é u lé, haû hkyangjong mó é dui-nhâng zoshâng myhi rayuq jé lé lo ri. ⁶⁷ Haú yuq gi, Petruq gyoq gang nyi é lé myàng jáng, yhang lé rago wú mù, "Nàng le, Nazaret wà byù Yesuq eq rahá nyi sù nghut ri." ga taî ri.

⁶⁸ Nghut kôlhang, yhang gi, "Nàng taî é hkyô lé, ngò, sé le a sé, gyo le a sé gyo." ga he pyám luî, wàng hkúmdong shut htoq e ló bê nghut ri.†

⁶⁹ Dui-nhâng zoshâng myhi haû gi, Petruq lé, haú má dum myàng jáng, awui ayàm má yap tô é bang lé, "Shí yuq le, haû hpúng má lom é sù rayuq nghut ri." ga dum taî ri. ⁷⁰ Petruq gi, radàm dum he pyâm ri; hau htâng razup zo má, haú nàm má yap tô é bang gi, Petruq lé, "Nàng gi, Galile byù rayuq nghut é yanmai, haú hpúng mâ é byù rayuq hkyak nghut lhê." ga taî akô.

⁷¹ Haú hkûn, yhang gi, yhanggùng yhang nhing luî, "Haû nungmoq taî é byù lé, ngò a sé." ga dakam ri.

⁷² Haú u yhang, woq radàm dum tun kat bê nghut ri. Haû mù, Petruq gi, "Woq í dâm a tûn shimá, nàng, Ngò lé sum dâm he-ngik pyám râ nghut lhê." ga, Yesuq, yhang lé taî é dang lé, myit bún kat mù, wum kat ngau ri.

15

Pilat Hí Má Yesuq Jé Nyi É Hkyô

Mht 27:1-2, 11-26; Luk 23:1-5, 13-25; Yhn 18:28-19:16

¹ Haû napkyó noq za má, hkyangjong agyi pé gi, suwún wuî, tarâ sará pé, Yudaq byìn tú wapdoq gón bang eq rahá kut, chôm bóng yû kômù, Yesuq lé tuî yû luî, shuí htoq é kômù, mauzau Pilat chyáng é ap byî akô nghut ri.

² Pilat gi, Yesuq lé, "Nàng gi, Yudaq byu pê é hkohkâm nghut lhê lhú?"

ga myi jáng, Yesuq gi, "Nàng taí é eq rajung za nghut lhê." ga, tû taí ri.

³ Haû hkyangjong agyi pé gi, Yhang lé mara gyai myo shoq chôh hun akô.

⁴ Haû mù, Pilat gi, Yesuq lé, "Wú aq, yhangmoq, nàng lé mara haû myhó hun nyi le, nàng, haí le a tû taí lú?" ga myí ri.

⁵ Nghut kôhlang, Yesuq gi, haí le a tû taí kut jáng, Pilat gi, maú byuq bê nghut ri.

⁶ Haû Lhoqlhai Poí u lé, mingbyû wui dúng é htóng byû rayuq yuq lé, mauzau mai lhaq lhoq htoq byi byi kut é htông joq ri. ⁷ Haû hkûn, Barabaq gâ é byû rayuq gi, gumlau gabyông é hkûn, byû sat é gumlau bang eq rahá, htóng gyó tô ri. ⁸ Byû hpûng mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi râ matú, dúng akô.

⁹ Haû mù, yhang gi, "Yudaq byu pé é hkohkâm lé nhang htoq kat byi râ lé, nungmoq ô nau akô lú?" ga myí ri. ¹⁰ Pilat, haû su ga myí é gi, haû hkyangjong agyi pé, Yesuq lé manôn kôluí, yhang chyáng lé ap byi kô é hkyô lé sê é yanmai nghut ri. ¹¹ Nghut kôhlang, haû hkyangjong agyi pé gi, Barabaq lé sheq nhâng byi râ matú, Pilat chyáng dung kó sháng gaq ga, haû byû moq mó lé i-myt lhoq toq byi akô.

¹² Pilat gi, "Haû jáng, nungmoq mai Yudaq byu pé é hkohkâm ga sù yuq lé, ngò hkâsu kut râ lú?" ga yhangmoq lé myí ri.

¹³ Haû hkûn, yhangmoq gi, "Yhang lé tapzîng má jén sat pyám aq." ga chôh garu akô.

¹⁴ Haû jáng, Pilat gi, "Haí mù lú lú? Yhang haí kut shut bê lú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq." ga je riyhang garû lo bum akô nghut ri.

¹⁵ Pilat gi, haû byû moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi,

nhuq bat nhâng mù, tapzîng má jén sat pyám râ matú, ap byí kat bê nghut ri.

*Gyezô Pé Gi, Yesuq Lé Rhoi É Hkyô
Mht 27:27-30; Yhn 19:2-3*

¹⁶ Gyezô pé gi, Yesuq lé, Pretori yhumwàng (mauzau hpô é yhumwàng) mó hkaû má shuí wang ló kômù, gyedap gón lé ji tsîng yu akô. ¹⁷ Hau htâng, yhangmoq gi, Yesuq lé buhîng nè radung hut byi mù, zujanmaú saí yù kôluí, Yhâng é ulhum má tsung byí akô. ¹⁸ Hau htâng, yhangmoq gi, "Yudaq byu pé é hkohkâm hpó ê! Chyung hîng xê hing nyi sháng gaq ô!" ga wut garû akô. ¹⁹ Hau htoq agó, yhangmoq gi, Yhâng é ulhum má dumbáng èq adàm dàm bat kômù, sôkan byé gyun lúí, Yhâng hí má hkyihput htuq mù, paí mhaû akô nghut ri. ²⁰ Yhangmoq gi, Yhang lé rhoi jihkyoí ban kut yû kôjáng, Yhang wut tô é buhîng nè lé hkyut yû kômù, Yhâng é mebu lé dum hut byi lúí, tapzîng má jén sat pyám râ matú, Yhang lé shuí htoq e ló bekô nghut ri.

*Yesuq Lé Jén Pyâm É Hkyô
Mht 27:31-44; Luk 23:27-43; Yhn 19:17-27*

²¹ Alesander eq Ruhpu nhiktang é yhângwa, Kuruni myuq byû nghut é Simun ga sù gi, yosô wà mai lò mù, haû jowò mai laí ló ri. Haû hkûn, gyezô pé gi, yhang lé, tapzîng waq nhang akô nghut ri. ²² Yhangmoq gi, Yesuq lé, Golgahta gâ é jowò má shuí e akô (Golgahta gâ é gi, ugyap joq é jowò lé gâ é nghut ri). ²³ Hau htâng, yhangmoq gi, Yhang lé, mura* eq nyhò tô é tsibiyiq wing huq akô; nghut kôhlang, Yhang gi, a lhom shuq byi nghut ri. ²⁴ Hau htâng má, yhangmoq gi, Yhang lé tapzîng má jén tap to kôluí, Yhâng é mebu pé lé, hkyîn shosé shê mù, âng é dông gam yu pyám byí akô nghut ri.

²⁵ Yhangmoq, Yesuq lé tapzîng má jén tap pyâm é hkûn gi, napkyó gau

* 15:23 Mura gi, chi wó kut jung xû nghut lhê.

hkyíng nghut bê nghut ri. ²⁶ Hau htoq agó, Yhang lé mara hun é dông kê tap to kê é gi, "YUDAQ BYU PÊ É HKOHKÂM" gâ ri. ²⁷ Yhangmoq gi, damyaq í yuq lé le, Yhâng é loqyo hkyam shut rayuq, loqpaí hkyam shut rayuq kut, tapzîng htoq má jén tap tô akô nghut ri. ²⁸ (Hâu gi, "Yhang gi, yubak dap bâng chyáng nghap lhôm é hui bê nghut ri."* gâ é Chyúmdang lé lhoq dik é nghut ri.)† ²⁹ Hkyô sô lai ló é bang gi, nyhap é dông u-ngut ngut mù, tái kê é gi, "Noqkuq yhûm lé hpyoq pyám luí, sum nyí gyoro má dum wó saí lhê ga Sû ê! ³⁰ Náng gùng nàng hkyi yù luí, tapzîng mai gyó lò wú aq mhaí!" ga akô nghut ri.

³¹ Hâu eq rajung za, hkyangjong agyi pé eq tarâ sará pé le, yhangmoq hkaû má, "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhinhung! ³² Nga-nhúng wó myâng mù, lumjîng râ matú, shí, Israelaq byu pé é hkohkâm, Hkrisduq gi, tapzîng mai gyó lo wú sháng gaq." ga, Yhang lé rhoi dang tái akô. Yhang eq rahá tapzîng má jén tap to hui é su nhik le, Yhang lé rhoi dang tái akô nghut ri.

Yesuq, Shi É Hkyô

Mht 27:45-56; Luk 23:44-49; Yhn 19:28-30

³³ Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri. ³⁴ Myinhâng sum hkyíng jé é hkûn, Yesuq gi, "Eloi, Eloi, lama sabakhtani."* ga, htê mó eq garû kat ri. Hâu é lichyúm gi, "Ngá Garai ê, Ngá Garai ê, Nàng, haí mù, Ngo lé tô pyám tô lhê lhú?" gâ é nghut ri.

³⁵ Hâu nâm má yap tô é bang ra-am gi, haú lé wó gyo kôjáng, "Gyô wú keq. Yhang gi, myiqhtoí Eliyaq lé wut nyí ri." ga, tái akô.

³⁶ Hâu hkûn, byù rayuq gi, din e ló mù, wuimaù lé tsibiyiq wing chyín má jum yù luí, jàm-yang má tuí tap

mù, Yesuq shuq sháng ga yhun byi luí, "Eliyaq gi, lé lô mù, Yhang lé lé lhoq hkyô yù abe, nga-nhúng chôm láng wú sháng." ga tái ri.

³⁷ Yesuq gi, htê mó eq garû kat luí, kâng byit byuq bê nghut ri.

³⁸ Noqkuq yhûm mâ é pán-gyang gi, ahtoq mai a-ô í hkyam byáng dut byuq bê nghut ri. ³⁹ Yesuq é hí má yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, "Shí yuq gi, gè gè yhang, Garai Gasâng é Yhangzo nghut ri-nhung!" ga tái ri.

⁴⁰ Myiwe wuì ra-am gi, we we mai wú nyi bum akô. Hâu bang má, Magadalaq wà mâ é Mariq, Yakuq tiq sù yuq eq Yose nhiktang é yhângnu Mariq eq Salome pé le bo akô nghut ri. ⁴¹ Hâu bang sum yuq gi, Galile mau má, Yesuq htâng cháng mù, Yhâng râ é hkyô pé lé châng kut byí é bang nghut akô. Yesuq eq rahá, Yerusalem wà mó má doq lé lo é myiwe wuì, góbang myo myo le haú má nyi tô bum akô nghut ri.

Yesuq Lé, Myhup Pyâm É Hkyô

Mht 27:57-61; Luk 23:50-56; Yhn 19:38-42

⁴² Hâu nyí gi, Hên Lajang Buinyi (Bánno buinyi é hí nyí) nghut ri. Hâu mù, myinhâng jé lô jáng, ⁴³ Yudaq uphkâng hpúng má bo é, aróng wó é, Garai Gasâng é mingdán lé láng nyi é sù, Aramahti wà byù Yosep gi, myit wum lhoq kîng yù mù, Pilat chyáng wàng luí, Yesuq é gungsôm lé ê dúng ri. ⁴⁴ Pilat gi, Yesuq shí bê gâ é hkyô lé wó gyo jáng, maú byuq ri; haú mù, yhang gi, shô up gyezau lé wut yù mù, Yesuq shí teng bê lhú ga myí ri. ⁴⁵ Shí teng bê hkyô lé, shô up gyezau chyáng mai wó sê yù jáng, Pilat gi, Yesuq é gungsôm lé yù râ ahkáng, Yosep lé byi kat ri. ⁴⁶ Hâu mù, Yosep gi, pán yúng lé wui yù luí, gungsôm lé yu hkyó mù, htup yup luí, luqgok lé kyûng tô é lup hkaû má ê kat tô ri. Hau htâng, yhang gi, luphkum má, luqlông eq lhêng chí

* 15:28 Esai 53:12 † 15:28 Bun zo shí gi, chyúmding axau ra-am pé má za bo é nghut lhê. * 15:34 Hkya-on 22:1

pyâm tô ri. ⁴⁷ Magadalaq wà mâ é Mariq eq Yose é yhângnu Mariq gi, Yesuq lé, hkâmá lheq tô é lé, ê myang akô nghut ri.

16

Dum Dui Toq Lo É Hkyô

Mht 28:1-8; Luk 24:1-12; Yhn 20:1-10

¹ Bánno buinyi lai jáng, Magadalaq wà mâ é Mariq, Yakuq é yhângnu Mariq eq Salome pé gi, Yesuq é gùng má, ê but byi râ matú namngón jung é wui akô. ² Bánno buinyi htang napkyó bui htoq lo é hkûn yhang, yhangmoq gi, lup shut e ló akô. ³ Yhangmoq gi, "Luphkum mâ é luqgok lé, ó yuq chyûn lhêng pyám byi râ lú?" ga, rayuq eq rayuq taí lhum akô.

⁴ Nghut kôlhang, yhangmoq tu wú kat kô é hkûn, luqlong haú gi, lhoq lhêng to lánq é lé, myàng akô nghut ri; luqlong haú gi, gyai kô é nghut lhê. ⁵ Yhangmoq gi, lup hkaú má wang é kô é hkûn, hpyu é buhîng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

⁶ Haú hkûn, haú yuq gi, "Hkâgyuq dân kó! Nungmoq gi, haú tapzîng má jén sat huí é, Nazaret wà byù Yesuq lé ho akô, a nghut lú? Yhang dui toq ló bê! Yhang gi, shí má a nyi lo. Yhang lé, lheq tô é jowò lé wú wú keq. ⁷ Ahkuí, nungmoq gi, ló mù, "Yesuq gi, nungmoq hí má, Galile mau shut so lánq râ nghut lhê. Nungmoq lé, Yhang taí tô é eq rajung za, nungmoq gi, Yhang lé haú má ló myâng kó râ nghut lhê." nghû, Yhâng é chángzô pé eq Petruq lé ló taí kyo keq." ga lhom taí kat ri.

⁸ Haú mù, myiwe myhí haú bang gi, byòdàn gyuq nán é eq, lup mai hpang htoq ló akô; yhangmoq gi, lûm gyuq byuq kô é yanmai, ó yuq lé lé, haí le a taí kó nghut ri.

(Bun zo 9 mai 20 jé shoq gi, chyúmding axau ra-am pé má a bo é nghut lhê.)

Yesuq Htoq Shit É Hkyô

Mht 28:9-10, 16-20; Luk 24:13-53; Yhn 20:11-23; Lagyo 1:6-11

⁹ Yesuq gi, Bánno buinyi htang napsûn lé, Yhang dui toq é htâng, Yhang mai nat gang nyhit du hkat htoq pyám byi bê sù, Magadalaq wà mâ é Mariq lé hí htoq shit ri. ¹⁰ Mariq haú gi, ló mù, haú Yesuq eq nyi laí lò bê bang, yón ngau nyi kô é hkûn, haú hkyô lé ló taí kyô ri. ¹¹ Yhangmoq gi, Yesuq dum dui bê gâ é hkyô lé le, Yhang lé, Mariq myang é gâ é hkyô lé le, wó gyo kôlhang, a jîng kó nghut ri.

¹² Hau htâng má, Yesuq gi, yosô wà shut htoq e ló nyi é chángzo í yuq lé, gotû gunghkyâng dong htoq shit ri. ¹³ Haú nhik gi, taú lò mù, gotû chángzô pé lé haú hkyô lò shit kyo akô; nghut kôlhang, yhangmoq gi, haú lé le a jîng byi kó nghut ri.

¹⁴ Hau htâng má, Yesuq gi, haú chángzo raxe rayuq baú za zang zô nyi kô é hkûn, yhangmoq chyáng lé htoq shit ri. Yhangmoq chyáng lumjîng myit a bò kô é yanmai le, Yhang dui toq é htâng má, Yhang lé myang é bang taí kyo kô é dang lé, a jîng é za myit htan to kô é yanmai le, Yhang gi, yhangmoq lé tân ri.

¹⁵ Hau htoq agó, Yesuq gi, yhangmoq lé, "Mîngkan jâm shoq htoq è mù, waxâng zo wuî lhunglhang lé, haú gabú danglù hko kyo keq.

¹⁶ Lumjîng mù, wui-myhup hkâm yu é sù ó yuq nghut kôle, hkyi yu é hui râ nghut lhê. Nghut kôlhang, a lumjîng é sù ó yuq nghut kôle, mara byi é hui râ nghut lhê. ¹⁷ Lumjîng é bang wó kut shit râ kumlhá pé gi, Ngá é myîng lé lang luí, nat gâng pé lé wó hkat htoq kó râ eq laklai é myîng pé lé dat nyò kó râ nghut lhê; ¹⁸ yhangmoq gi, lhangmuí pé lé le, wó kui zui kó râ nghut lhê; muí shi jung duq lé, shuq kôlhang, haí dut kó râ a nghut. Nò bâng é htoq má, yhangmoq é loq ke byi jáng, nò bang ge byuq kó râ nghut lhê." ga taí ri.

¹⁹ Haú Yhumsîng Yesuq gi, yhangmoq lé dang ban taí é htâng má,

mauhkûng shut shuî toq yu é hui
luî, Garai Gasâng é loqyo hkyam
má zung to bê nghut ri. ²⁰ Hau
htâng, haû chángzô pé gi, htoq ê mù,
jowò hkangmó má mungdang ê hko
kyô akô nghut ri; haû Yhumsîng gi,
yhangmoq eq rahá nghut nyî mù luî,
Yhâng é mungdang têng é hkyô lé tân
shit râ matú, yhangmoq lé, kumlhá
pé wó kut é a-tsam byî é nghut ri.
Amen.

LUKAQ é Gabú Danglù Laiká (The Gospel of Luke)

¹ Aróng wó dik é sù Htohpiluq ê, ngamoq chyáng dut laí lò bê hkyô pé lé, sâng-hi mai yhumsing myoq eq yhang, myang é bang eq, mungdang wùn waq é bang mai shap kyô gyó lô mù luí, ² byù myo myo gi, shikut luí kâ to bekô nghut ri. ³⁻⁴ Ngò le haú pé banshoq lé awang mai ahyo hpyot jihkúm nuqguq ho myí yù luí, náng wó sê yu to bê hkyô pé gi, je lhoq gîng é dut sháng gaq nghû, náng é matú banshoq tok za kâ kat byi râ lé, ngò wó myit ri.

Wui-myhup Sará Yohan Hku Lé Lô Râ Gâ É Hkyô

⁵ Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyú mâ é, Elizabet ga sù nghut ri. ⁶ Haú nhik gi, Yhumsing Garaí é jep é tarâ eq htungtarâ banshoq lé, rago za cháng mù, Garaí Gasâng é hí má dingmán é su nhik nghut akô. ⁷ Nghut kôlháng, Elizabet gi, baùdung dung sù nghut é yanmai, yháng nhâm gi, zo dù a dap kó. Yhangnhik gi, asak ipyat le ko bekô nghut ri.

⁸ Ahkuí, Zahkariq gi, dum lhing hkyuq lo é hkyangjong mù lé, yhâng é hpúng eq rahá, Garaí Gasâng é hí má lé zui le, ⁹ haú Yhumsing é noqkuq yhûm ahkaú má namngón hkungga é wang nyhé râ matú, hká yuq nghut râ lé hkyangjong pé é htungli eq rajung za byù hkyín shosé she wú é hkûn, yhâng chyáng âng ri. ¹⁰ Haú mù yhang namngón hkungga lé nyhé é u lé, shiwa byù banshoq gi, yhumpán má, kyûdung nyi akô.

¹¹ Haú hkûn, Yhumsing Garaí é maumang lagyo gi, namngón jung nyhé é hkungga gyap é loqyo hkyam má, Zahkariq lé, lé yap shit ri.

¹² Zahkariq gi, maumang lagyo haú lé myàng jáng, dan gyuq nyi ri.

¹³ Nghut kôlháng, maumang lagyo gi, "Zahkariq ê, hkâgyuq, náng é kyûdung dang lé Garaí Gasang gyo byi bê. Haú mù luí, náng é yhumsing myhí Elizabet gi, náng é matú yuqzo rayuq bau byi berâ nghut lhê; náng gi, yhang lé Yohan nghû myhíng byi ra râ nghut lhê. ¹⁴ Yhang gi, náng é matú gabú hpo eq nguingón é hkyô dut berâ nghut lhê. Yhang lé baú lo é yanmai, byù myo myo le gabú lo bùm berâ nghut lhê. ¹⁵ Hkâsu mù gâ le, yhang gi, haú Yhumsing Garaí é hí má ahko ahkáng wó mù luí, byù mó dut râ sù nghut lhê. Yhang gi, tsibiyiq wing eq îhpe lé ge shuq râ sù a nghut; yhâng nû é unghkaú mai yhang, Chyoiyung Woi-nyí eq byíng nyí râ sù nghut lhê. ¹⁶ Yhang gi, Israelaq yhangzo yhangshû pé myo myo lé, Yhumsing yhangmoq é Garaí Gasâng chyáng lhing lò nhâng râ sù nghut lhê. ¹⁷ Íwâ pé é myit nhikhum lé gi, zô wui shut, nyo é a gyo bang lé gi, dingmán bâng é hpaqchyí hkyô shut lhing lò nhâng luí, haú Yhumsing jé lé râ matú hen tô é byù myú dut nhâng râ matú, Yohan gi, Eliyaq é woi-nyí wum-o wó é eq, Yhumsing é hí má e ló râ nghut lhê." ga luí, yhang lé taí ri.

¹⁸ Haú hkûn, Zahkariq gi, "Haú hkyô lé ngò hkâsu kut wó sé râ lú? Ngò le mang byuq bê, ngá é yhumsing myhí le asak ipyat ko bê." ga luí, maumang lagyo lé tû taí ri.

¹⁹ Maumang lagyo haú gi, "Ngò gi, Garaí Gasang eq rahá nyi é sù Gabrielaq nghut lhê. Nang lé gabú danglù shí taí kyo aq ga luí, Yhang, ngo lé nhang kat é nghut lhê.

²⁰ Ahkyíng jé jáng, ngá dang gi, gè gè dut lò râ nghut lhê. Dang shí pé lé náng a lumjíng é yanmai, mù haú dut lo é buinyí jé shoq, náng gi, nhut jit byuq râ nghut lhê." ga luí, yhang lé tû taí ri.

²¹ Haú u, shiwa byu pé gi, Zahkariq noqkuq yhûm ahkaú má haú-í myáng

shoq lúng byuq é hkyô lé lánq maú nyi akô. ²² Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haú mù luí, yhangmoq gi, noqkuq yhúm ahkaú má yhang myoqwup shing-rán rajung jung myàng ang bê lé, wú sê yu akô nghut ri.

²³ Ahkuí, Zahkariq gi, hkyangjong jong âng é buinyi ngap jáng, yhúm shut dum taú ló byuq bê. ²⁴ Hau htâng má, yhâng é yhumsing myhí Elizabet gi, zogûng dut lò mù luí, hká le a htoq e za lhamó ngo hkyap yhúmkaú má lúng byuq ri. ²⁵ Haú hkún, yhang gi, "Byu pé hí má ngò hui zô é hoq hpu hkyô lé, Garai Gasang gi, myàng byi luí, shí su dut nhang é dông mai huí sêng pyám byí é buinyi má, Yhang ge é hkyô lé, ngo lé tân shit bê nghut ri." ga taí ri.

Yesuq Hku Lé Lô Berâ Gâ É Hkyô

²⁶ Ahkuí, Elizabet zogûng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyi é, zomyi gyíng rayuq chyáng nhang kat ri. ²⁷ Zomyi hau é myíng gi, Mariq gâ ri; yhang gi, Dawiq amyú má é Yosep gá su eq dúng tô é zomyi nghut ri. ²⁸ Maumang haú gi, Mariq chyáng jé jáng, "Mariq ê, nguínón nyí sháng gaq; Nàng, hkungsô wó nyi ri; Haú Yhumsing Garai gi, nàng eq rahá nyi nyi ri ô!" ga taí ri.

²⁹ Mariq gi, dang haú lé gyo sing nán mù, shí su gâ é dang gi, haí jung gá naú é nghut lhê lhú ga luí, myít maú nyi ri. ³⁰ Haú hkún, haú maumang lagyo gi, "Mariq ê, hkâgyuq, nàng gi, Garai Gasâng é hí má myoq-dong wó bê nghut ri. ³¹ Wú aq, nàng zogûng dut lò mù luí, yuqzo rayuq bau rá nghut lhê. Yhâng é myíng lé gi, 'Yesuq' nghú luí, nàng myhíng byi ra rá nghut lhê. ³² Yhang gi, hpung bô sù dut rá nghut mù, Myhang htáng htúm Su é Yhangzo gâ é hui rá nghut lhê. Yhumsing Garai Gasang gi, yhang lé,

yhâng é îchyí îwa Dawiq é hkohkâm tanghkuq lé, byi rá nghut mù luí, ³³ Yhang gi, Yakup yhúm* lé hkâ-nhám le ru-up nyi rá nghut lhê. Yhâng é mingdán le htum nghu é joq rá a nghut." ga luí, yhang lé taí ri.

³⁴ Haú hkún, Mariq gi, "Ngò gi, zomyi gyíng ru nghut ashí, haú gi, hkâsu wó dut rá lhú?" ga luí, maumang lagyo lé tú taí ri.

³⁵ Haú maumang lagyo gi, "Chyoiyúng Woi-nyí náng é ahtoq má jé lé mù, Myhang htáng htúm Su é wum-o a-tsam gi, nàng lé shum gum to byi luí, haú baú lò rá Chyoiyúng sù le gi, Garai Gasâng é Yhangzo ga kó rá nghut lhê. ³⁶ Hau htoq agó, wú aq, nàng é amyú suisho baúdung myhí Elizabet lháng, mang bê le yuggè zo wun to bê. Ahkuí, zogûng dut é lhamó hkyuq hkyap wàng bê nghut ri. ³⁷ Hkâsu mù gâ le, Garai Gasang a wó kut é haí le a joq." ga luí, yhang lé tú taí ri.

³⁸ Haú hkún, Mariq gi, "Yhumsing é jùnmyhí ngò nghut nyi lhê; náng é dang eq rajung za ngá chyáng dut lò sháng gaq." ga tú taí ri. Hau htâng, maumang lagyo gi, yhâng chyáng mai ló byuq bê.

Elizabet Lé Mariq Ê Huí É Hkyô

³⁹ Hau htâng hkâ-í a myáng má, Mariq gi, Yuda mau bum mau má é wà rawà shut hân hân e ló luí, ⁴⁰ Zahkariq é yhúm má wàng mù, Elizabet eq huí nyo lhúm ri. ⁴¹ Mariq é danghtê lé Elizabet wó gyo jáng, yhâng é unghkaú má é zoshâng gi, byam chyú lo ri. ⁴² Elizabet le, Chyoiyúng Woi-nyí byíng to mù luí, Mariq lé htê mó eq taí é gi, "Myiwe banshoq má, nàng gi, hkungsô wó dik sù nghut ri. Náng é unghkaú má é zoshâng le hkungsô wó nyi ri ô! ⁴³ Ngá Yhumsing é yhângnu ngá chyáng jé lé é jeju gi, hai é yanmai nghut bê lhú? ⁴⁴ Wú aq, náng danghtê lé wó gyo kat jáng, ngá unghkaú má é zoshâng gi, gabú luí byam chyú nyi ri. ⁴⁵ Haú Yhumsing taí é dang gi, gè gè dik lò rá nghut lhê

* 1:33 Yakup yhúm nghu e gi, Israelaq amyú lé gâ lhê.

ga luî, lumjîng é myiwe gi, hkungsô wó nyi ri." gâ ri.

Mariq É Hkya-on Dang

- ⁴⁶ Haú hkûn, Mariq gi,
"Ngá é i-myt mai haú Yhumsîng lé hkya-on nyi lhê,
⁴⁷ ngá é woi-nyí le, Garai Gasang ngá é hkyi yù Sû má gabú nyi lhê.
⁴⁸ Ngò Yhâng é jùnmyhí myit nyhum nyi é lé, Yhang myàng byi bê nghut ri.
Wú aq, ahkuí mai ipyat dedu má, ngo lé gi, hkungsô wó nyí sù, gâ nyi bekô râ nghut lhê.
⁴⁹ hkâsu mù gâ le, Wum-o Bo Dik é Garai Gasang gi, ngo lé mauhpo mù mó kut byi bê nghut ri,
Yhâng é myîng gi, chyoiyúng nyi ri ô.
⁵⁰ Yhang lé gyuq hoq nyí bang é ahtoq má, Yhang shogyo nhikmyîn é hkyô gi,
pyat bán hkangmó jé shoq hkâ-nhám le joq nyi râ nghut lhê.
⁵¹ Yhâng é wum-o bo é loq èq mauhpo mù mó pé lé tân shit bê.
Yhumsîng myit é hkyô má nghutbún nyi é bang lé, Yhang lhoq pyo pyám bê.
⁵² Zaugun suwún wuî lé gi, zau zûng tanghkuq mai lhoq hkyô pyám mù,
i-myt nyhûm bang lé gi, lhoq myhâng bê nghut ri.
⁵³ Zòmut hui bang lé gi, ge é zoshuq gyi shoq byi tso mù,
sutzè wó bang lé gi, akôm nhang kat bê nghut ri.
⁵⁴⁻⁵⁵ Nga-nhûng é íchýí íwâ pé lé taí tô é dang eq rajung za, Abraham eq yhangzo yhangshu pé lé, hkâ-nhám le shogyo nhikmyîn nyi râ gâ e lé myit bún nyi é yanmai,
Yhâng é dui-nhâng zoshâng Israe-laq byu pé lé hku baú nyi ri."
ga luî, taí ri.
⁵⁶ Mariq gi, Elizabet chyáng lhamó sum hkyap kô nyi mù luî, yhûm shut dum taú lô byuq bê.

Wui-myhup Sará Yohan Baú É Hkyô

- ⁵⁷ Hau htâng, Elizabet gi, zoshâng bau râ buinyi jé mù, yuqgè zo bau bê.
⁵⁸ Yhang lé haú-í kô é jeju Yhumsîng tân shit é hkyô lé, yhâng é yhumkyo buinùm wuî eq mung moq gumang wuî wó gyo kojáng, yhang eq rahá gabú nyi akô.
⁵⁹ Ahkuí shit nyí jé jáng, yhangmoq gi, zoshâng haú lé ahpyo-kuq hpyit byi râ matú lé kôluî, yhâng wâ é myîng eq rajung za, Zahkariq ga myhîng byi râ dâ akô. ⁶⁰ Nghut kôlhâng, yhâng nu gi, "A nghut, Yohan nghû sheq myhîng râ nghut lhê." ga tû taí ri.
⁶¹ Yhangmoq gi, "Náng é amyû su-isho má le, haú su gâ é myîng rayuq le a bo wú shi." ga luî, yhang lé taí akô.
⁶² Haú hkûn, zoshâng haú lé hkâsu nghû myhîng nau lhê laq ga, yhâng wa lé loq lik lik shit mù myí akô.
⁶³ Zahkariq gi, kê jung longpá dúng yù mù, "Yhâng é myîng gi, Yohan nghut lhê." ga kê shit ri. Haú mù, lhunglhâng bang gi, maú byuq bum akô. ⁶⁴ Haú hkûn jáng, Zahkariq gi, nhut hkum bóng lô mù, dang wó nyô lui, Garai Gasang lé hkya-on nyi ri. ⁶⁵ Haú su dut é hkyô lé, wó gyô é awui ayàm lhîngkyuq mâ é lhunglhâng bang gi, gyuq maú byuq bùm kômù, Yuda mau bum mau ramau gón taí pyo lô bum akô. ⁶⁶ Wó gyô é lhunglhâng bang gi, haú hkyô lé yhumsîng é i-myt unghkaú má kat to mù, "Zoshâng shí gi, hkâsu dut lò râ sù nghut lhê lhú?" ga myit wú nyi akô. Haí mù gâ le, haú Yhumsîng é loq gi, yhang eq rahá nghut nyi é yanmai nghut ri.

Zahkariq É Myiqhtoi Dang

- ⁶⁷ Haú hkûn, zôshang é yhângwa Zahkariq gi, Chyoiyúng Woi-nyí byîng lô mù, myiqhtoi dang dong taí é gi,
⁶⁸ "Haú Yhumsîng, Israelaq é Garai Gasang lé hkya-on sháng ô!
Haí mù gâ le, Yhang gi, Yhâng é amyû lé, lé kûm wú mù luî, lé hkyi yù bê nghut ri.

- 69 Garai Gasang gi, Yhâng é dui-nhâng zoshâng, Dawiq é amyû mai nga-nhúng é matú wum-o bo é hkyi yu é hkyuif lé, yuq htoq lô nhâng bê.
- 70 Shí hkyô gi, a-nham pyat mai yhâng é chyoiyúng myiqhtoî pé é nhut mai tai tô é eq rajung za nghut ri.
- 71 Haû hkyuif gi, nga-nhúng lé nga-nhúng é gye pé chyáng mai le, a nguî a nau bang banshoq é loq mai le, hkyi yû râ nghut lhê.
- 72 Îwa Garai gi, nga-nhúng é îchyí îwa pé lé shogyo nhikmyin hkyô lé tân shit râ matú, Yhang byî tô é chyoiyúng dangshikaq lé a tô-myhí nghut ri.
- 73 Haû gi, nga-nhúng é chyiké Abraham lé byi tô é danggidiq nghut lhê.
- 74-75 Nga-nhúng lé gye pé loq mai hkyi yû râ eq, nga-nhúng asak dui tô é buinyî banshoq má, Yhâng é hí má a gyuq a kyum é za, chyoiyúng é eq dîngmán é hkyô mai, Yhang lé wó dojaú nyî nhâng râ matú, Yhang jé lé é nghut lhê.
- 76 Ngá zo ê, nàng gi, Yhumsing é hí má, e lô mù luî, Yhâng é hkyô lé hen lajang byi râ sù nghut é yanmai, nang lé Myhang htáng htúm Su é myiqhtoî ga kó râ nghut lhê.
- 77 Nàng gi, Garai Gasâng é byu pé lé, yhangmoq é yubak mara hkyut pyám byî é dong, hkyi yu é hui râ hkyô lé tai kyo râ sù nghut lhê.
- 78 Haî mù gâ le, Garai Gasâng é shogyo nhikmyin é yanmai, napsûn buif gi, mauhkûng mai nga-nhúng chyáng htoq lé lô râ nghut lhê.
- 79 Yhang gi, mauchut hkaû\$ eq shî wup hkaû má lúng to bang lé builoq su duqbó byi râ eq,

nga-nhúng lé nguingón simsaq é hkyô shut shuí e lô râ sù nghut lhê." ga ri.

80 Zoshâng haû gi, kô lò mù, woi-nyí wum-o bo lò luî, Israelaq byu pé chyáng htoq shit lo é buinyî jé shoq, yoso pé má nyi nyi ri.

2

Betlehem Wà Mó Má Yesuq Hku Lo É Hkyô

Mht 1:18-25

¹ Buinyî haú pé má, Romaq hkoséng ming banshoq mâ é byù lhunglhâng bang gi, myìng jihpán kat râ matú, hkoséng Kehtaq Augustuq chyáng mai mungdang htoq ri. ² Jihpán haû lé sâng-hi dâm guq hi é gi, Kuireni ga sù Suriq mau má mauzau kut nyi é hkûn nghut ri. ³ Haú hkûn, byù du jup gi, myìng jihpán kat râ matú, ó le ô é wà shut ló bum akô.

⁴ Haû mù, Yosep le Dawiq é awut ashín nghut é yanmai, Galile mau Nazaret wà mai, Yuda mau mâ é Betlehem gâ é Dawiq é wà shut, ⁵ yhang dîng tô é myiwe Mariq eq rahá myìng kat lhóm râ matú jé doqló akô; Mariq kúm gi, gungloq lai to bê nghut ri. ⁶ Haû Betlehem má nyi tô ashî le, Mariq gi, zo hkû râ buinyî jé mù, zomún yuqzo lé bau bê. ⁷ Yhang gi, zoshâng haû lé panchoq èq htup mù no tso langhkang má lheq tô ri; haî mù gâ le, bíng yhûm má yhangmoq nyi râ jowò a joq lo é yanmai nghut ri.

Sau Zúng Bang Yesuq Chyáng Jé Lé É Hkyô

⁸ Ahkuî, haú ginwáng mâ é sau zúng zo bang gi, sau zúng jang má yhangmoq é sau hpúng lé, myín lé zúng nyi akô. ⁹ Haú hkûn, Yhumsing é maumang lagyo gi, yhangmoq é hí má lé htoq yap shit to mù, Yhumsing é hpungwup shingkang gi, awui ayâm má duqbang lò luî, yhangmoq gyai gyuq bum akô. ¹⁰ Maumang

† 1:69 Hkyi yu é hkyuif gi, Yhumsing Yesuq lé tai é nghut ri. † 1:78 Napsûn bui gâ é gi, Yesuq lé tai é nghut lhê. § 1:79 Mauchut hkaû gâ é gi, Garai lé a sé mù woi-nyí má shi tô é bang lé gâ lhê.

lagyo gi, "Hkâgyuq kó, byù lhunglhang bâng é matú, gyai yhang gabú é danglù, ngò nungmoq chyáng wun lé lo lhê. ¹¹ Hkû-nyí lhê buinyí má, Hkrisduq* nghu é Yhumsîng nghut é hkyi yù Sû gi, Dawiq é wà má nungmoq é matú hku to bê. ¹² Nungmoq é matú kumlhá gi, zoshâng nyheqnú rayuq panchoq eq htup mù, no tso langhkang má lheq to lánng ra nghut lhê." ga luí, yhangmoq lé taí ri.

¹³ Haú hkûn jáng yhang, mauhkûng bang rajùm rayò htoq lô mù, mau-mang lagyo haú eq rahá Garai Gasang lé hkya-ôn é dang gi,

¹⁴ "Htoq tsáng myhâng má, Garai Gasang gi, hpungwup shingkanngzo í du,"* hkungga byí rá lhê ga kâ bo nyí sháng gaq ô!

Myigùng htoq má le, Yhang ô nau é byu pé má, nguingón é gi, hkâ-nhám le joq nyí sháng gaq ô!"

gâ akô.

¹⁵ Maumang lagyo pé, yhangmoq chyáng mai, mauhkûng shut dum lô byuq jáng, sau zúng bang gi, "Sà! Betlehem wà mó má jé shoq yhang, nga-nhúng é mù, ahkuí za Yhumsîng nga-nhúng lé lé shit kyô laí lô bê hkyô lé é gôn wú sháng." ga luí, rayuq eq rayuq taí lhùm akô.

¹⁶ Hau htâng, yhangmoq gi, hân hân é luí, Mariq eq Yosep lé le, no tso langhkang má lheq tô é zoshâng nyheqnú lé le, é myàng akô. ¹⁷ Zoshâng haú lé, yhangmoq myàng kôjáng, zoshâng haú eq séng luí yhangmoq lé, lé taí kyô é dang lé, taí pyô kat bekô. ¹⁸ Wó gyô é bang banshoq gi, haú sau zúng bang taí kyô é dang lé, maú byuq bum akô. ¹⁹ Mariq kúm gi, dut lo é hkyô pé eq wó gyô é dang banshoq lé unghkaú má matsîng yù mù luí, nik nik myit wú nyi ri. ²⁰ Sau zúng bang gi, yhangmoq lé maumang lagyo taí kyô kat é dang eq rajung za, wó gyô yù, wó myang yu é hkyô pé banshoq é yanmai, Garai Gasang lé hkya-on kungtôn uchyang dum taú lô bekô nghut ri.

Yesuq Lé, Noqkuq Yhûm Má Shuî E É Hkyô

²¹ Zoshâng haú, shit nyí jé mù ahpyo-kuq hpyit byi rá buinyí má, yhang unghkaú má a lúng shi mai maumang lagyo myhîng tô é myîng eq rajung za, yhang lé, "Yesuq" ga luí, myhîng byí akô.

²² Mosheq é tarâ eq rajung za, yhangmoq é lhoq san lhoq sêng é buinyí byíng jáng, Yhumsîng é tarâ má, "Zomún yuqzo hkangmó gi, haú Yhumsîng é hí má chyoiyúng sù wó nghû rá matú, Yhumsîng chyáng é ap byi rá lhê."* gâ é eq, ²³ "Hpûngkyui razúm, haú a nghut jáng, nghoqmyhû zozo í du,"* hkungga byí rá lhê ga kâ tô é eq rajung za, ²⁴ Mariq eq Yosep gi, zoshâng haú lé shui mù Yerusalem wà mó shut é akô.

²⁵ Haú hkûn, Simeon gâ é mangzo rayuq, Yerusalem wà mó má nyi ri. Haú yuq gi, dingmán é eq tarâ cháng sù nghut mù, Israelaq lé nhik lhoq tíng rá ahkyíng lé lánng nyí sù nghut ri; haú Chyoiyúng Woi-nyí le, yhâng é ahtoq má nyi nyi ri. ²⁶ Yhang gi, haú Yhumsîng Hkrisduq lé a myang é za, shî rá a nghut, ga Chyoiyúng Woi-nyí eq tân shit tô é hui sù nghut lhê. ²⁷ Yhang gi, Chyoiyúng Woi-nyí eq shui mù, noqkuq yhúmhaú má é jé nyi tô é hkûn lé, Mariq eq Yosep gi, zoshâng Yesuq lé htûng tarâ eq rajung za kut byi rá matú, noqkuq yhúmhaú má shuí wang lô kôjáng, ²⁸ Simeon gi, zoshâng lé loq eq lhom bún yù mù, Garai Gasang lé hkya-ôn é dang gi,

²⁹ "Yhumsîng é, náng é danggidig gi, dik bê nghut ri; hkû-nyí náng é jùn ngò gi, nguingón é eq wó shi lô berâ nghut lhê.

³⁰ Haí mù gâ le, byù lhunglhang bâng é matú, nàng lajang tô é hkyi yù hkyô lé, ngá myoq eq yhang wó myâng bê.

³¹ Haú gi, byù myû chângjup wó myâng rá matú, nàng lajang to byí é nghut mù,

* **2:11** Grik dong Hkrisduq gâ é gi, xù but hui Sû gâ é lichyúm nghut mù, Hebre dong "Mesaia" gâ é eq rajung za nghut lhê. * **2:22** Htoq Lô 13:2,12 * **2:23** Nhung 12:8

³² tûngbaù pé lé, tengmán hkyô má bui su duqbó mù hpông shit râ matú le, náng é amyû Israelaq é hpungwup shingkâng matú le nghut nyi ri."

gâ ri.

³³ Yhângnu eq yhângwâ nhik gi, zoshâng Yesuq é hkyô lé Simeon taí é yanmai, maú byuq akô. ³⁴ Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shí gi, Israelaq ming mâ é byù myo myô é matú lingbat jowò eq myo myô é matú kô lò myhang lò râ hkyô le, byù myo myo taí he pyám râ kumlhá matú le, hkyin tô é hui sù nghut ri.

³⁵ Haù mù, byù myo myô é unghkaù má, myit mi-myt lé lhoq htoq shit râ nghut lhê. Náng é myit nhiklum má, shâm chûn eq htaù kyâng kat é su gâ é lé, nàng hui zo râ nghut lhê." ga taí ri.

³⁶ Ashe amyû mâ é Hpanuelaq é yhangzo, Annaq gâ é myiqhtoi myhí rayuq nyi ri; yhang gi, ipyat gyai ko bê. Yhang gi, zomyi pyat mai, yhanglâng eq nyhit zân za nyi luí, shit xe myi zân jé shoq chuimó mó nyi to sù nghut ri. ³⁷ Myiwe haù gi, noqkuq yhûm mai a htoq ê za, nyi myín a ga noqkuq dojaú nyi mù, zoshuq gám luí kyûdûng nyi ri. ³⁸ Simeon dang ban taí jáng, Annaq gi, hui lé lô mù, Garai Gasâng jeju lé hkya-on luí, Yerusalem wà mó lé Garai Gasang hkyi yù râ gâ é lé, myit lum to bang lhunglhang lé, zoshâng hau é hkyô taí kyô ri.

³⁹ Yosep eq Mariq gi, kut râ pé lé haù Yhumsing é tarâ joq é dông ban kut jáng, Galile mau mâ é yhangmoq wà Nazaret shut dum taù lò bekô. ⁴⁰ Zoshâng haù gi, kô lò mù, wum-o bò lo é eq, hpaqchyí byéng-yá le byíng nyi ri. Garai Gasâng jeju le, Yhâng é ahtoq má joq nyi ri.

Noqkuq Yhúmhkaù Má Zoshâng Yesuq Jé Nyi É Hkyô

⁴¹ Yhângnu yhângwâ nhik gi, Lhoqlhai Poí jé hkangmó, zân wui Yerusalem wà mó má é é kut akô. ⁴² Yesuq raxe í zân jé jáng, poí haù, é bo lóm ra htungli joq é eq rajung

za, yhangme wui yhangpe wui doq lò akô. ⁴³ Haù poí buinyi lai luí, dum taù lo é hkûn, zoshâng Yesuq gi, Yerusalem wà mó má nyi gyó tô ri; nghut kôlhang, yhângnu yhângwâ nhik gi, a sé kó. ⁴⁴ Yesuq lé rahá lo é luzúm wui chyáng bò râ su ngàm kômù luí, Yosep eq Mariq gi, ra-nyí buigyùm chap sô lò bê htâng má, mung moq wui eq, sê lhûm é buinùm ji-myi wui chyáng Yhang lé châng ho akô. ⁴⁵ Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taù jé e lò bekô. ⁴⁶ Ahkuí, sum nyi nghú râ nyi sheq, noqkuq yhúmhkaù má, tarâ sará pê é gung gûng má zûng to mù, yhangmoq é dang lé gyo yù luí, dum taù myi myi kut nyi é lé, yhangnhik é myàng akô. ⁴⁷ Yhâng é dang wó gyô é bang banshoq gi, Yhâng é u-nuq nyau é hkyô lé le, Yhang tû taí é dang lé le, maú nyi akô. ⁴⁸ Yhang lé myàng jáng, yhangnhik maú byuq kômù luí, yhângnu gi, "Ngá zo ê, haí mù luí ngá-nhik lé isu kut lhê lhú? Wú aq, náng wa eq ngá-nhik gi, myit myo myit chiq é eq, nàng lé jaq châng ho pyám bê." ga luí, Yhang lé taí ri.

⁴⁹ Yhang gi, "Haí mù luí, ngo lé châng ho akô lhú? mauhkûng mâ é ngá Wâ é yhûm má ngò nyi râ lhê le gi, nungnhik a sé kó lhú?" ga luí, yhangnhik lé tû taí ri. ⁵⁰ Nghut kôlhang, yhangnhik gi, Yesuq taí é dang lichyúm lé, a sê gyo kó.

⁵¹ Yesuq kúm gi, yhangnhik eq rahá Nazaret wà shut taù jé gyó lò luí, yhangnhik nyo é dang lé gyo mù nyi tô ri. Yhângnu Mariq gi, dut lai lò bê hkyô pé banshoq lé, yhâng é myit nhiklum má matsíng tô ri. ⁵² Yesuq gi, hpaqchyí byéng-yá kûng zet lo é eq, gunghkyâng kô myhang lò mù, Garai Gasâng é hí má le, byu hí má le, myoqdong wó lo nyi ri.

3

Wui-myhup Sará Yohan Mhoqshit É Hkyô

Mht 3:1-12; Mrk 1:1-8; Yhn 1:19-28

1 Romaq hkoséng Kehtaq Tiberuq gi, hkó zung é raxe ngo zân nghut é hkûn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má; 2 Anna eq Kayahpaq gi, hkyangjong mó mù má, kut nyi akô. Haú hkûn, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé lé ri. 3 Haú mù, yhang gi, Yodan làng yàm jowò hkanmó má, sô jón wún luí, yubak mara hkyut pyám byí é hui rá matú myit lhîng mù, wui-myhup hkâm* yù rá hkyô lé, hko kyô nyi ri. 4 Haú gi, myiqhtoi Esai-aq laiká má,

"Haú yoso má, byù rayuq garú taí é htê gi,

'Haú Yhumsing é matú, hkyô hen to keq, Yhâng é matú hkyô lhoq nyhang to keq;

5 wuihkung langhkop hkanmó lé lhoq pyíng ra rá nghut lhê; bùm eq wingkáng hkanmó lé hpyit pyám ra rá nghut lhê; agoi aguq é hkyô hkat hkanmó lé lhoq nyhâng ra rá nghut lhê; ahkung ahkop dut é hkyô hkat hkanmó lé lhoq rhá ra rá nghut lhê.

6 Haú hkûn, byù banshoq gi, Garai Gasâng é hkyi yù hkyô lé myàng rá nghut lhê."[†]✠ ga luí, kâ tô é eq rajung za nghut ri.

7 Shiwa byù rajùm rayò gi, Yohan é loq má wui-myhup hkâm yù rá ga luí htoq lé lô kôjáng, Yohan taí é gi, "Duq htan é lhangmuí amyû pé† é, jé lô rá yubak dam mai wó hpanq lut kó sháng gaq ga, nungmoq lé ó yuq taí pùn é lhú? 8 Myit lhîng hkyô eq gingdán é ashi zui keq. 'Nga-nhúng gi, Abraham é yhangzo yhangshû pé

nghut lhê.† nghû luí, yhumsing é i-myit unghkaú má hkâtaí kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. 9 Ahkuí lháng, Garai Gasang gi, Yhâng é wazung lé haú sikkâm wang pé má tô to bê nghut ri; haú mù, ge é ashi a zui é agàm hkanmó lé gi, htuq lhêng pyám mù, myi má dú kat pyám rá nghut lhê." gâ ri. §

10 Haú hkûn, shiwa byu pé gi, "Haú nghut le gi, ngamoq hkâsu kut le gè rá lhú?" ga luí, yhang lé myí akô.

11 Yhang gi, "Bu í dung wó sù gi, bu a wó sù lé, gàm byi sháng gaq; zo shuq wó sù le, a wó sù lé, gàm byi sháng gaq." ga luí, yhangmoq lé tú taí kat ri.

12 Kang guq bang le, wui-myhup hkâm yù rá ga lé lô mù, "Sarâ é, ngamoq gi, hkâsu kut le ge rá lhú?" ga luí, yhang lé myí akô.

13 Yhang gi, "Nungmoq hkyui yù rá masat tô é htoq lai shoq hkâyû kó." ga luí, yhangmoq lé taí ri.

14 Gyezô pé ra-am le, "Ngamoq gi, hkâsu kut le gè rá lhú?" ga luí, yhang lé lé myí akô.

Yohan gi, "Ó lé le hkâkyuq zo ko; a tara é dông mara le hkâhún kó; nungmoq wó e ahpau éq gé bûn nyi keq." ga luí, yhangmoq lé taí ri.

15 Shiwa byu pé kúm gi, Hkrisduq lé myit lánq nyi tô é bang nghut é yanmai, Yohan lé haú yuq nghut lhê laq ga yhumsing é i-myit unghkaú má myit wú nyi bum akô. 16 Haú hkûn, banshoq bang lé Yohan taí é gi, "Ngò gi, nungmoq lé, wui éq za wui-myhup hkâm byí lhê; nghut kôlhang, ngá htoq má wum-o a-tsam je bo é sù rayuq jé lé lô rá nghut lhê. Ngò gi, yhâng é hkyi-tsung tui lé hpyí rá lháng a gingdán; Yhang gi, Chyoiyúng Woi-nyí má le, myi má le, nungmoq

* 3:3 Wui-myhup hkâm gâ é gi, baptisma lé gâ é nghut lhê. ✠ 3:6 Esai 40:3-5 † 3:7 Lhangmuí amyû pé gâ é gi, Lukaq 3:7-10 má bo é Hparishe eq Saduke pé lé taí é nghut ri. ‡ 3:8 Nga-nhúng gi, Abraham é yhangzo yhangshû pé nghut lhê gâ é gi, Abraham é yhangzo yhangshu nghut é yanmai, Garai Gasang jéyáng é lé a hui rá ga, myit yu é hkyô nghut ri. § 3:9 Bun zo shí lhùm é lichyúm gi, myit a lhîng bang lé, Garai Gasang jéyáng é buinyí jé rá nghut lhê ga nau é nghut ri.

lé wui-myhup hkám byi râ nghut lhê.
¹⁷ Yhang gi, loq má byò chung to mù, guq chyârâng mâ é guq bùm lé hik sân pyám luî, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myî eq nyhê hkyô pyám râ nghut lhê." gâ ri.*
¹⁸ Haû mù, Yohan gi, byù haú bang lé gotû dang myo myo eq lhoq pun lhoq kying mù, gabú danglù lé hko kyô nyi ri.

¹⁹ Nghut kôlhang, hkâ-myháng a myáng má mauzau Herut gi, yhanggû é yhangmyi Herudiaq lé lú yu é hkyô eq, yhang kut shut é gotû a ge é mù banshoq é yanmai, Yohan gi, yhang lé tân mhoqshit bê nghut ri. ²⁰ Mara haú pè htoq agó, Herut dum kut jat yu é mara gi, Yohan lé htóng má lhûng kat é nghut ri.

Yesuq, Wui-myhup Hkâm Yu É Hkyô

Mht 3:13-17; Mrk 1:9-11

²¹ Yohan lé htóng má a lhûng kat shimá, byù myo myo gi, wui-myhup hkâm yu nyi kô é hkûn, Yesuq le Yohan chyáng wui-myhup hkâm yù mù, kyûdûng nyi le, mauhkûng búng lô mù, ²² haû Chyoiyúng Woi-nyí gi, hpûngkyui gunghkyâng sù é dông mai Yhâng ahtoq má lé gyó nô ri. Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

Yesuq É Byù Xik Shap Kyô É Hkyô

Mht 1:1-17

²³ Yesuq gi, Yhang mù zûi hi é hkûn, asak sum xê zàn kô nghut bê; Yhang lé byù hkyam dông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo, ²⁴ Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo, ²⁵ Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é

yhangzo, Esali gi, Nagai é yhangzo, ²⁶ Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo, ²⁷ Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo, ²⁸ Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo, ²⁹ Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo, ³⁰ Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo, ³¹ Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo, ³² Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo, ³³ Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo, ³⁴ Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo, ³⁵ Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo, ³⁶ Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo, ³⁷ Lamek gi, Mehtusela é yhangzo, Mehtusela gi, Eruk é yhangzo, Eruk

* **3:17** Haû eq rajung za, Hkrisduq gi, a ge é byu pé eq ge é byu pé lé gam hkoq pyám râ nghut lhê.

gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo,³⁸ Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

4

Yesuq Lé Tsadán Gunlaú É Hkyô Mht 4:1-11; Mrk 1:12-13

¹ Yesuq gi, Chyoiyúng Woi-nyí èq byíng mù, Yodan làng mai dum taú lo é hkûn, Chyoiyúng Woi-nyí gi, Yhang lé yoso shut shuí e ri. ² Haú má, Yesuq gi, buinyí myi xê nyí jé shoq, nat Tsadán èq gunlaú é huí ri. Buinyí haú gyoro má, Yesuq gi, haí le a zô é yanmai, zòmut hui bê nghut ri.

³ Haú mù luí, nat Tsadán gi, "Nàng, Garai Gasâng é Yhangzo nghut le gi, luqgok shí lé muk dut nhâng aq." ga luí, Yhang lé taí ri.

⁴ Haú hkûn, Yesuq gi, "'Byù gi, muk èq za asak duì rà a nghut.'" ga luí, Chyúmdang má kê tô ri.* ga yhang lé tû taí ri.

⁵ Hau htâng, nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq lé razup má za tûn shit luí, ⁶ "Shí ahkáng ayá banshoq eq haú mingdán é hkikhkâm hkyô banshoq, ngò nang lé wó byí lhé; hkâsu mù gà le, haú pé banshoq gi, ngo lé ap byí to bê nghut mù, ngò byí nau é sù ó yuq lé nghut kôlhang, byi rà nghut lhé. ⁷ Haú mù, Nàng, ngo lé noq é nghut jáng, shí pé banshoq Nàng é dut rà nghut lhé." ga, Yesuq lé taí ri.

⁸ Haú hkûn, Yesuq gi, "'Haú Yhumsîng nâng é Garai Gasang lé za, nâng noqkuq dojaú ra rà nghut lhé.'" ga luí, Chyúmdang má kê tô ri." ga luí, yhang lé tû taí ri.

⁹ Nat Tsadán gi, Yesuq lé Yerusalem và mó má shuí ê mù, noqkuq yhum je myhang é shùhtâng htoq má yap

nhang to luí, "Nàng, Garai Gasâng é Yhangzo nghut le gi, shí mai byam gyó kat wú aq. ¹⁰ Hkâsu mù gà le, 'Nang lé upzúng byí nyí rà matú, Garai Gasang gi, Yhâng é mau-mang lagyô pé lé taí to rà nghut mù,

¹¹ luqgok má nâng é hkyí a ló htung shoq, yhangmoq é loq èq Nang lé lhom bún yú kó rà nghut lhé.*

ga luí, Chyúmdang má kê tô ri." ga taí ri. ¹² Nghut kôlhang, Yesuq gi, "'Haú Yhumsîng, nungmoq é Garai Gasang lé, wó chyam wú rà a nghut.'" ga luí, Chyúmdang má bo tô ri." ga, yhang lé tû taí ri.

¹³ Nat Tsadán gi, gunlaú é hkyô pé banshoq ban kut jáng, ahko ahkáng láng wú uchyang yhâng chyáng mai byam gâng nyi byuq ri.

Yesuq Lé Nazaret Và Bang He-ngik Pyâm É Hkyô

Mht 4:12-17; 13:53-58; Mrk 1:14-15; 6:1-6

¹⁴ Yesuq kúm gi, Chyoiyúng Woi-nyí wum-o byíng é èq Galile mau shut dum taú lo ri. Haú mau jowò hkangmó má, Yhâng é hkyô lé taí pyo ló bùm bekô. ¹⁵ Yhangmoq é tarajong pé má, Yesuq mhoqshit byi mù, lunglhâng bang gi, Yhang lé taí hkya-ôn nyi bum akô.

¹⁶ Hau htâng má, Yhang nyi kô lo é Nazaret và má dum taú jé ló bê; Yhang gi, hkâ-nhâm le kut nyi é eq rajung za, Bánno buinyí* lé tarajong má wang ê mù, laiká nghap rà ga toq yap é hkûn, ¹⁷ Yhang lé myiqhtoi Esai-aq chyúmding byi kôjáng, Yhang chyúmding haú lé hpông kat le,

¹⁸ "Yhumsîng é Woi-nyí gi, ngá é ahtoq má nyi nyi ri;

hkâsu mù gà le, asho awuí é bang lé gabú danglù hkô kyo rà matú, Yhang ngo lé hkyin yù bê.

Htóng lúng bang lé lhoq htoq rà hkyô eq, myoqjit bang lé myoq dum

* 4:4 Tarâ Pun 8:3 * 4:8 Tarâ Pun 6:13 * 4:11 Hkya-on 91:11-12 * 4:12 Tarâ Pun 6:16 * 4:16 Bánno buinyí gà é gi, Yudaq byu pé nòmu é buinyí lé gà lhé. Ahkui lhé é dông ga jáng, Bánno buinyí gi, bat htoq hkyuq nyí lé âng ri.

myàng nhâng râ hkyô hkô kyo
râ matú le,
zik zo huí é bang lé nhang kat
nhâng râ eq,

19 Yhumsing, Yhâng é byu pé lé hkyi
yù râ ahkyíng zanwut lé hkô
kyo râ matú le, Yhang, ngo lé
nhang kat bê nghut ri."*

ga luí, kê tô é jowò lé myang záng mù
nghap ri.

20 Hau htâng, Yesuq gi, chyúmding
haú lé ding mù, shuí-u sù lé tau byí
pyám luí, dum zung tô ri; tarajong mâ
é byù lhunghâng bang gi, Yesuq lé
chôm wú tô é hkûn, 21 Yesuq gi, "Nung-
moq é nohkyap má, ahkuí wó gyô é
Chyúmdang shí gi, hkû-nyí yhang lo
dik bê." ga luí, yhangmoq lé taí hi kat
ri.

22 Lhunghâng bang gi, Yhang ge é
hkyô lé saksé hkám byi kômù, Yhâng
é nhut mai htoq é jeju bo é dang lé
le, maú kôluí, "Shí yuq gi, Yosep é
yhangzo a nghut lhú?" ga taí bum
akô.

23 Haú mù luí, Yesuq gi, "Nung-
moq gè gè yhang, 'Chi sará ê, yhum-
sing gùng lé lhoq ge yù aq.'† gâ é
sanghkyang èq le, 'Nàng, Kaperna-um
wà má kut shit wú é hkyô ngamoq wó
gyo bê, haú eq rajung za, nàng, náng é
yhum mau má le, kut shit wú aq.' ga
luí le, ngo lé taí kó râ nghut lhê." ga taí
ri.

24 Yhang dum xoq taí é gi, "Ngò,
nungmoq lé teng za taí kôlé, myiqhtoi
ó yuq le yhumsing é yhum mau má
myoqdong wó wú é a nghut. 25 Ngò,
nungmoq lé teng za taí kôlé, Eliyaq
é pyat lé, Israelaq ming má chuimó
myo myo nyi bum akô. 26 Nghut
kôlhang, haú ming má sùm zan eq
lhamó hkyuq hkyap yhang, mau a
wò dut byuq mù, mutmó gyó tô é
hkûn, Garai Gasang gi, yhangmoq
mâ é rayuq chyáng le, Eliyaq lé a
nhang kat é za, Sidun mau Zarephta
wà mâ é, chuimó myhí rayuq chyáng
sheq nhang kat byí é nghut lhê.

27 Myiqhtoi Elisha é pyat má le, Is-
raelaq ming má, manggâm dap é
byù myo myo nyi kôlhang, yhangmoq
chyáng mâ é rayuq le wó sân-yúng yù
kô é a nghut; Suriq byù Naman ga
sù tûngbau hpó za sheq wó sân-yúng é
nghut lhê." ga taí ri.

28 Tarajong hkaú mâ é lhunghâng
bang gi, haú hkyô lé wó gyo kôjáng,
gyai yhang nhik-yo nau bùm kômù,
29 toq yap luí, Yhang lé wà mai hkat
htoq mù, yhangmoq é wà xuq tô é
bùm gùng htoq mâ é gampyoq má, ê
chyún hpyit hkyô pyám râ ga shuí e
ló akô. 30 Nghut kôlhang, Yesuq kúm
gi, byù hpûng haú mai so hkoq htoq
ló byuq bê nghut ri.

Agè Ashop É Nat Lé Yesuq Hkat Htoq É Hkyô

Mrk 1:21-28

31 Hau htâng, Yesuq gi, Galile mau
mâ é Kaperna-um wà má jé ê mù,
Bánno buinyi má byu pé lé mhoqshit
hi ló bê nghut ri. 32 Yhangmoq gi,
Yhang mhoqshit é hkyô lé mauhong
nyi akô; hkâsu mù gâ le, Yhang gi,
ahko ahkáng bo é dang dông taí nyi é
yanmai nghut ri.

33 Yesuq, tarajong hkaú má mho-
qshit byí nyi é hkûn, nat gang wang
júng é byù rayuq htê mó o mó èq taí
é gi, 34 "Ê, Nazaret wà byù Yesuq ê,
ngamoq gi, Nàng eq haí sêng lhê lhú?
Ngamoq lé lhoq hten râ matú, Nàng
jé lé é nghut lhê lhú? Nàng gi, Garai
Gasang é Chyoiyúng Sù nghut é lé, ngò
sê lhê." gâ ri.

35 Haú hkûn, Yesuq gi, "Hkâjop,
yhâng chyáng mai htoq ló aq." ga
yhang lé tân kat jáng, nat gi, haú yuq
le yhangmoq é gung gûng má lhoq
lheq to mù, a nò nhang é za, yhâng
chyáng mai htoq ló byuq ri.

36 Haú mù luí, shiwa byù banshoq
bang gi, gyai yhang maú byuq kômù,
rayuq eq rayuq, "Shí yuq é dang
gi, hkasú é dang wá nghut lhê lhú?
Yhang gi, ahkáng ayá èq le, wum-o bo

* 4:19 Esai 61:1-2 † 4:23 Chi sará ê, yhumsing gùng lé lhoq ge yù aq gâ é sanghkyang gi, "Mesaia
nghut le gi, mauhpo mù wó tân shit râ nghut lhê." gâ é nghut lhê.

é eq le, agè ashop é nat pé lé hkunmó hkyó jáng, haú bang htoq ló byuq akô." ga taí lhûm bum akô. ³⁷ Haú hkûn, haú mau mâ é awui ayàm jowò hkangmó má jàm shoq, Yhâng é hkyô lé taí pyo hû ló bûm bekô nghut ri.

Yesuq Nòhpyo Lhoq Gê Byî É Hkyô Mht 8:14-17; Mrk 1:29-34

³⁸ Yesuq gi, haú tarajong mai toq ló mù, Simun é yhûm má wang ló ri. Simun é yhâng-aumó gi, ali gyai nyé no nyi é nghut mù luí, lhoq gê byí râ matú, Yesuq lé garúm dung byî akô. ³⁹ Yesuq gi, Simun é yhâng-aumó nàm má yap to mù, nòhpyo haú lé tân kat jáng, Simun é yhâng-aumó gi, ge ló byuq bê; haú hkûn jáng, yhang gi, toq mù, yhangmoq lé gaí tso gaí huq bê nghut ri.

⁴⁰ Bui wang ló jáng, nòhpyo hui bang eq awáng nòhpyo ajung jung dap é bang lhunglháng lé, Yesuq chyáng shuí lé lô kômù, yhangmoq rayuq htâng rayuq é ahtoq má Yesuq gi, loq ke byi luí, lhoq gê byí ri. ⁴¹ Nat gâng pé gi, Yesuq lé, "Nàng gi, Garai Gasâng é Yhangzo nghut ri." ga luí, wut taí mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó taí loshoq, Yesuq tân pyâm ri.

⁴² Maubó lô jáng, Yesuq gi, htoq ló mù, gaú é jowò yoso hkaú má ê nyi tô ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a ló byuq râ matú châng hkûm wú akô. ⁴³ Nghut kôlhang, Yesuq gi, "Garai Gasâng é mingdán é gabú danglù lé, gó wâ pé má le ngò hko kyo râ râ ashî, haú é matú, Garai Gasang gi, ngo lé nhang kat bê nghut lhê." ga luí, yhangmoq lé taí ri. ⁴⁴ Haú mù, Yesuq gi, Yuda mau mâ é tarajong pé má, hko kyô wún nyi ri.

5

Sâng-hi Ji Yù Huí É Chángzô Pé Mht 4:18-22; Mrk 1:16-20

¹ Radàm má lé, Yesuq gi, Genesarat nhông yàm má yap tô le, Garai Gasâng é mungdang gyo râ ga, shiwa byu pé, Yhâng chyáng chyîn chyap wang lé lô kô é hkûn, ² nhông gin-gau yàm má lhaí razúm joq tô é lé, Yhang myang kat ri. Ngogûn dú bang kúm gi, lhaí mai htoq mù, yhangmoq é gùn pé lé chî nyi akô. ³ Yesuq gi, Simûn é lhaí má wàng mù gin-gau mai rachyit lhoq kang nhâng luí, haú lhaí htoq má zung to mù, shiwa byu pé lé mhogshit taí kyô nyi ri.

⁴ Dang ban taí jáng, Yesuq gi, Simun lé, "Wui nik é shut hui luí, ngozo wó kông yù râ matú, nungmoq é gùn pé lé dú hkyô kat keq." ga taí ri.

⁵ Simun gi, "Yhumsîng ê, ngamoq amàn ra-myin mau shikut wú kôlhang, haí le a wó; nghut kôlhang, náng dang é yanmai, ngò gùn dú hkyô kat râ nghut lhê." ga tú taí ri.

⁶ Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lháng jeq ló râ su dut é yanmai, ⁷ lhaí gó lhum mâ é luzúm wui lé, lé garúm yù râ matú loq lik lik kat kôjáng, haú bang lé lô mù, haú lhaí í lhum aluq myup ló shoq ngozo lé kat pyíng bekô.

⁸ Simun Petruq gi, haú lé myàng jáng, Yesuq é hkyî wang má hkyihput htuoq mù, "Yhumsîng ê, ngá chyáng mai ló byuq aq, haí mù gâ le, ngò gi, yubak dap é byù nghut nyi lhê." ga taí ri. ⁹ Haí mù luí gâ le, Simun le, yhang eq nyi tô é lhunglhâng bang le, haú su ngozo wó yu é yanmai, maú nyi bùm kômù nghut ri. ¹⁰ Simûn é luzúm nhik, Zebedi é yhangzo Yakuq eq Yohan le, haú su chôm maú byuq akô.

Hau htâng, Yesuq gi, "Hkâgyuq, ahkuí mai nàng gi, byù lé châng kóng sù dut râ nghut lhê." ga luí, Simun lé taí ri. ¹¹ Yhangmoq gi, wuiyàm má jé jáng, lhaí pé eq yhangmoq é zè banshoq lé tô pyâm to luí, Yesuq htâng cháng bekô nghut ri.

Manggâm Dap Bang Lé Yesuq Lhoq Gê Byî É Hkyô Mht 8:1-4; Mrk 1:40-45

12 Radàm lé, Yesuq gi, wà rawà má nyi tô lé, ragùngdû é manggâm dap é byù rayuq lé lo ri; haú yuq gi, Yesuq lé myàng jáng, hkyihput htuoq luí, "Yhumsíng ê, Nàng dóng é nghut le gi, ngo lé Nàng wó lhoq sân-yúng byi rá nghut lhê." ga dúng wut ri.

13 Yesuq gi, loq lhâm kat mù, haú yuq lé é záng luí, "Ngò dóng lhê, sân-yúng aq hkoí." ga taí ri; haú hkûn jáng, haú yuq é manggâm gi, ge byuq bê nghut ri.

14 Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tún shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga, yhang lé taí hkûm kat ri.

15 Nghut kôlhang, Yesuq é hkyô gi, je riyhang taí pyo hù jam ló mù luí, shiwa byù rajùm rayò gi, Yhâng é dang gyo rá matú le, yhangmoq é nòhpyo lhoq gê byí nhâng rá matú le, lé zup míng tô akô. 16 Yesuq kúm gi, Yhang baú tsik za yoso shut htoq é mù, kyû é dung dung kut ri.

Gùngjum Shí Sû Lé, Yesuq Lhoq Gê Byí É Hkyô

Mht 9:1-8; Mrk 2:1-12

17 Ra-nyí lé, Yesuq mhoqshit nyi é hkûn, Hparishe pé eq tarâ sará pé le, Yesuq nâm má zung tô akô; haú bang gi, Galile mau wà hkyap hkangmó mã é bang eq Yuda mau, Yerusalem wà mó mã é bang nghut akô. Yhumsíng Garaí é wum-o a-tsam le nòhpyo lhoq gê rá matú Yesuq eq rahá nghut nyi ri. 18 Haú hkûn, byù ra-am gi, gùngjum shí sù rayuq lé taphkang mai waq lé lô kômù, haú yuq lé, yhúmhkaú má nyi tô é Yesuq é hí má, wó lheq byi shoq ga hkyô ho nyi akô. 19 Byù lúm myô chyín chyap to mù, haú nò sù lé hká dóng le a wó shuí wàng kôluí, haú yhumhkûng htoq shut waq doq ló mù, haú yuq lé taphkang eq roq,

shiwa hpong gung gûng, Yesuq é hí ang ang má hkyô hang kat akô.

20 Yesuq gi, yhangmoq é lumjíng myit lé byu myàng jáng, "Byù nàng ê! Náng é yubak mara lé hkyut pyám byi bê." ga taí ri.

21 Haú hkûn, Hparishe pé eq tarâ sará pé gi, "Shí su ga luí, Garai Gasang lé rhoi dang taí é sù gi, ó yuq wá nghut lhê lhú? Garai Gasang za a nghut jáng, yubak mara wó hkyut pyám byi sù gi, ó yuq wá nghut lhê lhú?" ga luí, myit són wuí nyi bum akô.

22 Yesuq gi, yhangmoq myit són wuí nyi é hkyô lé sé mù, "Nungmoq é i-myt hkaú má, haí mù shí pé lé myit són wuí nyi akô lhú? 23 'Náng é yubak mara lé hkyut pyám byi bê.' nghútaí rá eq, 'Toq luí, hkyô so aq.' nghú taí rá má, hká hkun je taí lui lhê lhú? 24 Nghut kôlhang, haú Byu Yhangzo* gi, mingkan htoq má, mara hkyut byi rá ahkáng wó Sû nghut é lé, nungmoq lé sé nhâng nau lhê." ga mù, haú gùngjum shí sù lé, "Ngò, nàng lé taí bá, toq aq, náng é taphkang yu chûng luí, yhûm taú ló aq hkoí." ga taí ri. 25 Haú hkûn jáng, yhang gi, yhangmoq é hí má toq yap mù, yhâng é taphkang waq chûng luí, yhâng é yhûm shut Garaí Gasang lé hkya-on kungtôn uchyang ló byuq bê. 26 Byù banshoq bang gi, gyai maú byuq kômù luí, Garaí Gasang lé hkya-on kungton akô nghut ri. Yhangmoq gyai gyuq maú dik é èq le, "Hkû-nyí, nga-nhúng, mauhpo amú pé lé myàng bê." ga taí nyi akô.

Yesuq Gi, Lewiq É Yhûm Má Yubak Dap Bang Eq Rahá Zo Shuq É Hkyô

Mht 9:9-13; Mrk 2:13-17

27 Hau htâng má, Yesuq sô e ló le, Lewiq gâ é kang guq sù rayuq yhâng é kang guq zúm má zung tô é lé é myàng mù, haú yuq lé, "Ngá htâng cháng aq." ga taí ri. 28 Lewiq gi, haú mã é zè banshoq lé tô pyâm to mù, toq luí, Yhâng htâng cháng bê nghut ri.

* 5:24 Byu Yhangzo gâ é gi, Yesuq Yhânggùng yhang lé le taí e nghut lhê, Mesaia lé le taí é nghut lhê.

²⁹ Hau htâng, Lewiq gi, yhâng é yhûm má Yesuq é matú zoshuq poi mó kut byî ri; poi haú má kang guq bang myo myo eq byù góbang le, yhangmoq eq rahá za zô zung nyi bum akô. ³⁰ Haú mù luí, Hparishe pé eq yhangmoq hpúng mâ é tarâ sará pé kúm gi, "Nungmoq gi, haí mù luí kang guq bang eq yubak dap bang eq rahá zo shuq nyi akô lhú?" ga, Yhâng é chángzô pé lé mara hûn dang taí akô.

³¹ Yesuq gi, yhangmoq lé, "Wángzán bang chi sará a ra kó, nòhpyo hui bang za sheq ru râ lhê. ³² Ngò gi, dingmán bang lé wut yù râ matú jé lé é a nghut, yubak dap bang myit lhing râ matú sheq jé lé é ru nghut lhê." ga tû taí ri.

Zoshuq Gám Hkyô Eq Séng Luí, Yesuq Taí É Hkyô

Mht 9:14-17; Mrk 2:18-22

³³ Dum, yhangmoq gi, "Yohan é chángzô pé gi, zoshuq gám mù kyûdung dung kut akô; Hparishe pé é chángzô pé le, haú su kut akô; nghut kôlhang, náng é chángzô pé gi, haí mù zô nyi shuq nyi akô lhú?" ga Yesuq lé taí akô.

³⁴ Yesuq, yhangmoq lé tû taí é gi, "Bíng pé gi, lusik eq rahá nghut nyi to ashí hkûn, yhangmoq lé zo shuq wó gám nhâng râ lhú? ³⁵ Nghut kôlhang, lusik† lé yhangmoq chyáng mai shuí yu pyâm é hkyíng jé râ nghut lhê; haú buinyi pé má kúm gi, yhangmoq, zoshuq gám kó râ nghut lhê." ga ri.

³⁶ Dangtú dông mai le, Yesuq, yhangmoq lé taí é gi, "Mebu sik mâ é lâng cheq yû mù, mebu xau má hpo é gi, ó a kut wú kó; haú su kut é nghut jáng, mebu sik lé le lâng cheq pyâm é dut mù, pán jap sik le mebu xau eq du lhum râ a nghut. ³⁷ Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng mù, tsibiyiq wing le yui shun byuq, htûng le htên byuq, dut râ nghut lhê. ³⁸ Haú su a dut shoq gi, tsibiyiq wing asik lé, shokuq htûng asik má kat ra

† 5:35 Lusik gâ é gi, Yesuq lé taí nau é nghut lhê. và mó má joq é saksé zúm lé gâ é nghut lhê.

râ nghut lhê. ³⁹ Tsibiyiq wing axau shuq nyi bê sù gi, asik lé a shuq naú nghut râ; hkâsu mù gâ le, 'Axau sheq je nghâm ri.' ga taí râ." ga ri.

6

Bánno Buinyi Má, Yesuq É Chángzô Pé Kyôshi Shap Zô É Hkyô

Mht 12:1-8; Mrk 2:23-28

¹ Bánno buinyi ra-nyí má, Yesuq gi, Yhâng é chángzô pé eq yò hkaú mai sô laí ló é hkûn, Yhâng é chángzô pé gi, kyôshi ratsuí langshap yû mù, loq èq nè hpuq zô akô. ² Haú mù luí, Hparishe pé ra-am gi, "Bánno buinyi má a ge kut jung lé, nungmoq gi, haí mù luí haú su kut akô lhú?" ga taí akô.

³ Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut huí é hkûn, hkâsu kut é hkyô lé, nungmoq a nghap wú kó lhú?

⁴ Dawiq gi, Garai Gasâng é yhûm* hkaú má wang é mù, hkyangjông pé mai lai luí, ó le a ge zô é, kyâng tô é muk lé yù zo mù, yhâng htâng châng é bang lé le, byi tsó é a nghut kó lhú?" ga tû taí ri. ⁵ Hau htâng, Yhang gi, "Haú Byu Yhangzo gi, haú Bánno buinyi é Yhumsíng nghut lhê." ga yhangmoq lé taí ri.

Loq Jum Shî Sù Lé Yesuq Lhoq Gé Byí É Hkyô

Mht 12:9-14; Mrk 3:1-6

⁶ Gotú Bánno buinyi má le, Yesuq gi, tarajong má wàng mù mhoqshit nyi é hkûn, loqyo loq ajum shi byuq é byù rayuq haú má nyi tô ri. ⁷ Haú hkûn, tarâ sará pé eq Hparishe pé gi, Bánno buinyi má nòhpyo lhoq gê byi râ lhú ga luí, Yhang lé mara wó hûn shoq ga gyám wú nyi akô. ⁸ Yesuq kúm gi, yhangmoq é i-myit lé sé sù nghut luí, loq jum shî sù lé, "Toq mù, banshoq bâng é hí má, yap shit aq." ga taí kat ri. Haú yuq le, toq mù yap tô ri.

⁹ Haú hkûn, Yesuq gi, "Ngò nungmoq lé myí wú kôlé, Bánno buinyi má, ge é muzó kut râ, a ge é muzó kut râ,

* 6:4 Garai Gasâng é yhûm nghu é gi, Yerusalem

byù asak hkyî râ eq lhoq hten râ pé má hká lhum kut lé sheq tarâ wang lhê lhu?" ga luî, yhangmoq lé taî ri.

¹⁰ Hau htâng má, yhangmoq banshoq lé lhing wú mù, haû loq jum shî sù lé "Náng é loq nyhang kat aq." ga taî kat é hkûn lé, yhang le loq nyhang kat luî, yhâng é loq gi, shoq za ge byuq bê nghut ri. ¹¹ Nghut kôlhang, yhangmoq gi, myoq chum nhô chik yhang nhikyo naû kômù luî, "Yesuq lé hkâsu wá kut pyám râ lhu?" ga luî, rayuq eq rayuq taî lhûm nyi akô.

Raxe Í Yuq Lé Lagyo Ga Myhîng Yu É Hkyô

Mht 10:1-4; Mrk 3:13-19

¹² Haû yoq ra-nyí má, Yesuq gi, kyûdung râ ga bùm shut htoq e ló luî, ra-myin mau Garai Gasang lé kyûdung nyi ri. ¹³ Maubó jáng Yhâng é chángzô pé lé wut yù mù, yhangmoq chyáng má é raxe í yuq lé hkyin yù luî, lagyo pé ga myhîng to byî ri. ¹⁴ Haû bang gi, Yesuq eq Petruq ga myîng myhîng byî é Simun eq, yhanggu Andre, Yakuq eq Yohan, Hpilip eq Barhtolume, ¹⁵ Mahte eq Htomaq, Alhpe é yhangzo Yakuq eq Zelutuq† dut é Simun, ¹⁶ Yakuq é yhangzo Yudaq eq, Yesuq lé ap pyám râ sù Yudaq Iskarut pé nghut akô.

Hkungsô Wó É Hkyô Eq Dingnyé Wó É Hkyô

Mht 4:23-25; 5:1-12

¹⁷ Yesuq gi, yhangmoq eq rahá gyó ló mù, janggyú má yap tô é hkûn; Yhâng é chángzo moq mó le mù, Yuda mau banshoq má é bang, Yerusalem wà mó má é bang, wuîshuq lung-aû ayàm má é Turuq myuq eq Sidun myuq má é bang, rajùm rayò gi, ¹⁸ Yhâng é dang gyô yù râ eq yhangmoq é nôhpyo lhoq gê nhâng râ matú, rahá za zup míng tô akô. Agè ashop é nat èq zing-ri huî é bang le ge byuq

akô. ¹⁹ Yhâng é gùng mai htoq é wumô èq byù banshoq lé lhoq gê byî nyi é yanmai shiwa byu pé le Yhang lé wó záng shoq ga, ho nyi akô.

²⁰ Haû hkûn, Yesuq gi, Yhâng é chángzô pé lé wú kat luî taî é gi, "Myûng bang nungmoq gi, hkungsô wó nyi ri, hkâsu mù gâ le, Garai Gasâng é mingdán‡ gi, nungmoq é mingdán nghut nyi ri.

²¹ Ahkuî, zòmut wuîshit huî nyi é bang nungmoq gi, hkungsô wó nyi ri, hkâsu mù gâ le, nungmoq nhik dik shoq myàng zo kó râ nghut lhê.

Ahkuî, ngau nyi bang nungmoq gi, hkungsô wó nyi ri, hkâsu mù gâ le, nungmoq myang wuî kó râ nghut lhê.

²² Haû Byu Yhangzô é yanmai nungmoq lé su èq a nguì é, lhoq hpyoq lhoq kâng é, hoq hpu nhang é,

agè ashop nghut é dong jihpoi gamhkui huî é hkûn, nungmoq gi, hkungsô wó nyi ri.

²³ Haû hkûn lé, gabú byam chyù nyi keq, hkâsu mù gâ le, wú keq, nungmoq é matú kô é chyunghuq gi, mauhkûng mingdán má joq tô ri. Ngò, nungmoq lé taî lhê, hkâsu mù gâ le, yhangmoq é îchyí îwa pé le myiqhtoi pé§ lé haû su kut wú bekô."

²⁴ Nghut kôlhang, sùt wó bang nungmoq gi, dingnyé wó râ, hkâsu mù gâ le, nungmoq gi, yhumsing gùng má nhik shî nhik dik é hkyô lé huî yù bekô.

²⁵ Ahkuî, gyi gyi dau dau myàng zo myàng shuq nyi é bang nungmoq gi, dingnyé wó râ, hkâsu mù gâ le, nungmoq zòmut wuîshit é hui kó râ nghut lhê.

Ahkuî, wui nyi é bang nungmoq gi, dingnyé wó râ, hkâsu mù gâ le,

† 6:15 Zelutuq gâ é lichyúm gi, yhumsing zui sai é hkyô má gyai yhang myit lòm shirong é sù lé ga lhê. Haû u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

‡ 6:20 Garai Gasâng é mingdán gâ é gi, Garai Gasang up é lé gâ lhê. § 6:23 Myiqhtoi pé le zing-ri huî é yanmai, yhangmoq chyunghuq wó nyi akô. Haû eq rajung za, jamjau huî é bang nga-nhúng le chyunghuq wó râ nghut lhê.

iyon yôn é eq ngaubyi ngau-nhap htoq é hui kó râ nghut lhê.

²⁶ Byù banshoq bang, nungmoq lé ge é byù ga kôjáng, nungmoq gi, dingnyé wó râ, hkâsu mù gà le, yhangmoq é îchyi îwâ pé le, myiqhtoi pyoq pé* lé, haù su ga taí wú bekô.

Gye Pé Lé Chyitdap Râ Hkyô

Mht 5:38-48; 7:12

²⁷ Hau htoq agó, ngá dang gyô nyi bang nungmoq lé ngò taí kôlé, nungmoq é gye pé lé chyitdap nyi keq; nungmoq lé a naù a wôm é bang lé ge é hkyô kut keq; ²⁸ nungmoq lé nhîng é bang lé, shimân byi keq; nungmoq lé rhoi é bang lé kyûdung byi keq. ²⁹ Nang lé bo-pyuq rahkyam shut pyuq byi sù lé, rahkyam dum hkâm byi shi aq; náng bumó hkyut yu é sù lé, buzo le dum hkyut byi shi aq; ³⁰ nang lé rajung jung dúng é sù lé le, byi pyám aq; náng zè yu pyám byi é su chyáng mai le, hkádúng yù lo. ³¹ Nungmoq ô nau é dông supé lé kut nhâng nau é su, yhangmoq lé le kut byi keq.

³² Nungmoq lé chyitdap é bang lé za chyitdap kô le gi, nungmoq é matú hai akyû bò kó râ lú? Yubak dap bang le, yhumsîng lé chyitdap é bang lé gi, chyitdap nyi akô. ³³ Nungmoq lé ge é dông kut nyi é bang lé za, ge é dông kut nyi kô le gi, nungmoq é matú hai akyû bò kó râ lú? Yubak dap bang le haù su kut nyi akô. ³⁴ Supé lé zè chyí byi le, dum wó tau byi râ su dut é bang lé za, chyí byi le gi, nungmoq é matú hai akyû bò kó râ lú? Yubak dap bang lhang chyí byi é myhó dum wó yù shoq, yubak dap é bang lé chyí byi akô. ³⁵ Nghut kôlhang, nungmoq gi, nungmoq é gye pé lé chyitdap mù, ge é dông kut byi nyi keq. Dum wó taù yù râ lé myoq a byu é za, chyí ngho byi keq; haù su kut jáng, nungmoq wó é chyunghuq ko râ

eq, Myhang htáng htúm Su é yhangzô pé dut râ nghut lhê; hkâsu mù gà le, Yhang gi, jeju a dat bun bang eq agè ashop é bang lé ge é kut nyi ri. ³⁶ Nungmoq é Îwa Garai Gasang shogyo nhikmyin sê é su, nungmoq le shogyo nhikmyin nyi keq.

A Jéyáng Râ Hkyô

Mht 7:1-5

³⁷ A jéyáng é za nyi keq; haù jáng, nungmoq le jéyáng é a hui kó râ nghut lhê. A doqdân é za nyi keq; haù jáng, nungmoq le doqdân é a hui kó râ nghut lhê. Mara hkyut byi keq; haù jáng, nungmoq le mara hkyut byi é hui kó râ nghut lhê. ³⁸ Byi keq, haù jáng, nungmoq le dum byi é hui kó râ nghut lhê. Mán é búng mai byíng mui shún shoq nhún chyíng, dún chyíng kat mù, nungmoq é tanghkoí hkaù má lik kat byi é hui kó râ. Hkâsu mù gà le, nungmoq lik byi é bung èq, nungmoq lé dum lik byi râ nghut lhê." gâ ri.

³⁹ Hau htoq agó, Yhang dangtú ralhú dong yhangmoq lé dum taí é gi, "Myoqjit sù gi, myoqjit sù lé hkyô wó tûn shít lhê lú? Yhangnhik í yuq é donghkong má byit gyó kó râ nghut lhê, a nghut kó lú? ⁴⁰ Jongzo gi, sará htoq gyaù râ a nghut; nghut kôlhang, gúm shoq mhoq yù bê sù ó nghut kôlhang, yhumsîng é sará su dut râ nghut lhê.

⁴¹ Yhumsîng myoq hkaù má lúng tô é siktúm† lé lhang a myit wú é nhîng, haí mù luí, nunggu nungmang é myoqwàng‡ lé myang lhê lú?

⁴² Yhumsîng é myoq má lúng tô é siktúm lé lhang a myàng sù nhîng, 'Gumang hpó ê, náng myoq má lúng tô é myoqwàng lé, ngò choq pyám byi lé.' nghu luí, náng é gumang hpó lé hkâsu wó taí râ lú? Gegùn labyoq kut sù ê, náng é myoq má lúng tô é siktúm lé hí choq pyám aq. Haù jáng sheq, nunggu nungmang é myoq má wang tô é myoqwàng lé choq pyám

* **6:26** Myiqhtoi pyoq pé gi, Garai Gasang jéyáng é hui râ. † **6:41** Siktúm nghu e gi, yubak mara kô é lé taí lhê. ‡ **6:41** Myoqwàng nghu e gi, yubak mara atiq azo lé taí é nghut lhê.

byi râ matú, nàng san za myàng râ nghut lhê.

Agàm Eq Ashi

Mht 7:17-20; 12:34-35

⁴³ A ge é ashí zuí é, ge é shigâm hkâmá le a joq. Ge é ashí zuí é, a ge é shigâm le a joq. ⁴⁴ Haú mù luí, shigâm hkangmó lé, zuí é ashí lé wú mù wó sê hkyin yu lhê. Dangké, zubyap mai maihpáng-shi ó le a myang hpyoq yù wú, zugyóm mai le tsibyiq shi a wó hpyoq yu wú. ⁴⁵ Ge é sù gi, yhumsing é i-myt unghkaú mâ é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myt unghkaú mâ é agè ashop é sutdò mai, agè ashop é zè pé lé lhoq htoq shit lhê. Haí mù gà le, yhâng é i-myt unghkaú má byíng mui tô é lé za, yhâng é nhut mai taí htoq lo é nghut lhê.

Luqhtân Htoq Má Yhûm Saí Sù Eq Myì Chîn Dum Má Yhûm Saí Su É Hkyô

Mht 7:24-27

⁴⁶ Ngò taí é eq rajung za lháng a wó châng kut kô é nhîng, haí mù luí, nungmoq Ngo lé 'Yhumsîng ê, Yhumsîng ê.' nghu nyi akô lhú? ⁴⁷ Ngá chyang lé mù, ngá dang gyô yù luí, châng kut é sù ó nghut kôle, hkasú é sù eq wuí é lé ngò nungmoq lé shit kyo kôle. ⁴⁸ Haú yuq gi, wahpang yhûm saí le, nik nik du luí a dui é lunghtân htoq má apûn awang hi é sù eq wuí lhê. Wuì jê lò luí wuibaù pè èq yhûm haú lé lo gùn kôlhang, ging ging tíng tíng saí to bê nghut luí, haú lé a wó gun nhún. ⁴⁹ Ngá dang gyô yù mù, a cháng sù gi, apûn awang a saí é za myì chîn dum má wahpang yhûm saí sù eq wuí nyi ri. Wuìbaù pè èq yhûm haú lé lo gun kat é eq, haú hkûn jáng, lêng gyop byuq ri. Yhûm haú byoq hten byuq é gi, yù whuí a bò loshoq dut byuq râ nghut lhê." gà ri.

7

Romaq Gyezau Rayuq É Lumjîng Myit

Mht 8:5-13; Yhn 4:43-54

¹ Yesuq gi, shiwa byu pé lé ban mhoqshit é htâng má, Kaperna-um wà shut wang ló ri. ² Haú hkûn, Romaq gyezau rayuq é chyitdap dui-nhâng zoshâng gi, shî-nò no nyi ri. ³ Haú u lé, gyezau hpó gi, Yesuq é hkyô lé wó gyo jáng, yhâng é dui-nhâng zoshâng lé lhoq gê byi râ matú, Yesuq lé é ji lò keq ga, Yudaq suwún wuí lé nhang kat ri. ⁴ Haú bang gi, Yesuq chyang jé é kô é hkûn, "Yhang gi, nàng shí hkyô kut byi râ matú gingdán é sù, yhang nghut nyi ri; ⁵ hkâsu mù gà le, yhang gi, nga-nhûng amyú lé chyitdap é eq, ngamoq matú tarajong le kut byi sù nghut ri." ga luí, Yhang lé zuq zuq dîng wut nyi akô. ⁶ Haú mù luí, Yesuq gi, yhangmoq eq rahá za e ló ri.

Haú yhûm eq hká hé a wê é má jé jáng, Romaq gyezau hpó, yhâng é luzúm wuí lé taí nhang kat é gi, "Yhumsîng Yesuq ê, náng gûng lé hkâlhoq hkyik lo. Nàng, ngá é laishînhâng má, lé nang râ lháng ngò má a gingdán. ⁷ Haú mù, ngò, náng chyang jé lé râ matú gingdán é sù a nghut; Náng, dang rahkun za taí kat laq, haú hkûn, ngá é dui-nhâng zoshâng ge ló râ nghut lhê. ⁸ Hkâsu mù gà le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê, rayuq lé 'Ê aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jûn lé le, 'Shî kut aq!' nghu le, yhang kut lhê." gà ri.

⁹ Yesuq gi, dang haú lé wó gyo jáng, haú yuq é hkyô lé maú byuq luí, Yhang htâng châng é shiwa byu pé lé lhing wú mù, "Ngò, nungmoq lé taí kôlé, Israelaq amyú má lháng, shî í lumjîng é sù lé, Ngò a myang wú." ga taí ri. ¹⁰ Nhang kat é bang yhûm má dum taú jé jáng, no nyi é dui-nhâng zoshâng gi, ge to lánng é lé ló myang akô.

Shî Sù Lé Dum Lhoq Tui É Hkyô

¹¹ Hau htâng hkâ-myháng a myáng má, Yesuq gi, Yhâng é chángzô pé eq, shiwa byù moq mó le mù rahá za Na-in gà é wà shut e ló akô. ¹² Haú wà

wàng hkum má jé lo é hkûn lé, chuimó myhî é yuqzo te gi, shî mù, yhâng é mâng lé waq htoq lé lo akô. Wà byù myo myo le, chuimó myhî haù eq rahá châng lé lo akô. ¹³ Yhumsîng gi, haù chuimó myhî lé myàng jáng, yhang lé wú shogyo luî, "Hkâ-ngaù." ga taî ri.

¹⁴ Yesuq gi, gung shut huî ê mù, loq èq ê záng kat ri. Haù hkûn, waq tô é bang le jâng yap to byî akô. Yhang gi, "Zorâm ê, ngò, nang lé taî lhê, toq aq." ga taî ri. ¹⁵ Haù hkûn, shî bê sù gi, toq zûng mù dang taî lo ri. Yesuq gi, zorâm haù lé yhângnú chyáng dum ap byî ri.

¹⁶ Byù lhunglhâng bang gyuq maù bùm kôluî, Garai Gasang lé hkya-ôn é dang gi, "Myiqhtoi mó, nga-nhûng chyáng lé pô htoq bê nghut ri. Garai Gasang gi, Yhâng é amyû lé garúm râ ga lé kûm wú nyi ri." ga taî nyi akô. ¹⁷ Haù Yesuq é hkyô eq sêng é ludang lé, Yuda mau eq haù mau awui ayàm jowò hkangmó má taî pyo myhîn lô bum akô.

Yesuq Eq Wui-myhup Sará Yohan É Hkyô

Mht 11:1-19

¹⁸ Haù hkûn, wui-myhup sará Yohan é chángzô pé gi, haù hkyô banshoq yhang lé lo taî kyô akô. ¹⁹ Haù mù luî, Yohan gi, yhâng é chángzo í yuq lé ji yù mù, haù Yhumsîng chyáng nhang kat luî, "Nàng gi, haù jé lé lô râ Sù nghut lhê lhú? Haù a nghut jáng, ngamoq, góyuq lé lánng ra shirâ lhú?" ga, myí nhang kat ri.

²⁰ Haù nhik gi, Yesuq chyáng jé jáng, "Nàng gi, haù jé lé lô râ sù nghut lhê lhú? Haù a nghut jáng, ngamoq góyuq lé myoqbyu lánng nyî ra shirâ lhú?" ga luî, Wui-myhup Sará Yohan gi, ngá-nhik lé nánng chyáng myí nhang kat ri." ga taî akô.

²¹ Haù u yhang, Yesuq gi, nò zo hpýo zo, noli nojàng huî é bang eq agè ashop é nat dap jun dap é byù

myo myo lé, lhoq gê byî ri. Myoqjit bang myo myo lé le, myoq dum myàng nhang ri. ²² Haù hkûn, Yesuq gi, yhangnhik lé, "Myàng mi-myàng, wó gyo má wó gyo, Yohan lé lô taî kyo keq; myoqjit bang, myoq wó myàng bekô; hkyî hten bang le, wó so bekô; manggâm dap bang le, lhoq gê byî é hui bekô; nojit bang le, wó gyo bekô; shî bê bang le, lhoq dui toq é hui bekô; myùng bâng é matú, gabú danglù hko kyô nyî bê nghut lhê. ²³ Ngá é yanmai, Ngo lé lum shut é hkyô a bò sù gi, hkungsô wó nyi ri." ga taî ri.

²⁴ Yohan é chángzô nhik lô byuq é htâng má, Yesuq gi, Yohan eq séng luî, byù moq mó lé taî é gi, "Nungmoq gi, haì lé hpuq wú râ matú, haù yoso shut e akô lhú? Lai èq hik nhûn é jamgàm lé wú râ matú nghut akô lhú?

²⁵ Haù a nghut jáng, haì lé wú râ matú e akô lhú? Nú-nhâm é mebu wut sù lé wú râ matú e akô lhú? A nghut! Wú keq, gyai hpaù é mebu wut luî agùn agó wó bang gi, hkohkâm-wâng pé má sheq ru nyi lhê. ²⁶ Haù nghut le gi, haì lé wú râ matú ê kô é lhú? Myiqhtoi rayuq lé lhú? Haù kúm nghut ri. Ngò, nungmoq lé taî kôlé, Yohan gi, myiqhtoi htoq lánng gyaú sù nghut lhê. ²⁷ Haù yuq é hkyô lé, Chyúmdang má kê tô é gi,

'Wú aq, Náng é hkyô lajang lánng râ matú, Ngá é lagyo lé, Náng é hí má Ngò nhang kat râ nghut lhê.'*

gâ ri. ²⁸ Ngò, nungmoq lé taî kôlé, myiwe wui mai hku kat é bang má, Yohan htoq je kô é rayuq lánng a nyî, nghut kôlhang, Garai Gasâng é mingdán má je tiq dik sù gi, Yohan htoq je kô lhê." gâ ri.

²⁹ Mingbyû lhunglhâng bang eq kang guq bang gi, dang haù pé lé wó gyo kôjáng, Yohan byî é baptisma lé hkâm yù kô é nghut mù luî, Garai Gasâng é dingmán é hkyô lé sê gyô yu akô. ³⁰ Hparishe pé eq tarâ sará pé kúm gi, Yohan byî é baptisma a hkam yù kômù luî, Garai Gasang hen lajang

* 7:27 Mal 3:1

é hkyô lé yhumsing gung é matú he-
ngik pyâm akô.

³¹ Yesuq dum taí é gi, "Haú mù luí,
byù myû shí lé, Ngò, hai eq taí kê wú
rá lhú? Yhangmoq hai eq wuí akô
lhú?" ³² Yhangmoq gi,

'Nungmoq é matú, ngamoq sampyí
mut byi kôlhang, nungmoq gi, a
gó kó,

ngamoq ngau hkyangsâng kôlhang,
nungmoq gi, a ngau kó.'

ga luí, gài pé má zùng uchyang rayuq
eq rayuq wut taí lhùm nyi é zoshâng
wui eq wuí akô. ³³ Hkâsu mù gâ

le, Wui-myhup Sará Yohan jé lé luí,
muk a zo, tsibiyiq a shuq é nyi le le,
'Yhang gi, nat gang dap sù nghut ri.'

ga luí, nungmoq taí akô. ³⁴ Haú Byu
Yhangzo jé lé luí, zo mù shuq mù
kut jáng le, 'Shí yuq gi, zo myoq shuq

myoq noq sù eq, kang guq bang eq
yubak dap bâng é buinùm hpó nghut
ri.' ga dum taí akô. ³⁵ Nghut kôlhang,

hpaqchyí byéng-yá é yhangzô pé gi,
hpaqchyí byéng-yá tengmán é hkyô lé
saksé hkám byi nyi akô.* gâ ri.

Yubak Dap É Myiwe Rayuq, Yesuq Lé Xú But Byí É Hkyô

³⁶ Hparishe rayuq gi, Yesuq lé
yhâng chyáng zang zo rá matú ji kat
ri. Haú mù, Yesuq gi, haú Hparishe

é yhùm má wàng luí zo rá matú zung
tô ri. ³⁷ Haú hkûn, wú keq, haú wâ
mâ é yubak dap é myiwe rayuq gi,

Yesuq haú Hparishe é yhùm má zô
zung tô é lé sé jáng, gyai hpau dap
é namngón xú bo é luq hpyû bòng

yu lé luí, ³⁸ Yesuq é nunghtáng hkyí
wàng má ngau yap to mù, Yhâng é
hkyí má ngaubyí eq záng lhoq teq byi

jáng, úxam eq but sut pyám byí ri. Dum
nghut jáng, nhut eq puq luí mura lé
but byí ri.

³⁹ Yesuq lé ji é Hparishe wá gi,
haú lé myàng jáng, "Shí yuq myiqhtoi
nghut le gi, Yhang lé záng htûng é sù,
ó yuq nghut é eq hkâsû é yubak dap é

myiwe nghut é lé, Yhang sé rá nghut
lhê." ga luí, yhâng é unghkaú má myit
nyi ri.

⁴⁰ Yesuq gi, "Simun ê, Ngò, nang lé
taí rá rajung joq ri." ga taí ri.

Simun le, "Sarâ ê, taí aq." ga taí kat
ri.

⁴¹ Haú hkûn, Yesuq gi, "Ngùn chyí
zo sù rayuq chyáng, chyín dap é byù í
yuq nyi ri. Rayuq gi, denari† ngo shô

chap, rayuq gi, ngo xê chap dap ri.

⁴² Haú nhik gi, chyín xap rá ngùn a wó
kôluí, chyín yhumsing gi, yhangnhik
lé xap a ra lò gâ pyâm ri. Haú mù luí,
haú nhik mâ é hká yuq gi, yhang lé je
chyitdap rá lhú?" ga myí ri.

⁴³ Simun gi, "Je myo lhoq lhut hui
sù, nghut rá su ngam ri." ga tû taí ri.

Yesuq gi, "Nàng myit e dôngjô ri." ga
taí ri.

⁴⁴ Haú hkûn, Yesuq, myiwe zo haú
lé lhing wú luí, Simun lé, "Nàng
myiwe zo shí lé myang lhê lhú? Ngò,

nàng é yhùm má wang le, hkyí chí
rá uchyam, nàng a byi, yhang kúm
gi, ngaubyí eq ngá hkyí lé tik byi
luí, yhâng é xam eq sut pyám byi bê.

⁴⁵ Nàng gi, ngo lé nhut eq a puq nghut
ri; yhang kúm gi, ngò yhúmhaú má
wang é mai ngá hkyí má a no loshoq

puq nyi rá. ⁴⁶ Nàng gi, ngá ulhum má
xú a but byí wú, yhang kúm gi, ngá é
hkyí má nâm ngón é mura but byi bê

nghut ri. ⁴⁷ Haú su mù, ngò, nàng lé
taí lé, haú myiwe gi, je chyitdap luí,
yhang wó é yubak myo myo lé hkyut

pyám byí é hui bê. Shau za mara
hkyut pyám byí é hui sù gi, shau za
chyitdap sù nghut ri." ga taí ri.

⁴⁸ Yesuq gi, myiwe haú lé le, "Ngò,
nàng é yubak mara hkyut pyám byi
bê." ga taí ri.

⁴⁹ Rahá zung tô é bang gi, "Yubak
mara lháng wó hkyut pyám byi sù, shí
yuq gi, ó wá nghut lhê lhú?" ga luí,
myit nyi bum akô.

* **7:35** Nghut kôlhang, Garai Gasâng é hpaqchyí byéng-yá lé lhom hap yu é banshoq bang gi, Garai
Gasâng é hpaqchyí byéng-yá haú, tengmán ri ga saksé hkám nyi akô. † **7:41** Denari rachap gi, ra-nyí
lhê é byù rayuq é zuihpau eq wuí ri.

⁵⁰ Yesuq gi, "Náng é lumjǐng myit èq nang lé hkyi yù bê, ngón za ló aq hkoi." ga luí, myiwe haú lé taí kat ri.

8

Yesuq Htâng Châng É Myiwe Wui

¹ Hau htâng hkâ-myháng a myáng má, Yesuq gi, Garai Gasâng é mingdán hkyô eq sêng é gabú danglù lé taí kyo uchyang, Yhâng é lagyo raxe í yuq eq rahá za, rawa htâng rawà jé e ló ri. ² Hau htoq agó, nat gang dap é mai le, nòhpyo mai le Yesuq eq lhoq ge yu é myiwe wui, nat nyhit nat lhoq htoq pyám byi huí é, Magadalaq wà mà é Mariq le, ³ Herut é ikun zum sù Kuza é yhumsǐng myhí Yoanaq le, Susannaq le, gotù myiwe wui myo myo le, Yesuq eq rahá nghut akô. Haú bang gi, yhumsǐng wó du é í Yesuq eq lagyo pé lé byi zo byi huq nyi akô.

Kyôshi Sân É Hkyô

Mht 13:1-23; Mrk 4:1-20

⁴ Wà hkang wà mó mà é bang gi, Yesuq chyáng zup zǐng lé lo bùm kômù shiwa byù moq mó zup míng tô é hkûn, Yesuq dangtú dông taí kyô é gi, ⁵ "Kyô hkyó sù rayuq gi, kyôshi san râ ga htoq e ló ri. Yhang, kyôshi sân kat é hkûn, ra-am gi, hkyô má gyó ang mù, byu eq záng nâng pyeq pyâm lhê, maulat nghoq pê èq hte zo pyâm lhê dut ri. ⁶ Ra-am gi, luqgok yò má gyó ang mù, yuq htoq lo é hkûn, myigùng a teq é yanmai nyhuí shi byuq akô. ⁷ Ra-am gi, zugyóm hkaú má gyó ang luí, zubyap eq rahá yuq htoq lô mù, wup pyâm é hui bê nghut ri. ⁸ Nghut kôlhang, ra-am gi, myihpún bo é jang má gyó ang mù, yuq kô lò jáng, rashô tú myô jat lo ri." ga taí ri.

Yhang haú su ga taí nyi é hkûn, "Gyô yù râ nohkyap dap sù gi, gyô yù sháng gaq!" ga le, htê mó eq taí kat ri.

⁹ Haú hkûn, Yhâng é chángzô pé gi, dangtú shí hai lichyúm nghut lhê lhú ga, Yhang lé myí akô. ¹⁰ Yhang gi, "Garai Gasâng é mingdán eq sêng é sê gyo wui é hkyô pé lé sê gyo râ ahko

ahkáng, nungmoq lé byi to bê. Nghut kôlhang, góbâng matú gi,

"Wú to kôlhang, a myàng kó sháng, gyô nyi kôlhang, a sê gyo kó sháng."[☆] nghû, ngò dangtú dông taí lhê.

¹¹ Ahkui lhê é dangtú shi é lichyúm gi, îsu nghut ri: kyôshi gi, Garai Gasâng é mungdang nghut nyi lhê.

¹² Hkyô má gyó âng é kyôshi gi, haí eq wui lhê lhú gâ le, haú mungdang lé byu pé wó gyô é htâng má, lumjǐng é má le, hkyi yu é má le, a jé kó sháng gaq ga luí, yhangmoq é i-myt hkaú mai nat Tsadán eq mungdang haú lé, lé yu pyâm é huí bang eq wui lhê.

¹³ Luqgok yò pé má gyó âng é kyôshi gi, haí eq wui lhê lhú gâ le, haú mungdang lé wó gyo jáng, gabú myit eq hap yù kôlhang, amyit a wó chín mù, rayoq rabun za lumjǐng luí, gunglau huí é nyí má, dum htak ló byuq é bang eq wui lhê. ¹⁴ Zugyóm má gyó âng é kyôshi gi, haí eq wui lhê lhú gâ le, haú mungdang lé gyô yù luí, yhumsing é asak dui e ló é hkyô má, shí ipyat lhê é myit wui myit hke hkyô, ngùn zè sutgan eq mingkan ngón hkyô má myup byuq luí, mo é ashi a zuí é bang eq wui lhê. ¹⁵ Hpún bo é myigùng má gyó é kyôshi kúm gi, haí eq wui lhê lhú gâ le, haú mungdang lé lhumzui luí ge é i-myt eq ban gyô yù mù, ging tǐng shoq zuí zǐng luí, wó jân é i-myt eq ashi zuí é bang eq wui lhê.

Myibung Htûn É Hkyô

Mrk 4:21-25

¹⁶ Myibung lé tap mù, aú eq nghop tô é le, yhupchong ô má tô tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô. ¹⁷ Hkâsu mù gâ le, a htoqzê loshoq haq tô é zè haí le a joq, a sé a byông htoq loshoq wó zau tô é zè le haí a joq nghut ri. ¹⁸ Haú mù luí, nungmoq hkâsu wó gyô yu é hkyô lé sidiq nyi keq, haí mù gâ le, wó to sù lé gi, jat byi shirâ, a wó su chyáng mai kúm gi, yhang wó to bûn é mà é lé

☆ 8:10 Esai 6:9

lháng, yu pyám byi shirâ nghut lhê." ga taí ri.

*Yesuq É Yhângnu Eq Yhanggu Pé
Mht 12:46-50; Mrk 3:31-35*

¹⁹ Haú hkûn, Yesuq é yhângnu eq yhanggu pé gi, Yhâng chyáng lé lô kô le, shiwa byu pé lûm chyûn chyap to kômù, Yhâng chyáng a wó wang ê kó nghut ri. ²⁰ Haú hkûn, Yhang lé, "Náng nu eq nunggu pé gi, nang lé hui naú luí, shinggan má láng yap bum akô." ga taí kyo akô.

²¹ Yesuq gi, yhangmoq lé, "Garai Gasâng é mungdang lé gyô yù luí, châng é bang gi, Ngá nu eq Ngá gû pé nghut akô." ga luí, yhangmoq lé tû taí kat ri.

*Laidun Mó Lé Yesuq Lhoq Zîm É
Hkyô*

Mht 8:23-27; Mrk 4:35-41

²² Ra-nyí lé, Yesuq gi, Yhâng é chángzô pé lé, "Nga-nhúng nhông he hpoq shut dap e ló sháng." ga taí luí, lhaí má wàng mù gû dap e ló akô. ²³ Yhangmoq gû dap e ló é hkûn lé, Yesuq gi, yhup myhî tô ri. Haú u lé, nhông haú má laidun mó lò luí, lhaí má wui byíng lô mù, yhangmoq myup shî râ su dut lò nyi bekô nghut ri.

²⁴ Haú mù, yhangmoq gi, Yesuq chyáng huí ê luí, Yhang lé nhaú pun mù, "Yhumsîng ê, Yhumsîng ê, nga-nhúng myup ló nyi ri." ga taí akô.

Haú hkûn, Yhang toq luí, laidun eq wuìlhêng pé lé tân kat jáng, haú pé gi, zim za dut ló byuq bê. ²⁵ Haú mù, Yesuq gi, "Nungmoq é lumjîng myit gi, hkâmá nghut akô lú?" ga luí, yhangmoq lé myí ri.

Yhangmoq kúm gi, gyuq maú byuq bùm kôluí, "Shí yuq gi, hkasû é byù nghut lhê là? Yhang hkunmó hkyó jáng, lài eq wuìlhêng pé lháng gyo byi ri-nhung!" ga luí, rayuq eq rayuq myí lhùm bum akô nghut ri.

*Nat Lé Hkat Htoq Byí É Hkyô
Mht 8:28-34; Mrk 5:1-20*

²⁶ Hau htâng, yhangmoq gi, Galile mau tû tap mâ é Gerase byu pé é mau má jé dap e ló bekô. ²⁷ Yesuq kong shut doq ló le, haú wâ mâ é nat gang dap é sù rayuq gi, Yhang lé hui ri. Haú yuq gi, yhúm má le a nyi é za, mebu a dap é, lupdùng má myáng myáng nyi nyi sù nghut ri. ²⁸ Haú yuq gi, Yesuq lé myàng jáng, wut garu luí, yhâng é hkyí wang má paí gop to mù, "Myhang htâng é Garaí Yhangzo Yesuq é, Náng gi, ngò eq haí séng lhê lú? Ngo lé a zing-ri râ matú, ngò nang lé dùng nyi lhê." ga luí, htê mó èq taí garu nyi ri. ²⁹ Hkâsu mù gâ le, Yesuq gi, agè ashop é nat lé haú yuq gùng mai htoq ló râ matú, tân pyám é yanmai nghut ri. Byù haú yuq lé nat gâng èq adàm dàm wang júng hkanmó, loq eq hkyí má toqjâng tuí èq tuí shung, kyum xâng tô é eq, zúng tô é nghut kôlháng, láng hpyit pyám pyám kut é htoq ago, nat gâng èq yhang lé yoso hkaú shut lêngmhap yù yù kut nyi ri.

³⁰ Yesuq gi, yhang lé, "Náng myîng haí gâ lhê?" ga myí kat é hkûn, yhang gi, "Legio* gâ lhê." ga tû taí ri. Haí mù gâ le, yhâng chyáng nat gang myo myo wang lúng tô é yanmai nghut ri. ³¹ Nat jùm gi, yhangmoq lé nik dik htúm é Lasang-dong shut a kôn kat râ matú, Yesuq lé chôm dùng nyi bum akô.

³² Haú u lé, waq rajùm mó gi, bùm yàm má dû but zô nyi bum akô nghut ri. Haú mù, yhangmoq gi, waq pé chyáng wàng nhâng laq ga, Yesuq lé ahkáng dum dung dung kut kojáng, Yesuq gi, yhangmoq lé ahkáng byi kat ri. ³³ Haú mù luí, nat gang jùm gi, byù haú yuq chyáng mai htoq ló kôluí, waq pé chyáng wàng byuq bekô nghut ri. Haú hkûn, waq haú jùm gi, gampyoq mai nhông hkaú shut rut din yán wang ló kôluí, myup shi byuq bekô nghut ri.

³⁴ Waq zúng bang gi, haú su dut é lé myàng jáng, hpanng din ló kômù, myuq hkaú mâ é bang eq awui ayàm mâ é bang lé ló taí kyô akô nghut ri. ³⁵ Haú mù, wó gyô é bang gi, haú hkyô lé wú

* **8:30** Legio gâ é lichyúm gi, gyezo 4000 eq 6000 gyoro bo é gyedap lé taí ri.

râ matú htoq lé lo akô. Yhangmoq gi, Yesuq chyáng jé lé kô é hkûn, nat gang htoq byuq hui sù, Yesuq é hkyî wang má mebu wut to luî, byù gè rayuq su zùng to lánng é lé myàng kômù, gyuq dan bùm bekô nghut ri. ³⁶ Nat dap sù lé hkâsu kut luî lhoq ge yu é hkyô lé myang é bang gi, góbang lé taî kyô akô nghut ri. ³⁷ Haú hkûn, Gerase byu pé é mau má é lhunghâng bang gi, gyuq dan dik kôluî, Yesuq lé yhangmoq é mau mai htoq ló byuq râ matú, chôm dúng tôngbán akô. Haú mù luî, Yesuq gi, taû ló byuq râ matú lhaî má wàng bê nghut ri.

³⁸ Nat htoq byuq huî é sù gi, Yesuq htâng cháng râ matú, Yesuq lé dúng tôngbán ri. ³⁹ Nghut kôhang, Yesuq gi, "Nàng, yhûm shut sheq ló mù, Garai Gasang, nang lé hkâ-í kut byi bê hkyô lé, ló taî kyo aq." ga luî, yhang lé ló nhâng bê nghut ri. Haú hkûn, yhang htoq ló mù, Yesuq yhang lé hkâ-í kut byi bê hkyô lé, haú wà rawà bang lé ló taî kyô ri.

Ya-iruaq É Yhangzo Byizô É Hkyô Eq, Yesuq É Bu Lé Lé Záng É Myiwe Rayuq É Hkyô

Mht 9:18-26; Mrk 5:21-43

⁴⁰ Ahkuî, Galile byu pé gi, Yesuq dum taû lò râ lé lánng nyî kô é nghut mù, Yhang dum taû gû dap lo é hkûn gabú myit eq lhom te yu akô. ⁴¹ Haú hkûn, Ya-iruaq gâ é tarajong má up sù rayuq gi, jé lé lô mù, Yesuq é hkyî wang má hkyihput htuq luî, yhang yhûm má lé râ matú ji nyi ri. ⁴² Hkâsu mù gâ le, raxe í zân bò bê é, yhangzo byizo te gi, shi ló nyi é yanmai nghut ri.

Haú mù, Yesuq cháng e ló le, shiwa byu pé gi, Yhang lé záng htung lo bum akô. ⁴³ Haú u lé, raxe í zân sui yuî luî ngunzè lhungháng ban pyám shoq chi sará pè chyáng yâ wú kôhang, hká yuq le a wó yâ gè byi é† myiwe myhí rayuq le haú hkaû má bo tô ri. ⁴⁴ Myiwe haú gi, Yesuq é nunghtáng

má huî lé mù, Yhâng é bushi htâng má é záng kat eq, sui yui é ana gi, ge byuq bê nghut ri.

⁴⁵ Haú hkûn, Yesuq gi, "Ngo lé, ó yuq záng bê lhú?" ga luî myi jáng, lhunghâng bang gi, a sé ga he nyi bùm kô é hkûn lé, Petruq gi, "Yhumsîng ê, shiwa byu pé gi, nang é lhinghkyuq mai nang chyáng chyin chyap wang lo bùm kô é yanmai, nang lé záng bekô râ nghut lhê?" ga taî ri.

⁴⁶ Yesuq gi, "Byù rayuq ngo lé lé záng mù, ngá chyáng má é hpungwup a-tsam htoq ló é lé, ngò cháng sé kat ri." ga taî ri.

⁴⁷ Haú jáng, myiwe myhí haú gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyî wang má ngóm gop kat luî, haî mù Yhang lé záng é hkyô eq, hká dong ge ló byuq é hkyô pé lé, shiwa byù banshoq bâng é hí má Yesuq lé taî kyô nyi ri. ⁴⁸ Yesuq gi, "Ngá zo ê, nang é lumjîng myit gi, nang lé lhoq gè byi bê nghut ri, ngón za ló aq hkoî!" ga luî, myiwe haú lé taî kat ri.

⁴⁹ Yesuq gi, dang ru taî nyi ashî hkûn, tarajong má up sù Ya-iruaq é yhûm mai byù rayuq jé lé lô luî, "Nung zo gi, shi byuq bê, haú sará lé hkâlhoq hkyik nyi lo." ga luî, Ya-iruaq lé taî kyô ri.

⁵⁰ Yesuq gi, dang haú lé wó gyo jáng, "Hkâgyuq, za lumjîng aq, haú jáng, yhang ge byuq râ nghut lhê." ga luî, Ya-iruaq lé taî ri.

⁵¹ Yesuq gi, Ya-iruaq é yhûm má jé é hkûn lé, Petruq, Yohan, Yakuq, eq haú myiwe zô é yhângnu eq yhângwa mai lai luî, yhûm haú má, ó lé le a wàng nhâng kut ri. ⁵² Haú u lé, lhunghâng bang zoshâng hau é yanmai, ngaubyi ngau-nhap eq yón nyi akô. Yesuq kúm gi, "Hkâ-ngaû kó, yhang shi byuq é a nghut, yhup myhí tô é sheq ru nghut lhê." ga luî, yhangmoq lé taî ri.

⁵³ Zoshâng gi, shi byuq bê lé yhangmoq sé kôluî, yhangmoq gi, Yesuq lé

† 8:43 Ngunzè lhungháng ban pyám shoq chi sará pè chyáng yâ wú kôhang, hká yuq le a wó yâ gè byi gâ é, Chyúmdang ra-am má gi, bo lhê; ra-am má gi, a bò.

wuizui kut pyám byí akô. ⁵⁴ Yhang kúm gi, myiwe zo hau é loq má zui to mù, "Zoshâng ê, toq aq." ga taí kat ri. ⁵⁵ Haú mù luí, yhâng woi-nyí dum taú wàng mù, haú hkûn jáng toq yap ri. Haú jáng, Yesuq gi, zoshâng haú lé zôjung byi keq, ga yhangmoq lé taí kat ri. ⁵⁶ Haú myiwe zô é yhângnu eq yhângwa nhik gi, gyai maú byuq akô. Nghut kôlhang, Yesuq gi, haú dut é hkyô ó lé le a taí kyo râ matú, yhangnhik lé taí hkûm tô ri.

9

Lagyo Raxe Í Yuq Lé Nhang Htoq Kat É Hkyô

Mht 10:5-15; Mrk 6:7-13

¹ Yesuq gi, haú lagyo raxe í yuq lé wut yù mù, nat gang banshoq lé wó hkat htoq pyám râ matú eq, noli nojàng wó lhoq gê râ matú, yhangmoq lé wum-o a-tsam eq ahko ahkáng byí ri. ² Hau htâng má, Garai Gasâng é mingdán hkyô hko kyo râ eq, nòhpyo lhoq gê byi râ matú nhang htoq kat ri. ³ Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htaí lhang hkâwûn hkâchûng kó. ⁴ Nungmoq hká yhûm má wàng kôlhang, haú wâ mai dum htoq ló é buinyi jé shoq, haú yhûm má za nyi nyi keq. ⁵ Nungmoq lé a lhom hap yu é bang lé gi, yhangmoq é wâ mai htoq ló é hkûn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaú lé yhangmoq é myoq hí má ko hkyô pyám to keq." ga taí kat ri. ⁶ Haú mù, yhangmoq gi, htoq e ló luí, wâ hkang wâ mó má haú gabú danglù hko kyo uchyang, hká jé hkâmá nòhpyo lhoq gê byí wún akô.

Herut Maú Úng-âng É Hkyô

Mht 14:1-12; Mrk 6:14-29

⁷ Haú su dut é hkyô banshoq lé, mauzau Herut wó gyô yù luí myit wui nyi ri. Hkâsu mù gâ le, ra-am gi, Yohan shi é mai dum dui toq lô bê ga, ⁸ ra-am gi, Eliyaq dum pô htoq lo ri ga, haú mai, ra-am gi, hí hpyang lhé

é myiqhtoi rayuq yuq dum dui toq lô bê ga luí, taí bùm kô é yanmai nghut ri. ⁹ Herut gi, "Yohan é ulhum lé, ngò hpyit pyám nhâng bê, nghut kôlhang, shí í wá taí byông bùm kô é gi, ó wá nghut lhé lhú?" ga luí, Yesuq lé myàng shoq ga ho nyi ri.

Byù Ngo Hkyîng Lé Yesuq Zoshuq Byi Tsô É Hkyô

Mht 14:13-21; Mrk 6:30-44; Yhn 6:1-14

¹⁰ Lagyô pé dum taú lo é hkûn, yhangmoq kut lai lo é hkyô pé, Yesuq lé taí kyô akô. Haú hkûn, Yesuq gi, yhangmoq lé shuí chûng mù, Betsaida gâ é wâ mó shut tsik za e ló byuq ri. ¹¹ Shiwa byu pé gi, haú hkyô lé châng sé kômù, Yhâng htâng châng e ló akô. Yesuq le yhangmoq lé lhom hap yù mù, Garai Gasâng é mingdán hkyô lé taí kyo luí, nòhpyo gè naú bang lé, lhoq gê byí ri.

¹² Buigyùm zó má, lagyo raxe í yuq gi, Yhâng chyáng huí ê mù, "Haú shiwa byu pé lé, awui ayàm mâ é yhûm pé eq wâ pé má ló mù, zoshuq hô zo luí ló yhup kó sháng gaq, ló nhâng aq. Hkâsu mù gâ le, ahkuí nganhung gi, yoso má nghut nyi ri." ga luí, Yhang lé taí akô.

¹³ Haú hkûn, Yesuq gi, "Nungmoq, yhangmoq lé rajung jung byi tso keq." ga tû taí ri.

Yhangmoq gi, "Shí myhô bang lé tso râ zoshuq a ê wui le gi, ngamoq chyáng muk-yo muk ngo long eq ngozo í du mai lai luí, haí le a wó nghut ri." ga taí akô. (Hkâsu mù gâ le, yuqgè wui baú lhang ngo hkyîng kô nghut ri.)

¹⁴ Nghut kôlhang, Yesuq gi, "Shí bang lé rahpúng má ngo xê xê kô kut luí, zùng nhang to keq." ga luí, Yhâng e chángzô pé lé taí ri. ¹⁵ Yhangmoq lé Yesuq taí é eq rajung za, banshoq bang lé zùng nhang to bekô. ¹⁶ Haú hkûn, Yesuq gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, haú lé ajap jap hpé luí, shiwa byu pé lé, châng to byi râ matú, Yhâng é

chángzô pé lé byi kat ri. ¹⁷ Haú hkûn, yhangmoq banshoq bang zô gyî bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsíng yu ashî kô nghut ri.

Yesuq Gi, Hkrisduq Nghut Lhé Ga Petruq Taí É Hkyô

Mht 16:13-28; Mrk 8:27—9:1

¹⁸ Radàm lé, Yesuq gi, Yhang baú kyûdung nyi é hkûn, chángzô pé le, Yhang eq rahá nghut akô. Hau htâng, Yhang gi, yhangmoq lé, "Shiwa byu pé gi, ngo lé ó yuq nghut lhê ga, taí akô lhú?" ga myí ri.

¹⁹ "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhê é myiqhtoi rayuq yuq dum dui toq lo é nghut ri ga, taí akô." ga luí, yhangmoq tú taí akô.

²⁰ Dum, Yhang gi, yhangmoq lé, "Nghut kôlhang, nungmoq gi, ngo lé ó yuq nghut lhê nghu akô lhú?" ga myí ri.

Haú hkûn, Petruq gi, "Nàng gi, Garai Gasang nhâng byí é Hkrisduq nghut ri." ga tú taí ri.

²¹ Shí hkyô ó lé le a taí kyo sháng gaq ga, Yesuq, yhangmoq lé taí hkûm pyâm ri. ²² Haú mù, Yhang gi, "Haú Byu Yhangzo gi, zing-rî é myo myo hui zo luí, suwún wuî, hkyangjong agyi pé, tarâ sará pé èq he-ngik pyâm é hui mù, sat pyâm é hui ra râ nghut lhê, hau htâng sum nyí nghû râ buinyi má, lhoq toq yu é hui râ nghut lhê." ga taí ri.

²³ Hau htâng, banshoq bang lé Yhang dum xoq taí é gi, "Ngá htâng cháng naú sù ó yuq nghut kôle, yhum-sing gùng yhumsing he-ngik pyâm mù, nyí wuî yhumsing é tapzîng lé waq chûng* luí, cháng ra râ nghut lhê.

²⁴ Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sum pyâm é sù kúm gi, asak hkyi yu é hui râ nghut lhê. ²⁵ Byù gi, mingkan gón lé wó sing to kôlhang, yhumsing

é asak woi-nyí sùm byuq é nghut le gi, yhang é matú, haí akyû bò râ lhú?

²⁶ Ngò eq Ngá é dang lé, lhom hap yù râ lé hoq é sù ó yuq lé le, haú Byu Yhangzo gi, yhumsing é hpungwup shingkang eq, Yhâng Wâ é hpungwup shingkang, haú chyoiyúng maumang lagyô pé é hpungwup shingkang èq jé lé é hkûn, hoq pyâm râ nghut lhê.

²⁷ Ngò, nungmoq lé teng za taí kôlé, shi má yap tô é bang ra-am gi, Garai Gasâng é mingdán lé a myang é za shî kó râ a nghut." gâ ri.

Mosheq Eq Eliyaq Yesuq Lé Hui Nyo É Hkyô

Mht 17:1-8; Mrk 9:2-8

²⁸ Dang haú taí é htâng, shit nyi kô nghut jáng, Yhang gi, kyûdung râ ga Petruq, Yohan, Yakuq pé lé shuí chûng mù, bùm shut doq ló ri. ²⁹ Kyû dung nyi le, Yesuq é myoqdong gi, ihpyô isâm htaí lò mù, Yhâng é mebu gi, lhap su duq bang lo ri.

³⁰ Haú hkûn, wú keq, Mosheq eq Eliyaq gi, hpungwup shingkang eq htoq lé lô luí, Yesuq eq dâng nyo lhùm nyi akô.

³¹ Yhangmoq gi, Garai Gasang myit tô é hkyô Yerusalem wà mó má Yesuq shî hkâm é dông mai dik lò râ nghut é hkyô lé taí lhùm nyi akô. ³² Petruq eq yhâng luzúm nhik gi, yhup muí nyi akô; nghut kôlhang, yhangmoq bûn lo é hkûn lé, Yesuq é hpung-wup shingkang lé le, Yhang eq rahá yap to su nhik lé le, myang kat akô.

³³ Haú nhik Yesuq chyáng mai gâng ló nyi é hkûn, Petruq gi, Yesuq lé, "Yhumsing ê, shí jowò má nga-nhúng nyi le ge ri, haú mù, Nàng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhum saí nhâng laq." ga taí kat kôlhang, yhang haí taí nyi é lé, yhang a sé.

³⁴ Petruq dang taí nyi ashî hkûn lé, mhut jé mù, yhangmoq lé htup zîng lo nyi ri. Mhut haú htup lo nyi é yanmai, yhangmoq gi, gyuq byuq akô. ³⁵ Haú mhut hkaú mai htoq lo é

* **9:23** Tapzîng lé waq chûng nghu é gi, Yesuq é yanmai jamjau huí é lé taí é nghut lhê.

htê gi, "Shí yuq gi, Ngá zo nghut lhê; Ngò hkyin yu é Sû le nghut lhê; Yhâng é dang gyo keq." gâ ri. ³⁶ Dang htê haû zim jáng, Yesuq yhang baú nyi tô é lé, yhangmoq myang akô. Yhangmoq myang é hkyô lé, buinyi haú bun haú yoq má, ó lé le a taî kyô é zim za nyi byuq akô.

Nat Gang Dap É Yuqgè Zo Rayuq Lé Lhoq Gê Byî É Hkyô

Mht 17:14-18; Mrk 9:14-27

³⁷ Hau htâng nyi, yhangmoq bùm haû mai gyó ló kô le, byù moq mó gi, Yesuq lé lhom te yu akô. ³⁸ Haú hkûn, byù hpúng haú mâ é byù rayuq wut garû htoq ló é gi, ³⁹ "Sarâ é, wú aq, ngá é zo te yuqzo gi, nat wang júng mù dân so dân loq garû lo lhê, guttsû gi, agut gut dut shoq langhtân nhang lo lhê kut mù, nat gi, yhang lé gyai myáng shoq zing-rî yù yù kut nyi ri. ⁴⁰ Nat haû lé hkat pyám byi kó laq nghû luî, Náng é chángzô pé lé ngò dúng wú kôlhang, yhangmoq a wó hkat pyám byi kó. Haû mù, ngá zo lé lhoq gê byi rá matú, ngò gi, nang lé gyai myit lum é eq dúng kat lhê." gâ ri.

⁴¹ Haû mù luî, Yesuq gi, "Lumjîng myit a bo é eq agè ashop é amyû pé é, Ngò gi, hkâ-myháng jé shoq nungmoq eq rahá nyi mù, wó jân nyi râ lúhú? Nung zo lé, shí shut shuî lé lô aq." ga tû taî ri.

⁴² Zoshâng haû, lé lo nyi le lhang, nat gang gi, yhang lé lhoq lhêng to mù langhtân nhang ashî. Yesuq kúm gi, haû agè ashop é nat lé tân kat luî, zoshâng haú lé lhoq gê byi mù, yhang wa lé dum ap byî ri. ⁴³ Nyi mi-nyî gi, Garai Gasâng é kô dik é hpungwup a-tsam lé maú hong nyi bum akô.

Lhunglhâng bang gi, Yesuq kut é muzó haû lé maú nyi bùm kô le, Yesuq gi, ⁴⁴ "Haû Byu Yhangzo gi, byu pé é loq má ap pyâm é hui zo râ nghut lhê. Dang shí hkun lé nungmoq é no má rago gyô wun to keq." ga luî, chángzô pé lé taî ri. ⁴⁵ Yhangmoq kúm gi, dang haú lé a sê gyo kó, hkâsu mù ga le, haû gi, yhangmoq é matú a sê gyo sháng gaq ga luî, nghop tô ashî

yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

Ó Yuq Gi, Kô Dik Sû Nghut Râ Lhú? Mht 18:1-5; Mrk 9:33-40

⁴⁶ Hau htâng, lagyô pé gi, hká yuq sheq, kô dik sù nghut lhê lhú ga, rayuq eq rayuq taî myíng myô lhùm nyi akô. ⁴⁷ Yesuq kúm gi, yhangmoq é unghkaû má myit nyi é hkyô lé sé byi luî, zoshâng rayuq lé shuî yù mù, Yhâng nàm má shap to luî, ⁴⁸ "Shî zoshâng lé Ngá é myíng mai hap sù ó yuq nghut kôle, Ngo lé hap yu é sù nghut bê; Ngo lé hap yù sù ó yuq nghut kôle, haû Ngo lé nhang kat é Sù lé hap yu é le nghut lhê. Haû mù luî, nungmoq banshoq má, je tiq sù gi, je ko sù nghut lhê." ga luî, yhangmoq lé taî ri.

⁴⁹ Haú hkûn, Yohan gi, "Yhumsîng ê, Náng é myíng lánng luî, nat gâng pé lé hkat pyám byî wún é byù rayuq lé, ngamoq myang ri. Yhang gi, ngamoq chyáng a lòm sù nghut é yanmai, yhang lé ngamoq hkûm pyâm é nghut lhê." ga taî ri.

⁵⁰ Yesuq kúm gi, "Yhang lé hkâhkúm kó, nungmoq é gyè hkyam shut a nyi sù gi, nungmoq é hkyam shut nyi sù nghut lhê." ga luî, yhang lé taî ri.

Samariq Wà Bang Yesuq Lé A Lhom Hap Yu É Hkyô

⁵¹ Ahkuî, Yesuq gi, Yhang lé mauhkûng shut shuî toq yû râ buinyi chyâng lò bê nghut mù, Yerusalem wà mó shut ê râ lé myit hpyit to luî, Yhâng é hí má lagyô nhang kat ri. ⁵² Lagyo haú bang gi, Yhâng matú râ é hkyô lajang lánng râ ga, Samariq wà rawà má wang ló akô. ⁵³ Nghut kôlhang, Yesuq gi, Yerusalem wà mó shut laî e ló é sù nghut é yanmai, haú wà bang gi, Yhang lé a lhom hap yù kó. ⁵⁴ Haú hkûn, lagyô Yakuq eq Yohan nhik gi, haû lé myàng jáng, "Yhumsîng ê, yhangmoq lé lhoq htên pyám râ matú, ngá-nhik mauhkûng mai myi wut hkyó le, a gè lúhú?" ga luî, Yesuq lé myî akô. ⁵⁵ Yhang kúm gi, lhing wú

luí yhangnhik lé, tân pyâm ri, ⁵⁶ haú mù luí, yhangmoq gi, gó wâ shut e ló byuq akô.

Yesuq É Htâng, Hkâsu Kut Cháng Râ Hkyô

Mht 8:19-22

⁵⁷ Yhangmoq haú hkyô má e ló kô le, byù rayuq gi, "Nàng hká e le hká ngò cháng râ." ga luí, Yesuq lé taí ri.

⁵⁸ Yesuq gi, haú yuq lé, "Wamhkuí pé gi, hkyûng wó akô, nghoq pé le, nghoqsut wó akô. Nghut kôlhang, haú Byu Yhangzo gi, ulhum to jang lháng a wó é nghut ri." ga taí pyám ri.

⁵⁹ Dum rayuq lé, "Ngá htâng cháng aq." ga taí jáng, haú yuq gi, "Yhumsîng ê, ngá wa lé, ló yhûm pyám râ ahkáng hí byi shi laq." ga taí ri.

⁶⁰ Yesuq gi, yhang lé, "Shí bê bang† gi, shí bê bang yhangchang yhûm lhum kó sháng gaq; nghut kôlhang, nàng gi, Garai Gasâng é mingdán hkyô lé, ê hko kyo aq." ga taí ri.

⁶¹ Byù rayuq dum, Yhang lé, "Yhumsîng ê, ngò le náng htâng cháng râ, nghut kôlhang, ngá yhumbyù lé hí hkyang ló shit to râ ahkáng byi shi laq." ga taí ri.

⁶² Yesuq gi, "Yò hpuq li zui mù htâng shut lhing wú sù ó yuq nghut kôlhang, Garai Gasâng é mingdán eq a gíngdán." ga luí, yhang lé taí ri.

10

Yesuq, Chángzô Pé Nyhit Xê Yuq Lé, Nhang Htoq Kat É Hkyô

¹ Hau htâng má, Yhumsîng gi, gotú chángzô pé nyhit xê yuq* lé hkyin yù mù, Yhang e ló râ wà eq jowò hkangmó shut í yuq razúm zúm kut luí, Yhâng é hí má ê nhang kat ri.

² Yesuq gi, yhangmoq lé, "Kyô† shù yù râ myo shoq joq kôlhang, mù zui râ byù gi, shaú nyi ri. Haú mù, haú kyô Yhumsîng lé, Yhâng é kyô yò má, kyô shu byù‡ myo myo nhâng byi râ

matú, dung keq. ³ Nungmoq e ló keq! Wamhkuí hpúng má nhang hâng kat é sau zô pé lé su, Ngò, nungmoq lé nhang kat é nghut lhê. ⁴ Ngùn htung eq, etap, hkyî-tsung pé hkâyú chùng kó, hkyô má ó lé le hkâshichyên kùn nyi kó.

⁵ Nungmoq gi, hká yhûm má wàng e ló kô le, 'Shi yhûm nguingón nyi sháng gaq.' nghû luí, hí taí keq. ⁶ Haú yhûm má nguingón hkyô eq gíngdán sù nyi é nghut le gi, nguingón hkyô haú gi, haú yuq é ahtoq má joq to râ nghut lhê. Haú a nghut jáng, nguingón hkyô haú gi, nungmoq chyáng dum taú lo byuq râ nghut lhê. ⁷ Haú yhûm má nyi to mù, yhangmoq haí byi le haí zo haí shuq keq; hkâsu mù gâ le, mù zui sù gi, zuihpau wó yû gíng lhê; haú mù, nungmoq rayhum htâng rayhûm hkâhtot nyi wún kó.

⁸ Nungmoq hká wà má wang ló kôlhang, yhangmoq lhom hap yù kô é nghut le gi, nungmoq é hí má yhangmoq htung to byi é zoshuq lé, zo keq, shuq keq. ⁹ Haú mâ é nò bang lé lhoq gê byi mù, 'Garai Gasâng é mingdán gi, nungmoq eq chyâng lò bê nghut ri.' nghû luí, yhangmoq lé taí kyo keq. ¹⁰ Nghut kôlhang, nungmoq hká wà má wang ló kô le, yhangmoq a lhom hap yu é nghut le gi, haú wâ mâ é hkyô mó má htoq ê mù, ¹¹ 'Ngamoq é hkyî má dap tô é nungmoq wà mâ é hpuilhaú lháng, nungmoq lé hkyang pú tsô nyi râ matú ngamoq ko hkyô pyâm to byi bê. Nghut kôlhang, Garai Gasâng é mingdán gi, chyâng lò bê hkyô lé, sé to keq.' nghû luí taí keq. ¹² Ngò, nungmoq lé taí kôlé, haú buinyi§ lé, haú wâ gi, Sodom wà htoq má je hpuzo râ nghut lhê.

¹³ Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumhá pé lé, Turuq myuq eq Sidun myuq má kut shit é ru

† **9:60** Shí bê bang gâ é gi, woi-nyí má shi to bang lé gâ lhê. * **10:1** Chyúmdang ra-am má gi, chángzo nyhit xê í yuq ga le kâ tô ri. † **10:2** Kyô nghû é gi, Yesuq lé lumjîng naù kôlhang taí kyo râ bang a nyi luí láng tô é bang nghut ri. ‡ **10:2** Kyô shu byù nghu é gi, Yesuq é hkyô gabú danglù lé taí kyo bang nghut ri. § **10:12** Haú buinyi gâ é gi, Garai Gasâng tará jéyáng é buinyi lé gâ lhê.

nghut le gi, yhangmoq, noq noq mai myit lhing mù, jimê tú wut lhê, myiwap kyaq gyûn lhê kut zung ngûng to bekô râ nghut lhê. ¹⁴ Haû mù, tarâ jéyáng é nyí jé jáng, nungnhik gi, Turuq myuq eq Sidun myuq htoq má je hpuzo* kó râ nghut lhê. ¹⁵ Dum mù, Kaperna-um wà nàng ê, nàng gi, mauhkûng jé shoq waq toq é hui râ lhú? A nghut, mosumhkung má sheq gyó râ nghut lhê." ga taí ri.

¹⁶ Hau htâng má, chángzô pé lé dum xoq taí é gi, "Nungmoq é dang gyo sù gi, ngá é dang gyo sù le nghut bê; nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê." gâ ri.

Nyhit Xê Yuq Dum Taû Jé Lo É Hkyô

¹⁷ Hau htâng, haû chángzo nyhit xê yuq gi, gabú myit eq dum taû lò mù, "Yhumsîng ê, náng é myîng lé lang jáng, nat gâng pé lháng ngamoq é dang lé gyô bum akô." ga taí akô.

¹⁸ Haû su ga taí kôjáng, Yesuq tú taí é gi, "Tsadán gi, mauhkûng htoq mai lhap hpyat é su byit gyó lo é lé ngò myang kat bê. ¹⁹ Wú keq! Ngò gi, nungmoq lé, lhangmuì eq gogok pé lé wó nang râ eq gumlau gyè pé é wum-o a-tsam banshoq lé wó ûng râ ahko ahkáng lé byi bê nghut mù luí, hai eq le nungmoq lé wó lhoq hten râ a nghut lo. ²⁰ Nghut kôlhang, nat pé nungmoq é dang gyô é lé za hkâgabú nyí kó, mauhkûng htoq mâ é asak jihpán laiká buk má nungmoq é myîng bo to bê lé sheq gabú nyí keq." ga taí ri.

²¹ Haû u lé, Yesuq gi, Chyoiyúng Woi-nyí má gabú é myit byíng lô mù, "Mauhkûng eq myigung é Yhumsîng, Áwa ê, Nàng gi, haû pé lé, hpaqchyí byéng-yá bò bang eq myit hpaqchyí sé bâng é hí mai haq nghop to luí, zoshâng wuì lé tûn shit bê nghut é yanmai, Ngò, Nang lé hkya-ôn lhê ô.

Nghut bê, Áwa ê, haû gi, Nàng ô nau é hkyô nghut ri.

²² Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang mai lai luí ó le a sé; Áwa ó nghut é lé le, haû Zo eq haû Zo mai sé nhâng râ matú hkyin yu é bang mai lai luí, ó a sé." ga taí ri.

²³ Hau htâng má, Yhâng é chángzô pé shut lhing wú luí, yhangmoq lé baú za haq taí kat é gi, "Nungmoq byu-myàng é hkyô pé lé, myang é myoq pé gi, hkungsô wó nyi ri. ²⁴ Hkâsu mù gâ le, Ngò, nungmoq lé taí kôlé, nungmoq wó myàng, wó gyô é pé lé, myiqhtoí pé eq hkohkam pé myo myo gi, myàng naù gyo naù kôlhang, a wó myàng, a wó gyo kó nghut ri." ga taí ri.

Gè É Samariq Byù

²⁵ Haû hkûn, wú keq, tarâ sará rayuq gi, toq luí, Yesuq lé, "Sarâ ê, ahtum abyuq é asak lé wó yû shoq, ngò hkâsu kut râ râ lhê lhú?" ga luí, Yhang lé myí chyam wú ri.

²⁶ Yesuq gi, "Mosheq é tarâ má hkâsu ga kâ tô ri lhú? Nàng haû lé hkâsu nghap yu nyi lhê lhú?" ga luí, yhang lé myí ri.

²⁷ Haû yuq gi, "Haû Yhumsîng náng é Garai Gasang lé, náng é myit nhikhum banshoq, náng é asak woi-nyí lhum gón, náng é wum-o banshoq, náng myit é hkyô banshoq eq, chyitdap râ lhê; * 'náng gûng lé nàng chyitdap é su, náng é chyangnâm mâ é bang lé le chyitdap aq. *" ga tú taí ri.

²⁸ Yesuq gi, "Nàng tú taí é dang jô ri; haû su yhang kut aq, haû jáng nàng gi, asak duì râ nghut lhê." ga yhang lé taí ri.

²⁹ Nghut kôlhang, haû yuq gi, yhâng gungdu dingmán é lé, tûn shit naù luí, "Ngá é chyangnâm mâ é sù gi, ó yuq nghut lhê lhú?" ga luí, Yesuq lé myí ri.

³⁰ Yesuq tú taí é gi, "Byù rayuq gi, Yerusalem wà mó mai Yeriho wà

* **10:14** Nungnhik je hpuzô é hkyô gi, mauhpo kumlhá myo myo myang é nghut kôlhang, myit a lhing kô é yanmai nghut ri. * **10:27** Tarâ Pun 6:5 * **10:27** Nhung 19:18

shut gyó ló le, damyaq eq htông huí ri. Damyaq haú bang gi, yhâng é mebu pé lé hkyut shang pyám byi kôluí, rayúm gyut shoq bat nha mù, aluq shoí shí jáng sheq tô pyám to kôluí ló byuq bekô. ³¹ Haú u lé, hkyangjong rayuq gi, haú hkyô mai laí âng ló le, haú damyaq hui sù lé myàng jáng, koi laí ló byuq ri. ³² Haú eq rajung za, Lewiq rayuq le, haú mai laí ló é hkûn, haú yuq lé myàng jáng, koi laí ló byuq ri. ³³ Nghut kôlhang, Samariq byù rayuq le, haú mai laí ló é hkûn, haú yuq leq tô é lé myàng jáng, wú shogyo luí yhâng chyáng huí é mù, ³⁴ yhâng é dâm má, xù eq tsibiyiq wíng shoq gyun luí, rago za htup byi mù, yhâng é logúng má, haú yuq lé bún ke luí, bing-yhûm ralhùm má jé shoq shuí ló mù, gôn lajang byí ri. ³⁵ Htang nyí lé, yhang gi, haú bing-yhûm yhumsing lé ngùn Denari í chap shê byi mù, taí é gi, 'Shí yuq lé wú lajang byi laq, yhâng gùng má nàng myo chung záng é banshoq lé ngò dum taú lò jáng, lo xap râ.' gâ ri." gâ ri.

³⁶ Hau htâng, tarâ sará lé, "Nàng gi, byù haú bang sum yuq má damyaq hui sù é chyangnâm mâ é dông nghut sù gi, hká yuq nghut râ su ngam ri lhú?" ga luí, Yesuq myí ri.

³⁷ Haú tarâ sará gi, "Haú yuq lé shogyo sù nghut ri." ga taí ri.

Yesuq gi, "Nàng le haú dông ló kut aq." ga luí, yhang lé taí kat ri.

Mariq Eq Mahtaq Nhik Chyáng Yesuq Ê Jé Ê Hkyô

³⁸ Ahkuí, Yesuq eq Yhâng é chángzô pé hkyô xoq sô e ló kô le, wà rawà má jé wang ló é hkûn, Mahtaq gâ é myiwe rayuq gi, Yesuq lé yhâng yhûm má lhom te yu ri. ³⁹ Mahtaq gi, Mariq gâ é yhanggu myiwe zo rayuq wó ri. Mariq haú gi, Yhumsing Yesuq é hkyí wang má zung to mù, Yhang mhoqshít é dang lé gyô nyi ri. ⁴⁰ Mahtaq kúm gi, saí tso saí huq é amû myo luí, gyin bûn nyi ri. Haú mù luí, yhang huí é mù, "Yhumsing ê, ngá gu gi, saí tso saí huq é amû má, ngo lé baú za rap kut tô é lé, nàng a bo myàng

byi lhú? Ngo lé, lé garúm sháng gaq, yhang lé taí byi laq." ga luí, Yesuq lé taí ri.

⁴¹ Haú hkûn, Yhumsing gi, "Mahtaq, Mahtaq, nàng gi, muzó lé za ma nyi mù, myit myo myit chiq é huí nyi ri.

⁴² Nghut kôlhang, je ahkyak é hkyô gi, rahkat za nghut lhê. Mariq kúm gi, haú je ge é hkyô lé hkyin yù bê nghut ri. Haú lé yhâng chyáng mai wó yu pyám byi râ a nghut." ga luí, yhang lé tû taí ri.

11

Yesuq Mhoqshít Ê Kyûdung Dang Mht 6:9-13; 7:7-11

¹ Ra-nyí lé, Yesuq gi, jowò rawò má kyûdung nyi ri. Yhang kyû ban dung jáng, Yhâng é chángzo rayuq gi, "Yhumsing ê, Yohan gi, yhâng é chángzô pé lé kyûdung râ hkyô mhoq byí é su, ngamoq lé le mhoq byi laq." ga Yhang lé taí ri.

² Haú hkûn, Yhang gi, "Nungmoq kyûdung le,

'Mauhking htoq tsáng myhâng mâ é ngamoq é Áwa ê,

Náng é myìng gi, chyoiyúng nyí sháng gaq.

Náng é mingdán jé lô sháng gaq.

³ Ngamoq nyí wuí râ é zoshuq lé, ngamoq lé nyí wuí byi laq.

⁴ Ngamoq lé shut é byù banshoq bâng é mara lé, ngamoq hkyut pyám byí é yanmai, ngamoq é mara lé le hkyut pyám byi laq.

Ngamoq lé, agúng alaú hkyô má hkâwâng nhâng.'

ngû keq." ga luí, yhangmoq lé mhoqshít ri.

⁵ Yesuq yhangmoq lé dum taí é gi, "Dangké, nungmoq chyáng mâ é rayuq sù gi, buinùm wó é ngû sháng, yhang gi, gunggàm yoq má haú yuq chyáng ê luí, 'Buinùm hpó ê, ngo lé muk sùm long byam chyí byí kat laq,

⁶ haí mù gâ le, ngá buinùm rayuq byin we mai ngá chyáng jé nyi tô ri. Ngò gi, yhang lé byi tso râ haí le a joq byam dut tô ri.' ga taí é hkûn, ⁷ yhúmhaú shut mâ é sù gi, 'Ngo lé, hkâlé lhoq

hkyik lo, hkum le myhî pyám bê, ngá zoshâng wuì le ngò eq rahá yhupjang má yhup to bekô. Ngò, nang lé haì le a wó toq yû byi lo.' ga tu kat ri. ⁸ Ngò, nungmoq lé taí kôlé, buinùm nghut é yanmai za gi, muk a kâm toq byi lo kôlhang, zuq zuq dúng nyi é yanmai, haú yuq lé, yhang ra châ é banshoq toq yû byi râ nghut lhê.

⁹ Haú mù, ngò, nungmoq lé dum taí kôlé, dung keq, haú jáng, nungmoq lé byi râ nghut lhê; hô keq, haú jáng, nungmoq myàng kó râ nghut lhê; hkum má kok keq, haú jáng, nungmoq lé hpóng byi râ nghut lhê. ¹⁰ Hkâsu mù gâ le, ó yuq nghut kôlé, dung sù wó râ; hô sù myàng râ; hkum kok sù lé gi, hpóng byi râ nghut lhê.

¹¹ Nungmoq îwâ pé má, ó yuq wá, yhumsing yhangzo muk dúng le, luq-gok byi kó râ lhú? Ngozo dúng le, lhangmuì byi kó râ lhú? ¹² Woq-ú dúng le, gogok byi kó râ lhú? ¹³ Agè ashop é bang nungmoq lhang gi, nungmoq é zo wuì lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é Îwa gi, Yhang lé dúng é bang lé, je riyhang haú Chyoiyúng Woi-nyí byi râ nghut lhê." ga taí ri.

Mara Hûn É Dang Lé Yesuq Tú Taí É Hkyô

Mht 12:22-30, 43-45; Mrk 3:20-27

¹⁴ Radàm lé, Yesuq gi, byù rayuq lé dang a wó nyô shoq kut tô é nat gang lé, haú yuq chyáng mai hkat htoq pyâm ri. Nat haú htoq ló byuq é htâng má, dang a wó nyô sù gi, dang wó nyo nyi é yanmai, byù moq mó gi, chômaú byuq bum akô. ¹⁵ Nghut kôlhang, yhangmoq chyáng mâ é ram gi, "Yhang gi, nat gâng pé é zau Bezebulaq é wum-o a-tsâm eq za, nat gâng pé lé wó hkat pyâm é nghut ri." ga taí bum akô nghut ri. ¹⁶ Ra-am le,

Yhang lé, mauhkûng mâ é kumlhá tûn shit wú laq ga dúng chyam wú akô.*

¹⁷ Yesuq kúm yhangmoq myit nyi é hkyô lé sé mù taí é gi, "Ikun byoq é mingdán hká lhum nghut kôlé, hten byuq râ za nghut lhê; haú eq rajung za, ikun byù yhangchang rayuq eq rayuq byoq lhùm é yhùm htu gi, byoq gâng lhum râ za nghut lhê. ¹⁸ Nat pé le yhangmoq yhangchang byoq gâng lhùm nyi kô é nghut le gi, Tsadán é mingdán gi, hkâsu kut wó gîng to râ lhú? Ngò isu nghu taí é gi, nungmoq ngo lé Bezebulaq é wum-o a-tsâm eq za, nat gâng pé lé hkat pyâm ri ga kô é yanmai nghut lhê. ¹⁹ Ngò gi, Bezebulaq é wum-ô eq za, nat gâng pé lé hkat htoq é nghut jáng, nungmoq é chángzô pé gi, ó yuq é wum-o a-tsâm eq za, nat gâng pé lé hkat pyâm kô é nghut lhê lhú? Haú mù luì, yhangmoq gi, nungmoq lé jéyáng é bang dut bekô râ nghut lhê. ²⁰ Nghut kôlhang, Ngò gi, Garai Gasâng é wum-ô eq nat gâng pé lé hkat htoq pyâm é nghut jáng, Garai Gasâng é mingdán† gi, nungmoq chyáng jé bê nghut ri.

²¹ Wum-o bo é sù rayuq gi, yhâng é yhùm lé, shâm, lhâm chûng luì zúng tô é nghut jáng, yhâng é sutzè pé gi, rago za wó joq to râ nghut lhê. ²² Nghut kôlhang, yhâng htoq wum je bo é sù lé luì, haú yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyâm byi luì, yhâng é sutzè pé lé, gam yu pyâm byi râ nghut lhê.‡

²³ Ngá hkyam shut a dap sù gi, Ngo lé gyè kut sù nghut lhê. Ngò eq rahá a shuì tsing sù gi, lhoq pyo pyâm é sù nghut nyi ri.

²⁴ Haú agè ashop é nat gi, byù rayuq chyáng mai htoq ló mù, kyuq huì é jowò pé má sô yông e ló luì, no râ jowò hkat ho wú le, a myang hô nghut ri. Haú hkûn, yhang gi, 'Ngò nyi laì lo é yhùm má dum taú ló wú râ.' ga taí ri.

* **11:16** Byu pé gi, Yesuq lé Garai Gasang nhang kat é hkyô lé saksé myàng naù luì, mauhpo kumlhá dúng nyi akô. † **11:20** Garai Gasâng é mingdán gâ é gi, byù htoq má le, nat htoq má le, Garai Gasâng yhang uphkan é lé gâ é nghut lhê. ‡ **11:22** Haú eq rajung za, Yesuq gi, Tsadán lé zân ùng bê nghut é yanmai, agè ashop é nat pé lé byu pé chyáng mai, wó hkat pyâm bê nghut ri.

²⁵ Yhang dum taû jé ló wú le, yhûm haû gi, shum pyám mù san za rago dut to lánq é lé ló myang ri. ²⁶ Haû jáng, yhang gi, dum taû é mù, yhang htoq je wuî é nat nyhit nat lé shuî lò luî, haû má lo wàng nyi to bekô. Haû mù, haû yuq é nyi yap sâmlai gi, hí lhê htoq má je wuî lò bê nghut ri." ga taî ri.

²⁷ Haû su ga, Yesuq taî nyi é hkûn, haû shiwa hpong mâ é, myiwe zo rayuq htê mó o mó èq Yhang lé taî é gi, "Nang lé wun é ûng wam eq nàng shuq é nauwang gi, hkungsô wó nyi ri ô!" gâ ri.

²⁸ Yesuq gi, "Garai Gasâng é mung-dang gyô yù luî châng kut é bang gi, je riyhang hkungsô wó kó râ nghut lhê." ga taî ri.

Mauhpo Kumhá Lé Dung Kô É Hkyô

Mht 12:38-42; Mrk 8:12

²⁹ Shiwa byu pé jat myô zup zîng lo é hkûn lé, Yesuq taî é gi, "Shí ipyat lhê é byu pé gi, agè ashop é bang nghut akô. Yhangmoq gi, limik kumhá dîng nyi bùm kôhang, Yonaq é kumhá mai lai luî, gotû haî le tûn shit râ a nghut. ³⁰ Yonaq gi, Ninewe wà byu pé hí má kumhá§ dut é su, haû Byu Yhangzo gi, shí pyat lhê é byu pé hí má, kumhá dut râ nghut lhê. ³¹ Maupyî mâ é hkohkâm myhí gi, maumyî ló htâng é mai lé lô mù, Sholumon é hpaqchyî dang lé, lé gyô yù bê nghut mù, haû tarâ jéyáng é buinyi má, shí ipyat mâ é byu pé eq rahá toq lô luî, yhangmoq lé mara hûn râ nghut lhê. Wú keq, Sholumon htoq ko sù gi, ahkuî shí má jé nyi to bê. ³² Ninewe wà byu pé gi, Yonaq, mung-dang hko kyô é hkûn myit lhîng kô é nghut mù, tarâ jéyáng é buinyi má, shí ipyat eq rahá toq lô luî, yhangmoq lé mara hûn kó râ nghut lhê. Wú keq,

Yonaq htoq ko sù gi, ahkuî shí má jé nyi to bê.

Myibung Su Duqbó Râ Hkyô

Mht 5:15; 6:22-23

³³ Myibung lé tuq mù go pyâm é jowò má tô tô é le, mûng eq nghop tô é le, ó a kut wú kó. Nghut kôhang, wang lé lô bang myoq wó myâng râ matú kúm gi, tsungjang má tsung to to chyat kut akô. ³⁴ Náng é myoq gi, náng gungdû é myibung* nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê. Nghut kôhang, náng myoq a ge é nghut le gi, náng é gungdu gón gi, mauchut tuq dut nyi râ nghut lhê. ³⁵ Haû mù, náng chyáng bo é maubó gi, mauchut byuq é, a chut byuq é lé wú nyi aq. Náng lumjîng é hkyô eq nàng myit é hkyô gi, mauchut tuq a dut sháng gaq, sidiq nyi aq. ³⁶ Náng é ragûngdu gón má duqbó é nghut le gi, rawò má le mauchut é jowò a joq é za, myibung nang lé duqbó byi nyi é su, náng gungdu gón má duqbó nyi râ nghut lhê." ga taî ri.

Hparishe Pé Eq Tarâ Sará Pé Lé, Yesuq Mara Hun É Hkyô

Mht 23:1-36; Mrk 12:38-40; Luk 20:45-47

³⁷ Yesuq haû su ga ban taî é htâng má, Hparishe rayuq gi, yhang eq zang rahá zo râ matú, Yesuq lé jî ri. Haû mù, Yesuq gi, haû yhûm má wang ê mù zang zo râ ga sibôî nàm má zung tô ri. ³⁸ Nghut kôhang, Hparishe wá gi, zang zo râ hí má Yesuq loq a chí é lé, myàng luî maú nyi ri.†

³⁹ Haû mù luî, Yhumsîng Yesuq yhang lé taî é gi, "Nungmoq Hparishe pé gi, góm eq zanghkoq lé ahtoq shut za chí yúng nyi kômù, nungmoq é unghkaû má gi, lú zo lú shuq é eq agè ashop é hkyô pé byíng zan tô ri. ⁴⁰ Byù bâm pé ê, ahte‡ lé le, ahtoq§ lé le, saí

§ **11:30** Kumhá gi, Yonaq, ngozô wamdaui má sum nyi lúng é su, Yesuq le, shí bê mai sum nyi ngû ra nyi má, dum dui toq lô râ hkyô lé taî nau é nghut ri. * **11:34** Myibung gâ é gi, tengmán é mungdang lé wó sê yu é a-tsam lé, taî é nghut ri. † **11:38** Yudaq htûng tarâ má gi, zang a zo shi má loq chi râ lhê. ‡ **11:40** Ahte gâ é gi, i-myit unghkaû lé taî ri. § **11:40** Ahtoq gâ é gi, gungdu lé taî ri.

sù gi, Garai Gasang rayuq za nghut é lé, a sé kó lú? ⁴¹ Nghut kôlhang, ahte má bo é zè pé lé, ra châ é bang lé byí pyám keq; haú hkûn, nungmoq é matú banshoq gi, sân-yúng lô râ nghut lhê.

⁴² Hparishe pé ê, nungmoq gi, dingnyé wó ri, hkâsu mù gâ le, nungmoq gi, gau-tsáng, shingtón pé eq zangxun mhan-haq ajù jù mâ é, xê gambùm ragambùm lé gi, Garai Gasang lé byi nyi kômù, tarâ dingmán é hkyô eq Garai Gasang chyitdap é hkyô lé gi, lhai pyâm tô akô. Xê gambùm ragambùm byí é lé le cháng luí, tarâ dingmán é hkyô eq Garai Gasang lé chyitdap é hkyô lé le, kut nyi râ lhê.

⁴³ Hparishe pé ê, nungmoq gi, dingnyé wó ri, hkâsu mù gâ le, tarajong pé mâ é ahkyak dik é zùng jang pé lé le, gài pé má hkunggâ é èq shichyên é dang lé le, nungmoq ô nau nyi bum akô.

⁴⁴ Nungmoq gi, dingnyé wó ri, hkâsu mù gâ le, nungmoq gi, ahkô a dong lo mù, byu pé a sé luí, ahtoq mai sô lai é lupdùng eq du akô." ga tai ri.

⁴⁵ Haú hkûn, tarâ sará rayuq gi, "Sarâ ê, nàng haú su gâ é gi, ngamoq lé le rhoi lhôm nyi é nghut bê." ga Yhang lé tú tai ri.

⁴⁶ Haú su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gâ le, nungmoq gi, byu pé lé, wùn waq râ wuí é noqkuq htung tarâ wòlai lé wùn nhâng luí, yhumsing yhang gi, wò haú lé loqnyhuí èq lhang, a bo záng wú kó nghut ri.

⁴⁷ Nungmoq gi, dingnyé wó ri, hkâsu mù gâ le, nungmoq gi, nungmoq é íchýí îwâ pé sat pyâm é myiqhtoí pé é lup lé luptsuq tsuq akô.

⁴⁸ Haú mù luí, nungmoq gi, nungmoq é íchýí îwa pé é muzó lé, myit bo huí é bang nghut nyi akô. Hkâsu mù gâ le, yhangmoq gi, myiqhtoí pé lé sat pyám mù, nungmoq gi, lup haú pé lé luptsuq tsuq akô. ⁴⁹ Haú mù luí, Garai Gasang, Yhâng é hpaqchyí byéng-yá mai tai é gi, 'Myiqhtoí pé eq lagyô

pé lé, ngò yhangmoq chyáng nhang kat râ nghut lhê; haú bang mâ é ram lé gi, yhangmoq lhom sat pyám mù, ra-am lé gi, zing-ri kó râ nghut lhê.' gâ ri. ⁵⁰ Haú su mù luí, mau htoq xâng hkûn lhê é, Abelaq é sui mai, hkungga gyap eq noqkuq yhùm gyoro má sat pyám huí é Zakhariq é sui jé shoq, shun pyâm é myiqhtoí pé é sui banshoq bâng é manglat gi, shí pyat mâ é byu pé lé hùn râ nghut lhê. ⁵¹ Ngò, nungmoq lé tai kôlé, manglat haú pé lé gi, shí pyat mâ é byu pé lé, gè gè yhang hùn râ nghut lhê.

⁵² Tarâ sará pé ê, nungmoq gi, dingnyé wó ri, hkâsu mù gâ le, nungmoq gi, byu pé Garai Gasang lé sé ra zoqshi lé yu pyám byi kômù, yhumsing yhang le a sé, sé naú bang lé le, hkûm zing tô akô nghut ri." ga tai ri.

⁵³⁻⁵⁴ Yesuq haú mai htoq ló é hkûn, tarâ sará pé eq Hparishe pé gi, Yhang lé gyè kut mù, Yhâng é dang má mara wó myâng shoq ga, wuí é dangmyi myo myo myi luí, gyám wú nyi akô nghut ri.

12

Gegùn Labyoq Kut É Bang Lé Sidiq Râ Hkyô

Mht 10:28-33; 12:32; 10:19-20

¹ Haú u, byù hkyîng mun zup zîng lò mù, rayuq eq rayuq lhang záng nâng lhum shoq dut nyi é hkûn, Yesuq, Yhâng é chángzô pé lé tai hi é gi, "Gegùn labyoq kut é Hparishe pé é múnchi lé koi sidiq pyám keq. ² A byông htoq loshoq wó zaú nghop tô é, hai le a joq râ nghut lhê; a sé loshoq wó haq tô é le, hai a joq râ nghut lhê. ³ Haú mù luí, nungmoq, mauchut hkaú má haq tai é dang banshoq lé, myoq myàng maubó má wó gyô bùm kó râ nghut lhê. Gok hkaú má, dangsoq soq é lé le, yhumhkûng htoq mai tai pyo bùm bekô râ nghut lhê.

⁴ Ngá buinùm wuí ê, Ngò, nungmoq lé tai kôlé, gungdu lé za wó sat pyám mù, woi-nyí lé hai le a wó kut é bang lé, hkâgyuq kó. ⁵ Nghut kôlhang,

nungmoq ó lé za gyuq râ é lé gi, Ngò, nungmoq lé taí kyo kôlé, gungdu lé sat pyâm é htâng má, woi-nyí lé ngaraí ming shut wó hkyô kat pyâm é a-tsam wó sù lé kúm gi, gyuq keq. Nghut bê, Ngò, nungmoq lé taí kôlé, haú yuq lé za, gyuq nyí keq. ⁶ Johkyáng ngo du lé, gyi htingchap í chap èq wó ùng pyâm lhê a nghut kó lhú? Haú johkyáng radu lé lháng, Garai Gasang gi, tô-myhí pyâm é a nghut. ⁷ Garai Gasang gi, nungmoq é ulhum má é xâm banshoq lé lháng, nghap to gù nghut lhê. Haú mù, hkâgyuq kó; nungmoq gi, haú johkyáng myo myô htoq má lháng gù je bo é bang nghut lhê.

⁸ Ngò, nungmoq lé taí kôlé, byu pè hí má Ngo lé lhom yín yu é sù ó yuq nghut kôle, Garai Gasâng é maumang lagyô pè é hí má, haú Byu Yhangzo gi, haú yuq lé lhom yín yû râ nghut lhê. ⁹ Nghut kôlhang, byu pè é hí má Ngo lé he-ngik pyâm é sù lé chyaú gi, Garai Gasâng é maumang lagyô pè é hí má, he-ngik pyâm râ nghut lhê. ¹⁰ Haú Byu Yhangzo lé dang dông shut é sù gi, mara hkyut byí é wó hui ra nghut lhê; nghut kôlhang, haú Chyoiyúng Woi-nyí lé rhoí dang taí pyâm é sù gi, mara hkyut byí é hui râ a nghut.

¹¹ Byu pé nungmoq lé jéyáng râ matú tarajong pé má le, agyi suwún wui eq ahkáng ayá wó bâng é hí má le, shuí e ló kô é hkûn, hkâsu kut râ lé le, hkâsu nghú tû taí râ lé le, hkâmyit chiq kó. ¹² Hkâsu mù gà le, haú u lé yhang, Chyoiyúng Woi-nyí gi, nungmoq hkâsu taí râ hkyô lé mhoqshit byi râ nghut lhê." ga taí ri.

Hpaqchyí A Bo É Sahtê Hpó Lé Dangtú Yu É Hkyô

¹³ Haú hkûn, shiwa hpúng hkaú mai, byu rayuq gi, "Sarâ ê, ngá-nhik tâng wó é muizè pé lé chôm gam lum râ matú, ngá mang lé bo taí byi laq." ga luí, Yesuq lé taí ri.

¹⁴ Yesuq gi, "Byù nàng ê, nungnhik tang ahtoq má tarâ agyi kut luí, ikun zè gàm byi râ gi, ngo lé ó hkyin tô é lhú?" ga luí, yhang lé tû taí ri. ¹⁵ Yesuq

yhangmoq lé taí é gi, "Myoqnoq é hkyô banshoq mai, nungmoq é i-myt lé hkûm zìng luí, koi sidiq nyí keq. Hkâsu mù gà le, byu é asak gi, agùn agó é sutzè má bo é a nghut." gà ri.

¹⁶ Dangtú ralhum dông mai le, yhangmoq lé Yesuq taí é gi, "Sahtê rayuq gi, yhâng é yò pé má guqzo muilhum gyaí já ri. ¹⁷ Haú mù luí, yhâng é unghkaú má myit é gi, 'Ngò hkâsu kut wú râ lhi? Ngá é guqzo muilhum pé lé kat to râ jowò a wó lo dut to bê.' gà ri.

¹⁸ Dum nghut jáng, yhang gi, 'Ngò îsu kut wú râ abe, ngá é chyí xau pé lé hpyoq pyám luí, je kô é chyí pé lé saí râ nghut lhê. Chyí haú pé má ngá é guqzo muilhum pé eq sutzè banshoq lé, tsíng kat to luí, ¹⁹ ngá é i-myt lé îsu nghú taí râ, "I-myt ê, zanwut myáng myáng é matú, zè gè myo myo ngò tsíng to bê. I-myt nàng zim za kut nyí aq hkoi. Zo mù, shuq mù, ngón ngón nyí aq." ga' gà ri.

²⁰ Nghut kôlhang, Garai Gasang gi, 'Byù gò ê, náng é asak lé, hkû-myín yhang, wup yu pyám byí é nghut jáng, nàng tsing hkong tô é zè pé gi, ó yuq é matú dut râ lhú?' ga luí, yhang lé taí ri.

²¹ Haú eq rajung za, yhumsing é matú sutzè hkong to mù luí, Garai Gasâng é hí má myung nyí sù gi, haú yuq su nghut râ nghut lhê." gà ri.

Myit A Chiq É Za Garai Lé Lumjng Râ Hkyô

Mht 6:25-34, 19-21

²² Yesuq, Yhâng é chángzô pé lé dum taí é gi, "Haú mù luí, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdú matú haí wut haí tsang râ lé, hkâ-myit chiq kó. ²³ Asak gi, zoshuq htoq má, gungdu gi, mebù htoq má, je ahkyak lhê. ²⁴ Nghonoq pè é hkyô lé myit wú keq; yhangmoq gi, kyô hkyó kyô shu a kut kó; guqchyí eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haú pè htoq má je riyhang hpaudap nyi lhê a nghut

kó lúhú? ²⁵ Nungmoq má, ó yuq wá, myit chiq é eq, yhumsing é asak lé radúng kô wó jat yù kó râ lúhú? ²⁶ Haú su mù luí, tiq dik é hkyô lé lhang, nungmoq a wó kut kô é nhing, haí mù luí gotú hkyô pé lé, myit myô nyi akô lúhú?

²⁷ Htutbó ban* pé hkâsu kut kô lo é lé, myit wú keq. Haú pé gi, mù le a zui, hkying le a duì kó nghut ri. Nghut kôlhang, Ngò, nungmoq lé taí kyo kôlé, Hkôhkâm Sholumon hpúng kô dik u lé wut é mebu lhang, ban haú rabó lé a hkyit nghut ri. ²⁸ Lumjúng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haú su kut hut é nghut le gi, nungmoq lé, je riyhang hut râ a nghut kó lúhú? ²⁹ Nungmoq gi, haí zo haí shuq râ lé hkâho nyi kó; haú eq séng luí lé hkâ-myit chiq nyí kó. ³⁰ Hkâsu mù gà le, Garai Gasang lé a sé bang gi, haú hkyô banshoq lé châng hkat ho nyi akô; nghut kôlhang, nungmoq é Íwa Garai Gasang gi, haú pé lé nungmoq râ é hkyô, sé byí nyi lhê. ³¹ Nungmoq kúm gi, Yhâng é mingdán lé ho nyi keq, haú jáng, haú pé, nungmoq lé puq byi râ nghut lhê.

³² Sau hpúng zô pé ê, hkâgyuq ko, hkâsu mù gà le, nungmoq é Íwa Garai Gasang gi, Yhâng é mingdán nungmoq lé byí nau nyi ri. ³³ Nungmoq wó é zè pé lé ûng pyám luí, myùng bang lé byi keq, yhumsing é matú a dat xau a dat wôm é ngunhtung saí luí, hkau sù lé a jé, manot eq le a wó zô é sutzè lé mauhkung htoq má hkong to keq. ³⁴ Hkâsu mù gà le, náng é sutzè joq jang má, náng é i-myit le jé nyi râ nghut lhê.

Yesuq Dum Jé Lé Lô Râ Hkying Lé Machya Nyi Râ Hkyô

Mht 24:45-51

³⁵ Nungmoq gi, hpyihit hit luí, (mù zui râ matú rì rì kut to keq); nungmoq é myibung lé tuq to mù, ³⁶ myiháng poí mai dum taú lò luí, hkúm lo kok

é, yhumsing hpó lé radá dâm hkum lhom wó hpông hâng yù shoq, lág tô é dui-nhâng zoshâng wui su kut nyi keq. ³⁷ Haú yhumsing jé lo le, machya nyi lág é dui-nhâng zoshâng wui gi, hkungsô wó nyi râ. Hkâsu mù gà le, ngò, nungmoq lé teng za taí kôlé, haú yhumsing hpó gi, yhangmoq lé yuq zung to nhâng luí, yhang gi, dui-nhâng zoshâng su hpyihit hit mù, saí tso saí huq râ nghut lhê. ³⁸ Gunggám yoq lé nghut kôlhang, woq tûn hkûn lé nghut kôlhang, haú su kut machya nyi é lé, yhumsing hpó lo myang é nghut le gi, dui-nhâng zoshâng haú bang hkungsô wó nyi ri. ³⁹ Yhumsing hpó rayuq, hká u má hkau sù lé lô râ lé, sê tô é ru nghut le gi, yhang machya nyi luí, yhâng yhûm lé a wó hput htong nhâng râ nghut é lé, bûn sê nyi keq. ⁴⁰ Haú mù, nungmoq le rì rì nghut nyi keq; hkâsu mù gà le, haú Byu Yhangzo gi, a bûn nùng má jé lé lô râ nghut lhê." gà ri.

⁴¹ Haú hkûn, Petruq gi, "Yhumsing ê, dangtú shí gi, ngamoq lé za, taí é nghut lhê lúhú? Haú a nghut jáng, lhunglhâng bang lé taí é dông nghut lhê lúhú?" ga myí ri.

⁴² Haú jáng, Yesuq gi, "Lumging é eq hpaqchyí bo é sùt zum sù gi, hká yuq nghut lhê lúhú? Haú yuq gi, yhâng yhumsing é dui-nhâng zoshâng wui lé ahkying jé jáng zoshuq gám byi râ matú, yhumsing hpó eq hkyin to sù dut râ nghut lhê. ⁴³ Yhumsing hpó dum taú lo é hkûn, haú su kut nyi lág é dui-nhâng zoshâng gi, hkungsô wó nyi ri. ⁴⁴ Ngò, nungmoq lé teng za taí kôlé, yhumsing hpó haú gi, yhâng é sutzè banshoq, dui-nhâng zoshâng haú lé ap to râ nghut lhê. ⁴⁵ Nghut kôlhang, dui-nhâng zoshâng haú gi, yhâng é i-myit unghkau má, 'Ngá é yhumsing hpó jé lô râ gyai myáng ashí.' ga myit pyám mù, dui-nhâng zoshâng luzúm wui myiwe, yuqgè lé nhuq bat é eq, zo yê shuq yê í shuq wut nyi é nghut jáng, ⁴⁶ dui-nhâng zoshâng hau é yhumsing hpó

* **12:27** Htutbó ban gi, yúng dik é yosô ban nghut lhê.

gi, yhang a myitbyu tô é buinyì eq yhang a sé tô é ahkyíng má jé lô mù, yhang lé jap pyám luí a lumjíng bang eq rahá nyhi pyám rá nghut lhê.

⁴⁷ Yhumsíng hpô é i-myt lé sê to kôlhang, yhang ô nau é dông a cháng, rì rì le a hen tô é dui-nhâng zoshâng gi, yhâng yhumsíng eq nhuq bat é lé, myo myo hui zo rá nghut lhê.

⁴⁸ Nghut kôlhang, a sé mù kut shut sù kúm gi, shau za bat é hui rá nghut lhê. Haú eq rajung za, Garai Gasang gi, myo shoq wó yú su chyáng mai, myo shoq dúng yú rá nghut lhê. Myo myo ap byí tô é hui su chyáng mai, je myo shoq dum dúng yú rá nghut lhê.

Nguingón Nhâng Râ A Nghut, Lhoq Kang Nhâng Râ Ru Nghut Lhê

Mht 10:34-36

⁴⁹ Ngò jé lé é gi, myigùng htoq má, myi nyé nhâng rá matú nghut lhê. Myi haú dap to lánng é nghut le gi, ngò ô nau é hkyô jup byíng bê. ⁵⁰ Nghut kôlhang, ngò hkam yú rá é baptisma† rajung joq ashí, haú a hkam yú yú gi, ngò gyai yhang hkâm zo wuí nyi ri. ⁵¹ Ngò jé lé é gi, myidàm htoq má simsaq hkyô byi rá matú nghut nhô ngam akô lhú? Haú dông a nghut, Ngò, nungmoq lé táí kôlé, byu pé lé lhoq pyô lhoq kang rá matú sheq ru nghut lhê. ⁵² Haú su mù, ahkuí mai rayhúm za má é byù ngo yuq gi, rayuq eq rayuq yhang-moq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô rá nghut lhê. ⁵³ Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoí gi, yhâng dumó eq, yhâng dumó gi, yhangmhoí eq kut, ngá é yanmai, rayuq eq rayuq byoq gâng lhum bùm bekô rá nghut lhê." ga táí ri.

Dut Lò Râ Hkyo É Kumhá Lé Sê Gam Hkoq Râ Lhê

Mht 16:2-3; 5:25-26

⁵⁴ Hau htâng shiwa byu pé lé, Yhang taí é gi, "Nungmoq gi, buiwàng hkyam shut mhut htup é lé myàng jáng, 'Maú wo lò berâ.' ga radá dâm lhaq taí taí mu akô, haú eq rajung za le, dut lò lò mu ri. ⁵⁵ Dum nghut jáng, maupyí shut mâ é lài lo le, 'Bui htân berâ.' ga lhaq taí taí mu akô, haú eq rajung za le dut lò lò mu ri. ⁵⁶ Gegùn labyoq kut bang ê, nungmoq gi, myigùng eq mauhkung é kumlhá lé, sê gam hkoq yu nyi akô. Haú su nghut kô le nhîng, haí mù luí, shí ipyat mâ é kumlhá lé gi, a sê gam hkoq dut tô akô lhú?

⁵⁷ Haú eq rajung za, haí mù haú dingmán é hkyô lé yhumsíng yhang yhang a wó doqdân yú kô é lhú?

⁵⁸ Dangké, nang lé yui tsuq sù eq rahá, tarâ agyi wá chyáng e ló le, hkyô má yhang eq ngón shoq byìn hpyé huí yú aq. Haú a nghut jáng, yui yhumsíng gi, nang lé tarâ agyi chyáng é dé pyám luí, tarâ agyi gi, htóng hkyó su chyáng, nang lé ap pyám luí, yhang gi, nang lé htóng má lhûng pyám rá nghut lhê. ⁵⁹ Ngò, nang lé táí lé, yuichyîn haú a ban xap xap gi, htóng haú mai nàng wó htoq ló rá a nghut." ga táí ri.

13

Myit A Lhîng Jáng Shi Hten Byuq Râ

¹ Haú hkûn, haú má nyi é byù ra-am gi, mauzau Pilat eq Galile byù ra-am lé sat mù yhangmoq é sui eq yhang-moq nóng jaú é hkungga lé nyhò pyâm é hkyô, Yesuq lé lé táí kyô akô.

² Yesuq gi, "Galile byù haú bang haú su kut hui zo kô é yanmai, yhangmoq gi, gotû Galile byu pé banshoq htoq má, yubak je myô akô nghû, nungmoq myit ngam akô lhú? ³ Haú su a nghut! Ngò, nungmoq lé táí kôlé, nungmoq le, myit a lhîng kô é nghut le gi, banshoq bang haú eq rajung za shi hten byuq kó rá nghut lhê. ⁴ Haú htoq agó, Síloam wà má é machya gyop gyó luí, nhê sat huí é byù raxe shit yuq gi, Yerusalem wà mó má é byù banshoq bang htoq má mara je kô akô

† 12:50 Shí má é baptisma gi, Yesuq, ajung jung hpuzo mù shí hkâm é hkyô lé táí é nghut lhê.

ngû, nungmoq myit ngam nyi akô lhú? ⁵ Haú su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haú eq rajung za shi hten byuq kó râ nghut lhê." ga taí ri.

⁶ Yesuq dangtú dông dum taí é gi, "Byù rayuq gi, yhâng é tsibiyiq hkyâm má, maihpáng gâm ragàm hô tô ri. Yhang agàm haú má, ashi ê ho wú le, zui tô é a myàng nghut ri. ⁷ Haú hkûn, yhang gi, 'Wú aq, ngò sum zân tup maihpáng gâm haú má ashi ê ho wú le, a myàng nghut ri; haú lé htuq pyám aq. Haí mù, maumyî aha agó kut yuq nhang tô lhê lhú?' ga luí, tsibiyiq hkyâm zúng sù lé taí ri.

⁸ Hkyâm zúng sù gi, 'Yhumsîng ê, hkûzân za gi, yuq tô wú shi sháng gaq, shigâm hau é lhînghkyuq má ngò du lhîng to mù, myìhpún kat luí bóm byi wú shirâ. ⁹ Htang zàn má ashi zui é nghut le gi, yuq to sháng gaq, ashi a zui é nghut le kúm gi, htuq pyám râ nghut lhê.' ga luí, hkyâm yhumsîng lé tû taí ri." gâ ri.

Bánno Buinyi Má Gùng Loq Hten Sù Lé, Lhoq Gê Byî É Hkyô

¹⁰ Bánno buinyi lé, Yesuq gi, tara-jong ralhum má, mhoqshit nyi ri. ¹¹ Haú hkûn, haú má raxe shit zân tup nat dap luí, gùng loq lhoq hten huí é myiwe rayuq le nyi tô ri. Yhang gi, dàngngóm luí, gungdu ratsuí lháng a wó lhoq nyhâng lô é sù nghut ri. ¹² Yesuq gi, myiwe haú lé myàng jáng, yhâng chyáng wut yù mù, "Myiwe myhí ê, nàng, nòhpyo mai gè berâ." ga luí, ¹³ yhâng é ahtoq má loq ke byî ri. Haú hkûn jáng, myiwe haú gi, nyàng za dum wó yap luí, Garai Gasang lé hkya-ôn nyi ri.

¹⁴ Haú mù, Bánno buinyi lé, Yesuq nòhpyo lhoq gê byî é yanmai, tarajong má up sù gi, wú nhik-yo luí, "Mù wó zui é buinyi hkyuq nyí joq tô le, buinyi haú pé má, lé wó lhoq ge yù lhê. Haú mù, Bánno buinyi má gi,

hkâkut kó." ga luí, shiwa byu pé lé taí kat ri.

¹⁵ Haú hkûn, Yhumsîng Yesuq gi, "Gegùn labyoq kut bang ê, nungmoq yuq hkangmó gi, Bánno buinyi lé, yhumsîng é no, logúng pé lé, hkup mai hpông htoq yù mù uchyam byi huq huq kut akô a nghut lhú? ¹⁶ Haú nghut le gi, raxe shit zân gón Tsadán èq tû to huí é, Abraham é yhangzo yhangshu myiwe zo shî lé, Bánno buinyi má Tsadán loq mai, hkyut byi a gíng râ lhú?" ga tû taí ri.

¹⁷ Haú su ga taí jáng, Yhang eq i-myit shai lhum é bang banshoq gi, hoq hpû byuq bum akô. Shiwa byù banshoq bang kúm gi, Yhang kut é mauhpo amû banshoq é yanmai, gabú nyi bum bekô nghut ri.

Angshi Cham Eq Munchi Dangké Mht 13:31-33; Mrk 4:30-32

¹⁸ Haú hkûn, Yesuq taí é gi, "Garai Gasâng é mingdán gi, haí eq wuí lhê lhú? Ngò hai eq taí kê wú râ lhú? ¹⁹ Haú gi, byù rayuq mai, yhâng é hkyâm má hô tô é angshi cham eq wuí ri. Angshi cham haú gi, yuq kô lò mù agàm mó dut lò jáng, hau é akoq pé má, maulat nghoq zô pé wó zung nõ yu akô." gâ ri.

²⁰ Yhang dum xoq taí é gi, "Garai Gasâng é mingdán lé, ngò hai eq taí kê wú râ lhú? ²¹ Haú gi, myiwe zo rayuq èq sungso mún sum bûng má yu nyhó luí, haú pé banshoq lé wó lhoq daú nhang é múnchi eq wuí ri." gâ ri.

Chyap É Hkúmdong Mht 7:13-14, 21-23

²² Hau htâng, Yesuq gi, Yerusalem wà mó shut laí e ló uchyang, rawà bàn rawà má wàng mù, mhoqshit byî ri. ²³ Haú hkûn, byù rayuq gi, "Yhumsîng ê, hkyi yu é hui râ bang gi, shau za nghut râ lhú?" ga luí, Yesuq lé myî ri.

²⁴ Yesuq gi, "Chyap é hkúmdong mai, Garai Gasâng é mingdán má wó wâng shoq shikut keq. Hkâsu mù gâ le, ngò, nungmoq lé taí kôlé, byù myo myo gi, wó wâng shoq ga shikut wú kó râ.

* **13:25** Yhumsîng hpó gi, Garai nghut lhê. Yhûm gi, Garaí é mingdán lé taí é nghut lhê.

Nghut kôlhang, a wó wâng kó râ nghut lhê. ²⁵ Yhumsîng hpó,* hkum toq myhî pyâm é htâng má sheq, nungmoq gi, hkúmdong hí má yap to mù, hkum lé kok uchyang, 'Yhumsîng ê, ngamoq lé hkum hpóng byi laq ô! ga luî, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tù taí râ nghut lhê.

²⁶ Haú jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng mhoqshit byi wú bê nghut lhê.' ga taí bekô râ.

²⁷ Nghut kôlhang, yhumsîng hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dông kut é bang banshoq ê, ngá chyáng mai gâng ló byuq keq.' ga tù taí kat râ nghut lhê.

²⁸ Garai Gasâng é mingdán má, Abraham, Isak, Yakup pé eq myiqhtoí pé banshoq bang nyi to kô é lé, nungmoq wó myâng kôlhang, nungmoq gi, shinggan shut hkat pyâm é hui luî, haú jowò má ngaubiyi ngaù nhap eq zui kyik kyik shoq hpuzô nyi bùm bekô râ nghut lhê. ²⁹ Hau hkûn, buihtoq, buiwàng, maupyî, mautsûng mâ é mingdán myo myo mai byu pé lé luî, Garai Gasâng é mingdán zoshuq poi má myang zùng kó râ nghut lhê. ³⁰ Haú hkûn, ahkuî htâng gyó nyi bang gi, hí bekô râ; ahkuî hí to bang gi, htâng gyó bekô râ." ga luî, yhangmoq lé taí ri.

Yerusalem Wà Mó Eq Séng Luî, Yesuq Taí É Hkyô

³¹ Haú u lé, Hparishe pé ra-am gi, Yesuq chyáng lé luî, "Shí jowò mai htoq ló byuq aq. Hkâsu mù gâ le, Herut gi, nang lé sat râ hen nyi ri." ga luî, Yhang lé taí akô.

³² Haú jáng, Yesuq gi, "'Hkû-nyí, napmá,† ngò nat gang hkat pyâm luî, nò zo hpyo zo lhoq gê byi râ nghut

lhê; sum nyí nghû râ buinyi‡ má sheq, ngá mù bàn râ nghut lhê.' nghû luî, agè ashop é wamhkui haú lé ló taí kyo keq. ³³ Haí wá dut kôlhang, hkûnyí, napmá, sânghepe nyí, ngò gi, e ló râ dut ashî. Hkâsu mù gâ le, myiqhtoí pé gi, Yerusalem wà mó mai lai luî gotú jowò má a shi wú kó nghut ri.

³⁴ Yerusalem ê, Yerusalem ê, myiqhtoí pé lé sat pyám pyám kut mù, náng chyáng nhang kat é bang lé, luqgok èq dú sat sat kut é myuq nàng ê, woqzìng gi, yhangzô pé lé, yhâng é dùng hkaú má tsîng lhûng yu é su, nungzô pé lé, Ngò hkâ-myhó dâm shuí tsîng yù naù kôlhang, nàng a dông nghut ri. ³⁵ Wú keq, nungmoq é yhûm gi, nungmoq é matú chamchyuyi dut pyâm to berâ nghut lhê; Ngò, nungmoq lé taí kôlé; 'Yhumsîng é myìng mai jé lé lo é Sû gi, hkungsô wó nyi sháng gaq.'* nghû, nungmoq a taí taí gi, Ngo lé wó myâng kó râ a nghut lo." ga luî, yhangmoq lé taí ri.

14

Hparishe Rayuq É Yhûm Má Yesuq Jé Nyi É Hkyô

¹ Bánno buinyi ra-nyí má, Yesuq gi, zang zo râ ga Hparishe suwún rayuq é yhûm má, ê wang nyi tô le, haú mâ é bang gi, Yhang lé gyui gyui chôm wú nyi bum akô. ² Haú u lé, wuì wam ana dut sù rayuq gi, Yesuq é hí má jé nyi tô ri. ³ Haú mù, Yesuq gi, "Bánno buinyi má nòhpyo lé lhoq gê byi é gi, tarâ wang lhê lhú, a wang é lhú?" ga luî, tarâ sará pé eq Hparishe pé lé myi kat ri. ⁴ Nghut kôlhang, yhangmoq gi, zim za dut byuq akô. Haú hkûn, Yesuq gi, nòhpyo hui sù lé, zui to mù, lhoq gê byi luî, nhang kat ri.

⁵ Hau htâng, Yesuq gi, yhangmoq lé, "Nungmoq chyáng mâ é rayuq yuq gi, yhumsîng é yhangzo rayuq yuq, haú a nghut jáng, no myang radu du, Bánno buinyi má, wuìtung má byit gyó le, haú hkûn jáng, a xe htoq yu

† 13:32 Hkû-nyí, napmá gâ é gi, Yesuq mingkan htoq má mù zui râ ahkyíng lé taí é nghut lhê. ‡ 13:32 Sum nyí nghû râ buinyi gâ é gi, Yesuq mingkan htoq má mù ban zui é buinyi lé taí é nghut lhê. * 13:35 Hkya-on 118:26

é za, wó nyî kó râ nghut lhê lhú?" ga myî kat ri. ⁶ Yhangmoq kúm gi, dang haú hkun lé, haî le a wó tû taí kó nghut ri.

⁷ Haú hkûn, Yesuq gi, ji tô é bang jé réng é zùng jowò pé hkyin yu nyî kô é lé myàng jáng, yhangmoq lé dangtú dông taí é gi, ⁸ "Byù rayuq yuq nang lé, myiháng poî má ji é nghut jáng, je réng é jowò má hkâ-ê zùng. Hkâsu mù gâ le, náng htoq je aróng wó sù lé le, ji to shirâ abe. ⁹ Ji tô é nghut jáng gi, nungnhik lé ji tô é yhumsing hpó lé lô mù, 'Shí yuq lé jowò hui byi aq.' ga luî, náng lé lé taí jáng, nàng hoq hpu luî, hkyî htàng shut huî zùng ra râ nghut lhê. ¹⁰ Haú mù luî, supé nang lé ji le, hkyî htàng má é zûng aq; haú hkûn, nang lé jì sù lé mù luî, 'Buinùm hpó é, shî je réng é jowò má huî doq zùng aq.' ga luî, nang lé taí jáng, nàng eq rahá zung tô é bíng lhunglhâng bâng é hí má, nàng gi, myoqdong wó râ nghut lhê. ¹¹ Hkâsu mù gâ le, yhumsing gùng lé waq toq é sù ó yuq nghut kôle, lhoq nyhum pyâm é hui râ nghut lhê; yhumsing gùng lé, lhoq nyhum é sù kúm gi, waq toq é hui râ nghut lhê." ga taí ri.

¹² Hau htàng, Yesuq yhang lé ji é yhumsing hpó lé taí é gi, "Napzang, a nghut jáng, myinxûn lé nàng byi tso nau le gi, náng é buinùm wui, âgu âmâng pé, mungmoq wui, sùt wó é yhumkyo chang pé lé hkâjî tso. Haú bang lé jì tsô é nghut jáng gi, yhangmoq nang lé dum jì tsô é eq, jeju dum tau kó râ nghut lhê. ¹³ Nghut kôlhâng, nàng poî kut mù, byi tso byi huq nau é nghut le gi, myùng bang, hkyî gyui loq hten bang eq myoqjit é bang lé, jì tso aq. ¹⁴ Haú su kut jáng, nàng hkungsô wó nyî râ nghut lhê. Yhangmoq nang lé jeju a wó tau kôlhâng, dingmán bang dum dui toq lo é buinyî má, hau é akyû lé, nàng wó hkam yù râ nghut lhê." gâ ri.

Zoshuq Poî Mó Lé Dangtú Yu É Hkyô
Mht 22:1-10

¹⁵ Yesuq eq rahá zô zung tô é byù rayuq gi, dang haú wó gyo jáng, "Garai Gasâng é mingdán mâ é zoshuq poî má wó zo râ sù gi, hkungsô wó nyî sù nghut râ." ga luî, Yesuq lé taí ri.

¹⁶ Yesuq haú yuq lé tû taí é gi, "Byù rayuq gi, myinzang byi tso râ ga, zoshuq poî mó ralhum hen to mù, byù myo myo lé ji tô ri. ¹⁷ Zang byi tso râ yàm jé jáng, yhâng é dui-nhâng zoshâng lé, ji tô é bâng chyáng 'Lé keq hkoi, zoshuq jin to bê.' ga é châng wut nhang ri.

¹⁸ Nghut kôlhâng, haú bang ban-shoq gi, zoshuq poî má a é râ dông chyat he pyâm akô. Rayuq sù gi, 'Ngò yohtung rahkyang wui tô lhê; haú lé é wú râ dut ri. Haú mù, ngo lé ahkáng byi shi laq.' ga yhang lé taí ri.

¹⁹ Dum rayuq le, 'Ngò, nohtó ngo zúm wui tô lhê; haú pé lé dui nhang chyam wú râ dut ri; ngo lé ahkáng byi shi laq.' ga taí wô ho ri.

²⁰ Dum rayuq le, 'Ngò myiwe hâng tô é a myáng shi mù, a wó lé.' ga taí wô ho ri.

²¹ Haú jáng, dui-nhâng zoshâng taú lò mù, yhâng é yhumsing lé haú hkyô banshoq lò taí kyô ri. Haú hkûn, yhumsing hpó gi, nhikmó gyô yo mù, 'Wà mâ é hkyô mó hkyô zo hkat hkangmó má hân hân ê mù luî, myùng bang, hkyî gyui loq hten bang eq myoqjit bang lé, é jì lò aq.' ga luî, yhâng é dui-nhâng zoshâng lé nhang kat ri.

²² Hau htàng má, dui-nhâng zoshâng gi, 'Yhumsing ê, nàng nhang é eq rajung za ban kut bê; nghut kôlhâng, zùng râ jowò gi, mân tô ashî.' ga taí ri.

²³ Haú su ga jáng, yhumsing hpó gi, 'Ngá yhûm byíng râ matú, wà yàm hkyô pé eq hkyâm yàm hkyô pé má htoq é mù, myang é bang lé a wó le wó shoq é tsing shuí lò aq. ²⁴ Nang lé ngò taí lé, hí lé ji to huî é bang rayuq lháng, ngá é zoshuq poî lé wó chyim wú râ a nghut.' ga luî, yhâng é dui-nhâng zoshâng lé taí ri." gâ ri.

Yesuq É Chángzo Wó Dut Râ Matú
Mht 10:37-38; 5:13; Mrk 9:50

²⁵ Byù hpûng mó Yesuq eq rahá e ló kô é hkûn, Yesuq gi, haú bang lé lhing wú luí, ²⁶ "Ngá chyáng lé sù ó yuq nghut kôle, yhumsing é înu, îwa, yhangmyi, yhangzo eq, yhanggu, yhangmang, yhâng nhammó pé lé le, haú htoq agó, yhumsing é asak lé le, ngo lé chyitdap é htoq má je chyitdap sù gi, ngá é chángzo a wó dut. ²⁷ Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo a wó dut.

²⁸ Dangké, nungmoq chyáng mâ é byù rayuq yuq, tsehtung yhûm ralhûm saí nau le, yhang gi, yhûm haú ban saí râ matú, ngùn hkâ-myhó bàn râ eq yhang wó tô é ngùn luq a luq é lé, zùng mù luí, hí a sôn wú é byù nyi kó râ lú? ²⁹ Laq má mù, apûn awang gi, saí hi to mù luí, a wó lhoq pân é nghut jáng, ³⁰ myàng é bang banshoq èq, 'Shí yuq gi, apûn awang gi, saí hi to mù luí, banshoq a wó saí pân lo nghut ri.' ga luí, yhang lé jóng pyám bekô râ nghut lhê.

³¹ Dangké, hkohkâm rayuq gi, gyè zan râ hen le, gyezo í mun eq lé sù hkohkâm lé, gyezo ramûn eq za lhom wó zân ûng râ, a wó zân ûng râ lé, zùng mù luí, hí a myit wú é nyi râ lú?

³² A ûng râ dut le gi, gyè pé we we má nyi tô ashî hkûn lé, lagyo suwún pé lé nhang kat luí, simsaq râ matú htingram pyám ra râ nghut lhê. ³³ Haú eq rajung za, nungmoq chyáng mâ é ó yuq nghut kôhang, yhumsing wó é zè banshoq lé, a pyám to sù gi, ngá é chángzo wó dut râ a nghut.

³⁴ Xo gi, gè lhê. Nghut kôhang, xomân kân byuq jáng gi, haú lé hai èq dum wó lhoq ngam yù râ lú? ³⁵ Haú gi, myigung matú le, myìhpún kut râ matú le, akyû a bò lo. Haú mù luí, shinggan shut kúm gi, dú pyám sê akô.

Gyo râ nohkyap dap sù gi, gyô yù sháng gaq." ga taí ri.

15

Byuq Byuq É Sau
Mht 18:12-14

¹ Ra-nyí lé, Yesuq é dang gyo kó râ ga, kang guq bang eq yubak dap bang gi, Yhâng chyáng lé zîng bum akô. ² Haú hkûn, Hparishe pé eq tarâ sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga taí put nyi bum akô.

³ Haú mù, Yesuq yhangmoq lé dangtú dông taí é gi, ⁴ "Nungmoq má, sau rashô du wó luí radu byuq byuq é nghut le, gaú xe gaú du lé yoso mhan yô má nyhi pyám to mù, byuq byuq é sau haú lé, myàng shoq a châng ho yu é, ó yuq wá nyi kó râ lú? ⁵ Byuq byuq é sau haú lé myang hô jáng, gyaí gau é i-myit èq goqsân htoq má bún kê chûng mù, ⁶ yhûm má jé jáng, yhâng é buinùm ji-myi wui eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chôm gabú sháng.' ga taí râ nghut lhê. ⁷ Haú eq rajung za, Ngò, nungmoq lé taí kôlé, myit lhing a râ é dingmán bang gaú xe gau yuq lé gabú é htoq, myit lhing é yubak dap sù rayuq é yanmai, mauhkûng htoq má, je riyhang gabú jowò dut râ nghut lhê.

Byuq Byuq É Ngùn Chap

⁸ Dum nghut jáng, dangtú ralhûm gi, myiwe rayuq, ngùn raxê chap wó é má, rachap byuq byuq é nghut le, yhang gi, myibung tap mù rayhûm é shum luí, myang yù shoq rago za, ho wú râ a nghut lú? ⁹ Haú lé ho myàng jáng le, yhâng é buinùm ji-myi wui eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chôm gabú sháng.' ga taí râ nghut lhê. ¹⁰ Haú eq rajung za, Ngò, nungmoq lé taí kôlé, myit lhing é yubak dap sù rayuq é yanmai, Garai Gasâng é maumang lagyô pé hí má, gabú jowò dut râ nghut lhê." gâ ri.

Byuq Byuq É Yuqzo

11 Yesuq xoq taî é gi, "Byù rayuq gi, yuqzo í yuq wó ri. 12 Haù nhik mâ é tiq sù yuq gi, yhâng wa lé, 'Áwa ê, ngò wó gíng é sutzè, ngo lé gàm byi laq.' ga dung jáng, yhâng wa le yhangnhik tâng lé sutzè gàm byi kat ri.

13 Hau htâng hkâ-myháng a myáng má, yhangzo tiq sù yuq gi, sutzè banshoq hkyom yu chùng mù, mau we shut ê luí, haú jowò má, mingkan ngón hkyô châng é má yhang wó é ngunzè banshoq lé langsâ pyâm bê.

14 Haù su kut ngunzè wó mi-wó lé ban langsâ pyâm é htâng má, haú mau má mutmó gyo é yanmai, yhang gi, asho awui dut lo nyi bê nghut ri.

15 Haù mù, haú mau mâ é byù rayuq chyáng, langchyáng ê kut le, haú yuq gi, yhang lé waq rém jang shut nhang kat mù, waq lé lhom zúng nhang ri.

16 Haú hkûn, yhang gi, waq jùm zô é shigyang cham pé lé lháng, zo naù shoq dut kôhang, ó yuq le a byi zo kó nghut ri.

17 Haù mù, yhang myit bûn lo é gi, 'Ngá wâ chyáng nyi é langchyâng pé gi, agùn agó myàng zô nyi kó râ nghut lhê. Nghut kôhang, ngò gi, shí jowò má, zo mut wuìshit é eq shi ló râ dut bê. 18 Ahkuí, ngò toq mù, ngá wâ chyáng taù ló luí, "Áwa ê, ngò gi, Garai Gasang lé le, nang lé le, shut bê. 19 Ahkuí mai ngò gi, nung zo nghû râ a gíng lo, hau é yanmai, náng é langchyáng rayuq dông za ngo lé nyi nhâng laq." nghû luí, ló taí râ.' gâ ri. 20 Hau htâng, yhang toq luí, yhâng wâ chyáng ló le, yhang we we má ru nghut ashî hkûn mai, yhâng wa gi, yhang lé lhom myàng jáng, wú shogyo luí, din ê mù, yhangzô é lingzing má é po pyik dap to luí, bopuq puq byi ri.

21 Haú hkûn, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuí mai, ngò gi, nung zo nghû râ a gíng lo.' ga luí, yhâng wa lé dúng tóngbán ri.

22 Yhângwa kúm gi, yhâng é langchyâng pé lé, 'Réng dik é mebu hân hân yu lé mù, yhang lé hut byi keq; yhâng é loq má, loqchyop chyop

byi keq; hkyî má le hkyî-tsung tsung byi keq. 23 Tsô myum tô é nojûng zo le yu sat keq. Haù mù, nga-nhúng gi, zoshuq poí kut mù chôm ngón sháng.

24 Haù mù gâ le, ngá zo shí yuq gi, shi byuq é mai, ahkuí dum duì bê; byuq byuq é mai le, ahkuí dum myàng bê.' ga taí ri. Haù mù, yhangmoq gi, ngón ngón zo shuq ló bekô.

25 Haú u lé, yhangzo ko sù yuq kúm gi, yò má nyi tô ri. Yhang gi, yò mai yhâm shut jé lo nyi é hkûn, zìng út bat luí gó nyi é htê lé ló wó gyô ri.

26 Haù mù, langchyáng rayuq lé wut yù luí, haú hkyô lé yhang myí wú le,

27 langchyáng haù gi, 'Nung gu dum taù jé lô bê. Haù mù, náng wa gi, nung gu wáng wáng zán zán dum taù jé lo é lé lhom myàng luí, tsô myum tô é nojûng zo lé sat bê nghut ri.' ga taí kyô ri.

28 Dang haù lé wó gyo jáng, yhang gi, gyô nhik-yo luí, yhúmhkaù shut a wàng lo kut ri. Haù mù, yhâng wa htoq ê luí, yhang lé ê chyúq ri.

29 Yhangzo kúm gi, 'Wú aq, ngò, shî-myháng shílo náng é jùn dông kut luí, hkâ-nhám le náng dang lé a lu laí wú. Nghut kôhang, ngò ngá é luzúm wuì eq ngón kún râ matú, bainám zo radu lháng radàm le náng a byi wú shi.

30 Shiwa myhî pé eq zum yap wún luí, náng é sutzè lé lhoq pân pyâm é sù nung zo haù dum taù jé lô jáng kúm gi, tsô myum tô é nojûng zo lé, yhâng é matú náng sat byi bu-nhung!' ga luí, yhâng wa lé tû taí ri.

31 Yhângwa gi, 'Ngá zo ê, náng gi, hkâ-nhám le ngò eq rahá yhang nyi nyi lhê mù, ngá é sutzè joq mijoq banshoq gi, náng é chyat nghut lhê.

32 Nghut kôhang, shî nung gu gi, shi byuq é mai ahkuí dum duì bê; byuq byuq é mai le, dum myàng bê. Haù mù, gabú hpo nghut bê.' ga luí, yhang lé taí ri." gâ ri.

16

Hpaqchyî Ge Dâ É Sùt Zum Sù

1 Yesuq, Yhâng é chángzô pé lé taí é gi, "Sahtê rayuq chyáng sùt zum

sû rayuq nyi ri. Haú yuq gi, yhang yhumsing é sutzè pé lé jai hpyuq pyám ri ga, yhang yhumsing é hí má, yhang lé mara lé hun akô. ² Haú hkûn, sahtê hpó gi, yhang lé wut yù mù, 'Nàng é hkyô lé ngò wó gyo bê. Haú gi, hkâsu lúhú? Nàng sùt zùm é eq séng luí kut tô é jihpán laiká lé lò shit wú aq. Hkâsu mù gâ le, ahkuí mai nàng gi, sùt zum sù wó kut lo râ a nghut lo.' ga taí ri.

³ Haú jáng, sùt zum sù gi, 'Ahkuí, ngò hkâsu kut lo râ lúhú? Ngá é yhumsing gi, ngo lé sùt zum ayá mai lhoq hkyô pyám bê. Myì du myì hkop zo râ le ngò wum a bò; dung zo dung shuq râ le ngò hoq ri. ⁴ Ngo lé sùt zùm é ayá mai hkyô pyám htàng má, supé ngo lé yhangmoq é yhùm má lhom hap yù râ matú, hkâsu kut râ hkyô lé ngò sé bê.' ga wó myit rot jáng, ⁵ yhang gi, yhang yhumsing hpó lé chyín dap tô é bang rayuq htàng rayuq lé wut yù mù, sâng-hí yuq lé, 'Ngá yhumsing hpô chyáng nàng chyín hkâ-myhó dap tô lhê lúhú?' ga myi jáng, ⁶ haú yuq gi, 'Xú rashô pûng dap lhê.' ga tú taí ri.

Haú jáng, sùt zum sù gi, 'Náng é jihpán yù luí, hân zùng mù, ngo xê pûng kut kê to aq.' ga yhang lé taí ri.

⁷ Dum rayuq lé, 'Nàng hkâ-myhó dap tô lhê lúhú?' ga myi jáng, haú yuq gi, 'Sungsô rashô bûng dap lhê.' ga tú taí ri. Sutzum sù gi, haú yuq lé, 'Náng é jihpán má shit xê bûng kut kê to aq.' ga taí ri.

⁸ Haú a dingmán é sùt zum sù lé, yhumsing hpó gi, hpaqchyí ge da sù nghut ri ga hkya-ôn ri. Ngò shí lé taí é gi, mingkan zo wuí gi, yhangmoq é mingkan eq séng é hkyô pé má, maubó gung é yhangzo pé* htoq hpaqchyí je bò kô é yanmai nghut lhê. ⁹ Haú mù luí, Ngò nungmoq lé taí kyo kôle, a tara é sutzè pé eq buinùm ho nyì keq, haú mù, sutzè haú htúm byuq jáng, nungmoq lé, ahtum abyuq joq tô

é yhùm má, lhom hap yu é hui kó râ nghut lhê.

¹⁰ Tiq é mù má wó lum é sù ó yuq nghut kôlhang, mù mó má le wó lùm râ nghut lhê. Tiq é mù má lhum a zuí é sù ó yuq nghut kôlhang, mù mó má le lhumzui râ a nghut. ¹¹ Haú mù, mingkan sutzè má lhang nungmoq lé a wó lùm kô é nghut le gi, haú tengmán é sutzè lé, nungmoq chyáng ó yuq wá kâm ap byi râ lúhú? ¹² Supé é sutzè má, nungmoq lé a wó lùm kô é nghut le gi, nungmoq síng âng é sutzè lé, nungmoq chyáng ó yuq wá kâm ap byi râ lúhú?

¹³ Dui-nhâng zoshâng ó yuq nghut kôlhang, yhumsing í yuq lé wó dojaú râ a nghut. Hkâsu mù gâ le, yhang gi, rayuq lé a jú kut mù, rayuq lé, chyitdap râ nghut lhê; haú a nghut jáng, rayuq lé gi, lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut." ga taí ri.

¹⁴ Ngùn myoqnoq é Hparishe pé gi, dang haú banshoq lé wó gyo kôjáng, Yesuq lé wuizui kut pyám byí akô. ¹⁵ Haú mù luí, Yesuq gi, yhangmoq lé, "Nungmoq gi, byu pé hí má yhumsing gung lé yhumsing dingmán bang su kut shit mhaú é bang nghut akô; nghut kôlhang, Garai Gasang gi, nungmoq é i-myit unghkaú lé sé sù nghut lhê. Byù é hí má hpaudap é pé gi, Garai Gasang é hí má achayut é nghut nyi ri.

¹⁶ Jep é tarâ† eq myiqhtoí pé é dang, ahko ahkáng wó tô é ahkyíng gi, wui-myhup sará Yohan jé lé é buinyì jé shoq nghut bê. Haú hkyíng mai gi, Garai Gasang é mingdán hkyô gabú danglù lé, hko kyô nyì mù, yuq du jup gi, haú hkyô má htung chying wang ló bum akô. ¹⁷ Jep é tará mà é tiq dik é dangjí eq myihkyet zo ralhúm lé wó lhoq hten râ htoq, mauhkung eq myigùng hten râ gi, je luí râ nghut lhê.

* **16:8** Maubó gung é yhangzô pé nghu é gi, Garai Gasang é yhangzô pé lé taí é nghut lhê. † **16:16** Jep é tará gâ é gi, Garai Gasang, Mosheq mai nga-nhúng lé byí tô é tará lé gâ lhê.

¹⁸ Dangké, yhumsing é yhangmyi lé kâng pyám mù, myiwe gotû dum hâng yu é sù ó yuq nghut kôle, su-myi lú é sù nghut bê; yhumsing é yhanglâng eq gang bê myiwe lé hâng yu é sù le, su-myi lú é sù dut bê nghut ri." ga taí ri.

Sahtê Hpó Eq Lazaruq

¹⁹ Yesuq dum xoq taí é gi, "Radàm lé, sahtê rayuq gi, nè é eq nú-nhâm é mebu wut mù luí, nyí nyí bui bui zo ngón shuq ngón nyi ri. ²⁰ Yhâng é hkúmdong má gi, ragùngdû é jeq byi tô é Lazaruq gâ é dung zo sù rayuq lé, lé nyhi tô akô. ²¹ Haú yuq gi, sahtê wá é siboí mai gyó é agyó ahtâng lé, wú zô nau nyi ri. Hkui pé le yhâng é dâm pé má, lé yoq byí nyi akô.

²² Htâng má, haú dung zo sù shi byuq jáng, maumang lagyô pé gi, mauhkûng má nyi é Abraham é tanghkoí má yhang lé shuí ló byí akô. Sahtê wá le shi byuq luí, yhâm pyám bekô nghut ri. ²³ Sahtê wá gi, ngaraí ming má dik shoq hpuzô nyi mù luí, tu wú kat le, we we má Abraham lé le, yhâng é tanghkoí mâ é Lazaruq lé le, myàng kat ri. ²⁴ Haú mù, yhang gi, 'Áwa Abraham ê, ngo lé shogyo yù laq ô. Ngò gi, shí myi htum má achýí aku nyé é huí zô nyi ri. Haú mù, Lazaruq gi, yhâng é loqnyhui ù èq wuì má tik yù mù, ngá é shô má wuì ra-poq zo hkâlhang lé tik cham byi sháng gaq, yhang lé ngá chyáng nhang kat byi laq ô!' ga luí, dúng wut nyi ri.

²⁵ Haú hkûn, Abraham gi, 'Ngá zo ê, asak dui tô é u lé, nàng nyi ngón yuqyo tô é hkûn, Lazaruq gi, asho awui dut é lé, bûn nyi aq. Ahkuí, yhang kúm gi, shí má lo nyi byán to bê; nàng chyaú gi, jamjau hui zô nyi bê. ²⁶ Haú mai gotû gi, shí mai nungmoq chyáng dap lé nau bang a wó dap shoq le, haú mai ngamoq chyáng ó a wó dap lé râ matú le, ngamoq eq nungmoq é gyoro má, nik dik é langhkung mó èq kyo pyâm to bê nghut ri.' ga tú taí ri.

²⁷ Sahtê wá gi, 'Áwa ê, haú nghut le gi, ngò, nang lé dúng nau ri. Ngá gú pé ngo yuq nyi ashî; yhangmoq le

îsu hpuzô é jowò má a jé sháng gaq, ²⁸ yhangmoq myit lhîng shoq ló taí pun râ matú, Lazaruq lé ngá wâ yhâm shut nhang kat byi laq ô!' ga luí, dúng wut ngau nyi ri.

²⁹ Abraham gi, 'Yhangmoq chyáng, Mosheq eq myiqhtoí pé nyi lhê; haú bâng dang lé gyó yù kó sháng gaq.' ga taí ri.

³⁰ Sahtê wá gi, 'Áwa Abraham ê, haú su a nghut. Shi byuq é bang mâ é rayuq yuq yhangmoq chyáng dum taú lo é nghut le kúm gi, yhangmoq myit lhîng kó râ nghut lhê.' ga taí ri.

³¹ Abraham gi, 'Mosheq eq myiqhtoí pé é dang lé yhangmoq a gyo kô é nghut le gi, shi byuq é bang mâ é rayuq yuq dum dui toq ló mù, ló taí kyo kôhang, kâm gyo kó râ a nghut.' ga luí, yhang lé tú taí ri." gâ ri.

17

Mara Hkyut É Hkyô Eq Lumjîng Myit

Mht 18:6-7, 21-22; Mrk 9:42

¹ Yesuq, Yhâng chángzô pé lé taí é gi, "Byu pé lé mara kut shut nhang é hkyô gi, joq htoq lô râ za nghut lhê. Nghut kôhang, mara kut shut nhang é hkyô lé lhoq htoq é sù gi, dingnyé wó rá. ² Zoshâng shí bang mâ é rayuq lé, mara kut shut nhang é sù gi, yhâng é lingzing má luqluí long mó tuí hut byi luí, wuimau má é dú hkyô pyám é huí é nghut le gi, yhang é matú je gè râ nghut lhê. ³ Nungmoq gi, yhumsîng gûng yhumsîng sidiq keq.

Nunggu nungmang nàng lé mara kut shut é nghut le gi, yhang lé tan luí, mhoqshit aq; yhang myit lhîng é nghut le gi, yhang lé mara hkyut pyám byi aq. ⁴ Ra-nyí má za, yhang nang lé nyhit dâm shut mù, 'Ngò myit lhîng bê.' ga luí, nang lé nyhit dâm dum tôngbán le, tôngbán hkangmó, nàng, yhâng é mara lé hkyut pyám byi aq." gâ ri.

⁵ Haú hkûn, lagyô pé gi, "Ngamoq é lumjîng myit lé lhoq ko byi laq." ga Yhumsîng lé dúng akô.

⁶ Haû jáng, Yhumsîng gi, "Nungmoq é lumjîng myit angshi cham í za hkâhâng bò kô é nghut le gi, shî hangwâ gâm lé, 'Sikgâm ê, amyit eq roq bún luî, wuîshuq lung-aû má, ê yuq to aq ô.' gâ le, nungmoq é dang lé sikgâm haû gyo byi râ nghut lhê.

⁷ Dangké, nungmoq mâ é rayuq yuq chyáng, yò hpuq é, a nghut jáng, sau zúng é dui-nhâng zoshâng rayuq nyi é nghut le, dui-nhâng zoshâng haû yohtung pá mai jé lo é hkûn, yhang lé, 'Hân zúng mù zang zo aq.' ga luî, ó yuq wá taí kó râ lhú? ⁸ Haû dui-nhâng zoshâng lé sheq, 'Ngò zo râ myinzang lajang aq. Ngò bàn zo shoq hpyidum má hpyihit hit mù, xun zang wú nyi aq. Ngò bàn zo jáng sheq nàng wó zo râ nghut lhê.' ga luî, taí râ a nghut kó lhú? ⁹ Taí mitaí banshoq lé, dui-nhâng zoshâng ban zui saí byi é nghut kôlhâng, yhang lé jeju bún é dang ó yuq wá taí wú akô lhú? ¹⁰ Haû eq rajung za, nungmoq gi, taí mitaí ban kut jáng sheq, 'Nga-nhúng gi, jeju bun a gîng é dui-nhâng zoshâng pé nghut nyi lhê; kut râ é mù lé za lhoq pân é bang nghut lhê.' nghû taí keq." ga taí ri.

Manggâm Dap Bang Raxê Yuq Lé, Yesuq Lhoq Gê Byi É Hkyô

¹¹ Ahkuî, Yesuq gi, Yerusalem wà mó shut e ló nyi le, Samariq mau eq Galile mau gyoro mai lai e ló ri. ¹² Yhang, wà rawà shut wang ló é hkûn, manggâm dap é byù raxê yuq eq huî ri. Haû bang gi, we mai yap to mù, Yesuq lé, ¹³ "Yesuq, Zau ê, ngamoq lé shogyô yù laq ô." ga luî, wut garû bum akô.

¹⁴ Yesuq gi, yhangmoq lé myàng jáng, "Nungmoq é gungdu lé, hkyangjông pê chyáng ló tún shit keq." ga yhangmoq lé taí ri. Yhangmoq gi, hkyô má ru sô nyi ashî le lháng, sân-yúng ló byuq bekô.

¹⁵ Yhangmoq chyáng mâ é rayuq gi, yhumsing gungdu ge byuq é lé myàng jáng, Yesuq chyáng dum taû ê mù, htê mó èq Garai Gasang lé hkya-ôn é eq, ¹⁶ Yesuq é hkyî wang má paí gop to luî,

Yhang lé jeju hkya-ôn nyi ri. Haû yuq gi, Samariq byù nghut ri.

¹⁷ Haû mù, Yesuq gi, "Sân-yúng byuq é gi, raxê yuq a nghut lhú? Gau yuq gi, hká ló byuq bekô? ¹⁸ Shî tûngbaù rayuq mai lai luî, dum taû lé mù Garai Gasang lé hkya-ôn é byù, rayuq le a nyi lo kó lhú?" ga taí ri. ¹⁹ Hau htâng, Yesuq gi, haû yuq lé, "Toq mù ló aq, náng é lumjîng myit gi, nang lé lhoq sân-yúng byi bê nghut ri." ga taí ri.

Garai Gasâng É Mingdán Jé Lô Râ Hkyô

Mht 24:23-28, 37-41

²⁰ Radàm lé, Hparishe pé gi, Garai Gasâng é mingdán hkâ-nhám jé râ hkyô, Yesuq lé myî akô. Haû jáng, Yesuq gi, "Garai Gasâng é mingdán jé lé râ gi, myoq èq wú luî myàng râ a nghut. ²¹ Garai Gasâng é mingdán gi, nungmoq yuq jup é ahkaû má nghut nyi é yanmai, 'Wú keq, shí má joq ri, mhó má joq ri.' ga luî le, byu pé gi, wó taí kó râ a nghut." ga luî, yhangmoq lé tû taí ri.

²² Chángzô pé lé le Yesuq taí é gi, "Haû Byu Yhangzô é buinyi ra-nyi lé, nungmoq myàng nau dik é ahkyíng jé râ. Nghut kôlhâng, nungmoq gi, Byu Yhangzo lé wó myàng kó râ a nghut. ²³ Haû buinyi má, byu pé gi, nungmoq lé, 'Yhang shí má nyi ri.' haû a nghut jáng, 'Yhang hê má nyi ri.' ga taí kó râ nghut lhê. Nghut kôlhâng, hkâ-ê; hkâcháng kó. ²⁴ Hkâsu mù gâ le, maumyî rahkyam má hpyat é maulhap gi, maumyî gó hkyam jé shoq duqbó é su, haû Byu Yhangzo dum jé lé é buinyi má le dut râ nghut lhê. ²⁵ Nghut kôlhâng, haû su a dut htoq shimá, Yhang gi, zîng-rî é myo myo lé le, ipyat shi mâ é byu pé èq hengik pyâm é lé le, hui shirâ nghut lhê.

²⁶ Noaq é tsîn pyat má dut é su, haû Byu Yhangzo jé lé é buinyi má le dut râ nghut lhê. ²⁷ Byu pé gi, Noaq, wuî-sanghpo mó hkaû má wang é hkûn jé shoq, zo zo shuq shuq, myi byi myi yû, myiháng kut luî, nyi nyi bum akô.

Haú hkûn, dowuî dîng lô mù, yhangmoq banshoq lé lo lhoq htên pyám bê nghut ri.

²⁸ Haú eq rajung za, Lot é pyat má le, byu pé gi, zo mù, shuq mù, ung zo wuî zo, ho zo ho shuq, yhûm kut luî nyi nyi akô. ²⁹ Nghut kôlhang, Sodom wà mai Lot htoq ló é buinyi má, mauhkûng mai, myi eq hang gi, mau su wò gyó lô luî, lhunglhang lé lhoq htên pyám bê nghut ri.

³⁰ Haú Byu Yhangzo, lé htoq shit é buinyi má le, haú eq rajung za dut rá nghut lhê. ³¹ Haú buinyi má, yhumhkûng* htoq má nyi tô é sù gi, yhúmkaû mâ é zè lé, a ló gyó wang yù lo sháng gaq. Yò má nyi tô é sù gi, haú eq rajung za, yhûm shut a taû ló lo sháng gaq. ³² Lot é yhangmyi† lé bûn nyi keq. ³³ Yhumsing é asak duî hkyô hô sù ó yuq nghut kôle, asak sum rá nghut lhê; asak sum pyám é sù kúm gi, asak wó duî rá nghut lhê. ³⁴ Ngò, nungmoq lé taî kyo kôlé, haú myîn lé, yhupjang ralhum má byù í yuq nyi to kô le, rayuq gi, shuî yu é hui mù, rayuq gi, myit gyó to rá nghut lhê. ³⁵ Myiwe í yuq luî má rahá za chôm luî nyi tô le; rayuq gi, shuî yu é hui mù, rayuq gi, myit gyó pyám to rá nghut lhê. ³⁶ Yohtung má byù í yuq nyi to le, rayuq gi, shuî yu é hui luî, rayuq gi, myit gyó pyám to berâ nghut lhê." gâ ri.

³⁷ Haú hkûn, chángzô pé gi, "Yhumsing Yesuq é, haú gi, hká gyo má dut rá lhú?" ga luî, Yesuq lé myi kôjáng, Yhang gi, "Màng leq é jang má, langdâ pé, lé zîng bùm rá nghut lhê." ga luî, yhangmoq lé tû taî ri.

18

Chuimó Myhí Eq Tarâ Agyi É Hkyô Lé Dangtú Yù É Hkyô

¹ Yesuq, Yhâng é chángzô pé lé, myit wum a gyui é za, hkâ-nhám le kyûdûng nyi rá hkyô lé, dangtú dông mhoqshit é gi, ² "Wà rawà má, Garai

Gasang lé le a gyuq hoq, byù lé le haí su a ngàm é tarâ agyi rayuq nyi ri.

³ Haú wâ má chuimó myhí rayuq le nyi ri. Yhang gi, haú tarâ agyi wá chyáng ê luî, 'Ngò eq amû htoq sù lé, yhâng é mara eq rajung za, jéyáng byi laq.' ga luî, ê dum taí taí kut nyi ri.

⁴ Nghut kôlhang, tarâ agyi wá gi, ahkying rayoq zo jé shoq tarâ a jéyáng byi é tô tô ri. Hau htâng má, yhang gi, 'Ngò, Garai Gasang lé le a gyuq a hoq, byù lé le haí su a ngàm, ⁵ nghut kôlhang, chuimó myhí shí yuq é amû lé, ngò a jéyáng a doqdan byi é nghut le gi, yhang dum lé lé kut mù, ngo lé myit hpêbù nhâng rá dut ri. Haú mù, ngò yhâng é amû lé jéyáng byi rá.' ga, yhâng é unghkaû má myit yu ri." gâ ri.

⁶ Haú mù luî, Yhumsing Yesuq gi, "A ding a mán é tarâ agyi wá taí é dang mai mhoq yù keq. ⁷ Garai Gasang gi, Yhang lé nyi myin wut dîng nyi é, Yhang hkyin yu to bê bang lé, tarâ é dông a kut byi é gi, myáng myáng nyi to rá lhú? ⁸ Ngò, nungmoq lé taí kôlé, Garai Gasang gi, yhangmoq lé hân yhang tengmán é dông jéyáng byi berâ nghut lhê. Nghut kôlhang, haú Byu Yhangzo jé lé é buinyi má, lumjîng hkyô lé gi, mingkan htoq má myang wú shirá lhú?" ga taî ri.

Hparishe Eq Kang Guq Sù Kyûdûng É Hkyô

⁹ Yhumsing gûng lé dingmán bun luî, byù góbang lé wú tiq é bang ram lé, Yesuq dangtú dông taí é gi, ¹⁰ "Byù í yuq kyûdûng kó rá ga, noqkuq yhûm má doq e akô. Rayuq gi, Hparishe, rayuq gi, kang guq sù nghut ri. ¹¹ Hparishe hpó gi, yap to luî, 'Garai Gasang é, ngò gi, byù góbang su lú zo lú shuq é hkyô le a kut, agè ashop é hkyô le a cháng, su-myî le a lú é htoq agó, shî kang guq sù su le, a nghut é yanmai, ngò nang lé jeju bûn lhê ô! ¹² Ngò gi, rabat má zoshuq í dâm gám nyi lhê; ngò wó yu é gû mâ é xê gambùm ragambùm le kat nyi lhê.'

* **17:31** Yudaq byu pé é yhumhkûng gi, rá é nghut lhê mù, nyi kún jang kut akô. † **17:32** Lot é yhangmyi gi, Sodom wà shut dum taû lhing wú é yanmai, Garai Gasang lhoq hten pyám é hui sù nghut lhê.

ga luí, yhang baú yhang gotú kut dúng nyi ri.

¹³ Kang guq sù kúm gi, we we má yap to mù, mauhkúng shut lháng a wám tu wú é za, wànggàng bat luí, 'Garai Gasang ê, shí yubak dap sù ngo lé, shogyô yù laq ò!' ga dúng ri.

¹⁴ Ngò, nungmoq lé tái kôlé, kang guq sù kúm gi, Garai Gasang é hí má mara hkyut san byî é lé wó yù luí, yhùm shut dum taú ló bê; nghut kôlhang, Hparishe wá gi, a wó nghut ri. Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê; yhum-sing gùng lé lhoq nyhum é sù kúm gi, waq toq é hui râ nghut lhê." ga tái ri.

Zoshâng Wuí Lé Yesuq Shimân Byî É Hkyô

Mht 19:13-15; Mrk 10:13-16

¹⁵ Byu pé gi, zonú wuí lé Yesuq záng htung byi sháng gaq ga, Yhâng chyáng shuí lé lo bum akô. Chángzô pé gi, haú lé myàng jáng, lhom tân hkúm akô nghut ri. ¹⁶ Nghut kôlhang, Yesuq gi, zoshâng wuí lé, wut yù luí, "Haú zoshâng wuí lé, Ngá chyáng lé nhâng keq; yhangmoq lé hkâhkúm zing to kó; hkâsu mù gâ le, Garai Gasang é mingdán gi, haú sù é bâng é mingdán ru nghut lhê. ¹⁷ Ngò, nungmoq lé teng za tái kôlé, Garai Gasang é mingdán lé, zoshâng su kut a lhom hap yu é nghut le gi, mingdán haú má gè gè yhang wó wâng râ a nghut." ga tái ri.

Ayá Wó É Sahtê Hpó

Mht 19:16-30; Mrk 10:17-31

¹⁸ Ayá wó é byù rayuq le, Yesuq lé, "Ge é Sará ê, ahtum abyuq é asak wó yù râ matú, ngò haí kut ra râ lhú?" ga myí ri.

¹⁹ Yesuq gi, "Haí mù, Ngo lé ge é Sará ngu lhê lhú? Garai Gasang mai lai luí, ge é ó yuq le a nyi. ²⁰ Jep é tarâ má, 'Su-myi sulàng hkâlú, byù hkâsat, hkâhkau, a teng a mán é saksé hkâhkám, nángnu nángwa lé hkungga aq.'* gâ é dang pé lé, nàng sé gû bê." ga luí, yhang lé tú tái ri.

* 18:20 Htoq Lô 20:12-16

²¹ Haú yuq gi, "Haú pé banshoq lé, ngò, zoshâng hkùn mai cháng bê nghut lhê." ga tái ri.

²² Yesuq gi, dang haú lé wó gyo jáng, "Nàng kut râ rajung râ tô ashí; nàng wó miwó lé ùng pyám luí, myùng bang lé byî pyám aq; haú jáng, nàng, mauhkúng htoq má sutzè wó râ nghut lhê; haú mù, Ngá htàng lé cháng aq." ga luí, yhang lé tái ri.

²³ Haú yuq gi, dang haú lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri. ²⁴ Yesuq gi, haú yuq lé wú luí, "Sutzè wó bang gi, Garai Gasang é mingdán má wàng râ matú, haú-í yhang wuí ri-nhung! ²⁵ Sutzè wó sù rayuq, Garai Gasang é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." ga tái ri.

²⁶ Dang haú lé wó gyô é bang gi, "Haú su ru nghut le gi, ó yuq za hkyi yu é hui râ nghut lhê lhú?" ga myí bum akô nghut ri.

²⁷ Haú hkùn, Yesuq gi, "Byù a wó kut é hkyô lé, Garai Gasang gi, wó kut lhê." ga tái kyô ri.

²⁸ Haú hkùn, Petruq gi, Yesuq lé, "Wú aq, ngamoq gi, wó miwó tô pyâm to luí, Náng htàng cháng bê nghut lhê." ga tái jáng,

²⁹ Yesuq gi, "Ngò, nungmoq lé teng za tái kôlé, Garai Gasang é mingdán é yanmai, yhumsing é yhùm, yhum-sing é yhangmyi, yhumsing é âgu âmang, yhumsing é ínu íwa, yhumsing é yhangzô pé lé, pyâm to sù ó yuq nghut kôle, ³⁰ shí pyat má, akyû myo myo wó hkam yù râ htoq agó, htang pyat má le, ahtum abyuq é asak a wó yu é gi, a nyi râ nghut lhê." ga luí, yhangmoq lé tái ri.

Yesuq, Yhang Shí Hkám Râ Lé Dum Taí É Hkyô

Mht 20:29-34; Mrk 10:46-52

³¹ Yesuq gi, Yhâng é lagyô pé raxe í yuq lé gotú kut wut yù mù, "Gyô wú keq, nga-nhúng gi, Yerusalem wà mó shut doq ló nyi é nghut lhê. Haú má

jé jáng, haú Byu Yhangzo eq séng luí, myiqhtoí pé kâ tô é banshoq gi, dik lò berâ nghut lhê. ³² Hkâsu mù gâ le, Byu Yhangzo gi, tûngbaù pé é loq má ap pyâm é hui luí, haú bâng eq Yhang lé, wuìzui kut pyâm é, rhoi rip e, sôkan byé gyûn é, nhuq bat é kut yû mù, sat pyám kó râ nghut lhê. ³³ Hau htâng sum nyí nghû râ buinyi má, Yhang gi, dum dui toq lô râ nghut lhê." ga luí, yhangmoq lé taí ri.

³⁴ Lagyo pé gi, dang haú pé rahkun lé lhang a sé gyo kó; dang hau é lichyúm gi, yhangmoq é hí má zaú nghop tô é nghut é yanmai, Yhang haí taí nyi é hkyô pé lé yhangmoq a sé kó nghut ri.

Dung Zo É Myoqjit Sû Lé, Yesuq, Myoq Dum Myàng Nhang É Hkyô

³⁵ Ahkuí, Yesuq Yerihko wà nàm má jé lo nyi le, myoqjit é byù rayuq gi, hkyô yàm má zùng mù, dung zô nyi ri. ³⁶ Yhang gi, byù rajùm rayò sô laí ló é htê lé wó gyo jáng, haú haí dut nyi é hkyô lé, myi kat ri. ³⁷ Haú hkûn, yhangmoq gi, "Nazaret wà byù Yesuq laí ló ri." ga luí, yhang lé taí kyo akô.

³⁸ Haú su gâ é lé wó gyo jáng, yhang gi, "Dawiq é Yhangzo Yesuq ê, ngo lé shogyo yù laq ô!" ga wut dúng kat ri.

³⁹ Hí má laí ló é bang gi, zim za nyi râ matú yhang lé tân hkûm akô; nghut kôhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang htê mó o mó eq wut dúng kat ri.

⁴⁰ Haú mù, Yesuq gi, yap kat mù, byù haú yuq lé Yhâng chyáng shuí lé lô nhang kat ri. Myoqjit sú Yhâng nàm má jé lé jáng, Yesuq gi, ⁴¹ "Ngò, nàng lé haí kut byi râ ô nau ri lhú?" ga, yhang lé myi kat ri.

Haú yuq gi, "Yhumsîng ê, ngò myoq myàng nau ri." ga tû taí ri.

⁴² Hau hkûn, Yesuq gi, "Náng myoq myàng sháng gaq! Náng é lumjîng myit gi, nang lé lhoq gê byi bê nghut ri." ga, yhang lé taí ri. ⁴³ Haú yuq gi, haú hkûn jáng, yhang myoq wó

myàng mù, Garai Gasang lé hkya-on uchyang Yesuq htâng cháng bê. Lhunglhâng bang haú lé myàng kôjáng, Garai Gasang lé hkya-ôn nyi bum akô.

19

Yesuq Eq Zake

¹ Yesuq gi, Yerihko wà má wàng mù, sô laí ló nyi ri. ² Haú hkûn, haú wà má, Zake gâ é kang guq agyì rayuq nyi ri; haú yuq gi, sutzè wó sù nghut ri. ³ Yhang gi, Yesuq hká yuq nghut é lé myàng naù kôhang, nyhùm sù nghut é htoq agó, byù rajùm rayò chyîn chyap tô é yanmai, a wó myàng nghut ri. ⁴ Haú mù, yhang gi, Yesuq lé wó myàng shoq ga, Yesuq laí ló râ hkyô hí shut din ê mù, hkohúm gâm htoq má ê doq zung tô ri.

⁵ Yesuq gi, haú jowò má jé jáng, tu wú kat luí, "Zake é, hân gyó lô aq; hkû-nyí ngò náng yhùm má bíng râ nghut lhê." ga taí ri. ⁶ Haú jáng, Zake gi, hân hân gyó ló mù, gabú dik é eq Yesuq lé lhom hkulum yu ri.

⁷ Haú má nyi bang banshoq gi, haú lé myàng jáng, "Yhang gi, yubak dap sù rayuq chyáng bíng kut râ ga wang e ló bê." ga luí, mara hùn dang taí nyi bum akô.

⁸ Zake kúm gi, toq yap mù, "Yhumsîng Yesuq ê, ngò wó é sutzè rawuí gû myùng bang lé gàm byi pyám râ; ngò záng mop zô pyâm é byù rayuq yuq nyi le gi, myi tú dum tau byi râ." ga Yhumsîng Yesuq lé taí ri.

⁹ Haú hkûn, Yesuq gi, "Shí yuq le, Abraham é yhangzo* rayuq nghut é yanmai, hkû-nyí shí yhùm má hkyi yù hkyô jé bê, ¹⁰ hkâsu mù gâ le, haú Byu Yhangzo gi, byuq byuq bê bang lé, hkat hô mù hkyi yù râ matú, jé lé sù nghut lhê." ga luí, Zake lé taí ri.

Hkohkam É Dui-nhâng Zoshâng Raxê Yuq

Mht 25:14-30

¹¹ Haú hkyô lé, yhangmoq gyô nyi bùm kô é hkûn, Yesuq gi, Yerusalem

* 19:9 Abraham é yhangzo nghû é lichyúm gi, Abraham su Garai Gasang lé lumjîng é sù lé gâ lhê.

wà mó má jé râ chyâng lò bê nghut é yanmai le, Garai Gasâng é mingdán gi, radá dâm htoq shit lô berâ ga, byu pé myit ngam tô bùm kô é yanmai le, dangtú ralhùm dông dum taí jat é gi, ¹² "Aróng wó sù byù rayuq gi, hkohkâm ayá ê hkam yù luí, dum taú lò râ ga, wê é ming shut ê râ matú hen nyi ri. ¹³ Haú mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoí joí ap byi luí, 'Ngò dum taú jé lô shoq, shi èq hpugá gá nyí láng keq.' ga luí, yhangmoq lé pying tô ri.

¹⁴ Yhâng é mingbyù wui kúm gi, yhang lé a ngui bum é nghut mù luí, yhang e ló é htâng má, 'Shí yuq ngamoq ahtoq má up nyi râ lé, ngamoq a ô nau.' ga luí, ê taí râ matú lagyo châng nhang kat akô.

¹⁵ Nghut kôlhang, yhang kúm gi, hkohkâm ayá wó hkam yù luí, dum taú jé lô jáng, yhang ngùn ap byi tô é dui-nhâng zoshâng wui lé, hpugá gá luí, amyat hkâ-myhó wó ho jat bê hkyô lé sé nau luí, yhangmoq lé wut nhang kat ri.

¹⁶ Haú hkûn, sâng-hí yuq gi, lé mù luí, 'Yhumsîng ê, ngò, náng é ngùn rajoí mai, amyat raxê joí wó ho jat yù bê.' ga taí ri.

¹⁷ Haú hkûn, yhumsîng hpó gi, 'Arâ! Nghut bê, kyet é dui-nhâng zoshâng ê, náng gi, je tiq é mù má lhang wó lum é sù nghut é yanmai, wà raxê lé upzo lo aq hkoi.' ga luí, yhang lé taí ri.

¹⁸ Htang yuq le, lé mù luí, 'Yhumsîng ê, ngò, náng é ngùn rajoí mai, amyat ngo joí wó ho jat yù bê.' gâ ri.

¹⁹ Yhumsîng gi, haú yuq lé, 'Nàng gi, wà ngo wâ lé up lo aq hkoi.' ga taí ri.

²⁰ Dum rayuq le, lé mù luí, 'Yhumsîng ê, náng é ngùn rajoí lé a byuq shoq, ngò panchoq èq htup tô lhê; wú aq, shí nghut lhê. ²¹ Nàng gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut

é yanmai, nang lé ngò gyuq ri.' ga taí ri.

²² Haú hkûn, yhumsîng gi, 'Agè ashop é dui-nhâng zoshâng ê, náng nhut mâ é dang eq rajung za, ngò, nang lé jéyâng râ nghut lhê. Ngò gi, yhumsîng yhang a tô tô é zè pé lé yù nau é eq, yhumsîng yhang a hô tô é yò mai yâm yù nau é sù, byù wui nghut é hkyô lé, náng sê to gù nghut le nhîng, ²³ ngá ngùn lé, ngò dum taú jé lô jáng, aráng eq amyat wó yù shoq, ngùn hpún kat jang má, haí mù a kat tô é lhú?' ga yhang lé taí ri.

²⁴ Hau htâng, yhumsîng hpó gi, ayàm má yap tô é bang lé, 'Haú ngùn rajoí lé yhâng chyáng mai taú yù luí, raxê joí wó sù lé jat byi keq.' ga taí ri.

²⁵ Haú bang gi, 'Yhumsîng ê, yhang gi, raxê joí wó to bê lé nhîng.' ga akô.

²⁶ Haú jáng, yhang gi, 'Ngò, nungmoq lé taí kôlé, wó sù† ó yuq le, jat byi é hui shirâ nghut lhê; a wó su chyáng mai kúm gi, yhang wó tô é lé lhang, yu pyám byi shirâ nghut lhê. ²⁷ Ahkuí, yhangmoq ahtoq má ngò hkohkâm kut râ lé a ô nau é, ngá é gyè pé lé, shí má shuí lé mù, ngá hí má sat pyám keq.' ga hkûnmó hkyô kat ri." gâ ri.

Yesuq Logúng Ji Mù, Yerusalem Wà Mó Shut Wang E Ló É Hkyô

Mht 21:1-11; Mrk 11:1-11; Yhn 12:12-19

²⁸ Yesuq gi, shí hkyô pé lé ban taí jáng, hí má so luí, Yerusalem wà mó shut doq ló nyi ri. ²⁹ Yesuq gi, Yhâng é chángzô pé eq Tsanlun Bùm mâ é Bethpage wà eq Behtani wà má jé ló kojáng, Yhâng é chángzo í yuq lé, ³⁰ "Nungnhik, hí mâ é wà má ê keq; wà haú má wang é hkûn jáng, ó le a jì wú shí é logúng zo tuí tô láng é lé, ê myâng kó râ nghut lhê; haú lé hpyi yù mù, Ngá chyáng she lò keq. ³¹ Byù rayuq yuq mai, 'Haú haí mù hpyi nyi akô?' ga nungnhik lé myi kôjáng, 'Shí du lé, haú Yhumsîng râ ri gâ.' nghú tũ taí keq." ga pyîng luí, nhang kat ri.

† 19:26 Wó sù nghu é gi, yhumsîng a-tsam lé rago dat chûng sù lé taí é nghut lhê.

³² Nhang kat é sù nhik ê jé lé, Yesuq taí kat é dông yhang, dut to láng é lé ê myang akô. ³³ Yhangnhik logúng zo haú lé hpyi nyi kô é hkûn, yhumsing wui gi, "Haú logúng zo lé, haí mù hpyi nyi akô lúhú?" ga luí, yhangnhik lé myí akô.

³⁴ Haú jáng, yhangnhik gi, "Shí du lé haú Yhumsing râ ri gâ." ga taí akô.

³⁵ Yhangnhik gi, haú logúng zo lé Yesuq chyáng she lò mù, yhangmoq é buhîng pé lé logúng ahtoq má buí luí, Yesuq lé doq ji nhang akô. ³⁶ Haú su kut, Yhang ji e ló nyi le, byu pé gi, yhangmoq é buhîng pé lé hkyô má hkang byí akô.

³⁷ Ahkuí, Tsanlun Bùm hkêgyó gyó ló é jowò eq chyáng lo é mai gi, chángzô pé banshoq bang, yhangmoq myang é laklai kumlhá pé é yanmai, gabú myit mai htê mó o mó eq Garai Gasang lé hkya-on kô é dang gi,

³⁸ "Haú Yhumsing é mying mai jé lé lo é hkohkâm gi, hkungsô wó nyi sháng gaq ô!✧ Mauhkûng htoq má, nguingón nyi sháng gaq ô! Htoq tsáng myhâng má, Garai Gasang gi, hpungwup shingkang bo nyi sháng gaq ô!"

gâ akô.

³⁹ Haú mù luí, haú byù hpûng hkaú má bo é Hparishe pé ra-am gi, "Sarâ ê, náng é chángzô pé lé tân pyám aq." ga luí, Yesuq lé taí akô.

⁴⁰ Haú hkûn, Yesuq gi, "Ngò, nungmoq lé taí kôlé, shí bang zim za nyi kó é nghut le gi, luqgok pé garû lô râ nghut lhê." ga tû taí ri.

⁴¹ Ahkuí, Yesuq, Yerusalem wà mó eq chyâng lò luí, wà mó haú lé myàng jáng, haú wà mó é matú ngaù mù, taí é gi, ⁴² "Wà nàng ê! Hkû-nyí lhê é buinyi má, nguingón é hkyô lé nàng bûn sé tô é nghut le gi, gè râ wá! Ahkuí kúm gi, haú hkyô lé nghop to bê nghut mù luí, nàng a sé lo nghut ri. ⁴³ Hkâsu mù gâ le, náng chyáng Garai Gasang lé kúm jé é hkûn, nàng a bun a sé wú kat é yanmai, náng é gye pé gi, awui ayàm má gyewap xuq mù, náng

é lhîng hkyuq mai nang lé lom tô é buinyi jé lô râ nghut lhê. ⁴⁴ Haú hkûn, nang lé lhoq htên pyám luí, nung zo pé lé le, haú ahkaú má yhang dùn nhê pyet sat pyám bekô râ; nàng gi, luqgok racham htoq má racham lháng a kê lhum loshoq, dut byuq râ nghut lhê." gâ ri.

Yesuq, Noqkuq Yhûm Lé Sêng Pyâm É Hkyô

Mht 21:12-17; Mrk 11:15-19; Yhn 2:13-22

⁴⁵ Ahkuí, Yesuq gi, Yerusalem noqkuq yhûm má wàng mù, ung zo ung shuq é bang lé, "Ngá yhûm gi, kyûdung yhûm dut râ nghut lhê.✧ ga kâ to kôlhâng, ⁴⁶ nungmoq gi, jowò shí lé 'domyaq hkyûng'✧ kut akô." ga taí uchyang, hkat htoq pyâm ri.

⁴⁷ Yhang gi, nyi wui noqkuq yhûm má mhoqshit nyi ri. Hkyangjong agyi pé, tarâ sarâ pé eq, byu pé é suwún wui kúm gi, Yhang lé wó sat pyám râ hkyô ho nyi akô. ⁴⁸ Nghut kôlhâng, byù banshoq bang gi, Yhâng mhoqshit é dang lé gyo nau nyi kô é yanmai, wó sat râ hkyô lé, a myang hô kó nghut ri.

20

Yesuq É Ahko Ahkáng Lé Myí Chyam Wú É Hkyô

Mht 21:23-27; Mrk 11:27-33

¹ Ra-nyí lé, Yesuq gi, noqkuq yhûm wàng hkaú má, byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tarâ sarâ pé, suwún wui eq rahá kut, Yhâng chyáng lé jé kômù, ² "Hai ahko ahkâng eq Nàng shí pé lé kut nyi lhê lúhú? Ahko ahkáng shí, Nang lé ó yuq byí é lúhú? Ngamoq lé taí kyô wú aq." ga Yhang lé myí akô.

³ Haú hkûn, Yhang gi, "Ngò le, nungmoq lé rajung myí wú kôlé; ⁴ Yohan byí é bapisma gi, mauhkûng mai lúhú? A nghut jáng, byu chyáng mai lúhú? Ngo lé taí kyô wú keq?" ga yhangmoq lé myí ri.

⁵ Haú hkûn, yhangmoq chom hpyê lhum kô é gi, "Mauhkûng mai nghut lhê.", nghû nga-nhúng taí jáng le, 'Haí mù, yhang lé a lumjng kô é lú?' ga rá nghut; ⁶ 'Byu chyáng mai nghut lhê.' nghû jáng le, shiwa byù ban-shoq gi, Yohan lé, myiqhtoi rayuq ga lumjng to kô é yanmai, yhangmoq, nga-nhúng lé luqgok eq dú sat kó rá nghut." ga akô.

⁷ Haú mù, yhangmoq gi, "Hkâmai nghut é lé, ngamoq a sé." ga tû taí akô.

⁸ Yesuq gi, "Haú jáng, Ngò le, hai ahko ahkâng eq shí pé kut é hkyô lé, nungmoq lé a taí kyo." ga, yhangmoq lé taí ri.

Tsibiyiq Hkyâm Yhumsing Eq Hkyâm Saí Zo Bang

Mht 21:3-46; Mrk 12:1-12

⁹ Byu pé lé, Yesuq dangtú dông xoq taí kyô é gi, "Byù rayuq gi, tsibiyiq hkyâm ralhum saí to mù, hkyâm saí zo bang chyáng ngho byí to luí, gó ming shut myáng myáng é nyi byuq ri.

¹⁰ Kyôshu yoq jé jáng, yhang gi, hkyâm saí zo bang eq, hkyâm mâ é tsibiyiq shi pé lé lhom byí kat sháng gaq ga, dui-nhâng zoshâng rayuq lé yhangmoq chyáng nhang kat ri. Nghut kôlhang, hkyâm saí zo bang gi, haú yuq lé lhom bat mù, loq kôm taú nhang kat akô. ¹¹ Gotú dui-nhâng zoshâng rayuq lé, yhangmoq chyáng dum nhang kat ri. Nghut kôlhang, yhangmoq gi, haú yuq lé le, lhom bat mù, hoq lhoq hpu luí, loq kôm dum taú nhang kat akô. ¹² Sum yuq nghû rá dui-nhâng zoshâng lé dum nhang kat ri. Yhangmoq gi, haú yuq lé le bat cheq luí, hkyâm mai hkat htoq kat akô.

¹³ Haú hkûn, tsibiyiq hkyâm yhumsing gi, 'Ngò hkâsu kut wú rá lú? Ngò chyt dap é ngá zo lé, nhang kat wú rá nghut ri. Yhang lé kúm gi, yhangmoq lhom hkungga kó abe.' ga taí ri.

¹⁴ Hkyâm saí zo bang gi, yhumsing hpô é yhangzo lé myàng kôjáng, 'Shí yuq gi, silí wunlí sing yù rá sù nghut lhê; nga-nhúng, silí wunlí haú pé wó

yú shoq, yhang lé sat pyám sháng.' ga rayuq eq rayuq taí lhum bum akô.

¹⁵ Haú mù, yhang lé hkyâm shinggan shut dú htoq kômù, sat pyám akô.

Haú su kut kôjáng, tsibiyiq hkyâm yhumsing gi, yhangmoq lé hkâsu kut rá lú? ¹⁶ Yhang gi, é mù, haú hkyâm saí zo bang lé sat pyám luí, hkyâm haú lé góbang lé htot ngho byí pyám rá nghut lhê." gâ ri.

Dang haú lé wó gyo bang gi, "Haú su gi, hkâ-nhám le a dut sháng gaq ô!" gâ akô.

¹⁷ Hau htâng, Yesuq gi, yhangmoq lé byu wú luí, "Haú jáng gi,

'Yhûm saí bang eq hkyin htoq pyâm é luqgok gi, htungchyûn mâ é ahkyak dik é luqgok dut bê.'*

ga Chyúmdang má kâ tô é gi, haí gá nau é nghut lhê lú? ¹⁸ Luqgok* haú má gyó záng é sù ó yuq nghut kôle, gyuí gyop byuq rá nghut lhê. Luqgok hau eq gyó nhê záng é sù le, nhê pyeq pyâm é hui rá nghut lhê." ga taí ri.

¹⁹ Tarâ sará pé eq hkyangjong agyi pé gi, dangtú shí gi, yhangmoq lé lhoq ang luí taí é hkyô lé, sé kô é yanmai, haú hkûn jáng lhang Yhang lé chyup yú rá matú hkyô ho nyi akô. Nghut kôlhang, byu pé lé gyuq mù a chyup shi kó nghut ri.

Kang Kat É Hkyô Eq Séng Luí Myi É Dang

Mht 22:15-22; Mrk 12:13-17

²⁰ Haú mù, yhangmoq gi, Yesuq é dang má mara wó chyup yú shoq ga, gegùn labyoq kut bang lé jowú nhang nyi akô. Haú gi, ahkáng ayá wó é mauzaú chyáng Yhang lé wó ap pyám rá matú nghut ri. ²¹ Haú jowú bang gi, "Sarâ é, nàng gi, dng dng mán mán taí mhoqshit é eq, byu é myoqdong lé a tê byí é za, Garai Gasâng é hkyô lé, tengmán é dông mhoqshit é sù nghut é lé, ngamoq sê lhê. ²² Hkoséng Khtaq lé, ngamoq kang kat rá gi, tarâ wang lhê lú? A wang é lú?" ga luí, Yhang lé myí wú akô.

* 20:17 Hkya-on 118:22 * 20:18 Luqgok nghu é gi, Yesuq lé taí ri.

²³ Nghut kôlhang, Yesuq gi, haú bang é myit goí é hkyô lé sé mù luí, yhangmoq lé, ²⁴ "Ngo lé, ngùn rachap tún shit wú keq. Ó yuq é alhô eq masat laiká dap tô ri lhú?" ga myi jáng, ²⁵ yhangmoq gi, "Kehtaq é nghut ri." ga akô.

Haú hkûn, Yesuq gi, "Haú nghut jang, Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga yhangmoq lé taí ri.

²⁶ Yhangmoq gi, byu pé hí má, Yhâng é dang má mara a wó ho myang é eq, Yhang tú taí é dâng é yanmai, maú hong byuq kôluí, zim byuq akô.

Dum Dui Toq Lô Râ Hkyô Eq Séng Luí Myî É Dang

Mht 22:23-33; Mrk 12:18-27

²⁷ Haú hkûn, haú dum dui toq hkyô a joq gâ é Saduke pé ra-am gi, Yesuq chyáng lé jé kômù, ²⁸ "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi rá matú, yhâng rhat lé chui gon ra rá nghut lhê ga, nga-nhúng lé, Mosheq kâ to byî ri. ²⁹ Hí hpyang lé, gumang nhiktâng wuì nyhit yuq nyi akô. Lagám yuq gi, myiwe yù luí, zo dù a dap é za shi ló byuq bê nghut ri. ³⁰ Lanong yuq le, yhangmang mó é chui lé gon mù, zo dù a dap é za shi ló byuq bê. ³¹ Hau htâng, Lalaq yuq mai Lahká yuq jé shoq, chuimó haú lé rayuq htâng rayuq dum gon gon kut kôlhang, zo dù a dap é chyat shi ló byuq bùm bekô nghut ri. ³² Ló htáng má, myiwe myhí haú le châng shi ló byuq bê nghut ri. ³³ Haú mù luí, haú dum dui toq é buinyì má, myiwe myhí haú gi, haú nhiktâng wuì mâ é hká yuq é yhangmyi nghut rá lhú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." ga luí, Yhang lé myî wú akô.

³⁴ Haú hkûn, Yesuq gi, "Shí mingkan htoq mâ é byu pé gi, ikun

kut é eq myi byi myi yû kut nyi bum akô. ³⁵ Shi é mai dum dui toq râ eq, haú pyat má nyi rá gíng bang é matú gi, ikun kut é eq myi byi myi yû hkyô joq lo rá a nghut. ³⁶ Haú bang gi, maumang lagyô pé su dut byuq luí, a dat shî lo kô rá nghut lhê. Yhangmoq gi, dum dui toq lô su é yhangzô pé† nghut é yanmai, Garai Gasâng é yhangzô pé nghut bekô. ³⁷ Haú nyé duq nyi é mhanpúng eq séng luí, Mosheq eq kâ tô é má lháng, Yhumsîng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'* ga bo tô é yanmai, shi é bang dum dui toq lô rá hkyô lé tún shit to bê nghut ri. ³⁸ Garai Gasang gi, shi bê bang é Garai Gasang a nghut, dui nyi bang é Garai Gasang ru nghut nyi lhê; hkâsu mù gâ le, lunglhang bang gi, Garai Gasâng é hí má dui nyi é bang chyat nghut akô." ga yhangmoq lé tú taí ri.

³⁹ Haú hkûn, tarâ sarâ pé ra-am gi, "Sarâ ê, nàng taí é jô ri." ga akô. ⁴⁰ Haú mù, yhangmoq gi, Yhang lé haí le a wám myî jat lo kó nghut ri.

Hkrisduq Gi, Ó Yuq É Yhangzo?

Mht 22:41-46; Mrk 12:35-37

⁴¹ Hau htâng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkâsu mù taí akô lhú? ⁴²⁻⁴³ Dawiq yhang yhang lháng gi, Hkya-on Kungtôn Laiká má, 'Haú Yhumsîng Garai gi, ngá é Yhumsîng lé, "Ngò, náng é gyè pé lé,

náng é hkyî nang tanghkuq kut pyám byî é hkyíng jé shoq, Ngá é loqyo hkyam‡ shut zung nyi shi aq." gâ ri.*

ga kâ tô ri. ⁴⁴ Haú mù, Dawiq yhang lháng, Hkrisduq lé, Yhumsîng gâ é nghut le gi, Hkrisduq gi, yhangzo za hkâsu ge nghut rá lhú?" ga taí ri.

† 20:36 Dum dui toq lô su é yhangzô pé gâ é gi, Yesuq lé lumjîng luí, shi é htâng má dum dui toq lo é bang lé gâ lhê. * 20:37 Htoq Ló 3:6 ‡ 20:42-43 Loqyo hkyam nghu é gi, ahko ahkáng wó é jowò nghut lhê. * 20:42-43 Hkya-on 110:1

Tarâ Sará Pé Lé Sidiq Râ Hkyô
Mht 23:1-36; Mrk 12:38-40; Luk
11:37-54

⁴⁵ Byù banshoq gyô nyi é u lé, Yesuq, Yhâng é chángzô pé lé tai é gi, ⁴⁶ "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún lui, gai pé má hkunggâ é èq shichyen rá lé le, tarajong pé má é ahkyak dik é zùng jang pé eq poi pé má é je réng é zùng jowò pé má myang zùng rá lé le, ô nau nyi bum akô. ⁴⁷ Yhangmoq gi, chuimó pé é yhûm-yò pé lé hpyoq zo hpyoq shuq kôluî, kyû hîng hîng dîng shit mhaû é bang nghut akô. Haû sù é bang gi, je riyhang htan é dông dam byi é hui zo kó rá nghut lhê." ga ri.

21

Chuimó Myhí Kat É Alu
Mrk 12:41-44

¹ Yesuq tu wú kat é hkûn lé, noqkuq yhûm má é alu sidek má, wó bang alu kat nyi bùm kô é lé myang ri. ² Dum nghut jáng, gyi htingchap ngùn zo í chap za kat é, myung é chuimó myhí rayuqlé le myang ri. ³ Haû mù, Yhang gi, "Ngò, nungmoq lé teng za tai kôlé, shí myung é chuimó myhí gi, góbang banshoq htoq má je myo kat bê nghut ri. ⁴ Hkâsu mù gà le, haû góbang banshoq gi, yhumsîng agùn agó wó é má é lé, lé kat akô; yhang kúm gi, myùng sù nghut kôle, yhâng asak lé baú ra ngùn lhunglhang lé kat bê nghut ri." ga tai ri.

Ló Htûm Buinyi Má Dut Lò Râ Hkyô
Mht 24:1-21, 29-35; Mrk 13:1-19,
24-31

⁵ Noqkuq yhûm lé, yúng é luqgok pé èq le, alu chyunghuq pé èq le, mhôn tô ri ga, chángzô pé ra-am hkya-ôn bùm kôjáng, Yesuq gi, ⁶ "Nungmoq myang nyi é shí pé gi, luqgok rachâm htoq racham lhang a kê lhum loshoq, hpyoq hpyi pyâm é buinyi jé rá nghut lhê." ga tai ri.

⁷ Haû su ga jáng, yhangmoq gi, "Sarâ ê, haû nghut le gi, haû hkyô pé gi, hkâ-nhâm dut lô rá lhú? Haû dut rá chyâng lò jáng, hkasû é kumlhá htoq

lô rá nghut lhê lhú?" ga, Yhang lé myi akô.

⁸ Haû hkûn, Yhang gi, "Nungmoq gi, hkyô shuí nghoq é a hui kó sháng gaq, sidiq nyi keq. Hkâsu mù gà le, 'Ngò gi, Mesaia nghut lhê.' ga le, 'Ahkyíng chyâng lò bê.' ga le, Ngá myíng lé lîng é byù myo myo pô htoq lô kó rá nghut lhê. Nghut kôlhang, nungmoq gi, yhangmoq htâng hkácháng kó. ⁹ Majan htoq é eq, gumlau toq é hkyô lé, wó gyo kôjáng, hkâgyuq hkâkyûm kó, haû hkyô pé hí dut lò rá nghut lhê. Nghut kôlhang, ló htâng é buinyi gi, haû hkûn jáng dut rá a nghut shi." ga tai ri.

¹⁰ Hau htâng, Yhang, yhangmoq lé dum tai é gi, "Ra-myû eq ra-myû, mingdán ralhum eq ralhum majan zân lhûm lò kó rá nghut lhê. ¹¹ Jowò myo myo má, layàng mó nún lo é, noli nojàng myô lo é eq mutmó gyó lo é pé, dut lò rá nghut lhê; gyuq chiq jung pé eq kumlhá mó le, mauhkûng htoq mai htoq shit lô rá nghut lhê.

¹² Nghut kôlhang, haû hkyô banshoq a dut shimá, Ngá myíng é yanmai, byu pé gi, nungmoq lé chyup yû lui, zing-rí yù mù, tarajong pé eq htóng pé má ap pyám kó rá nghut lhê, hau htoq agó, nungmoq gi, hkohkam pé eq zau pé chyáng ê ap byi é le, hui kó rá nghut lhê. ¹³ Haû su é pé mai, nungmoq gi, ngò eq séng lui, saksé wó hkám rá hkyô htoq lô berá nghut lhê. ¹⁴ Nghut kôlhang, hkâsu nghû lhom tú tai rá hkyô lé, hí mai a myit wui nyi rá lé, nungmoq myit hpyit to keq. ¹⁵ Hkâsu mù gà le, nungmoq é gye pé lhunglhang bang, hai le a wó lhom tú tai loshoq, ngò, nungmoq lé dang eq hpaqchyî byi rá nghut lhê. ¹⁶ Nghut kôlhang, nungmoq gi, înu îwâ pé, âgu âmâng pé, mungmoq eq buinûm ji-myi wui èq lhang, ap pyâm é hui kó rá nghut lhê. Yhangmoq gi, nungmoq chyáng má é ra-am lé lhang, sat pyám kó rá nghut lhê. ¹⁷ Byù lhunglhang bang gi, Ngá é yanmai, nungmoq lé a nguì kut kó rá nghut lhê. ¹⁸ Nghut kôlhang, nungmoq é

xâm rahkat lhang wó htên byuq râ a nghut.* ¹⁹ Nungmoq gi, wó jân é hkyô mai, asak lé wó yû kô râ nghut lhê.

²⁰ Yerusalem wà mó lé gyè hpúng mó eq lóm tô é lé, nungmoq myàng jáng, wà mó haû htên byuq râ ahkyíng chyâng lò bê lé, bún sê nyi keq. ²¹ Haû hkûn lé, Yuda mau má nyi é bang gi, bùm pé shut hpanq doq ló kó sháng gaq; haû wà hkaû má nyi é bang le, hpanq htoq kó sháng gaq; wà tiq wà zo pé má nyi é bang le, wà hkaû shut a wàng kó sháng gaq. ²² Hkâsu mù gà le, Chyúmdang má kâ to má kâ to banshoq dik lò râ matú, buinyi haû pé gi, mara dam byi é buinyi pé dut râ nghut lhê. ²³ Haû buinyi pé má, zogúng dut é myiwe wui eq naú huq ashî nghut é înu wui gi, gyai yhang wuîhke kô râ nghut lhê; hkâsu mù gà le, shí ming ahtoq má wuîhke mó eq, shí amyú ahtoq má Garai Gasang nhikmó-yô é jé lô râ nghut lhê. ²⁴ Yhangmoq gi, shâm lhâm eq sat pyám hui lhê eq, ming hkanq ming mó má chyup shuí ló é le hui kó râ nghut lhê. Tungbaù pé lé byi tô é buinyi ahkyíng htáng shoq, Yerusalem wà mó gi, tungbaù pé eq nâng zik tô é hui râ nghut lhê.

²⁵ Haû hkûn, bui, kyî, lhamó pé má, kumlhá htoq shit râ nghut lhê. Wuishuq lung-aû má é wuîlhêng pé é mying é htê mó é yanmai, myigùng htoq má, byù myú chângjup gi, hkâsu kut râ a sé loshoq maú é eq myit wui myit hkê é hui bekô râ nghut lhê. ²⁶ Byu pé gi, mingkan htoq má dut lò râ é hkyô pé lé, a jé shi mai myit gyuq kô é yanmai, moq byuq ló bùm kó râ nghut lhê; hkâsu mù gà le, mauhkûng má é wum-o a-tsam pé gi, lhoq nhûn é hui bùm kô râ nghut lhê. ²⁷ Haû hkûn, haû Byu Yhangzo gi, mhut ji mù, hpungwup a-tsam mó eq le, hpungwup shingkanq mó eq le, gyó lé lo é lé, yhangmoq byu-myàng kó râ nghut lhê. ²⁸ Haû hkyô pé dut hi lò jáng, ulhum tû mù wú kat keq, hkâsu mù gà le, nungmoq lé hkyi yû

râ buinyi gi, chyâng lò bê nghut ri." gâ ri.

²⁹ Yhang, yhangmoq lé dangtú dông xoq taí é gi, "Maihpáng gâm eq sigâm banshoq lé wú wú keq. ³⁰ Sikbu nyún lo é lé myàng jáng, bui nyé nám chyâng lò bê ga luî, nungmoq yhang dat wú sê akô. ³¹ Haû eq rajung za, haû hkyô pé dut nyi é lé, nungmoq myàng kôjáng, Garai Gasâng é mingdán gi, chyáng bê nghut é hkyô lé, nungmoq sé lo keq.

³² Ngò, nungmoq lé teng za taí kôlé, shí pyat mâ é byu pé a ban shi byuq shimá, haû hkyô pé banshoq dut byuq râ nghut lhê. ³³ Mauhkûng eq myigùng gi, a joq lo dut byuq râ nghut lhê; nghut kôlháng, Ngá é dang gi, ru joq nyi râ nghut lhê.

³⁴ "Nghut kôlháng, zo myo shuq myô é, î shuq wut é, mingkan htoq má é myit wui myit hkê é pé eq, nungmoq é i-myit wò lai nyi luî, haû ngò jé lé é buinyi gi, lhai bik lo é su, nungmoq ahtoq má byodàn tung a jé lò sháng gaq, sidiq nyi keq. ³⁵ Hkâsu mù gà le, buinyi haû gi, mingkan htoq má nyi é byù banshoq bâng é ahtoq má, haû su jé lô râ nghut lhê. ³⁶ Haû mù luî, haû dut lò râ hkyô banshoq mai, nungmoq wó lut lai mù, haû Byu Yhangzô é hí má, wó yap gíng é bang dut sháng gaq, hkâ-nhám le kyúdung luî, ahkyíng hkanqmó má machya nyi keq." gâ ri.

³⁷ Yesuq gi, nyi wuî noqkuq yhûm má mhoqshit nyi luî, myin wuî Tsan-lun Bùm gà é bùm shut htoq é mù, é nyi to to kut ri. ³⁸ Byù banshoq bang gi, Yhang mhoqshit é dang gyo râ ga, napsûn noq noq mai noqkuq yhûm má jé lé bum akô nghut ri.

22

Yesuq Lé, Yudaq Eq Ung Zô É Hkyô Mht 26:1-5,14,16; Mrk 14:1-2, 10-11; Yhn 11:45-53

¹ Ahkuî, Lhoqlhai Poî gà é Azuma (múnchi a kat é Muk Zo Poî) jé râ chyâng lò bê. ² Haû mù, hkyangjong

* **21:18** Shí má gi, asak woi-nyí a shí râ hkyô lé taí é nghut lhê.

agyi pé eq tarâ sará pé gi, Yesuq lé hkâsu kut wó sat pyám râ hkyô, ho nyi akô; hkâsu mù gê le, yhangmoq gi, mingbyû wui lé gyuq bùm kô é yanmai nghut ri. ³ Haú hkûn, lagyo raxe í yuq má bo é Iskarut gê é Yudaq chyáng Tsadán wàng mù luí, ⁴ yhang gi, htoq ê mù Yesuq lé hkâsu kut ap pyám râ hkyô lé hkyangjong agyi pé, noqkuq yhùm zúng é gyezau pé eq, é hpyê ri. ⁵ Haú mù, yhangmoq gi, gyô nguì luí, Yudaq lé ngùn byi râ hkyô myit hui bekô. ⁶ Yudaq le hap yù luí, byù hpúng má a nghut é hkûn, Yesuq lé ap pyám râ hkyô ho nyi bê nghut ri.

Lhoqlhai Poí Lé Món É Hkyô

Mht 26:17-30; Mrk 14:12-26; Yhn 13:21-30

⁷ Ahkuí, haú Lhoqlhai Poí mâ é sauzo shigu hkungga sat nhông byi râ é Azuma buinyi jé bê. ⁸ Haú hkûn, Yesuq gi, Petruq eq Yohan lé, "Nga-nhúng zo râ matú Lhoqlhai Poí ê món láng keq." ga luí, nhang kat ri.

⁹ Haú nhik gi, "Hkâmá ê món to nhâng nau ri lú?" ga luí, Yhang lé myí akô.

¹⁰ Haú hkûn, Yesuq gi, "Nungnhik, myuq hkaú shut wang e ló le wui yambú waq é byù rayuq lhom hui râ nghut lhê; haú yuq chyáng châng ló luí, yhang wang ló é yhùm má châng wàng mù, ¹¹ yhumsing lé, 'Ngò Ngá é chángzô pé eq rahá, Lhoqlhai Poí zo râ bíng wap hkâmá nghut lhê lú ga, Sará myí nhang kat ri.' nghú taí keq. ¹² Haú hkûn, hen tô é ahtoq mâ é wap mó lé, nungnhik lé lhom tân shit râ nghut lhê; wap haú má ê món to keq." ga taí kat ri.

¹³ Haú chángzo nhik htoq e ló le, Yesuq taí kat é eq roq za ê myâng kômù, Lhoqlhai Poí lé món to bekô nghut ri.

Yhumsing É Myinzang

¹⁴ Ahkuí, ahkyíng jé jáng, Yesuq eq Yhâng é chángzô pé rahá za zohpoq má zung tô akô. ¹⁵ Haú hkûn, Yesuq gi, "Ngò wuîhke jamjau hpuzô é a hui shi má, Lhoqlhai Poí shí lé nungmoq

eq rahá zo râ lé, Ngò gyai ô nau nyi lhê. ¹⁶ Hkâsu mù gê le, ngò, nungmoq lé taí kôlé, Garai Gasâng é mingdán má poí shí a ló dik dik gi, ngò haú lé dum zo râ a nghut ló." ga luí, yhangmoq lé taí ri.

¹⁷ Hau htâng, Yesuq gi, góm lé yù mù jeju ban hkya-on jáng, "Góm shí lé yù luí, nungmoq yhangchang gàm shuq lhum keq. ¹⁸ Ngò, nungmoq lé taí kôlé, ahkuí mai gi, Ngò, Garai Gasâng é mingdán a jé jé tsibiyiq wing lé dum shuq râ a nghut lo." ga taí ri.

¹⁹ Hau htâng, Yhang gi, muk lé yù mù, jeju hkya-on luí, muk lé myhik hpé mù, yhangmoq lé byi uchyang, "Shí gi, nungmoq é matú byí pyâm é, Ngá é gungdu nghut lhê; Ngo lé bûn nyi râ matú, shí su kut nyí keq." ga taí ri.

²⁰ Haú eq rajung za, myinzang ban zo jáng, góm lé le yù mù, "Góm shí gi, nungmoq é matú htoq pyâm é, Ngá é sui má xuq tô é dangshikaq asik nghut lhê. ²¹ Nghut kôlhang, wú keq, Ngo lé ap pyám râ sù gi, zang bó shí má ngò eq rahá nyi tô ri. ²² Haú Byu Yhangzo gi, hkyin to huí é eq rajung za shí râ nghut lhê; nghut kôlhang, Yhang lé ap pyâm é sù gi, dingnyé wó ri." ga taí ri. ²³ Haú su ga jáng, lagyô pé gi, yhangmoq má shí hkyô kut râ sù gi, hká yuq nghut râ lú ga, rayuq eq rayuq myí lhum bum akô.

²⁴ Haú htoq agó, yhangmoq mâ é hká yuq sheq je kô lhê lú ga le, rayuq eq rayuq taí htíng lhùm bum akô. ²⁵ Haú mù luí, Yesuq gi, "Tûngbaù pé é hkohkam pé gi, yhangmoq byù myú pé é ahtoq má up zô nyi kô é nghut luí, byu pé gi, ahkáng ayá wó é bang lé jeju yhumsing pé ga luí, taí hkungga nyi bum akô. ²⁶ Nungmoq kúm gi, haú su hkâkut kó. Nungmoq má je ko sù gi, asak je tiq é sù su, up é sù le, dui-nhâng zoshâng su nghut nyi sháng gaq. ²⁷ Hká yuq sheq je kô lhê lú? Zô zung nyi sù lú? Haú a nghut jáng, saí tsô é sù lú? Zô zung nyi é sù sheq nghut ri. Nghut kôlhang, ngò gi, nungmoq mâ é saí tso sù su za nghut nyi

lhê. ²⁸ Nungmoq kúm gi, Ngò jamjau huì nyi le, Ngò eq rahá nyi nyi é bang nghut nyi akô. ²⁹ Haù su mù, Ngá wa gi, Ngo lé, mingdán ap byí é su, Ngò le, nungmoq lé mingdán ap byi râ nghut lhê. ³⁰ Haù mù, Ngá é mingdán mâ é, Ngá é zangbó má, nungmoq wó zo kó râ nghut lhê; nungmoq le hkohkâm-tanghkuq má zung to mù, Israelaq amyú raxe í hú lé jéyáng kó râ nghut lhê.

Yesuq Lé, Petruq (Simun) He-ngik Pyâm Râ Hkyô

Mht 26:31-35; Mrk 14:27-31; Yhn 13:36-38

³¹ Simun, Simun ê, wú aq, sungsô cham lé shaí é su, nungmoq lé wó shaí shoq ga, Tsadán wá gi, ahkáng dung bê. ³² Nghut kôlhang, náng é lumjíng myit a hten sháng gaq nghú, Ngò, náng é matú kyúdung byi bê; náng dum lhing bûn lò jáng, nung gu nung mâng pé lé wum-o lhoq ging byi aq." ga taí ri.

³³ Haù hkûn, Simun gi, "Yhumsîng ê, htóng wâng kôlhang, shí kôlhang, ngò gi, náng eq rahá cháng râ matú myit hpyit to bê." ga tû taí ri.

³⁴ Yesuq gi, "Petruq ê, nang lé Ngò taí lé, hkû-nyí* lhang woq a tûn shi má, náng, Ngo lé a sé ga luí sum dâm he-ngik pyám râ nghut lhê." ga taí ri.

³⁵ Haù htâng, Yesuq, yhangmoq lé taí é gi, "Ngò, nungmoq lé ngunhtûng, jhtûng, hkyî-tsung a wùn a chûng nhang é za, nhang kat é nghut hkûn, nungmoq chyáng haí ra akô l hú?" ga myí jáng, yhangmoq gi, "Haí le a ra lo." ga taí akô.

³⁶ Haù hkûn, Yhang gi, "Ahkuí kúm gi, ngunhtûng wó sù gi, yù wun sháng gaq, jhtûng wó sù le, yù wùn sháng gaq, shâm a wó sù gi, bumó ung luí wuì sháng gaq. ³⁷ Hkâsu mù gâ le, Ngò, nungmoq lé taí kôlé, Ngò eq séng luí Chyúmdang má kê tô é gi, dut lò berâ nghut lhê; 'Haù yuq gi, yubak mara wó bang má nghap lhôm to bê.'* ga

kê tô é dang gi, Ngá chyáng dik lò râ nghut lhê." ga luí, yhangmoq lé taí ri.

³⁸ Haù mù, lagyô pé gi, "Yhumsîng ê, wú aq, shí má shâm í hkyam joq tô ri." ga taí kôjáng, Yesuq gi, "Gé bê." ga luí, yhangmoq lé taí ri.

Tsanlun Bùm Má Yesuq Kyúdung É Hkyô

Mht 26:36-46; Mrk 14:32-42

³⁹ Ahkuí, Yesuq gi, htoq luí, gó hkun é eq rajung za, Tsanlun Bùm shut htoq e ló bê nghut ri; Yhâng é chángzô pé le Yhang htâng châng e ló akô. ⁴⁰ Haù jowò má jé jáng, Yhang gi, "Nungmoq, gunglaú é a hui sháng gaq, kyúdung nyi keq." ga luí, yhangmoq lé taí to mù, ⁴¹ chángzô pé nyi é mai luqgok radú we kô gâng e ló luí, hkyihput htuq mù,

⁴² "Áwa ê, Náng ô nau é nghut le gi, góm† shí lé Ngá chyáng mai lhaí pyám byi laq. Nghut kôlhang, Ngò ô nau é dông a nghut, Náng ô é dông sheq nghut sháng gaq." ga kyúdung ri. ⁴³ Haù hkûn, mauhkûng mai mau-mang lagyô rayuq htoq lé luí, Yhang lé i-myt nhik lé taí tîng ri. ⁴⁴ I-myt hkaú má dik shoq hkâm zo wuì é yan-mai, Yhang je riyhang kyúdung wum kat nyi ri; Yhâng é buibù le, sui hkyí sui pat su myigùng má yui gyó ri.

⁴⁵ Haù mù, kyú ban dung jáng, Yhang toq luí, chángzô pê chyáng ló wú le, yhangmoq gi, myit yón mù luí, yhup myhî to kô é lé ló myâng mù, ⁴⁶ "Haí mù yhup nyi akô l hú? Toq keq! Gunglaú é a hui sháng gaq, kyúdung nyi keq." ga luí, yhangmoq lé taí ri.

Yesuq Lé Chyup É Hkyô

Mht 26:47-56; Mrk 14:43-50; Yhn 18:3-11

⁴⁷ Haù su ga, ru taí nyi ashí le, wú keq, haù chángzo raxe í yuq má bo é Yudaq gi, hkyô hí mù byù rajùm rayò lé shuí lé lô luí, yhang gi, Yesuq lé bopuq puq râ ga huì lé lo ri. ⁴⁸ Haù mù luí, Yesuq gi, "Yudaq ê, náng gi,

* **22:34** Yudaq byu pé é ra-nyí gi, myinhtâng buì wang é mai, htang nyí buì wang é jé shoq nghut lhê. Shí má é hkû-nyí gi, nga-nhûng é matú myín âng ri. † **22:37** Esai 53:12 † **22:42** góm gâ é gi, Yesuq jamjau hui râ hkyô eq shí râ hkyô lé, taí nau é nghut lhê.

haù Byu Yhangzo lé bopuq puq é èq gyè pè chyáng ap pyâm lhê lhú?" ga luí, yhang lé lhom myî ri.

⁴⁹ Haù hkûn, Yesuq htâng cháng bang gi, haí dut lò râ lé bún sé kô é yanmai, "Yhumsîng ê, ngamoq gi, sham èq zân le, gè râ lhú?" ga myî akô.

⁵⁰ Yhangmoq chyáng mâ é rayuq gi, hkyangjong mó é dui-nhâng zoshâng lé zân kat luí, yhâng é loqyo nohkyap byit byuq bê nghut ri.

⁵¹ Yesuq kúm gi, "Gé bê. Yhangmoq ô nau é su nghut kó sháng gaq." ga tú taí mù, haù yuq é nohkyap lé ê záng luí lhoq gè byî ri.

⁵² Yesuq gi, Yhang lé chyup râ ga jé lé é hkyangjong agyi pé, noqkuq yhûm zúng é zau pé eq agyi suwún wuî lé, "Nungmoq gi, damyaq rayuq lé chyup é su, shâm, dumbáng eq kut luí, lé lo akô lhú?" ⁵³ Ngò gi, nyí wuî, noqkuq yhûm má nungmoq eq rahá nyí kôlhang, nungmoq Ngo lé chyup yû râ ga a hen wú kó; ahkuí gi, mauchut èq up[†] nyi bê yanmai, nungmoq é ahkyíng nghut nyi ri." ga taí ri.

Yesuq Lé, Petruq Èq He-ngik Pyâm É Hkyô

Mht 26:57-58, 67-75; Mrk 14:53-54, 66-72; Yhn 18:12-18, 25-27

⁵⁴ Haù hkûn, yhangmoq gi, Yhang lé chyup yû mù she ló luí, hkyangjong mó é yhûm shut shuí wang ló akô. Petruq le we we mai châng tô ri.

⁵⁵ Ahkuí, yhangmoq gi, wàng hkaú má myi mut yû luí zung tô bum é hkûn, Petruq le yhangmoq é ahkaú má bo tô ri. ⁵⁶ Langchyáng myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luí, "Shí yuq le Yesuq eq rahá nyi sù nghut ri." ga taí ri.

⁵⁷ Haù hkûn, Petruq gi, "Myiwe myhí ê, nàng taí é sù lé, ngò a sé." ga he pyâm ri.

⁵⁸ Hau htâng hkâ-myháng a myáng má, byù rayuq gi, yhang lé dum myàng luí, "Nàng le yhangmoq chyáng bo nyi sù nghut ri." ga taí kat jáng,

Petruq gi, "Byù hpó ê, ngò a nghut." ga tú taí ri.

⁵⁹ Hkyíng hkum rahkum kô myáng jáng, rayuq le, "Gè gè yhang, shí yuq gi, Yhang eq rahá nyi wún sù nghut ri; haí mù gâ le, yhang gi, Galile byù le nghut ri." ga zuq zuq taí ri.

⁶⁰ Petruq gi, "Byù hpó ê, nàng taí nyi é hkyô lé, ngò a sé." ga tú taí ri. Haù su ga ru taí nyi ashí le, woq tân bê nghut ri. ⁶¹ Haù hkûn, Yesuq gi, lhîng luí, Petruq lé wú kat ri. Haù mù, Petruq gi, "Hkû-nyí lháng, woq a tân shi má, nàng Ngo lé sum dâm he pyám râ nghut lhê." ga luí, Yhumsîng yhang lé taí é dang lé bún kat ri. ⁶² Haù mù, yhang gi, shinggan shut htoq ê luí, gyai yhang ê ngau nyi ri.

Gyezô Pé Yesuq Lé Rhoi É Hkyô

⁶³ Yesuq lé zúng nyi é bang gi, Yhang lé rhoi luí nghap myíng nghap htê mu nyi akô. ⁶⁴ Yhangmoq gi, Yhâng é myoqdong nghop pyám byi luí, "Nang lé bat sù gi, ó yuq nghut ri lhú? Myiqhtoi htoí wú aq." ga myî akô. ⁶⁵ Yhangmoq gi, Yhang lé nyhap é dang ajung jung dông taí rhoi nyi akô.

Suwún Wui É Hí Má Yesuq Jé Nyi É Hkyô

Mht 26:59-66; Mrk 14:55-64; Yhn 18:19-24

⁶⁶ Napkyó myoqmyàng jáng, ming-byû wui é suwún hpúng bang eq rahá, hkyangjong agyi pé, tarâ sará pé, zup hpong kut nyi é má, Yesuq lé shuí è mù, ⁶⁷ "Nàng Hkrisduq nghut é têng le gi, ngamoq lé taí kyo laq." gâ akô.

Yesuq gi, "Ngò gi, Hkrisduq nghut lhê nghú taí kôlhang, nungmoq jíng kó râ a nghut. ⁶⁸ Ngò, nungmoq lé myi kôlhang, nungmoq gi, tú taí kó râ a nghut. ⁶⁹ Nghut kôlhang, ahkuí mai haù Byu Yhangzo gi, a-tsam bo dik é Garai Gasâng é loqyo hkyam má wó zung nyi berâ nghut lhê." ga luí, yhangmoq lé taí ri.

⁷⁰ Haù hkûn, yhangmoq banshoq bang gi, "Haù nghut le gi, Nàng, Garai

[†] 22:53 Mauchut èq up gâ é gi, Tsadán èq up é lé gâ ri.

Gasâng é Yhangzo nghut lhê lhú?" ga myí akô.

Yesuq gi, "Nungmoq taí é eq rajung za Ngò nghut lhê." ga luí, yhangmoq lé tú taí ri.

⁷¹ Haú hkûn, yhangmoq gi, "Nga-nhúng haí jung saksé wá râ nyi ashí lhú? Yhâng é nhut mai yhang, taí htoq kat é dang lé, nga-nhúng wó gyo bê nghut lhê." ga akô.

23

Yesuq Lé Mara Hun É Hkyô

Mht 27:1-2, 11-14; Mrk 15:1-5; Yhn 18:28-38

¹ Haú hkûn, zup zîng tô é bang ban-shoq gi, htoq mù, Yesuq lé mauzau Pilat chyáng shuí wang ê luí, ² "Shí yuq gi, mingbyû wui lé hkyô shuí nghoq é eq, hkoséng Kehtaq chyáng kang kat râ hkyô lé le hkûm to luí, Yhânggùng yhang gi, haú Hkrisduq nghú é hkohkâm nghut lhê ga luí, taí nyi é lé ngamoq myang ri." ga luí, Yhang lé mara hun akô.

³ Haú hkûn, Pilat gi, Yesuq lé, "Nàng gi, Yudaq byu pê é hkohkâm nghut lhê lhú?" ga myí jáng, Yesuq gi, "Nàng taí é eq rajung za nghut lhê." ga tú taí ri.

⁴ Pilat gi, "Shí yuq lé hún râ mara ngò a myàng." ga luí, hkyangjong agyi pé eq shiwa byu pé lé taí ri.

⁵ Nghut kôhang, haú bang gi, "Shí yuq gi, Yuda mau gón má yhang mhogshít é dông mai, mingbyû wui é i-myt lé shuí gabyông ri. Haú gi, Galile mau mai ahkuí shí má jé shoq nghut bê nghut ri." ga zuq zuq taí bum akô.

⁶ Pilat gi, haú su ga kô é lé wó gyo jáng, Yesuq Galile byù nghut é, a nghut é hkyô lé myí wú ri. ⁷ Yesuq gi, Herut up é mau mâ é byù nghut é lé Pilat sé jáng, haú u lé Yerusalem wà mó má nyi tô é Herut chyáng, ê dé kat nhang ri.

⁸ Herut gi, Yesuq lé myàng jáng, gyai yhang gabú pyám ri. Hkâsu mù gâ le, Yhâng é hkyô lé wó gyô wú mù, Yhang laklaí kumlhá ralhum lhum kut shit râ lé, wó myâng shoq ga, myit myoqbyu nyi é nghut luí, Yhang lé

myàng nau é gyai yhang myáng bê nghut ri. ⁹ Haú mù, yhang gi, Yesuq lé dangmyi myo myô èq myí wú kôhang, Yesuq gi, dang rahkun lháng a tú taí byi nghut ri. ¹⁰ Hkyangjong agyi pé eq tarâ sará pé gi, yap to mù, Yhang lé mara gyai yhang chôm hun akô. ¹¹ Herut eq yhâng é gyezô pé gi, Yesuq lé rhoi jihkyoí kut mù, atam é dông taí hpoí kô luí, réng é mebu hut byi mù, Pilat chyáng dum taú dé nhang kat akô. ¹² Haú nyí jáng, hí hpyang gyè dut lhùm é Herut eq Pilat gi, buinùm dut byuq bekô nghut ri.

Yesuq Lé Sat Râ Matú Doqdân É Hkyô

Mht 27:15-26; Mrk 15:6-15; Yhn 18:39—19:16

¹³ Haú hkûn, Pilat gi, hkyangjong agyi pé eq zau suwún wui, mingbyû wui lé wut tsîng to mù, ¹⁴ "Shí yuq gi, mingbyû wui lé hkyô shuí nghoq ri ga, Yhang lé nungmoq ngá chyáng shuí lé lô bekô. Ahkuí, wú keq, nungmoq é hí má, Yhang lé ngò myí wú le, Yhang má nungmoq hun é mara lé ngò a myàng nghut ri. ¹⁵ Hau htoq agó, Herut le, hai mara le a myàng mù, shí yuq lé nga-nhùng chyáng dum dé kat byi bê nghut ri; haú mù luí, wú keq, shí yuq gi, shí gíng é mara haí le a kut shut nghut ri. ¹⁶ Haú mù, ngò, Yhang lé dam byi luí, nhang pyám rà." ga luí, yhangmoq lé taí ri.

¹⁷ Nghut kôhang, Lhoqlhai Poí hkangmó má, Pilat gi, mingbyû wui lé htongbyû rayuq yuq nhang kat byi byi kut é yanmai, ¹⁸ yhangmoq banshoq bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga luí, chôm wut garu bum akô. ¹⁹ Barabaq gi, wà htum má gumlau kut é eq byù sat é yanmai, htóng gyó nyi sù nghut ri.

²⁰ Pilat gi, Yesuq lé nhang pyám nau é nghut mù luí, yhangmoq lé dum puq taí ri. ²¹ Nghut kôhang, yhangmoq gi, "Yhang lé tapzîng má jén tap pyám aq, jén tap pyám aq!" ga luí, wut taí garú nyi bum akô.

22 Haú mù luí, sum dâm nghû râ hkûn, Pilat dum taí é gi, "Haí mù luí lhú? Yhang gi, hai mara kut shut bê lhú? Yhang má shí gíng é mara lé ngò a myàng, haú mù, ngò, Yhang lé bat, nhuq, mhoqshit luí, nhang pyám rà." ga luí, yhangmoq lé taí ri.

23 Yhangmoq gi, Yesuq lé tapzîng má wó jén sat pyám shoq ga, zuq zuq htê mó o mó èq dúng wut nyi akô nghut é yanmai, wó taí ung yù bekô nghut ri. 24 Haú mù luí, Pilat gi, yhangmoq dúng é eq rajung za myit hpyit doqdan byí ri. 25 Haú su mù, yhang gi, yhangmoq dúng é eq rajung za, wà htum má gumlau kut é eq byù sat é mai, htóng gyó nyi sù lé nhang kat byi luí; Yesuq lé gi, yhangmoq ô nau é dông ap byi kat bê nghut ri.

Yesuq Lé Tapzîng Htoq Má Jén Tap É Hkyô

Mht 27:31-44; Mrk 15:21-32; Yhn 19:17-27

26 Yhangmoq gi, Yesuq lé shuí htoq ló kô é hkûn, yosô wà mai lo é, Kuruni myuq byú nghut é Simun ga sù lé, chyup yú mù, tapzîng waq nhâng luí, Yesuq htâng má cháng nhang akô.

27 Byù rajùm rayò gi, Yhang htâng má châng e ló bum akô. Yhang é yanmai ngaubyi ngàu nhap eq iyon yôn é myiwe zo wuì le haú má bo tô ri. 28 Yesuq gi, yhangmoq shut lhîng wú luí, "Yerusalem byizo wuì ê, Ngá é yanmai hkâ-ngau nyi kó, nungmoq gi, yhumsing gùng eq yhumsing é zo dù wui é matú sheq ngau nyi keq. 29 Hkâsu mù gâ le, 'Zogùng a dut wú é eq naú a huq wú é baùdung myhí pé gi, hkungsô wó nyi ri.' ga luí, taí é buinyi gi, jé lô râ nghut lhê. 30 Haú buinyi má, byu pé gi, bùm pé lé, 'Ngamoq ahtoq má byoq nhé aq!' ga luí le, kong pé lé,

'Ngamoq ahtoq má nghop aq!'[☆] ga luí le, wut taí bùm bekô râ nghut lhê. 31 Byu pé gi, sikhâm jùm tô ashí le isu kut kô é nghut le gi, màn jáng gi, hkâsu wá dut lò râ lhú?" ga taí ri.

32 Haú hkûn, damyaq í yuq lé le, sat pyám rà ga, Yesuq eq rahá shuí htoq ló akô. 33 Ahkuí, Ugyap nghu é kong má jé jáng, Yesuq lé tapzîng htoq má jén tap tô é hkûn, damyaq í yuq lé le, loqpai loqyò shut kut luí tapzîng má jén tap tô akô. 34 Haú hkûn, Yesuq gi, "Áwa ê, yhangmoq lé mara hkyut pyám byi laq; hkâsu mù gâ le, yhangmoq kut é hkyô lé yhangmoq a sé kó nghut ri." ga taí ri. Gyezô pé gi, Yhâng é mebu pé lé lháng, hkyîn shosé she é dông gam yu pyám byí akô.

35 Mingbyú wuì gi, yap to mù tu wú nyi akô. Zau suwún wuì Yhang lé nyhap é gi, "Yhang gi, byù góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhânggùng yhang le hkyi yu wú sháng gaq." ga akô.

36 Gyezô pé le, huí ê mù, rhoi nyaú nyaú akô. Yhangmoq gi, chyîn wing lé yhun byi kôluí, 37 "Nàng gi, Yudaq byu pé é hkohkâm nghut é nghut le gi, Nàng gùng yhang nàng, hkyi yu wú aq." ga Yhang lé taí akô.

38 Yhâng é ulhum ahtoq má le, (Grik dông le, Latin dông le, Hebre dông le) "SHÍ YUQ GI, YUDAQ BYU PÊ É HKOHKÂM." gâ é laiká kâ tap tô akô.

39 Tapzîng htoq má bat tap lhâng to huí é damyaq rayuq gi, "Nàng gi, Hkrisduq nghut lhê, a nghut lhú? Haú Nàng gùng nàng le, ngá-nhik lé le, hkyi yù aq." ga luí, Yhang lé rhoi ri.

40 Damyaq góyuq sù kúm gi, "Nàng le shí yuq eq rajung za jén tô é huí luí nhîng, Garai Gasang lé a gyuq lhú?

41 Nga-nhik gi, yhumsing kut shut é mara eq rajung za, jéyáng hui zo gíng é sù nhik nghut lhê; shí yuq kúm gi, hai mara lé kut shut wú sù a nghut." ga luí, haú yuq lé tân kat ri.

42 Hau htâng, yhang Yesuq lé taí é gi, "Yesuq ê, Nàng, Nàng é mingdán má jé ló jáng, ngo lé myit bun laq ô." gâ ri.

43 Haú hkûn, Yesuq gi, "Ngò, nang lé teng za taí lé, hkû-nyí yhang nàng Ngò

☆ 23:30 Hos 10:8 * 23:43 Hparadisu nghu é gi, mauhkûng mingdán lé taí ri.

eq rahá hparadisu* má nyi râ nghut lhê." ga luí, yhang lé tâ taí kat ri.

Yesuq Soqkang Byit É Hkyô

Mht 27:45-56; Mrk 15:33-41; Yhn 19:28-30

⁴⁴ Haú ahkyíng gi, nyi káng raxe í hkyíng nghut luí, myinhâng sum hkyíng jé shoq ramau gón mauchut tuq dut byuq bê nghut ri;† ⁴⁵ hkâsu mù gâ le, builoq shum byuq é yanmai nghut ri. Noqkuq yhúm mâ é pán-gyang le, í hkyam byáng dut byuq bê nghut ri. ⁴⁶ Haú hkûn, Yesuq gi, "Áwa ê, Ngò, Ngá é woi-nyí náng é loq má ap byí lhê." ga htê mó eq garû kat ri. Haú su ga ban taí eq, Yhang kâng byit bê nghut ri.

⁴⁷ Shô up gyezau hpó gi, haú su dut é lé myàng jáng, "Shí yuq gi, gè gè yhang, dingmán sù nghut ri." ga luí, Garai Gasang lé hkya-on kungton ri. ⁴⁸ Haú hkyô lé wú râ ga, lé zíng tô é byù lhunglhâng bang le, haú su dut é hkyô pé lé myàng kôjáng, myit yón kôluí, wànggàng bat mù, dum taú ló byuq bekô. ⁴⁹ Nghut kôlhâng, Yhang lé sê é bang eq Galile mau mai Yhang htâng châng é myiwe wuì gi, we we má yap to mù, haú hkyô pé lé byu wú nyi akô.

Yesuq É Màng Lé Lup Hkaú Má Kat É Hkyô

Mht 27:57-61; Mrk 15:42-47; Yhn 19:38-42

⁵⁰ Haú hkûn, Yuda mau Aramahti gâ é myuq má, Yosep gâ é sù rayuq nyi ri. Haú yuq gi, nhik bo é sù eq dingmán é sù nghut é htoq agó, Garai Gasang é mingdán jé râ hkyô lé myit myoqbyu to sù le, nghut mù luí, ⁵¹ yhang gi, Yudaq uphkâng hpúng mâ é rayuq nghut kôlhâng, hpyé lhúm é hkyô má le, zui saí é hkyô má le, myit a bo huí lom é sù nghut ri. ⁵² Yhang gi, Pilat chyáng wàng luí, Yesuq é gungsôm lé dúng yu ri. ⁵³ Haú mù, gungsôm haú lé tapzîng mai hkyut hkyô yù luí, pán yúng eq htop yup mù,

ó lé lháng a kat wú shí é, luqgok lé kyûng tô é luqgok lup hkaú má kat tô ri. ⁵⁴ Haú nyí gi, Hên Lajang Buinyi nghut luí, Bánno buinyi jé râ za nghut bê.

⁵⁵ Galile mau mai Yesuq eq rahá htoq lé lo é myiwe zo wuì le, Yosep htâng má châng ê luí, lup haú lé le, Yesuq é gungsôm lé le, hkâsu kut tô tô é lé, ê myang akô. ⁵⁶ Hau htâng, yhangmoq gi, yhúm shut taú lò mù, Yesuq é gùng sôm lé but byi râ matú, namngón é jung eq mura xú lé hen tô akô. Bánno buinyi má kúm gi, tarâ joq é eq rajung za, yhangmoq yuban bân nyi bum akô nghut ri.

24

Yesuq, Dum Dui Toq É Hkyô

Mht 28:1-10; Mrk 16:1-8; Yhn 20:1-10

¹ Bánno buinyi htang napsûn noq le, myiwe wuì gi, yhangmoq hen tô é namngón jung pé lé yu chûng mù, lup shut e ló akô. ² Yhangmoq gi, lup mâ é luqhkum lêng bóng to lánng é lé, ê myâng kômù, ³ wang e wú kô le, haú Yhumsîng Yesuq é gungsôm lé, a myàng lo kó nghut ri. ⁴ Yhangmoq maú úng-âng nyi bùm kô é hkûn, radá dâm maulhap su duqbó é mebu wut é byù í yuq, yhangmoq é nàm má yap tô akô. ⁵ Haú mù, myiwe haú bang gi, gyuq dan bum kôluí, myigùng shut myoqdong ngóm gop tô bum é u lé, haú nhik gi, "Nungmoq gi, dui sù lé, shi to bâng chyáng haí mù ho nyi akô lhú? ⁶ Yesuq gi, shí má a nyi lo; Yhang dui toq lo bê! Yhang gi, nungmoq eq rahá Galile mau má nyi tô ashí hkûn lé, ⁷ 'Haú Byu Yhangzo gi, yubak dap bâng é loq má ap pyâm é hui luí, tapzîng má jén sat to huí é htâng, sum nyí nghú é buinyi má lhoq dui toq yu é hui râ nghut lhê.' ga nungmoq lé tâ tô é dang lé myit bun keq." ga luí, yhangmoq lé tâ ri. ⁸ Haú hkûn, yhangmoq gi, Yesuq é dang lé bûn kat bekô nghut ri.

† 23:44 Nga-nhông é nyi káng raxe í hkyíng gi, Yudaq byù pé é napkyó hkyuq hkyíng nghut lhê; yhangmoq é gau hkyíng gi, nga-nhông é myinhâng sum hkyíng nghut bê.

⁹ Yhangmoq gi, lup mai dum taû lò mù, lagyo raxe rayuq eq gotû lunglhang bang lé, haú hkyô ban-shoq lo taí kyô akô. ¹⁰ Lagyo pé lé lo taí kyo bang gi, Magadalaq wà má é Mariq, Yoanaq, Yakuq é yhangnu Mariq eq, yhangmoq eq rahá nyi é myiwe góbang le nghut akô. ¹¹ Lagyo pé kúm gi, yhangmoq é dang lé dangsôm su ngam pyám kôluí, a jing byi kó nghut ri. ¹² Nghut kôlhang, Petruq gi, toq luí lup má din jé é mù ngóm wú kat le, mâng htup é pán leq tô é lé za myàng mù luí, haú su dut é hkyô lé maú é eq, yhúm shut dum taû ló byuq bê nghut ri.

Chángzo Í Yuq Lé Yesuq Htoq Shit É Hkyô

Mrk 16:12-13

¹³ Haú ra-nyí má za, Yesuq é chángzô pé má é í yuq gi, Yerusalem wà mó mai nyhit déng kô wé é Ema-u gâ é wà shut e ló akô. ¹⁴ Yhangnhik gi, dut laí ló é hkyô pé banshoq lé, rayuq eq rayuq taí lhúm nyi akô. ¹⁵ Yhangnhik gi, haú hkyô pé lé rayuq eq rayuq taí hpyê lhúm e ló kô le, Yesuq gi, yhangnhik chyáng jé lé lò mù, yhangnhik eq rahá sô nyi ri. ¹⁶ Nghut kôlhang, yhangnhik gi, myoq hpuq hpuq pyám byí é hui kômù, Yhang lé a sê wú byuq kó nghut ri.

¹⁷ Hau hkûn, Yesuq gi, yhangnhik lé, "Nungnhik hkyô so uchyang taí lhúm lé lo é gi, haí jung wá nghut akô lhú?" ga myi kat jáng, yhangnhik gi, myoqdong shúm kut luí, hkying yap tô akô. ¹⁸ Yhangnhik má é Hklupa gâ é sù gi, "Nàng gi, Yerusalem wà mó má lé bíng nyí luí nhing, shí gyoro lé haú wà má dut lo é hkyô pé lé, a sê é bíng gi, Nàng baú za wá nghut lhé lhú?" ga myi kat ri.

¹⁹ Yhang gi, "Haí jung lhú?" ga dum myí é hkûn lé, yhangnhik gi, "Nazaret wà byù Yesuq é hkyô nghut lhé; haú yuq gi, Garai Gasâng é hí má le, byù lunglhang bâng é hí má le, nhut shô hpaqchyí a-tsam eq hkyí loq a-tsam má wum-o bo é sù myiqhtoi nghut ri. ²⁰ Nghut kôlhang, hkyangjong agyi

pé eq ngamoq é zau suwún wui eq haú yuq lé sat pyám râ matú ap byí pyám kômù, yhangmoq gi, Yhang lé tapzîng má jén sat pyám bekô nghut ri. ²¹ Ngamoq kúm gi, haú yuq lé, Israelaq byù myú lé hkyi yù râ sù nghut lhé nghu luí, myit myoqbyu nyi bum lhé. Nghut kôlhang, haú su dut laí ló é gi, hkû-nyí sum nyí lhang bò bê. ²² Hau htoq agó, hkû-nap noq le, lup má é wú é, ngamoq hpúng má é myiwe wui ra-am gi, ngamoq lé, lo lhoq maú akô. ²³ Yhangmoq gi, Yesuq é gungsôm lé a myàng jáng dum taû lò mù, 'Haú Yhumsîng dui nyi ri.' ga luí, taí kyô é maumang lagyo htoq shit é shing-rán lé, myang é hkyô lé lo taí kyô akô. ²⁴ Haú mù, ngamoq é luzúm wui ra-am gi, lup má é wú kô le, myiwe wui taí é eq rajung za, dut to lánng é lé é myàng akô. Nghut kôlhang, haú yuq lé gi, yhangmoq a myàng kó gâ." ga luí, Yhang lé taí kyô akô.

²⁵ Haú hkûn, Yhang gi, "Myiqhtoi pé taí é dang banshoq lé lumjing râ matú, hpaqchyí a bo é eq ngha é sù nhik é, ²⁶ Hkrisduq gi, haú su é wuihke jamjau hkâm zô yu é htang má sheq, Yhang é hpungwup shingkang má wó wang nyi to râ, a nghut kó lhú?" ga luí, yhangnhik lé myí ri. ²⁷ Yhang gi, yhangnhik lé, Mosheq kê tô é eq myiqhtoi pé banshoq bang kê tô é Chyúmdang pé mai, Yhang má âng é dang banshoq é lichyúm lé, taí hpông kyô ri.

²⁸ Ahkuí, yhangmoq, haú nhik e ló é wà má chyáng lò kôjáng, Yesuq gi, laí ló râ su kut ri. ²⁹ Haú hkûn, yhangnhik gi, "Nga-nhik eq rahá wang bíng sháng; hkâsu mù gâ le, buigyum bê mù, mau le chut lô bê nghut ri." ga luí, Yhang lé wum kat chom lung nyi akô. Haú mù luí, Yesuq gi, yhangnhik eq rahá wang bíng bê nghut ri.

³⁰ Yesuq gi, zang zo râ ga, yhangnhik eq rahá zung tô é hkûn, muk lé yù luí, jeju hkya-on mù, myhik hpé luí, yhangnhik lé gàm byí ri. ³¹ Haú hkûn, yhangnhik é myoq bóng lô luí, Yesuq nghut é lé bûn sé kat bekô. Yesuq

kúm gi, yhangnhik chyáng mai byuq byuq bê nghut ri. ³² Haû mù, yhangnhik gi, "Yhang gi, hkyô má ngá-nhik eq dang nyo lhùm é eq Chyúmdang é lichyúm taí hpóng shit é hkûn, ngá-nhik gi, i-myt unghkaû má, achyí aku dut bê a nghut lhú?" ga luí, yhangnhik yhangchang taí lhùm akô.

³³ Yhangnhik gi, toq mù, radá dâm Yerusalem wà mó shut dum taú ló kô le, lagyo raxe rayuq eq, yhangmoq eq rahá nyi é bang zup ming to kô é lé ló myang akô. ³⁴ Haú bang gi, "Haú Yhumsîng gi, teng za yhang dum dui toq ló bê; Simun lé lhang htoq shit bê nghut ri." ga taí lhùm nyi bum akô. ³⁵ Haú hkûn, yhangnhik gi, hkyô má dut lai ló é hkyô pé eq, muk hpê é hkûn má Yesuq lé bûn sé kat é hkyô lé, taí kyô akô nghut ri.

Chángzô Pé Lé Yesuq Htoq Shit É Hkyô

Mht 28:16-20; Mrk 16:14-18; Yhn 20:19-23; Lagyo 1:6-8

³⁶ Yhangmoq haú hkyô lé chôm taí nyi tô bum ashí le, Yesuq gi, Yhang gûng yhang, yhangmoq é agùng má yap to luí, "Nungmoq nguingón yuqyo nyi sháng gaq." ga luí, yhangmoq lé taí ri.

³⁷ Yhangmoq kúm gi, gyuq dan byuq bùm kômù, sobyô lé myàng bê ga myit yu pyâm bum akô. ³⁸ Haú mù luí, Yhang gi, "Nungmoq gi, haí mù dan nyi bum akô lhú? Haí mù nungmoq é i-myt unghkaû má úng-âng nyi bum akô lhú? ³⁹ Ngá é loq eq Ngá é hkyí lé wú wú keq. Ngò yhang nghut nyi lhê. Ngo lé sop wú keq. Sobyô nghû é gi, ngo lé nungmoq myang é su, sho eq showui showang bo é a nghut." ga luí, yhangmoq lé taí kyô ri.

⁴⁰ Yhang gi, haú su ga taí mù, Yhâng é hkyí loq lé tân shit ri. ⁴¹ Yhangmoq gi, gabú é eq maú nyi bùm kômù, a wó jing shi dut tô é hkûn lé, Yesuq gi, "Nungmoq shí má zôhpo rajung jung wó akô lhú?" ga luí, yhangmoq lé myi kat ri. ⁴² Haú hkûn, yhangmoq gi,

nyhîn nyhoq tô é ngozo rahtung lé, byí akô. ⁴³ Yhang gi, haú lé yù mù, yhangmoq é hí má zô shit ri.

⁴⁴ Hau htâng, Yhang, yhangmoq lé taí é gi, "Mosheq é tarâ eq, myiqh-toi laiká pé má le, Hkya-on Kungtôn Laiká pé má le, Ngò èq séng luí kâ to má kâ to banshoq gi, dik râ chyat nghut lhê nghû luí, nungmoq eq rahá nyi to ashí hkûn lé, Ngò, nungmoq lé taí kyô tô é pé gi, shí nghut bê." ga taí ri.

⁴⁵ Hau htâng, Yhang gi, Chyúmdang pé lé sê gyo shoq ga, yhangmoq é i-myt hkum hpóng byí ri. ⁴⁶ Haú mù, Yhang gi, "Hkrisduq gi, wuîhke jamjau hui zo mù, sum nyi nghû râ buinyi má, shi é mai dum dui toq lô râ hkyô lé le, ⁴⁷ Yerusalem wà mó mai hí luí, byù myû chângjup lé, Yhâng é mying lé lang luí yubak mara hkyut pyám byi râ hkyô eq myit lîng râ hkyô lé le, hko kyo râ hkyô lé, kâ to bê nghut ri. ⁴⁸ Nungmoq gi, shí pé é saksé pé nghut nyi akô. ⁴⁹ Ngá Wa byí tô é danggidiq* lé, Ngò, nungmoq é ahtoq má nhang kat râ nghut lhê; nungmoq kúm gi, htoq tsáng myhâng mâ é wum-o a-tsam wó yu é buinyi jé shoq, Yerusalem wà mó má láng nyi keq." ga luí, yhangmoq lé taí ri.

Yesuq Mauhkûng Shut Shuí Toq Yu Huí É Hkyô

Mrk 16:19-20; Lagyo 1:9-11

⁵⁰ Hau htâng, Yhang gi, yhangmoq lé Behtani wà yàm shut shuí htoq é mù, Yhâng é loq tu toq luí, shimân byí ri. ⁵¹ Haú su kut shimân byí nyi ashí le, Yhang gi, yhangmoq chyáng mai gâng ló byuq luí, mauhkûng shut shuí toq yu é hui bê nghut ri. ⁵² Yhangmoq kúm gi, Yhang lé noqkuq kômù luí, gyai gabú é myit eq Yerusalem wà mó shut dum taú ló akô. ⁵³ Yhangmoq gi, noqkuq yhùm má nyi to mù, Garai Gasang lé hkya-on kungton nyi bum akô nghut ri.

* **24:49** Ngá Wâ byi tô é danggidiq nghu é gi, Chyoiyúng é Woi-nyí lé taí ri.

YOHAN é Gabú Danglù Laiká (The Gospel of John)

Haù Mungdang, Xângzo Byù Gùng Lé Dut É Hkyô

¹ A-nham sâng-hi má, Mungdang joq ri; Mungdang haù gi, Garai Gasang eq rahá nghut luí, haù Mungdang yhang Garai Gasang nghut ri. ² Yhang gi, a-nham sâng-hi má, Garai Gasang eq rahá nghut nyi ri.

³ Nyi mi-nyì, joq mijoq gi, Yhang dông mai hpan tô é chyat nghut lhê; Yhang dông mai a hpan é gi, haì lháng a joq nghut ri. ⁴ Asak chyungxe gi, Yhang má nghut lhê mù, asak haù gi, byu pé é matú maubó nghut ri. ⁵ Haù maubó gi, mauchut má duqbó byì nyi kôlhang, mauchut gi, haù lé a hap yù nghut ri. ⁶ Garai Gasang mai nhang kat é, Yohan gà é byù rayuq jé lé ri.

⁷ Yhang gi, maubó haù eq sêng é hkyô lé, saksé hkám byi luí, yhang é yanmai byù lhunglhâng bang wó lumjínng kó sháng gaq ga, saksé rayuq dông jé lé é sù nghut ri. ⁸ Yhang gi, haù maubó a nghut; maubó haù lé saksé hkám byi râ matú za sheq jé lé é ru nghut lhê. ⁹ Byù yuq jup lé duqbó byi é, maubó akying haù gi, mingkan htoq má jé nyi to bê.

¹⁰ Yhang gi, mingkan htoq má nyi to bê nghut ri; mingkan lé gi, Yhang dông mai hpan tô é nghut kôlhang, mingkan haù gi, Yhang lé a wú sé nghut ri. ¹¹ Yhang gi, yhumsîng mau má jé lé kôlhang, Yhâng é amyù pé gi, Yhang lé a lhom hap yù kó nghut ri. ¹² Nghut kôlhang, Yhang gi, Yhang lé lhom hap yù luí, Yhâng é myìng lé lumjínng é bang lhunglháng lé, Garai Gasâng é yhangzô pé dut râ ahkáng byi bê nghut ri. ¹³ Haù bang gi, sui sho dông hku kat é le a nghut, byù ô nau é dông hku kat é le a nghut, gungsho ô nau é dông hku kat é le a nghut e

za, Garai Gasang chyáng mai hku kat é bang ru nghut lhê.

¹⁴ Haù Mungdang gi, xângzo byù gùng lé dut luí, ngamoq chyáng nyi wú bê nghut lhê. Ngamoq gi, haù jeju eq tengmán hkyô byíng tô é, Yhang é hpungwup shíngkang lé myang wú bê nghut lhê; haù gi, haù Íwâ é zote rayuq dông, Yhang wó yu é hpungwup shíngkang nghut ri.

¹⁵ Wui-myhup Sará Yohan gi, Yhang eq sêng é hkyô lé saksé hkâm é hkûn, garú taí é gi, "'Ngá é htâng má jé lé é Sù gi, ngá é hí mai nyi to bê sù nghut é yanmai, ngá htoq je gyaú sù nghut ri.' nghù, ngò taí é sù gi, shí yuq nghut bê." gà ri. ¹⁶ Yhâng é gumjup é jeju ahkaù mai, nga-nhúng banshoq bang gi, shimân jeju lé ralhûm htoq ralhûm myang yu nyi bê nghut lhê. ¹⁷ Hkâsu mù gà lé, haù jep é tarâ gi, Mosheq é loq dông mai byì é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê. ¹⁸ Garai Gasang lé, ó yuq èq le a myang wú wú é nghut lhê; nghut kôlhang, haù Íwâ é tanghkoí má lúng tô é, Yhang Zo zote gi, Garai Gasâng é gùng lé lhoq htoq shit bê nghut ri.

Wui-myhup Sará Yohan Hko Kyô É Hkyô

Mht 3:1-12; Mrk 1:1-8; Luk 3:15-17

¹⁹ Yerusalem wà mó mâ é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myì nhang kat kô é hkûn, Yohan saksé hkâm é gi, a-ô mâ é hkyô pé nghut ri. ²⁰ Yhang gi, a hê a zaú tô e za, "Ngò gi, Hkrisduq* a nghut." ga lhom taí kyô ri.

²¹ Haù hkûn, yhangmoq gi, "Haù nghut jáng, nàng gi, ó yuq nghut lhê lhú? Nàng gi, Eliyaq lhú?" ga myi kôjáng, yhang gi, "A nghut." ga taí ri; "Nàng gi, haù Myiqhtoi nghut lhê lhú?" ga dum myi kôjáng, yhang gi, "A nghut." ga tù taí ri.

²² Haù mù, yhangmoq gi, "Ngamoq lé nhang kat bâng chyáng ló wó taí

* **1:20** Grik dong Hkrisduq gà é gi, xù but hui Sù gà é lichyúm nghut mù, Hebre dong "Mesaia" gà é eq rajung za nghut lhê.

kyo râ matú, nàng gi, ó yuq nghut lhê lú? Náng gûng lé nàng hkâsu nghu lhê lú? Taí kyô wú laq." ga dum myi akô.

²³ Haú hkûn, Yohan gi, myiqhtoi Esai-aq é dang eq rajung za, "Ngò gi, haú yoso má, 'Yhumsing é matú hkyô lhoq nyhang to keq.' gâ é htê lé, garú taí é sù nghut lhê." ✨ ga tú taí ri.

²⁴ Hparishe pé mai nhang kat é bang ra-am gi, yhang lé, ²⁵ "Nàng gi, haú Hkrisduq le a nghut, Eliyaq le a nghut, Myiqhtoi le a nghut é nhîng, haí mù luí, wui-myhup hkám byi nyi lhê lú?" ga dangmyi myi akô.

²⁶ Haú hkûn, Yohan tú taí é gi, "Ngò gi, wui èq za wui-myhup hkám byi lhê; nghut kôhang, nungmoq a sê é sù rayuq nungmoq chyáng yap tô ri. ²⁷ Yhang gi, ngá htâng má lé é sù yuq nghut bê; ngò gi, Yhâng é hkyî-tsung tui lé hpyî râ lhang a gingdán é nghut ri." gâ ri.

²⁸ Shí pé banshoq gi, Yohan wui-myhup hkám byi nyi é, Yodan làng hé hpoq mâ é Behtani wà má dut é hkyô pé chyat nghut ri.

Yesuq Gi, Garai Gasâng É Sauzo Nghut É Hkyô

²⁹ Hau htang nyi, Yohan gi, yhâng chyáng Yesuq lé lo nyi é lé myàng luí, taí é gi, "Míngkan byu pé é yubak mara lé yu pyám byi é Garai Gasâng é Sauzo lé, wú keq! ³⁰ Shí yuq gi, 'Ngá é htâng má jé lé é Sù gi, ngá é hí má nyi bê sù nghut é yanmai, ngá htoq je gyaú Sù nghut ri.' nghú, ngò taí é sù yhang nghut bê. ³¹ Ngò gi, Yhang ó yuq nghut é lé a sê é nghut lhê, nghut kôhang, Yhang lé, Israelaq byu pé wó sé kó sháng gaq nghú, ngò lé jé mù, wui èq wui-myhup hkám byi nyi é nghut lhê." gâ ri.

³² Hau htâng, Yohan saksé hkâm é gi, "Haú Woi-nyí gi, mauhkûng mai hpûngkyui gunghkyâng sù é đông mai gyó lé mù, Yhâng chyáng lé nô tô é lé, ngò myàng ri. ³³ Ngò gi, Yhang ó

yuq nghut é lé a sê é nghut kôhang, wui èq wui-myhup hkám byi râ matú, ngo lé nhang kat é Sù, ngo lé taí kyô é gi, 'Haú Woi-nyí gyó lé lô mù, ó yuq chyáng lé nô tô é lé, nàng myàng jáng, haú yuq gi, haú Chyoiyúng Woi-nyí má wui-myhup hkám byi râ sù nghut lhê.' gâ ri. ³⁴ Haú eq rajung za ngò myàng bê nghut luí, shí yuq gi, Garai Gasâng é Yhangzo nghut lhê nghú, ngò saksé hkâm lhê." gâ ri.

Sâng-hi Lhê É Chángzô Pé

³⁵ Hau htang nyi, Yohan gi, yhâng é chángzo í yuq eq rahá, haú má dum nyi tô akô. ³⁶ Haú hkûn, yhang gi, Yesuq lai ló nyi é lé myang kat jáng, "Hê, Garai Gasâng é sauzo lé, wú keq!" ga taí kat ri.

³⁷ Chángzo haú í yuq gi, yhang haú su gâ é lé wó gyo kôjáng, Yesuq é htâng cháng bekô nghut ri. ³⁸ Yesuq gi, lhing wú kat le, yhangnhik châng tô é lé myàng luí, "Nungnhik haí o akô lú?" ga myi jáng, yhangnhik gi, "Rabai ê, Nàng hkâmá nyi lhê lú?" ga taú myi kat akô nghut ri. (Rabai gâ é gi, Sará gâ é lichyúm nghut lhê.)

³⁹ Haú hkûn, Yhang gi, "Lé keq, haú jáng, nungnhik myàng kó râ nghut lhê." ga tú taí ri.

(Haú-u gi, raxê hkyíng† kô nghut ri.) Haú mù luí, yhangnhik gi, châng é mù, Yhang hkâmá nyi é lé, ê myàng kôluí, haú nyi buigyùm shoq, Yhang eq rahá ê nyi nyi akô nghut ri.

⁴⁰ Yohan taí é dang lé wó gyo luí, Yesuq htâng châng é su nhik mâ é rayuq gi, Simun Petruq é yhanggu Andre nghut ri. ⁴¹ Andre gi, yhangmang Simun lé hí myàng luí, "Nga-nhik gi, Mesaia lé myàng bê." ga yhang lé taí kyô ri. (Mesaia gâ é lichyúm gi, Hkrisduq gâ é nghut lhê.) ⁴² Hau htâng, yhang gi, yhangmang lé Yesuq chyáng shuí e ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa‡ gâ é myìng

✨ 1:23 Esai 40:3 † 1:39 Raxê hkyíng gi, myinhâng myi hkyíng záng ri. ‡ 1:42 Aramaik dang đông Kehpa gâ é eq Grik dang đông "Petruq" gâ é lichyúm gi, luqgok gâ é nghut lhê.

lé, nàng wó yû râ nghut lhê." ga taí ri. (Kehpa gâ é lichyúm gi, Petruq gâ é nghut lhê.)

Hpilip Eq Nahtanelaq Lé Hkyin Yu É Hkyô

⁴³ Hau htang nyí, Yesuq gi, Galile mau shut ê râ matú, myit hpyit yû bê nghut ri. Yhang gi, Hpilip lé myàng jáng, "Ngá htàng cháng aq." ga taí ri.

⁴⁴ Hpilip gi, Andre eq Petruq nhik nyi é Bet-saida wà mó mâ é byù nghut ri. ⁴⁵ Yhang gi, Nahtanelaq lé myàng jáng, "Mosheq mai tarâ laiká má kâ tô é eq myiqhtoí pé mai le lhoq ang luí kâ tô é sù, Yosep é yhangzo, Nazaret wà byù Yesuq lé, ngamoq myàng bê." ga yhang lé taí kyô ri.

⁴⁶ Haú hkûn, Nahtanelaq gi, "Nazaret wà ô! Haú mai, ge é jung haí wa wó htoq lhê lhú?" ga myi jáng, Hpilip gi, "Ru lé wú aq." ga yhang lé taí ri.

⁴⁷ Yesuq gi, Yhâng chyáng Nah-tanelaq lé lo nyi é lé myàng jáng, yhang lé lhoq ang luí, "Wú keq, shí yuq gi, mhaú é myit a bo é sù, Israelaq byù akying rayuq nghut ri." ga taí ri.

⁴⁸ Haú hkûn, Nahtanelaq gi, "Nàng, ngo lé hkâsu kut sê é lhú?" ga myi jáng, Yesuq gi, "Nang lé, Hpilip eq a wut yù shimá, nàng, maihpáng gâm ô má ru nyi tô ashí hkûn, Ngò, nang lé myàng bê nghut lhê." ga tú taí ri.

⁴⁹ Haú mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pé é Hkohkâm le nghut ri." ga taí ri.

⁵⁰ Haú hkûn, Yesuq gi, "Ngò, nang lé, maihpáng gâm ô má myang é nghú taí kyô é yanmai, nàng lumjíng lhê a nghut lhú? Hau htoq je kô é muzó pé lé, nàng myàng râ nghut lhê." ga taí ri. ⁵¹ Hau htàng, Yesuq xoq taí é gi, "Ngò, nungmoq lé teng za taí kôlé, mauhkûng bóng lô luí, haú Byu Yhangzô ahtoq má, Garai Gasâng é maumang lagyô pé doq lô gyó lô kut nyi kô é lé, nungmoq myàng kó râ nghut lhê." ga ri.

2

Wuì Lé Tsibiyiq Wing Dut Nhang É Hkyô

¹ Hau htàng, í nyí nghú râ nyí má, Galile mau mâ é Hkanaq wà mó má, myiháng poí ralhum joq ri. Haú má Yesuq é yhângnu le, bo lom ri. ² Yesuq eq Yhâng é chángzô pé lé le, myiháng poí haú má ji akô nghut ri. ³ Tsibiyiq wing jaú tûm to kô é hkûn, Yesuq é yhângnu gi, "Yhangmoq, tsibiyiq wing a wó lo kó nghut ri." ga, Yesuq lé taí ri.

⁴ Haú hkûn, Yesuq gi, "Ánu ê,* haú, nàng gi, Ngò eq haí sêng lhê lhú? Ngá é ahkying a jé shi é nghut lhê." ga tú taí ri.

⁵ Nghut kôlhang, Yhâng nu gi, haú dui-nhâng zoshâng wuì lé, "Yhang haí taí le, haí kut keq." ga taí ri.

⁶ Haú nàm má, í sum xê galan kô wang é luqgok wúng hkyuq cham joq tô ri; haú gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

⁷ Yesuq gi, haú dui-nhâng zoshâng wuì lé, "Wúng haú pé má wuì lhoq pyíng keq." ga taí ri; haú mù, yhangmoq gi, wúng haú pé má byíng shoq shoq lhoq pyíng bekô nghut ri.

⁸ Hau htàng, Yhang gi, yhangmoq lé, "Ahkuí, ratsuí hkú yù mù, poí-up lé yu ló byi keq." ga taí jáng, yhangmoq gi, yu ló byi akô nghut ri.

⁹ Poí-up hpó gi, wuì mai dut é tsibiyiq wing haú lé, shuq chyam wú ri; wuì hkam é dui-nhâng zoshâng wuì gi, tsibiyiq wing haú hkâmai lo é hkyô lé sê to kôlhang, yhang gi, a sé nghut ri. Haú mù, yhang gi, lusik lé, ji yù luí, ¹⁰ "Yuq hkangmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyâng lé ru yu htoq lhê; nghut kôlhang, nàng gi, nghâm é tsibiyiq wing lé, ahkuí jé shoq wó hkong tô ri-nhung!" ga taí ri.

¹¹ Galile mau mâ é Hkanaq wà mó má, Yesuq tûn shit é limik kumlhá gi, Yhang kut é limik kumlhá pé mâ é sâng-hí dàm nghut ri. Yhang gi, Yhâng

* 2:4 Ánu ê gâ é lé, Grik đông gi, "Myiwe myhi ê" ga bo tô é nghut lhê.

é hpungwup shingkang lé, haú dông lhoq htoq shit é nghut mù luí, Yhâng é chángzô pé gi, Yhang lé lumjúng bum akô nghut ri.

Noqkuq Yhâm Lé Lhoq Sansêng Pyâm É Hkyô

Mht 21:12-13; Mrk 11:15-17; Luk 19:45-46

¹² Hau htâng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um wà má gyó ló ri; yhangmoq gi, haú má buinyi myi ngò nyí nyi akô nghut ri.

¹³ Yudaq byu pé é Lhoqlhai Poí jé râ nghut é hkûn, Yesuq gi, Yerusalem wà mó má doq ló ri. ¹⁴ Haú hkûn, noqkuq yhâm wàng má, nojûng, sau, hpûngkyui pé lé ûng nyi é bang lé le, siboí má ngùn htaí zô zung nyi é bang lé le, Yhang ló myàng ri. ¹⁵ Haú mù, Yhang gi, tui lé, nhuq râ wase saí yù mù, banshoq bang lé le, sau eq nojûng lé le, haú noqkuq yhâm wàng mai hkat htoq luí, ngùn htaí zo bâng é ngùn htingchap lé gi, tû hut pyám byi mù, yhangmoq é siboí lé gi, tu mhuq pyám byí ri; ¹⁶ haú hpûngkyui ung zô é bang lé le, "Zè shi pé lé yu htoq ló keq! Ngá Wá é yhâm lé, hpugá jowò hkâkut kó!" ga luí nhik-yô ri.

¹⁷ Haú mù, Yhâng é chángzô pé gi, "Ngò, Náng é yhâm lé chytidap kâng tui é hkyô gi, Ngo lé myi su nyê jôm pyám râ nghut lhê." ✧ ga kâ tô é lé, myit bûn kat akô nghut ri.

¹⁸ Yudaq byu pé gi, Yhang lé, "Nàng, shí pé kut râ ahko ahkáng wó é hkyô lé saksé tûn shit râ matú, ngamoq lé, hai jung limik kumlhá wó tûn shit râ lhú?" ga chôm myí akô nghut ri.

¹⁹ Haú hkûn, Yesuq gi, "Noqkuq yhâm shí lé nungmoq hpoyoq pyám keq, sum nyí gyoro má, Ngò, haú lé dum tu shap râ nghut lhê." ga, yhangmoq lé tû taí ri.

²⁰ Haú Yudaq byu pé gi, "Noqkuq yhâm shí lé, myí xe hkyuq zân tup saí é ru nghut lhê; sum nyí gyoro má za, Náng wó tu shap râ lhú?" ga tu myí akô nghut ri. ²¹ Nghut kôlhang, Yesuq

taí é noqkuq yhâm gi, Yhâng é gùng lé lhoq ang luí taí é nghut ri. ²² Haú mù, Yhang, shi é mai lhoq dui toq huí é hkûn sheq, Yhâng é chángzô pé gi, Yhang haú su ga taí é dang lé myit bun kômù, Chyúmdang lé le, Yesuq taí é dang pé lé le, lumjúng akô nghut ri.

²³ Haú Lhoqlhai Poí nghut é u lé, Yerusalem wà mó má Yesuq nyi nyi é hkûn, byù myo myo gi, Yhang kut shit é limik kumlhá pé lé myàng kômù, Yhang lé lumjúng bum akô nghut ri. ²⁴ Nghut kôlhang, Yesuq gi, byù lunglhang bâng é myit lé sê é yanmai, yhangmoq chyáng, Yhânggùng lé a ap to nghut ri. ²⁵ Yhang gi, byu é i-myit unghkaú má hai lúng tô é lé sê é yanmai, byù yhangchang saksé hkám byí é a ra nghut ri.

3

Nikodimu Lé, Yesuq Mhoqshit É Hkyô

¹ Nikodimu gâ é Hparishe rayuq nyi ri; yhang gi, Yudaq byu pé é byin tú wapdoq má bo é sù nghut ri.

² Yhang gi, myín lé, Yesuq chyáng lé mù, "Rabai ê, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gâ le, Nàng kut shit é limik kumlhá pé gi, Garai Gasang a lom é nghut jáng, ó yuq le wó kut râ a nghut." ga taí ri.

³ Haú hkûn, Yesuq gi, yhang lé, "Ngò, nàng lé teng za taí kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myàng râ a nghut." ga tû taí ri.

⁴ Haú jáng, Nikodimu gi, "Ipyat kó bê é byù gi, dum hkû é hkâsu kut wó hui râ lhú? Ínû é unghkaú má dum wàng mù, dum hku é hui râ gi, gè gè yhang wó dut râ a nghut!" ga taí ri.

⁵ Haú hkûn, Yesuq gi, "Ngò, nàng lé teng za taí kyo lé, ó yuq nghut kôle, wui eq Woi-nyí mai hku kat é hui sù za a nghut le gi, Garai Gasâng é mingdán má wó wàng râ a nghut.

⁶ Gungsho mai hku kat é gi, gungsho nghut ri; Woi-nyí mai hku kat é kúm

gi, woi-nyí nghut ri. ⁷ 'Nungmoq gi, dum hku é hui râ lhê' nghû Ngò taí é dang lé, nàng hkâmaú nyí. ⁸ Haú, lài gi, yhang nau é shut ló lhê. Lài lò htê lé nàng wó gyo kôlhang, lài hkâmai lo é eq, hká shut ló é lé, nàng sé râ a nghut; haú Woi-nyí mai hku kat huí é sù, ó yuq nghut kôle, haú eq rajung za nghut lhê." ga tû taí ri.

⁹ Haú hkûn, Nikodimu gi, "Haú gi, hkâsu wó dut râ lhú?" ga myí ri.

¹⁰ Yesuq tû taí é gi, "Nàng gi, Israelaq byu pé é sará rayuq nghut to luí nhîng, haú hkyô pé lé a sê gyo lhú? ¹¹ Ngò, nang lé teng za taí kyo lé, ngamoq gi, ngamoq sê é hkyô lé taí mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri. ¹² Ngò gi, nungmoq lé, mingkan eq sêng é hkyô lé taí kyô le lhang, a lumjîng kô é nghut le gi, mauhkûng mingdán eq sêng é hkyô lé taí kyô é nghut le gi, hkâsu kut wó lumjîng kó râ lhú? ¹³ Mauhkûng mingdán mai gyó lo é sù, haú Byu Yhangzo mai lai luí, mauhkûng mingdán má ó yuq lhang wó doq ló wú é a nghut. ¹⁴ Mosheq gi, yoso má lhangmuí lé tu shap tô é su, haú Byu Yhangzo le tu shap tô é hui ra râ nghut lhê. ¹⁵ Haú mù, haú Byu Yhangzo lé lumjîng é yuq hkangmó gi, ahtum abyuq é asak wó yù râ nghut lhê.

¹⁶ Hkâsu mù gâ le, Garai Gasang gi, mingkan lé gyai yhang chyitdap é yanmai, Yhang Zo lé lumjîng é sù ó yuq nghut kôle, htên byoq é a huí e za, ahtum abyuq é asak wó yù sháng gaq ga, rayuq za é Yhâng é Zote lé byí pyám bê nghut ri. ¹⁷ Hkâsu mù gâ le, Garai Gasang gi, mingkan lé mara byí râ matú, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui râ matú sheq nhang kat é ru nghut lhê. ¹⁸ Yhang lé lumjîng é sù gi, mara byí é hui râ a nghut; nghut kôlhang, Yhang lé a lumjîng é sù kúm gi, Garai Gasâng é Yhangzo zote lé a lumjîng é sù nghut é yanmai, mara byí é huí to

gù bê nghut ri. ¹⁹ Maubó gi, mingkan htoq má lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chyit râ malaí, mauchut lé chyit akô nghut ri; haú gi, mara byí é hui râ hkyô yhang nghut ri. ²⁰ Agè ashop hkyô kut é sù ó yuq nghut kôle, maubó lé a nguí nghut ri; haú yuq gi, yhang kut é hkyô lhoq byông htoq kat râ lé gyuq é yanmai, haú maubó shut lé lô râ a nghut. ²¹ Nghut kôlhang, haú tengmán hkyô dông asak dui é sù ó yuq le, yhumsîng kut é hkyô gi, Garai Gasang lom é hkyô lé, san za byu-myàng sháng gaq ga, haú maubó shut lé lo ri." gâ ri.

Yesuq Eq Séng Luí, Wui-myhup Sará Yohan Saksé Hkâm É Hkyô

²² Hau htâng má, Yesuq gi, Yhâng é chángzô pé eq rahá, Yuda mau shut wang ló mù, haú má rayoq zo nyí luí, wui-myhup hkâm byí ri. ²³ Haú u lé, Yohan gi, Salim nàm mâ é E-nun gâ é jowò má, wui gyai myo joq é yanmai, wui-myhup hkâm byí nyí ri; byu pé gi, abyit alan lé lò kômù, wui-myhup lé hkâm yu nyi bum akô nghut ri. ²⁴ (Haú gi, Yohan lé htóng a lhoq hkyó shí é hkun lhê é hkyô nghut ri.) ²⁵ Haú hkûn, Yohan é chángzô pé ra-am eq Yudaq byù rayuq gi, lhoq san lhoq yúng hking eq séng luí, dang htíng htíng lhùm bum akô nghut ri. ²⁶ Hau htâng, yhangmoq gi, Yohan chyáng lé luí, "Rabai ê, Yodan làng hé hpoq shut nàng eq rahá nyí luí, nàng èq saksé hkâm byí é Sù gi, ahkuí, wui-myhup hkâm byí nyi é nghut mù, yuq hkangmó gi, Yhâng chyáng e bum akô nghut ri mhaí." ga, yhang lé taí akô.

²⁷ Haú eq séng luí, Yohan tû taí é gi, "Byù rayuq gi, mauhkûng mai byí é za a nghut jáng, haí le wó hap yù râ a nghut. ²⁸ 'Ngò gi, Hkrisduq a nghut, Yhang é hí má nhang kat huí é sù za nghut lhê.' nghû, ngò taí é lé, nungmoq yhang saksé nghut bum akô. ²⁹ Myisik wó é sù gi, lusik nghut ri. Lusik lé, lánng yap tô é luzúm hpó gi, lusik é htê lé wó gyô é yanmai,

gyai yhang gabú nyi ri. Haû sù é gabú hkyô gi, ngá é gabú hkyô nghut mù, ngò má byíng jup nyi bê nghut ri. ³⁰ Yhang gi, kô jat lò ra râ nghut lhê; ngò gi, yom lò ra râ nghut lhê.

³¹ Ahtoq mai lé é Sù gi, lhunglhâng é ahtoq má nghut ri; myigùng htoq mâ é sù kúm gi, myigùng htoq eq sêng é nghut luí, myigùng htoq eq sêng é dông za taí ri; mauhkùng mai lé é Sù gi, lhunglhâng é ahtoq má nghut ri.

³² Yhang gi, wó myâng wó gyô é hkyô lé, saksé hkám kôlhang, Yhang hkâm é saksé lé, ó yuq le a hap yù kó nghut ri. ³³ Yhâng é saksé lé hap yu é sù kúm gi, haû Garai Gasang gi, tengmán sù nghut ri ga, saksé shit é sù nghut bê. ³⁴ Garai Gasâng èq nhang kat é hui Sù gi, Garai Gasâng é mungdang lé taí ri; hkâsu mù gâ le, Garai Gasang gi, haû Woi-nyí lé, laké a kat e za byí é yanmai nghut ri. ³⁵ Haû Íwa gi, Zo lé chyitdap luí, jung hkangmó lé Yhâng é loq má ap byi bê nghut ri. ³⁶ Haû Zo lé lumjíng é sù ó yuq nghut kôle, ahtum abyuq é asak wó lhê; nghut kôlhang, haû Zo lé he-ngik pyâm é sù ó yuq nghut kôle, asak haû lé myàng râ a nghut; hkâsu mù gâ le, Garai Gasâng é nhikmo-yo hkyô gi, yhâng chyáng ru joq nyi ri." gâ ri.

4

Yesuq Eq Samariq Myhí Huí É Hkyô

¹ Yesuq gi, Yohan htoq má, chángzo je lhoq myô é eq wui-myhup hkám byí nyi ri gâ é hkyô lé, haû Hparishe pé wó gyô akô nghut ri. ² (Nghut kôlhang, gè gè ga jáng, Yesuq gi, Yhang wui-myhup hkám byí é a nghut, Yhâng é chángzô pé sheq ru nghut akô.) ³ Haû hkyô lé, Yesuq sé jáng, Yhang gi, Yuda mau mai htoq mù, Galile mau shut dum taû lò bê nghut ri.

⁴ Ahkuí, Yesuq gi, Samariq mau mai sô laí lò ra dut bê nghut ri. ⁵ Haû mù, Yhang gi, Yakup mai yhang zo Yosep lé byí é maumyí rajap eq chyâng lhâm é, Suhka ga myhíng é, Samariq mau

mâ é wà mó ralhúm má lo jé ri. ⁶ Haû má, Yakup é wuhtung le joq to luí, Yesuq gi, hkyô sô nú é yanmai, wuhtung hau é nàm má zung gyó tô ri. Haû u gi, nyí-káng raxe í hkyíng* nghut bê nghut ri.

⁷ Haû hkûn, Samariq myiwe myhí rayuq wui lé hkam ri; Yesuq gi, yhang lé, "Ngo lé wui byi shuq laq." ga taí ri. ⁸ (Haû u gi, Yhâng é chángzô pé, zoshuq wui râ matú wà hkaú shut e byuq kô é ahkyíng nghut ri.)

⁹ Haû Samariq myiwe myhí gi, Yhang lé, "Nàng gi, Yudaq byu rayuq nghut to luí nhíng, ngò Samariq myiwe myhí chyáng, haí mù shuq wui dúng lhê lhú?" ga taí ri. (Hkâsu mù gâ le, Yudaq byu pé gi, Samariq byu pé eq a zùm yap kó nghut ri.)

¹⁰ Haû hkûn, Yesuq gi, yhang lé, "Nàng gi, haû Garai Gasâng é chyunghuq lé le, nang lé wui dung sù ó yuq nghut é lé le, sê é nghut le gi, noq mai Yhang lé dúng tôngbán luí, Yhang gi, nang lé asak-wui byi berâ nghut lhê." ga tû taí ri.

¹¹ Myiwe myhí haû gi, "Yhumsíng ê, Nàng gi, wui hkâm râ zè haí le a wó, wuhtung le nik ri; haû asak-wui lé, Nàng hkâmâ é wó yû râ lhú?

¹² Ngamoq é íwa Yakup gi, ngamoq lé wuhtung shí byí to bê nghut lhê; yhang yhang le, yhang zo pé le, yhang rém é dusak pé le, wuhtung shí mâ é wui shuq bekô nghut ri; Nàng gi, Yakup htoq je kô lhê lhú?" ga Yhang lé taí ri.

¹³ Yesuq gi, "Wui shí lé shuq é sù ó yuq le, wushit é dum hui râ nghut lhê. ¹⁴ Nghut kôlhang, Ngò byí é wui lé shuq é sù ó yuq nghut kôle, wushit é hkâ-nhám a hui lo râ nghut lhê. Ngò byí é wui haû gi, haû yuq má, ahtum abyuq é asak matú wuíbúm dut râ nghut lhê." ga yhang lé tû taí ri.

¹⁵ Myiwe myhí haû gi, Yhang lé, "Yhumsíng ê, ngò gi, wui le a shit lo, shí má wui hkâm le a lé ra lo sháng gaq, wui haû ngo lé byi laq." ga taí ri.

* **4:6** Nyí-káng raxe í hkyíng gi, Yudaq byu pé é hkyuq hkyíng nghut ri.

16 Haú hkûn, Yesuq gi, "Ló mù, nung làng lé ló wut lò aq." ga, yhang lé taí ri.

17 Yhang gi, "Ngò, làng a wó." ga taí jáng, Yesuq gi, yhang lé, "Nàng, làng a wó gâ é gi, têng ri. 18 Hkâsu mù gâ le, nàng gi, yuqgè ngo yuq wó wú bê sù nghut ri; nàng, ahkuí wó tô é yuqgè le nung làng a nghut. Nàng gi, têng é dang taí bê nghut ri." ga taí ri.

19 Haú hkûn, myiwe myhí haú gi, "Yhumsîng ê, Nàng gi, myiqhtoi rayuq nghut é hkyô lé, ngò wú sé bê. 20 Ngamoq é îchyí îwâ pé gi, bùm shî má noqkuq kô é nghut lhê; nghut kôlhang, nungmoq Yudaq byu pé gi, Yerusalem wà mó za noqkuq jowò nghut lhê ga taí akô nghut ri." ga taí ri.

21 Haú hkûn, Yesuq taí é gi, "Myiwe myhí ê, Ngo lé jîng aq; bùm shî má le a nghut, Yerusalem wà mó má le a nghut e za, haú Îwa lé noqkuq râ ahkyîng, jé lò nyi bê nghut ri. 22 Nungmoq Samariq byu pé gi, yhumsîng lháng a sê é lé, noqkuq akô; ngamoq kúm gi, ngamoq sê é lé noqkuq lhê; hkâsu mù gâ le, hkyi yù hkyô gi, Yudaq amyû mai lo é nghut lhê.† 23 Nghut kôlhang, haú têng é dông noqkuq é bang gi, woi-nyí mai le, tengmán hkyô mai le, haú Îwa lé noqkuq râ ahkyîng gi, jé lo nyi bê nghut luí, ahkuí lháng jé to bê nghut ri; hkâsu mù gâ le, haú Îwa gi, haú su kut noqkuq é bang lé ô nau ri. 24 Garai Gasang gi, woi-nyí nghut lhê; haú mù, Yhang lé noqkuq é bang gi, woi-nyí mai le, tengmán hkyô mai le, noqkuq ra râ nghut lhê." ga taí ri.

25 Myiwe myhí haú gi, "Hkrisduq gâ é Mesaia jé lé râ nghut é lé gi, ngò sê lhê. Yhang jé lé jáng, nga-nhúng lé banshoq taí sân kyo râ nghut lhê." ga taí ri.

26 Hau htâng, Yesuq gi, "Nàng eq dang nyo nyi é sù ngò gi, haú yuq nghut lhê." ga taí ri.

Haú Chángzô Pé Dum Taú Jé Lo É Hkûn Lhê Hkyô

27 Haú u lé, Yhâng é chángzô pé gi, dum taú jé lo bum akô; yhangmoq gi, Yesuq, myiwe rayuq eq dáng nyo nyi é lé lo myàng luí, maú byuq bum akô. Nghut kôlhang, "Nàng, haí ô ri lú?" ga le, "Haí mù Yhang eq dáng nyo nyi lhê lú?" ga le, Yhang lé ó yuq a myi kó nghut ri.

28 Hau htâng, myiwe myhí haú gi, yhâng é wui yambú lé tô pyâm to luí, wà shut taú wang ló mù, wà byù wui lé ló taí kyô é gi, 29 "Ngò kut lai lò bê hkyô pé lhunglhang lé, taí kyô é byù rayuq lé, lé wú keq! Yhang gi, Hkrisduq nghut lhê abe?" gâ ri. 30 Haú mù, yhangmoq gi, wà mai htoq lé luí, Yesuq chyáng lé lo bum akô nghut ri.

31 Haú u lé, Yhâng é chángzô pé gi, Yhang lé, "Rabai ê, zoshuq zo aq." ga chôm taí akô.

32 Haú hkûn, Yhang gi, yhangmoq lé, "Nungmoq a sê é jung zoshuq zo râ Ngò wó lhê." ga tû taí ri.

33 Haú mù, Yhâng é chángzô pé gi, "Yhang lé, rayuq yuq eq zoshuq lé dé byí é abe?" ga, rayuq eq rayuq taí lhùm bum akô.

34 Haú hkûn, Yesuq taí é gi, "Ngo lé nhang kat Sù ô nau é hkyô lé kut râ eq Yhâng é muzó jizó lé lhoq pán râ hkyô gi, Ngá é zoshuq nghut bê.

35 'Kyôshu yoq jé râ gi, lhamó myi hkyap râ ashî.' ga, nungmoq lhaq taí lhê a nghut kó lú? Ngò, nungmoq lé taí kôlé, nungmoq é myoq hpóng luí, haú yò pé má wú kat wú keq! Kyôshi gi, myhíng luí, kyô shu yoq gi, jé to bê nghut ri. 36 Haú kyô hkyó sù eq kyô shu sù gi, rahá wó gabú kó sháng gaq ga, ahkuí lháng, haú kyô shu sù gi, yhâng é zuihpau lé myang yù luí, ahtum abyuq é asak é matú, kyôshi shù tsîng to bê nghut ri. 37 Haú su mù, 'Rayuq gi, sân hkyó, góyuq gi, shù yù.' gâ é sanghkyang gi, têng ri. 38 Nungmoq a zui saí tô é jang mâ é shù yù râ matú, nungmoq lé Ngò

† 4:22 Bun zo shî má, Yesuq taí nau é gi, hkyi yù hkyô lé, Garai Gasang gi, Yudaq byu pé dông danggidiq byi to é nghut é lé taí nau é nghut ri.

nhang kat bê nghut lhê. Góbang gi, haú má wum kat zui saí to bê nghut mù, nungmoq gi, haú bang zui saí é akyû lé shu yù bekô nghut ri." gâ ri.

Samariq Byù Myo Myo Lumjínq Kô É Hkyô

³⁹ "Yhang gi, ngò kut lai lò bê hkyô lhungháng lé, taí kyô ri." ga luí, myiwe myhí haú saksé hkâm é yanmai, haú wâ mâ é Samariq byù myo myo gi, Yesuq lé lumjínq bùm bekô nghut ri. ⁴⁰ Haú mù, Samariq byu pé gi, Yesuq chyáng lé jé kômù, yhangmoq eq nyí râ matú, Yhang lé lung kô é yanmai, Yhang gi, í nyí bo nyí bê nghut ri. ⁴¹ Yhâng é dang pê é yanmai, byù myo myo gi, lumjínq bang dut jat lò bekô nghut ri.

⁴² Yhangmoq gi, myiwe myhí haú lé, "Ahkuí, ngamoq lumjínq é gi, nàng taí é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mingkan é hkyi yù Sû nghut é lé, ngamoq sé bê nghut é yanmai nghut lhê." ga chôm taí akô nghut ri.

Mingsuwún Hpó É Yhangzo Lé Lhoq Gê Byí É Hkyô

Mht 8:5-13; Luk 7:1-10

⁴³ Í nyí lai jáng, Yesuq gi, haú mai Galile mau shut htoq e ló bê nghut ri. ⁴⁴ "Myiqhtoi gi, yhumsing é mau má myoqdong a wó wú é nghut lhê." ga, Yesuq yhang saksé hkâm é nghut lhê. ⁴⁵ Yesuq gi, Galile mau má jé é hkûn, Galile byu pé gi, Yhang lé lhom hku-lum yu akô; yhangmoq gi, Yerusalem wà mó má, Lhoqlhai Poí ê lòm kô é nghut é yanmai, poí u lé, Yesuq kut é hkyô lhungháng lé, myàng kô é bang nghut ri.

⁴⁶ Yesuq gi, Yhang mai haú wuì lé tsibiyiq wing dut nhang é, Galile mau mâ é Hkanaq wà mó má, ê dum kûm ri. Haú ming suwún rayuq é yhangzo yuqzo gi, Kaperna-um wà má no nyi ri. ⁴⁷ Yesuq gi, Yuda mau mai Galile mau má jé lé bê gâ é hkyô lé, ming suwún haú wó gyo jáng, yhang gi, Yesuq chyáng é mù, shí-nò no nyi é

yhangzo lé, lé lhoq gê byi râ matú, Yhang lé dúng tôngbán ri.

⁴⁸ Haú hkûn, Yesuq gi, yhang lé, "Byù nungmoq gi, limik kumlhá pé eq mauhpo muzó pé lé za a myàng kô é nghut le gi, hkâ-nhám lé lumjínq kó râ a nghut." ga taí ri.

⁴⁹ Mingsuwún haú gi, "Yhumsing ê, ngá zo a shí shimá gyó lé laq." ga taí ri.

⁵⁰ Haú hkûn, Yesuq gi, "Nàng wó ló bê; nung zo byùn râ nghut lhê." ga tú taí ri.

Suwún haú gi, Yesuq taí é dang haú lé gyô jínq luí, tau ló bê nghut ri.

⁵¹ Yhang gi, hkyô má ru nghut nyi ashí hkûn, yhâng é dui-nhâng zoshâng wuì gi, yhang lé lé hui luí, zoshâng haú gè byuq é hkyô, lé taí kyô akô nghut ri. ⁵² Yhang gi, yhang zo hkâ-nhám gè byuq é ahkyíng lé myi wú é hkûn, yhangmoq gi, "A-nyí nap nyí hkyuí rahkyíng má, gùng nyé é châm ló byuq bê nghut ri." ga taí kyô akô.

⁵³ Haú hkûn, ahkyíng haú gi, "Nung zo byùn râ nghut lhê." ga, yhang lé, Yesuq taí é ahkyíng nghut é lé, haú yhângwa bûn sé bê nghut ri. Haú mù, yhang eq yhâng yhumbyù banshoq bang gi, lumjínq bekô nghut ri.

⁵⁴ Haú gi, Yesuq, Yuda mau mai Galile mau má lé jé é htâng, í dâm nghû râ dá kut shit é limik kumlhá nghut ri.

5

Wuìhtum Yàm Má, Nòhpyo Lhoq Gê Byí É Hkyô

¹ Hau htâng a myáng má, Yudaq byu pé é poí ralhum joq é yanmai, Yesuq gi, Yerusalem wà mó má doq ló ri. ² Ahkuí, haú Yerusalem wà mó é Sau Hkúmdong nàm má, Hebre myíng dông gi, Betzahta ga myhíng é wuìhtum ralhum joq ri; hau é lhínghkyuq má, jiropp ngo lhum joq tô ri. ³ Jirop haú pé má, myoqjit bang, hkyí hten bang, gùngjum shí bang ajùm ayò leq tô bum akô. (Haú bang gi, wuì dui nún râ lé láng tô é bang nghut akô. ⁴ Hkâsu mù gâ le, haú

Yhumsing é maumang lagyo gyó lé lé kut mù, wuì lé, lé lhu nhún jáng, wuìhtum haú má hí wó wang é sù gi, haí jung ana wa dap to kôlhang, ge byuq é huì é yanmai nghut ri.)⁵ Súm xe shit zân tup no nyi é byù rayuq le, haú má bo tô ri. ⁶ Yesuq gi, haú yuq no leq tô é lé myàng mù, haú su no nyi é gyai myáng bê nghut é hkyô lé sé jáng, yhang lé, "Nàng, gè nau ri lú?" ga myí ri.

⁷ Nò sù haú yuq gi, "Yhumsing ê, wuì dui nún lo é hkûn, wuìhtum má wàng râ matú, ngo lé garúm râ byù ó a nyi; ngò wàng râ nghú jáng, góyuq hí, ngá hí má wàng wàng dut ri." ga tú taí ri.

⁸ Hau htâng, Yesuq gi, yhang lé, "Toq aq! Nàng é taphkang yu chûng luí, sô ló aq." ga taí ri. ⁹ Haú yuq gi, radá dâm nò ge byuq bê nghut luí, yhang é taphkang yù mù, sô ló bê nghut ri.

Haú nyí gi, Bánno buinyi nghut ri.

¹⁰ Haú mù, Yudaq byu pé gi, haú nò ge byuq é hui sù lé, "Hkû-nyí gi, Bánno buinyi nyí nghut é yanmai, nàng, taphkang waq é gi, tarâ lu lai bê nghut ri." ga taí akô.

¹¹ Nghut kôlhang, yhang tú taí é gi, "Haú ngo lé lhoq gè byi sù gi, ngo lé, 'Nàng é taphkang yu chûng mù, sô ló aq.' ga taí é nghut lhê." gâ ri.

¹² Haú mù, yhangmoq gi, "'Nàng é taphkang yu chûng mù sô ló aq.' ga, nang lé taí é sù gi, ó yuq wá nghut ri lú?" ga myí akô.

¹³ Nghut kôlhang, haú ó yuq nghut é lé, nò ge byuq é hui sù gi, a châng sê kat nghut ri; hkâsu mù gâ le, Yesuq gi, haú mâ é byù moq mó má wang nyó ló byuq é yanmai nghut ri.

¹⁴ Htâng má, Yesuq gi, haú yuq lé noqkuq yhûm má myàng jáng, "Wú aq, nàng wángzán bê nghut ri; hí lhê htoq má je wuìhke é hkyô a hui zo sháng gaq, mara hkâkut shut lo." ga luí, yhang lé taí ri. ¹⁵ Haú yuq gi, htoq ló mù, yhang lé lhoq gè byí é sù gi,

Yesuq nghut ri ga, Yudaq byu pé lé taí kyô ri.

Asak Wó Yû Râ Hkyô

¹⁶ Haú mù, Yudaq byu pé gi, Bánno buinyi nyí má, Yesuq, haú hkyô kut é yanmai, Yhang lé gunjang lo akô nghut ri. ¹⁷ Haú hkûn, Yesuq gi, yhangmoq lé, "Ngá Wa gi, hkû-nyí jé shoq, hkâ-nhám le mù zuí nyi é nghut mù, Ngò le mù zuí nyi lhê." ga taí ri.

¹⁸ Haú mù luí, Yesuq gi, Bánno buinyi lé lhoq htên é htoq agó, Garai Gasang lé lhang, Yhang Wa ga wut é dông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám râ matú, je riyhang shikut lo akô nghut ri.

¹⁹ Yesuq, yhangmoq lé tú taí é gi, "Ngò, nungmoq lé teng za taí kôlé, haú Zo gi, yhumsing é myit dông haí le a wó kut; Yhang Wa kut é hkyô lé myang é gù za wó kut é nghut lhê; hkâsu mù gâ le, haú Íwa kut é hkyô lé za, haú Zo châng kut é yanmai nghut lhê. ²⁰ Hkâsu mù gâ le, haú Íwa gi, Zo lé chyitdap é nghut luí, Yhang kut é hkyô lunglhang, haú Zo lé tûn shit ri; nungmoq máu hong shoq, shí pé htoq je ko é hkyô pé lé lhang, haú Zo lé tûn shit shirâ nghut lhê. ²¹ Haú Íwa gi, shí bê bang lé lhoq dui toq mù, yhangmoq lé asak byí é eq rajung za, haú Zo le, Yhang byí nau é bang lé, asak byí râ nghut lhê. ²² Hau htoq agó, haú Íwa lé hkunggâ é eq rajung za, haú Zo lé le, lunglhang bang hkungga kó sháng gaq ga, haú Íwa gi, ó yuq lé le a jéyáng e za, jéyáng é hkyô lunglhang, haú Zo lé lum to bê nghut ri. ²³ Haú Zo lé a hkunggâ é sù gi, haú Yhang lé nhang kat é sù Íwa lé le, a hkunggâ é sù nghut ri.

²⁴ Ngò, nungmoq lé teng za taí kôlé, Ngá dang lé gyo luí, Ngo lé nhang kat é Sù lé lumjín é sù, ó yuq nghut kôlé, mara byí é a hui e za, ahtum abyuq é asak wó é nghut lhê; haú yuq gi, shí é mai lut luí, asak dui bê sù nghut

* 5:4 Bun zo 3 lhum má é ahtang túm eq bun zo 4 lhum gi, chyúmding myo myo má a bo é nghut lhê.

ri. ²⁵ Ngò, nungmoq lé teng za tai kôlé, haù Garai Gasâng é Yhangzô é htê lé, shi byuq bê bang wó gyo râ ahkyíng gi, jé lo nyi bê nghut ri; ahkuí lhang jé to bê nghut ri. Htê haù lé gyô é bang gi, asak duì kó râ nghut lhê. ²⁶ Hkâsu mù gâ le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang é yanmai nghut ri. ²⁷ Hau htoq agó, Yhang gi, haù Byu Yhangzo nghut é yanmai, Garai Gasang gi, tarâ jéyang râ ahko ahkáng, Yhang lé byi bê nghut ri.

²⁸ Shí hkyô lé hkâ-maú hong nyi kó: lup pé má lúng tô é bang banshoq gi, Yhâng é htê lé wó gyo kôluí, htoq ló râ ahkyíng jé lò râ nghut lhê. ²⁹ Ge é hkyô kut é bang gi, asak duì râ matú, duì toq kó râ nghut lhê; agè ashop hkyô kut é bang gi, mara byi é hui zo râ matú, duì toq kó râ nghut lhê. ³⁰ Ngò gi, Ngá myit dông mai haí le a wó kut é nghut lhê; Ngò wó gyô yu é eq rajung za sheq, jéyang é nghut luí, Ngò jéyang é hkyô gi, tengmán lhê; hkâsu mù gâ le, Ngò gi, Ngò ô nau é dông châng é a nghut e za, Ngo lé nhang kat é Sû ô nau é dông châng é sheq ru nghut lhê.

Yesuq Eq Séng Luí, Saksé Hkâm É Hkyô

³¹ Ngá gùng lé ngò saksé hkâm é nghut jáng, ngò za saksé hkâm é hkyô gi, teng râ a nghut. ³² Ngá é hkyô lé saksé hkâm byi é Sû (Ngá Wa) góyuq nyi lhê; Ngò eq séng luí, haù yuq hkâm é saksé gi, têng é hkyô lé, Ngò sê lhê.

³³ Nungmoq gi, Yohan† chyáng byu nhang kat wú bekô nghut ri; yhang gi, haù tengmán hkyô lé saksé hkâm byi bê nghut lhê. ³⁴ Ngò gi, xângzo byu pé mai saksé hkâm byi râ lé, ra luí a nghut, nghut kôlhang, nungmoq hkyi yu é wó hui râ matú sheq, haù su nghu tai é ru nghut lhê. ³⁵ Yohan gi, duq nyi é myibung su duqbó byi é nghut mù luí, nungmoq gi, haù

duqbó é hkaù má, rayoq zo ngón nau nyi akô nghut ri.

³⁶ Nghut kôlhang, Ngò wó é saksé gi, Yohan byi é saksé htoq je kô lhê; hkâsu mù gâ le, ahkuí Ngò zui saí nyi é muzó gi, Ngò lhoq pán râ matú, haù Íwa, Ngo lé ap byi tô é nghut luí, haù Íwa, Ngo lé nhang kat é hkyô lé, saksé hkâm byi nyi ri. ³⁷ Hau htoq agó, haù Ngo lé nhang kat é sù Íwa le, Ngò eq séng luí saksé hkâm byi ri; nungmoq gi, Yhâng é htê lé le, a wó gyô wú kó; Yhâng é gunghkyáng lé le, a myang wú kó; ³⁸ haù Yhâng é mungdang le, nungmoq chyáng a bò kó nghut ri; hkâsu mù gâ le, nungmoq gi, Yhang nhang kat é Sû lé a lumjínng kó é yanmai nghut ri. ³⁹ Nungmoq gi, haù Chyúmdang mai ahtum abyuq é asak wó yû râ nghut lhê ga myit yû kô é yanmai, haù Chyúmdang má ho wú akô nghut ri; nghut kôlhang, Chyúmdang haù gi, Ngò eq séng luí saksé hkâm byi ri; ⁴⁰ nghut kôlhang, asak wó yû râ matú, nungmoq gi, Ngá chyáng a kâm lé kó nghut ri.

⁴¹ Ngò gi, byu eq hkya-ôn é lé a lhom yu é nghut lhê. ⁴² Nghut kôlhang, nungmoq lé gi, Ngò sê lhê; nungmoq é i-myt hkaù má, Garai Gasang lé chyitdap é myit a bò kó nghut ri. ⁴³ Ngò gi, Ngá Wâ é myìng mai jé lé é sù nghut kôlhang, nungmoq gi, Ngo lé a lhom hap yû kó; yhâng myìng yhang lang é byù, gotû rayuq jé lé é ru nghut le gi, haù yuq lé, nungmoq lhom hap yû kó râ nghut lhê. ⁴⁴ Nungmoq gi, rayuq eq rayuq hkya-ôn lhùm é lé za hap yû luí, rayuq za nghut é Garai Gasâng chyáng mai lo é hkya-ôn hkyô lé gi, a hô kô é bang nhîng, hkâsu kut wó lumjínng kó râ lú?

⁴⁵ Nghut kôlhang, haù Íwâ é hí má, Ngò, nungmoq lé mara hùn nhô hkâ-ngâm kó; nungmoq lé mara hun é sù gi, haù nungmoq mai myit myoqbyu tô é Mosheq ru nghut lhê. ⁴⁶ Mosheq lé nungmoq gè gè yhang lumjínng kó é ru nghut le gi, Ngo lé le lumjínng kó

† 5:33 Yohan shí yuq gi, Wui-myhup Sará Yohan nghut lhê.

râ nghut lhê; hkâsu mù gâ le, Mosheq gi, Ngá é hkyô lé kâ tô é sù nghut ri. ⁴⁷ Nghut kôlhang, nungmoq gi, yhang kâ tô é pé lé lhang a lumjing kô é nhing, Ngá dang lé, hkâsu kut wó lumjing kó râ lhu?" gâ ri.

6

Byù Ngo Hkying Lé Zoshuq Byi Tsô É Hkyô

Mht 14:13-21; Mrk 6:30-44; Luk 9:10-17

¹ Hau htang a myang má, Yesuq gi, Tiberi nhong le gâ é, Galile nhong he hpoq shut gû dap ló bê nghut ri. ² Haú hkûn, byù ajùm ayò gi, haú nò bang htoq má, Yhang kut shit é limik kumhá pé lé myang kô é yanmai, Yhang htang châng e ló bum akô nghut ri. ³ Yesuq gi, bùm shut doq ló mù, Yhang é chángzô pé eq rahá zung tô ri. ⁴ Yudaq byu pé é Lhoqlhai Poí gi, chyâng lo nyi bê nghut ri.

⁵ Yesuq gi, tu wú kat le, byù ajùm ayò Yhang shut lé lo bùm kô é lé byu-myang kat luí, Hpilip lé, "Shí bang zo râ muk, nga-nhung, hkâmá ê wó wuí râ lhu?" ga taí ri. ⁶ Yesuq, haú su ga taí é gi, yhang lé chyam wú râ matú za nghut ri; hkâsu mù gâ le, hkâsu kut râ hkyô gi, Yhang é myit má bo to gù bê nghut ri.

⁷ Hpilip gi, Yhang lé, "Denari* í sho eq muk wui le lhang, rayuq ratsuí tsuí ngap râ a nghut." ga tû taí ri.

⁸ Haú hkûn, Yhang é chángzo nghut é, Simun Petruq é yhanggu Andre gi, Yhang lé, ⁹ "Muk-yo muk ngo long eq ngozo í du wó é yuqgè zo rayuq, shí má nyi ri; nghut kôlhang, byù shí myhò bang lé luq shoq, hkâsu kut wó gam byi râ lhu?" ga taí htoq kat ri.

¹⁰ Yesuq gi, "Haú shiwa byu pé lé, zùng nhang keq." ga taí ri. Jowò haú gi, mhán htu é jang nghut mù, yuqgè wui baú lhang, ngo hkying kô zung tô bùm bekô nghut ri; ¹¹ hau htang, Yesuq gi, muk long pé lé yù mù, jeju

hkyâ-on luí, zung tô é bang lé, yhangmoq o é myhò tsing gam byi ri. Haú eq rajung za, ngozo lé le haú su kut ri.

¹² Yhangmoq banshoq bang zô gyí bùm kô é htang má Yhang gi, Yhang é chángzô pé lé, "Myit gyó tô é ajap azo pé lé châng guq tsing yù keq. Haí le a langsâ pyâm shang gaq." ga taí ri. ¹³ Haú mù, yhangmoq gi, zô myhit tô é muk-yo muk ngo long má é ajap azo pé lé châng guq tsing le, raxe í mung bying shoq wó guq tsing yu akô nghut ri.

¹⁴ Haú shiwa byu pé gi, Yesuq kut é limik kumhá lé myang kô é hkûn, "Shí yuq gi, mingkan htoq má jé lé lô râ gâ é, Myiqhtoi yhang nghut ri-nhung!" ga taí bum akô. ¹⁵ Yesuq gi, yhangmoq lé mù, Yhang lé hkohkâm zik kut nhang kó râ dâ é hkyô lé, sê é yanmai, Yhang baú tsik za bùm shut dum haq doq ló bê nghut ri.

Yesuq, Wui Htoq Má Sô É Hkyô

Mht 14:22-27; Mrk 6:45-52

¹⁶ Buigyum htang, Yhang é chángzô pé gi, haú nhong shut gyó ló mù, ¹⁷ lhai má wang ji luí, nhong hé hpoq má é Kaperna-um wà shut gû e ló akô; haú hkûn, mauchut bê nghut kôlhang, Yesuq gi, yhangmoq chyáng a jé gyó lo shí nghut ri. ¹⁸ Haú u lé, laidun htan lo é yanmai, wuilheng toq lô bê nghut ri. ¹⁹ Yhangmoq gi, sum myi déng kô lhai kôn e ló kô é hkûn, Yesuq gi, nhong htoq má so luí, haú lhai shut chyâng lé lo nyi é lé myang kômù, gyuq dan bùm bekô nghut ri. ²⁰ Nghut kôlhang, Yesuq gi, "Hkâgyuq kó, Ngò ru nghut lhê." ga yhangmoq lé taí ri. ²¹ Haú mù, yhangmoq gi, Yesuq lé gabú myit eq lhai hkaú má shuí hâng yù nau akô. Haú hkûn, lhai haú gi, radá dâm yhangmoq jé nau é jang wuiyàm má jé bê nghut ri.

²² Nhong hé hpoq má nyi tô é byù moq mó gi, haú má lhai racham za joq lai lo é hkyô eq, lhai haú má Yesuq a bo doq ji e za, chángzô pé baú ji htoq ló kô é hkyô lé, hau htang nyí,

* **6:7** Denari rachap gi, byù rayuq é ra-nyí é zuihpau eq wui é nghut lhê.

bùn sê kat akô nghut ri. ²³ Haú hkûn, haú Yhumsîng, jeju hkya-ôn é htâng, byu pé muk zô é jowò nàm má, Tiberi myuq má é lhaí pé jé lé bum ri. ²⁴ Haú byù moq mó gi, Yesuq eq Yhâng é chángzô pé, haú má a nyì lo kô é hkyô lé sé kô é yanmai, Yesuq lé châng hô râ matú lhaí haú pé má wang ji mù, Kaperna-um wà shut e ló akô nghut ri.

Yesuq, Asak Muk Nghut É Hkyô

²⁵ Yhangmoq gi, nhông hé hpoq má Yesuq lé myàng kôjáng, "Rabai ê, Nàng gi, shí má hkâ-nhám jé lé é l hú?" ga, Yhang lé myî akô.

²⁶ Haú hkûn, Yesuq gi, "Ngò, nungmoq lé teng za taí kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê. ²⁷ Htên byuq sê é zoshuq é matú, hkâshikut kó; haú Byu Yhangzo byi râ nghut é ahtum abyuq é asak é matú, ru gîng nyi é zoshuq wó yû râ lé sheq shikut nyi keq. Yhâng chyáng gi, haú Íwa Garai Gasang mai Yhâng é saksé dizik tap to bê nghut lhê." ga tû taí ri.

²⁸ Haú mù, yhangmoq gi, "Garai Gasang ô nau é muzó pé zui saí râ matú, ngamoq haí kut ra râ l hú?" ga Yhang lé myî akô.

²⁹ Haú hkûn, Yesuq gi, "Garai Gasang nhang kat é Sû lé, lumjîng é gi, Garai Gasang ô nau é muzó nghut bê." ga tû taí ri.

³⁰ Haú mù luí, yhangmoq gi, Yhang lé, "Ngamoq myoq èq wó myâng luí, Nàng lé lumjîng râ matú, Nàng, haí jung limik kumlhá kut shit râ l hú? Nàng, haí jung kut shit râ l hú? ³¹ Haú Chyúmdang má, 'Yhang gi, yhangmoq zo râ matú, mauhkûng mai muk byî ri.'* ga kâ tô é eq rajung za, ngamoq é íchý íwa pé gi, haú yoso hkaú má mannaq muk zo bekô nghut lhê." ga taí akô.

³² Haú hkûn, Yesuq gi, yhangmoq lé, "Ngò, nungmoq lé teng za taí kôlé, nungmoq lé mauhkûng mai muk byî

é Sû gi, Mosheq a nghut, haú Ngá Wa sheq, nungmoq lé mauhkûng mai tengmán é muk byî é Sû ru nghut lhê. ³³ Hkâsu mù gâ le, Garai Gasang byî é muk gi, mauhkûng mai gyó lé luí, haú mingkan lé asak byî é Sû nghut lhê." ga taí ri.

³⁴ Yhangmoq gi, "Yhumsîng ê, ahkuí mai, ngamoq lé muk haú hkâ-nhám le byî nyi laq." ga chôm taí bum akô.

³⁵ Haú mù, Yesuq taí kyô é gi, "Ngò gi, asak muk nghut lhê. Ngá chyáng lé é sû gi, hkâ-nhám le zòmút é hui râ a nghut; Ngo lé lumjîng é sû le, hkâ-nhám le wuîshit é hui râ a nghut.

³⁶ Nghut kôlhang, Ngò, nungmoq lé taí wú bê eq rajung za, nungmoq gi, Ngo lé myang wú é nghut kôlhang, a lumjîng shi kó nghut ri. ³⁷ Haú Íwa mai Ngo lé ap byî tô é byù lhunglhang bang gi, Ngá chyáng lé kó râ nghut luí, Ngá chyáng lé é sû ó yuq lé le, Ngò gi, hkâ-nhám lé hkat htoq pyám râ a nghut. ³⁸ Hkâsu mù gâ le, Ngò, mauhkûng mai gyó lé é gi, Ngò ô nau é hkyô lé kut râ matú a nghut e za, Ngo lé nhang kat Sû ô nau é hkyô lé kut râ matú ru nghut lhê. ³⁹ Haú Ngo lé nhang kat Sû ô nau é hkyô gi, Yhang mai Ngo lé ap byî tô é bang má é rayuq lé l háng, Ngò, a lhoq hpyuq pyâm e za, jìhtûm buinyì má yhangmoq lé dum lhoq dui toq yû râ matú ru nghut lhê. ⁴⁰ Hkâsu mù gâ le, Ngá Wa ô nau é hkyô gi, haú Zo lé wú mù, Yhang lé lumjîng é sû yuq hkangmó, ahtum abyuq é asak lé wó yû râ matú nghut lhê; Ngò le, jìhtûm buinyì má haú bang lé lhoq dui toq râ nghut lhê." gâ ri.

⁴¹ Haú mù, "Ngò gi, mauhkûng mai gyó lé é muk nghut lhê." ga, Yesuq taí é yanmai, Yhang eq séng luí, Yudaq byu pé taí put kô é gi, ⁴² "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó l hú? Haú sù é nhîng, ahkuí, 'Ngò gi, mauhkûng mai gyó lé

* 6:31 Htoq Ló 16:4

é nghut lhê.' ga, Yhang hkâsu kut wó taí lhê lhú?" gâ bum akô.

⁴³ Haú hkûn, Yesuq gi, "Nungmoq ahkaú má hkâtaí put nyi kó. ⁴⁴ Haú Ngo lé nhang kat é sù Íwa mai shuí jé é sù za a nghut jáng, ó yuq le Ngá chyáng wó jé lé rá a nghut; jé lé é sù lé gi, jìhtûm buinyi má, Ngò lhoq dui toq rá nghut lhê. ⁴⁵ Myiqhtoi laiká pé má, 'Yhangmoq lhunglhâng bang gi, Garai Gasâng èq mhoq byi é hui kó rá nghut lhê.'* ga kâ tô é eq

rajung za, haú Íwâ chyáng mai gyo yù, mhoq yu é bang yuq hkanmó gi, Ngá chyáng lé kó rá nghut lhê. ⁴⁶ Haú gi, rayuq yuq mai, haú Íwâ lé myang wú bê nghû nau é a nghut; Garai Gasâng chyáng mâ é Sù za sheq, haú Íwâ lé myang wú é Sù nghut lhê. ⁴⁷ Ngò, nungmoq lé teng za taí kôlé, lumjínng é sù gi, ahtum abyuq é asak wó lhê. ⁴⁸ Ngò gi, asak muk nghut lhê. ⁴⁹ Nungmoq é íchyí íwâ pé gi, haú yoso hkaú má mannaq muk zo bekô nghut lhê; nghut kôle, shi byuq bekô nghut ri. ⁵⁰ Nghut kôlhâng, shi gi, mauhkûng mai gyó lé lo é muk nghut lhê; haú lé zô é sù gi, a shi lo rá nghut lhê. ⁵¹ Ngò gi, mauhkûng mai gyó lé lo é, haú asak dui é muk nghut lhê; rayuq yuq, muk shi lé zô é nghut le gi, ahtum abyuq dui nyi rá nghut lhê; muk shi gi, mingkan zô wui é asak matú, Ngò byi rá nghut é Ngá gungsho nghut lhê." ga tû taí ri.

⁵² Haú mù, haú Yudaq byu pé gi, "Byù shí yuq gi, nga-nhúng lé, Yhâng é gungsho hkâsu kut wó byi tso rá lhú?" ga, yhangmoq yhangchang dang htíng htíng lhûm bum akô.

⁵³ Haú hkûn, Yesuq gi, yhangmoq lé, "Ngò, nungmoq lé teng za taí kôlé, haú Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó rá a nghut. ⁵⁴ Ngá é gungsho lé zô é eq Ngá é sui lé shuq é sù, ó yuq nghut kôle, ahtum abyuq é asak wó é nghut lhê; Ngò gi, jìhtûm buinyi má, haú yuq lé lhoq dui toq yû rá nghut lhê. ⁵⁵ Hkâsu mù gâ

le, Ngá é gungsho gi, zojung yhang nghut lhê; Ngá é sui gi, shuqjung yhang nghut lhê. ⁵⁶ Ngá é gungsho lé zô é eq Ngá é sui shuq é sù, ó yuq nghut kôle, Ngò má nghut nyi luí, Ngò le haú yuq má nghut nyi bê nghut lhê. ⁵⁷ Haú rû dui nyi é Íwâ gi, Ngo lé nhang kat luí, Ngò gi, haú Íwâ é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi rá nghut lhê. ⁵⁸ Shí gi, mauhkûng mai gyó lé lo é muk nghut lhê. Nungmoq é íchyí íwâ pé gi, mannaq muk zo kôle, shi byuq bekô nghut ri; nghut kôlhâng, muk shi lé zô é sù gi, ahtum abyuq dui nyi rá nghut lhê." ga taí ri. ⁵⁹ Dang haú pé gi, Yesuq, Kaperna-um wà mâ é tarajong má mhoqshit nyi é u lé, taí é dang nghut ri.

Chángzô Pé Myo Myo, Yesuq Lé Kâng Pyâm To Kô É Hkyô

⁶⁰ Yhâng é chángzô pé myo myo gi, haú lé wó gyo kôjáng, "Dang shi gi, gyai wui ri. Ó yuq wá wó cháng rá lhú?" ga taí bum akô.

⁶¹ Yesuq gi, haú eq séng luí, Yhâng é chángzô pé taí put nyi bùm kô é lé Yhâng é myit má sé luí, yhangmoq lé, "Dang shi é yanmai, nungmoq myit htên bum akô lhú? ⁶² Haú Byu Yhangzo gi, Yhang nyi laí lò bê jowò shut taú doq ló é lé, nungmoq myàng kô é nghut le gi, hkâsu nghû kó rá lhú? ⁶³ Haú Woi-nyí gi, asak byi lhê; gungsho kúm gi, haú le a wó dut nghut ri. Nungmoq lé, Ngò taí é dang pé gi, Woi-nyí le nghut lhê, asak le nghut lhê. ⁶⁴ Nghut kôle, nungmoq chyáng mâ é ra-am gi, a lumjínng kó nghut ri." ga taí ri. Hkâsu mù gâ le, ô pé gi, a lumjínng kó rá eq, ó yuq gi, Yhang lé ap pyám rá nghut é hkyô lé, Yesuq gi, sâng-hi mai sê to gù bê nghut ri. ⁶⁵ Yhang xoq taí é gi, "Haú su mù, haú Íwâ èq ahkáng byi é sù za a nghut le gi, ó yuq le Ngá chyáng wó lé rá a nghut nghû, Ngò, nungmoq lé taí kyo wú bê nghut lhê." gâ ri.

* 6:45 Esai 54:13

⁶⁶ Haú dàm mai, Yhâng é chángzô pé myo myo gi, Yhâng htâng a cháng lo kô e za, taù ló byuq bùm bekô nghut ri.

⁶⁷ Haù su mù, Yesuq gi, haù chángzo raxe í yuq lé, "Nungmoq le, ló byuq nau akô, a nghut lú?" ga myî ri.

⁶⁸ Haù hkûn, Simun Petruq gi, "Yhumsîng ê, Nang gi, ahtum abyuq é asak mungdang wó Sû nghut to bê lé nhîng, ngamoq gi, ó yuq chyáng ê shirâ lú?" ⁶⁹ Nang gi, Garai Gasâng é Chyoiyúng Sû nghut é lé, ngamoq, lumjîng lhê, sê nyi lhê." ga, Yhang lé tû taí ri.

⁷⁰ Haù hkûn, Yesuq gi, "Nungmoq raxe í yuq lé, Ngò hkyin yù bê a nghut kó lú? Nghut kôle, nungmoq mâ é rayuq gi, nat nghut ri." ga tû taí ri. ⁷¹ (Yhang gi, haù Simun Iskarut é yhangzo, Yudaq lé taí nau é nghut ri; haù yuq gi, chángzo raxe í yuq má bò sù nghut kôle, htâng má, Yhang lé ap pyám râ sù nghut ri.)

7

Yesuq Eq Yhâng É Gumang Wuî

¹ Hau htâng má, Yesuq gi, Yhang lé sat râ matú, Yudaq byu pé ho nyi bùm kô é yanmai, Yuda mau má a kâm sô wún mù, Galile mau má sô lhing wún ri. ² Nghut kôlhang, haù Yudaq byu pé é Saksé Zúm Poî chyâng lo nyi é hkûn, ³ Yesuq é yhanggu yuqzô pé gi, Yhang lé, "Náng é chángzô pé gi, Nang kut é laklaí kumlhá pé lé myàng kó sháng gaq, Nang, shî mai htoq ló luî, Yuda mau shut e ló aq. ⁴ Myîng hu nau é sù gi, hkaù zaù luî haî le a kut wú é nghut lhê. Nang gi, haù pé lé kut nyî bê nghut é yanmai, mingkan lé, Náng gûng tûn shit aq." ga taí akô. ⁵ Hkâsu mù gâ le, yhanggu sîng yuqzô pé lhang, Yhang lé a lumjîng kô nghut ri.

⁶ Haù mù luî, Yesuq gi, yhangmoq lé, "Ngá é ahkyíng gi, a jé shi nghut ri; nungmoq é ahkyíng kúm gi, hká hkûn le joq nyi ri. ⁷ Haù mingkan gi, nungmoq lé a jú a wó kut kó nghut ri; nghut kôlhang, Ngo lé gi, a jú kó; haî mù gâ le, yhang kut é hkyô gi, agé

ashop é nghut é lé, Ngò, saksé tûn shit é yanmai nghut ri. ⁸ Nungmoq gi, poî haù shut doq ló keq. Ngò kúm gi, Ngá é ahkyíng a jé shi nghut é yanmai, poî haù shut a doq ló shirâ nghut lhê." ga taí ri. ⁹ Haù su ga taí luî, Yhang gi, Galile mau má nyi gyó to bê nghut ri.

¹⁰ Nghut kôlhang, Yhang gu pé, haù poî shut doq ló byuq é htâng má, Yhang gi, de de a nghut é dông, tsik za châng doq ló bê nghut ri. ¹¹ Yudaq byu pé gi, haù poî má, Yhang lé châng hô kômù, "Haù yuq gi, hkâmá nghut lhê lú?" ga, myi wún akô nghut ri.

¹² Haù byù hpûng hkaù má, Yhang eq séng luî taí lhum bùm kô é má, ra-am gi, "Yhang gi, byù gè nghut ri." ga taí kôjáng, ra-am gi, "A nghut, Yhang gi, byu pé lé hkyô shuî nghoq sù nghut ri." ga tû taí akô. ¹³ Nghut kôlhang, haù Yudaq suwún wuî lé gyuq kô é yanmai, ó yuq le, Yhang eq sêng é hkyô lé de de a wám taí kô nghut ri.

Haù Poî Má, Yesuq Mhoqshit É Hkyô

¹⁴ Haù poî rawuí nghut ló é hkûn, Yesuq gi, noqkuq yhûm má doq ê luî, mhoqshit hi ló bê nghut ri. ¹⁵ Haù hkûn, Yudaq byu pé gi, gyô maú byuq kômù, "Shí yuq gi, mhoq yu é hkyô le a joq wú é wá, haù-í hkâsu mù sê lhê laq?" ga myi bum akô.

¹⁶ Haù mù, Yesuq tû taí é gi, "Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê. ¹⁷ Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasâng chyáng mâ é nghut a nghut é eq, Ngá é myit dông taí é dang nghut a nghut é lé, yhang sê gàm hkoq yû râ nghut lhê. ¹⁸ Yhumsîng é myit dông taí é sù gi, yhumsîng é matú aróng hô sù nghut ri; nghut kôlhang, yhumsîng lé nhang kat su é matú, aróng ho é sù gi, tengmán é byû nghut ri; yhang má, a tengmán é hkyô haî le a bò nghut ri. ¹⁹ Mosheq gi, nungmoq lé jep é tarâ byî to bê, a nghut kó lú? Nghut kôlhang, nungmoq ó yuq le, jep

é tarâ haû lé a cháng kó nghut ri. Haû mù luî, Ngo lé sat nau nyi akô lhú?" gâ ri.

²⁰ Haû hkûn, haû byù hpûng gi, "Nàng gi, nat gang wang to sù nghut ri-nhung! Nang lé, ó yuq wá sat nau nyi ri lhú?" ga tâ taî akô.

²¹ Yesuq gi, yhangmoq lé, "Ngò, lak-laí kumlhá ralhum kut jáng, nungmoq banshoq bang gi, maú byuq bum akô. ²² Nghut kôlhang, nungmoq gi, ahpyo-kuq hpyit byî é hkyô lé, Mosheq byî é nghut lhê ga luî, Bánno buinyi má, zoshâng lé ahpyo-kuq hpyit byî akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, íchyí îwâ pê chyáng mai lo é ru nghut lhê.). ²³ Haû, Mosheq é jep é tarâ lé a lhoq htên pyám sháng gaq nghû, Bánno buinyi má, zoshâng lé ahpyo-kuq hpyit byî é nghut le gi, haû mù luî, Bánno buinyi má, byù rayuq é gùng gón lé, Ngò lhoq gê byî é yanmai, Ngo lé nhikjum yô akô lhú? ²⁴ Byù du lé wú luî hkâjéyáng kó; tengmán é dông sheq jéyáng keq." ga tâ ri.

Yesuq Gi, Hkrisduq Nghut Lhê Lhú?

²⁵ Haû mù luî, Yerusalem wà mó má é byu pé ra-am gi, "Haû yhangmoq sat pyám nau nyi é sù gi, shí yuq a nghut lhi? ²⁶ Yhang gi, shí má de de dâng nyo nyi le, yhangmoq gi, Yhang lé, haû le a ga kó myhi-nhung! Yhang gi, Hkrisduq nghut lhê ga, haû ahkáng ayá wó bang gi, gè gè yhang, sê akô abe? ²⁷ Haû Hkrisduq jé lé é hkûn gi, Yhang hkâmai lé lo é lé, ó yuq lhang sé râ a nghut." ga tâ bum akô. Nghut kôlhang, shí yuq gi, hkâmâ é sù nghut é lé, nga-nhung sê lhê;

²⁸ Haû mù, Yesuq gi, noqkuq yhûm wàng má mhoqshit uchyang, htê mó èq tâi kat é gi, "Nungmoq gi, Ngo lé sê é htoq agó, Ngò, hkâmai lé é sù nghut é lé le, sê akô nghut ri. Ngò gi, Ngá myit dông shí má lé nyi tô é sù a nghut kôlhang, Ngo lé nhang kat é Sù gi, tengmán lhê; nungmoq gi, Yhang lé a sé kôlhang, ²⁹ Ngò gi, Yhang lé sê lhê; hkâsu mù gâ le, Ngò gi, Yhâng chyáng

mai lé é sù eq Yhang mai nhang kat é sù nghut lhê." gâ ri.

³⁰ Haû mù, yhangmoq gi, Yhang lé chyup râ dâ akô; nghut kôlhang, Yhâng é ahkyíng a jé shi é yanmai, Yhang lé chyup râ matú, ó yuq le loq a jé kó nghut ri. ³¹ Nghut kôlhang, byù hpûng hkaû má é bang myo myo gi, Yhang lé lumjíng bûm kôluî, "Haû Hkrisduq jé lé é hkûn, Yhang gi, shí yuq htoq má, limik kumlhá pé je wó kut shit râ lhú?" ga tâ bum akô nghut ri.

³² Haû Hparishe pé gi, haû byù hpûng hkaû má, Yesuq eq sêng é hkyô lé, haû su ga dangsoq soq lhûm nyi kô é hkyô lé wó gyô yu akô. Haû mù, haû hkyangjong agyi pé eq Hparishe pé gi, Yhang lé ê chyup râ matú, noqkuq yhûm zúng é bang lé nhang kat akô.

³³ Haû hkûn, Yesuq gi, "Ngò gi, nungmoq eq rahá rayoq zo za nyi râ nghut lhê; hau htâng, Ngo lé nhang kat Su chyáng taû ló râ nghut lhê.

³⁴ Haû hkûn, nungmoq gi, Ngo lé hô kôlhang, myang hô kó râ a nghut; Ngò nyi é jang má, nungmoq wó jé kó râ a nghut." ga tâ ri.

³⁵ Hau é yanmai, Yudaq byu pé, rayuq eq rayuq tâi lhum kô é gi, "Shí yuq gi, Yhang lé nga-nhung a myang hô loshoq, hká shut e byuq râ dâ lhê lhú? Yhang gi, Grik byu pé má nyi byo myín tô é nga-nhung é byu pé nyi é jowò má ê mù, Grik byu pé lé, ê mhoqshit râ dâ lhê lhú? ³⁶ 'Nungmoq gi, Ngo lé hô kôlhang, myang hô kó râ a nghut.' gâ é eq, 'Ngò nyi é jang má, nungmoq wó jé kó râ a nghut.' gâ é, Yhang tâi é dang gi, haû jung wá gá naû é nghut lhê lhú?" gâ akô.

³⁷ Haû lô htâng é eq je ahkyak é Poî buinyi má, Yesuq toq yap luî, htê mó èq tâi é gi, "Wuî shit sù gi, Ngá chyáng lé mù, shuq sháng gaq. ³⁸ Ngo lé lumjíng é sù ó yuq nghut kôle, haû Chyúmdang má tâi tô é eq rajung za, 'Yhâng chyáng mai asak uchyam é wuilàng yui htoq lô râ nghut lhê.'" gâ ri. ³⁹ Yhang haû su gâ é gi, Yhang lé lumjíng é bang myang hap yù râ

nghut é, haú Woi-nyí lé taí é nghut ri. Haú hkûn jé shoq, haú Woi-nyí lé a byi kat shi nghut ri. Hkâsu mù gâ le, Yesuq gi, hpungwup shingkang dan hû é a hui nhâng shi é yanmai nghut ri.

⁴⁰ Yhâng é dang pé lé wó gyo kôjáng, ra-am gi, "Shí yuq gi, gè gè yhang, Myiqhtoi haú nghut ri." ga taí akô.

⁴¹ Ra-am gi, "Shí yuq gi, Hkrisduq nghut ri." ga taí akô. Góbang nghut jáng, "Hkrisduq wá Galile mau mai htoq lé râ nghut lhê lhú?" ⁴² Haú Chyúmdang má, Hkrisduq gi, Dawiq é awut ashín mâ é nghut luí, Dawiq nyi lai lo é Betlehem wà mai htoq ló râ nghut lhê gâ é, a nghut lhú?" ga myí bum akô nghut ri. ⁴³ Haú mù luí, Yesuq é yanmai, shiwa byu pé gi, gàm hkoq lò byuq bekô nghut ri. ⁴⁴ Ra-am gi, Yhang lé chyup yù nau bùm kôlhang, Yhang lé loq a záng kó nghut ri.

Yudaq Byu Pé Lé Shuí U É Bang A Lumjínng Kô É Hkyô

⁴⁵ Hau htâng má, haú noqkuq yhûm zúng bang gi, haú hkyangjong agyi pé eq Hparishe pê chyáng taú ló kô é hkûn, haú bang gi, yhangmoq lé, "Nungmoq, haú mù luí, Yhang lé a shuí lo kô é lhú?" ga lhom myí akô.

⁴⁶ Haú hkûn, haú noqkuq yhûm zúng bang gi, "Shí yuq su ga taí é byù gi, ó le a nyí wú é nghut lhê." ga taí kyô akô.

⁴⁷ Haú mù, haú Hparishe pé gi, "Nungmoq lé le, Yhang èq mhoq hpyoq yù bekô lhú?" ⁴⁸ Haú zaú wui chyáng le, Hparishe pê chyáng le, Yhang lé lumjínng é byù bò akô lhú? ⁴⁹ A bò! Nghut kôlhang, haú jep é tarâ lé a sê é byù moq mó shí gi, nhîng pyâm é hui bekô nghut ri." ga nhik-yô é dông tú taí kat akô nghut ri.

⁵⁰ Nghut kôlhang, yhangmoq hpúng má bo é, hí hkûn Yesuq chyáng e wú bê sù nghut é, Nikodimu gi, ⁵¹ "Nga-nhúng é tarâ gi, byù rayuq lé, yhâng é dang hí a gyô wú é eq, yhang haú kut

é lé a sê e za, mara byi lhê lhú?" ga, yhangmoq lé myí ri.

⁵² Haú hkûn, yhangmoq gi, "Nàng le, Galile mau byù nghut lhê lhú? Galile mau mai myiqhtoi rayuq lháng a htoq é hkyô lé, nàng gon wú aq, haú jáng sé râ nghut lhê." ga tú taí akô.

⁵³ Hau htâng, yuq hkangmó gi, ó le ô yhûm shut taú ló byuq bùm bekô nghut ri.*

8

Yesuq Lé, Lé Myí Chyam Wú Kô É Hkyô

¹ Yesuq kúm gi, Tsanlun Bùm shut e ló bê nghut ri. ² Htang napkyó napsûn noq le, Yesuq gi, noqkuq yhûm wàng hkaú má dum ê luí, byu pé lhunglháng gi, Yhâng é lhîngkyuq má lé zîng bum akô; haú mù, Yhang gi, zung to luí, yhangmoq lé mhoqshit ri. ³ Haú hkûn, haú tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuí lé lô kômù, gung gung má shap to kôluí, ⁴ Yesuq lé, "Sará ê, myiwe myhí shí lé, sulàng shut nyi é má myang chyup yu é nghut lhê. ⁵ Haú Mosheq é tarâ má gi, shí su é myiwe lé, luqgok èq dú sat pyám keq ga, nga-nhúng lé hkunmó hkyô tô ri. Ahkuí, Nàng gi, hkâsu nghú râ lhú?" ga myí akô. ⁶ Yhangmoq haú su ga myí é hkyô gi, Yhang lé mara wó hûn shoq ga, chyam wú râ matú nghut ri.

Nghut kôlhang, Yesuq gi, ngóm mù, myigùng má loqnyhuí èq htaú kâ nyi ri. ⁷ Yhang lé, yhangmoq ru jang myí nyi kô é hkûn, Yhang gi, yap nyhang kat mù, yhangmoq lé, "Nungmoq mâ é mara a wó é sù hí, myiwe myhí shí yuq lé luqgok èq dú sháng gaq." ga taí ri. ⁸ Hau htâng, Yhang gi, dum ngóm luí, myigùng má kâ nyi ri.

⁹ Yhangmoq gi, haú su gâ é lé wó gyo kôjáng, je mang bang mai hí luí, rayuq htâng rayuq ló byuq bekô nghut luí, Yesuq baú za myit gyó tô é eq, myiwe myhí haú jâng yap nân

* 7:53 Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

tô ri. ¹⁰ Yesuq gi, yap nyhang kat luî, yhang lé, "Myiwe myhi ê, yhangmoq hká ló bekô lhú? Ó yuq eq le, nang lé mara a byi kó lhú?" ga myi ri.

¹¹ Yhang gi, "Yhumsing ê, ó yuq le mara a byi kó nghut ri." ga tû taî ri.

Haú hkûn, Yesuq gi, "Ngò le, nang lé mara a byi, ló aq hkoi, ahkuî mai mara hkâdum kut shut lo." ga taî kat ri.

Yesuq, Mingkân É Maubó

¹² Yesuq gi, shiwa byu pé lé dum nyo é hkûn, "Ngò gi, mingkân é maubó nghut lhê; Ngá htâng châng é sù ó yuq nghut kôle, mauchut hkaû má hkâ-nhâm le so râ a nghut, asak maubó lé wó râ nghut lhê." ga taî ri.

¹³ Haû mù, haû Hparishe pé gi, "Wú aq, Náng gûng Náng saksé hkâm yu é nghut ri; Náng é saksé gi, teng râ a nghut." ga taî akô.

¹⁴ Haú hkûn, Yesuq gi, "Ngá gûng Ngò saksé hkâm kôlhang, Ngá é saksé gi, têng lhê; hkâsu mù gâ le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri.

¹⁵ Nungmoq gi, byù hkyam dông za jéyáng akô; Ngò gi, ó yuq lé le a jéyáng é nghut lhê. ¹⁶ Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gâ le, Ngò gi, Ngò baú a nghut, haû Ngo lé nhang kat é sù Íwa eq rahá nghut nyi lhê. ¹⁷ Haû nungmoq é tarâ má yhang le, í yuq mai hkâm é saksé gi, têng lhê ga kâ tô ri. ¹⁸ Ngò gi, Ngá é matú saksé hkâm yù sù nghut lhê; hau htoq agó, haû Ngo lé nhang kat é sù Íwa le, Ngá é matú saksé hkâm byi é nghut lhê." ga tû taî ri.

¹⁹ Haû mù, yhangmoq gi, Yhang lé, "Náng Wa gi, hkâmá lhú?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kô é nghut le gi, Ngá Wa lé le, sé kó râ nghut lhê." ga tû taî ri. ²⁰ Dang haú pé gi, haû noqkuq

yhûm wàng hkaû má é alu kat jang nàm má, Yhang mhoqshit nyi é u lé taî é dang nghut ri. Nghut kôlhang, Yhang lé, ó yuq le a chyup kó; hkâsu mù gâ le, Yhâng é ahkyíng a jé shi é yanmai nghut ri.

²¹ Haû mù luî, Yesuq gi, yhangmoq lé, "Ngò gi, ló byuq râ nghut lhê, haú hkûn, nungmoq Ngo lé hô kó râ, yhumsing é mara má le shi kó râ nghut lhê. Ngò ló é jang má, nungmoq wó jé kó râ a nghut." ga, radàm dum puq taî ri.

²² Hau é yanmai, haû Yudaq byu pé gi, "Ngò ló é jang má, nungmoq wó jé kó râ a nghut." gâ é gi, Yhânggùng yhang sat shi râ gâ é nghut lhê lhú?" ga myi bum akô.

²³ Nghut kôlhang, Yesuq xox taî é gi, "Nungmoq gi, a-ô mai lo é bang nghut akô; Ngò gi, ahtoq mai lé é sù nghut lhê. Nungmoq gi, mingkan shi eq sêng é bang nghut akô; Ngò kúm gi, mingkan shi eq sêng é sù a nghut.

²⁴ Haû mù, nungmoq gi, yhumsing é mara má shi kó râ nghut lhê nghû, Ngò taî é nghut lhê. Ngò gi, haú Yuq nghut lhê nghû taî é lé, nungmoq a lumjîng kô é nghut jáng, nungmoq gi, gè gè yhang, yhumsing é mara má shi kó râ nghut lhê." gâ ri.

²⁵ Haú hkûn, yhangmoq gi, "Náng, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhâm le taî nyi bê nghut lhê. ²⁶ Ngò gi, nungmoq eq séng luî, taî râ hkyô eq jéyáng râ hkyô, myo myo joq lhê. Nghut kôlhang, Ngo lé nhang kat é Sù gi, tengmán é Sù nghut lhê mù, Yhâng chyáng mai wó gyô yu é gû lé, Ngò, mingkan lé taî kyô lhê." ga tû taî ri.

²⁷ Yesuq gi, yhangmoq lé, Yhâng Wa eq séng é hkyô taî kyô nyi é lé, yhangmoq gi, a sé gyo kó nghut ri. ²⁸ Haû mù luî, Yesuq gi, "Haû Byu Yhangzo lé nungmoq tu shap* kat é hkûn sheq, Ngò gi, haú Yuq nghut é hkyô lé le, yhumsing myit dông haî le a kut e za, haû Íwa mhoq byi é dông za taî é hkyô

* **8:28** Tu shap gâ é lichyúm gi, tapzîng htoq má jén sat pyám râ gâ é nghut lhê.

lé le, nungmoq sé kó râ nghut lhê.
²⁹ Haû Ngo lé nhang kat é Sû gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngo lé baú za a tô pyâm to nghut ri." ga taí ri. ³⁰ Yhang, haû su taí nyi é u lé lhang, byù myo myo gi, Yhang lé lumjínq bùm bekô nghut ri.

Abraham É Awut Ashín Pê Hkyô

³¹ Haû mù, Yesuq gi, Yhang lé lumjínq é Yudaq byu pé lé, "Ngò mhogshit é hkyô lé châng kut nyi bekô nghut jáng, nungmoq gi, gè gè yhang, Ngá é chángzô pé nghut bekô.
³² Nungmoq gi, haû tengmán hkyô lé sé kó râ nghut luí, haû tengmán hkyô gi, nungmoq lé lhoq lhut kat râ nghut lhê." ga taí ri.

³³ Haû hkûn, yhangmoq gi, "Ngamoq gi, Abraham é awut ashín pé nghut luí, ó yuq é jùn le hkâ-nhám a dut wú é nghut lhê. Haû mù, 'nungmoq lé lhoq lhut kat râ' nghû Nang hkâsu kut wó taí lhê lhú?" ga tû taí akô.

³⁴ Yesuq dum tû taí é gi, "Ngò, nungmoq lé teng za taí kôlé, mara kut shut é sù gi, marâ é jùn nghut lhê. ³⁵ Jùn gi, yhùm ikun eq hkâ-nhám le sêng nyi râ a nghut; zo kúm gi, ikun eq ahtum abyuq sêng lhê. ³⁶ Haû mù luí, haû Zo gi, nungmoq lé lhoq lhut kat é nghut jáng, nungmoq gi, gè gè yhang, lut berâ nghut lhê. ³⁷ Nungmoq gi, Abraham é awut ashín pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yù kô é yanmai, Ngo lé sat râ dâ akô nghut ri. ³⁸ Ngò gi, Ngá Wâ chyáng mai myang yu é eq rajung za, nungmoq lé taí kyô nyi lhê; nungmoq le, nungmoq é îwa chyáng mai wó gyô yu é eq rajung za kut nyi akô nghut ri." ga ri.

³⁹ Haû hkûn, yhangmoq gi, "Ngamoq é îwa gi, Abraham nghut lhê." ga tû taí kôjáng, Yesuq gi, "Nungmoq, Abraham é yhangzô pé nghut é nghut le gi, Abraham kut é su kut kó râ nghut lhê. ⁴⁰ Nghut kôlhang, nungmoq gi, haû Garai Gasâng chyáng mai

wó gyô yu é tengmán hkyô lé taí kyo sù nghut é Ngo lé, sat pyám nau akô nghut ri. Haû sù é hkyô gi, Abraham a kut é nghut lhê. ⁴¹ Nungmoq gi, nungmoq é îwa kut é muzó lé yhang, kut nyi akô." ga taí ri.

Haû hkûn, yhangmoq gi, "Ngamoq gi, dezo amyû a nghut; ngamoq gi, Îwa rayuq za wó lhê; haû gi, Garai Gasang nghut lhê." ga taí he akô nghut ri.

Zô Wui É A-kyang Gi, Mó Ó Nghut É Hkyô Shit

⁴² Yesuq gi, yhangmoq lé, "Garai Gasang gi, nungmoq é Îwa nghut é nghut jáng, nungmoq gi, Ngo lé chyít-dap kó râ nghut lhê; hkâsu mù gâ le, Ngò gi, Garai Gasâng chyáng mai lé jé luí, ahkuí, shí má nyi tô é nghut lhê. Ngò gi, Ngá myit dông lé lo é a nghut, Yhang sheq Ngo lé nhang kat é ru nghut lhê. ⁴³ Nungmoq gi, haû mù Ngá é dang lé a sê gyo kô é lhú gâ le, Ngò taí é dang lé, nungmoq a wó lhom yù kô é yanmai nghut ri. ⁴⁴ Nungmoq gi, haû nungmoq é îwa nghut é nat Tsadán eq sêng é bang nghut luí, nungmoq é îwa ô nau é hkyô lé kut nau bum akô. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai, yhang gi, haû tengmán hkyô má a yap gîng nyi nghut ri. Yhang gi, mhaú é hkûn, yhâng é myit má bo é dông taí ri; hkâsu mù gâ le, Yhang gi, byù mhaú nghut luí, mhaú hkyô pé é îwa nghut ri. ⁴⁵ Haû su mù, Ngò, nungmoq lé, haû tengmán hkyô taí kyô é yanmai, nungmoq gi, Ngo lé a lumjínq kó nghut ri. ⁴⁶ Nungmoq mâ é ó yuq wá, Ngo lé mara bo lhê nghû saksé wó tûn shit akô lhú? Ngò gi, haû tengmán hkyô lé taí nyi é nghut le nhîng, nungmoq, Ngo lé haû mù a lumjínq kô é lhú? ⁴⁷ Garai Gasang eq sêng é sù gi, Garai Gasang taí é dang lé gyô lhê. Nungmoq a gyo kô é gi, nungmoq, Garai Gasang eq a sêng kô é yanmai nghut ri." ga taí ri.

Yesuq Eq Abraham

48 Haú hkûn, haú Yudaq byu pé gi, Yhang lé, "Nàng gi, Samariq byù nghut é htoq agó, nat gang wang júng to sù nghut lhê nghû, ngamoq taí é dang gi, jô lhê a nghut lhú?" ga myí akô.

49 Yesuq gi, "Ngò gi, nat gang wang júng é hui sù a nghut; Ngò gi, Ngá Wa lé sheq hkunggâ é ru nghut lhê; nungmoq kúm gi, Ngo lé taí hpoí nyi akô nghut ri. 50 Ngò gi, Ngá é matú aróng ho nyi é a nghut; nghut kôlhang, hô byi Sù rayuq nyi lhê, haú yuq jéyáng sháng gaq. 51 Ngò, nungmoq lé teng za taí kôlé, Ngá dang lé châng é sù gi, hkâ-nhám le, shî râ a nghut." ga taí ri.

52 Hau é yanmai, haú Yudaq byu pé gi, "Nàng gi, nat gang wang júng to sù nghut é lé, ahkuí, ngamoq sé bê! Abraham gi, shi byuq bê; haú myiqhtoí pé le, shi byuq bekô nghut ri; nghut kôlhang, Nàng gi, 'Ngá dang lé châng é sù gi, hkâ-nhám le, shî râ a nghut.' ga taí ri. 53 Nàng gi, ngamoq é îwa Abraham htoq hkik lhê lhú? Yhang gi, shi byuq bê; haú myiqhtoí pé le, shi byuq bekô nghut ri. Náng gûng nàng ó yuq su ngàm lhê lhú?" ga taí akô.

54 Yesuq gi, "Ngá gûng Ngò lhoq gyaú yu é nghut jáng, Ngá é aróng gi, hai hpaudap é a nghut; nghut kôlhang, haú nungmoq é Garai Gasang nghut lhê ga nungmoq taí é sù, Ngá Wa gi, Ngo lé lhoq gyaú é sù ru nghut lhê. 55 Nungmoq gi, Yhang lé a sé kó nghut ri; nghut kôlhang, Ngò gi, sê lhê. Yhang lé a sé nghû Ngò taí é ru nghut le gi, Ngò le nungmoq su byù mhaú dut râ nghut lhê; nghut kôlhang, Ngò gi, Yhang lé sé luí, Yhâng é dang gyo sù nghut lhê. 56 Nungmoq é îwa Abraham gi, Ngo lé râ buinyi lé myoqbyu gabú nyi é nghut luí, myàng mù, gabú bê nghut ri." ga tû taí ri.

57 Haú hkûn, haú Yudaq byu pé gi, Yhang lé, "Nàng gi, asak ngo xê zàn lháng a nghut shî é nhîng, Abraham lé myàng wú é nghut lhê lhú?" ga taí akô.

58 Yesuq gi, "Ngò, nungmoq lé teng za taí kôlé, Abraham lháng a hkû shî má, Ngò nyi gù bê nghut lhê."* ga tû taí ri.† 59 Haú mù luí, yhangmoq gi, Yesuq lé, dú râ ga luqgok kui yu akô; nghut kôlhang, Yesuq gi, haú noqkuq yhûm mai haq htoq ló byuq bê nghut ri.

9

Myoqjit Sù Lé Lhoq Gê Byí É Hkyô

1 Yesuq gi, sô yông ló nyi é u lé, hku lé é mai myoqjit to gû nghut é byù rayuq lé myang ri. 2 Haú hkûn, Yhâng é chángzô pé gi, Yhang lé, "Rabai ê, shí yuq, myoqjit gû hku lé é gi, ó yuq kut shut é yubak é yanmai nghut lhê lhú? Yhang kut shut é lhú? A nghut jáng, yhâng nu yhâng wa kut shut é lhú?" ga myí akô.

3 Yesuq tû taí é gi, "Haú gi, yhang kut shut é yanmai le a nghut, yhâng nu yhâng wa kut shut é yanmai le a nghut; haú Garai Gasang é muzó lé, yhang má wó lhoq htoq shít râ matú, haú dut é ru nghut lhê. 4 Nga-nhúng gi, haú Ngo lé nhang kat Su é muzó lé, nyí nghut tô ashî hkûn, zui saí nyi ra râ dut lhê; myín jé jáng gi, ó yuq le, mù wó zui saí râ a nghut. 5 Ngò gi, mingkan htoq má nyi tô é u lé, mingkân é maubó nghut lhê." gâ ri.

6 Yhang gi, haú su ga taí luí, myigùng má sôkan byé hkyó mù, tse-nyhaq saí yù luí, haú yuq é myoqjí má but byí ri. 7 Hau htâng, haú yuq lé, "Haú Siloam wuhtum má ê chí pyám aq." ga taí ri. (Siloam gâ é gi, nhang é gâ é lichyúm nghut lhê.). Haú mù, haú yuq gi, ê chí mù, myoq myàng luí, yhûm shut ló bê nghut ri.

8 Haú yhâng é yhumkyo bang eq yhang dung zô wún é lé myang wú é bang gi, "Shí yuq gi, haú zung to mù, dung zo zo lhaq kut é sù, a nghut kó lhú?" ga myí bum akô. 9 Ra-am gi, "Haú yuq nghut lhê." gâ bum akô.

Góbang gi, "A nghut, haú yuq su dut e za ru nghut lhê." ga taí akô.

* 8:58 Htoq Ló 3:14 † 8:58 Bun zo shî má, Yesuq gi, Yhânggùng yhang Garai Gasang nghut lhê gâ nyi nghut ri.

Nghut kôlhang, yhang gi, "Ngò, haú yuq yhang nghut lhê." ga taí ri.

¹⁰ Haú hkûn, yhangmoq gi, "Haú nghut le gi, náng myoq hkâsu kut wó myang é lhú?" ga myí akô.

¹¹ Yhang gi, "Haú Yesuq gâ é byù rayuq, tse-nyhaq ratsuí saí yù luí, ngá é myoqjí má but byi mù, 'Siloam wuìhtum má ê chí pyám aq.' ga ngo lé taí ri; haú mù, ngò é chí pyám é htâng má, ngá myoq wó myang é nghut lhê." ga tû taí ri.

¹² Haú hkûn, yhangmoq gi, "Byù haú yuq gi, hkâmá nyi ri lhú?" ga, yhang lé myí akô.

Yhang gi, "Ngò a sé." ga taí ri.

Myoq Dum Myang Byuq É Hkyô Lé, Hparishe Pé Gôn Wú É Hkyô

¹³ Yhangmoq gi, haú myoqjit wú bê sù lé, Hparishe pé chyáng shuí lé akô. ¹⁴ Yesuq, tse-nyhaq saí yù mù, haú yuq é myoq lé lhoq myâng byí é buinyi gi, Bánno buinyi nghut ri.

¹⁵ Haú mù, yhang, myoq hkâsu kut wó myang é hkyô lé, haú Hparishe pé le dum myí akô. Haú jáng, yhang gi, "Haú yuq gi, ngá é myoqjí má tse-nyhaq but byi mù, ngò gi, é chí pyám jáng, ngá myoq myàng bê nghut lhê." ga tû taí ri.

¹⁶ Haú Hparishe pé ra-am gi, "Shí yuq gi, Bánno buinyi é tarâ lé a châng é sù nghut é yanmai, Garai Gasâng chyáng mai lé é sù a nghut." ga taí akô.

Nghut kôlhang, ra-am gi, "Yubak dap sù rayuq gi, haú su é limik kumlhá pé lé, hkâsu wó kut htoq râ lhú?" ga myí akô. Haú mù, yhangmoq gi, myit a huí lhùm bùm lò kó nghut ri.

¹⁷ Haú mù, yhangmoq gi, haú myoqjit wú sù shut lhîng mù, "Nang lé myoq lhoq myâng byí é sù gi, hkasû é byù nghut lhê nghû, nàng taí râ lhú?" ga dum myi kôjáng, "Yhang gi, myiqhtoi rayuq nghut ri." ga, yhang tû taí ri.

¹⁸ Haú Yudaq byu pé gi, haú yuq myoqjit wú é hkyô lé le, ahkuí myoq dum myàng bê nghut é hkyô lé le, haú yhâng nu eq yhâng wa lé, é ji lò nhang é hkûn jé shoq, a lumjîng kó

nghut ri. ¹⁹ Haú mù, Yhangmoq gi, haú yhâng nu eq yhâng wa lé, "Shí yuq gi, nungnhik é yhangzo nghut lhê lhú? Hku lé é hkûn mai, myoqjit gù nghut lhê lhú? Yhang, ahkuí, hkâsu kut wó myang é lhú?" ga myí akô.

²⁰ Haú hkûn, yhâng nu eq yhâng wâ nhik gi, "Yhang gi, ngá-nhik é yhangzo nghut é lé le, hku lé é hkûn mai myoqjit gù nghut é lé le, ngá-nhik sê lhê.

²¹ Nghut kôlhang, yhang, ahkuí hkâsu kut wó myang é hkyô lé le, yhâng é myoq lé ó yuq èq lhoq myâng byí é hkyô lé le, ngá-nhik a sé. Yhang, asak wáng bê, yhang lé myí wú keq, yhânggùng yhang dat taí kyo râ nghut lhê." ga tû taí akô. ²² Haú yhâng nu eq yhâng wâ nhik gi, Yudaq byu pé lé gyuq kô é yanmai, haú su ga taí kô é nghut ri; hkâsu mù gâ le, Yesuq gi, haú Hkrisduq nghut lhê ga yín yu é sù, ó yuq lé nghut kôle, haú tarajong mai lhoq htoq pyám râ nghut lhê ga, haú Yudaq suwún wuì chôm myit hpyit to bekô nghut é yanmai nghut ri. ²³ Hau é yanmai, yhâng nu eq yhâng wâ nhik gi, "Yhang, asak wáng bê, yhang lé myí wú keq." ga taí kô é nghut ri.

²⁴ Haú Hparishe pé gi, myoqjit wú bê sù haú yuq lé dum ji yù mù, "Garai Gasang lé za hkya-on waq toq aq! Haú yuq gi, yubak dap sù rayuq nghut é lé ngamoq sê lhê." ga taí akô.

²⁵ Haú hkûn, yhang tû taí é gi, "Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myâng bê nghut é lé za, ngò ru sê lhê." gâ ri.

²⁶ Hau htâng, yhangmoq gi, "Yhang, nang lé haí kut byí ri lhú? Náng é myoq lé, yhang, hkâsu kut lhoq myâng byí ri lhú?" ga, yhang lé myí akô.

²⁷ Haú hkûn, yhang gi, "Ahkuí za, ngò, nungmoq lé taí kyo bê le, nungmoq sheq a gyo kôluí nhîng! Nungmoq gi, haí mù dum gyô nau akô lhú? Nungmoq le, Yhâng é chángzô pé dut nau akô lhú?" ga taú myí ri.

²⁸ Haú mù, yhangmoq gi, yhang lé gyaí rhoî é dông mai, "Nàng gi, haú yuq é chángzo nghut ri-nhung! Ng-amoq kúm gi, Mosheq é chángzô pé ru nghut lhê! ²⁹ Garai Gasang gi, Mosheq lé dâng nyo é hkyô lé, ngamoq sê lhê; nghut kôlhang, haú yuq eq séng luí, Yhang gi, hkâmai lé é sũ nghut é lé lhang, ngamoq a sé." ga taí akô.

³⁰ Haú hkûn, haú yuq gi, "Yhang, ngo lé myoq wó lhoq myang byi kôlhang, Yhang gi, hkâmai lé é sũ nghut é lé, nungmoq a sé kô é gi, mauho yhang nghut bê! ³¹ Garai Gasang gi, yubak dap bâng é dang lé a gyo byi é hkyô lé, nga-nhung sê lhê. Garai Gasang gi, Yhang lé noqkuq luí, Yhâng ô nau é hkyô lé, kut é sũ é dang lé kúm gyo byi lhê. ³² Hku lé é hkûn mai myoqjit gù nghut é byù lé, ó yuq eq myoq lhoq myâng byi é gâ é hkyô lé, mingkan lé joq é hkûn mai, ó yuq le a wó gyo wú é nghut lhê. ³³ Haú yuq gi, Garai Gasâng chyáng mai lé é sũ za a nghut le gi, haí le wó kut râ a nghut." ga tũ taí ri.

³⁴ Haú su ga jâng, yhangmoq gi, "Nàng gi, yubak htui má hku lé é sũ nghut to luí nhîng, ngamoq lé wám mhogshit lhê lhú?" ga tũ taí kôluí, yhang lé hkat htoq pyâm akô nghut ri.

Woi-nyí Má Myoqjit É Hkyô

³⁵ Yesuq gi, haú yuq lé yhangmoq hkat htoq pyâm é hkyô lé wó gyo luí, yhang lé myàng huí jâng, "Nàng gi, haú Byu Yhangzo lé lumjîng lhê lhú?" ga myí ri.

³⁶ Haú hkûn, haú yuq gi, "Yhumsîng ê, haú gi, ó yuq nghut lhê lhú? Yhang lé, ngò wó lumjîng sháng gaq, taí kyo laq." ga myí ri.

³⁷ Yesuq gi, "Nàng, haú yuq lé myàng wú bê nghut lhê; ahkuí, nàng eq dâng nyo nyi é sũ gi, haú yuq yhang nghut lhê." ga taí ri.

³⁸ Haú mù, haú yuq gi, "Yhumsîng ê, ngò lumjîng lhê!" ga taí luí, Yhang lé noqkuq ri.

³⁹ Haú hkûn, Yesuq gi, "Haú myoqjit bang myoq myàng kó râ hkyô eq myoq myàng bang myoqjit kó râ hkyô

lé, tarâ jéyâng râ matú, mingkan shí má Ngò jé lé é nghut lhê." ga taí ri.

⁴⁰ Yhang eq rahá nghut nyi é Hparishe pé ra-am gi, Yhang haú su ga taí é lé wó gyo kôjâng, "Hkâsu htà? Ngamoq gi, myoqjit bang dut bê lhú?" ga myí akô.

⁴¹ Haú hkûn, Yesuq gi, "Nungmoq, myoqjit é bang ru nghut le gi, yubak mara a bò kó râ nghut lhê; nghut kôlhang, ahkuí, nungmoq gi, myoq myàng bang nghut lhê ga kô é yan-mai, nungmoq má yubak mara bo ashí kó nghut ri.

10

Sau Zúng Sũ Eq Sau Hpúng

¹ Ngò, nungmoq lé teng za taí kôlé, haú sau hkup má, hkúmdong mai a wang e za, gó hkyô dông doq lut wang é sũ gi, hkau sũ eq damyaq nghut ri.

² Haú hkúmdong mai wang é sũ kúm gi, sau zúng sũ nghut ri. ³ Haú hkum zúng sũ gi, yhang lé hkum hpóng byi é htoq agó, haú sau pé gi, yhâng é htê lé gyo byi akô. Yhang gi, yhâng é sau pé lé, myîng lang luí wut yù mù, yhangmoq lé shuí htoq htoq kut nyi ri. ⁴ Yhâng é sau pé banshoq lé hpông htoq yù mù, yhang gi, hí má sô ri; sau pé gi, yhâng é htê lé sê gyo kô é yanmai, yhâng é htâng má châng akô nghut ri. ⁵ Nghut kôlhang, yhangmoq gi, byù bíng é htâng má, hkâ-nhám lhang cháng kó râ a nghut e za, yhâng chyáng mai kúm hfang byuq kó râ nghut lhê; hkâsu mù gâ le, haú byù bíng é htê lé, yhangmoq a sê gyo kô é yanmai nghut ri." ga taí ri. ⁶ Yesuq gi, dangtú haú lé yù mù, yhangmoq lé taí kyô ri; nghut kôlhang, yhangmoq gi, Yhang haí taí kyô nyi é lé, a sê gyo kó nghut ri.

⁷ Haú mù, Yesuq dum taí é gi, "Ngò, nungmoq lé teng za taí kôlé, Ngò gi, haú sau pé wang é hkúmdong nghut lhê. ⁸ Ngá é hí má lé é lhunglhang bang gi, hkau bang eq damyaq pé nghut akô; haú sau pé kúm gi, yhangmoq é dang lé a lhom gyo byi kó nghut ri. ⁹ Ngò gi, hkúmdong nghut

lhê; Ngò mai wang é sù ó yuq nghut kôle, hkyi yu é hui râ nghut lhê. Haú yuq gi, htoq htoq wàng wàng wó kut râ eq mhan-yô myang hô râ nghut lhê. ¹⁰ Haú hkau sù gi, hkau râ, sat râ eq lhoq htên pyám râ matú, lé e za nghut lhê. Ngo lé é gi, yhangmoq, asak wó yû râ eq byíngjup é asak lé wó yû râ matú sheq nghut lhê.

¹¹ Ngò gi, ge é sau zúng sù nghut lhê; haú ge é sau zúng sù gi, sau pê é matú, yhumsing é asak lé ap byi pyâm é nghut lhê. ¹² Haú langchyáng kut sù gi, sau pé lé sing é sau zúng sù a nghut; haú mù, yhang gi, haú wamhkui lé lo é lé myàng jáng, saú pé lé pyâm to mù hfang ló byuq râ nghut lhê; haú hkûn, wamhkui gi, sau hpúng lé é htim luí, lhoq pyo pyám râ nghut lhê. ¹³ Yhang gi, langchyáng hpó nghut luí, haú sau pê é matú haí le a myit chiq byí é yanmai, hfang é nghut ri.

¹⁴ Ngò gi, haú ge é sau zúng sù nghut lhê; haú Íwa gi, Ngo lé sê é nghut luí, Ngò le, haú Íwa lé sê é eq rajung za, ¹⁵ Ngá é sau pé lé, Ngò sê lhê; Ngá é sau pé le, Ngo lé sê akò nghut ri; Ngò gi, haú sau pê é matú, yhumsing é asak lé ap byí pyâm é nghut lhê. ¹⁶ Ngò gi, sau hkup shî mâ é a nghut é gotû sau pé wó ashî; sau haú pé lé le, Ngò, shuí yù ra râ nghut lhê; sau haú pé le, Ngá é htê lé gyo kó râ nghut lhê; haú hkûn, sau hpúng rahpúng za dut luí, sau zúng sù le rayuq za, nghut râ nghut lhê. ¹⁷ Ngò gi, Ngá é asak lé dum wó taú yù sháng gaq nghú, yhumsing é asak lé ap byí pyâm é yanmai, Ngá Wa gi, Ngo lé chyitdap é nghut lhê. ¹⁸ Ngá é asak lé, ó yuq èq le wó yu pyâm é a nghut, Ngá é myit dông byi pyâm é ru nghut lhê. Ngò gi, yhumsing asak lé ap byi pyám râ ahko ahkáng eq haú lé dum taú yù râ ahko ahkáng wó sù nghut lhê. Haú gi, Ngá Wá chyáng mai Ngò wó yu é hkunmó nghut lhê." gâ ri.

¹⁹ Dang haú pê é yanmai, haú Yudaq byu pé gi, myit a huí lhum dum

dut byuq bekò nghut ri. ²⁰ Haú mâ é bang myo myo gi, "Yhang gi, nat gang wang júng to luí, nâ byuq bê nghut ri. Yhâng é dang lé, haí mù gyô nyi akò lhú?" ga taí bum akò.

²¹ Nghut kôlhang, góbang gi, "Dang shi pé gi, nat gang wang júng tô é byù taí é dang a nghut. Nat gang gi, myoqjit sù lé, myoq wó lhoq myàng nhâng râ lhú?" ga taí bum akò nghut ri.

Yudaq Byu Pé A Lumjínng Kô É Hkyô

²² Yerusalem wà mó má, Ap Nóng Poí* jé bê nghut ri. Haú gi, gyoqmyò nám nghut ri. ²³ Haú hkûn, Yesuq gi, haú noqkuq yhûm wàng mâ é, Sholomon é Jirop má sô yông wún ri. ²⁴ Haú u lé, haú Yudaq byu pé gi, Yhâng é lhíngkyuq má lé zíng bùm kômù, "Nàng gi, ngamoq lé hkâ-myháng jé shoq úng-áng nhang nyi râ lhú? Nàng, Hkrisduq nghut le gi, ngamoq lé san za taí kyô pyám laq." ga taí akò.

²⁵ Yesuq gi, "Ngò, nungmoq lé taí kyo bê nghut lhê; nghut kôlhang, nungmoq a lumjínng kó nghut ri. Ngá Wá é myìng mai, Ngò kut é laklaí kumlhá haú pé gi, Ngá é matú saksé hkám byí nyi ri. ²⁶ Nghut kôlhang, nungmoq gi, Ngá é sau a nghut kô é yanmai, a lumjínng kó nghut ri. ²⁷ Ngá é sau pé gi, Ngá é htê lé dat gyô akò; Ngò gi, yhangmoq lé sê lhê; yhangmoq le, Ngá htâng châng akò nghut ri.

²⁸ Ngò gi, yhangmoq lé, ahtum abyuq é asak byí é nghut mù, yhangmoq gi, hkâ-nhám le htên byoq kó râ a nghut; ó yuq èq le, yhangmoq lé, Ngá é loq mai wó lú yù râ a nghut. ²⁹ Yhangmoq lé, Ngá é loq má ap byi tô é sù, haú Ngá Wa gi, lhunghâng htoq má je gyaú Sù nghut lhê; ó yuq èq le, yhangmoq lé, Ngá Wá é loq mai wó lú yù râ a nghut. ³⁰ Ngò eq haú Íwa gi, rayuq za nghut lhê." ga tú taí ri.

³¹ Haú hkûn, haú Yudaq byu pé gi, Yesuq lé, dú râ matú luqgok dum kui akò. ³² Nghut kôlhang, Yesuq gi, yhangmoq lé, "Haú Íwâ chyáng mâ é

* 10:16 Esai 56:8

* 10:22 Ap Nóng Poí gâ é gi, Garai Gasâng é yhûm lé ap nóng lé gâ lhê.

laklai kumlhá mó pé myo myo, Ngò, nungmoq lé tân shit bê nghut lhê. Nungmoq, Ngo lé dú râ gi, hká lhâm é yanmai nghut akô lúhú?" ga myí ri.

³³ Haú Yudaq byu pé gi, "Ngamoq, Nang lé dú râ gi, haú pé hká lhâm é yanmai le a nghut; Nang gi, byù rayuq nghut to luí, Garai Gasang nghut é đông táí whuí luí, Yhang lé rhoí dang táí é yanmai, dú râ nghú lhê." ga tú táí akô.

³⁴ Haú hkûn, Yesuq gi, yhangmoq lé, "Nungmoq gi, garaí pé nghut akô nghú, Ngò táí bê nghut lhê." ³⁵ ga nungmoq é tarâ má kê to lhê a nghut kó lúhú? ³⁵ Chyúmdang haú lé gi, a ge lhoq hpyoq pyâm é nghut luí, haú Garai Gasang é mungdang lé wó yu é bang lé, 'garaí pé' gâ é nghut le gi, ³⁶ haú Íwa mai, Yhang é matú hkyin htoq yú luí, mingkan má nhang é Sù eq séng luí gi, hká đông nghú kó râ lúhú? 'Ngò gi, Garai Gasang é Yhangzo nghut lhê.' nghú táí é yanmai, Ngò gi, Garai Gasang lé táí hpoí ri nghú, nungmoq, haí mù Ngo lé mara hân akô lúhú? ³⁷ Ngá Wâ é muzó pé lé, Ngò kut é a nghut jáng, Ngo lé hkâlumjínng kó. ³⁸ Nghut kôlhang, Ngò, haú pé lé kut é nghut le gi, nungmoq, Ngo lé a lumjínng kôlhang, haú muzó pé lé lumjínng keq; haú hkûn, haú Íwa gi, Ngò má nghut nyi é hkyô lé le, Ngò gi, haú Íwa má nghut nyi é hkyô lé le, nungmoq wó sé luí, sê gyo kó râ nghut lhê." ga tú táí ri. ³⁹ Yhangmoq gi, Yhang lé chyup râ dum hen akô; nghut kôlhang, Yhang gi, yhangmoq é loq mai wó lut ló bê nghut ri.

⁴⁰ Hau htâng, Yesuq gi, haú Yodan làng he hpoq mâ é, Yohan, wui-myhup hkám byí hi é jowò má ló jé ri. Haú má, Yhang nyi nyi é nghut luí, ⁴¹ byù myo myo gi, Yhâng chyáng lé jé bum akô. Yhangmoq gi, "Yohan gi, limik kumlhá a kut wú é nghut kôlhang, shí yuq eq séng luí, Yohan táí é hkyô lhunglhang gi, têng ri." ga táí bum akô. ⁴² Haú jowò má, byù myo

myo gi, Yesuq lé lumjínng bùm bekô nghut ri.

11

Lazaruq Shi Byuq É Hkyô

¹ Ahkuí, Lazaruq gâ é byù rayuq gi, no nyi ri. Yhang gi, haú Mariq eq yhângnhá Mahtaq nhik nyi é Behtani wà mâ é sù nghut lhê. ² Mariq haú gi, Yhumsíng lé namngón-xù hut gyun luí, hkyí má yhâng xam eq sùt byí é sù nghut ri; yhang gi, haú no nyi é Lazaruq é yhângnhá nghut ri. ³ Haú mù, haú yhângnhá nhik gi, "Yhumsíng é, Nang chyitdap é sù gi, no nyi ri." ga, Yesuq chyáng é táí nhang akô.

⁴ Yesuq gi, dang haú lé wó gyo jáng, "Nòhpyo haú gi, shí-nò a nghut. Haú Garai Gasang é Yhangzo gi, hau é yanmai, hpungwup shíngkang wó dan hù é hui sháng gaq ga, Garai Gasang é hpungwup shíngkang é matú dut é ru nghut lhê. ⁵ Yesuq gi, Mahtaq eq yhanggu Mariq lé le, Lazaruq lé le, chyitdap ri. ⁶ Haú su mù, Yhang gi, haú Lazaruq no nyi ri gâ é lé, wó gyô é hkûn, haú Yhang nyi é jowò má, í nyí nyi tô ashí nghut ri.

⁷ Hau htâng, Yhang gi, Yhâng é chángzô pé lé, "Nga-nhúng gi, Yuda mau shut dum taú ló sháng." ga táí ri.

⁸ Haú hkûn, yhangmoq gi, "Rabai é, hkû-yoq za, haú Yudaq byu pé, Nang lé luqgok eq dú sat râ da kô é nghut le nhing, ahkuí, haú shut dum taú ló râ lúhú?" ga Yhang lé myí akô.

⁹ Yesuq gi, "Nyí gi, hkyíng hkum raxe í hkum bo lhê a nghut kó lúhú?*" Nyí má hkyô sô é sù gi, mingkan shí é maubó é yanmai myoq myàng luí, lengbat râ a nghut. ¹⁰ Myín lé hkyô sô é sù kúm gi, maubó lé a wó é yanmai, lengbat lhê." ga tú táí ri.

¹¹ Haú su ga táí é htâng má, Yhang, yhangmoq lé xoq táí kyô é gi, "Nga-nhúng é luzúm Lazaruq yhup myhí byuq bê nghut ri; nghut kôlhang, Ngò

✧ 10:34 Hkya-on 82:6 * 11:9 Nyí gi, hkyíng hkum raxe í hkum bo lhê a nghut kó lúhú? gâ é gi, ahkyíng a jé shimá, muzó nô é gi, a ge é nghut lhê gâ é nghut ri.

gi, yhang lé ê nhaû toq râ nghut lhê." gâ ri.

¹² Haú hkûn, Yhâng é chángzô pé gi, "Yhumsîng ê, yhang yhup myhî tô é nghut le gi, ge lò râ nghut lhê." gâ taî akô. ¹³ Yesuq gi, Lazaruq shi byuq bê hkyô lé taî é nghut ri; nghut kôlhang, Yhâng é chángzô pé gi, gè gè yhup myhî tô é lé taî é su ngam pyâm akô nghut ri.

¹⁴ Haú mù luî, Yesuq, yhangmoq lé san za jáng taî kyô é gi, "Lazaruq gi, shi byuq bê nghut lhê. ¹⁵ Ngò haú má a nyi záng é gi, nungmoq wó lumjîng râ matú nghut luî, nungmoq é matú Ngò gabú byî ri; yhâng chyáng e ló sháng hkoi." gâ ri.

¹⁶ Haú mù, haú Zozûm le gâ é Htomaq gi, gotû chángzô pé lé, "Nga-nhúng le, Yhang eq rahá shî sháng gaq, châng e ló sháng." ga taî ri.

Haú Ê-nhâ Nhik Lé, Yesuq Nhik Tîng É Hkyô

¹⁷ Yesuq gi, jé e é hkûn, haú Lazaruq lé lup má kat pyâm é myi nyi nghut bê hkyô lé, lhom taî kyô akô. ¹⁸ Behtani wà gi, Yerusalem wà mó eq í dêng kô za wê lhûm ri. ¹⁹ Haú mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik tîng byi kó râ ga lé jé nyi bum akô nghut ri. ²⁰ Mahtaq gi, Yesuq jé lé lo é hkyô lé wó gyo jáng, htoq ê mù, Yhang lé é huî ri; nghut kôlhang, Mariq gi, yhûm má nyi tô ri.

²¹ Mahtaq gi, Yesuq lé, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut. ²² Nghut kôlhang, ahkuî le, Garai Gasâng chyáng Nàng haî dung kôlhang, Yhang byi râ nghut é lé, ngò sê lhê." ga taî ri.

²³ Yesuq gi, yhang lé, "Nung gu, dum dui toq râ nghut lhê." ga taî ri.

²⁴ Haú hkûn, Mahtaq gi, "Haú jîhtûm buinyi má dum dui toq é hkûn, yhang le dum dui toq râ nghut é lé, ngò sê lhê." ga tû taî ri.

²⁵ Haú hkûn, Yesuq gi, yhang lé, "Ngò gi, dum dui toq hkyô eq asak

nghut lhê. Ngo lé lumjîng é sù gi, shi byuq kôlhang, dum dui râ nghut lhê.

²⁶ Asak dui nyi luî, Ngo lé lumjîng é sù ó yuq nghut kôle, hkâ-nhám le shi é huî râ a nghut. Nàng gi, dang shî lé lumjîng lhê lhú?" ga taî ri.

²⁷ Haú hkûn, yhang gi, "Yhumsîng ê, ngò lumjîng lhê. Nàng gi, haú mingkan má jé lé lô râ nghut é, Garai Gasâng é Yhangzo, Hkrisduq† nghut é lé, ngò lumjîng lhê." ga, Yhang lé taî kyô ri.

²⁸ Yhang gi, haú su ga taî é htâng má, taû ló mù, yhanggu Mariq lé, tsik za wut yù luî, "Haú Sará jé tô ri; Yhang gi, nang lé myi nyi ri." ga taî kyô ri. ²⁹ Mariq gi, haú lé wó gyo jáng, hân za toq mù, Yesuq chyáng ê bê nghut ri. ³⁰ Haú u lé, Yesuq gi, haú wâ hkaû má a wang ló shî e za, Mahtaq eq huî é jowò má ru nyi tô ashî nghut ri. ³¹ Haú yhûmhkaû má, Mariq lé nhik tîng nyi é Yudaq byu pé gi, yhang hân za toq luî, htoq ló é lé myàng kôjáng, yhang, lup má ê ngaû râ dâ lhê abe ga, myit yù kômù, yhang htâng châng e ló bum akô nghut ri.

³² Mariq gi, Yesuq nyi tô é jang má jé mù, Yhang lé myàng jáng, Yhâng é hkyî wang má ngóm gop to luî, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut." ga taî ri.

³³ Yesuq gi, Mariq ngaû nyi é lé le, haú yhang eq rahá lé lo é Yudaq byu pé ngaû nyi kô é lé le, myàng jáng, Yhâng é myit má gyai yhang hkâm zo wuî é eq myit wui myit hke dut nyi ri. ³⁴ Haú mù, Yhang gi, "Yhang lé, hkâmá tô tô akô lhú?" ga myi jáng, yhangmoq gi, "Yhumsîng ê, lé wú wú aq." ga tû taî akô.

³⁵ Yesuq gi, ngaû bê nghut ri.

³⁶ Haú mù, haú Yudaq byu pé gi, "Wú keq, Yhang gi, Lazaruq lé, haú-í yhang chyit ri-nhung!" ga taî akô.

³⁷ Nghut kôlhang, ra-am gi, "Haú myoqjît sù lé, myoq wó lhoq myàng byî é Sù gi, shí yuq lé le, a shí lo shoq

† 11:27 Hkrisduq lé Mesaia le gâ lhê.

a wó kut é lúhú?" ga taí bum akô nghut ri.

Lazaruq Lé Lhoq Dui Toq É Hkyô

³⁸ Yesuq gi, Yhâng é myit má radàm dum gyai yhang hkâm zo wuí é èq, lup má lé jé ri. Lup haû gi, luqhkýung dong nghut luí, luqgok rachâm èq chí tô akô. ³⁹ Haû mù, Yhang gi, "Luqgok haû lé yu pyám keq." ga taí ri.

Haû hkûn, haû shi byuq su é yhângnhá Mahta q gi, "Yhumsing ê, yhang lé, haû má tô tô é myi nyí lhang nghut bê yanmai, ahkuí gi, bup nàm berâ nghut lhê." ga taí ri.

⁴⁰ Haû mù, Yesuq gi, "Nàng, lumjینگ é nghut le gi, haû Garai Gasâng é hpungwup shingkang lé, wó myâng rá nghut lhê nghû, Ngò, nang lé taí kyô wú bê a nghut lúhú?" ga taí ri.

⁴¹ Haû mù luí, yhangmoq gi, luqgok haû lé yu pyám akô. Hau htâng, Yesuq gi, mauhkung shut tu wú luí, "Áwa ê, Nàng, Ngá é dang lé gyo byi é yanmai, Ngò, Nang lé jeju hkya-ôn lhê. ⁴² Nàng gi, hkâ-nhám le, Ngá é dang lé gyo byi nyi é lé, Ngò sê lhê; nghut kôlhang, Nàng, Ngo lé nhang kat é hkyô lé, shi má yap tô é bang lumjینگ kó sháng gaq nghû, yhangmoq é matú, Ngò, isu nghû taí é nghut lhê." ga taí ri.

⁴³ Yhang gi, haû su ga taí luí, "Lazaruq ê, htoq lô aq." ga htê mó èq wut kat ri. ⁴⁴ Haû hkûn, haû shi byuq bê sù gi, yhâng é loq hkyi pé má pân èq htup yup to gù eq, yhâng é myoqdong má hpajet èq htup to gù htoq lo ri.

Haû mù, Yesuq gi, yhangmoq lé, "Yhang lé hpyi pyám byi mù, nhang kat keq." ga taí ri.

Yesuq Lé Sat Pyám Râ Haq Dâ É Hkyô

Mht 26:1-5; Mrk 14:1-2; Luk 22:1-2

⁴⁵ Haû mù luí, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjینگ bùm bekô nghut ri. ⁴⁶ Nghut kôlhang, yhangmoq chyáng mâ é ra-am gi, haû Hparishe pê chyáng ló mù, Yesuq kut é hkyô lé, ló taí kyô akô. ⁴⁷ Haû mù,

haû hkyangjong agyi pé eq Hparishe pé gi, Yudaq byin tú wapdoq† zuph-pong lé ji tsing to mù, "Byù shí yuq gi, limik kumlhá myo myo kut shit nyi ri. Nga-nhúng, hkâsu kut le gè rá lúhú? ⁴⁸ Nga-nhúng, Yhang lé haû su ru kut nyi nhang é nghut jáng, yuq hkangmó gi, Yhang lé lumjینگ kó rá nghut lhê; haû hkûn, Romaq byu pé gi, jé lé mù, nga-nhúng é jowò eq nga-nhúng é byuhú lé, lé lhoq htên pyám kó rá nghut lhê." ga taí akô nghut ri.

⁴⁹ Haû hkûn, yhangmoq chyáng mâ é, haû zân má hkyangjong mó nghut nyi é sù, Kayahpaq gi, yhangmoq lé, "Nungmoq gi, haû lhang a sé kó nghut ri-nhung! ⁵⁰ Haû byuhú gón htên byoq byuq rá htoq má, byuhú hau é matú, byù rayuq shí hkâm byi le gi, nungmoq é matú je gè rá hkyô lé, nungmoq, a myit jé kó nghut ri." ga taí kat ri.

⁵¹ Yhang haû su ga taí é gi, yhum-sing myit dông a nghut e za, haû zân má, yhang gi, hkyangjong mó nghut é eq rajung za, haû Yudaq byuhú é matú, Yesuq shí hkâm byi rá nghut é hkyô lé le, ⁵² byuhú hau é matú baú a nghut e za, haû byo myín tô é, Garai Gasâng é yhangzô pé lé, shuí tsing yù mù, rading ralhum za dut nhâng rá matú, shí hkâm byi rá nghut é hkyô lé le, myiqhtoi dang taí é ru nghut lhê.

⁵³ Haû nyi mai, yhangmoq gi, Yesuq lé sat rá matú chôm da bekô nghut ri.

⁵⁴ Hau é yanmai, Yesuq gi, Yudaq byu pé gyoro má, de de a sô shit wún e za, haû mai htoq luí, haû yoso eq chyâng lhûm é mau mâ é, Ehprim gâ é wà má ê mù, Yhâng é chángzô pé eq rahá nyi ri.

⁵⁵ Haû Yudaq byu pé é Lhoqlhai Poí jé rá za nghut é hkûn, byù myo myo gi, Lhoqlhai Poí a jé shi má, lhoq san lhoq yúng hking dông yhumsing gùng lé lhoq sân-yúng yû rá matú, yosô wà pé mai, Yerusalem wà mó shut doq ló bum akô. ⁵⁶ Haû mù, yhangmoq gi, Yesuq lé ho nyi kô é nghut luí, haû noqkuq yhûm wàng má yap to

† 11:47 Yudaq byin tú wapdoq lé Grik dông gi, San-hedrin gâ lhê.

uchyang, rayuq eq rayuq, "Nungmoq, hkâsu wó myit akô lhú? Yhang gi, Poí má a lé lô râ gâ lhê lhà?" ga myí lhúm bum akô. ⁵⁷ Nghut kôlhang, haú hkyangjong agyi pé eq Hparishe pé gi, Yesuq lé wó chyup yû râ matú, Yesuq hkâmá nyi é lé, sê é sù ó yuq nghut kôle, yhangmoq lé lo shit kyo râ lhê ga dangmó hkyó tô akô nghut ri.

12

Yesuq, Namngón-xû But Byi Huí É Hkyô

Mht 26:6-13; Mrk 14:3-9

¹ Haú Lhoqlhai Poí jé râ hkyuq nyi râ ashí hkûn, Yesuq gi, Yhâng èq shí é mai lhoq dui toq yu é sù, Lazaruq nyi é Behtani wà má ló jé ri. ² Haú má, Yesuq lé hkunggâ é dông myinzang byi tsô akô; Mahtaq gi, zoshuq jaú ri; Lazaruq gi, haú Yesuq eq rahá siboí má zô zung nyi bang mâ é rayuq nghut ri. ³ Haú hkûn, Mariq gi, haú nardu amyit mai za saí yu é, gyai hpaú é namngón-xû raxe í rûng kô yu lé mù, Yesuq é hkyí má hut gyun byi luí, yhâng é uxam èq sùt byí ri. Haú mù, yhúm haú gi, namngón-xû shôm byíng to bê nghut ri.

⁴ Nghut kôlhang, Yesuq lé ap pyám râ nghut é, Yhâng é chángzo rayuq nghut sù, Yudaq Iskarut gi, ⁵ "Haú myùng bang lé byí pyám râ matú, haú namngón-xû lé denari sum sho èq haí mù a ûng pyâm é lhú?" ga taí ri. ⁶ Yhang haú su ga taí é gi, myùng bang lé chiq byí é yanmai taí é a nghut, yhang gi, ngùn htûng chûng sù nghut luí, haú má kat tô é ngùn lé, yhumsing é matú lhaq yu chûng chûng kut é, hkau sù nghut é yanmai taí é nghut ri.

⁷ Yesuq gi, "Nghut shang gaq; yhang gi, Ngo lé myhup yhum râ buinyi é matú, namngón-xû shí lé hkong to byí é nghut lhê. ⁸ Haú myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi,

nungmoq eq rahá ayang nyi nyi râ sù a nghut." ga tû taí ri.

⁹ Haú u lé, Yudaq byu pé ajùm ayò gi, haú má Yesuq nyi é lé sé kôluí, lé lo akô; haú bang gi, Yesuq é yanmai za lé kô é a nghut, haú Yhâng èq shí bê mai lhoq dui toq yu é Lazaruq lé, lé myâng nau kô é yanmai le nghut ri. ¹⁰ Haú mù, haú hkyangjong agyi pé gi, Lazaruq lé le, sat pyám râ matú chôm hpyê lhúm akô. ¹¹ Hkâsu mù gâ le, yhâng é yanmai, haú Yudaq byu pé myo myo gi, Yesuq chyáng lhing ló kômù, Yhang lé lumjîng bûm kô é yanmai nghut ri.

Yesuq, Yerusalem Wà Mó Má Wang E Ló É Hkyô

Mht 21:1-11; Mrk 11:1-11; Luk 19:28-40

¹² Hau htang nyí, haú Poí má lé jé é byù moq mó gi, Yerusalem wà mó shut Yesuq jé doq ló é hkyô lé, wó gyô bum akô. ¹³ Haú mù, yhangmoq gi, byùm-haq pé yu chûng mù, Yhang lé é tê uchyang,

"Hosana!"

Haú Yhumsing é myìng mai jé lé lô Sù gi, hkungsô wó nyí sháng gaq ô!

Haú Israelaq byu pé é Hkohkâm gi, hkungsô wó nyí sháng gaq!"[✧]

ga, taí garû bum akô nghut ri. ¹⁴ Haú hkûn, Yesuq gi, logúng zo radu lé myàng luí, doq jí ri;

¹⁵ haú gi, "Zi-un byizo† ê, hkâgyuq; wú keq, nungmoq é hkohkâm gi, logúng zo má ji mù lé lo nyi ri."[✧]

ga, kâ tô é eq rajung za nghut ri.

¹⁶ Haú pé banshoq lé, Yhâng é chángzô pé gi, sâng-hi lé a sê gyo kó; nghut kôlhang, Yesuq gi, hpungwup shingkang dan hu huí é htâng má za sheq, haú pé gi, Yhang eq séng luí kâ tô é hkyô lé le, haú eq rajung za, Yhang lé, yhangmoq mai kut bê hkyô lé le, bûn sê kat akô nghut ri.

¹⁷ Haú Yesuq gi, lup hkaú mâ é Lazaruq lé wut luí, shí é mai lhoq

* **12:13** Hebre dang má, hosana gâ é gi, "ahkuí hkyi yù aq" gâ é nghut lhê. Nghut kôlhang, bun zo shí má gi, hkya-on dang dông chung é nghut lhê. ✧ **12:13** Hkya-on 118:25-26 † **12:15** Hebre myíng dông Zi-un byizo gâ é gi, Yerusalem mâ é byu pé lé gâ é nghut lhê. ✧ **12:15** Zhk 9:9

dui toq yu é hkûn, Yhang eq rahá nghut é shiwa hpúng gi, haú hkyô lé, saksé hkám byî nyi akô. ¹⁸ Haú mù, byù myo myo gi, Yesuq tân shit é limik kumlhá hau é hkyô lé, wó gyo kô é yanmai, Yhang lé hui râ matú htoq e akô. ¹⁹ Hau é yanmai, haú Hparishe pé gi, "Wú keq, nga-nhung, hkâsu yhang a ge kut lo nhung! Haú mingkan gón gi, Yhâng htâng châng bùm bekô." ga, rayuq eq rayuq taí lhûm bum akô nghut ri.

Yesuq, Yhang Shî Râ Hkyô Lé Te Tai É Hkyô

²⁰ Haú hkûn, noqkuq râ matú Poi má doq ló é bang má, Grik pé ra-am le bo tô akô. ²¹ Yhangmoq gi, Galile mau, Bet-saida wà mó mâ é Hpilip chyáng lé jé kômù, "Âhkaú ê, ngamoq gi, Yesuq lé myàng nau ri." ga, dung tôngbán akô. ²² Haú mù, Hpilip gi, Andre lé, ê taí kyô ri; Andre eq yháng nhik gi, Yesuq lé, ê taí kyô akô.

²³ Haú mù, Yesuq gi, "Haú Byu Yhangzo gi, hpungwup shingkan dan hû é hui râ matú, ahkyíng jé bê nghut ri. ²⁴ Ngò, nungmoq lé teng za taí kôlé, sungso racham gi, myigùng má gyó luí, shi byuq e za a nghut jáng, acham roq za dut nyi râ nghut lhê. Nghut kôlhang, shi byuq é nghut le gi, ashi myo myo lhoq htoq râ nghut lhê. ²⁵ Haú yhumsing é asak lé chyt-dap é sù gi, asak sùm byuq râ nghut lhê. Mingkan shî má, haú yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to râ nghut lhê. ²⁶ Ngo lé dojaú é sù ó yuq nghut kôle, Ngá htâng cháng râ lhê; Ngò, hkámá nyi le, Ngá é dui-nhâng zoshâng le nyi râ nghut lhê. Ngá Wa gi, haú Ngo lé dojaú é sù lé, shigyaú râ nghut lhê.

²⁷ Ahkuí, Ngò, myit wuîhke nyi ri; Ngò hkâsu nghû taí râ lhi? 'Áwa ê, ahkyíng shî mai Ngo lé lhoq lhut yù laq.' nghû taí râ lhú? Nghut kôle, Ngò gi, ahkyíng shi é matú za sheq jé lé é ru nghut lhê. ²⁸ Áwa ê, Náng é myíng lé

hpungwup shingkan dan hu nhâng aq hkoi!" ga taí ri.

Haú hkûn, "Ngò gi, Ngá é myíng lé hpungwup shingkan dan hu nhâng bê nghut luí, dum dan hu nhâng shirâ nghut lhê." gâ é htê, mauhkúng mai htoq lo ri. ²⁹ Haú má nyi tô é byù moq mó gi, haú lé wó gyo kôjáng, "Maugum gum ri." gâ bum akô; ra-am gi, "Yhang lé, maumang lagyo rayuq nyo ri." ga taí bum akô nghut ri.

³⁰ Haú hkûn, Yesuq gi, "Danghtê shî gi, Ngá é matú a nghut, nungmoq é matú ru nghut lhê. ³¹ Ahkuí gi, mingkan shî lé jéyáng râ ahkyíng nghut bê; mingkan shi é zau gi, ahkuí hkat htoq pyâm é hui râ nghut lhê. ³² Nghut kôlhang, Ngò gi, myigùng mai tu shap kat é huí é hkûn, byù lhunglhâng bang lé, Ngá chyáng shê yù râ nghut lhê." ga taí ri. ³³ Yhang haú su ga taí é gi, Yhang hkâsu kut shî râ nghut é hkyô lé shit é nghut ri.

³⁴ Haú hkûn, haú byù moq mó gi, "Haú tarâ laiká má, Hkrisduq gi, ahtum abyuq dui nyi râ nghut lhê gâ é lé sheq, ngamoq wó gyô wú é ru nghut le nhîng, 'Haú Byu Yhangzo gi, tu shap é hui ra râ nghut lhê.' nghû, Náng hkâsu kut wó taí lhê lhú? Haú Byu Yhangzo gi, ó yuq nghut lhê lhú?" ga, myí akô.

³⁵ Haú mù, Yesuq gi, yhangmoq lé, "Nungmoq chyáng, haú maubó joq nyi râ ahkyíng gi, a lûm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haú maubó joq nyi ashî hkûn sô nyi keq; hkâsu mù gâ le, haú mauchut má sô nyi é sù gi, yhang hká shut e ló nyi é lé, a sé nghut ri.

³⁶ Nungmoq gi, maubó é yhangzô pé wó dut kó sháng gaq, haú maubó joq nyi ashî hkûn, haú lé lumjíng keq." ga taí ri. Yesuq gi, dang haú ban taí jáng, yhangmoq chyáng mai htoq ló luí, haq byuq bê nghut ri.

Yudaq Byu Pé, A Lumjíng Ru Dut Nyi Kô É Hkyô

³⁷ Yesuq gi, yhangmoq é hí má, limik kumlhá haú pé banshoq kut

shit kôhang, yhangmoq gi, Yhang lé a lumjínng shi kó nghut ri. ³⁸ Haû gi, "Yhumsîng ê, nga-nhûng é danglù lé, ó yuq wá lumjínng byî wú é lhú? Haû Yhumsîng é loq† gi, ó yuq lé htoq shit wú é lhú?"^{*} ga, myiqhtoi Esai-aq taí tô é dang lo dik é nghut ri.

³⁹ Yhangmoq a wó lumjínng kô é hkyô gi, Esai-aq taí é dang má,

⁴⁰ "Yhang gi, yhangmoq é myoqjí lé lhoq chit byi luí, yhangmoq é i-myt lé lhoq htan to byi bê nghut ri;

haû mù, yhangmoq gi, myoqjí èq a wó myâng, i-myt èq a wó sê gyo, Ngò, yhangmoq lé yâ ge byi râ matú, a wó lhing taû lò kó dut râ nghut lhê."^{*}

ga le bo tô é yanmai nghut lhê. ⁴¹ Esai-aq gi, Yesuq é hpungwup shingkang lé myang é yanmai, Yhang eq sêng é hkyô lé, haû su ga taí é nghut ri.

⁴² Nghut kôhang, haû uphkâng bang myo myo lháng gi, haû u má, Yesuq lé lumjínng bum akô. Nghut kôle, yhangmoq gi, Hparishe pé èq tarajong mai lhoq htoq pyâm é hui râ lé, gyuq kô é yanmai, yhangmoq lumjínng bê hkyô lé a yín yu bùm kó nghut ri. ⁴³ Hkâsu mù gâ le, yhangmoq gi, Garai Gasâng chyáng mâ é aróng lé, ô nau é htoq má, byu pé chyáng mâ é aróng lé, je ô nau kô é yanmai nghut ri.

⁴⁴ Haû mù, Yesuq, htê mó èq taí é gi, "Ngò lé lumjínng é sù gi, Ngò lé baú lumjínng é a nghut; haû Ngò lé nhang kat é Sù lé le, lumjínng é nghut lhê.

⁴⁵ Ngò lé myang é sù gi, haû Ngò lé nhang kat é Sù lé le myang é nghut lhê. ⁴⁶ Ngò gi, Ngò lé lumjínng é sù ó yuq le, mauchut hkaû má a nyi sháng gaq nghû, maubó dông mingkan má lé jé é nghut lhê.

⁴⁷ Ngò gi, Ngá é dang lé wó gyo luí, a châng é sù ó yuq lé le, jéyáng râ a nghut; hkâsu mù gâ le, Ngò gi, mingkan lé jéyáng râ matú jé lé é a

nghut; haû mingkan lé hkyi yù râ matú sheq, jé lé é ru nghut lhê. ⁴⁸ Ngò lé he-ngik luí Ngá é dang lé a hap yu é sù lé, jéyáng râ Sù rayuq nyi lhê; Ngò taí é danghkun haû gi, haû jihtùm buinyi má, haû yuq lé mara byi râ nghut lhê. ⁴⁹ Hkâsu mù gâ le, Ngò gi, Ngá é myit dông taí é a nghut; nghut kôhang, Ngò haí taí râ eq hkâsu nghû taí râ lé gi, haû Ngò lé nhang kat é sù Íwa mai, Ngò lé hkunmó hkyô to bê nghut lhê. ⁵⁰ Haû Yhâng é hkunmó gi, ahtum abyuq é asak nghut é lé, Ngò sê lhê. Haû mù luí, Ngò, haí taí kôle, haû Íwa mai Ngò lé taí kyô é lé za, taí é nghut lhê." gâ ri.

13

Chángzô Pé É Hkyî Chi Byî É Hkyô

¹ Haû Lhoqlhai Poí jé râ hí má za, Yesuq gi, Yhang, mingkan shî mai Yhâng Wâ chyáng htot lô râ ahkyíng jé bê hkyô lé, sê ri. Yhang gi, mingkan má nyi é, Yhâng é byu pé lé chyitdap nyi é nghut luí, jihtùm jé shoq Yhâng é chyitdap myit lé shit râ nghut lhê.

² Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám râ myit kat byî to gú nghut ri. ³ Yesuq gi, haû lhungháng lé Íwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luí, Garai Gasâng chyáng dum taû lò râ sù nghut é lé le, sê ri. ⁴ Haû mù, Yhang gi, zohpoq mai toq luí, Yhâng é bumó lé hkyut pyám mù, hpyidum má hpajet ralhùm èq hpyihit hit tô ri. ⁵ Hau htâng, Yhang gi, jirung má uchyam hut kat mù, Yhâng é chángzô pé é hkyî chi byi luí, haû Yhâng é hpyidum má hit tô é hpajet èq sut hui byî ri.

⁶ Yhang gi, Simun Petruq chyáng jé jáng, Simun Petruq gi, "Yhumsîng ê, Nang gi, ngá hkyî lé chi byi râ nghut lhê lhú?" ga myí ri.

⁷ Haû hkûn, Yesuq gi, "Ngò, haí kut nyi é hkyô lé, ahkuí, nang sê gyo râ a

† 12:38 Yhumsîng é loq gâ é gi, Yhumsîng é hpungwup a-tsam lé gâ é nghut lhê. * 12:38 Esai 53:1

* 12:40 Esai 6:10

nghut; nghut kôlhang, htâng má sê gyo râ nghut lhê." ga tû taí ri.

⁸ Petruq gi, "Ngá hkyî lé, Nàng, hkâ-nhâm le wó chi byi râ a nghut." ga taí jáng, Yesuq gi, "Nang lé, Ngò a chi byi é nghut jáng, nàng gi, Ngò eq séng râ a nghut." ga tû taí ri.

⁹ Haú hkûn, Simun Petruq gi, "Yhumsîng ê, haú su nghut jáng gi, ngá é hkyî lé baú za a nghut, ngá é loq eq ulhum lé le chi byi laq!" ga tû taí ri.

¹⁰ Yesuq gi, "Gùng chi bê sù gi, hkyî za chi jáng, ragúngdú é sanséng bê nghut ri. Nungmoq gi, sanséng bekô; nghut kôlhang, yuq hkanqmó gi, sanséng é a nghut." ga tû taí ri.

¹¹ Hkâsu mù gâ le, Yhang gi, Yhang lé ap pyám râ sù ó yuq nghut é lé, sê é yanmai, "Nungmoq gi, sanséng é bang chyat a nghut." ga taí é nghut ri.

¹² Yesuq gi, yhangmoq é hkyî lé ban chi byi jáng, Yhâng é bumó lé wut mù, Yhâng é jowò má ló dum zùng luí, yhangmoq lé myi é gi, "Nungmoq gi, ahkuí, ngò kut byi é hkyô lé, sê gyo akô lhú?" ¹³ Nungmoq, Ngo lé, 'Sarâ' ga le, 'Yhumsîng' ga le, wut kô é gi, a shut; hkâsu mù gâ le, Ngò gi, haú yuq yhang nghut lhê. ¹⁴ Ngò, nungmoq é Sarâ eq Yhumsîng nghut sù lhang, nungmoq é hkyî lé chi byi é nghut le gi, nungmoq le, rayuq eq rayuq é hkyî lé chi byi lhum râ dut lhê. ¹⁵ Nungmoq gi, Ngò, nungmoq lé kut byi é su kut kó sháng gaq nghû, Ngò, nungmoq lé alik kut shit tô é nghut lhê. ¹⁶ Ngò, nungmoq lé teng za taí kôlé, dui-nhâng zoshâng gi, yhumsîng htoq je kô é a nghut; lagyo gi, nhang kat é sù htoq je kô é a nghut. ¹⁷ Ahkuí, nungmoq gi, haú pé lé sé bekô nghut luí, châng kut kô é nghut jáng, hkungsô wó kó râ nghut lhê.

Yesuq Lé Ap Pyám Râ Lé, Te Taí Ê Hkyô

¹⁸ Ngò gi, nungmoq banshoq bang lé lhoq ang luí taí é a nghut; Ngò hkyin yu é bang lé gi, Ngò sê lhê.

Nghut kôlhang, 'Haú ngá é muk lé bo zô é sù gi, ngo lé, yhâng é hkyihtáng lanhik eq nâng htíng râ nghut lhê.'[✧] gâ é Chyúmdang lé, lhoq dik râ matú ru nghut lhê.

¹⁹ Haú a dut htoq shimá, Ngò, nungmoq lé taí kyô nyi é gi, haú dut é hkûn, Ngò gi, haú Yuq* nghut é lé, nungmoq wó lumjínkó râ matú nghut lhê.

²⁰ Ngò, nungmoq lé teng za taí kôlé, Ngò nhang kat é sù lé, lhom hap yu é sù ó yuq nghut kôle, Ngo lé hap yu é nghut bê; Ngo lé hap yu é sù ó yuq nghut kôle, haú Ngo lé nhang kat é Sù lé hap yu é nghut bê." gâ ri.

²¹ Yesuq gi, haú su ga taí é htâng má, myit wuîhke nyi mù, saksé hkâm é gi, "Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám râ nghut lhê." gâ ri.

²² Haú mù, Yhâng é chángzô pé gi, ó yuq lé taí záng nyi é hkyô lé, rago a sé kô é yanmai, rayuq eq rayuq wú tsuq lhûm bum akô nghut ri. ²³ Haú Yesuq chyitdap é chángzo rayuq gi, Yesuq é tanghkoí nâm má leq nge zung tô ri. ²⁴ Haú mù, Simun Petruq gi, chángzo haú yuq lé, loq lik kat mù, "Yhang, ó yuq lé lhoq ang luí, taí nyi é hkyô lé, myi wú aq." ga taí ri.

²⁵ Haú mù, chángzo haú gi, Yesuq é tanghkoí má saí leq nge zung mù, "Yhumsîng ê, haú gi, ó yuq nghut lhê lhú?" ga, Yhang lé myi ri.

²⁶ Yesuq gi, "Ngò, muk jap zo shî lé jum yù mù, byi é sù gi, haú yuq nghut lhê." ga tû taí luí, muk jap zo haú lé jum yù mù, Simun é yhangzo Yudaq Iskarut lé byi ri. ²⁷ Yudaq gi, muk haú lé yù zo kat é eq, Tsadán gi, yhâng chyáng wàng bê nghut ri.

Haú mù, Yesuq gi, "Nàng kut râ é hkyô lé, hân kut aq hkoi." ga yhang lé taí kat ri. ²⁸ Nghut kôlhang, yhang lé, Yesuq haú su ga haí mù taí é hkyô lé, zohpoq haú má nyi tô é bang gi, rayuq lhang a sê gyo kó nghut ri. ²⁹ Haú Yudaq gi, ngùn zum sù nghut é yanmai, ra-am gi, haú Poí má râ é hkyô

✧ 13:18 Hkya-on 41:9 * 13:19 Haú Yuq gâ é gi, Hkrisduq lé gâ é nghut lhê.

lé, ê wuî râ matú, Yesuq taî ri ga luî le, myùng bang lé rajung jung byí nhang ri ga luî le, myit yu bum akô nghut ri.
³⁰ Yudaq gi, muk haû lé lhom yù eq, htoq ló byuq bê nghut ri. Haû u gi, mauchut bê nghut ri.

Petruq He-ngik Pyám Râ Lé, Yesuq Te Taî É Hkyô

Mht 26:31-35; Mrk 14:27-31; Luk 22:31-34

³¹ Haû yuq htoq ló byuq jáng, Yesuq taî é gi, "Ahkuî, haû Byu Yhangzo gi, hpungwup shingkang dan hû é nghut luî, Garai Gasang gi, haû Byu Yhangzô é yanmai, hpungwup shingkang dan hu bê nghut ri.
³² Garai Gasang gi, haû Byu Yhangzô é yanmai, hpungwup shingkang dan hû é nghut jáng, Yhang le, Yhang má haû Zo lé hpungwup shingkang dan hu nhâng râ nghut lhê; radá dâm dan hu nhâng râ nghut lhê.

³³ Ngá zo pé ê, Ngò, nungmoq eq rahá nyi râ gi, razup za ru nghut alô. Nungmoq gi, Ngo lé hô kó râ nghut lhê; nghut kôlhang, 'Ngò ló é jang má, nungmoq wó jé kó râ a nghut.' nghû, haû Yudaq byu pé lé, Ngò taî é eq rajung za, ahkuî, nungmoq lé le, Ngò taî lhê.

³⁴ Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò, nungmoq lé chyitdap é su, nungmoq yhangchang chyitdap lhum râ dut lhê. ³⁵ Nungmoq yhangchang chyitdap lhum kô é nghut jáng, nungmoq gi, Ngá é chángzô pé nghut é hkyô lé, byù lhunglhang bang sé kó râ nghut lhê." gâ ri.

³⁶ Haû hkûn, Simun Petruq gi, "Yhumsîng ê, Nàng, hká shut ló râ lhú?" ga, Yhang lé myi jáng, Yhang gi, "Ngò ló é jang má, nungmoq, ahkuî a wó châng kó râ nghut lhê. Nghut kôlhang, htâng má gi, nungmoq châng ra kó râ nghut lhê." ga tû taî ri.

³⁷ Petruq gi, "Yhumsîng ê, haî mù luî, ahkuî ngò Náng htâng a wó châng é lhú? Ngò gi, Náng é matú, shî hkám râ rì rì nghut lhê." ga taî ri.

³⁸ Haû mù, Yesuq taî é gi, "Nàng gi, gè gè yhang, Ngá é matú shî hkám râ lhú? Ngò, nàng lé teng za taî lé, woq a tân shimá, nàng, Ngo lé sum dâm he-ngik pyám râ nghut lhê.

14

Yesuq, Yhâng É Chángzô Pé Lé Nhkik Tîng É Hkyô

¹ Nungmoq é i-myit nhiklhum lé, myit wui myit hkê hkâdut nhâng kó. Garai Gasang lé lùm keq; Ngo lé le lùm keq. ² Ngá Wâ é yhûm má, nyi jowò myo myo joqlhê; a joq é ru nghut le gi, noq mai, Ngò, nungmoq lé taî kyo râ nghut lhê. Ngò, haû má ló é gi, nungmoq é nyi jowò ló hên lánng râ matú ru nghut lhê. ³ Ngò gi, ló mù, nungmoq é matú nyi jowò ló hen é nghut jáng, Ngò nyi é jang má nungmoq le wó nyi shoq, Ngò eq rahá nyi râ matú, Ngò dum taû lé mù, nungmoq lé, lé shuí yù râ nghut lhê. ⁴ Ngò ló é jang má jé é hkyô lé, nungmoq sê lhê." gâ ri.

Yesuq Za Hkyô

⁵ Haû hkûn, Htomaq gi, Yhang lé, "Yhumsîng ê, Nàng hká shut ló é lé lhang, ngamoq a sê le nhîng, hkyô haû lé, ngamoq hkâsu kut wó sé râ lhú?" ga myî ri.

⁶ Yesuq gi, "Ngò gi, hkyô nghut lhê; haû tengmán hkyô eq asak le nghut lhê. Ngò mai za a nghut jáng, ó yuq le, Íwâ chyáng wó jé é a nghut.
⁷ Nungmoq, gè gè yhang, Ngo lé sé kô é nghut le gi, Ngá Wa lé le, nungmoq sé kó râ nghut lhê. Ahkuî mai, nungmoq gi, Yhang lé sé kô é htoq agó, myàng le myang wú bekô nghut lhê." ga tû taî ri.

⁸ Haû hkûn, Hpilip gi, "Yhumsîng ê, ngamoq lé, haû Íwa tân shit laq, haû hkûn, ngamoq nhik shî râ nghut lhê." ga taî ri.

⁹ Yesuq tû taî é gi, "Hpilip ê, Ngò, nungmoq eq shî myáng lhang nyi lò bê le nhîng, nàng, Ngo lé a sé lhú? Ngo lé myang é sù gi, haû Íwa lé myàng bê nghut ri; haû nghut le nhîng, 'Ngamoq lé, haû Íwa tân shit laq.' nghû,

nàng hkâsu wó taí lhê lúh? ¹⁰ Ngò gi, haù Íwa má nghut nyí luí, haù Íwa gi, Ngò má nghut nyi é hkyô lé, nàng a lumjínng lúh? Ngò, nungmoq lé taí é dang haù pé gi, Ngá é myit mai taí é a nghut; haù Ngò má lúng nyi é Íwa sheq, Yhâng é mù zuí nyi é ru nghut lhê. ¹¹ Ngò gi, haù Íwa má nghut nyí luí, haù Íwa gi, Ngò má nghut nyi lhê nghû é lé lumjínng keq; haù a nghut jáng, kut shit é limik kumlhá pé dông za lhang, lumjínng keq. ¹² Ngò, nungmoq lé teng za taí kôlé, Ngo lé lumjínng é sù gi, Ngò kut é muzó lé kut rã nghut lhê. Ngò gi, haù Íwa chyáng ló rã nghut é yanmai, haù yuq gi, hau htoq je kô é muzó pé lé lhang kut rã nghut lhê. ¹³ Haù Yhangzô é yanmai, Íwa é hpungwup shingkang wó hù ló shoq, Ngá é myìng lé lang luí, nungmoq haí jung dung kôlhang, Ngò gyo byi rã nghut lhê. ¹⁴ Nungmoq gi, Ngá é myìng lé lang luí, haí dung kôlhang, Ngò gyo byi rã nghut lhê.

Chyoiyúng Woi-nyí Byi Rã Dang-gidiq

¹⁵ Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó rã nghut lhê. ¹⁶ Haù Íwa gi, nungmoq eq ahtum abyuq nyi nyi rã nghut é, hpaqchyí byi Sù gotù rayuq, nungmoq lé byi rã matú, Ngò gi, haù Íwa lé dung rã nghut lhê. ¹⁷ Haù yuq gi, tengmán é Woi-nyí nghut lhê. Haù mingkan gi, Woi-nyí haù lé a myàng a sê é yanmai, Yhang lé a wó hap yu é nghut lhê. Nghut kôlhang, Yhang gi, nungmoq eq rahá nyi nyi é nghut luí, nungmoq má nyi to rã Sù nghut é yanmai, nungmoq gi, Yhang lé sê akô. ¹⁸ Ngò gi, nungmoq lé, chuizô pé dông pyâm to rã a nghut; nungmoq chyáng Ngò dum jé lé rã nghut lhê. ¹⁹ Adê myáng má, haù mingkan gi, Ngo lé a myàng lo rã nghut lhê; nghut kôlhang, nungmoq gi, Ngo lé myàng kó rã nghut lhê. Hkâsu mù gâ le, Ngò gi, asak dui nyi é nghut mù, nungmoq le duì kó rã nghut lhê. ²⁰ Ngò gi, Ngá Wã chyáng

nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haù buinyi má, nungmoq sé kó rã nghut lhê. ²¹ Ngá é hkunmó pé lé wó mù, châng kut é sù ó yuq nghut kôle, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap rã nghut lhê; Ngò le, haù yuq lé chyitdap luí, Ngá gûng lé yhang, yhang lé shit rã nghut lhê." gâ ri.

²² Hau htâng, (Yudaq Iskarut a nghut sù) Yudaq gi, "Yhumsîng ê, Nàng gi, haù mingkan lé Nàng gûng a shit e za, ngamoq lé shit rã nghut é gi, haí mù nghut lhê lúh?" ga myí ri.

²³ Haù hkûn, Yesuq tù taí gi, "Rayuq yuq, Ngo lé chyitdap é nghut le gi, Ngá dang lé gyo rã nghut lhê. Ngá Wa le, haù yuq lé chyitdap rã nghut luí, Ngá hpe gi, haù yuq chyáng lé mù, yhang eq rahá nyi rã nghut lhê. ²⁴ Ngo lé a chyitdap é sù gi, Ngá dang lé gyo rã a nghut. Nàng wó gyô é dang shí pé gi, Ngá myit mai taí é a nghut; dang haù pé gi, Ngo lé nhang kat é Sù, haù Íwa é ru nghut lhê.

²⁵ Ngò gi, shí pé banshoq lé, nungmoq eq rahá nyi tô ashí u lé taí bê nghut lhê. ²⁶ Nghut kôlhang, Ngá é myìng dông, haù Íwa nhang kat rã nghut é, hpaqchyí byi Sù nghû é, haù Chyoiyúng Woi-nyí gi, nungmoq lé, jung hkangmó mhoq byi rã eq, Ngò, nungmoq lé taí kyo bê hkyô lhunglhang, nungmoq lé lhoq pun rã nghut lhê. ²⁷ Ngò gi, nungmoq chyáng, nguìngón hkyô tô to byi bê; Ngá é nguìngón hkyô, Ngò, nungmoq lé byí é nghut lhê. Ngò gi, mingkan byí é dông, nungmoq lé byí é a nghut. Nungmoq é i-myit nhikhum lé, myit wui myit hke é eq gyuq kyûm é hkâdut nhâng kó.

²⁸ 'Ngò gi, ló byuq luí, nungmoq chyáng dum taú lé rã nghut lhê.' nghû, Ngò taí é lé, nungmoq wó gyô yù bê nghut lhê. Nungmoq, Ngo lé chyitdap kô é nghut le gi, haù Íwa chyáng Ngò ló rã nghut é hkyô lé, nungmoq gabú kó rã nghut lhê; hkâsu

mù gâ le, haû Îwa gi, Ngá htoq je ko Sû nghut lhê. ²⁹ Haû dut é hkûn, nungmoq lumjîng kó sháng gaq nghû, ahkuí, haû a dut shimá, Ngò, nungmoq lé taí kyô é nghut lhê. ³⁰ Ahkuí mai, Ngò gi, nungmoq lé, dang myo myo wó nyô râ a nghut lo; hkâsu mù gâ le, mingkan shi é zau gi, jé lé lo nyi bê nghut ri. Haû yuq gi, Ngo lé up râ ahkáng haí a wó é sù nghut ri. ³¹ Nghut kôlhang, haû Îwa lé Ngò chyitdap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

15

Tsibiyiq Nuí Eq Akoq Pé É Hkyô

¹ Ngò gi, haû tsibiyiq nuí akyîng nghut lhê; Ngá Wa gi, tsibiyiq hkyâm yhumsîng nghut lhê. ² Yhang gi, ashi a zuí é akoq hkangmó lé, Ngá chyáng mai kyik pyám luí, ashi zuí é akoq hkangmó lé kúm gi, ashi je myo zui sháng gaq ga, shang pyám byí ri. ³ Nungmoq gi, Ngò, nungmoq lé taí é mungdang hau é yanmai, sanséng gû nghut bekô nghut ri. ⁴ Ngò má nyi nyi keq; Ngò le, nungmoq má nyi nyi râ nghut lhê. Akoq hkangmó gi, tsibiyiq nuí má nui nyi é za a nghut jáng, yhang baú ashi wó zuí é a nghut. Haû eq rajung za, nungmoq le, Ngò má nyi nyi e za a nghut jang, ashi wó zui kó râ a nghut.

⁵ Ngò gi, tsibiyiq nuí nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luí, Ngò gi, yhang má nyi nyi é nghut jáng, haû yuq gi, ashi myo myo zui râ nghut lhê; hkâsu mù gâ le, Ngò mai gang jáng, nungmoq gi, haí le a wó kut kô é nghut lhê. ⁶ Ngò má a nyi nyi é sù gi, haû dú pyâm é hui luí, kyuq shi byuq é akoq eq wuí ri; haû sù é akoq pé gi, byu pé èq guq yù mù, myihkyóm má dú kat pyâm é hui luí, nyé gyó byuq râ nghut lhê.

⁷ Nungmoq gi, Ngò má nyi nyi luí, Ngá é dang pé gi, nungmoq má bo nyi é nghut le gi, nungmoq ô nau

é haí nghut kôlhang, dung keq; haû hkûn, nungmoq lé byi râ nghut lhê. ⁸ Nungmoq gi, haû ashi ga-myhó zuí é dông, Ngá Wá é hpungwup shingkang lé lhoq htoq shit é nghut luí, Ngá é chángzô pé nghut é hkyô lé tûn shit nyi bekô nghut ri.

⁹ Haû Îwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuí, Ngá é chyitdap myit má gîng nyi keq. ¹⁰ Ngò gi, Ngá Wá é hkunmó lé châng é nghut luí, Yhâng é chyitdap myit má gîng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gîng nyi kó râ nghut lhê. ¹¹ Nungmoq má Ngá é gabú hkyô joq nyi râ eq, nungmoq é gabú hkyô wó byíng jup râ matú, Ngò, nungmoq lé, dang shí pé taí é nghut lhê. ¹² Ngò, nungmoq lé chyitdap é su, nungmoq yhangchang chyitdap lhum keq; haû gi, Ngá é hkunmó nghut lhê. ¹³ Haû yhumsîng é luzúm wui é matú, yhumsîng é asak ap byí pyâm é chyitdap myit htoq kô é, chyitdap myit gi, ó yuq chyáng le a bò nghut ri. ¹⁴ Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wui nghut bekô. ¹⁵ Ngò gi, Ngá Wá chyáng mai Ngò wó gyô yu é hkyô lhunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wui nghû, a wut lô e za, luzúm wui nghû wut é nghut lhê; hkâsu mù gâ le, dui-nhâng zoshâng gi, yhâng yhumsîng hpô é muzó lé a châng sé nghut ri. ¹⁶ Nungmoq, Ngo lé hkyin yu é a nghut, Ngò sheq, nungmoq lé, htoq e ló mù, gîng nyi é ashi zui râ matú hkyin masat tô é ru nghut lhê. Hau hkûn sheq, Ngá é myîng lé lang mù, haû Îwá chyáng nungmoq haí jung dung kôle, Yhang byi râ nghut lhê. ¹⁷ Nungmoq yhangchang chyitdap lhum keq; haû gi, Ngá é hkunmó nghut lhê.

Haû Mingkan Gi, Chángzô Pé Lé A Jú É Hkyô

18 Haû mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq. 19 Nungmoq gi, haû mingkan eq sêng é bang nghut é nghut jáng, haû mingkan gi, yhang eq sêng é bang nungmoq lé chyitdap râ nghut lhê. Nghut kôlhang, nungmoq lé gi, Ngò, haû mingkan mai hkyin htoq yû bê nghut luí, nungmoq gi, haû mingkan eq a sêng lo kô é yanmai, mingkan gi, nungmoq lé a jú é nghut ri. 20 'Dui-nhâng zoshâng gi, yhâng é yhumsing htoq je kô é a nghut.' nghû, Ngò, nungmoq lé taí é dang pé lé bûn nyi keq. Ngo lé lhang, yhangmoq zing-rí yû bekô nghut le gi, nungmoq lé le, zing-ri kó râ nghut lhê. Ngò mhoqshit é hkyô lé, yhangmoq cháng kô é nghut le gi, nungmoq mhoqshit é lé le, cháng kó râ nghut lhê. 21 Nghut kôlhang, yhangmoq gi, Ngá é mying é yanmai, nungmoq lé haû su kut kó râ nghut lhê; hkâsu mù gâ le, haû Ngo lé nhang kat é Sû lé, yhangmoq a sé kôluí nghut ri. 22 Yhangmoq lé, Ngò a lé nyo wú é nghut le gi, yhangmoq mara bò kó râ a nghut; nghut kôlhang, ahkuí gi, yhangmoq mara wó taí hkyut râ a nghut lo. 23 Ngo lé a jú é sù gi, Ngá Wa lé le a jú é sù nghut ri. 24 Haû ó yuq lhang a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó râ a nghut; ahkuí kúm gi, laklai kumlhá haû pé lé yhangmoq myang nyi kôlhang, Ngò eq Ngá Wa lé a jú kô é nghut ri. 25 Haû gi, 'Yhangmoq gi, jumgúyô má Ngo lé a jú kut akô nghut ri.'* ga, yhangmoq é tarâ má kâ tô é dang lé lhoq dik é nghut ri.

26 Haû Íwâ chyáng mâ é, Ngò nhang kat râ nghut é, Íwâ mai htoq lé lo é tengmán é Woi-nyí nghut é, haû hpaqchyí byi Sû jé lé é hkûn, Ngá é hkyô lé saksé hkám byi râ nghut lhê. 27 Nungmoq le, Ngò eq rahá sâng-hi mai nyi bekô nghut é yanmai, saksé hkám byi ra kó râ nghut lhê.

* 15:25 Hkya-on 35:19; 69:4

16

1 Nungmoq gi, myit lingbat jowò a joq kó sháng gaq nghû, haû pé ban-shoq lé, Ngò, nungmoq lé taí kyo bê nghut lhê. 2 Yhangmoq gi, nungmoq lé, tarajong mai hkat htoq pyám kó râ nghut lhê; ó yuq nghut kôle, yhang mai nungmoq lé sat pyâm é hkûn, yhang gi, haû dông mai Garai Gasang lé dojaú nyi lhê ga myit yu é ahkyíng, gè gè yhang, jé râ nghut lhê. 3 Yhangmoq gi, haû Íwâ lé le, Ngo lé le, a sé kô é yanmai, haû su kut kó râ nghut lhê. 4 Nghut kôlhang, nungmoq lé, Ngò sidiq byí é hkyô lé, ahkyíng jé jáng nungmoq bûn nyi kó sháng gaq nghû, Ngò haû hkyô taí kyô é nghut lhê. Ngò gi, nungmoq eq rahá nghut nyi é yanmai, haû hkyô lé, hí hkûn nungmoq lé a taí kyô é nghut lhê.

Chyoiyúng Woi-nyí é muzó

5 Nghut kôlhang, ahkuí, Ngò gi, Ngo lé nhang kat Su chyáng ló râ nghut lhê. Nghut kôlhang, nungmoq ó yuq le, 'Nàng, hká shut ló râ lhu?' ga, Ngo lé a myi kó nghut ri. 6 Ngò, nungmoq lé, haû hkyô pé taí kyô é yanmai, nungmoq é i-myit unghkaú má iyon hkyô byíng to bekô nghut ri. 7 Nghut kôlhang, Ngò, nungmoq lé teng za taí kôlé, Ngò ló byuq é gi, nungmoq é matú je gè râ hkyô ru nghut lhê. Ngò ló byuq e za a nghut jáng, haû hpaqchyí byi Sû gi, nungmoq chyáng lé râ a nghut; Ngò ló jáng sheq, Yhanglé, Ngò, nungmoq chyáng nhang kat byi râ nghut lhê. 8 Yhang jé lé é hkûn, Yhang gi, haû mara wó é eq séng luí le, dingmán hkyô eq séng luí le, tarâ jéyáng hkyô eq séng luí le, haû mingkan lé tân shit râ nghut lhê. 9 Haû yubak mara wó é eq séng luí ga jang, byu pé gi, Ngo lé a lumjínng kô é yanmai nghut ri. 10 Haû dingmán hkyô eq séng luí ga jang, Ngò gi, haû Íwâ chyáng ló râ nghut luí, nungmoq, Ngo lé a myàng lo kó râ nghut é yanmai nghut ri. 11 Haû tarâ jéyáng hkyô eq séng luí ga jang, mingkan shi é zau

gi, mara byi é huí é nghut é yanmai nghut ri.

¹² Ngò gi, nungmoq lé taí rã hkyô myo myo wó ashî; nghut kôlhang, ahkuí, nungmoq wó hkâm kó rã a nghut. ¹³ Nghut kôlhang, haú tengmán é Woi-nyí jé lé é hkûn, Yhang gi, tengmán hkyô lhunglhang lé shuí sé rã nghut lhê. Yhang gi, Yhâng myit dông taí rã a nghut; Yhang, wó gyô yu é hkyô lé za taí luí, dut lò rã hkyô pé lé le, nungmoq chyáng taí pyô rã nghut lhê. ¹⁴ Yhang gi, Ngò wó é lé, yù mù, nungmoq lé taí kyô é eq sé nhang é dông, Ngá é hpungwup shingkang lé hú ló nhâng rã nghut lhê. ¹⁵ Haú Íwa wó é lhunglhang gi, Ngá é chyat nghut lhê. Hau é yanmai, haú Woi-nyí gi, Ngò wó é lé yù mù, nungmoq lé sé nhâng rã nghut lhê nghû, Ngò taí é nghut lhê.

¹⁶ Adê myáng má, nungmoq gi, Ngo lé a myàng lo kó rã nghut lhê; hau htâng, dum adê myáng má, nungmoq gi, Ngo lé myàng kó rã nghut lhê." gâ ri.

Changzô Pé É Iyon Hkyô Gi, Gabú Hkyô Taú Dut Rã

¹⁷ Yhâng é chángzô pé ra-am gi, "Adê myáng má, nungmoq gi, Ngo lé a myàng lo kó rã nghut lhê; hau htâng, dum adê myáng má, nungmoq gi, Ngo lé myàng kó rã nghut lhê." gâ é eq 'Ngò gi, Íwa chyáng ló rã nghut é yanmai nghut lhê.' ga, Yhang taí é gi, haí jung gá nau é nghut lhê lú?" ga, rayuq eq rayuq myí lhúm bum akô. ¹⁸ Hau htoq agó, yhangmoq gi, "Adê myáng má, gâ é gi, Yhang haí jung gá nau lhê lú? Nga-nhúng gi, Yhang haí taí nau é lé a sê gyo." ga, taí lhúm bum akô nghut ri.

¹⁹ Yesuq gi, yhangmoq myi naú kô é hkyô lé sê ri; haú mù, Yhang, yhangmoq lé taí é gi, "Adê myáng má, nungmoq gi, Ngo lé a myàng lo kó rã nghut lhê; hau htâng, dum adê myáng má, nungmoq gi, Ngo lé myàng kó rã nghut lhê." nghû, Ngò taí é lé, haí jung gá nau lhê laq nghû, rayuq eq rayuq myi lhúm nyi akô lú? ²⁰ Ngò, nungmoq lé teng za taí kôlé, haú mingkan

gi, gabú nyi é u lé, nungmoq gi, ngaú é eq iyon yón é hui kó rã nghut lhê. Nungmoq gi, iyon yón é hui kó rã nghut lhê; nghut kôlhang, nungmoq é iyon hkyô gi, gabú hkyô taú dut rã nghut lhê. ²¹ Myiwe gi, zoshâng hkû rã nghut jáng, zohkû-nò nò rã ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkûn gi, mingkan htoq má zoshâng rayuq wó hku to bê nghut luí, yhang gabú é yanmai, haú no hpu é hkyô lé a bun byuq lo nghut ri. ²² Haú eq rajung za, ahkuí gi, nungmoq iyon yón é ahkyíng nghut ri; nghut kôlhang, Ngò, nungmoq lé dum huí é hkûn, nungmoq gi, gabú kó rã nghut lhê; nungmoq é gabú hkyô haú lé, nungmoq chyáng mai ó yuq èq le wó yu pyám byi rã a nghut. ²³ Haú buinyi má, nungmoq gi, Ngo lé, haí le a dung lo kó rã nghut lhê. Ngò, nungmoq lé teng za taí kôlé, nungmoq gi, Ngá myíng lang luí, Ngá Wá chyáng haí dung kôle, Yhang byi rã nghut lhê. ²⁴ Ahkuí jé shoq, nungmoq gi, Ngá myíng lé lang luí, haí le a dung wú shi kó nghut ri. Dung keq, haú hkûn, nungmoq myang hap yù kó rã nghut luí, nungmoq é gabú hkyô gi, byíng jup lò rã nghut lhê.

²⁵ Ngò gi, nungmoq lé, dangtú dông haú pé taí kyo bê nghut lhê; nghut kôlhang, Ngò gi, dangtú a chúng lô e za, haú Íwa eq sêng é hkyô, nungmoq lé san za taí kyô é ahkyíng jé rã nghut lhê. ²⁶ Haú buinyi má, nungmoq gi, Ngá é myíng lé lang luí dung kó rã nghut lhê. Ngò gi, nungmoq é matú, haú Íwa chyáng dung byi rã nghut taí nyi é a nghut. ²⁷ Hkâsu mù gâ le, nungmoq gi, Ngo lé chyitdap kô é eq, Ngò gi, Íwa Garai Gasâng chyáng mai jé lé é Sû nghut é lé, nungmoq lumjíng kô é yanmai, haú Íwa yhang, nungmoq lé chyitdap é nghut lhê. ²⁸ Ngò gi, haú Íwa chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, haú Íwa chyáng dum taú ló rã nghut

lhê." gâ ri.

²⁹ Haú hkûn, Yesuq é chángzô pé gi, "Ahkuí, Nàng gi, dangtú a chûng é dông, san za taí kyô nyi é nghut bê!
³⁰ Nàng gi, lhunglhang lé sê é sù nghut é lé le, Nàng lé, ó yuq èq le dangmyi myi nó a râ é hkyô lé le, ahkuí, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjǐng lhê." ga taí bum akô.

³¹ Haú hkûn, Yesuq tû taí é gi, "Nungmoq, ahkuí lumjǐng bekô lú?
³² Nghut kôlhang, nungmoq gi, lhoq pyo pyâm é hui luí, Ngo lé baú za tô pyâm to kômù, ó le ô yhûm shut ló byuq râ ahkyǐng jé lo nyi bê nghut ri; ahkuí lhang jé to bê. Nghut kôlhang, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lhê.

³³ Nungmoq gi, Ngò má nguingón hkyô wó kó sháng gaq nghû, Ngò gi, haú hkyô pé lé taí kyô é nghut lhê. Nungmoq gi, mingkan shí má, wuîhke hkyô hui kó râ nghut lhê; nghut kôlhang, myit wum lhoq kǐng keq. Ngò gi, mingkan lé ung pyâm bê nghut lhê." gâ ri.

17

Yesuq Kyûdung É Hkyô

¹ Yesuq gi, haú su ga taí é htâng má, mauhkûng shut tu wú luí, kyûdung é gi, "Áwa ê, ahkyǐng jé bê nghut ri; haú Nung Zo gi, Nang lé hpungwup shingkang wó hu nhâng sháng gaq, Nung Zo lé hpungwup shingkang hû ló nhâng laq ô!
² Hkâsu mù gâ le, Nàng mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nàng gi, byù lhunglhang bang lé up râ ahkáng, Yhang lé byi tô é yanmai nghut ri.
³ Nàng za tengmán é Garai Gasang nghut é eq Nàng nhang kat é sù Yesuq Hkrisduq lé, sê é gi, ahtum abyuq é asak nghut lhê.
⁴ Ngò gi, Nàng, Ngo lé wùn waq nhang é muzó lé lhoq pán é dông, myidàm htoq má, Náng é hpungwup shingkang lé lhoq

htoq shit bê nghut lhê. ⁵ Áwa ê, haú mingkan lhang a joq shí mai, Ngò, Nàng eq rahá chôm wó é hpungwup shingkang èq, ahkuí, Náng é myoq hí má, Ngo lé hpungwup shingkang dan hu nhâng laq.

Chángzô pé matú, Yesuq kyûdung byi é hkyô

⁶ Mingkan mai, Nàng, Ngo lé hkyin htoq yû byi é bang lé, Ngò gi, Náng é myǐng lhoq htoq shit bê nghut lhê. Yhangmoq gi, Náng é byu pé nghut bekô; Nàng gi, yhangmoq lé, Ngá é loq má ap byi bê nghut luí, yhangmoq gi, Náng é dang lé châng kut bekô nghut ri. ⁷ Nàng, Ngo lé byi é lhunglhang gi, Náng chyáng mâ é nghut é lé, ahkuí, yhangmoq sé bekô nghut ri. ⁸ Hkâsu mù gâ le, Nàng, Ngo lé byi kat é mungdang pé lé, Ngò, yhangmoq lé byi bê nghut luí, yhangmoq gi, haú pé lé hap yù bekô nghut ri; Ngò gi, Náng chyáng mai lé é sù nghut é lé le, yhangmoq hkyak sê akô; Nàng, Ngo lé nhang kat é hkyô lé le, yhangmoq lumjǐng bekô nghut ri. ⁹ Ngò gi, yhangmoq é matú kyûdung byi lhê. Ngò gi, haú mingkan byu pé é matú dung byi nyi é a nghut; Nàng, Ngo lé ap byi tô é bâng é matú sheq dung byi nyi é ru nghut lhê; hkâsu mù gâ le, yhangmoq gi, Náng é byu pé nghut akô. ¹⁰ Ngò wó é lhunglhang gi, Náng é chyat nghut mù, Nàng wó é lhunglhang le, Ngá é chyat nghut lhê. Haú mù, Ngò gi, yhangmoq má hpungwup shingkang hû é hui bê nghut lhê. ¹¹ Ngò gi, Nàng chyáng lò râ nghut lhê mù, mingkan htoq má nyi nyi râ a nghut lo; nghut kôlhang, yhangmoq gi, mingkan htoq má nyi nyi shirâ nghut lhê; chyoiyúng é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nàng, Ngo lé byi é, haú Náng myǐng é a-tsam èq yhangmoq lé upzúng nyi aq. ¹² Ngò gi, yhangmoq eq rahá nghut nyi é u lé, yhangmoq lé upzúng bê nghut luí, Nàng, Ngo lé byi é myǐng hau èq, yhangmoq lé rago zúng bê nghut lhê. Haú Chyúmdang lhoq dik sháng gaq ga, haú bang má é

htên byoq hui râ sù mai lai luî, ó yuq le a byuq byuq é nghut lhê.

¹³ Ngò gi, ahkuî, Náng chyáng lò râ nghut bê; nghut kôhang, Ngá é gabú hkyô gi, yhangmoq chyáng byíng jup sháng gaq nghû, Ngò gi, haú pé lé mingkan má taí é nghut lhê. ¹⁴ Ngò gi, yhangmoq lé, Náng é mungdang byi bê nghut lhê; haú mingkan gi, yhangmoq lé a jú nghut ri; hkâsu mù gà le, Ngò gi, mingkan mâ é a nghut é su, yhangmoq le, mingkan mâ é a nghut kô é yanmai nghut ri. ¹⁵ Ngò kyûdûng é gi, Nàng, yhangmoq lé mingkan mai shuí htoq yû râ matú dúng é a nghut, haú agè ashop su chyáng mai, yhangmoq lé upzúng yû râ matú sheq dúng é ru nghut lhê. ¹⁶ Ngò gi, mingkan mâ é a nghut é su, yhangmoq le, mingkan mâ é a nghut kó. ¹⁷ Yhangmoq lé, haú tengmán hkyo eq lhoq sân-yúng yû laq; Náng é mungdang gi, tengmán hkyô nghut ri. ¹⁸ Nàng, Ngo lé, mingkan má nhang hâng kat é su, Ngò le, yhangmoq lé, mingkan má nhang hâng kat é nghut lhê. ¹⁹ Yhangmoq lé, tengmán hkyô má wó lhoq sân-yúng yû kó sháng gaq nghû, Ngò gi, yhangmoq é matú, yhumsing gùng lé lhoq sân-yúng yu é nghut lhê.

Lumjîng Bang Lhunglhâng É Matú, Yesuq Kyûdung Byî É Hkyô

²⁰ Ngò gi, yhangmoq é matú baú za kyûdung byî é a nghut; Yhangmoq é danglu é yanmai, Ngo lé lumjîng kó râ bâng é matú le, Ngò kyûdung byî é nghut lhê. ²¹ Haú mù, yhangmoq banshoq bang gi, rading ralhûm za dut nyi kó sháng gaq. Haú mingkan gi, Nàng, Ngo lé nhang kat é hkyô lé wó lumjîng sháng gaq; Âwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi nyi kó sháng gaq. ²² Ngá hpe gi, ragùng za nghut é su, yhangmoq le, rading ralhûm za dut nyi kó sháng gaq nghû, Ngò gi, Nàng, Ngo lé byî é hpungwup shingkang lé, yhangmoq lé byi bê nghut lhê. ²³ Nàng, Ngo

lé nhang kat bê hkyô eq Nàng, Ngo lé chyitdap é su, yhangmoq lé chyitdap é hkyô lé, haú mingkan wó sé râ matú, yhangmoq gi, gumjup shoq rading ralhûm za wó dut kó sháng gaq nghû, Ngò gi, yhangmoq má nyi nyi luî, Nàng gi, Ngò má nyi nyi é nghut lhê.

²⁴ Âwa ê, haú mingkan lháng a joq shi mai, Nàng, Ngo lé chyitdap luî byi tô é hpungwup shingkang haú lé, Nàng, Ngo lé byi tô é bang, wó myàng kó râ matú le, Ngò nyi é jang má, Ngò eq rahá wó nyi kó râ matú le, Ngò ô nau ri.

²⁵ Dingmán é Âwa ê, haú mingkan gi, Nang lé a sé kôhang, Ngò gi, Nang lé sê lhê; Nàng, Ngo lé nhang kat é hkyô lé gi, yhangmoq sé akô nghut ri. ²⁶ Nàng, Ngo lé chyitdap é chyitdap myit gi, yhangmoq má wó joq nyi râ matú le, Ngò gi, yhangmoq má wó nyi nyi râ matú le, yhangmoq lé, Ngò, Nang é hkyô sé nhâng bê nghut luî, xoq mù sé nhang nyi shirâ nghut lhê." gâ ri.

18

Yesuq Chyup Yû Huí É Hkyô
Mht 26:47-56; Mrk 14:43-50; Luk 22:47-53

¹ Yesuq gi, haú su ga kyûdûng é htâng má, Yhâng é chángzô pé eq rahá, Kedron wuihkung mai lai byit dap ló luî, haú hpoq má joq é hkyâm ralhûm má wang e akô nghut ri.

² Hkyâm haú gi, Yesuq eq Yhâng é chángzô pé lhaq hui hui kut é jowò nghut é yanmai, haú Yesuq lé ap pyám râ sù Yudaq le sê ri. ³ Haú mù, Yudaq gi, haú hkyangjong agyi pé eq Hparishe pê chyáng mai nhang kat é noqkuq yhûm zúng bang ra-am eq gyezo rajùm lé, haú jowò shut shuí wang lé lo ri. Haú bang gi, myihu, myibung eq shâm lhâm pé chung lé lo akô.

⁴ Yesuq gi, Yhang má dut lò râ hkyô lhunglhâng lé sé gû nghut mù, htoq ê luî, yhangmoq lé, "Nungmoq, ó yuq lé ho akô lhú?" ga myî ri.

⁵ Haú hkûn, yhangmoq gi, "Nazaret wà byù Yesuq lé ho lhê." ga tú taí kôjáng, Yesuq gi, "Ngò gi, haú yuq nghut lhê." ga taí ri. (Yesuq lé appyám sù Yudaq le, yhangmoq eq rahá yap tô ri.) ⁶ "Ngò gi, haú yuq nghut lhê." ga Yesuq taí kat é hkûn jáng, yhangmoq gi, nungzut zut mù, myigùng má lêng leq ló bum akô nghut ri.

⁷ Yhang gi, "Nungmoq, ó yuq lé ho akô lhú?" ga, yhangmoq lé dum myí kat jáng, yhangmoq gi, "Nazaret wà byù Yesuq lé ho lhê." ga taí akô.

⁸ Haú hkûn, Yesuq gi, "Ngò gi, haú yuq nghut lhê nghû, nungmoq lé taí kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tú taí ri. ⁹ Haú gi, "Nàng, Ngo lé byí tô é bang rayuq le lhang, Ngò, a lhoq hpyuq pyám." ga, Yhang taí tô é dang dik râ matú nghut ri.

¹⁰ Haú hkûn, Simun Petruq gi, shâm wun tô é nghut luí, shâm shê mù, haú hkyangjong mó é dui-nhâng zôshang é loqyo nohkyap lé zân hpyit kat byí ri. (Dui-nhâng zôshang haú yuq é mying gi, Malhku gâ ri.)

¹¹ Haú mù, Yesuq gi, Petruq lé, "Náng é shâm lé, shambyâng má xâng pyám aq! Haú Îwa, Ngo lé byí é góm* lé, Ngò a shuq é wó nyí râ lhú?" ga taí kat ri.

Yesuq Lé, Anna Chyáng Shuí E É Hkyô

Mht 26:57-58; Mrk 14:53-54; Luk 22:54

¹² Hau htâng, gyezo haú jûm eq yhangmoq é gyezau hpó, Yudaq byu pé é mingsuwún wuî gi, Yesuq lé chyup yû mù, tuí akô nghut ri. ¹³ Yhangmoq gi, haú zân má é hkyangjong mó Kayahpaq é yhâng-tsa Anna chyáng hí, Yhang lé shuí ló akô nghut ri. ¹⁴ Kayahpaq gi, byu pé é matú rayuq shí hkám byí le je gè râ nghut lhê ga, haú Yudaq byu pé lé hpaqchyí byí é sù yuq nghut ri.

Yesuq Lé, Petruq Sâng-hi Dam Hengik Pyâm É Hkyô

Mht 26:69-70; Mrk 14:66-68; Luk 22:55-57

¹⁵ Simun Petruq eq gotû chángzo rayuq gi, Yesuq htâng châng e ló akô nghut ri. Gotû chángzo haú yuq gi, hkyangjong mó lé rago sê lhê nghut mù luí, hkyangjong mó é yhumwàng hkaû shut, Yesuq é htâng má châng wang ló ri. ¹⁶ Petruq kúm gi, hkúmdong shinggan má lánng yap tô ri. Haú hkyangjong mó lé rago sê é sù, gotû chángzo haú yuq gi, taú htoq ló mù, hkum zúng é myiwe myhí lé taí luí, Petruq lé shuí hâng yu ri.

¹⁷ Haú hkûn, haú hkum zúng é myiwe myhí gi, Petruq lé, "Nàng gi, haú yuq é chángzô pé mâ é rayuq a nghut lhú?" ga myí jáng, yhang gi, "Ngò a nghut." ga tú taí ri.

¹⁸ Haú u lé, gyoq é yanmai, dui-nhâng zoshâng wuî eq noqkuq yhûm zúng bang gi, yhangmoq gyoq gâng râ matú myigyê èq mut tô é myihkyóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

Yesuq Lé, Hkyangjong Mó Myí Choq Wú É Hkyô

Mht 26:59-66; Mrk 14:55-64; Luk 22:66-71

¹⁹ Haú u lé, haú hkyangjong mó gi, Yesuq lé, Yhâng é chángzô pé hkyô eq Yhâng mhoqshit é hkyô eq séng luí myí ri.

²⁰ Haú hkûn, Yesuq gi, "Haú mingkan htoq má, Ngò, de de taí bê nghut lhê. Ngò gi, haú Yudaq byu pé banshoq bang chôm zing é, tarajong pé má le, noqkuq yhûm má le, ayang mhoqshit é nghut lhê. Ngò gi, haq zaú luí taí é hkyô haí le a joq. ²¹ Nàng, haí mù Ngo lé myí lhê lhú? Haú, Ngò taí é lé wó gyô é bang lé myí aq; Ngò haí taí é hkyô lé, yhangmoq gè gè sê akô nghut ri." ga tú taí ri.

²² Yesuq haú su ga taí jáng, haú nàm má nyi tô é noqkuq yhûm zúng sù rayuq gi, Yhang lé pyuq kat luí,

* **18:11** Góm lé shuq gâ é gi, jamjau hui râ eq shí hkám râ lé, taí nau é nghut lhê.

"Hkyangjong mó lé wá, Nàng, haú su nghut dang tú lھے lھú?" ga taí ri.

²³ Haú hkún, Yesuq gi, "Ngò taí shut é nghut le gi, shut é hkyô lé saksé tũn shit aq. Nghut kôlhang, Ngò gi, têng é dông ru taí le nhĩng, nàng, haí mù Ngo lé pyuq lھے lھú?" ga tú taí ri. ²⁴ Hau htàng, Anna gi, Yhang lé tuí to gù, haú hkyangjong mó Kayahpaq chyáng dé kat nhang ri.

Yesuq Lé, Petruq Xoq He-ngik Pyâm É Hkyô

Mht 26:71-75; Mrk 14:69-72; Luk 22:58-62

²⁵ Haú Simun Petruq gyoq gang yap tô é hkún, "Nàng gi, Yhàng é chángzô pé mâ é rayuq a nghut lھú?" ga, yhang lé myi kôjáng, yhang gi, "Ngò a nghut." ga, dum he pyâm ri.

²⁶ Haú Petruq eq nohkyap zân hpyit pyâm byí é huí su é buinùm nghut é sũ, haú hkyangjong mó é dui-nhàng zoshàng rayuq gi, yhang lé, "Haú hkyâm má, nàng, Yhang eq rahá nghut nyi é lé, ngò a myang é su ngam lھے lھú?" ga taí ri. ²⁷ Haú hkún, Petruq gi, xoq he pyâm ri; haú u yhang, woq tũn bê nghut ri.

Pilat É Myoq Hí Má, Yesuq Jé Nyi É Hkun Lھے Hkyô

Mht 27:1-2, 11-14; Mrk 15:1-5; Luk 23:1-5

²⁸ Hau htàng, yhangmoq gi, Yesuq lé, Kayahpaq chyáng mai, haú mauzau hpô é yhũmwàng shut shuĩ e ló akô. Haú u gi, napsũn noq ashĩ nghut ri. Yhangmoq gi, agot a-ũ a dut e za, htũngli dông Lhoqlhai Poĩ lé wó zo rá matú, yhũmhkaũ má a wàng kó nghut ri. ²⁹ Haú mù luĩ, mauzau Pilat gi, yhangmoq chyáng htoq ê mù, "Shĩ yuq lé, nungmoq hai mara hũn nau akô lھú?" ga myĩ ri.

³⁰ Haú hkún, yhangmoq gi, "Shĩ yuq, a ge é muzó kut é a nghut le gi, Yhang lé, nàng é loq má ngamoq lé ap byi rá a nghut." ga tú taí akô.

³¹ Pilat gi, "Yhang lé, nungmoq yhang shuĩ ló mù, nungmoq é tarâ dông ló jéyáng keq." ga taí jáng, haú

Yudaq byu pé gi, "Nghut kôlhang, ngamoq gi, ó yuq lé sat rá ahkáng le a wó é nghut lھے." ga tú taí akô nghut ri.

³² Haú su dut é hkyô gi, Yesuq, Yhang hká dông shĩ rá ga taí é dang lé lhoq dik rá matú nghut lھے.

³³ Haú mù, Pilat gi, yhũmhkaũ má taũ wang ló mù, Yesuq lé wut yũ luĩ, "Nàng gi, Yudaq byu pé é hkohkâm nghut lھے lھú?" ga myĩ ri.

³⁴ Haú hkún, Yesuq gi, "Haú gi, nàng é myit dông taí é nghut lھے lھú? A nghut jáng, góbang mai, nang lé, Ngá é hkyô taí kyo luĩ nghut lھے lھú?" ga taũ myĩ ri.

³⁵ Pilat gi, "Ngò gi, Yudaq byũ nghut lھے lھú? Haú Nàng é byũ myũ eq Nàng é hkyangjong agyi pé sheq, Nang lé, ngá loq má ap byĩ é ru nghut lھے. Nàng gi, haí kut é nghut lھے lھú?" ga dum myĩ ri.

³⁶ Haú hkún, Yesuq gi, "Ngá é mingdán gi, mingkan shĩ eq a séng. Mingkan shĩ eq séng é ru nghut le gi, haú Yudaq byu pé, Ngo lé a wó chyup yu lo shoq, Ngá é dui-nhàng zoshàng wuĩ, Ngo lé chôm hung yũ kó rá nghut lھے. Nghut kôlhang, Ngá é mingdán gi, mingkan shĩ eq a séng é ru nghut lھے." ga taí ri.

³⁷ Haú mù, Pilat gi, "Haú jáng, Nàng gi, hkohkâm nghut bê lھú?" ga myi jáng, Yesuq gi, "Ngo lé, hkohkâm nghut lھے ga, nàng taí nyi é jô ri. Gè gè ga jáng, Ngò gi, hau é yanmai hku lé lo é sũ nghut lھے; haú tengmán hkyô lé saksé hkám rá matú, Ngò, mingkan htoq má jé lé é nghut lھے. Haú tengmán hkyô eq séng é sũ ó yuq le, Ngá é dang lé gyô ri." ga tú taí ri.

³⁸ Haú hkún, Pilat gi, "Tengmán hkyô gâ é gi, haí jung lھú?" ga myĩ ri. Yhang gi, haú su ga myi luĩ, haú Yudaq byu pé chyáng dum htoq ê mù, "Shĩ yuq chyáng mara hũn rá hkyô, ngò a myàng nghut ri. ³⁹ Nghut kôlhang, haú Lhoqlhai Poĩ u lé, nungmoq é matú, ngò, htóng byũ rayuq nhang htoq kat byi byi kut é htũng, nungmoq wó akô. Haú mù, 'Yudaq byu pé é hkohkâm' lé, nhang htoq kat

byi râ lé, nungmoq ô nau akô lhu?" ga myi ri.

⁴⁰ Haú hkûn, yhangmoq gi, "Haú yuq lé a nghut! Barabaq lé sheq nhâng byi aq." ga, garû kat akô. Barabaq gi, damyaq nghut ri.

19

Yesuq Lé, Tapzîng Má Jén Sat Râ Matú Doqdân É Hkyô

Mht 27:15-31; Mrk 15:6-20; Luk 23:13-25

¹ Haú mù luî, Yesuq lé lâng she yù mù, nhuq bat râ matú, Pilat hkunmó hkyô ri. ² Haú gyezô pé gi, zujanmaú saí yù kôluî, Yesuq é ulhum má tsung byi kômù, Yhang lé, buhîng nè hut byi akô nghut ri. ³ Hau htâng, yhangmoq gi, Yhâng chyáng dum huî ê ê kut luî, "Yudaq byu pé é hkohkâm ê! Chyung hîng xê hîng nyi sháng gaq ô!" ga taí kômù, Yhâng é myoqdong má pyuq byi akô nghut ri.

⁴ Pilat gi, haú Yudaq byu pé chyáng radàm dum htoq ê mù, "Wú keq, shí yuq chyáng mara hûn râ hkyô, ngò a myang é lé nungmoq sé sháng nghû, Yhang lé, ngò nungmoq chyáng shuí htoq lé byi lhu." ga taí ri. ⁵ Yesuq gi, haú zumuq tsûng tô é eq bu nè hîng wut to mù htoq lé jáng, Pilat gi, yhangmoq lé, "Wú keq, Yhang, shí yuq nghut lhu." ga taí ri.

⁶ Haú hkyangjong agyi pé eq yhangmoq é noqkuq yhûm zúng bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garû bum akô.

Nghut kôlhang, Pilat gi, "Nungmoq shuí yù mù, tapzîng má jén sat keq. Ngò gi, Yhâng chyáng mara hûn râ hkyô a myàng." ga tû taí ri.

⁷ Haú hkûn, haú Yudaq byu pé gi, "Ngamoq chyáng tarâ rahkat joq lhu; tarâ haú dông ga jang, Yhang gi, shí gîng bê nghut ri; hkâsu mù gâ le, Yhang gi, Garai Gasâng é Yhangzo haú nghut lhu gâ ri." ga xoq taí akô.

⁸ Pilat gi, dang haú lé wó gyo jáng, je gyô gyuq luî, ⁹ yhúmhaú shut dum

wang ló mù, Yesuq lé, "Nàng, hkâmâ é sù nghut lhu lhu?" ga myi ri. Nghut kôlhang, Yesuq gi, dang rahkun lhang a tû taí byi nghut ri. ¹⁰ Haú hkûn, Pilat gi, "Nàng, ngo lé a tû taí kut lhu lhu? Ngò gi, Nàng lé, wó lhoq lhut kat é eq tapzîng má wó jén sat pyám é ahkáng wó sù nghut é lé, Nàng a sé lhu?" ga myi ri.

¹¹ Yesuq gi, "Nàng lé, haú ahtoq mai ahkáng byi e za a nghut le gi, nàng, Ngo lé haí kut râ a-tsam le wó râ a nghut. Haú mù luî, Ngo lé, nàng é loq má ap byi é sù gi, mara je bo é nghut lhu." ga tû taí ri.

¹² Haú hkûn mai, Pilat gi, Yesuq lé lhoq lhut kat byi nau nyi bê nghut ri. Nghut kôlhang, haú Yudaq byu pé gi, "Nàng, haú yuq lé nhang pyám é nghut jáng, nàng gi, hkoséng Kehta é luzúm a nghut lo; yhumsing gûng lé, hkohkâm gâ é sù gi, hkoséng Kehta eq shai lhum é sù nghut lhu." ga, ru jáng garû nyi bum akô nghut ri.

¹³ Haú lé wó gyo jáng, Pilat gi, Yesuq lé shuí htoq ê mù, Hebre myíng dông Gabahta gâ é Luqgok hkâng myhang to jang nghu é jowò mâ é tarâ jéyáng tanghkuq má zung tô ri. ¹⁴ Haú u gi, Lhoqlhai Poí é matú, Hên Lajâng é Buinyi nyí-káng raxe í hkyíng nghut ri.

Pilat gi, haú Yudaq byu pé lé, "Nungmoq é hkohkâm lé wú keq." ga taí ri.

¹⁵ Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garû bum akô.

Haú hkûn, Pilat gi, "Nungmoq é hkohkâm lé wá, ngò, tapzîng má jén sat pyám râ lhu?" ga myi jáng, haú hkyangjong agyi pé gi, "Haú hkoséng Kehta mai lai luî, gotû hkohkâm ngamoq a wó." ga, tû taí akô nghut ri.

¹⁶ Hau htâng má, Pilat gi, Yesuq lé tapzîng má jén sat pyám râ matú, yhangmoq é loq má ap byi kat bê nghut ri. Haú mù luî, yhangmoq gi, Yesuq lé shuí ló bekô nghut ri.

Tapzîng Má Jén Pyâm É Hkyô
Mht 27:32-44; Mrk 15:21-32; Luk
23:26-43

¹⁷ Yesuq gi, yhumsing é tapzîng lé waq mù, Hebre myíng dông Golgahta gâ é, Ugyap joq é Jowò gâ é jang má htoq jé e ri. ¹⁸ Yhangmoq gi, haú má, Yesuq lé tapzîng htoq má jén tap pyám akô; Yhang eq rahá, gotú í yuq lé le, rahkyam shut rayuq kut jén to kô é nghut luí, Yesuq gi, gyoro má nghut ri.

¹⁹ Pilat le, masat laiká kâ yù luí, haú tapzîng htoq má tap tô ri. Haú má gi, "YUDAQ BYU PÊ É HKOHKÂM, NAZARET WÀ BYÙ YESUQ" gâ tô ri.

²⁰ Yesuq lé jén tô é jowò gi, myuq eq chyâng lhùm é htoq agó, haú masat laiká gi, Hebre dông le, Latin dông le, Grik dông le, kâ tô é yanmai, haú Yudaq byu pé myo myo gi, masat laiká haú lé nghap bum akô nghut ri.

²¹ Haú Yudaq byu pé é hkyangjong agyi pé gi, Pilat lé, "'Yudaq byu pé é hkohkâm' nghû hkáká, 'Ngò gi, Yudaq byu pé é hkohkâm nghut lhê ga, Yhang taí ri.' nghû luí sheq ká aq." ga taí akô.

²² Haú hkûn, Pilat gi, "Ngò kâ é dông, ngò kâ to bê nghut lhê." ga tû taí ri.

²³ Haú gyezô pé gi, Yesuq lé tapzîng má jén tap pyâm é htâng má, Yhâng é mebu pé lé yù mù, myí hkyam gàm luí, rayuq rahkyam yu akô; haú ahte bu lé le, gàm râ dâ akô; nghut kôlhang, haú gi, hkyupshi a bo e za, awang mai ahyo hpyot kut woq tô é nghut ri.

²⁴ Haú mù, yhangmoq gi, "Bu shí lé gi, a lêng cheq e za, ó yuq myang yù ang râ laq, hkyîn shosé she wú shâng." ga, rayuq eq rayuq taí lhum akô.

Haú gi,
 "Yhangmoq, Ngá é mebu lé chôm gam yù kó râ; Ngá é ahtê bú é matú, hkyîn shosé shê kó râ nghut lhê."[☆]

gâ é Chyúmdang lé lhoq dik râ matú dut é nghut lhê. Haú mù, gyezô pé gi, haú su kut bekô nghut ri.

²⁵ Haú Yesuq é tapzîng nàm má gi, Yhângnu, Yhângnú é yhanggu byizo eq, Klopa é yhangmyí Mariq eq Magadalaq wà má é Mariq pé, yap tô bum akô. ²⁶ Yesuq gi, Yhang nàm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, "Ánu ê* nung zo lé wú aq." ga taí mù, ²⁷ chángzo haú lé le, "Náng nu lé wú aq." ga taí ri. Haú hkûn mai, chángzo haú yuq gi, Yesuq é yhângnu lé, yhâng é yhùm shut shuí ló bê nghut ri.

Yesuq Soqkâng Byit É Hkyô

Mht 27:45-56; Mrk 15:33-41; Luk
23:44-49

²⁸ Hau htâng, Yesuq gi, ahkuí, muzó bàn bê nghut é lé sé luí, haú Chyúmdang lhoq dik râ matú, "Ngò, wuì shit ri." ga taí ri. ²⁹ Haú má, tsibiyiq wing chyín rayambú joq tô ri; haú mù, yhangmoq gi, wuìmaù lé tsibiyiq wing chyín haú má jum yù luí, jâm-yang ahyo má tuí tap mù, Yhâng é nhutwuí jé shoq yhun byí akô nghut ri. ³⁰ Yesuq gi, tsibiyiq wing chyín haú lé shuq yù mù, "Mú bàn bê." ga taí ri. Yhang, haú su ga taí eq yhang, ulhum nghuq ló mù, kâng byit bê nghut ri.

³¹ Htang nyí gi, ahkyak é Bánno buinyì nghut luí, haú nyí gi, Hên Lajang Buinyì nghut ri. Haú mù, Yudaq byu pé gi, Bánno buinyì má, mâng pé lé tapzîng htoq má a joq to nhâng naù kô é yanmai, hkyí pé lé bat hkyuí pyám mù, mâng pé lé yù hkyô pyám nhâng râ matú, Pilat chyáng dúng tôngbán akô. ³² Haú mù luí, gyezô pé gi, lé mù, Yesuq eq jén hui su nhik mâ é, rayuq é hkyí lé hí bat hkyuí pyám mù, rayuq é hkyí lé dum bat hkyuí pyám akô nghut ri. ³³ Nghut kôlhang, yhangmoq gi, Yesuq chyáng jé é hkûn, Yhang shi to lêng bê nghut é lé myàng kômù, Yhâng é hkyí lé a bat hkyui byi kó nghut ri. ³⁴ Nghut kôlhang, gyezo rayuq gi, Yesuq é namcham má lham eq htaú kat byi jáng, radá dâm sui eq wuì yui htoq lo ri.

[☆] 19:24 Hkya-on 22:18 * 19:26 Ánu ê, gâ é lé, Grik dông gi, "myiwe myhí ê" ga bo tô é nghut lhê.

³⁵ Haû lé myàng é sù gi, saksé hkám byî ri; yhang saksé hkâm é hkyô gi, tengmán ri. Haû yhang taî kyô é hkyô gi, têng é lé, yhang sé mù, nungmoq le wó lumjîng kó sháng gaq ga, saksé hkám byî é nghut ri. ³⁶ Haû hkyô pé dut é gi, "Yhang é showui rahkat lháng a lhoq hkyui râ nghut lhê."* gâ é Chyúmdang haû lhoq dik râ matú nghut lhê. ³⁷ Chyúmdang gotû ralhum má le, "Yhangmoq èq htau htông é sù lé, yhangmoq tu wú kó râ nghut lhê."* gâ é bo tô ashî nghut ri.

Yesuq Lé, Myhup Yhum É Hkyô
Mht 27:57-61; Mrk 15:42-47; Luk 23:50-56

³⁸ Hau htâng, Yesuq é chángzo dut nyi é Aramahti myuq byû Yosep gi, haû Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat èq ahkáng byî kat jáng, yhang gi, gungsôm haû lé, lé yu ló bê nghut ri. ³⁹ Yhang gi, hí hkûn, myín lé, Yesuq lé é huí é sù, Nikodema eq rahá lé é nghut ri; Nikodema gi, mura eq achyo nyhò tô é namngón jung sum xê joí kô yu lé ri. ⁴⁰ Yhangnhik gi, Yesuq é gungsôm lé yù mù, Yudaq byu pé é mâng yhum htûng eq rajung za, namngón jung eq rahá, pán yúng èq htup yup to byî akô. ⁴¹ Haû Yesuq lé tapzîng má jén sat pyâm é jowò nàm má, hkyâm ralhum joq ri; ó yuq lé le a lheq wú shî é, lup sik ralhum hkyâm hkaû má joq tô ri. ⁴² Haû nyí gi, Yudaq byu pé é Hên Lajang Buinyì nghut é yanmai le, lup haû le chyâng é yanmai le, yhangnhik gi, Yesuq lé, haû má ê lheq tô akô nghut ri.

20

Lup Akôm
Mht 28:1-10; Mrk 16:1-8; Luk 24:1-12

¹ Bánno buinyì htâng, napsûn noq le mau a bó shimá, Magadalaq wà mâ é Mariq gi, haû lup má ê jé le, lup hkum mâ é luqlong huí hpyuq to lánq é lé myang ri. ² Haû mù, yhang

gi, Simun Petruq eq Yesuq chyitdap é chángzo góyuq chyáng din jé ló mù, "Haû Yhumsîng lé, lup mai yu htoq ló byuq bekô; hkâmá é kat to kô é lé, ngamoq a sé." ga taî ri.

³ Haû mù, Petruq eq chángzo haû gi, lup shut e ló akô. ⁴ Yhangnhik í yuq é din akô; nghut kôlhang, chángzo haû gi, Petruq htoq má wó din luí, lup má hí din jé e ri. ⁵ Haû mù, yhang gi, ahkaû shut ngóm wú kat é hkûn, haû pán yúng htui leq tô é lé myang ri; nghut kôlhang, yhang gi, a wang é nghut ri. ⁶ Hau htâng, Simun Petruq gi, châng jé luí, lup hkaû shut wang e ri; haû hkûn, yhang gi, haû má pán yúng htui joq tô é lé le, ⁷ haû Yesuq é ulhum má htup é panchoq lé le, myang ri. Panchoq haû gi, pán yúng htui eq rahá a nghut e za htui jup leq tô ri. ⁸ Haû lup má hí jé é chángzo le, ahkaû má wang é luí, myàng jáng, lumjîng bê nghut ri. ⁹ (Yesuq gi, shi é mai dum dui toq lô râ nghut lhê ga bo tô é Chyúmdang lé, yhangnhik gi, a sê gyo shi kó nghut ri.) ¹⁰ Hau htâng, haû chángzô nhik gi, yhûm taû ló bekô nghut ri.

Magadalaq Wà Mâ É Mariq Lé, Yesuq Htoq Shit É Hkyô
Mrk 16:9-11

¹¹ Nghut kôlhang, Mariq gi, lup shinggan má ngau yap tô ri. Yhang gi, ngàu uchyang lup hkaû má ngóm wú kat ri. ¹² Haû hkûn, yhang gi, Yesuq é gungsôm lheq tô é jang má, hpyu é mebu wut é maumang lagyo í yuq hkyî htâng shut rayuq, umhtúng shut rayuq, zung to kô é lé, myang ri.

¹³ Yhangnhik gi, "Myiwe myhí ê, nàng, haî mù ngau nyi lhê lhú?" ga myi kôjáng, yhang gi, "Ngá é Yhumsîng lé yù ló hpyuq kôluí, Yhang lé hkâmá ló lheq to kô é lé, ngò a sê é yanmai nghut lhê." ga tú taî ri. ¹⁴ Haû su ga luí, yhang, lhing wú kat é hkûn, Yesuq yap tô é lé myàng kôlhang, Yesuq nghut é lé yhang a wú sé nghut ri.

15 Yesuq gi, "Myiwe myhí ê, nàng, haí mù ngau nyi lê lhú? Nàng gi, ó yuq lé ho wún lê lhú?" ga myí jáng, yhang gi, hkyâm saí zo sù su ngam pyám mù, "Sarà ê, nàng, Yhang lé waq htot pyâm é nghut le gi, hkâmá ê lheq tô é, ngo lé taí kyo laq, ngò, Yhang lé yu ló rà." ga taí ri.

16 Haú hkûn, Yesuq gi, yhang lé, "Mariq ê" ga wut kat ri.

Mariq gi, Yhâng shut lhîng mù, Hebre myíng dông, "Raboni!" ga wut kat ri. (Haú gi, "Sarà ê" gâ é lichyúm nghut ri.)

17 Yesuq gi, "Ngo lé hkâzáng shi; hkâsu mù gâ le, Ngò gi, haú Îwâ chyáng a taú doq ló shí é nghut lê. Nàng gi, Ngá é gumang wui chyáng ló mù, yhangmoq lé, 'Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lê.' gâ ri nghú, ló taí kyo aq." ga, yhang lé taí kat ri.

18 Magadalaq wà mâ é Mariq gi, chángzô pé chyáng ló mù, "Yhumsîng lé, ngò myàng bê!" ga taí luí, yhang lé shit kat é pé lé, taí kyô ri.

Yesuq, Yhâng É Chángzô Pé Lé Htoq Shit É Hkyô

Mht 28:16-20; Mrk 16:14-18; Luk 24:36-49

19 Haú nyí, Bánno buinyi htang myìn lé, haú chángzô pé gi, Yudaq byu pé lé gyuq kô é yanmai, hkum tsing myhí pyám mù, zîng tô bum kô é u lé, Yesuq gi, lé jé mù, yhangmoq é agùng má yap to luí, "Nungmoq ngu-ingón yuqyo nyi sháng gaq!" ga taí ri. 20 Yhang gi, haú su ga taí é htâng má, yhangmoq lé, Yhâng é loq pé eq namcham lé tûn shit ri. Chángzô pé gi, haú Yhumsîng lé myàng kôjáng, gyai gabú bùm bekô nghut ri.

21 Yesuq gi, "Nungmoq ngu-ingón yuqyo nyi sháng gaq! Haú Îwa gi, Ngo lé nhang kat é su, Ngò gi, ahkuí, nungmoq lé nhang kat é nghut lê." ga dum taí ri. 22 Haú su ga taí mù, Yhang gi, yhangmoq é ahtoq má soq mut luí, "Haú Chyoiyúng Woi-nyí lé hap

yù keq. 23 Ó yuq é mara pé lé nghut kôle, nungmoq hkyut byí é nghut jáng, mara haú pé gi, hkyut pyám byí é hui râ nghut lê; nungmoq a hkyut byí é nghut jáng, mara haú pé gi, hkyut pyám é hui râ a nghut." ga taí ri.

Htomaq Lé, Yesuq Htoq Shit É Hkyô

24 Haú chángzô raxe í yuq má bo é, Zozûm le gâ é Htomaq gi, Yesuq lé jé é hkûn, haú chángzô pé eq rahá a nyi to nghut ri. 25 Haú mù luí, gotû chángzô pé gi, yhang lé, "Haú Yhumsîng lé, ngamoq myàng bê." ga taí kyô akô.

Nghut kôlhang, yhang gi, yhangmoq lé, "Ngò gi, Yhâng é loq pé mâ é shamtoq zuhkô lé myàng mù, ngá é loqnyhuí èq joí wú é eq, Yhâng é namcham má, ngá é loq èq myang lap wú é za a nghut jáng, haú lé ngò lumjîng rá a nghut." ga taí ri.

26 Rabat myáng jáng, chángzô pé gi, haú yhúmhkaú má dum nyi tô akô; Htomaq le, yhangmoq eq rahá nghut nyi ri. Haú hkum pé myhí to kôlhang, Yesuq gi, lé jé mù, yhangmoq é agùng má yap to luí, "Nungmoq ngu-ingón yuqyo nyi sháng gaq!" ga taí ri. 27 Hau htâng, Yhang gi, Htomaq lé, "Náng é loqnyhui, shí má lé joí mù, Ngá é loq pé lé wú aq. Náng é loq lhâm kat mù, Ngá é namcham má lé lap wú aq. A lùm hkâkut, lumjîng nyi aq." ga taí ri.

28 Haú hkûn, Htomaq gi, "Ngá é Yhumsîng, ngá é Garai Gasang ê!" ga Yhang lé taí ri.

29 Yesuq gi, yhang lé, "Nàng gi, Ngo lé myang é yanmai, lumjîng é a nghut lhú? A myàng kôlhang, lumjîng é bang gi, hkungsô wó nyi ri." ga taí ri.

30 Laiká buk shí má a kê tô é limik kumlhá pé gotû myo myo lé le, Yesuq gi, Yhâng é chángzô pé hí má kut shit bê nghut ri. 31 Nghut kôlhang, Yesuq gi, Garai Gasâng é Yhangzo Hkrisduq nghut é lé, nungmoq wó lumjîng rá matú eq, lumjîng é yanmai, nungmoq Yhâng é myìng má asak wó kó rá matú, shí hkyô pé lé kê tô é nghut lê.

21

Ngozo Wó Chyup Yu É Limik Kumhá

¹ Hau htâng má, Yesuq gi, Tiberi nhông yàm má, Yhâng é chángzô pé lé dum htoq shit ri. Yhang htoq shit é hkyô gi, a-ô mâ é đông nghut ri. ² Simun Petruq, Zozûm le gâ é Htomaq, Galile mau Hkanaq wà mó mâ é Nahtanelaq, Zebedi é yhangzo nhik eq gotú chángzo í yuq pé gi, rahá nyì to bum akô. ³ Haú hkûn, Simun Petruq gi, yhangmoq lé, "Ngò gi, ngozo kóng é râ." ga taí jáng, yhangmoq gi, "Ngamoq le châng lé râ." ga taí akô. Haú mù luí, yhangmoq gi, htoq ê mù, haú lhai má wàng bekô nghut ri; nghut kôhang, haú myîn, radu lhang a wó kóng kó nghut ri.

⁴ Htang napkyó maubó lo é hkûn, Yesuq gi, wuiyàm má yap tô ri; nghut kôhang, haú chángzô pé gi, Yesuq nghut é lé a wú sé kó nghut ri.

⁵ Yesuq gi, yhangmoq lé, "Luzúm wui é, nungmoq, ngozo wó akô lhu?" ga, wut myi kat jáng, yhangmoq gi, "A wó." ga tû taí akô.

⁶ Haú hkûn, Yhang gi, "Nungmoq é gùn lé, haú lhai é loqyo hkyam shut dú hkyô kat keq; haú jáng, nungmoq wó kông yù kó râ nghut lhé." ga taí ri. Haú mù, yhangmoq gi, gùn dú hkyô kat é hkûn, ngozo lûm myô é yanmai, haú gùn lé lhang a wó lhang yù lo kó nghut ri.

⁷ Haú mù luí, haú Yesuq chyitdap é chángzo gi, Petruq lé, "Yhumsing ru nghut ri." ga taí ri. Simun Petruq gi, "Yhumsing ru nghut ri." gâ é lé wó gyo eq yhang, yhang gi, mebu hkyut pyâm tô é yanmai, buhíng mó lé, yhâng é gùng má baíyup yù mù, wui hkaú má byam wang ló bê nghut ri. ⁸ Haú chángzo góbang gi, wuiyàm eq ngo xê làm kô za wê é yanmai, ngozo byíng tô é gùn lé, wuiyàm shut lhai mai she jé lo akô nghut ri. ⁹ Yhangmoq gi, wuiyàm má jé dap ló kô é hkûn, myigye gyúng é myihkyóm htoq má ngozo nyhîn tô é lé le, muk ratsuí joq tô é lé le, myang akô.

¹⁰ Yesuq gi, yhangmoq lé, "Haú, ahkuí za nungmoq wó kông yu é ngozo, ra-am yù lé keq." ga taí ri.

¹¹ Haú mù, Simun Petruq gi, lhai má doq ji luí, kô é ngozo rasho ngó xe sùm du yhang bo é gùn lé, dùng yàm má she htoq tô ri. Ngozo haú myhó myo kôhang, gùn gi, a jeq nghut ri. ¹² Yesuq gi, yhangmoq lé, "Napzang lé zo keq." ga taí ri. Chángzô pé gi, Yhang, haú Yhumsing nghut é lé sé kô é yanmai, ó yuq lhang, "Nàng, ó yuq nghut lhé?" ga, a wám myi kó nghut ri. ¹³ Yesuq gi, lé mù, muk lé é yù luí, yhangmoq lé byi ri; ngozo lé le, haú su kut ri. ¹⁴ Yesuq gi, shi é mai lhoq dui toq yù huí é htâng, Yhâng é chángzô pé lé htoq shit é má, shi gi, sum dâm nghû râ dâm nghut ri.

Yesuq Eq Petruq

¹⁵ Yhangmoq bàn zô bùm kô é htâng má, Yesuq gi, Simun Petruq lé, "Yohan é yhangzo Simun ê, nàng gi, shí bang htoq má, Ngo lé teng za je chyitdap lhé lhu?" ga myi jáng, yhang gi, "Nghut lhé; Yhumsing ê, ngò, Nàng lé chyitdap é hkyô lé, Nàng sê lhé." ga tû taí ri. Haú hkûn, Yesuq gi, "Ngá é sau zô pé lé, baú aq." ga, yhang lé taí ri.

¹⁶ Hau htâng, Yesuq gi, "Yohan é yhangzo Simun ê, nàng gi, Ngo lé teng za chyitdap lhé lhu?" ga dum myi jáng, yhang gi, "Nghut lhé; Yhumsing ê, ngò, Nàng lé chyitdap é hkyô lé, Nàng sê lhé." ga tû taí ri. Haú hkûn, Yesuq gi, "Ngá é sau pé lé, rém aq." ga taí ri.

¹⁷ Dum radàm, Yesuq gi, yhang lé, "Yohan é yhangzo Simun ê, nàng gi, Ngo lé chyit lhé lhu?" ga myi ri.

Haú hkûn, Petruq gi, "Nàng gi, ngo lé chyitdap lhé lhu?" ga, yhang lé Yesuq eq sùm dam dâm taí é yanmai, yhâng myit nò luí, "Yhumsing ê, Nàng gi, lhunglhang lé sê lhé; ngò, Nàng lé chyitdap é hkyô lé, Nàng sê lhé." ga taí ri.

Haú hkûn, Yesuq gi, "Ngá é sau pé lé, baú aq. ¹⁸ Ngò, nàng lé teng za taí lé, nàng, zorâm nghut é hkûn gi, yhumsing gùng yhumsing hpyihit

baíyup* yù mù, ê nau é jowò hkangmó má wó é é nghut lhê; nghut kôlhang, nàng mang jáng gi, loq í loq lham lui, nang lé góyuq eq hpyihit baíyup byi mù, nàng a é nau é jowò shut shuí é râ nghut lhê." ga taí ri. ¹⁹ (Yesuq haú su ga taí é gi, haú Petruq, hkâsu kut shi é dông mai, Garai Gasâng é hpungwup shingkang lé dan hu nhâng râ nghut é lé, taí nau é nghut ri.) Hau htâng, Yesuq gi, yhang lé, "Ngá htâng cháng aq." ga taí ri.

²⁰ Haú hkûn, Petruq gi, lhîng wú kat le, haú Yesuq chyitdap é chángzo, yhangmoq htâng châng wún é lé myàng ri. Chángzo haú gi, hí hkûn, myinzang zô é u lé, Yesuq chyáng leq ngè mù, "Yhumsîng ê, Nang lé ap pyám râ sù gi, ó yuq lhú?" ga, myi wú é sù nghut ri. ²¹ Petruq gi, haú yuq lé myàng jáng, Yesuq lé, "Yhumsîng ê, shí yuq gi, hkâsu dut râ lhú?" ga myí ri.

²² Yesuq gi, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lhê lhú? Nàng gi, Ngá htâng cháng aq." ga tû taí ri. ²³ Dang hau é yanmai, chángzo haú yuq a shí râ nghut lhê gâ é danglám gi, haú gumang wui chyáng byo myín to bê nghut ri. Nghut kôlhang, Yesuq gi, haú yuq a shí râ hkyô lé taí é a nghut, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lhê lhú?" ga, taí é ru nghut lhê.

²⁴ Shí pé lé saksé hkám mù, shí pé lé kê tô é sù gi, chángzo haú yuq nghut lhê. Yhâng é saksé gi, têng é lé, ng-amoq sê lhê.

²⁵ Yesuq gi, gotû muzó myo myo le kut ashî nghut ri. Muzó haú pé lhum jup lé, kê htoq yu é ru nghut le gi, kê tô é laiká buk haú pé gi, mingkan gón má lháng ngo râ a nghut nghú, ngò wó myit ri.

* **21:18** Hpyihit baíyup gâ é lichyúm gi, mebu wut lui ri ri kut tô é lé gâ lhê.

LAGYO Laiká (Acts)

Yesuq, Mauhkûng Má Shuí Yù Huí É Hkyô

¹ Htohpiluoq ê, Yesuq yhang hkyin yu tô é lagyo pé lé, Chyoiyúng Woi-nyí wum-o eq dang ban pying tô é htâng má, Garai Gasang yhang lé mauhkûng shut shuí yu é buinyi jé shoq, ² Yhang kut shit é hkyô pé eq, mhoqshit é hkyô pé banshoq lé, hí lhé é laiká buk má ngò kê kat bê nghut lhé. ³ Yesuq gi, shí hkâm é htâng má, Yhang dui toq bê hkyô lé, lumjínq é saksé myo myô eq yhangmoq lé tûn shit mù, buinyi myi xê nyí gyoro má yhangmoq chyáng lé htoq shit shit kut luí, Garai Gasang é mingdán hkyô lé hko kyô ri. ⁴ Yhang, yhangmoq eq rahá zup tô é hkûn, hkunmó hkyô é gi, "Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ é danggidiq byi tô é chyunghuq lé láng nyi keq. ⁵ Hkâsu mù gâ le, Yohan gi, wui eq wui-myhup hkâm byi é nghut lhé; nghut kôlhang, nungmoq kúm gi, buinyi hkâ-myháng a myáng má, Chyoiyúng Woi-nyí mai bapisma wó hkam yù kó râ nghut lhé." gâ ri.

⁶ Lagyo pé gi, Yhang eq rahá chôm zup míng tô é hkûn, Yhang lé, "Yhumsing ê, nang, haú Israelaq byu pé lé mingdán dum xuq byi râ gi, ahkuí yhang nghut bê lhú?" ga myi akô.

⁷ Yesuq gi, "Áwa gi, Yhâng é ahkáng ayá eq kut to bê é ahkyíng yam-yoq pé lé, nungmoq sé nó a ra. ⁸ Nghut kôlhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yú mù luí, Yerusalem wà mó eq Yuda mau ban-shoq, Samariq mau eq maumyí htáng

shoq, ngá é saksé pé dut kó râ nghut lhé." ga luí, yhangmoq lé taí ri.

⁹ Dang haú ban taí é htâng má, yhangmoq wú nyi le, Yhang gi, mauhkûng shut shuí yu é hui mù, yhangmoq hí mai Yhang lé a myàng loshoq, mhut eq htup ló byuq bê nghut ri.

¹⁰ Yesuq doq ló nyi é u lé, yhangmoq mauhkûng shut ru wú tsuq nyi bum ashí le, hpyu é mebu wut é byú í yuq gi, radá dâm yhangmoq nâm má htoq yap lò mù, ¹¹ "Galile byu pé ê, haí mù luí mauhkûng shut wú tsuq nyi akô lhú? Nungmoq é hí mai mauhkûng shut shuí yù huí é, haú Yesuq mauhkûng shut doq ló é u lé, nungmoq myang kat é su, Yhang dum jé lé râ nghut lhé." ga taí akô.

Yudaq É Jowò Má, Mahtiaq Lé Hkyin Kat É Hkyô

¹² Hau htâng má, yhangmoq gi, Tsanlun Bùm mai, Yerusalem wà mó shut taú ló bekô.* Haú gyoro gi, Bánno buinyi má ge sô é í za wê ri. ¹³ Yhangmoq jé ló kôjáng, yhangmoq nyi nyi kô é yhúm ahtoq pyâm mâ é wap shut doq ló akô; haú bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô. ¹⁴ Yhangmoq lhunglhâng bang gi, myiwe wui le, Yesuq é yhângnu Mariq le, yhanggu pé le kut mù, i-myit rahkat za kyú chôm dung dung kut nyi akô.

¹⁵ Buinyi haú yoq má, Petruq gi, lumjínq é gumang gu-nhá† wui rasho í xê yuq kô zup zing tô é gung gung má, toq yap mù, ¹⁶ "Gumang gu-nhá wui ê, Yesuq lé chyup é bang lé hkyô shuí hí é sù Yudaq eq séng luí, hí hpyang Dawiq é nhut mai Chyoiyúng Woi-nyí taí tô é Chyúmdang gi, dik byuq bê nghut ri. ¹⁷ Yhang gi, nga-nhúng má nghap lhôm é hui mù, hpúng sará ayá

* **1:12** Tsanlun bùm eq Yerusalem gyoro gi, déng rawuí hkup kô we ri. † **1:15** Gumang gu-nhá gâ é lé, Grik má gi, gumang za gâ to lhé.

wó bê sù nghut kôlhang shí hkyô dut bê nghut ri." ga taî ri.

¹⁸ (Yudaq gi, yhang kut é agè ashop é muzó mai wó é ahpau èq myigùng ratóng wui yu é htâng, haú má yhang, a-nghop dông byit gyó mù wam buq goq luí, û banshoq buq myín byuq bê nghut ri. ¹⁹ Haú hkyô lé Yerusalem wà mó má nyi é lhunglhâng bang wó gyo kôjáng, myigùng haú lé yhangmoq é myíng dông, 'Akeladama' ga myhíng akô; haú gi, 'Sui myigùng', gâ é nghut ri.)

²⁰ Petruq xoq taî é gi, "Hkâsu mù gâ le, Hkya-on Kungtôn Laiká má,

'Yhâng é jowò chamchyuiyui dut byuq sháng gaq; haú má ó le a nyi kó sháng gaq.'[✧]
ga luí le, dum

'Yhang wó é ayá lé byù góyuq wó yu pyám byi sháng gaq.'[✧]
ga luí le, bo tô ri. ²¹⁻²² Haú mù luí, Yohan baptisma byi hi é hkûn mai, Yesuq lé nga-nhung chyáng mai shuí yu é buinyi jé shoq, Yhumsíng Yesuq nga-nhung eq rahá htoq htoq wàng wàng kut nyi é buinyi banshoq pé má, nga-nhung eq yhang zum nyi sù rayuq lé, hkyin kat râ dut ri. Haú yuq gi, Yesuq dum dui toq é hkyô lé nga-nhung eq rahá saksé dut râ sù nghut lhê." gâ ri.

²³ Haú hkûn, yhangmoq gi, Yustu ga le myhíng é, Barsabaq gâ é Yosep eq Mahtiaq nhik lé hkyin tô akô. ²⁴⁻²⁵ Haú mù, yhangmoq kyûdung kô é gi, "Byù banshoq é i-myt lé sê é Yhumsíng ê, Yudaq Iskarut gi, yhang ló gíng é jowò shut ló râ ga, tô pyám tô é yhâng é lagyo ayá é matú shí nhik má é nàng hkyin tô é sù lé tûn shit laq ò." ga akô. ²⁶ Hau htâng, yhangmoq, byù hkyin shosé she le, Mahtiaq chyáng ang bê. Haú mai, Mahtiaq lé gi, haú lagyo raxe rayuq má jat kat bê nghut ri.

✧ 1:20 Hkya-on 69:25 ✧ 1:20 Hkya-on 109:8 ngo xê nyi jé é buinyi má, kut é poi lé gâ lhê.

2

Chyoiyúng Woi-nyí Jé Gyó Lo É Hkyô

¹ Penteko-ti* buinyi jé jáng, lumjíng bang banshoq gi, jowò ralhú má za, chôm zup míng nyi tô akô. ² Haú hkûn, laidun mó lo é su gâ é htê gi, byodàn ratung, mauhkûng mai mying htoq lô mù luí, yhangmoq zing tô é yhúm byíng shoq dut to bê nghut ri. ³ Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri. ⁴ Yhangmoq lhunglhâng bang gi, Chyoiyúng Woi-nyí byíng lo bùm kômù, Woi-nyí èq taî nhang é eq rajung za, laklai dang dông nyo lo bum akô.

⁵ Haú u lé, mauhkûng ô má joq é mingdán hkangmó mâ é, tarâ hkunggâ é Yudaq byu pé gi, Yerusalem wà mó má bíng nyi bum akô. ⁶ Haú mying é htê lé wó gyo kôjáng, byù rajùm rayò zíng lé lô kômù, ó le ô é myíng dông sê gyô yù kô é yanmai, maú úng-âng byuq bùm kôluí, ⁷ maú bùm uchyang taí kô é gi, "Wú keq, ahkuí dang taî nyi é byù shí bang lhunglháng gi, Galile byu pé chyat a nghut kó lú? ⁸ Haú nghut é wa, hkâsu mù nga-nhung ó le ô é yhumsing mau má é myíng dông sê gyô yu lhê lú? ⁹ Parhti, Medi, Elam mau má é bang eq Mesopotamiaq mau, Yuda eq Kapadokia mau, Pontuq eq Asia, ¹⁰ Hprugi eq Pamhpuli, Egotuq ming má nyi é bang eq Kuruni myuq nâm má nyi é Libya ming má é bang, Romaq myuq mai lé bíng nyi é Yudaq byu pé eq Yudaq noqkuq htung má lhing wang lò bang, ¹¹ Kreti zinlóng eq Arabiq mau má é bang, nga-nhung gi, yhangmoq hko kyô é Garai Gasâng é mauhpo muzó hkyô lé, yhumsing mau má é myíng dông yhang wó sê gyô yu ri-nhung." gâ ri. ¹² Yhangmoq banshoq bang gi, maú úng-âng byuq kômù, "Shí gi, haí wá nghut lhê lú?"

* 2:1 Penteko-ti gâ é gi, Lhoqlhai Poi lai é htâng

ga le, rayuq eq rayuq myî lhûm bum akô.

¹³ Nghut kôlhang, byù ra-am gi, "Shí bang gi, î shuq wut é bang nghut akô." ga luí, taí jihpoi bum akô nghut ri.

Petruq Hko Kyô É Mungdang

¹⁴ Haú hkûn, Petruq gi, lagyo góbang raxe rayuq eq toq yap mù, htê mó eq byù haú bang lé taí é gi, "Yudaq byu pé eq Yerusalem wà mó má nyi nyi é lhunglhang bang ê, rago gyô wú keq! Ngò, nungmoq lé, shí hkyô taí kyo kôlé. ¹⁵ Shí bang gi, nungmoq sùngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng za ru nghut ashí. ¹⁶ Shí hkyô kúm gi, myiqhtoi Yoelaq taí tô é eq rajung za dut é nghut ri. ¹⁷ Yhang taí tô é gi,

'Garai Gasang îsu gâ ri: Ló htâng é buinyi pé má, Ngò Ngá é Woinyí lé byù lhunglhang bâng é ahtoq má hut gyun râ nghut lhê.

Haú mù, nungmoq é yuqzo byizô pé gi, myiqhtoi htoi kó râ; nungmoq é zorâm wui gi, myoqwup shing-rán myàng kó râ; nungmoq é hpaû mâng pé gi, yhupmoq myàng kó râ nghut lhê.

¹⁸ Buinyi haú pé má, Ngá é dui-nhâng zoshâng hpô pé eq dui-nhâng zoshâng myhí pé é ahtoq má lhang, Ngò Ngá é Woinyí lé hut gyun mù luí, yhangmoq gi, myiqhtoi htoi kó râ nghut lhê.

¹⁹ Ngò gi, ahtoq mauhkûng htoq má mauhpo muzó pé lé, a-ô myigùng htoq má, kumlhá pé lé, sui eq, myi eq, myihkau dùm pé eq kut mù tân shit rá.

²⁰ Haú Yhumsing é kô hkikhkam é buinyi a jé shimá, bui gi, mauchut byuq, lhamó gi, sui dut byuq é hí dut râ nghut lhê.

²¹ Haú hkûn, Yhumsing é myìng lé lhang é bang yuq hkangmó gi, hkyi yu é hui kó râ nghut lhê. ✧

gâ ri.

✧ 2:21 Yol 2:28-32 ✧ 2:28 Hkya-on 16:8-11

²² Israelaq byu pé ê, dang shí lé gyô yù keq, nungmoq sê é eq rajung za, Nazaret wà byù Yesuq nungmoq é hí má tân shit é, laklaí kumlhá, mauhpo muzó eq kumlhá pé gi, Yhang lé Garai Gasang nhang kat é saksé dut bê nghut ri. ²³ Shí yuq gi, Garai Gasang myit hpyit tô é hkyô eq, hí te sê é hpaqchyî dông, nungmoq chyáng ap pyâm é hui mù, nungmoq gi, agè ashop byu pé é loq eq, Yhang lé tapzìng htoq má jén sat pyám nhâng bekô nghut ri. ²⁴ Nghut kôlhang, haú shí-nò hkyô gi, Yhang lé wó hkûm zing jung a nghut é yanmai, Garai Gasang gi, Yhang lé shí-nò jamjau mó mai, lhut pyám byi luí lhoq dui toq yù bê nghut ri. ²⁵ Dawiq gi, shí yuq eq séng luí taí é má,

'Haú Yhumsing gi, ngá é myoq hí má hkâ-nhám le nyi nyi é lé ngò myàng bê.

Yhang ngá é loqyo hkyam má nyi nyi é yanmai, ngo lé wó lhoq nhún râ a nghut lo.

²⁶ Haú mù, ngá i-myt gi, nguìngón nyi luí, ngá nhut shô gabú hkya-ôn nyi ri;

ngá é gungdu le myit myoqbyù jowò má nyi nyi rá nghut lhê.

²⁷ Hkâsu mù gâ le, nàng, ngá é woi-nyí lé mosumhkung má tô pyâm to rá a nghut.

Nàng, náng é Choyiýung Sù lé bup byuq é hui nhâng râ a nghut.

²⁸ Nàng, ngo lé asak dui é hkyô sé nhâng bê.

Náng é myoq hí má, nàng, ngo lé gabú hkyô lhoq pyíng byi rá nghut lhê. ✧

gâ ri.

²⁹ Gumang wui ê, nga-nhûng é îchyí îké Dawiq kâng byit mù, myhup pyám hui bê hkyô lé le, yhang é lup gi, hkûnyí jé shoq nga-nhûng chyáng joq tô é lé le, ngò, nungmoq lé a gyuq a kyum wám taí lhê. ³⁰ Dawiq gi, myiqhtoi rayuq nghut é yanmai, yhang é awut ashín má é rayuq lé, yhang é hkohkâm tanghkuq má zùng nhâng râ ga Garai

Gasang byi tô é danggidiq lé sê to mù, ³¹ 'Hkrisduq† gi, mosumhkung má pyâm to a hui rá eq, Yhâng é gungsho a bup byuq é za, dum dui toq ló rá nghut lhê.', gâ é hkyô lé te sê to luí taí tô ri. ³² Garai Gasang gi, haú Yesuq lé lhoq dui toq yù bê. Ngamoq banshoq bang gi, haú hkyo é saksê pé nghut nyi ri. ³³ Haú mù, Garai Gasang gi, Yesuq lé Yhâng é loqyo hkyam má lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkam yù mù, hut hkyô kat bê nghut é yanmai, ahkuí nungmoq shí su wó myâng, wó gyo bekô nghut ri. ³⁴⁻³⁵ Hkâsu mù gâ le, Dawiq gi, mauhkûng htoq tsáng myhâng má a doq ló wú kôlhang, yhang gi, 'Haú Yhumsîng Garai gi, ngá é Yhumsîng lé, "Ngò, náng é gye pé lé, náng é hkyí nang tanghkuq kut pyám byí é hkyíng jé shoq, Ngá é loqyo hkyam shut zung nyi shi aq." gâ ri.'*

³⁶ Hau é yanmai, Garai Gasang gi, nungmoq eq tapzîng má jén sat pyâm é haú Yesuq lé, Yhumsîng eq Hkrisduq dut nhang é hkyô, Israelaq byu pé lhunglhâng bang hkyak sê nyi kó sháng gaq ô." gâ ri.

Sâng-hi Lumjîng É Bang

³⁷ Yhangmoq gi, haú lé wó gyô bùm kôjáng, yhangmoq é i-myt má záng kô é nghut mù luí, "Gumang wuî é, ngamoq hkâsu kut lo rá lhú?" ga luí, Petruq eq lagyo góbang lé myí akô.

³⁸ Petruq gi, "Nungmoq yuq hkanmó myit lhîng mù, Yesuq Hkrisduq é myîng mai wui-myhup hkâm yù keq; Haú jáng, nungmoq é yubak hkyut pyám byí é hui kó rá nghut lhê. Haú hkûn, Chyoiyúng Woi-nyí gâ é chyunghuq lé, nungmoq wó yú kó rá nghut lhê. ³⁹ Hkâsu mù gâ le, danggidiq haú gi, nga-nhûng

é Yhumsîng Garai Gasang ji yù rá bang banshoq nghut é, nungmoq eq nungmoq é yhangzo yhangshû pé eq le, mau we má nyi é lhunglhâng bang eq le, sêng lhê." ga luí, yhangmoq lé taí kyô ri.

⁴⁰ Yhang gi, dang gotû myo myô èq le saksê hkâm mù, "Shî agè ashop é amyû mai wó lut htoq lo keq ô!" ga luí, yhangmoq lé lhoq pun lhoq kyîng ri. ⁴¹ Dang haú lé guq yu é bang gi, wui-myhup hkâm yu bùm kôluí, haú nyí má byù sum hkyîng kô jat wàng lo bum bekô nghut ri.

Lumjîng Bang Zùm Yap É Hkyô

⁴² Haú bang gi, lagyo pé mhooqshit é hkyô, zùm yap é hkyô, muk hpê gam é hkyô† eq akyû dîng é hkyô má, i-myt rahkat za chôm châng nyi akô. ⁴³ Lagyo pé kut shit é mauhpo muzó eq limik kumlhá pé myo myô é yanmai, lhunglhâng bang gi, gyuq maú nyi bum akô nghut ri. ⁴⁴ Lumjîng é lhunglhâng bang gi, rawò má za zup zîng to mù, azîng zè banshoq lé chôm chung nyi akô. ⁴⁵ Yhangmoq gi, yhumsîng é sutzè pé lé, ûng pyám mù, yuq hkanmó lé, yhang rá tô é eq rajung za gâm byí akô. ⁴⁶ Yhangmoq gi, nyí wuî myit rahkat zâ èq noqkuq yhûm wàng má nyi nyi akô. Yhumsîng é yhûm pé má le muk hpê gam é hkûn, ⁴⁷ Garai Gasang lé hkya-on kungtôn uchyang, gabú é eq myit huí é èq chôm zo chôm shuq nyi bum akô; byù banshoq bâng é hí má le myoq-dong wó bum akô. Haú Yhumsîng gi, nyí wuî yhangmoq chyáng hkyi yù hui bang jat lò nhang ri.

3

Hkyî Hten Sû Rayuq Lé, Petruq Lhoq Gê Byí É Hkyô

¹ Ahkuí, Petruq eq Yohan gi, myinhtâng zó sum hkyîng lhê é kyûdung nám má, noqkuq yhûm shut doq e ló akô. ² Haú hkûn, ínû unghkaú mai

† 2:31 Grik dong Hkrisduq gâ é gi, xû but hui Sû gâ é lichyúm nghut mù, Hebre dong Mesaia gâ é eq rajung za nghut lhê. * 2:34-35 Hkya-on 110:1 † 2:42 Muk hpê gam hkyô gâ é lé lichyúm í dông wó yu lhê - radông gi, rahá chôm zo chôm shuq é lé gâ lhê; radông gi, Poído chôm zô é lé gâ lhê.

hkyî hten lugù dut é byù rayuq lé, noqkuq yhûm má wang lé lô bâng chyáng mai dung zo sháng gaq ga, Yúngl hó hkum ga myhîng é hkúmdong má nyí hkang nyí mó waq lé lô mù, lé nyhi to to kut akô. ³ Yhang gi, Petruq eq Yohan, noqkuq yhûm háu má wang e ló é lé, myàng luí, lhom dúng nyi ri. ⁴ Petruq eq Yohan kúm gi, yhang lé chôm wú tsuq to mù, "Nga-nhik lé tu wú aq." gâ akô. ⁵ Haù mù, yhang, yhangnhik chyáng mai rajung jung wó yû râ lé myit myoqbyù luí, yhangnhik lé rago za saí wú tô ri.

⁶ Petruq kúm gi, "Ngùn, hîng gi, ngò a wó; nghut kôlhang, ngò wó é nang lé byi lé: Nazaret wà byù Yesuq Hkrisduq é myìng mai toq sô ló aq." ga taí uchyang, ⁷ yhâng é loqyo loq má zui mù láng toq kat ri; háu hkún jáng, yhâng é hkyî kochang-chap pé wúm bo lò bê nghut ri. ⁸ Haù mù, yhang gi, radá dâm toq yap mù sô kat luí, so uchyang, byàm uchyang Garai Gasang lé hkyá-on mù, yhangnhik eq rahá noqkuq yhûm má wang ló ri. ⁹ Yhang sô e ló nyi é eq Garai Gasang lé hkyá-on kungton nyi é lé, lhungl háng bang chôm myang akô. ¹⁰ Háu yuq gi, noqkuq yhum é Yúngl hó hkum gâ é hkúmdong má zung to mù, dung zo sù nghut é lé yhangmoq matsîng kô é nghut mù luí, yhâng chyáng dut lò bê hkyo é yanmai, maú hong byuq bum akô nghut ri.

Petruq Hkô Kyô É Mungdang

¹¹ Petruq eq Yohan chyáng háu dung zo sù byìn châng tô é hkún, shiwa byu pé gi, wú maú uchyang, Sholumon jirop shut, yhangmoq chyáng din yán wang lé lo bum akô. ¹² Petruq háu lé myàng jáng, shiwa byu pé lé taí é gi, "Israellaq byu pé ê, shí yuq é hkyô lé haí mù luí maú nyi akô lú? Nga-nhik é dingmán hkyô eq wum-o a-tsâm eq, shí yuq lé wó so nhang é su ngâm luí, ngá-nhik lé wú tsuq bum akô lú? Háu dông a nghut. ¹³ Abraham, Isak eq Yakup pé é Garai Gasang, nga-nhûng é îchyí

îwa pê é Garai Gasang gi, Yhâng é dui-nhâng zoshâng Yesuq lé hpungwup shingkang lhoq htoq byi é nghut ri; nungmoq kúm gi, Yhang lé sat hui shoq ga ap pyám kômù luí, Pilat zau hpó mai Yhang lé nhang pyám râ ga myit to bê lé, nungmoq gi, Yhâng é hí má yhang, Yhang lé he-ngik pyám akô nghut ri. ¹⁴ Haù chyoiyúng dingmán é Sù lé nungmoq he-ngik pyám kômù, byù sat sù lé sheq dúng htoq yû kôluí, ¹⁵ Asak Yhumsîng lé gi, sat pyám bekô. Garai Gasang kúm gi, háu yuq lé shi é mai lhoq dui toq yû bê nghut ri; ngá-nhik gi, háu hkyo é saksé nghut nyi lhê. ¹⁶ Yesuq é myìng lé lumjîng é yanmai, háu lumjîng myit mai za, shí nungmoq myang é sê é sù lé wum-o lhoq pyíng byi bê nghut ri; nghut bê, Yesuq lé lumjîng é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

¹⁷ Ahkuí, gumang wui ê, nungmoq é uphkâng bang kut é su, nungmoq le háu hkyô lé a sé mù kut pyám é hkyô lé ngò sê nyi lhê. ¹⁸ Nghut kôlhang, háu hkyô gi, Garaí é Hkrisduq shî-nò jamjau hui râ nghut lhê ga luí, myiqhtoi banshoq bang lé hí hí mai taí nhang tô é Garai Gasang yhang, lhoq dik é nghut ri. ¹⁹ Hau é yanmai, háu Yhumsîng chyáng mâ é nguìngón é ahkyíng yàm yoq jé lô râ matú le, ²⁰ nungmoq é matú hkyin tô é Hkrisduq nghut é Yesuq lé, Yhang nhang kat byi râ matú le, nungmoq é yubak mara hkyut pyám byi é hui râ matú le, nungmoq gi, myit lhîng mù Garai Gasâng chyáng lhing lò keq. ²¹ Garai Gasang gi, a-nham pyat mai, Yhâng é chyoiyúng myiqhtoi pê é nhut mai, taí nhang to bê eq rajung za, nyi mi-nyì, joq mijoq lé asik dum saí é pyat jé shoq, Yesuq lé mauhkûng htoq má nyi nhang to râ nghut lhê. ²² Hkâsu mù gâ le, Mosheq taí tô é le, 'Haù Yhumsîng Garai Gasang gi, nungmoq é yhanggu yhangmâng pê chyáng mai, nungmoq é matú ngò sù é myiqhtoi rayuq pô htoq lô nhâng râ nghut lhê; háu yuq

taí mitaí nungmoq gyo ra râ nghut lhê. ²³ Myiqhtoi hau é dang lé a gyo sù ó yuq nghut kôlhang, yhumsing é byù myû mai chyung hpyit pyâm é hui râ nghut lhê. ^{*} gâ ri.

²⁴ Gè gè yhang, Samuelaq mai, yhang é htâng má châng pô htoq lo é myiqhtoi pé banshoq bang hko kyô lo é má le, buinyi shí pé eq séng mù taí to bekô nghut ri. ²⁵ Nungmoq gi, hau myiqhtoi pé é dang silí wunlí eq, Garai Gasang mai, Abraham lé, 'Náng é awut ashîn é yanmai, mingkan htoq má é byù myû chângjup hkungsô wó kó râ nghut lhê! ^{*} gâ é eq rajung za, nungmoq é îchyí îwâ pé eq tô tô é danggidiq lé wó hkam yù râ bang nghut akô. ²⁶ Garai Gasang gi, nungmoq yuq hkangmó lé yhumsing agè ashop é hkyô mai wó lhing taú lò nhang é dông, shimân byi râ matú, Yhâng é dui-nhâng zoshâng lé pô htoq lô nhâng luí, nungmoq chyáng hí nhang kat byi bê nghut ri." gâ ri.

4

Petruq Eq Yohan Nhik Chyup Huí É Hkyô

¹ Hkyangjông pé, noqkuq yhûm zúng é suwún hpó eq Saduke pé gi, Petruq eq Yohan shiwa byu pé lé dâng nyo nyi é hkûn, htoq lé lô kômù, ² yhangnhik, shiwa byu pé lé mhoghshít é eq, Yesuq é yanmai shi byuq bê bang Yesuq má dum dui toq lô râ gâ é hkyô lé taí nyi kô é yanmai, yhangmoq gyai yhang myit myô nyi bum akô. ³ Hau mù, yhangmoq gi, yhangnhik lé chyup yú luí, myinhtâng mauchut lô bê nghut é yanmai, htang napkyó jé shoq htóng má lhûng tô akô. ⁴ Nghut kôlhang, mungdang lé wó gyô yu é bang myo myo gi, lumjîng kômù luí, yuqgè ngo hkyîng kô jé shoq myô jat lò bekô nghut ri.

Yudaq Byîn Tú Wapdoq Má, Yhangnhik Lé Myî Jep Wú É Hkyô

^{*} 3:23 Tarâ Pun 18:15, 18-19 ^{*} 3:25 Apûn 22:18; 26:4 ^{*} 4:11 Hkya-on 118:22 * 4:15 Yudaq byîn tú wapdoq lé Grik dông gi, San-hedrin gâ lhê.

⁵ Htang nyí, yhangmoq é zau wuî, suwún wuî eq tarâ sará pé gi, Yerusalem wà mó má chôm huí zup akô. ⁶ Hkyangjong mó Anna, Kayahpaq, Yohan, Alesander pé eq hkyangjong mó é amyû pé banshoq le, hau má bo tô akô. ⁷ Hau mù, yhangmoq gi, Petruq eq Yohan lé gung gûng má nyhi to luí, "Nungnhik gi, hau a-tsam, ó yuq é myîng mai mù shí lé kut akô lhú?" ga myî akô.

⁸ Hau hkûn, Petruq gi, Chyoiyúng Woi-nyí byíng tô é nghut mù luí, yhangmoq lé taí é gi, "Mingbyû wuî é zaugun suwún wuî é, ⁹ hkyî hten sù shí yuq lé lhoq gê byî é jeju yanmai, yhang hkâsu kut lhoq ge yù huí é hkyô lé, hkû-nyí nungmoq ngá-nhik lé myî gôn wú naú kô é nghut le gi, ¹⁰ nungmoq lhunglhâng bang eq Israelaq byu pé banshoq lé sé nhâng kôlé, nungmoq eq tapzîng má jén sat pyám mù, Garai Gasâng eq shi é mai lhoq dui toq yu é, Nazaret wà byù Yesuq Hkrisduq é myîng mai, shí yuq gi, nungmoq é hí má îsu wáng wáng zán zán yap tô é nghut ri.

¹¹ 'Yhûm saí bang nungmoq hkyin htoq pyâm é luqgok gi, htungchyûn má é ahkyak dik é luqgok dut bê. ^{*} gâ é gi, Yesuq lé taí é dông nghut ri. ¹² Hkyi yù hkyô gi, Yhang mai lai luí gotû a nyi lo, hkâsu mù gâ le, nga-nhúng hkyi yu é hui râ matú, mauhkûng a-ô má, Yhâng é myîng mai lai luí, xângzo byu pé lé byî tô é myîng gotû a joq lo é yanmai nghut ri." gâ ri.

¹³ Yhangmoq kúm gi, Petruq eq Yohan nhik a gyuq a kyum taí é lé myàng kôjáng, yhangnhik, jong a doq wú é, mayú byù za nghut é hkyô lé sé to kô é yanmai, maú nyi bum akô; nghut kôlhang, hí hpyang Yesuq eq zum wún wú sù nhik nghut é lé, yhangmoq bûn kat akô nghut ri. ¹⁴ Hau htoq agó, lhoq gê byî é hui sù le, yhangnhik eq rahá yap tô é lé, yhangmoq myàng kô é nghut mù luí,

taí rã hkyô haí le a joq lo kó nghut ri. ¹⁵ Haú mù, yhangnhik lé, haú Yudaq byìn tú wapdoq* mai lhoq htoq to mù, yhangmoq rayuq eq rayuq hpyê lhum kô é gi, ¹⁶ "Shí nhik lé hkâsu kut lé gè rã lhú? Yhangnhik kut shit e laklaí kumlhá gi, Yerusalem wà mó má nyi é lhunglhâng bang é hí má de za dut bê nghut é yanmai, nga-nhúng haú lé a wó hê lo nghut ri. ¹⁷ Nghut kôlhang, mingbyû wuì má shí hkyô je riyhang a byo myín ló sháng gaq, ahkuí mai myìng haú lé lang mù ó lé le a taí kyo lo rã matú, yhangnhik lé kyuq hkúm pyám sháng." gã bum akô.

¹⁸ Haú mù, yhangnhik lé dum wut hâng yù luí, Yesuq é myìng lé lang mù, haí le hkâtaí, hkâ-mhoqshit kó ga chôm hkùm akô. ¹⁹ Petruq eq Yohan kúm gi, "Garai Gasâng é mungdang lé gyo rã htoq má, nungmoq é dang gyo le gi, Garai Gasâng é hí má gè rã, a gè rã lé, nungmoq yhang doqdân yù keq. ²⁰ Nga-nhik kúm gi, myàng yù, wó gyô yù bê é hkyô pé lé, a taí é, a wó nyi nghut lhê." ga luí, yhangmoq lé dum tũ taí akô.

²¹ Haú hkùn, yhangmoq gi, dut lai lò bê hkyô é yanmai, shiwa byu pé Garai Gasang lé hkya-on kungton nyi bùm kôluí, yhangnhik lé dãm byi rã hkyô a myàng kó ê nghut mù luí, yhangnhik lé dum tân kyuq luí nhang pyám bekô nghut ri. ²² Hkâsu mù gã le, haú laklaí kumlhá dông lhoq gè byi huí é sũ gi, asak myi xê zãn chyân bê sũ nghut é yanmai nghut ri.

Lumjìng Bâng É Kyûdung Dang

²³ Yhangnhik gi, nhang kat pyâm é hui kôjáng, yhangnhik é luzúm wui chyáng taú ló kômù, hkyangjong agyi pé eq suwún wui èq yhangnhik lé hkyim é dang banshoq lé, ló taí kyo akô nghut ri. ²⁴ Haú hkyô lé wó gyo kôjáng, yhangmoq gi, myit rahkat zã èq yhumsing é htê lhoq ko mù, Garai Gasang lé kyûdung kô é gi, "Mauhkung eq myigùng, wuìshuq lung-aũ eq, haú

pé má, nyi mi-nyì lé hpan tô é, ahko ahkáng lhunglhâng wó é Yhumsing ê, ²⁵ Nàng, náng é dui-nhâng zoshâng, ngamoq é íchýí íké Dawiq é nhut mai, Chyoiyúng Woi-nyí èq taí tô é gi,

'Haí mù luí, tũngbaù amyû pé gi, nhikjum yô akô? haí mù luí, byu pé gi, akôm dã pyám akô lhú?

²⁶ Haú Yhumsing eq Yhâng é Hkrisduq lé gumlau toq rã matú, mingkan hkohkâm pé gi, toq mù, zau suwún wuì eq rahá zup zìng bum akô.*

gã ri. ²⁷ Gè gè yhang, Herut eq Pontu Pilat nhik gi, tũngbaù pé eq Israelaq byu pé le mù, wà mó shí má chôm zìng to kôluí, nàng xũ but byi é sũ,† náng é Chyoiyúng dui-nhâng zoshâng Yesuq lé gumlau toq rã dã nyi akô.

²⁸ Nàng é wum-o a-tsam eq nàng ô nau é dông dut rã matú, hí hkùn mai nàng myit hpyit doqdân tô é hkyô lé, yhangmoq gi, kut pyám bekô nghut ri. ²⁹ Yhumsing ê, ahkuí yhangmoq taí kyuq nyi é dang lé myàng byi laq ô! Nàng é dui-nhâng zoshâng wuì, a gyuq a kyum é myit èq náng é dang lé taí rã matú wum-o byi laq! ³⁰ Nàng é wum-o bo é loq lhâm kat luí, nolì nojàng lé lhoq gè byi mù, náng é Chyoiyúng dui-nhâng zoshâng Yesuq é myìng mai, limik kumlhá eq mauhpo muzó pé lé kut shit laq ô!" gã akô.

³¹ Haú su, kyû ban dung kôjáng, yhangmoq zìng tô é jowò gi, dui nún lô mù, yhangmoq lhunglhâng bang gi, Chyoiyúng Woi-nyí byìng lô luí, Garai Gasâng é mungdang lé a gyuq a kyum é za taí bùm bekô nghut ri.

Azìng Zê Lé Chôm Gam Chũng Kô É Hkyô

³² Haú lumjìng é lhunglhâng bang gi, i-myit rahkat za nghut nyi akô; ó yuq le, yhumsing wó é zè lé ngá é a gã é za, banshoq eq chôm gam chung nyi akô. ³³ Lagyo pé le, haú Yhumsing Yesuq dum dui toq é hkyô

* 4:26 Hkya-on 2:1-2 † 4:27 Xũ but é hkyô gi, Yudaq byu pé htũng dông xũ but byi jáng, rajung jung kut rã matú hkyin masat yu é hkyô nghut lhê. Xũ but byi é sũ gi, Grik dông Mesaia gã é nghut lhê.

lé a-tsam mó eq saksé hkâm nyi kô é nghut mù luí, yhangmoq banshoq bâng é ahtoq má jeju myo myo joq nyi ri. ³⁴ Yhangmoq chyáng a wó a lom é byù rayuq le a nyi kó. Hkâsu mù gâ le, maumyî ratóng wó é, a nghut jáng, yhûm wó é bang ó yuq nghut kôlhang, haú pé lé adàm dàm ùng pyám luí wó yu é ngùn le gi, ³⁵ lagyô pé é hkyî wang má lé to byí akô. Haú mù luí, a wó a lòm sù ó yuq lé le ra tô é eq rajung za gàm byí akô nghut ri.

³⁶ Haú hkûn, Barnaba ga luí lagyô pé eq myhíng byi é, Kupru ming mâ é Lewiq byù Yosep le, yhang wó é maumyî ratóng lé ung luí, wó yu é ngùn lé lagyô pé é hkyî wang má, lé to byí ri. ³⁷ Barnaba gâ é dang lichyúm gi, myit wum byí su é yhangzo gâ é lichyúm nghut lhê.

5

Anani Eq Sahpira Njik É Hkyô

¹ Nghut kôlhang, Anani ga sù gi, yhangmyi Sahpira eq rahá, yháng nhâm wó é maumyî ratóng lé ùng pyám luí, ² yhangmyi le bo sê é dông, ngùn haú ra-am lé gi, haq myhit yu to mù, ra-am lé za lagyô pé é hkyî wang má lé to byí akô.

³ Haú mù luí, Petruq gi, "Anani ê, Chyoyúng Woi-nyí lé mhaú pyám rá matú eq, maumyî hpau mâ é ra-am lé haq yu to rá matú, haí mù luí, náng é myit má Tsadán le byíng nhang tô lhê lhú? ⁴ Maumyî haú joq tô le, náng é zè nghut lhê a nghut lhú? Wó ung é ngùn le náng é zè nghut ashí, a nghut lhú? Haí mù luí, náng haú dông dâ lhê lhú? Byù lé mhaú é a nghut, Garai Gasang lé mhaú pyám bê nghut ri." ga taí ri.

⁵ Anani gi, dang haú lé wó gyo jáng, lêng mù, shi byuq bê nghut ri. Haú hkyô lé wó gyô é bang banshoq le, gyai yhang gyuq bùm bekô nghut ri. ⁶ Haú hkûn, zorâm wui gi, toq mù, yhâng é mâng lé htup luí, ê waq myhup pyám akô. ⁷ Hau htâng, sum hkyíng kô myáng jáng, yhangmyi le, wang lé lo ri. Haú su dut é hkyô lé gi, yhang a sé nghut ri.

⁸ Haú hkûn, Petruq gi, "Ngo lé taí kyô wú aq. Nungnhik ùng é maumyî hpau gi, shí gû za nghut lhê lhú?" ga myi jáng, yhang gi, "Nghut lhê, haú gû za nghut bê." ga tú taí ri.

⁹ Petruq gi, "Nungnhik gi, haú Yhumsing é Woi-nyí lé ísu kut chyam wú rá matú, hkâsu mù chôm myit huí akô lhú? Wú aq, náng é yhumsing hpó lé é myhup pyám bang gi, haú hkúmdong má jé bê; yhangmoq gi, nang lé le waq htoq pyám kó rá nghut lhê." ga taí ri.

¹⁰ Radá dâm, yhang le lagyo hpô é hkyî wang má lêng shi byuq bê. Zorâm wui le wang lo wú le, myiwe haú shi to lánng é lé myàng kôluí, waq é mù, yhanglang é nàm má, é myhup pyám bekô. ¹¹ Hau é yanmai, haú hkun lhê é hpúng byù banshoq bang eq, haú su dut é hkyô lé wó gyo má wó gyô é bang gi, gyai yhang gyuq bùm bekô nghut ri.

Byù Myo Myo Lé, Lagyô Pé Lhoq Gê Byí É Hkyô

¹² Ahkuí, lagyô pé gi, mingbyù wui é hí má limik kumlhá eq mauhpo muzó myo myo lé, kut shít nyi akô. Haú lumjíng bang gi, i-myit rahkat zâ eq, Sholumon jirop má chôm hui hui kut bum akô. ¹³ Shiwa byu pé gi, yhangmoq lé hkunggâ nyi bùm kôlhang, yhangmoq lé a wám é zum bùm kó. ¹⁴ Nghut kôlhang, haú Yhumsing lé lumjíng é myiwe yuqgè wui gi, myo sheq myô jat lò kômù, yhangmoq chyáng je myô jat lò bê nghut ri. ¹⁵ Haú mù luí, byu pé gi, Petruq laí lo é hkûn, yhâng é wupzo za lhang rayuq yuq é ahtoq má zang sháng gaq ga, nòhpyo huí é bang lé, wá mâ é hkyô yàm má waq htoq é mù, yhuphpú pé eq taphkang pé má lhez tô akô. ¹⁶ Hau htoq agó, Yerusalem awui ayàm mâ é wá pé mai le, byù ajùm ayò gi, no é bang eq agè ashop é nat wang zing-ri huí é bang lé shuí jé lé bum akô; haú bang lhunglhang gi, lhoq gê lhoq yô byí é huí bum akô nghut ri.

Lagyo Pé Zing-ri Huí É Hkyô

¹⁷ Hkyangjong mó eq yhâng é luzúm wuî, Saduke hpúng mâ é byu pé kúm gi, gyai yhang wú manon bùm kôluî, toq mù, ¹⁸ lagyo pé lé chyup yû luî, wà mâ é htóng má lhûng tô akô. ¹⁹ Nghut kôlhang, haû myín lé, Yhumsîng é maumang lagyo rayuq gi, htóng hkum pé lé hpông pyám mù, yhangmoq lé shuí htoq yû uchyang, ²⁰ "Nungmoq htoq ló mù, noqkuq yhûm má ê yap to luî, dui é asak hkyô sik eq sêng é danglù banshoq, shiwa byu pé lé taí kyo keq." ga taí ri.

²¹ Napsûn myoqmyàng zó lé, yhangmoq gi, noqkuq yhûm má wàng mù yhangmoq wó gyô yu é eq rajung za, shiwa byu pé lé, mhoqshit hi ló akô.

Haû u lé, hkyangjong mó eq yhâng é luzúm wuî gi, Israelaq byu pé é suwún wuî lhunglhang bang lé ji yû mù, Yudaq byìn tú wapdoq chôm zung yû luî, lagyo pé lé é shuí yû râ matú htóng shut byù nhang kat akô.

²² Haû bang kúm gi, htong má jé é hkûn, lagyo pé lé a myàng kôjáng, dum taû lò mù lo taí kyo kô é gi, ²³ "Htóng hkum le ging ging myhî to lánq ri, htóng zúng bang le hkum yâm má yap tô akô. Nghut kôlhang, hpông wú le, ahkaû má ó le a nyi to lo nghut ri." gá ri. ²⁴ Noqkuq yhûm zúng é zau hpó eq hkyangjong agyî wuî gi, dang haû lé wó gyo kôjáng, "Shí hkyô haî dut lô râ lhu?" ga, gyai gyuq maú bum akô.

²⁵ Haû hkûn, byù rayuq wang lé lô mù, "Wú keq, nungmoq eq htóng má lhûng tô é bang gi, noqkuq yhûm má yap to mù byu pé lé mhoqshit nyi bum akô." ga luî, yhangmoq lé taí kyô ri. ²⁶ Haû mù luî, zau hpó haû gi, yhâng é a-ô mâ é bang eq ê mù, lagyo pé lé é shuí yu akô. Nghut kôlhang, shiwa byu pé luqgok eq dú lô kó râ lé gyuq kô é yanmai, htân htân a wám kut kó nghut ri.

²⁷ Lagyo pé lé shuí jé lô kôjáng, Yudaq byìn tú wapdoq hí má yhangmoq lé nyhi tô akô. Haû hkûn, hkyangjong mó gi, ²⁸ "Yesuq é myìng lé lang luî

a mhoqshit râ matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jàm shoq, nungmoq kut bekô nghut luî, Yesuq é sui lé, ngamoq é ahtoq má ke byi râ dâ nyi akô." ga luî, yhangmoq lé taí akô.

²⁹ Haû hkûn, Petruq eq gotû lagyo pé tú taí kô é gi, "Ngamoq gi, byù dang lé gyo ra htoq má Garai Gasang é mungdang lé je luî gyo râ dut lhê. ³⁰ Nga-nhûng é îchyî îwâ pê é Garai Gasang gi, nungmoq eq tapzîng má lhang sat pyâm é Yesuq lé, shi e mai lhoq dui toq kat bê nghut ri.

³¹ Israelaq amyû lé, myit lhîng hkyô eq mara hkyut byi hkyô hpông byi râ matú, up é ahkáng wó Sû eq hkyi yù Sû kut nhâng râ ga, Garai Gasang gi, Yhang lé, Yhâng é loqyo loq* má waq toq to bê nghut ri. ³² Ngamoq le shí hkyo é saksé pé nghut nyi lhê; mungdang lé gyô yù luî châng é bang lé Garai Gasang byî tô é Chyoiyúng Woi-nyí le, shí pê é saksé nghut lhê." ga akô.

Gamalelaq Hpaqchyî Byî É Hkyô

³³ Yhangmoq gi, dang haû lé wó gyo kôjáng, lûm gyo nhik-yo naû kômù, lagyo pé lé sat pyám râ lhang myit akô. ³⁴ Nghut kôlhang, mingbyû banshoq bâng é hí má aróng wó é tarâ sará Gamalelaq gâ é Hparishe rayuq, haû Yudaq byìn tú wapdoq má toq yap mù, lagyo pé lé razup zo lhoq htoq to nhâng luî, ³⁵ yhang taí é gi, "Israelaq byu pé ê, shí bang lé hkâsu kut râ hkyô, rago za hí myit wú keq.

³⁶ Hkâsu mù gâ le, hí hpyang Htudaq gâ é byù rayuq pô htoq lô mù, yhânggùng yhang byù mó rayuq yuq nghut lhê ga taí jáng, byù myi shô kô yhâng chyáng châng wú bekô. Yhang sat pyâm é hui luî, yhang htâng châng é lhunglhang bang le byo myín byuq kômù, haî le a wó kut dut byuq akô nghut ri. ³⁷ Hau htâng, myìng jihpán guq yu é buinyî má, Yudaq gâ é Galile byù rayuq pô htoq mù, mingbyû wuî

* **5:31** Garai é loqyo loq gâ é gi, hpautap hkungga gíng é jowò lé taí nau é nghut lhê.

lé yhang hkyam shut mhoq hpyoq yu ri. Yhang le sat pyâm é hui mù, yhang htâng châng é lhunglhang bang le, byo myín byuq bekô nghut ri. ³⁸ Ahkuí le, shí bang lé haí le hkâgon ko, yhangmoq kâm é đông nghut nyí kó sháng gaq; yhangmoq kut nyi é hkyô eq dâ nyi é hkyô pé gi, byù myit đông kut é nghut jáng, htên byoq byuq râ za nghut lhê. ³⁹ Nghut kôlhang, Garai Gasâng chyáng mâ é nghut le gi, nungmoq wó lhoq hkyîng pyám kó râ a nghut. Garai Gasâng é gyè sheq dut lò kó râ nghut lhê." gâ ri.

⁴⁰ Dang haû lé yhangmoq gyô htuk bum akô. Haû mù, lagyô pé lé wut yù mù luí, nhuq bat yù kômù, Yesuq é myîng lé lang luí mhoqshit é hkyô a ge kut râ nghut lhê ga taí kômù, nhang pyâm akô nghut ri.

⁴¹ Lagyô pé kúm gi, Yesuq é myîng é yanmai ru hpuzô é hkyô gi, gingdán nyi ri, ga myit yù kômù, Yudaq byìn tú wapdoq haû mai gabú myit èq htoq lò bekô. ⁴² Hau htâng, yhangmoq gi, nyí wuî làng noqkuq yhùm má le, rayhùm htâng rayhùm má le, Yesuq gi, Hkrisduq nghut é hkyô gabú danglù lé mhoqshit hkô kyô nyi akô nghut ri.

6

Garúm Râ Byù Nyhit Yuq Lé Hkyin Yu É Hkyô

¹ Ahkuí, chángzô pé myô jat lo nyi é buinyi pé má, Grik dang nyo é Yudaq byu pé gi, yhangmoq é chuimó myhí pé lé, nyí wui lhê é gâm tso gâm huq é hkyô má rago a wó kut kô é yanmai, Hebre myíng mu é Yudaq byu pé lé mara hùn dang taí bum akô. ² Haû hkûn, lagyo raxe í yuq gi, chángzô pé lhunglhang bang lé wut yù mù, "Ngamoq, Íwa Garai Gasâng é mungdang hko kyô é muzó lé rap pyâm to mù, zangbó amû lé za lajang nyi é nghut le gi, a htuk râ nghut lhê. ³ Haû mù luí, gumang wuî ê, Chyoiyúng Woi-nyí byíng é eq hpaqchyí byéng-yá bo é nhik bo byù nyhit yuq lé nungmoq

chyáng mâ é hkyin to keq. Haû bang lé muzó shí lhum hun to râ nghut lhê.

⁴ Ngamoq kúm gi, kyûdûng é hkyô eq mungdang hkô é hkyô lé za, noqzuq tung kut nyí râ nghut lhê." ga taí akô.

⁵ Dang haû lé shiwa byù lhunglhang bang gyô htuk kômù luí, lumjîng myit kô é, Chyoiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htûng má lhing wang lò bê sù Antioku wà mó mâ é Nikolaq pé lé hkyin yù mù, ⁶ lagyô pé chyáng shuí lò akô; lagyô pé gi, kyûdung byi kômù, yhangmoq lé loq ke byí akô nghut ri.

⁷ Garai Gasâng é mungdang gi, je myô jam lò luí, Yerusalem wà mó má chángzô pé gyai myô jat lawán lo é htoq agó, hkyangjông pé myo myo le, haû lumjîng hkyô má châng nyi bum akô.

Stehpan Chyup Yû Huí É Hkyô

⁸ Ahkuí, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pé é hí má mauhpo muzó pé eq limik kumlhá mó pé tân shit ri. ⁹ Haû hkûn, luthkyô ga bâng é tarajong eq sêng é Kuruni, Alesander eq Kiliki, Asia mau mâ é bang ra-am gi, toq mù, Stehpan eq dang chyin chyin lhùm akô. ¹⁰ Nghut kôlhang, Stehpân é dang gi, Chyoiyúng Woi-nyí lom é hpaqchyí dang nghut é yanmai, yhangmoq a ûng kó nghut ri.

¹¹ Haû mù, yhangmoq gi, "Shí yuq, Mosheq eq Garai Gasâng lé rhoí dang taí nyi é lé, ngamoq wó gyô ri." ga luí, mhaû taí nhâng râ byù haq lung tô akô.

¹² Haû mù, yhangmoq gi, ming-byû wuî eq nhik bô suwún wuî, tarâ sará pé lé, chun htau mù, Stehpan lé chyup yû nhâng luí, Yudaq byìn tú wapdoq má shuí nyhi tô akô. ¹³ Mhaû é saksé byu pé lé le lhoq hâng kat luí, haû bang gi, "Shí yuq, shí chyoyúng jowò* eq jep é tarâ lé shut shai é dang ru taí nyi ri. ¹⁴ Nazaret wà

* **6:13** Shí chyoyúng jowò gi, Yerusalem noqkuq yhùm lé gâ lhê.

byù Yesuq ga sù gi, jowò shî lé hpyoq pyám mù, nga-nhúng lé Mosheq èq byî tô é htunghking lé htaî pyám râ nghut lhê ga luî, yhang taî é dang lé ngamoq wó gyô é nghut lhê." ga taî akô.

¹⁵ Haû Yudaq byìn tú wapdoq má zung to bang banshoq, yhang lé chôm wú tsuq nyî kô é hkûn, yhâng é myoq-dong gi, maumang lagyô é myoqdong su dut é lé, yhangmoq myang akô nghut ri.

7

Stehpan Taî É Dang

¹ Haû hkûn, hkyangjong mó gi, "Dang haû pé têng lhê lhú?" ga luî, yhang lé myî jáng,

² Stehpan tú taî é gi, "Gumang wuî eq íwa wuî ê, gyô wú keq, nga-nhúng lhunglhâng bâng é îchyí Abraham gi, Haran wà má a ló nyî shî lé, Mesopotamiaq mau má nyi tô ashî hkûn, hpungwup shingking bo é Garai Gasang gi, yhâng chyáng lé htoq shit mù, ³ 'Náng é ming eq náng é amyû mai htoq ló luî, ngò tûn shit râ ming shut e ló aq.'[☆] ga luî, yhang lé taî ri.

⁴ Haû mù, yhang gi, Hkaldea byu pé é mau mai htoq ló luî, Haran wà má ló nyi nyi ri. Yhâng wa shi byuq é htâng má, Garai Gasang gi, ahkuî, nungmoq nyi nyi é ming shî má yhang lé htot lô nhâng bê nghut ri. ⁵ Garai Gasang gi, shí ming má yhang lé silí wunlí nghû râ, hkyî rahkô nang í é myigùng lháng a byí é nghut kôlhâng, yhang, zodù lháng a wò shi mai, yhang lé le, yhâng é awut ashín pé lé le, maumyî shî byi râ ga danggidiq byî to bê nghut ri. ⁶ Hau htoq agó, shí hkyô lé Garai Gasang xoq taî é gi, 'Náng é awut ashín pé, tûngbaù ming má bíng nyî mù, haû ming bâng èq myi shô zàn jùn zô é eq zing-rî é lé hui kó râ. ⁷ Nghut kôlhâng, yhangmoq lé jùn zô é amyû lé le, ngò jéyáng râ nghut lhê.' gâ ri. 'Haû hkûn, yhangmoq gi, haû ming mai htoq lô mù, jowò shî má ngo lé

noqkuq kó râ nghut lhê.'[☆] ga le, Garai Gasang taî ri. ⁸ Hau htâng, yhang lé ahpyo-kuq hpyit byi râ hkyô eq sêng é dangshikaq le, byî ri. Haû mù, Abraham gi, Isak lé hku é htâng shit nyî buinyî má ahpyo-kuq hpyit byî ri; Isak gi, Yakup lé hkû mù, Yakup gi, îchyí íwa achyûng raxe í yuq lé hku kat bê nghut ri.

⁹ Haû îchyí íwâ pé gi, Yosep lé manôn kôluî, Egutuq ming shut jùn dông ûng kat akô. Nghut kôlhâng, Garai Gasang gi, yhang eq rahá nghut nyî mù luî, ¹⁰ wuîhke jamjau banshoq mai yhang lé lhoq lhut yû mù, Egutuq hkohkâm Hpara-uq é hí má le myoqdong wó, hpaqchyî byéng-yá le bò nhang é yanmai, hkohkâm haû gi, Egutuq ming eq, yhâng é hkohkâm-wâng banshoq lé up nhang ri.

¹¹ Haû u lé, Egutuq ming eq Hkanan ming banshoq má mutmó gyó lô mù, wuîhke jamjau mó hui bekô. Nga-nhúng é îchyí íwâ pé le zoshuq a myang hô zo lo dut byuq bekô nghut ri. ¹² Ahkuî, Yakup gi, Egutuq ming má guqzo joq é hkyô lé wó gyo jáng, nga-nhúng é îchyí íwâ pé lé sâng-hî dâm ê nhang ri. ¹³ Htang dâm dum ê é hkûn, Yosep gi, yhanggu yhangmâng pé lé yhang ó nghut é hkyô taî kyô ri. Hpara-uq le Yosep é yhumbyù ikun hkyô lé sê yù byi bê nghut ri. ¹⁴ Hau htâng, Yosep gi, yhâng wa Yakup eq yhumbyù banshoq nyhit xe ngo yuq lé, yhâng chyáng pying yù bê nghut ri. ¹⁵ Yakup le Egutuq ming má jé gyó lô luî, yhang eq nga-nhúng é îchyí íwâ pé gi, banshoq haû ming má shí ló byuq bekô nghut ri. ¹⁶ Yhangmoq é mâng lé gi, Shehkem wà má yu taù ló mù, Shehkem wà mâ é Hamora é yhangzo yhangshu pé chyáng mai, Abraham èq ngùn byi mù wui hpyit tô é lupdùng má ló myhup tô akô nghut ri.

¹⁷ Abraham lé Garai Gasang byî tô é danggidiq dik râ ahkyíng jé lo nyi é u lé, ¹⁸ nga-nhúng é amyû gi, Egutuq ming má Yosep lé a sê é hkohkâm pô

htoq é pyat jé shoq, myoluq jebe lò bekô nghut ri. ¹⁹ Hkohlâm hpó haú gi, nga-nhông é amyû htoq má a ge é hpaqchyí da luí, nyheqnú pé lé shi byuq sháng gaq ga, dú pyám nhang é đông mai nga-nhông é íchyí íwâ pé lé zing-ri bê nghut lê.

²⁰ Haú u má, Mosheq lé hkû to bê. Yhang gi, Garai Gasang é hí má gyai yúnglô é sù nghut ri; yhang gi, yhangwâ é yhûm má lhamó sum hkyap baú tô é hui mù, ²¹ htot tô tô é hui jáng, yhang lé Hpara-uq é byizô èq xe yù mù, zosíng kut yù luí, hku kô ri. ²² Mosheq gi, Egutuq ming má é hpaqchyí byéng-yá banshoq lé mhoq yù luí, nhut shô a-tsam eq hkyí loq a-tsam gyai bò sù nghut ri.

²³ Yhang asak myi xê zàn jé lò jáng, yhang é gumang Israelaq byu pé chyáng ê kûm wú rá matú wó myit htoq kat ri. ²⁴ Ê jé jáng, zing-ri hui nyi é sù rayuq lé ê myâng luí, haú yuq lé búng mù, zing-rí nyi é Egutuq byù lé, loqchoq hpuq é đông sat pyâm ri. ²⁵ Mosheq gi, yhang é byu pé lé yhang é loq đông Garai Gasang hkyi yù hkyô byi nyi é lé, yhang é amyû pé sê gyo byi nhô ngàm kôlhang, yhangmoq a sê gyo byi kó nghut ri. ²⁶ Htang nyí lé, Israelaq byù yhangchang mabyoq htoq nyi é má, e ang mù, yhangnhik lé pyín naù luí, 'Ahkaú nhik ê, gumang yhangchang sheq ru nghut lê nhing, haí mù rayuq eq rayuq byoq lhum nyi akô lú?' ga taí ngón wú ri.

²⁷ Luzúm hpó lé zing-rí nyi sù yuq gi, 'Ngamoq é ahtoq má zau eq tarâ agyí kut rá matú, nàng lé ó yuq hkyin tô é lú?' ²⁸ A-nyí nap Egutuq byù lé sat pyâm é su, ngo lé le sat pyám nau ri lú?' ga luí, tû taí uchyang yhang lé dún chyûn pyâm ri. ²⁹ Mosheq gi, dang hau é yanmai, hpâng luí Midian ming má é nyi byuq ri. Haú má yuqzo í yuq é wó ri.

³⁰ Haú ming má myi xê zàn lai jáng, Sinaq Bùm yàm, yoso hkaú má é myi yúng tô é mhanpúng mai, maumang

lagyo rayuq gi, Mosheq lé htoq shit ri. ³¹ Mosheq gi, haú lé myàng jáng, hau é yanmai maú luí, wú wú rá ga huí e ló le, Yhumsing é htê htoq lo é gi, ³² 'Ngò gi, náng íchyí íwâ pé é Garai Gasang, Abraham, Isak, Yakup é Garai Gasang nghut nyi lê.' ga ri. Mosheq kúm gi, gyuq nán luí, a wám tu wú nghut ri.

³³ Haú Yhumsing gi, 'Náng é hkyi-tsung hkyut pyám aq, nàng yap tô é jowò gi, chyoiyung é myigung nghut lê. ³⁴ Egutuq ming má ngá é amyû pé zik zo huí nyi é hkyô lé, ngò gè gè yhang myàng bê; yhangmoq é ngaù nhik ngaù htê lé ngò wó gyo bê; yhangmoq lé hkyi yù rá matú ngò gyó lé é nghut lê; ahkuí, lé aq, ngò, nang lé Egutuq ming shut nhang taú kat rá.' ga luí, yhang lé dum taí ri.

³⁵ Yhangmoq èq, 'Nang lé zau eq tarâ agyí kut rá matú, ó yuq hkyin tô é lú?' ga luí he-ngik pyâm é Mosheq lé yhang, mhanpúng má htoq shit é maumang lagyo đông mai, Garai Gasang gi, yhangmoq é zau eq hkyi yù sù kut nhâng luí, taú nhang kat é nghut ri. ³⁶ Haú Mosheq yhang, Egutuq ming má le, Nhong Nè má le, yoso hkaú pé má le, myi xê zàn gyoro má mauho muzó pé eq limik kumlhá pé tûn shit uchyang, yhang é byù myú pé lé Egutuq ming mai shuí htoq ló ri.

³⁷ Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoi rayuq lé, Garai Gasang gi, pô htoq lô nhâng rá nghut lê.' ga luí, taí tô é sù le Mosheq yhang nghut ri. ³⁸ Yoso hkaú má nghut nyi ashí hkûn lé, shiwa byù hpúng má, Sinaq Bùm má yhang lé dang taí é maumang lagyo eq le, nga-nhông é íchyí íwâ pé eq le rahá nghut sù gi, yhang yhang nghut nyi ri; nga-nhông lé ap byi rá asak dui é mung-dang lé lom yu é sù le, yhang nghut nyi ri.

³⁹ Nghut kôlhang, nga-nhông é íchyí íwâ pé kúm gi, yhang é dang lé a

kâm gyo kômù, yhang lé he pyám luí, Egutuq ming shut taú nau é myit bo bum akô. ⁴⁰ Haú mù, Arun lé, 'Egutuq ming mai nga-nhúng lé shuí htoq lo é Mosheq gi, haí dut byuq bê hkyô lé, ngamoq a sé lo; haú mù, nga-nhúng hí má so byi râ hparà lhô pé saí byi aq.'* ga taí akô. ⁴¹ Haú buinyi pé má, yhangmoq gi, nojúng zo lhô saí mù, alhô haú lé hkungga nhông byi uchyang, yhangmoq é loq èq saí tô é muzó jizó má gabú nhik dik nyi akô. ⁴² Haú mù luí, myiqhtoi pé é laiká má kâ tô é gi,

'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byi é nghut akô lhú?

⁴³ Nungmoq gi, nungmoq noq râ matú saí yu é alhô, Molak é zúm eq Rehpan hpara é kyí lé sheq, waq lhing wún ko é yan-mai,

Babelon lai shoq ngò nungmoq lé lhoq lhâm pyám râ nghut lhê.* ga luí, bo tô é eq rajung za, Garai Gasang gi, yhangmoq chyáng mai myoqdong lhing pyám mù, mauhkung htoq mâ é bui, kyí, lhamó pé lé noqkuq râ matú ap pyám bê nghut ri.

⁴⁴ Mosheq lé, nàng myang é azòng eq rajung za saí aq ga, Garai Gasang taí é dông saí tô é saksé zúm lé, haú yoso má nga-nhúng é íchýí îwâ pé wó yú bekô nghut ri. ⁴⁵ Haú mù, nga-nhúng é íchýí îwâ pé gi, yhangmoq é myoq hí mai Garai Gasang eq hkat htoq pyám byi é byù myú pé é mau má, Yoshuq eq rahá wang nyi ló kô é hkûn, saksé zúm haú lé yu wang ló akô. Haú gi, Dawiq é pyat jé shoq joq to bê nghut ri. ⁴⁶ Dawiq kúm gi, Garai Gasâng hí má myoqdong wó sù nghut mù luí, Yakup é Garai Gasâng matú nyi jowò saí rá ahkáng dung kôlháng, ⁴⁷ Sholumon èq sheq saí bê nghut ri.

⁴⁸ Nghut kôlháng, Myhang htáng htum Sù gi, byu é loq èq za saí é yhùm

má nyi é a nghut, haú hkyô eq séng luí myiqhtoi wá taí tô é gi,

⁴⁹ 'Mauhkung gi, ngá é zùng tanghkuq, myigùng gi, ngá é hkyí nang jang nghut nyi lhê; ngá é matú hkasû é yhùm saí byi shi kó râ lhú? Ngò nô yù râ jang gi, hkâmá nghut kó râ lhú?

⁵⁰ Haú banshoq lé ngá é loq èq baú saí tô é a nghut kó lhú? ga luí, haú Yhumsing taí ri.*

gâ ri.

⁵¹ I-myit htân mù, i-myit eq nohkyap má ahpyo-kuq a hpyit é bang* ê, nungmoq gi, nungmoq é íchýí îwâ pé su, Chyoiyúng Woi-nyí lé hkâ-nhám le lhom he-ngik pyám nyi akô; ⁵² Nungmoq é íchýí îwâ pé èq a zing-rí wú é myiqhtoi, ó yuq wá nyi lhê lhú? Haú Dingmán Sù pô htoq râ hkyô lé hko kyô é bang lé, yhangmoq sat pyám é chyat nghut akô; ahkuí, nungmoq le, haú Dingmán Sù lé ap pyám é bang eq sat pyám é bang nghut nyi akô. ⁵³ Maumang lagyo èq shit kyo byi é tarâ lé nungmoq wó yú kôlháng, haú lé a cháng kó nghut ri." gâ ri.

Stehpan Lé Luqgok Èq Dú Sat É Hkyô

⁵⁴ Haú hkyô lé yhangmoq wó gyo kôjáng, yhangmoq é nhiklhum má lûm htaú záng kô é yanmai, Stehpan lé, zui wang ngat kyáng shoq wú nhikyô nyi akô. ⁵⁵ Stehpan kúm gi, Chyoiyúng Woi-nyí byíng mù, mauhkung shut tu wú kat le, Garai Gasâng é hpungwup shing kang lé le, Garai Gasâng é loqyo hkyam shut Yesuq yap tô é lé le, myang ri. ⁵⁶ Haú mù, yhang gi, "Wú keq, mauhkung hpông tô é lé le, Garai Gasâng é loqyo hkyam shut haú Byu Yhangzo yap tô é lé le, ngò myàng ri." ga taí kat ri.

⁵⁷ Haú hkûn, yhangmoq gi, htê mó o mó garu uchyang, yhumsing é nohkyap xaú pyám mù, radá dâm yhang lé chôm htim kômù, ⁵⁸ yhang lé

* 7:40 Htoq Ló 32:1 * 7:43 Amo 5:25-27 * 7:50 Esai 66:1-2 * 7:51 I-myit eq nohkyap má ahpyo-kuq a hpyit é bang gâ é gi, Garaí dang lé a lùm a châng é bang lé gâ lhê.

wà mai she htoq ló kôluî, luqgok èq chôm dú ló bekô nghut ri; saksé kut é bang gi, Sholuq gâ é zoram é hkyî wang má yhangmoq é buhîng pé lé hkyut bum tô akô.

⁵⁹ Luqgok èq dú nyi bùm kô é u lé, Stehpan gi, "Yhumsîng Yesuq ê, ngá é woi-nyí lé hap yù laq." ga kyûdûng ri. ⁶⁰ Hau htâng, yhang gi, hkyihput htuoq mù, "Yhumsîng ê, yhangmoq kut é mara haû lé hkyut pyám byi laq." ga luî, htê mó èq wut dûng ri; haû ban taí jáng, yhang kâng byit byuq bê nghut ri.

8

Hpúng Byû Lé Sholuq Zing-rî É Hkyô

¹ Sholuq gi, haû má nyi to mù, Stehpan lé sat pyâm é muzó má myit bo huî ri.

Haû nyí mai, Yerusalem wà mó mâ é noqkuq hpúng gi, zing-ri mó huî lo é nghut mù luî, lagyô pé mai lai luî, lumjîng bang lhungháng gi, Yuda mau eq Samariq mau jowò hkanmó má byo myín ló bekô. ² Nghut kôlhang, tarâ hkunggâ é bang gi, Stehpan lé yhum pyâm é htâng má, yhang é yanmai iyon mó huî nyi akô nghut ri. ³ Sholuq kúm gi, rayhum htâng rayhûm wàng mù, myiwe yuqgè lé she hkyut htoq yû luî, htóng má lhûng tô é dông mai, noqkuq hpúng haû lé lhoq hpyoq ló nyi ri.

Samariq Wà Má, Gabú Danglù Hkô Kyô É Hkyô

⁴ Byo htoq ló é bang kúm gi, jé é jowò hkanmó má mungdang lé hkô kyô ló akô. ⁵ Haû hkûn, Hpilip gi, Samariq mau mâ é myuq ra-myuq shut e ló mù, Hkrisduq é hkyô lé hkô kyô ri. ⁶ Byû ajùm ayò gi, Hpilip taí kyô é hkyô lé wó gyô é eq, yhang tân shit é limik kumlhá lé myàng kôjáng, i-myit rahkat za eq yhâng é dang chôm gyô nyi bum akô. ⁷ Nat wang júng é byû myo myô pê chyáng mai, agè ashop é nat pé wut garu uchyang htoq ló byuq bum akô; gùngjum shi é bang eq hkyî htên é bang myo myo le,

ge ló byuq bum akô. ⁸ Haû mù luî, haû myuq má gabú hkyô gyai yhang wó bekô nghut ri.

Myoqheq Sará Simun É Hkyô

⁹ Simun gâ é byû rayuq gi, hí lé haû myuq má myoqheq hpaqchyî kut shit mù, Samariq byu pé lé lhoq maú luî, yhâng gùng lé yhang, laklaí sù nghut lhê gâ ri. ¹⁰ Byû tiq ko banshoq le, "Byû shí yuq gi, 'haû a-tsam mó' gâ é, Garaí chyáng mai hpungwup a-tsam wó yû sù nghut ri." ga luî, yhâng é dang lé gyô bum akô. ¹¹ Haû yuq gi, myáng myáng yhâng é myoqheq hpaqchyî èq yhangmoq lé lhoq maú lo é yanmai, yhâng dang lé chôm lum bum akô. ¹² Nghut kôlhang, Hpilip hko kyô é Garaí Gasâng é mingdán hkyô eq, Yesuq Hkrisduq é myìng eq sêng é gabú danglù hkyô lé, lumjîng kôjáng, myiwe yuqgè wui-myhup hkâm yu bum akô. ¹³ Simun yhang yhang le lumjîng mù luî, wui-myhup hkâm yù mù, Hpilip htâng châng wún ri. Hpilip é kumlhá mó eq laklaí kumlhá pé lé myàng jáng, yhang gi, gyai maú byuq ri.

¹⁴ Garaí Gasâng é mungdang lé Samariq byu pé, lhom hap yù bê hkyô lé, Yerusalem wà mó má nyi é lagyô pé wó gyô bùm kôjáng, yhangmoq gi, Petruq eq Yohan nhik lé haû má nhang kat akô. ¹⁵ Yhangnhik gi, lé jé jáng, byû haû bang Chyoiyúng Woi-nyí wó yû râ matú kyûdung byi akô. ¹⁶ Hkâsu mù gâ le, Chyoiyúng Woi-nyí gi, yhangmoq chyáng ó yuq é ahtoq má lé, a gyó lô shi; Yhumsîng Yesuq é myìng mai wui-myhup hkâm yu é za ru nghut bùm ashî. ¹⁷ Haû mù luî, lagyô nhik yhangmoq é ahtoq má loq ke byi jáng, yhangmoq gi, haû Chyoiyúng Woi-nyí lé wó hkâm yù bekô nghut ri.

¹⁸ Lagyô nhik é loq ke kat jáng Chyoiyúng Woi-nyí wó hkâm yu é lé, Simun myàng jáng, yhang gi, yhangnhik lé ngùn ê byi wú mù, ¹⁹ "Hká yuq é ahtoq má nghut kôlhang, ngò loq ke

byi jáng, haú yuq gi, Chyoiyúng Woi-nyí wó yû râ matú, haú su é a-tsam ngo lé le byi kó laq." ga dung ri.

²⁰ Petruq kúm gi, "Garai Gasâng é chyunghuq lé ngun èq wó wui yù râ nghut lhê ga luí, myit é yanmai, náng é ngùn gi, nàng eq rahá htên byoq byuq sháng gaq. ²¹ Nàng gi, Garai Gasâng é hí má myit a dǐng sù nghut é yanmai, shí hkyô má nàng wó bo lhóm râ a nghut. ²² Haú mù luí, shí agè ashop é hkyô mai myit lhíng mù, Yhumsíng Garaí chyáng dǔng tóngbán aq. Haú hkún, náng é unghkaú má myit pyám é hkyô lé, mara hkyut pyám byi abe. ²³ Nàng gi, ladu lai shoq nhikhko zo mù, yubak marâ èq tuí zing to huí é lé, ngò myàng ri." ga yhang lé taí ri.

²⁴ Haú hkún, Simun gi, "Nungnhik taí é hkyô haí le ngá chyáng a jé sháng gaq, ngá é matú haú Yhumsing chyáng kyúdung byi kó laq." ga tû taí ri.

²⁵ Yhangnhik kúm gi, haú Yhumsing é mungdang lé saksé hkám mù ban hko kyo jáng, Samariq byu pê é wà myo myo má, haú gabú danglù lé hko kyo uchyang, Yerusalem wà mó shut dum taú lò bekô nghut ri.

Hpilip Eq U-nuk Nhik É Hkyô

²⁶ Ahkuí, Yhumsíng é maumang lagyo gi, Hpilip lé, "Toq aq, Yerusalem wà mó mai Gaza shut lò é hkyô jé shoq, maupyí shut nyáng za e ló aq. Hkyô haú gi, yoso hkyô nghut lhê." ga taí ri. ²⁷ Haú hkún, yhang toq mù e ló ri. Haú u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhang é sutzè banshoq lé zûm é, Ehtiopi byù u-nuk rayuq gi, noqkuq râ ga Yerusalem wà mó má ê mù, ²⁸ dum taú lo é hkún, yhang é myanglhêng má zùng luí, myiqhtoi Esai-aq laiká lé nghap nyi ri. ²⁹ Woi-nyí gi, Hpilip lé, "Myanglhêng shut chyáng e ló aq." ga taí ri.

³⁰ Haú mù, Hpilip gi, din ê mù, myiqhtoi Esai-aq laiká nghap nyi é lé wó gyo jáng, "Nàng nghap nyi é hkyô lé sê gyo ri lhú?" ga luí, yhang lé myí ri.

³¹ Haú yuq gi, "Mhoqshit sù yuq a nyi le, ngò hkâsu kut sê gyo râ lhú?" ga tû taí mù, yhang eq rahá lo doq zùng aq ga Hpilip lé lung ri.

³² Yhang nghap é Chyúmdang gi, "Sat râ sau lé su, Yhang lé she e ló bê nghut ri;

sau zo gi, sau maú nyhám su é hí má zim za nyi tô é su, Yhang le nhut a hpông é za nyi tô ri.

³³ Yhânggùng lé lhoq shôm pyám to huí é hkún, Yhang lé a tara é dǒng doqdân pyám bekô;

Yhâng é asak lé myigùng htoq mai yù pyám bekô nghut mù luí, Yhâng é awut ashín lé ó yuq wó gôn kyo râ lhú?"[☆]

gâ ri.

³⁴ Haú hkún, haú u-nuk wa gi, Hpilip lé, "Haú nghut le gi, ngo lé taí kyo laq! Myiqhtoi shí yuq gi, ó lé lhoq ang luí, taí é nghut lhê lhú? Yhânggùng lé taí é nghut lhê lhú? Haú a nghut jáng, góyuq é hkyô lé taí é nghut lhê lhú?" ga myí ri. ³⁵ Haú hkún, Hpilip gi, Chyúmdang haú lé yù mù, Yesuq eq sêng é gabú danglù lé taí kyô ri.

³⁶ Haú su e ló kô le, wui joq é má jé jáng, haú u-nuk hpó gi, "Wú aq, shí má wui joq tô ri, wui-myhup hkâm yù râ matú ngo lé hkúm râ jang haí joq ashí lhú?" ga taí ri. ³⁷ Hpilip gi, "Náng i-myit banshoq èq, nàng lumjǐng bê nghut le gi, hkâm yu le ge lhê." ga taí ri; yhang le, "Yesuq Hkrisduq gi, Garaí Gasâng é Yhangzo nghut é lé, ngò lumjǐng bê." ga tû taí ri.* ³⁸ Haú hkún, yhang é myanglhêng hkying nhâng mù, yhangnhik wui má gyó wâng luí, Hpilip gi, u-nuk hpó lé wui-myhup hkâm byí ri. ³⁹ Wui hkaú mai htoq ló kô é hkún, haú Yhumsing é Woi-nyí gi, Hpilip lé myhik za shuí ló byuq mù, u-nuk hpó le Hpilip lé dum

[☆] 8:33 Esai 53:7-8

* 8:37 Bun zo 37 shí lé Chyúmlaiká ra-am má gi, bo lhê; ra-am má gi, a bò.

a myàng lo; nghut kôlhang, yhang gi, e ló é hkyô shut gabú myit èq xoq sô e ló bê nghut ri. ⁴⁰ Hpilip kúm gi, Azutu wà má lo htoq jé kat mù luí, Kesare wà mó jé shoq haú mau má é myuq pé wà pé hkangmó má gabú danglù hkô kyô wún ri.

9

Sholuq Lhik Wang Lo É Hkyô

¹ Haú u lé, Sholuq kúm gi, Yhumsing é chángzô pé lé hkat kyuq nha rà eq sat pyám rà ga, nhikmó-yô nyi é nghut mù luí, hkyangjong mó chyáng è mù, ² Yhumsing é Hkyô lé lumjìng é myiwe yuqgè myàng mi-myàng lé chyup yû luí, Yerusalem wà mó shut wó she ló rà matú, Damaskuq myuq má é tarajong pé má byi rà laiká pé lé dúng chùng ri. ³ Yhang e ló le, Damaskuq myuq eq chyáng ló nyi é hkûn, yhang é lhinghkyuq má mauhkûng mai dân loq tung duqbó htoq ló ri. ⁴ Yhang myigùng má lêng ngop tô é u lé, "Sholuq, Sholuq, nàng ngo lé haí mù zing-rí nyi lhê lú?" ga luí, yhang lé taí é htê wó gyô ri.

⁵ Haú hkûn, yhang gi, "Yhumsing ê, nàng gi, ó yuq nghut lhê lú?" ga myi jáng, haú Yhumsing gi, "Nàng zing-rí nyi é Yesuq nghut lhê, ⁶ toq aq, myuq shut wang ló aq. Nàng zui saí rà hkyô lé lhom taí kyo rà nghut lhê." ga tû taí ri.

⁷ Yhang eq rahá e ló é luzúm wuí gi, htê haú wó gyo kôlhang, ó yuq lé le a myàng kô é yanmai, maú hong yap tô bum akô. ⁸ Sholuq toq mù, myoq hpông kat wú le, haí lé le a myàng dut byuq mù luí, yhangmoq gi, yhang lé loq mai shê mù Damaskuq myuq shut shuí wang ló akô. ⁹ Sholuq gi, sum nyí tup myoqjit byuq mù luí, a zo a shuq é nyi byuq ri.

¹⁰ Damaskuq myuq má Anani gâ é chángzo rayuq nyi ri. Yhumsing gi, yhang lé, "Anani ê." ga shing-rán đông wut ri.

Yhang gi, "Yhumsing ê, shí má nyi lhê." ga tû taí ri.

¹¹ Haú Yhumsing dum taí é gi, "Toq aq, Hkyô-Nyàng gâ é wà hkyô shut è mù, Yudaq é yhùm má, Tarshu byù Sholuq lé é hô aq, yhang gi, kyúdüng nyi ri. ¹² Yhang gi, Anani ga sù wang lé lô mù, yhang é myoq dum myàng sháng gaq ga, yhang é ahtoq má loq ke byí é lé, shing-rán đông myàng bê nghut ri." gâ ri.

¹³ Anani kúm gi, "Yhumsing ê, shí yuq gi, Yerusalem wà mó má, nàng é sân-yúng bang lé a ge é đông hkâm-yhó kut lai lo é hkyanglù lé ngò myo myo wó gyô wú bê; ¹⁴ Shí pé má le, nàng é mying lé lêng é bang banshoq lé chyup rà ga, hkyangjong agyi pé chyáng má é ahko ahkáng wó yu to sù nghut ri." ga tû taí ri.

¹⁵ Nghut kôlhang, Yhumsing gi, "Ru ê aq, shí yuq gi, tûngbaù pé eq yhangmoq é hkohkam pé é hí má le, Israe-laq byu pé é hí má le, ngá é mying lé wún waq rà matú, ngò chùng rà nghu luí hkyin to sù nghut lhê; ¹⁶ Ngá mying é yanmai hkâ-í hpuzo ra hkyô lé, Ngò, yhang lé tûn shit rà nghut lhê." ga taí ri.

¹⁷ Hau htàng, Anani gi, jé è mù, yhùm haú má wàng luí, Sholuq é ahtoq má loq kê to mù, "Gumang Sholuq ê, nàng myoq dum wó myàng mù, Choyiyúng Woi-nyí byíng sháng gaq ga, nàng lé lo é hkyô má, nàng lé htoq shit é Yhumsing Yesuq èq ngo lé nhang kat é nghut lhê." ga taí ri.

¹⁸ Haú hkûn jáng, Sholuq é myoq mai akyap sù é wuí gyó byuq mù, yhang myoq dum wó myàng bê. Haú hkûn, yhang gi, toq mù wui-myhup hkâm yù luí, ¹⁹ zoshuq lé zo mù, wum-o dum lhoq pyíng yù bê nghut ri.

Sholuq, Damaskuq Myuq Má Mungdang Hko É Hkyô

Hau htàng, yhang gi, Damaskuq myuq má é chángzô pé eq rahá rayoq zo zùm yap nyi uchyang, ²⁰ Yesuq gi, Garai Gasàng é Yhangzo nghut é hkyô, haú hkûn jáng tarajong pé má hko kyô nyi bê nghut ri. ²¹ Sholuq é dang lé wó gyô é lhunglhang bang gi, maú byuq bùm kômù, "Shí yuq gi,

Yerusalem wà mó má myìng haù lãng é bang lé lhoq hten lhoq hpyoq sù nghut lhê, a nghut kó lhú? Ahkuî, shî má le, haù su é bang lé chyup yù mù, hkyangjong agyi pè chyáng ló ap rã da luí jé lé é sù a nghut kó lhú?" ga myi bum akô. ²² Sholuq kúm gi, a-tsam je bo lò mù, Damaskuq myuq má nyi é Yudaq byu pé lé taí hpyi kyo luí, Yesuq gi, Hkrisduq yhang nghut nyi é hkyô lé saksé tũn shit ri.

²³ Buinyí tsómra myáng é htâng má, Yudaq byu pé gi, yhang lé sat pyám rã matú haq dã akô. ²⁴ Nghut kôlhang, yhangmoq dã é hkyô lé Sholuq sê pyám ri. Yhangmoq gi, yhang lé wó sat pyám shoq ga, nyí lé myín lé myuq hkum pé má lhom nyi akô. ²⁵ Sholuq é chángzô pé kúm gi, myín má yhang lé shuí yù mù, manghkoq má lúng nhâng luí, wà kyám xewâm mai lhoq nyhum hkyô kat akô nghut ri.

Sholuq, Yerusalem Wà Mó Má Taú Jé Lo É Hkyô

²⁶ Hau htâng, yhang gi, Yerusalem wà mó má jé lo é hkũn, chángzô pé eq zùm yap rã matú shikut wú kôlhang, yhang gi, chángzo dut bê hkyô lé a jíng kô é yanmai, lhunglhâng bang gi, yhang lé gyuq bum akô. ²⁷ Barnaba kúm gi, Sholuq lé lagyo pè chyáng shuí lò mù, Sholuq, hkyô má Yesuq eq hkãsu kut huí é hkyô lé le, Yesuq eq yhang lé taí é dang wó gyô é hkyô lé le, Damaskuq myuq má Yesuq é myìng mai gyuq myit a bo é za hkãsu kut hko kyô é hkyô lé le, yhangmoq lé taí kyô ri. ²⁸ Haù mù, Sholuq gi, yhangmoq eq rahá Yerusalem wà mó má htoq htoq wàng wàng kut nyi uchyang, Yhumsíng é myìng mai a gyuq a kyum é za hko kyô nyi ri. ²⁹ Grik dang nyo é Yudaq byu pé eq le, taí he lhũm nyi akô; nghut kôlhang, yhangmoq gi, yhang lé sat pyám rã dã akô. ³⁰ Haù hkyô lé, gumang wuì sé kôjáng, yhang lé Kesare wà mó má jé shoq dé mù, Tarshu myuq shut nhang kat akô nghut ri.

³¹ Yuda mau, Galile mau eq Samariq mau jowò hkangmó mã é noqkuq hpúng gi, haù yoq pé mã, lhoq gíng lhoq títng é hkyô wó yù mù, nguínón nyi akô; haù Yhumsíng lé gyuq hkunggã é hkyô mã le, Chyoiyúng Woi-nyí eq lhoq pun lhoq kyíng é hkyô pé mã le châng nyi mù, myô jat lo bùm bekô nghut ri.

Ainea Ge Byuq É Hkyô

³² Haù hkũn, Petruq gi, haù mau pé mã hkat kũm wún uchyang, Ludaq wà mó mã nyi é sãn-yúng bãng chyáng é jé ri. ³³ Haù wà mã, gũngjum shî luí shit zãn tup yhupjang mai a wó toq é Ainea gã é byù rayuq lé ê myang ri. ³⁴ Haù mù, Petruq gi, "Ainea ê, Yesuq Hkrisduq, nang lé lhoq gê byi bê nghut ri, toq mù, náng é yhuphpú hen yù aq." ga luí, yhang lé taí ri. Haù hkũn jáng, Ainea wó toq yap bê nghut ri. ³⁵ Ludaq eq Sharon pá mã nyi é lhunglhâng bang gi, haù yuq lé myàng mù luí, Yhumsíng Yesuq chyáng lhing wang lo bum akô.

Dorka Ga Sũ Dum Dui Lo É Hkyô

³⁶ Ahkuî, Yopa myuq mã Tabihta gã é chángzo myiwe rayuq nyi ri; myìng haù lé Grik dang dông gi, Dorka* gã é nghut lhê. Myiwe haù gi, ge é muzó kut nyi é sù eq, asho awuì bang lé alu byí nyi é sù nghut ri. ³⁷ Haù u lé, yhang gi, nõhpyo hui mù shi ló bê nghut ri. Yhâng mâng lé gi, chi mù luí ahtoq gok mã jang tô akô. ³⁸ Ludaq wà mó gi, Yopa myuq eq chyáng é yanmai, haù myuq mã Petruq nyi é lé chángzô pé wó gyo kôjáng, yhangmoq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

³⁹ Haù hkũn, Petruq gi, toq mù, haù nhik htâng châng e ló ri. Yhang jé jáng, ahtoq pyám gok mã shuí hâng yu akô. Chuimó myhí pé lhunglhâng bang gi, yhâng nãm mã yap mù ngaù uchyang, yhangmoq eq rahá nyi tô ashí hkũn Dorka hkyup é buhíng eq gotũ mebu pé lé tũn shit nyi akô.

* 9:36 Dorka gã é lichyúm gi, "chochĩ" gã é nghut lhê.

⁴⁰ Petruq kúm gi, lhunglhâng bang lé htoq ló nhâng mù, hkyihput htuq luí, kyûdung mù, mâng shut lhing wú luí, "Tabihtha ê, toq aq!" ga taí ri, haú hkûn myiwe haú myoq hpóng lô mù, Petruq lé myàng jáng, toq zung lo ri. ⁴¹ Petruq gi, loq lhâm kat mù yhang lé lâng toq yù luí, lumjîng bang eq chuimó myhî pé lé wut yù mù, duì gú ap byî ri. ⁴² Haú hkyô lé, Yopa myuq mâ é bang banshoq wó gyô ló kômù luí, byù myo myo gi, haú Yhumsîng Yesuq lé lumjîng bum akô nghut ri. ⁴³ Haú mù, Petruq gi, shokuq loqmú saí é Simun ga sù eq rahá, Yopa myuq má rayoq zo nyi nyi ri.

10

Koneli É Shing-rán

¹ Ahkuí, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap mâ é nghut lhê. ² Yhang gi, tarâ hkungga myit bò luí, yhâng é yhumbyù banshoq bang eq rahá Garai Gasang lé gyuq hkunggâ nyi lhê eq, myùng bang lé alu myo myo byi uchyang, Garai Gasang lé hkâ-nhám le kyûdung nyi ri. ³ Ra-nyí lé, myinhtâng sum hkyíng kô má, Garai Gasâng é maumang lagyo rayuq gi, yhâng chyáng jé mù, "Koneli ê." ga luí, yhang lé wut é lé, shing-rán mai de de myang ri.

⁴ Haú mù, haú yuq lé wú tsuq to mù, "Yhumsîng ê, hai hkyô nghut lhê lhu?" ga gyuq myit eq myí ri.

Maumang kúm gi, "Náng é kyûdung dang eq alu byî é hkyô gi, Garai Gasâng é hí má, hkungga masat dông hkyâng bê nghut ri. ⁵ Ahkuí, Yopa myuq shut byù nhang kat mù, Petruq gâ é sù Simun lé ê shuí lò nhâng aq. ⁶ Yhang gi, wuimau yàm mâ é, shokuq hkyup zô é Simun yhûm má bíng nyi ri." ga taí ri.

⁷ Koneli gi, yhang eq dang taí é maumang lagyo ló byuq jáng, dui-nhâng zoshâng í yuq eq, yhâng chyáng hkâ-nhám le châng nyi bang mâ é, tarâ hkunggâ é gyezo rayuq lé ji yù mù,

⁸ dut laí lo é hkyô banshoq, yhang-moq lé taí kyo luí, Yopa myuq shut nhang kat ri.

Petruq É Shing-rán

⁹ Htang nyí nyí-káng u lé, yhang-moq, Yopa myuq jé ló yâm má, Petruq gi, kyûdung râ ga, yhumhkûng shut doq ló ri. ¹⁰ Haú hkûn, yhang gi, zòmut luí rajung jung zô nau nyi ri; nghut kôhang, zoshuq ru gaí nyi ashî le, yhang moq byuq ló mù myoqwup shing-rán myang é gi, ¹¹ mauhkûng bóng lô mù, hpajóng mó sù é lé, myi chyûn má zui luí myigùng shut lhoq hkyô kat é azíng lé myang ri. ¹² Haú hkaú má, myigùng htoq mâ é hkyí myi hkyí dap é jung dusak ahú hú eq dô yê é jung ahú hú, mau má dang é nghoq ahú hú, lúng tô ri. ¹³ "Petruq ê, toq mù, sat zo aq." gâ é danghtê le mying htoq lo ri.

¹⁴ Petruq kúm gi, "Yhumsîng ê, haú gi, a wó dut, achaq achyut é eq a sansêng é zè lé, ngò hkâ-nhám le a zô wú." ga tú taí ri.*

¹⁵ Haú hkûn, "Garai Gasang lhoq san lhoq séng bê zè lé, a sanséng hkâ-nghû." ga luí, yhang lé dum taí kat ri.

¹⁶ Haú su ga sum dâm taí é htâng má, zè haú lé radá dâm mauhkûng shut wup yu ló bê nghut ri.

¹⁷ Ahkuí, Petruq gi, yhang myang é shing-rán lé haí wá nghut lhê lhu ga luí, myit maú nyi é hkûn, haú Koneli nhang kat é bang gi, Simun é yhûm lé myang hô kômù, hkumtot má yap to luí, ¹⁸ Petruq gâ é sù Simun, yhûm haú má nyi a nyi é lé, wut myí wú akô.

¹⁹ Petruq gi, shing-rán haú lé ru myit wú nyi ashî le, Woi-nyí gi, "Wú aq, byù sum yuq nang lé ho nyi akô, toq mù gyó ló aq; ²⁰ yhangmoq gi, ngò nhang kat é bang nghut é yanmai, myit haí a úng-âng é za, yhangmoq eq rahá bo ló aq." ga taí ri.

²¹ Haú mù, Petruq gi, haú bâng chyáng gyó ló luí, "Nungmoq hô nyi é sù gi, ngò nghut lhê, haí ra luí lé kô é lhu?" ga myí ri.

* 10:14 Nhung 11 lé wú aq.

22 Yhangmoq taí é gi, "Dingmán é, Garai Gasang lé gyuq hkunggâ é, Yudaq amyû lhunglhâng bâng é hí má myoqdong wó é, shô up gyezau Koneli gi, nang lé yhâng é yhûm má ji hâng yù mù, nàng taí é dang gyo yù râ matú, yhang lé chyoiyúng maumang lagyô èq taí shit kyô é hkyô lé wó yû luí, ngamoq lé nhang kat é nghut lhê." ga akô. 23 Haú mù luí, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq mù, yhangmoq eq rahá bo ló ri; Yopa myuq mâ é gumang wuì ra-am le châng akô nghut ri.

Koneli Lé Petruq Huí É Hkyô

24 Hau htang nyí, yhangmoq gi, Kesare wà mó shut wang ló akô. Koneli gi, yhâng é gumang wuì eq buinùm jimyi wuì lé ji tsíng to mù, yhangmoq lé lánng nyi ri. 25 Petruq wang ló jáng, Koneli gi, te yù mù, yhâng é hkyi wang má paí gop noqkuq ri. 26 Petruq kúm gi, "Toq aq, ngò le byù ru nghut lhê." ga luí, taí uchyang yhang lé tu toq ri.

27 Haú mù, Petruq gi, yhang eq dang nyô uchyang wang ló wú le, byù myo myo zup zíng tô bum é lé myang ri. 28 Haú hkûn, yhang gi, yhangmoq lé, "Yudaq byù rayuq gi, noqkuq htúng dông tûngbaù rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akô. Nghut kôlhâng, ó yuq lé le achâq achyut dut ri, a sanséng dut ri nghû a ge taí é hkyô lé gi, Garai Gasang, ngo lé tûn shit bê. 29 Hau é yanmai, nungmoq ngo lé ji kat é hkûn, ngò a he pyâm é za châng lé lo é nghut lhê. Haú mù luí, haí ra kô é yanmai, ngo lé ji akô nghû ngò myí nau ri." ga taí ri.

30 Haú hkûn, Koneli gi, "Laí lò bê myi nyí nyí, myinhâng sum hkyíng má, ngá é yhûm má, ngò kyûdûng nyi le, danso loq, duqbó é mebu wut é byù rayuq ngá é hí má yap htoq shit mù, 31 'Koneli é, Garai Gasang gi, náng é kyûdung danghtê lé le gyo byi bê; nàng alu byí é hkyô lé le, bun byi bê

nghut ri. 32 Hau é yanmai, Yopa myuq shut byù nhang kat mù, Petruq gâ é Simun lé ji nhâng aq. Haú yuq gi, wuimau yâm mâ é shokuq hkyup zô é Simun yhûm má bíng nyi ri.' ga taí ri. 33 Haú mù luí, haú hkûn jáng ngò náng chyáng byù nhang kat bê nghut lhê. Ahkuí, nàng jé é gi, gyai gê bê nghut ri. Yhumsíng yhang nang lé taí nhang é gû banshoq gyô yù râ matú, ahkuí ngamoq lhunglhâng bang Garai Gasang é hí má nghut nyi lhê." ga taí ri.

Petruq Hko Kyô É Mungdang

34 Haú hkûn, Petruq dang-hi hpông é gi, "Garai Gasang, myoqdong a hkyin é hkyô lé, ahkuí ngò gè gè yhang sé bê. 35 Byù myû chângjup má, Yhang lé gyuq hkunggâ é eq tengmán é muzó jizó saí é sù gi, Yhang é hí má myoqdong wó nyi ri. 36 Nyi mi-nyí, joq mijoq é Yhumsíng, Yesuq Hkrisduq é yanmai, nguínón hkyô eq sêng é gabú danglù lé hko kyo sháng gaq ga, Israelaq byu pê chyáng Garai Gasang hun kat é mungdang eq rajung za, 37 bapisma hkyô lé, Yohan hko é htâng, Galile mau mai Yuda mau banshoq má taí pyo ló é hkyô lé, nungmoq sé gû nghut nyi lhê. 38 Haú gi, Garai Gasang èq Chyoiyúng Woinyí eq wum-o a-tsam byí to bê sù, Nazaret wà byù Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat èq zing-ri huí é bang banshoq lé lhoq gê byí wún ri.

39 Haú mù, Yudaq byu pê é ming má le, Yerusalem wà mó má le, yhang zui saí bê muzó banshoq é saksê pé gi, ngamoq nghut nyi lhê. Haú yuq lé yhang, yhangmoq sik zíng má jén sat pyám bekô nghut ri. 40 Garai Gasang kúm gi, sum nyí nghû râ buinyí má, haú yuq lé lhoq dui toq kat é nghut mù luí, byù banshoq é hí má a nghut e za, saksé kut râ matú Garai Gasang hkyin to gù nghut é bang ngamoq é hí má za htoq shit bê nghut ri. 41 Yhang shi é mai dum dui toq ló é htâng má, ngamoq yhang, Yhang eq

rahá razo rashuq wó kut yu é nghut lhê. ⁴² Yhang gi, asak dui é bang eq shî bê bâng é tarâ agyì kut râ matú, Garai Gasâng èq Yhang lé hkyin tò é sù nghut é hkyô lé, byu pé lé hko kyo râ eq, saksé hkám râ matú, ngamoq lé hkunmó hkyô to bê nghut ri. ⁴³ 'Yhang lé lumjúng é bang yuq hkangmó gi, Yhâng é mying é yanmai, yubak hkyut pyám byí é hui kó râ nghut lhê.' ga luí, taí é myiqhtoi ban-shoq gi, Yhâng é hkyô lé saksé hkam byí é bang nghut nyi akô." ga taí ri.

Chyoiyúng Woi-nyí Lé, Túngbaù Pé Wó Hap Yu É Hkyô

⁴⁴ Petruq gi, haú hkyô lé ru taí nyi ashî le, dang haú wó gyô é ban-shoq bâng ahtoq má Chyoiyúng Woi-nyí gyó jé lo ri. ⁴⁵ Túngbaù pé é htoq má lháng Chyoiyúng Woi-nyí gâ é chyunghuq lé hut hkyô kat é yanmai, Petruq eq rahá lé é, ahpyo-kuq hpyit bê é lumjúng bang Yudaq byu pé gi, maú bum akô. ⁴⁶ Hkâsu mù gâ le, yhangmoq gi, laklaí dang nyo é lé le, Garai Gasâng lé hkya-on kô é lé le, wó gyô bùm kô é yanmai nghut ri.

⁴⁷ Haú mù, Petruq gi, "Ngamoq su Chyoiyúng Woi-nyí hkâm yù bê bang lé, baptisma a byi nhâng râ gi, wuì lé ó yuq wó hkûm to râ lhú?" ga taí ri. ⁴⁸ Hau htâng, yhang gi, yhangmoq lé Yesuq Hkrisduq é mying lang luí wui-myhup hkâm yù râ matú pying tô ri. Haú hkûn, yhangmoq gi, Petruq lé buinyi ra-í nyí, nyi gyó shi aq ga chòm hkûm akô.

11

Petruq, Yhang Kut É Muzó Lé Shit Kyô É Hkyô

¹ Túngbaù pé le, Garai Gasâng é mungdang lhom yù bê gâ é hkyô lé, lagyô pé eq Yuda mau pé mâ é gumang wuì wó gyô akô. ² Haú mù, Petruq, Yerusalem wà mó má doq ló é hkûn, ahpyo-kuq hpyit hkyô lé myit zuq é lumjúng bang gi, ³ "Nàng gi, ahpyo-kuq a hpyit é bâng é yhûm má wàng mù, yhangmoq eq razo rashuq

kut ri." ga luí, yhang lé mara lhom taí hun bum akô.

⁴ Haú hkûn, Petruq gi, haú dut lò bê hkyô lé awang mai ahpyo hpyot, yhangmoq lé taí sân kyô hi kat é má, ⁵ "Ngò gi, Yopa myuq má kyûdûng nyi le, moq byuq ló mù shing-rán myang é gi, mauhkûng mai hpajóng mó sù é myi chyûn shut zui luí, ngá shut lhoq hkyô kat é zè gyó jé lo é lé, myang ri. ⁶ Haú lé rago za saí wú le, myigùng htoq má hkyí myi hkyí dap é jung dusak, yosô zè, dô yê é jung eq, maulat nghoqzô pé bo tô é lé, ngò myàng luí, myit wú nyi é hkûn, ⁷ 'Petruq è, toq mù, sat zo aq.' gâ é danghtê lé, ngò wó gyô ri.

⁸ Ngò kúm gi, 'Yhumsing è, haú gi, a wó dut, achag achyut é eq a sansêng é zè, ngá é nhut má hkâ-nhám le a wang wú.' nghú taí kat é nghut lhê.

⁹ Haú hkûn, 'Garai Gasâng lhoq san lhoq yúng bê zè lé, a sansêng hkâ-nghú.' ga luí, mauhkûng mai dum taí kat ri. ¹⁰ Haú su ga sum dâm taí é htâng má, haú pé ban-shoq lé mauhkûng shut dum wup yu ló bê nghut ri.

¹¹ Haú hkûn jáng, Kesare wà mó mai, ngá chyáng nhang kat é byù sum yuq gi, ngò nyi é yhûm hkumtot má jé nyi tô akô. ¹² Chyoiyúng Woi-nyí gi, ngo lé myit a úng-âng é za, yhangmoq htâng châng è aq ga taí ri; shî gumang hkyuq yuq le ngò eq rahá è mù, Koneli é yhûm má ngamoq wang é. ¹³ Haú hkûn, haú yuq gi, yhâng é yhûm má maumang lagyo lé htoq shit é hkûn, yhang hkâsu myang é hkyô lé le; maumang lagyô èq yhang lé, 'Yopa myuq shut byù nhang kat mù, Petruq gâ é sù Simun lé è jì nhâng aq; ¹⁴ nàng eq náng yhumbyù lhunghâng bang hkyi yù hui râ danglù, yhang, náng chyáng wun lé lô byi râ nghut lhê.' ga taí é hkyô lé le, ngamoq lé taí kyô ri.

¹⁵ Ngò dang taí hi ló nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri. ¹⁶ Haú hkûn sheq, ngò gi, 'Yohan gi, wuì èq

wui-myhup hkám byî ri; nungmoq kúm gi, Chyoiyúng Woi-nyí eq wui-myhup hkám byî é hui kó râ nghut lhé.' ga luí, Yhumsíng taí é dang lé bûn kat ri. ¹⁷ Haú mù luí, Yhumsíng Yesuq Hkrisduq lé lumjíng é hkûn, ngamoq lé Garai Gasâng jeju chyunguq byî é su, Yhang, yhangmoq lé le byî é nghut le gi, ngò gi, hkasû é byù nghut luí, Garai Gasang lé wó lhom hkûm pyám râ lhú?" ga taí ri.

¹⁸ Yhangmoq gi, haú hkyô lé wó gyo kôjáng, taí jang a joq lo kômù, "Ó! Nghut bê, Garai Gasang gi, tûngbaù pé lé le, asak duì râ matú myit lhîng hkyô byi bu-nhung!" ga luí, Garai Gasang lé chòm hkyâ-ôn akô nghut ri.

Antioku Wà Mâ É Noqkuq Hpúng

¹⁹ Ahkuí, Stehpan lé sat pyám kô é htâng má, zing-ri hui kô é yanmai, byo myín ló é bang gi, Hpinisi mau, Kupru zinlóng eq Antioku wà mó jé shoq byo ló kômù, Yudaq byu pé lé baú za, mungdang haú hko kyô akô nghut ri. ²⁰ Nghut kôlhang, yhangmoq mâ é Kupru byù eq Kuruni byù ra-am gi, Antioku wà mó má châng jé ló kômù, Yhumsíng Yesuq é gabú danglù lé, Grik pé lé le taí kyô bum akô. ²¹ Haú Yhumsing é loq gi, yhangmoq eq rahá nghut nyí mù luí, byù myo myo gi, lumjíng mù, Yhumsing chyáng lhing wang lo bùm bekô nghut ri.

²² Haú bâng é hkyô lé, Yerusalem noqkuq hpúng é no má hkyang jé ló é nghut mù luí, yhangmoq gi, Barnaba lé Antioku wà mó jé shoq nhang kat akô. ²³ Yhang jé é hkûn, Garai Gasâng jeju bo nyí é lé myàng jáng, yhang gi, gabú luí, yhangmoq é myit nhiklum banshoq eq haú Yhumsíng má lhumzuí nyí râ matú, lhunglhang bang lé myit wum byî ri. ²⁴ Hkâsu mù gâ le, Barnaba gi, byù gè nghut mù, Chyoiyúng Woi-nyí le, lumjíng myit le byíng tô é sù nghut nyí ri. Haú mù, byù myo myo gi, haú Yhumsing chyáng jat wang lo bùm bekô nghut ri.

²⁵ Haú htâng, Barnaba gi, Sholuq lé é hô râ ga Tarshu myuq shut é mù,

yhang lé myàng jáng, Antioku wà mó má shuí lo ri. ²⁶ Haú mù, yhangnhik gi, razàn gón noqkuq hpúng haú eq rahá zum nyí kô é nghut mù luí, byù myo myo lé wó mhoqshit akô. Chángzô pé gi, Hkristan gâ é myìng lé, Antioku wà mó má sâng-hi wó yù bekô nghut ri.

²⁷ Haú u lé, myiqhtoí pé ra-am gi, Yerusalem wà mó mai, Antioku wà mó má lé jé bum akô. ²⁸ Haú bang mâ é Agabu gâ é sù gi, toq yap mù, Romaq mingkan tîng má mutmó gyó lô râ nghut é hkyô lé, Woi-nyí eq tûn shit é dông taí kyô ri; (Haú gi, hkohkâm Klodi é pyat má dut bê nghut lhé.) ²⁹ Haú mù luí, chángzô pé gi, Yuda mau mâ é gumang wui lé, ó le ó wó dut é myhó garum kat râ ga, myit hpyit yu bum akô. ³⁰ Haú eq rajung za kut kômù, yhangmoq gi, chyunguq haú pé lé Barnaba eq Sholuq nhik é loq mai suwún wui pé chyáng hun kat bekô nghut ri.

12

Petruq, Htóng Mai Wó Lut Htoq Lo É Hkyô

¹ Haú u lé, Herut hkohkâm gi, hpúng byù ra-am lé chyup yù mù, zing-ri râ ga ngantsâ nyí ri. ² Haú mù, Yohan é yhangmang Yakuq lé sham eq sat pyám nhang ri. ³ Haú hkyô lé Yudaq byu pé wú gabú é lé myàng jáng, yhang gi, Petruq lé le, jâng chyup yu ri. Haú dut é gi, mún a kat é muk zo poí u lé nghut ri. ⁴ Herut gi, Lhoqlhai Poí lai jáng sheq, mingbyù wui hí má jéyáng râ ga myit tô é yanmai, yhang lé chyup yu é htâng má, htóng má lhûng tô mù, yhang lé zúng râ matú, gye myi yuq yuq kut myi hpúng lé ap tô ri.

⁵ Haú mù, Petruq gi, htóng má lúng tô ri; hpúng byù wui kúm gi, yhang é matú Garai Gasâng chyáng kyû gyai chòm dung byî nyí akô nghut ri.

⁶ Petruq gi, Herut eq yhang lé jéyáng râ matú she htoq yù râ hí myìn lé, shamtoq-tui í hkat eq tuí é hui luí, gyezo í yuq é gyoro má yhup myhí

tô ri; zúng é bang le htóng hkum má zúng nyi bum akô. ⁷ Haú hkûn, Yhumsing é maumang lagyo rayuq lé htoq shit mù, gok haú má duqbó lo ri. Maumang lagyo haú gi, Petruq é namcham má é hpuk kat mù, "Myap toq wú aq." ga nhaú ri; haú hkûn, Petruq é loq mâ é toqjâng tui pé le gyut gyó ló bê nghut ri.

⁸ Maumang dum taí é gi, "Hpyi-hit hit mù, hkyî-tsung tsung aq." gâ ri; Petruq le taí é eq rajung za kut ri. "Náng é bumó wut mù ngá htâng cháng aq." ga yhang lé maumang lagyo dum taí ri. ⁹ Haú hkûn, yhang gi, htóng mai yhâng htâng châng htoq ló ri; nghut kôlhang, maumang lagyo kut é muzó haú gi, gè gè nghut é lé, yhang a sé mù, shing-rán myang é nghut ri ga myit yu ri. ¹⁰ Ahkuí, yhangnhik gi, zúng tô é jowò í wô lai mù, wà má htoq é shamtoq hkum má jé jáng, hkum haú le yhang baú bóng lô mù, yhangnhik htoq luí, wà hkyô rahkat má sô ló le, maumang lagyo gi, haú hkûnjáng, yhâng chyáng mai gâng ló byuq bê nghut ri.

¹¹ Ahkuí, Petruq gi, dum bûn gyîng lò jáng, "Yhumsing gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyù tô é hkyô banshoq mai, ngo lé hkyi yù bê nghut é lé, ahkuí ngò gè gè sé bê." ga taí ri.

¹² Haú hkyô lé myit sê kat jáng, yhang gi, byù myo myo zing mù, kyûdûng nyi é jowò, Markuq gâ é Yohan é yhângnu Mariq é yhûm má jé ló ri. ¹³ Haú mù, yhang gi, yhûm wàng hkum lé ló bat é hkûn, Roda gâ é dui-nhâng zoshâng myiwe zo rayuq gi, gyô wú râ ga htoq lé lo ri. ¹⁴ Yhang gi, Petruq é htê nghut é lé sê gyô kat jáng, lûm gabú luí hkum a hpông byi shí é za, yhûmhkaú shut din wang ló mù, "Petruq gi, hkum mhó lut má lo yap tô ri." ga ló taí kyô ri.

¹⁵ Yhangmoq kúm gi, "Nàng na bê nghut ri." ga yhang lé taí akô. Yhang gi, gè gè nghut ri ga ru taí nyi ri.

Dum, yhangmoq gi, "Yhâng é maumang lagyo nghut âng ri." ga taí akô.

¹⁶ Nghut kôlhang, Petruq gi, hkum ru bat nyi mù, yhangmoq hpông kat é hkûn, yhang lé myàng kôjáng, chôm maú byuq bum akô. ¹⁷ Yhang gi, yhangmoq lé zim za nyi keq ga loq lik shit mù, yhang lé Yhumsing eq htóng mai hkâsu kut shuí htoq yu é hkyô lé taí kyo luí, "Shí hkyô lé Yakuq eq gumang wuì lé taí kyô kat keq." ga taí ri. Hau htâng, yhang htoq ló luí, jowò gó shut e ló bê nghut ri.

¹⁸ Ahkuí, maubó jáng, gyezô pé gi, Petruq haí dut byuq é hkyô lé a sé kô é yanmai, gyai maú gabyông bum akô. ¹⁹ Herut kúm gi, Petruq lé ho wú le a myàng jáng, zúng é bang lé myi gôn wú mù, yhangmoq lé sat pyám râ matú hkunmó hkyô ri.

Herut Hkohkâm Shi Byuq É Hkyô

Hau htâng, yhang gi, Yuda mau mai Kesare wà mó má gyó ló mù ló nyi nyi ri. ²⁰ Haú gyoro má, Herut hkohkâm gi, Turuq eq Sidun byu pé lé gyai nhik-yô nyi ri. Haú mù luí, yhangmoq gi, myit rahkat zâ eq yhâng chyáng ê mù, Blastu gâ é, hkohkâm wa lum tô é suwún hpó lé ê lûm hkaú mù, simsaq hkyô é dúng akô. Hkâsu mù gâ le, yhangmoq é zoshuq wó râ matú gi, Herut é ming lé lûm hkaú nyi kô é yanmai nghut ri.

²¹ Haú hkûn, ding lhûm tô é buinyi má, Herut gi, hkohkâm hking wut chûng mù, hkohkâm tanghkuq má zùng luí, yhangmoq lé hkohkâm mungdang byi ri. ²² Haú jáng, mingbyû wuì gi, "Htê shí gi, waxâng byu é htê a nghut, garai wá é htê sheq nghut ri." ga garû bum akô. ²³ Radá dâm, Herut gi, Garai Gasâng é hpungwup shingkang lé a tê byi é yanmai, Yhumsing é maumang lagyo gi, yhang lé dâm byi luí, yhang gi, luq eq hkê é hui mù, shi byuq bê nghut ri.

²⁴ Haú Garai Gasâng é mungdang gi, sê é bang myô jat lò mù, je riyhang byo myín lô bê nghut ri.

²⁵ Barnaba eq Sholuq nhik gi, Yerusalem wà mó má yhangnhik saí

túm nyi é muzó ban saí jáng, Markuq gâ é Yohan lé shuí chùng mù, Antioku và mó shut taû ló bekô nghut ri.

13

Barnaba Eq Sholuq, Hkyin Nhang Kat Huê É Hkyô

¹ Ahkuî, Antioku và mó mâ é noqkuq hpúng má, myiqhtoî pé eq sará pé le lom nyi akô. Haú bang gi, Barnaba, Niger* gâ é Simeon, Kuruni byù Luki, (Herut zau hpó eq zum kô lò sù) Manaen eq Sholuq pé nghut akô. ² Yhangmoq gi, zoshuq gám luí Yhumsing lé noqkuq dojaú nyi é hkûn, Chyoiyúng Woi-nyí gi, "Ngá é mù wùn waq râ matú ji tô é Barnaba eq Sholuq nhik lé, hkyin to keq." ga taí ri. ³ Haú mù luí, yhangmoq gi, zoshuq gám luí kyûdung mù, yhangnhik htoq má loq ke byi kô é htâng, yhangnhik lé nhang htoq kat akô nghut ri.

Kupru Zinlóng Má Dut É Hkyô

⁴ Haú mù, yhangnhik gi, Chyoiyúng Woi-nyí eq nhang kat é eq rajung za, Seluki và shut gyó ló mù, haú mâ é lhaí ji luí, Kupru zinlóng má jé ló luí, ⁵ Salami và mó má nyi nyi é hkûn, Yudaq byu pé é tarajong pé má, Garai Gasâng é mungdang hko kyô akô. Markuq gâ é Yohan le yhangnhik lé htuqluq htuqbang kut nyi ri.

⁶ Yhangmoq gi, haú zinlóng mai laí byit e ló mù Pahpu và mó jé ló kô é hkûn, myiqhtoî pyoq nghut sù Bara-Yesuq gâ é Yudaq byù myoqheq sará rayuq eq htông hui akô. ⁷ Haú yuq gi, Sergi Poluq gâ é, myit hpaqchyí kûng é ginwáng zau hpó é byù rayuq nghut lhê. Minggyi hpó haú gi, Garai Gasâng é mungdang gyô yù naù mù, Barnaba eq Sholuq nhik lé ji yu ri. ⁸ Haú hkûn, myoqheq sará gâ é lichyúm dông myhâng é Eluma le gâ é Bara-Yesuq kúm gi, ginwáng zau hpó lé haú lumjúng hkyô má a jau ló nhâng nau é nghut mù luí, yhangnhik lé lhom he tang pyâm ri. ⁹ Haú hkûn, Poluq le gâ é Sholuq gi, Chyoiyúng Woi-nyí byíng

mù, yhang lé wú tsuq to luí, ¹⁰ "Myit goí é hkyô eq hpuq lô lhik é hkyô ban-shoq byíng tô é, nat é yhangzo nghut sù, tengmán hkyô hkangmó é gyè hpó é, Yhumsing é tengmán hkyô lé a lhoq hpyoq é a wó nyí lhú? ¹¹ Ahkuî, wú aq, Yhumsing é loq gi, náng chyáng jé mù, nàng gi, rayoq zo builoq a wó myang é za, myoqjit byuq râ nghut lhê." ga taí ri.

Haú hkûn jáng, yhâng é myoq gi, myhì-myhà ga luí mauchut tuq dut lò byuq ri; haú mù, yhang lé shê râ byù ho sop lhing wún ri. ¹² Haú hkyô lé ginwáng zau hpó myàng jáng, Yhumsing eq sêng é mhoqshit é hkyô lé wú maú luí lumjúng bê nghut ri.

Antioku Và Mó Má Dut É Hkyô

¹³ Hau htâng, Poluq eq yhâng luzúm wuî gi, Pahpu và mó mai lhaí ji mù, Pamhpuli mau mâ é Perga và má jé ló akô. Markuq gâ é Yohan kúm gi, yhangmoq eq gang luí, Yerusalem và mó shut taû lú byuq bê nghut ri. ¹⁴ Dum, yhangmoq gi, Perga mai toq e ló le, Pesidi ginwáng mâ é Antioku và mó má jé ló akô. Bánno buinyi má, yhangmoq gi, tarajong má wang zung tô akô. ¹⁵ Haú hkûn, Mosheq é tarâ laiká eq myiqhtoî laiká pé lé ban nghap jáng, tarajong má up bang gi, "Gumang wuî ê, mingbyû wuî lé myit wum byi dang joq kô é nghut le gi, ahkuî taí lo keq." ga luí, yhangmoq chyáng taí nhang kat ri.

¹⁶ Haú hkûn, Poluq gi, toq yap mù, zîm byuq kó sháng gaq ga loq tû luí, "Israelaq byu pé eq Garai Gasang lé gyuq hkunggâ é byu pé ê, chôm gyô yù keq. ¹⁷ Israelaq byu pé é Garai Gasang gi, ngamoq é îchyí îkê pé lé hkyin yù bê nghut mù luí, Egutuq ming má byùbít dut nyi to ashí hkûn, yhangmoq lé kô myhâng nhâng mù, hpungwup a-tsam bo é loq eq haú mau mai shuí htoq ló ri. ¹⁸ Dum, myi xê zàn kô, yoso pé má yhangmoq é a-kyang lé jân pyâm byi mù, ¹⁹ Hkanan ming mâ é byuhú nyhit

* 13:1 Grik dong Niger gâ é gi, byù noq gâ é nghut lhê.

hú lé lhoq htên pyám luí, haú bâng é mingdán má é silí wunlí yhangmoq lé gàm byí ri. Haú gi, myi shô ngo xê zàn kô myáng ri.

²⁰ Hau htâng má, Garai Gasang gi, myiqhtoi Samuelaq é pyat jé shoq tarâ agyí pé lé to byí ri. ²¹ Hau htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamyin amyù má é, Kisha é yhangzo Sholuq lé byi luí, yhang gi, myi xê zàn up bê nghut ri. ²² Hau htâng, Sholuq lé lhoq hkyô pyám mù, Dawiq lé, yhangmoq é hkohkâm kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yhangzo Dawiq lé myàng bê; yhang gi, ngò kut nhang é hkyô banshoq lé kut râ nghut lhê.' gâ ri.

²³ Garai Gasang gi, Yhâng é danggidiq joq é eq rajung za, Israelaq byu pé é matú, haú yuq é awut ashín mai, hkyi yù Sû Yesuq lé, pô htoq nhâng bê nghut ri. ²⁴ Yesuq a jé lé shimá, Yohan gi, Israelaq byu pé banshoq lé myit lhing hkyô eq sêng é bapisma hkyô lé hko kyo bê nghut ri. ²⁵ Dum Yohan gi, yhang zuí é muzó ban ló é u lé, 'Ngo lé ó nghut é su ngâm tô akô lú? Ngò gi, haú yuq a nghut, wú keq, ngá é htâng má rayuq jé râ nghut lhê, haú yuq é hkyi-tsung tui hpyí râ lhang ngò a gíng.' ga taí ri.

²⁶ Abraham é yhangzo yhangshú pé eq Garai Gasang lé gyuq hkunggâ é tûngbaù, gumang wui é, shí hkyi yù hkyô mungdang lé, nga-nhông chyáng byi kat bê nghut ri. ²⁷ Yerusalem wà mó má é bang eq, yhangmoq é zau suwún wui gi, Yhang hkyi yù sù nghut é lé le, Bánno buinyi hkangmó nghap é myiqhtoi pé é dang lé le, a sê gyo kô é yanmai, Yesuq lé sat râ doqdân é hkûn, myiqhtoi pé é dang lé lhoq dik pyám bekô nghut ri. ²⁸ Yhâng chyáng shí gíng é mara a myàng kôlhang, Yhang lé sat pyám nhâng râ matú, Pilat chyáng dúng akô. ²⁹ Yhangmoq gi, yhang eq séng luí, kâ to má kâ to ban lhoq dik kôjáng,

Yhang lé tapzîng mai yu hkyó mù, lup má kat tô akô nghut ri. ³⁰ Garai Gasang kúm gi, Yhang lé shi é mai lhoq dui toq yù bê nghut lhê. ³¹ Yhang gi, Galile mau mai Yerusalem wà mó jé shoq, hí lé Yhâng htâng châng é bâng chyáng buinyi tsómra myáng shoq htoq shit shit kut ri. Haú bang gi, ahkuí, nga-nhông Israelaq byu pé é hí má, Yhâng é saksé dut bekô nghut ri.

³² Haú mù, í dam lhê é Hkya-on Kungtôn Laiká má,

'Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê.'*

ga luí, kâ tô é eq rajung za, ³³ Garai Gasang gi, íchyí îwâ pé lé byi tô é danggidiq lé, Yesuq lé lhoq dui toq byí é dông, yhangmoq é yhangzo yhangshu ngamoq é matú, lhoq dik byí é gabú danglù lé, nungmoq chyáng ngamoq wun lé byi bê. ³⁴ Hau htoq agó, Yhang htên byoq é hkâ-nhám a hui shoq, shi é mai lhoq dui toq yù râ hkyô eq séng luí, Garai Gasang taí é gi, 'Dawiq lé byí tô é danggidiq eq rajung za, chyoiyúng é eq lumgíng é jeju lé, ngò nungmoq lé byi râ nghut lhê.'*

gâ ri. ³⁵ Hkya-on Kungtôn Laiká gó wô má le,

'Náng é Chyoiyúng Sû lé, Nàng htên byoq nhâng naù râ a nghut.'*

ga taí tô ri.

³⁶ Ahkuí, Dawiq gi, yhâng é pyat banshoq má Garai Gasang ô nau é dông ban wùn waq jáng, shi byuq luí, íchyí îwâ pé eq rahá myhup pyám hui mù, htên byoq byuq é hui bê nghut ri. ³⁷ Garai Gasang lhoq dui toq yu é sù kúm gi, htên byoq huí é a nghut.

³⁸ Haú nghut é yanmai, gumang wui é, haú yuq mai yubak wó hkyut pyám byí é hkyô lé, nungmoq lé hko kyô nyi é nghut é le, sê nyi keq. ³⁹ Hau htoq agó, Mosheq é tarâ èq mara hkyut san byí é a hui kôlhang, haú yuq lé lumjíng é bang gi, hkyô lhumjup

má mara hkyut san byî é hui râ nghut lhê. ⁴⁰ Hau é yanmai,

'Wú keq, jihpoî é bang ê, maú mù luí htum byuq keq;

nungmoq é buinyì pé má ngò rajung jung kut htoq râ nghut lhê;

⁴¹ haú hkyô lé, rayuq yuq, nungmoq lé hkaî kyo kôlhang, jing kó râ a nghut. [✧]

ga luí, myiqhtoî pé taí é dang, nungmoq má a ang sháng gaq, sidiq nyi keq." ga hko kyô nyi ri.

⁴² Ahkuí, Poluq eq Barnaba nhik tarajong mai htoq ló le, htâng lhê é Bánno buinyì má le, haú pé lé dum hkaî kyo râ matú yhangmoq chôm dúng akô. ⁴³ Chôm byo htoq ló kô é hkûn, Yudaq byu pé eq Yudaq no-qkuq htûng má lhing wang lo é tarâ hkunggâ é byù myo myo gi, yhangnhik é htâng má châng bùm kô é nghut mù luí, Garai Gasâng jeju má gîng nyi râ matú, yhangnhik gi, yhangmoq lé lhoq pun lhoq kyîng akô nghut ri.

Tûngbaù Pé Chyáng Lhing Lo É Hkyô

⁴⁴ Hau htang lhê é Bánno buinyì má, Garai Gasâng é mungdang gyô yù râ matú, rawa bang aluq shoî banshoq, lé zup zîng to bum akô. ⁴⁵ Yudaq byu pé kúm gi, byù moq mó haú lé myàng jáng, manon myit baú byíng bùm kômù luí, Poluq taí é dang lé taí htíng é eq nhîng pyâm akô.

⁴⁶ Poluq eq Barnaba le gyuq myit a bo é dông taí é gi, "Garai Gasâng é mungdang lé, nungmoq lé hí taí kyo râ dut é yanmai, ngá-nhik taí bê nghut lhê. Nghut kôlhang, nungmoq gi, haú lé lhom he-ngik pyám kômù, ahtum abyuq é asak eq gingdán é dông yhumsing gùng lé a myit yù kô é yanmai, wú keq, ahkuí, ngá-nhik gi, tûngbaù pé shut lhing ló berâ nghut lhê. ⁴⁷ Hkâsu mù gâ le, haú Yhumsîng gi,

'Hkyi yù hkyô lé maumyî htum shoq wó chûng jé râ matú, Ngò, nàng lé tûngbaù pé é maubó dut nhâng bê. [✧]

ga luí, ngamoq lé hkunmó hkyó kat bê." gâ ri.

⁴⁸ Tûngbaù pé gi, dang haú lé wó gyo kôjáng, gabú é eq Yhumsing é mungdang lé hkya-on kungtôn nyi bum akô. Ahtum abyuq é asak lé wó râ matú hkyin to huí é lhunglhang bang le, lumjîng bum akô nghut ri.

⁴⁹ Yhumsîng é mungdang gi, haú ming gón jam lò bê nghut ri. ⁵⁰ Yudaq byu pé kúm gi, Poluq eq Barnaba nhik lé zing-ri râ matú, aróng wó é myiwe wuì mâ é tarâ hkungga bang eq, haú wà mâ é suwún wuì lé, nhik lhoq yo kôluí, yhangnhik lé maukyo mai chôm hkat htoq pyâm akô. ⁵¹ Yhangnhik gi, yhangmoq lé a nau é hkyô tûn shit é dông, yhumsing é hkyî mâ é hpuilhaú lé yhangmoq chyáng ko hkyô pyâm to kômù, Ikoni wà mó shut ló byuq bekô nghut ri. ⁵² Chángzô pé kúm gi, gabú é htoq agó, Choyiyúng Woi-nyí byíng nyi bum akô nghut ri.

14

Poluq Eq Barnaba Nhik, Ikoni Wà Mó Má Ló Jé É Hkûn Lhê Hkyô

¹ Ahkuí, Ikoni wà mó má nghut nyi é hkûn, Poluq eq Barnaba nhik gi, Yudaq byu pé é tarajong má rahá wàng mù, Yudaq byù eq tûngbaù pé ajùm ayò lumjîng bùm kó shoq, wum kat hko kyô akô. ² Nghut kôlhang, a lumjîng é Yudaq byu pé gi, lumjîng é gumang wuì lé a ngui râ dông tûngbaù pé lé mhoq hpyoq yù mù, shuí gumlaú akô. ³ Haú mù luí, yhangnhik gi, tsómra myang shoq haú má nyi mù, haú Yhumsing é matú gyuq myit a bo é za hko kyô akô; Yhang Yhumsîng le yhangnhik é loq mai limik kumlhá eq mauhpo muzó dut nhang é dông, Yhâng é jeju mungdang lé saksé hkám byî nyi ri. ⁴ Haú wà mâ é bang kúm gi, myit byo ló bùm kô é nghut mù luí, Yudaq byu pé chyáng ra-am, lagyô pé chyáng ra-am, lom byuq ló akô. ⁵ Ahkuí, tûngbaù pé le, Yudaq byù eq yhangmoq é uphkâng bang le,

yangnhik lé rhoi mù luqgok eq dú sat râ ga htim lo bum akô. ⁶ Nghut kôlhang, yangnhik gi, haú hkyô lé bün sê kat kôjáng, Lukaoni ginwáng má é Lustra eq Derbe wà mó eq, hau é awui ayàm wà tiq wà zo pé shut hpang e ló akô. ⁷ Haú pé má le, gabú danglù xoq hko kyô wún akô nghut ri.

Lustra Wà Mó Má Ló Jé É Hkùn Lhê Hkyô

⁸ Ahkuí, Lustra wà mó má, ínu unghkaú mai hkyí hten mù luí, hkâ-nhám le hkyô a wó sô wú é sù rayuq zung tô ri. ⁹ Yhang le Poluq taí é dang lé gyô nyi ri. Poluq gi, haú yuq lé wú tsuq kat é hkùn, wó lhoq gê byi hui râ nghut lhê gâ é lumjín myit yhang chyáng bo tô é lé, myàng byí ri. ¹⁰ Haú mù, Poluq gi, "Toq yap aq!" ga luí, hté mó eq yhang lé taí kat jáng, yhang gi, byam toq kat mù, wó so bê nghut ri.

¹¹ Haú mù, Poluq kut é muzó lé shiwa byu pé myàng kôjáng, yhang-moq gi, Lukaoni dang đông, "Nat hparà pé gi, byù gùng đông kut luí ngamoq chyáng gyó lô bekô nghut ri." ga luí, wut garu bum akô. ¹² Hau htâng, Poluq gi, dang myô taí sù nghut é yanmai, yhang lé Herme ga, Barnaba lé gi, Zeu ga myhín byí akô. ¹³ Haú wà yàm má é Zeu hparà noqkuq yhúm hkyangjong hpó gi, wà hkum má nohtó pé eq ban hkóng pé yu lé mù, shiwa byu pé eq rahá yangnhik lé hkungga nhông byi râ hen akô.

¹⁴ Nghut kôlhang, lagyo nhik Barnaba eq Poluq gi, haú lé wó gyo kôjáng, yhumsing é mebu lêng cheq pyám kôluí, shiwa hpong gung gung shut din wang ê kômù, garú taí kô é gi, ¹⁵ "Hkaú pé ê, haí mù haú su kut lo akô lú? Nga-nhik le nungmoq eq rajung za, xângzo byù za nghut lhê, akyú a bo é hkyô shí pé lé tô pyám to mù, mauhkung eq myigùng, wuìshuq lung-aú eq haú pé má nyi mi-nyì, joq mijoq lé hpan to sù, rú dui nyi é Garai Gasâng chyáng lhing wang lò kó sháng gaq nghú luí sheq, nungmoq lé gabú danglù hko kyô é nghut lhê. ¹⁶ Garai Gasang gi, byù

myú chângjup lé hí hpyang lhê é pyat bán má ó le ó kâm é đông kut nhâng bê nghut ri. ¹⁷ Nghut kôlhang, Yhang gi, mauhkung mai mau wô nhâng luí, kyôshi zuí nhang é ahkyíng yam-yoq byi mù, nungmoq lé zoshuq agùn agó byí é eq, nungmoq lé i-myit ngón nhang nyi é đông, Yhang ge é hkyô lé tün shit mù, Yhang nyi é hkyô lé saksé hkâm nyi ri." ga akô. ¹⁸ Haú su ga taí kô le lhang, yangnhik lé shiwa byu pé mai hkungga nhông byi râ hkyô lé, yangnhik gi, gyai wuihke luí sheq wó hkùm pyám akô nghut ri.

¹⁹ Hau htâng, Antioku wà mó eq Ikoni wà mó pé má é Yudaq byu pé ra-am lé jé kômù, shiwa byu pé lé shuì-u luí, Poluq lé luqgok eq chôm dú kômù, yhang lé shí byuq bê su ngàm kô é yanmai, wà shinggan shut shê hkyut htoq pyám akô. ²⁰ Nghut kôlhang, Poluq gi, yhang é lhinghkyuq má chángzô pé yap tô kô é hkùn, toq mù wà shut tau wang ló ri. Hau htang nyí, yhang gi, Barnaba eq rahá Derbe wà mó shut e ló bekô nghut ri.

Antioku Wà Mó Má Taú Jé Ló É Hkyô

²¹ Haú wà má yangnhik eq gabú danglù hkô kyo kô é yanmai, byù myo myo gi, chángzô pé dut lo akô. Hau htâng, yangnhik gi, Lustra, Ikoni, Antioku wà mó hkyô dum taú ló kômù, ²² chángzô pé lé myit lhoq ging byi uchyang, haú lumjín hkyô má ru gíng nyi râ matú myit wum byí akô. "Nga-nhúng gi, Garai Gasâng é mingdán má wàng râ matú, wuìhke jamjau myo myo hui ra râ nghut lhê." ga le, mhoqshit akô. ²³ Yangnhik gi, noqkuq hpúng hkangmó má, hpúng suwún kut râ bang lé hkyin yù mù, zoshuq gám luí kyúdung mù, yhang-moq lumjín nyi é Yhumsing Garaí chyáng ap byi tô akô. ²⁴ Hau htâng, yangnhik gi, Pesidi ginwáng mai laí byit ló mù, Pamhpuli ginwáng má jé ló akô nghut ri. ²⁵ Haú ginwáng má é Perga wà mó má mungdang hko kyo luí, Atali wà mó shut laí gyó ló akô nghut ri.

26 Haú mai, lhai ji mù, ahkuí yhangnhik wùn waq lái ló bê muzó é matú, Garai Gasâng jeju má ap luí yhangnhik lé nhang kat é Antioku wà mó má dum jé lò bekô nghut ri. 27 Jé lo é hkùn, yhangnhik gi, hpúng byû wui lé wut tsing yù mù, yhangnhik dông mai Garai Gasang kut é hkyô banshoq lé le, tungbaù pé lé haú lumjìng hkyô hkum hpóng byí é hkyô lé le, shit kyô akô. 28 Haú mù, yhangnhik gi, haú wâ má chángzô pé eq tsómra myang shoq nyi nyi akô nghut ri.

15

Ahpyo-kuq Hpyit Hkyô Eq Sêng É Manghkáng

1 Ahkuí, Yuda mau mâ é byù ra-am gi, Antioku wà mó má lé jé mù, gumang wui lé, "Nungmoq gi, Mosheq é htungtarâ eq rajung za, ahpyo-kuq a hpyit é nghut jáng, hkyi yu é hui râ a nghut." ga luí, mhogshit bum akô. 2 Hau é yanmai, myit a huí lhùm é hkyô htoq lô mù, Poluq eq Barnaba nhik gi, haú bang eq gyai yhang myíng myô lhùm akô; haú mù luí, gumang wui gi, Yerusalem wà mó má nyi é lagyo pé eq suwún wui chyáng, haú hkyô lé ló hpyê lhum râ matú, Poluq, Barnaba nhik eq rahá, yhangmoq chyáng mâ é ra-am lé, nhang kat râ ga hkyin tô akô. 3 Haú mù, hpúng byû wui yhangmoq lé dé kat kôjáng, yhangmoq gi, Hpinisi mau eq Samariq mau gyoro mai sô lai ló uchyang, tungbaù pé lhing wang lò bê hkyô lé taí kyô akô. Haú mâ é gumang wui lé gyai yhang gabú nhang akô nghut ri. 4 Yhangmoq, Yerusalem wà mó má jé kô é hkùn, hpúng byû wui, lagyo pé eq suwún wui gi, yhangmoq lé lhom hkulum yù kô é nghut mù luí, yhangmoq gi, yhangmoq dông mai Garai Gasang kut é hkyô lhungháng lé, haú bang lé shit kyô akô.

5 Haú hkùn, Hparishe hpúng mâ é lumjìng bang ra-am gi, toq mù luí, "Tungbaù pé lé, ahpyo-kuq hpyit nhâng râ eq, Mosheq é tará dông

cháng nhâng râ gi, ra yhang râ lhê." ga taí bum akô nghut ri.

Yerusalem Wà Mó Má Kut É Byìn Tú Wap Hpong

6 Ahkuí, lagyo pé eq hpúng suwún wui gi, shí hkyô lé chôm myit wú râ ga, zup tô bum akô. 7 Shí hkyô lé gyai yhang dang rhâng lhùm bum kô é htâng má, Petruq gi, toq mù luí, "Gumang wui ê, Garai Gasang gi, ngá nhut mai taí é, haú gabú danglù lé, tungbaù pé gyô yù mù lumjìng kó sháng gaq ga, hí hkùn nungmoq chyáng mai ngo lé hkyin yù bê hkyô lé, nungmoq sé lugù nghut bê. 8 Haú mù, myit nhiklum lé sé byi sù Garai Gasang gi, nga-nhúng lé byí é eq rajung za, yhangmoq lé le Choyiyung Woi-nyí byí é dông, yhangmoq lé hap yù bê hkyô lé saksé tûn shit bê nghut ri. 9 Garai Gasang gi, yhangmoq lumjìng luí, yhangmoq é myit nhiklum lé lhoq san lhoq yung byi bê nghut é yanmai, nga-nhúng eq yhangmoq é gyoro má gamhkuí é hkyô a joq nhâng lo nghut ri. 10 Haú nghut le gi, íchý íwâ pê eq le, nga-nhúng eq le a ung é wòlai lé, haú chángzô pê é lingzing má ke byí é dông mai, haí mù, ahkuí Garai Gasang lé chyam wú nyi akô lú? 11 Nghut kôlháng, ngamoq gi, yhangmoq eq rajung za, Yhumsing Yesuq é jeju mai za hkyi yu é huí é hkyô lé lumjìng é bang nghut lhê." ga luí, yhangmoq lé taí ri.

12 Haú hkùn, zup míng tô é bang lhungháng gi, zim za kut luí, Barnaba eq Poluq nhik mai, tungbaù pê chyáng, Garai Gasâng eq yhangnhik é loq dông limik kumhá pé eq mauhpo muzó pé kut shit é hkyô, taí kyô nyi é lé chôm gyô nyi akô. 13 Yhangnhik dang ban taí kôjáng, Yakuq gi, "Gumang wui ê, ngá dang lé gyô wú keq. 14 Garai Gasang gi, tungbaù pê chyáng mai Yhâng mying é matú byù ra-myù hkyin yù râ ga, yhangmoq lé sâng-hi mai hkâsu kut lé kûm nyi é hkyô lé, Simun taí kyo bê nghut ri. 15-16 Shí hkyô gi,

'Hau é htâng má gi, ngò dum taû lò mù luí, lêng gyop byuq bê Dawiq é yhûm* lé dum saí rã nghut lhê. Haû byoq htên tô é pé lé saí saí mù, haû lé dum lhoq toq rã nghut lhê.

17 Haû hkûn sheq, ngá myîng mai ji yu é tûngbaù pé eq, myit gyo tô é byù lhunglhâng bang gi, Yhumsîng Garai lé hô kó rã nghut lhê ga,

18 a-nham mau htoq xâng hkun mai, shí hkyô pé lé sé nhang é Yhumsîng Garai taí ri.*

ga myiqhtoí pé kê tô é dang eq rajung za nghut ri.

19 Haû mù luí, ngò taí nau é gi, tûngbaù pé chyáng mai Garai Gasâng shut lhing lo é bang lé, gotû haí le a lhoq wuî é za, 20 hparà lhô pé lé kyáng byî é a sansêng é zoshuq pé lé le, ashop é dông gungsho zùm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám rã matú za, yhangmoq lé, nga-nhúng laiká mai wó shit kat lhê.

21 Hkâsu mù gâ le, gó hkûn mai yhang, Mosheq é tarã lé wã hkangmó má hko kyô ló kômù, Bánno buinyì hkangmó tarajong pé má nghap kyo kyo kut bûm kô é nghut lhê." ga taí ri.

Lumjîng É Tûngbaù Pé Chyáng Hun Kat É Laiká

22 Haû hkûn, lagyô pé, suwún wuî eq, hpúng byû wuî lhunglhâng bang gi, Poluq, Barnaba nhik eq rahá Antioku wã mó shut nhang kat rã byù lé, yhangmoq chyáng mai hkyin yù rã matú chôm myit hpyit akô. Haû eq rajung za, yhangmoq gi, gumang wuî chyáng mã é nhik bô suwún nhik Barsabaq gâ é Yudaq eq Sila lé hkyin yu akô nghut ri. 23 Yhangnhik é loq má, hun kat kô é laiká gi,

"Antioku wã mó, Suriq mau eq Kiliki mau pé má nyi é, tûngbaù gumang wuî é, nungmoq é gumang wuî nghut é, ngamoq lagyô pé eq

suwún wuî gi, nuingón dang shit kyô kat lhê.

24 Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dang èq lhoq byok pyám luí, nungmoq é myit lé lhoq nhúng byî nyi é hkyô lé, ngamoq wó gyo bê. 25 Haû mù, ngamoq lhunglhâng bang gi, byù ra-am lé hkyin yù mù, 26 nga-nhúng é Yhumsîng Yesuq Hkrisduq é matú, yhumsing asak lé lháng a hã é nga-nhúng chytidap é Barnaba, Poluq nhik eq rahá, nungmoq chyáng nhang kat rã matú chôm myit hui bê. 27 Haû mù luí, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang taí kyo kó rã nghut lhê. 28 Nungmoq é matú gi, hparà lhó pé lé tîng byî é zoshuq eq sui, lingzing mai myhik sat é dusak sho eq ashop é dông gungsho zùm yap é hkyô pé lé, koi pyám rã hkyô mai lai luí, gotû wòwùn hûn rã hkyô a joq nghû luí, Chyoiyúng Woi-nyí le, ngamoq le, myit huí to bê. 29 Nungmoq haû pé lé koi pyám nyi kôjáng gi, gè rã nghut lhê.

Nuingón wángzán nyi kó sháng gaq ô!" ga kê tô ri.

30 Yhangmoq lé nhang kat kôjáng, yhangmoq gi, Antioku wã mó mã gyó jé lô kômù, hpúng byû wuî lé ji tsîng to kôluí, haû hûn kat é laiká lé ap byî akô nghut ri. 31 Hpúng byû wuî gi, laiká haû lé ban nghap kôjáng, wum-o byî é danglù hau é yanmai, gabú nyi bum akô. 32 Yudaq eq Sila gi, myiqhtoí nhik le nghut kômù luí, gumang wuî lé mungdang myo myô èq lhoq pun lhoq kyîng kômù, wum-o lhoq gîng to byî akô. 33 Rayoq zo haû má nyi nyi kô é htâng má, gumang wuî gi, yhangmoq lé nhang kat é bâng chyáng, ngui ngón ngón dum tau ló nhâng bekô nghut ri. 34 (Sila kúm gi, yhang

* 15:15-16 Dawiq é yhûm gâ é gi, Dawiq eq yhâng é awut ashîn pé up é hkyô lé gâ é nghut lhê. † 15:34 Bun zo shí lhum gi, Grik Chyúmlaiká myo myo má a bô nghut lhê.

ô nau é dông nyi gyó tô ri.)† ³⁵ Poluq eq Barnaba kúm gi, Antioku wà mó má nyi gyó to kômù, Yhumsing Yesuq é mungdang lé, góbang myo myo eq, mhoq kyo hko kyô akô nghut ri.

Poluq Eq Barnaba Nhik Gâng Lhum É Hkyô

³⁶ Hau htâng, buinyi tsómra myáng jáng, Poluq gi, Barnaba lé, "Yhumsing é mungdang hko kyô laí lo wú bê, wà hkyap hkangmó mâ é gumang wui chyáng taù lò luí, yhangmoq hkâsu dut nyi é hkyô lé, lò dum kùm wú lo goq." ga taí ri. ³⁷ Barnaba gi, Markuq gâ é Yohan lé le shuí chùng nau ri. ³⁸ Nghut kôhang, Poluq gi, haú yuq lé a kâm shuí chùng naù nghut ri; hkâsu mù gâ le, yhang gi, Pamhpuli mau má yhangnhik lé tô pyâm to mù, yhangnhik eq rahá muzó a kâm xoq zui nau é sù nghut é yanmai nghut ri. ³⁹ Hau é yanmai, yhangnhik gi, gyai yhang taí shai lhum kômù, rayuq eq rayuq gâng lhum bekô nghut ri. Barnaba gi, Markuq lé shuí chùng luí, lhaí ji mù Kupru zinlóng shut e lò byuq bê nghut ri. ⁴⁰ Poluq kúm gi, Sila lé hkyin yù mù, gumang wui èq yhang lé Yhumsing Garaí é jeju má ap kat kô é htâng má, yhangnhik gi, htoq e lò byuq bekô. ⁴¹ Haú mù, Poluq gi, Suriq mau eq Kiliki mau mai sô laí lò uchyang, haú mâ é noqkuq hpûng pé lé wum-o lhoq ging byí wún bê nghut ri.

16

Poluq Eq Sila Nhik Chyáng Timohti Châng É Hkyô

¹ Poluq gi, Derbe wà mó má jé é htâng, Lustra wà mó má dum jé ri. Haú wà má, Timohti gâ é chángzo rayuq nyi ri. Yhâng nu gi, Yesuq lé lumjáng é Yudaq myiwe myhí nghut ri; yhâng wa kúm gi, Grik amyû nghut ri. ² Timohti gi, Lustra wà mó eq Ikoni wà mó má nyi é gumang wui èq hkyâ-ôn é hui sù nghut ri. ³ Poluq gi, hkyowuì má yhang lé shuí chùng naù mù luí, aphyo-kuq hpyit byí ri. Hkâsu mù gâ le, yhâng wa gi, Grik nghut

é hkyô lé haú mâ é Yudaq byu pé lhunglhâng bang sé kômù, haú bang lé myit tê byí é yanmai nghut ri. ⁴ Haú mù, yhangmoq gi, rawa htâng rawà mai laí lò uchyang, Yerusalem wà mó mâ é lagyô pé eq hpúng suwún wuì, chôm myit hpyit tô é hkyô lé, cháng kó sháng gaq ga, yhangmoq lé taí kyô akô. ⁵ Haú mù luí, hpúng byû wuì gi, lumjáng hkyô má wum-o bo lò kômù, ra-nyí èq ra-nyí byù du myô jat lo nyi ri.

Makedoni Byù Rayuq Lé, Poluq Shing-rán Myang É Hkyô

⁶ Ahkuí, yhangmoq gi, Asia mau má mungdang ê hko kyo râ hkyô lé Chyoiyúng Woi-nyí èq yhangmoq lé hkùm pyâm é yanmai, Hprugi mau eq Galatiq mau dông sô laí lò mù, ⁷ Musi mau kyo má jé lò kôjáng, Bihtuni mau shut wang lò râ dâ akô; nghut kôhang, Yesuq é Woi-nyí gi, yhangmoq lé ahkáng a byi nghut ri. ⁸ Haú mù, yhangmoq gi, Musi mau mai sô laí lò luí, Troa myuq má gyó jé lò akô. ⁹ Haú má, myín lé, Poluq gi, Makedoni byù rayuq lé yap to mù, "Makedoni mau shut dap lé luí, ngamoq lé le garúm yû laq." ga luí, yhang lé dung wut nyi é shing-rán myang ri. ¹⁰ Shing-rán haú lé Poluq myang é eq, Makedoni byu pé lé gabú danglù hko kyo râ matú, ngamoq lé Garai Gasang wut yù bê nghut ri nghû myit yù luí, haú hkûn yhang, ngamoq gi, Makedoni mau shut dap ê râ matú ri rì kut lò bê nghut lhê.

Ludia Gâ É Myiwe Myhí Hpúng Byû Dut Lo É Hkyô

¹¹ Haú mù luí, ngamoq gi, Troa myuq mai Samohtake zinlóng ang ang shut lhaí ji ê mù luí, htang nyí gi, Neapoli wà má jé bê nghut lhê. ¹² Haú mai lai jáng, Makedoni mau má, Romaq byu pé xuq tô é, haú ginwáng má é ahkyak wà mó nghut é, Hpilipi myuq má ngamoq jé mù, haú má rayoq zo nyi nyi é nghut lhê. ¹³ Bánno buinyi jé jáng, ngamoq gi, kyûdung jowò joq nhô ngam mù, wà

hkum shinggan mâ é, wuilàng yàm shut htoq ê luí, haú má zîng to láng é myiwe wuì lé, zung gyó mù nyo hi é nghut lhê. ¹⁴ Haú dang gyo nyi é bang má, Garai Gasang lé noqkuq é, Htuatira myuq byû, pán nê ung zo sù Ludia gâ é myiwe myhí rayuq bo ri; Yhumsîng Garai gi, Poluq taí kyô é hkyô lé rago gyô yù sháng gaq ga, yhang lé myit hkum hpóng byí ri. ¹⁵ Yhang gi, yhang eq yhâng yhumbyù wuì wui-myhup ban hkâm yù kôjáng, "Nungmoq gi, ngo lé haú Yhumsîng Yesuq má lumjîng bê sù nghut é dông, myit yù byi kô é nghut jáng, ngá yhûm má lé bíng keq." ga luí, ngamoq lé zuq ji yu ri.

Poluq Eq Sila Nhik Htóng Lúng É Hkyô

¹⁶ Ra-nyí lé, ngamoq gi, haú kyûdûng é jowò shut e ló nyi le, nat wang júng luí gumhpân hpan é jùnmyhí rayuq ngamoq lé lhom huí ri. Haú yuq gi, gumhpân hpan é dông yhâng yhumsîng wuì lé ngunzè gyai yhang hô byí é sù nghut lhê. ¹⁷ Myiwe haú gi, Poluq eq ngamoq htâng má châng to mù, "Shí bang gi, nungmoq lé hkyi yù hkyô taí kyô wún é, Myhang Htâng é Garai Gasâng é dui-nhâng zoshâng wuì nghut bum akô ô!" ga wut garû ri. ¹⁸ Buinyi myo myo haú su chyat châng garû wún é yanmai, Poluq gi, gyai yhang myit hpêbu byuq mù, lhîng wú kat luí, nat haú lé, "Yesuq Hkrisduq é myîng lang luí ngò nang lé hkunmó hkyô kat lhê, yhâng chyáng mai htoq ló byuq aq." ga luí, nat haú lé, nhik-yô kat ri. Haú hkûn jáng, nat haú gi, yhâng chyáng mai htoq ló byuq bê nghut ri.

¹⁹ Ahkuí, myiwe hau é yhumsîng wuì gi, ngunzè myàng zo râ myoqbyù jowò a joq lo é hkyô lé sé kôjáng, Poluq eq Sila nhik lé chyup yù mù, gai mâ é suwún wui chyáng she hkyut e akô.

²⁰ Dum, yhangmoq gi, yhangnhik lé tarâ agyì pé chyáng shuí ê mù, "Shí nhik gi, Yudaq byù nghut mù luí, ngamoq Romaq byu pé mai a ge châng é htunghking lé mhoqshit byí nyi é

dông, ²¹ nga-nhûng é myuq lé gunjâng nyi akô nghut ri." ga taí akô.

²² Haú mù luí, shiwa byu pé gi, yhangnhik lé chôm htím akô. Tarâ agyì pé gi, yhangnhik é mebu lé lâng hkyut pyám luí, wumchûm hkat eq bat râ matú, hkunmó hkyô kat akô.

²³ Yhangmoq gi, yhangnhik lé gyai yhang nhuq bat yu é htâng, htong má lhûng kat mù, rago za wú zúng râ matú htóng suwún lé hkunmó hkyô tô akô. ²⁴ Htóng suwún hpó gi, haú sù é hkunmó lé wó jáng, yhangnhik lé hkyí kyum hut luí, htóng mâ é, je ahtê gok má lhûng tô ri.

Htóng Suwún Hpó Hkyi Yù Huí É Hkyô

²⁵ Nghut kôlhang, gunggàm yoq lé, Poluq eq Sila nhik gi, kyûdung luí, Garai Gasang lé mahkôn hkya-ôn nyi kô é hkûn, htóng byù góbang gi, yhangnhik é htê lé chôm gyô nyi bum akô. ²⁶ Haú hkûn, byodàn ratung layàng mó nún lô mù htóng yhûm gón le nún lô luí, hkum pé banshoq le radá dâm bóng hâ lo bum ri; dum nghut jáng, yuq hkangmó mâ é to-qjâng tui pé le gyut gyó byuq bê nghut ri. ²⁷ Htóng suwún hpó gi, yhup bûn lò mù, htóng hkum pé bóng hâ tô bum é lé myang kat jáng, htóng byu pé ban hpang byuq bùm bekô râ nghut lhê ga myit yù luí, shâm shê mù, yhânggùng yhang sat shî râ dâ ri. ²⁸ Nghut kôlhang, Poluq gi, "Ê, náng gûng yhang náng haú su hkâkut, ngamoq banshoq shî má nyi tô lhê." ga luí, htê mó eq wut garu taí kat ri.

²⁹ Haú hkûn, yhang gi, duq é myi-bung lé dûng yù mù, ahkaú shut din wang ló luí, Poluq eq Sila nhik é hí má gyuq nán é eq ngóm gop tô ri. ³⁰ Hau htâng, yhang gi, yhangnhik lé shuí htoq yù luí, "Sarâ nhik ê, ngò hkyi yu é hui râ matú, haí kut ra râ lhú?" ga myi kat ri.

³¹ Haú hkûn, yhangnhik gi, "Yhumsîng Yesuq lé lumjîng jáng, náng eq náng yhumbyù lhunglhâng bang hkyi yu é hui râ nghut lhê."

ga taí akô. ³² Hau htâng, yhangnhik gi, haú htóng suwún hpó eq yhâng yhumbyù lunglhang lé, Yhumsing é mungdang hko kyô akô. ³³ Haú myîn haú u lé yhang, htóng suwún hpó gi, yhangnhik lé shuí ê mù, yhangnhik é dâm pé lé tsing chî pyám byi luí, haú htâng, yhang eq yhâng yhumbyù banshoq bang wui-myhup hkâm yù bekô nghut ri. ³⁴ Hau htâng, yhang gi, yhangnhik lé, yhâng é yhúmkaú má shuí wanglò mù, zoshuq hkang byî ri. Yhang eq yhâng yhumbyù banshoq bang gi, Garai Gasang lé wó lumjîng bekô nghut é yanmai, gyai gabú nyi bum akô nghut ri.

Haq Nhang Pyám Râ Lé A Đông É Hkyô

³⁵ Ahkuí, maubó jáng, tarâ agyì wui gi, "Haú nhik lé nhang pyám aq." ga, htóng suwún hpô chyáng pyata pé lé taí nhang kat akô. ³⁶ Haú hkûn, htóng suwún hpó gi, "Nungnhik lé nhang pyám aq ga, tarâ agyì wui mai byù nhang kat ri; haú mù, ahkuí, nungnhik gi, ngón za htoq ló lo keq." ga luí, Poluq lé taí ri.

³⁷ Poluq kúm gi, "Nga-nhik gi, Romaq mingdán byù sheq ru nghut le wa, myí gôn wú é hkyô le a bo é, byu pé hí má ngá-nhik lé nhuq bat mù, htóng má hkyô kat kôluí nhîng, ahkuí tsik za haq nhang pyám râ dâ akô nhung lhi? A wó dut, yhangmoq yhang sheq lé shuí htoq yù kó sháng gaq." ga luí, yhangmoq lé tû taí kat ri.

³⁸ Pyata pé gi, tarâ agyì wui lé dang haú pé ló taí kyo kôjáng, tarâ agyì wui gi, Poluq eq Sila nhik Romaq mingdán byù nghut é hkyô lé wó gyo kôjáng, gyô gyuq kôluí, ³⁹ yhangmoq yhang, yhangnhik chyáng lé mù, tôngbán luí, shuí htoq yù mù, wà haú mai htoq ló byuq râ matú chôm dúng akô. ⁴⁰ Haú mù, Poluq eq Sila nhik gi, htóng mai htoq ló é htâng, Ludia é yhúm má wang ló akô; haú má, gumang wui eq le hui kômù, yhangmoq lé wum-o byi luí, htoq ló bekô nghut ri.

17

Htesaloni Wà Mó Má Mungdang Hko Kyô É Hkyô

¹ Hau htâng, yhangmoq gi, Amh-pipoli wà mó eq Apolon wà mó mai sô laí ló mù, Htesaloni wà mó má jé akô. Haú wà má gi, Yudaq byu pé é tarajong ralhûm joq ri. ² Poluq gi, yhang lhaq kut nyi é eq rajung za, tarajong má wàng luí, Bánno buinyi sum nyi yhang, Chyúmdang má bo é eq séng mù, yhangmoq eq chôm mîng lhûm uchyang, ³ Hkrisduq wuihke jamjau hui mù, shî bê mai dum dui toq lô râ hkyô lé taí hkoq san kyo luí, "Nungmoq lé, ngò hko kyô nyi é haú Yesuq gi, Hkrisduq nghut lhê." ga taí ri. ⁴ Yudaq byu pé mâ é ra-am gi, gyô jîng kômù, Poluq eq Sila nhik chyáng lé xoq yu akô; haú eq rajung za, Garai Gasang lé hkunggâ é Grik pé myo myo eq, ahkyak é myiwe wui tsómra myo shoq le, gyô jîng kômù, lé xoq yu akô.

⁵ Nghut kôlhang, a gyô jîng é Yudaq byu pé gi, manôn kôluí, gài mâ é byùgang jùm ra-am lé lung yù mù, byù moq mó tsîng yù luí, rawa é shuí gabyong kômù, shiwa byu pé é hí má Poluq eq Sila nhik lé wó shuí htoq shit shoq ga, Yason é yhúm má htîm e ló akô. ⁶ Nghut kôlhang, yhangnhik lé a myàng kôjáng, yhangmoq gi, Yason eq gumang wui ra-am lé, yhangmoq é wà suwún wui chyáng lêng she ê kômù, "Mingkan gón lé atau ahû kut é byù shí nhik, ahkuí shî má jé jáng, Yason gi, yhâng é yhúm má lhóm hkûlum yu ri. ⁷ Yhangmoq lunglhang bang gi, Yesuq gâ é hkohkâm góyuq nyi lhê ga kôluí, hkoséng Kehtaq é tarâ lé lhoq shai é đông kut é bang nghut akô." ga taí garû bum akô. ⁸ Shiwa byu pé eq wà suwún wui gi, dang haú lé wó gyo kôjáng, myit wui myit hke dut nyi bum akô. ⁹ Hau htâng, yhangmoq gi, manghkáng a lhoq htoq râ matú Yason eq góbang lé danggidiq zè byi nhâng mù, nhang pyám bekô nghut ri.

Beria Wà Mó Bang, Mungdang Lé Lhom Yu É Hkyô

¹⁰ Haú myîn jáng yhang, gumang wuì gi, Poluq eq Sila nhik lé Beria wà mó shut nhang kat akô; yhangnhik gi, haú wà má jé jáng, Yudaq byu pé é tarajong má wang ló akô nghut ri. ¹¹ Haú Beria wà mó byu pé gi, Htesaloni wà mó byu pé htoq má je riyhang nhik bo bum akô; haú mù, danglù haú lé gyai ô nau é myit èq hap yù mù, danglù shî teng a têng é hkyô lé wó sé shoq ga, nyí wuì Chyúmdang lé chôm nghap wú nyi akô nghut ri. ¹² Haú mù luí, Yudaq byu pé myo myo gi, lumjǐng bum akô, haú eq rajung za, aróng wó é Grik myiwe wuì eq yuqgè wuì myo myo le, lumjǐng bùm bekô nghut ri.

¹³ Poluq gi, Beria wà mó má le, Garai Gasâng é mungdang hko kyô nyi é hkyô lé, Htesaloni wà mó mâ é Yudaq byu pé sé kôjáng, yhangmoq gi, haú má lé kômù, wà byù wuì lé mhoq hpyoq luí, gabyông lò nhang akô. ¹⁴ Haú hkûn, gumang wuì gi, Poluq lé wuimau yàm jé shoq, radá dâm dé kat akô; nghut kôlhang, Sila eq Timohti nhik gi, Beria wà mó má nyi gyó tô akô nghut ri. ¹⁵ Poluq lé châng dé é bang gi, Ahten myuq jé shoq lé dé to kômù, Sila eq Timohti nhik lé hân hân châng ló râ matú pying kat é dang lé wun chûng mù, dum taù lò bekô nghut ri.

Poluq, Ahten Myuq Má Nyi É U Lhé Hkyô

¹⁶ Ahkuí, Poluq gi, Ahten myuq má haú nhik lé lánng nyi tô é u lé, haú wà má rawa é hparà lhô baú dut tô é lé myàng mù luí, yhâng i-myt gyai yhang a ngón dut byuq ri. ¹⁷ Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggâ é Grik pé eq le, gài pé má hui mihui bang eq le, nyí wuì taì sânh kyô lhûm nyi akô nghut ri. ¹⁸ Haú mù luí, Epikuri hpaqchyî eq Sto-i hpaqchyî*

lé sê é, myit wú hpaqchyî bo é bang ra-am gi, yhang eq dang chyin chyin lhûm akô; haú hkûn, yhang gi, Yesuq é hkyô eq dum dui toq hkyo é gabú danglù lé hko kyô é yanmai, ra-am gi, "Byù pyok shí yuq gi, haí wá taì nyi lhê lhú?" ga; ra-am gi, "Góming hparà pé é hkyô lé taì kyo sù nghut sam ri." ga, taì bum akô nghut ri. ¹⁹ Hau htâng, yhangmoq gi, Aripagu gâ é byìn tú wap shut Poluq lé shuí doq ló mù, "Nang mhoqshit é hkyô asik, ngamoq lé sé nhang le a gè lhú?" ²⁰ Nang èq taì é maú nhô za gâ é hkyô lé ngamoq wó gyô ri; haú é dang kyîng lé ngamoq sé nau ri." ga taì bum akô. ²¹ (Ahten byu pé eq haú má nyi é góming byu pé lhunglhâng bang gi, dang sik lù sik haú lé taì kún gyô kún mù, yhangmoq é ahkyîng lé lhoq pán nyi bum akô nghut ri.)

Poluq, Aripagu Zuphpong Má Mungdang Hko É Hkyô

²² Haú u lé, Poluq gi, Aripagu zuphpong má toq yap mù, "Ahten byu pé è, nungmoq gi, hkyô hkat hkanng mó má hparà lhô pé lé gyai yhang dat gyuq hkungga kô é lé, ngò myang ri. ²³ Hkâsu mù gâ le, ngò sô lhing wún mù nungmoq jaú é ze pé lé rago wú wú lé, 'A sê é Garaí matú.', ga luí, kâ tô é hkungga gyap ralhum lé myang záng ri; haú nungmoq a sê é za jaú nyi é Garaí hkyô lé, ngò, nungmoq lé hkaí kyo kôlé.

²⁴ Myidàm htoq eq haú má joq mi-joq lé hpan tô é Garai Gasang gi, mauhkûng eq myigùng é Yhumsîng le nghut lhê mù luí, byu loq èq saí é noqkuq yhûm má nyi râ a nghut. ²⁵ Yhang gi, byù lhunglhâng bang lé asak, soq, ra mira gumjup shoq byí to sù nghut nyi é yanmai, rajung jung râ é sù lé su, byu loq èq dojaú râ sù a nghut. ²⁶ Yhang gi, gunchyung rayuq mai za byuhú chângjup myô lò nhâng mù, myidàm htoq jâm shoq má nyi nhâng luí, yhangmoq é matú hí hí

* **17:18** Epikuri hpaqchyî gi, htang pyat a joq, ahkuí ngón yú râ za ahkyak gâ é nghut lhê. Sto-i hpaqchyî gi, haí wá dut kôlhang i-myt zim za kut mù, htang pyat matú chiq a ra gâ é nghut lhê.

mai ahkyíng yam-yoq eq nyi râ jowò masat to byi bê nghut ri. ²⁷ Yhang gi, nga-nhúng yuq hkgangmó eq a we to kôle, byu pé yhang lé châng hô mù, myang hô kó sháng gaq ga shí hkyô lé kut é nghut ri. ²⁸ Hkâsu mù gà le, nungmoq é jihkyang kat bang, 'Nga-nhúng le yhâng é awut ashîn pé nghut nyi lhê.' ga taí tô bum é eq rajung za, nga-nhúng gi, Yhang é yanmai wó nyí, wó dui é eq ísu wó dut é nghut lhê.

²⁹ Haû mù, nga-nhúng gi, Garai Gasâng é yhangzô pé nghut nyi é yanmai, Garaí gùng gi, byu é hpaqchyí loq èq kyûng kâ tô é híng, ngùn, luqgok pé eq pûng lhê nghû luí hkâ-myit yù kó. ³⁰ Láì lò bê haû myoq a bóng shí é pyat lé, Garai Gasang gi, haí le a ga lhaí pyâm to kôlhâng, ahkuí gi, jowò hkgangmó mâ é byù lhunglhâng bang lé, myit lhíng keq ga hkunmó hkyô to bê nghut ri. ³¹ Hkâsu mù gà le, Yhang hkyin to sù mai mingkan gón lé tara é dông jéyáng râ buinyi ra-nyí masat to bê nghut ri. Shí hkyô lé, byù lhunglhâng bâng é hí má wó lum é saksé dut sháng gaq ga, Yhang haú yuq lé shí é mai lhoq dui toq yû bê nghut ri." ga taí ri.

³² Shí é mai dum dui toq lo é hkyô lé wó gyô bùm kôjáng, ra-am gi, taí hpoí pyám byí akô; ra-am kúm gi, "Nàng shí hkyô taí é lé ngamoq dum gyô wú nau ashí." ga taí akô. ³³ Hau htâng, Poluq gi, haú zuphpong mai htoq ló byuq bê nghut ri. ³⁴ Nghut kôlhâng, byù ra-am gi, Poluq é htâng cháng kômù, lumjíng bang dut bekô nghut ri. Haú bang má, Aripagu zuphpong má bo é Dionisi ga sù le bo ri. Hau htoq agó, Damari gà é myiwe rayuq eq gotú byu pé le, bo bum akô nghut ri.

18

Poluq, Korinhtuq Myuq Má Nyi É U Lhê Hkyô

¹ Hau htâng má, Poluq gi, Ahten myuq mai htoq luí, Korinhtuq myuq má jé lo ri. ² Haû má, yhang gi, Romaq myuq mai Yudaq byù lhunglhâng bang htoq ló byuq râ dut lhê ga,

hkohkâm Klodi èq hkunmó hkyô é yanmai, a myáng shí lé Itali ming mai yhangmyi Priskila eq htoq jé lo é, Pontuq mau byù nghut é, Akula gà é Yudaq byù rayuq lé hui luí, yhangnhik chyáng é ri. ³ Yhangmoq gi, jonghpang saí zo bang chyat nghut kô é yanmai, muzó pûng kôluí, Poluq gi, yhangnhik eq rahá nyi nyi mù, muzó chôm saí akô. ⁴ Bánno buinyi hkgangmó, Poluq gi, tarajong má Yudaq byù eq, Grik pé lé, taí sân kyo luí, lhoq pun lhoq kyíng yu ri.

⁵ Ahkuí, Sila eq Timohti nhik Make-doni mau mai châng jé jáng, Poluq gi, mungdang hkô hkyô má za wum kat luí, haû Yesuq gi, Hkrisduq yhang nghut lhê ga, Yudaq byu pé lé saksé hkâm kyô ri. ⁶ Nghut kôlhâng, Yudaq byu pé gi, lhom he-ngik pyám kômù, yhang lé rhoí dang taí pyám akô; haû mù, Poluq gi, yhâng mebu ko shit é dông yhangmoq lé a nau é hkyô tân shit uchyang, "Nungmoq é sui mara gi, nungmoq é ulhum má jé sháng gaq, ngò eq haí a séng lo; ahkuí mai, ngò gi, tûngbàu pé chyáng e ló berâ nghut lhê." ga luí, yhangmoq lé taí ri.

⁷ Hau htâng, yhang gi, tarajong mai htoq luí, jong haû eq yhep nghut é, Garai Gasang lé noqkuq é Titu Yustu ga su é yhûm má wang ló ri. ⁸ Krispu gà é tarajong má up sù gi, yhâng yhumbyù lhunglhâng bang eq rahá, Yhumsing lé lumjíng akô. Korinhtuq myuq byu pé myo myo le, Poluq é dang lé gyô yù mù, lumjíng luí, wui-myhup hkâm yu bum akô nghut ri.

⁹ Ra-myìn lé, shing-rán ralhum má Yhumsîng mai Poluq lé taí é gi, "Hkâgyuq, taí aq, zim za hkâ-nyí. ¹⁰ Ngò nàng eq rahá nghut nyi lhê, nàng lé ó yuq èq le haí wó kut râ a nghut, hkâsu mù gà le, myuq shí má, ngá é byù myo myo nyi bum lhê." ga ri. ¹¹ Haû mù luí, Poluq gi, Garai Gasâng é mungdang mhoghshít uchyang, razàn eq lhamó hkyuq hkyap yhang, haú myuq má nyi nyi ri.

¹² Galio ga sù, Ahkaia mau mâ é

ginwáng zau kut nyi é u lé, Yudaq byu pé gi, myit rahkat zâ eq Poluq lé chôm chyup yû kôluí, tarâ hpyit wap má she háng kômù, ¹³ "Byù shí yuq gi, jep é tarâ eq shai lhûm é dông, Garai Gasang lé noqkuq râ matú, byu pé lé mhoq hpyoq wún ri." ga mara hún akô.

¹⁴ Haú hkûn, Poluq tû taí râ dâ lò jáng, Galio gi, Yudaq byu pé lé, "Yudaq byu pé ê, muzó shí gi, tarâ lu laí é muzó, haú a nghut jáng, agè ashop é muzó mai, dut lo é nghut le gi, nungmoq lé ngò gyo byi râ hkyô joq lhê. ¹⁵ Nghut kôlhang, muzó shí gi, nungmoq é tarâ eq séng luí, dang eq séng luí, myìng eq séng luí, taí lhum kô é hkyô nghut é yanmai, nungmoq yhang ru ló hpyit lhum keq. Haú sù é muzó má, ngò gi, tarâ agyì kut byi râ a nghut." ga taí mù, ¹⁶ tarâ hpyit wap mai yhangmoq lé hkat htoq pyám nhang ri. ¹⁷ Haú hkûn, yhangmoq lhunglhang bang gi, tarajong má up sù Sositeni lé chyup yû mù, tarâ hpyit wap hí má chôm bat akô. Galio kúm gi, haú hkyô lé hai gùn a kut byi nghut ri.

Poluq, Antioku Wà Mó Má Dum Taú Jé É hkyô

¹⁸ Poluq gi, Korinhtuq myuq má buinyì tsómra myáng shoq lumjìng bang eq nyi nyi ri. Hau htàng, yhang gi, haú bang lé shi-kyâm to luí, Priskila eq Akula nhik lé byinzùm kut mù, lhaí ji luí Suriq mau shut e ló akô. Hau hí má, yhang gi, danggidiq tô tô é yanmai, Kenhkrea wà má xâm nyhâm pyâm ri.* ¹⁹ Yhangmoq Ehpesu myuq má jé kô é hkûn, Poluq gi, Priskila eq Akula nhik lé nyhi pyâm to luí, yhang baú tarajong má wàng mù, Yudaq byu pé lé taí sân kyo byí ri. ²⁰ Haú má é bang gi, yhangmoq eq rahá rayoq zo nyì shi râ dông yhang lé dung kô é nghut kôlhang, yhang gi, a nhô lo nghut ri. ²¹ Haú mù, yhang gi, Ehpesu myuq mai lhaí ji mù htoq ló uchyang, "Garai Gasang ô nau é hkyô nghut

le gi, ngò nungmoq chyáng dum jé lé râ nghut lhê." ga, yhangmoq lé danggidiq byí tô ri. ²² Ahkuí, Poluq gi, Kesare wà mó má ló jé dap jáng, Yerusalem wà mó shut doq ló mù, noqkuq hpúng lé ló huí tô é htàng, Antioku wà mó má dum gyo ló ri.

²³ Yhang gi, haú wà má rayoq zo nyi é htàng, htoq ló mù, Galatiq mau eq Hprugi mau mai sô lai ló uchyang, rawa htàng rawa má é chángzô pé lé wum-o lhoq ging byí ri.

Apolo Zui Saí É Muzó

²⁴ Ahkuí, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyí bò sù nghut é htoq agó, Chyúmdang le gyai kung é sù nghut ri. ²⁵ Yhang gi, Yohan é bapisma hkyô lé za sé sù nghut kôlhang, Yhumsing é hkyô lé mhoq yû bê nghut luí, Yesuq é hkyô pé lé mhoq yu to bê eq rajung za wum zuq tung ga luí, hkyak hkyak mhoqshit byí ri. ²⁶ Ahkuí, yhang gi, gyuq kyûm myit a bo é za tarajong má taí hí ló ri. Haú hkûn, Priskila eq Akula nhik gi, haú lé wó gyo kôjáng, yhang lé ji yù mù, Garai Gasang é mungdang hkyô lé azó tung taí sân kyo byí akô nghut ri.

²⁷ Apolo gi, Ahkaia mau shut dap e ló nau é hkûn, gumang wuì gi, yhang lé wum saí byi mù, yhang lé lhom hkûlum yù râ matú, chángzô pé chyáng laiká ká byí kat akô; yhang gi, jé jáng, Garai Gasang jeju mai lumjìng bê bang lé, gyai yhang wó garúm sù dut bê nghut ri. ²⁸ Hkâsu mù gâ le, yhang mai, Yesuq gi, Hkrisduq yhang nghut nyi ri ga luí Chyúmdang má tûn shit uchyang, byu pé hí má Yudaq byu pé lé, wum kat wó taí ung pyâm é yanmai nghut ri.

19

Poluq, Ehpesu Myuq Má Nyi U Lhé Hkyô

* **18:18** Xâm nyhâm pyâm é gi, Yudaq htung dông rajung jung kut râ matú danggidiq to luí, haú lé ban kut jáng, yhumsing xâm lé nyhâm pyâm é nghut lhê.

¹ Ahkuî, Apolo gi, Korinhtuq myuq má nyi tô é hkûn, Poluq gi, mau káng mai sô lai lô mù, Ehpesu myuq má jé ri. Haú má, yhang gi, chángzô pé ram eq hui luí, ² yhangmoq lé, "Nungmoq gi, lumjínng é hkûn, Chyoiyúng Woi-nyí lé, wó yû bekô lhú?" ga myí ri.

Haú hkûn, yhangmoq gi, "Chyoiyúng Woi-nyí nyi lhê gâ é lhang, ngamoq a wó gyô wú." ga tú taí akô.

³ Haú mù, Poluq gi, "Haú nghut jáng, nungmoq gi, hai jung baptisma hkam yû kô é lhú?" ga luí, yhangmoq lé myí jáng, yhangmoq gi, "Yohan é baptisma hkam yu é nghut lhê." ga tú taí akô.

⁴ Haú hkûn, Poluq gi, "Yohan é baptisma nghu é gi, myit lhang mù wui-myhup hkâm yu é hkyô lé gâ lhê. Yohan gi, yhang é htâng má jé lé râ sù, haú Yesuq lé sheq lumjínng râ lhê ga shiwa byu pé lé taí ri." ga taí ri.

⁵ Yhangmoq gi, dang haú lé wó gyo kôjáng, Yesuq é myíng lang luí baptisma byí é lé, hkam yu bum akô.

⁶ Poluq gi, yhangmoq é htoq má loq ke byi jáng, haú Chyoiyúng Woi-nyí gi, yhangmoq htoq má jé lé mù, yhangmoq gi, laklai dang nyo lo é htoq agó myiqhtoi le htoí lo bum akô. ⁷ Haú bang lhungháng gi, yuqgè raxe í yuq kó nghut ri.

⁸ Hau htâng, Poluq gi, tarajong má wàng luí, gyuq kyûm myit a bo é za lhamó sum hkyap Garai Gasâng é mingdán hkyô lé taí sân kyo mù, lhoq pun lhoq kyíng yu ri. ⁹ Nghut kôlhang, ra-am gi, myit htan lo bùm kôluí a kâm lumjínng kô é htoq agó, haú Yhumsing é Hkyô lé byu pé hí má lhoq hpoí pyám byi kôjáng, Poluq gi, yhangmoq chyáng mai htoq luí, chángzô pé lé shuí chùng mù, Turanu gá su é hpaqchyí mhoq jong má, nyí wuí taí sân kyô lhúm nyi akô. ¹⁰ Haú su kut í zân yhang mhoqshit nyi é yanmai, Asia mau gón mâ é Yudaq byu pé eq Grik pé lhunghâng bang gi, Yhumsing é mungdang lé wó gyô yu bum akô nghut ri.

Skewa É Yhangzo Nyhit Yuq É Hkyô

¹¹ Garai Gasang gi, Poluq é loq dông laklai kumlhá kut ri. ¹² Haú mù, Poluq chyáng mâ é hpajet eq hpyihit rajung jung lé, nò bâng chyáng yu lô mù, lô záng byi jáng lhang, yhangmoq é nòhpyo ge lô byuq é eq, agè ashop é nat pé lé yhangmoq chyáng mai htoq lô byuq bum akô.

¹³ Haú u lé, nat hkat htoq wun é Yudaq byu pé ra-am gi, agè ashop é nat pé lé, "Poluq hko taí é Yesuq é myíng mai, ngò, nungmoq lé hkat htoq lhê." ga, agè ashop é nat wang júng to bâng é ahtoq má, Yhumsing Yesuq é myíng lé lang luí, hkat chyam wú akô.

¹⁴ Skewa gâ é, Yudaq hkyangjong agyí rayuq é yuqzo nyhit yuq le haú su kut wun akô. ¹⁵ Ra-nyí lé, agè ashop é nat gi, yhangmoq lé, "Yesuq lé ngò sê lhê; Poluq é hkyô lé le ngò sê lhê; nghut kôlhang, nungmoq gi, ó pé nghut akô?" ga tú taí mù, ¹⁶ agè ashop é nat haú wang júng é byù gi, yhangmoq htoq má byam doq jí to luí, nhuq bat yû mù yhangmoq lé ung pyám ri. Yhangmoq gi, yhúm haú mai gùngchîn sui nê yang yang hpang htoq lô bekô nghut ri.

¹⁷ Haú hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunghâng bang gi, chôm gyô gyuq bum akô. Yhumsing Yesuq é myíng gi, hkyá-on lhoq toq é hui bê nghut ri. ¹⁸ Lumjínng bê bang myo myo gi, lé mù, yhumsing kut shut é agè ashop hkyô lé, myo myô hí má yín yu akô. ¹⁹ Myoqheq hpaqchyí kut zô é bang le, yhangmoq é laiká lé yu lé kôluí, shiwa byu pé hí má nyhê hkyô pyám akô. Mausau haú pé é ahpau lé sôn wú le, ngùn chap ngo mun záng ri. ²⁰ Haú dông mai, haú Yhumsing é mungdang gi, ko lam lò mù, wum-o a-tsam je bo lò bê nghut ri.

Ehpesu Myuq Má Gabyông É Hkyô

²¹ Shí pé ban dut lai htâng má, Poluq gi, Makedoni mau eq Ahkaia mau dông sô lai lô mù, Yerusalem wà mó

má ló jé râ ga myit hpyit yû luî, "Haû má ló jé tô é htâng má, ngò, Romaq myuq má le, jé wú râ dut ashî." ga taí ri. ²² Haû mù, yhang lé htuqbang garúm é Timohti eq Erastu nhik lé hí Makedoni mau shut nhang kat luî, yhang gi, Asia mau má rayoq rabun zo nyi gyó tô ri.

²³ Haú yoq lé, haû Yhumsing é Hkyô yanmai gyai yhang gabyông lo bum akô. ²⁴ Demetri gâ é ngùn bat zo sù rayuq gi, Artemi hpara é ngùn yhùm zòng zo saí luî, mù saí luzúm wuî lé wó sùt nhang nyi ri. ²⁵ Yhang gi, yhâng é ngùn bat zo luzúm wuî eq haú jung amû kut é góbang lé le ji tsing to mù, taí é gi, "Luzúm wuî ê, muzó shí lhùm é yanmai, nga-nhúng nyi ngón yuqyo nyi é hkyô lé, nungmoq sê lhê. ²⁶ Nghut kôle, ahkuí gi, Ehpesu myuq má za le a nghut lo, Asia mau lháng aluq jam shoq, byu loq eq saí é zè lé, garaí pé a nghut ga, shî Poluq ga sù mai byù myo myo lé mhoq hpyoq yû mù, hkyô shuî lhoq nghoq nyi é hkyô lé, nungmoq wó myâng, wó gyô nyi akô. ²⁷ Haû mù luî, nga-nhúng é muzó shí gi, hpoi byuq râ lé chiq râ é za a nghut, hpara myhí mó Artemi é noqkuq yhùm gi, haí a dut byuq luî, Asia mau gón eq mingkan gón mai noq é hpara myhí é shingkan hpoi byuq râ lé le myit chiq râ dut bê." gâ ri.

²⁸ Yhangmoq gi, dang haû lé wó gyô bùm kôjáng, nhik mó gyô yo kôluî, "Ehpesu myuq byu pé é Artemi gi, kô nyi sháng gaq ô!" ga chôm garû bum akô. ²⁹ Hkâ-myháng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byù Ge-u eq Aristakuq nhik lé chyup she yù mù, yhangmoq é poi wàng mó shut radá dâm chyîn chyap wang ló bum akô. ³⁰ Poluq gi, moq hpúng hau hí má htoq shit naú kôlhang, chángzô pé gi, yhang lé a wàng nhâng kó nghut ri. ³¹ Poluq é luzúm wuî nghut é, haú mau mâ é suwún wuî ra-am lháng, yhang lé poi wàng hkaû má a ê râ matú, hkúm pyám nhang akô nghut

ri.

³² Zíng tô é bang gi, hai hû háng le a sé lo dut byuq kômù luî, ra-am rajung ga garû bum akô. Myo mi-myo gi, haí mù luî yhangmoq haû má nyi tô é lé lháng a sê bùm kó nghut ri. ³³ Yudaq byu pé gi, Alesander lé hí má chôm chyûn htoq kat kôluî, shiwa hpong mai ra-am gi, yhang hká đông taí râ hkyô lé mhoq byi kat akô. Alesander le shiwa hpong lé taí san kyo naú luî, zim byuq râ matú loq tu ri. ³⁴ Nghut kôlhang, Alesander, Yudaq byù nghut é lé sé kôjáng, yhangmoq lhunglhang bang gi, rahtê za kut kôluî, "Ehpesu myuq byu pé é Artemi gi, kô nyi sháng gaq ô!" ga hkyíng hkum í hkum kô garû bum akô.

³⁵ Haû, myuq chyare hpó gi, shiwa moq mó lé lhoq zim luî taí é gi, "Ehpesu myuq byu pé é, Ehpesu myuq shí gi, Artemi myhí mó é noqkuq yhùm eq mauhkúng mai byit gyó lo é yhâng é alhò lé, wú zúng nyi é wà nghut é hkyô lé, mingkan má a sê é ó yuq wa nyi lhê lhú? ³⁶ Haû mù luî, shí hkyô pé gi, wó he pyâm jung a nghut é yanmai, zim za nyi le ge lhê, hân so hân dùn hkâkut ko. ³⁷ Shí nhik gi, noqkuq yhùm lé hpyoq zo su nhik le a nghut, nga-nhúng é hpara myhí lé lhoq hpoi su nhik le a nghut kô é le nhing, nungmoq shuî lé bekô nghut ri. ³⁸ Demetri eq yhâng é ngùn bat zo luzúm wuî gi, rayuq yuq é ahtoq má mara hùn râ hkyô joq kô é nghut jáng, tarâ rùng pé hpông tô lhê. Tarâ agyi pé nyi lhê. Haú má yhangmoq é kó sháng gaq. ³⁹ Nungmoq taí nau é gó hkyô rajung jung joq é nghut le kúm gi, tarâ wang zuphpong mó má chôm taí pyám râ nghut lhê. ⁴⁰ Hkûnyí gabyông é mù shí má, mù htoq wang a bo é yanmai, nga-nhúng lé mara hùn râ chiq râ ri. Shí su kut chôm ming é hkyô lé, hai é yanmai nghut lhê nghû, nga-nhúng a wó taí kyo nghut ri." gâ ri. ⁴¹ Shí pé ban taí é htâng má, yhang gi, shiwa moq mó lé lhoq pyo kat bê nghut ri.

20

Makedoni Mau Éq Grik Mau Đông Lai Ló É U Lhê Hkyô

¹ Haû gabyông é hkyô zîm byuq é htâng má, Poluq gi, chángzô pé lé ji yù luí, yhangmoq lé wum byi dang taí to mù, shi-kyâm to luí, Makedoni mau shut htoq e ló bê nghut ri. ² Yhang gi, haú mau mai sô lai ló uchyang, byu pé lé wum byi é dang myo myo taí luí, Grik mau má ló jé bê. ³ Yhang haú má lhamó sum hkyap nyi yù mù, lhai ji luí Suriq mau shut ê rá hen nyi é hkûn, Yudaq byu pé gi, yhang lé gyám nyi kô é yanmai, yhang gi, Makedoni mau đông tau lò rá lé myit hpyit bê nghut ri. ⁴ Yhang eq rabyìn za châng é bang gi, Beria wà mó mâ é Purû yhangzo Sopata, Htesaloni wà mó mâ é Aristakuq eq Sekundu nhik, Derbe wà mó mâ é Ge-u, Timohti, Asia mau mâ é Tuhkiku eq Trohpimu nhik pé nghut akô. ⁵ Yhangmoq gi, hí so lánq luí, ngá-nhik lé Troa myuq má ló lánq nyi akô. ⁶ Nghut kôlhang, ngá-nhik gi, Azuma Poí* lai é htâng má, Hpilipi wà mó mai lhai ji ló le, ngo nyi nghu jáng, Troa myuq má yhangmoq lé hui luí, haú má nyhit nyi chôm nyi é nghut lhê.

Troa Wà Má, Utuhku Ga Sû Lhoq Tui Toq Hui É Hkyô

⁷ Rabat é sâng-hi nyi lé, ngamoq gi, muk hpê gâm rá matú lé chôm zup zîng tô é hkûn, Poluq gi, htang nyi ló byuq rá ga hen tô é yanmai, chángzô pé lé gunggâm jé shoq hko kyô nyi ri. ⁸ Ngamoq zup zîng nyi é haû ahtoq pyâm wap má, myibung myo myo le duq tô ri. ⁹ Poluq dang nyo hing nyi é u lé, Utuhku gâ é zorâm zo rayuq gi, hkohot hkum yâm má yhup mui zung tô ri. Haú yuq gi, yhupmó myi byuq luí, yhûm sum tsáng mai byit gyó mù, yhang lé bún toq wú le shi byuq bê nghut ri. ¹⁰ Haú hkûn, Poluq gi, gyó ló mù, po ngop to luí, "Hkâdân ko, yhang soq bo ashî." ga taí ri. ¹¹ Haû mù, yhang gi, dum tau doq ló luí,

muk lé hpê mù, zo luí, maubó shoq yhangmoq eq dang nyo kún mù htoq ló bê nghut ri. ¹² Zorâm zo haû lé duì gù shuí ló kômù, nhik tîng é gyai yhang hui bekô nghut ri.

Troa Wà Eq Melitu Wà Gyoro Mâ É Hkyowuì

¹³ Poluq gi, myi hkyô ló rá matú hen tô é yanmai, yhang lajang byi é eq rajung za, yhang lé Asu wà má lhai lhom shuí ji rá matú, ngamoq gi, lhai ji mù hí ló lánq bê nghut lhê. ¹⁴ Haû mù, yhang gi, Asu wà má ngamoq eq hui luí, ngamoq gi, yhang lé lhai má shuí ji chûng mù, Mitulene myuq shut e ló bê. ¹⁵ Htang nyi, ngamoq gi, haû mai lhai ji mù, Kiu zinlóng yâm mai lai ló luí, hau htang nyi gi, Samu zinlóng má lai dap ló luí, htang nyi gi, Melitu wà mó má jé ló bê nghut lhê. ¹⁶ Poluq gi, wó dut é nghut jáng, Penteko-ti buinyi lé Yerusalem wà mó má wó jé shoq gâ é yanmai, Asia mau má buinyi a kâm lhoq htum naù mù luí, Ehpesu myuq lé lhai pyâm to rá matú, myit hpyit to bê nghut ri.

Ehpesu Hpúng Suwún Wuì Lé, Poluq Shi-kyâm Tô É Dang

¹⁷ Poluq gi, Melitu wà mó mai Ehpesu shut byù nhang kat luí, hpúng suwún wuì lé ê ji nhang ri. ¹⁸ Haú bang jé lé kôjáng, yhang yhangmoq lé taí é gi, "Ngò, Asia mau má sâng-hi jé é buinyi mai, nungmoq eq hkâsu kut nyi nyi é ahkyíng banshoq lé le; ¹⁹ Yudaq byu pé jeq hô luí, ngò wuîhke jamjau hui zo kôlhang, haû Yhumsing é muzó lé, ngò myit gyai lhoq nyhûm é eq ngaubyi ngaù nhap é eq wùn waq é hkyô lé le; ²⁰ nungmoq é matú akyû bo é hkyô banshoq lé, a myhit to loshoq taí é hkyô lé le; shiwa byu pé hí eq rayhûm htâng rayhûm má ngò nungmoq lé mhoqshit é hkyô lé le; ²¹ ngò gi, Yudaq byu pé eq Grik pé lé, myit lhîng mù Garai Gasâng chyáng lhîng lò ra eq, nga-nhûng é Yhumsing Yesuq lé lumjîng ra hkyô lé,

* **20:6** Múnchi a bo é Muk zo Poí lé, Azuma Poí le gâ lhê.

saksé hkâm kyo lugù nghut bê lé le, nungmoq sê nyi akô.

²² Ahkuí, ngò gi, Woi-nyí má tuí tô é hui bê yanmai, Yerusalem wà mó má e ló lhê; haú má, ngò haí ló dut râ lé kúm gi, a sé nghut ri. ²³ Ngò gi, htóng eq wuîhke jamjau hkyô ngo lé láng tô ri ga, wà hkanmó má Chyoiyúng Woi-nyí èq lhoq pûn é hkyô lé za sê nyi lhê. ²⁴ Nghut kôlhang, ngò gi, òn râ hkyô ban òn râ eq, Garai Gasâng jeju eq sêng é gabú danglù lé saksé hkâm râ matú, Yhumsîng Yesuq ngo lé byi tô é muzó lé ban wùn waq râ za nghut jáng, ngá asak lé ratsuí le a myit ha lô é nghut lhê.

²⁵ Garai Gasâng é mingdán hkyô lé hko kyô wún é hkûn, ngò eq huí é nungmoq lhunghâng bang gi, htâng nùng má ngo lé a myàng lo kó râ nghut é lé, ahkuí ngò sê to bê. ²⁶ Haú mù luí, ó yuq nghut kôlhang, yubak mara má shi byuq ló é nghut le, haú yuq é sui chyín gi, ngò má a dap lô é hkyô lé, hkû-nyí, ngò saksé hkâm tô lhê. ²⁷ Hkâsu mù gâ le, Garai Gasang ô nau é hkyô banshoq nungmoq lé hko kyo râ matú, ngò zaú tô é hkyô a joq wú é yanmai nghut lhê. ²⁸ Nungmoq gi, yhumsîng gùng lé le, nungmoq lé Chyoiyúng Woi-nyí èq up zúng nhang é sau hpúng† lhungháng lé le, zúng nyí keq. Garai Gasang Yhâng suí èq wui tô é noqkuq hpúng lé le, rém zúng nyí keq. ²⁹ Ngò ló byuq é htâng má, sau hpúng lé a shogyô é, ashop é wamhkuí gi, nungmoq chyáng jé râ nghut é hkyô lé, ngò sê lhê. ³⁰ Hau htoq agó, chángzô pé lé wó mhoq hpuyô yû shoq ga, shut é òng taí é byu pé lhang nungmoq chyáng mai htoq lô râ nghut lhê. ³¹ Haú mù luí, nungmoq yuq hkanmó lé, ngò sum zân tup ngaubiyi ngau-nhap eq nyí myín a hkying loshoq, lhoq pun lhoq kyîng tô é dang pé lé, nungmoq gi, myit bun mù machya nyí keq.

³² Ahkuí, ngò gi, nungmoq lé, Garai Gasâng chyáng le, nungmoq lé wó

lhoq ging lhoq tîng mù, lhoq chyoyúng é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê. ³³ Ngò gi, ó yuq é hîng, ngùn, mebu pé lé le a myoqnoq wú. ³⁴ Ngá é loq shî í loq gi, ngò eq ngá htâng châng é bang ra châ é lé kut byi bê hkyô lé, nungmoq yhang sé gû nghut lhê. ³⁵ Ngò kut é muzó banshoq gi, nungmoq é alik dut bê nghut luí, shî su kut shikut é òng mai, nganhung gi, wum-o nyhóm bang lé htuq bang luí, 'Lhom yu é htoq má byí é gi, je riyhang hkungsô wó nyi ri.' ga luí, Yhumsîng Yesuq taí é dang lé bún nyi sháng." gâ ri.

³⁶ Poluq gi, haú su ga ban taí jáng, hkyihput htuq mù, yhangmoq lhunghâng bang eq rahá za kyûdûng ri. ³⁷ Yhangmoq lhunghâng bang gi, yhang lé po to luí, bopuq puq mù, chôm ngaù akô. ³⁸ Htâng nùng má, yhang lé dum myàng râ a nghut lo gâ é dang yanmai, yhangmoq gi, je riyhang yón kuq bum akô. Yhang lé, lhaí má jé shoq lé châng dé kat akô nghut ri.

21

Yerusalem Wà Mó Shut Doq Ló Nyi É U Lhê Hkyô

¹ Ngamoq gi, yhangmoq lé kang pyâm to luí, lhaí jî chûng mù, nyâng za Kusa zinlóng má jé é nghut lhê. Hau htang nyí gi, Rode zinlóng má jé mù, haú mai Patara wà má dum jé bê. ² Haú wâ má Hpinisi mau shut dap ló é lhaí lé, ngamoq myàng luí, haú mai chôm jî chûng bê. ³ Haú hkûn, ngamoq gi, Kupru zinlóng lé myàng jáng, hau é loqyo hkyam òng laí lô luí, Suriq mau shut e ló le, hpugá zê lé hkyó râ matú, Turuq myuq má nô é nghut lhê. ⁴ Haú wâ má, chángzô pé lé myang hô luí, yhangmoq chyáng nyhit nyí bíng yu é. Chángzô hau bang gi, Chyoiyúng Woi-nyí èq lhoq pûn é òng Poluq lé Yerusalem wà mó shut a ló râ matú, chôm hkûm akô. ⁵ Nghut kôlhang, nyhit nyí haú lai jáng,

† 20:28 Sau hpúng gâ é gi, lumjîng é bang lé gâ lhê.

ngamoq gi, ngamoq é hkyowuì shut dum xoq sô htoq ló bê. Chángzô pé lhunglhang bang gi, yhangmoq é myi zo wuì eq rahá, ngamoq lé wà shing-gan jé shoq châng dé kôluì, ngamoq gi, yhangmoq eq rahá wuiyàm má hkyihput htuq mù, kyû chôm dung bê nghut lhê. ⁶ Hau htâng, rayuq eq rayuq ban shi-kyâm lhum jáng, ngamoq gi, lhai má wàng bê; yhangmoq gi, yhûm shut dum tau ló byuq bekô nghut ri.

⁷ Ngamoq gi, Turuq myuq mai lhai jî chûng mù, Toleme wà má jé ló bê. Ngamoq gi, haú wâ má é gumang wuì lé shichyên yù mù, yhangmoq eq rahá ra-nyí chôm nyi kûn é nghut lhê. ⁸ Htang nyí gi, ngamoq haú wâ mai htoq ló mù, Kesare wà mó má dum jé bê. Haú wâ má, haú htuqluq htuqbang nyhit yuq* má bò sù, gabú danglù hko taí é Hpilip gá su é yhûm má, ngamoq wang bíng bê nghut lhê. ⁹ Yhang gi, yhang hku tô é byizo zomyi myiqhtoi myi yuq wó ri.

¹⁰ Ngamoq gi, haú yhûm má rayoq zo nyi é htâng má, Agabu gâ é myiqhtoi rayuq, Yuda mau mai jé lé ri. ¹¹ Yhang gi, ngamoq chyáng jé lé luì, Poluq é hpyihit lé yù mù, yhanggùng yhang loq eq hkyí pé má tui mù luì, taí é gi, "'Shî hpyihit yhumsîng lé, Yerusalem wà mó má é Yudaq byu pé mai shî su kut lhom tui luì, tûngbaù pé é loq má ap pyám kó râ nghut lhê;' ga luì, Chyoiyúng Woi-nyí taí ri." gâ ri.

¹² Dang haú lé wó gyo jáng, haú má é bang eq ngamoq gi, Poluq lé Yerusalem wà mó má a doq ló râ matú, gyai yhang chôm hkúm bê nghut lhê. ¹³ Nghut kôlhang, Poluq gi, "Nungmoq gi, haí mù luì ngaubyi ngau-nhap kut é eq, ngo lé myit wum gyui râ đông kut nyi akô lúhú? Ngò gi, Yhumsîng Yesuq é yanmai, Yerusalem wà mó má, tuí é hui râ za a nghut, shî hkâm râ matú le rì rì nghut lhê." ga tû taí pyâm ri. ¹⁴ Yhang lé wó taí hkúm râ su a dut lo jáng, ngamoq gi, "Garai Gasang ô nau é đông nghut

sháng gaq." nghu luì, zim za chôm nyi bùm bê.

¹⁵ Hau htâng má, ngamoq gi, zè món chûng mù Yerusalem wà mó shut doq ló bê nghut lhê. ¹⁶ Kesare wà mó má é chángzô pé ra-am le, ngamoq eq rabyìn za nghut kôluì, yhangmoq gi, ngamoq lé Kupru byù Manason ga sù, hí hí lhê é chángzo rayuq é yhûm má shuì ló mù, yhâng chyáng bíng nhang akô.

Yerusalem Wà Mó Má, Yakuq Lé Ê Huì É Hkyô

¹⁷ Yerusalem wà mó má ngamoq jé é hkûn, gumang wuì gi, ngamoq lé gabú tung lhom hkûlum yu akô. ¹⁸ Htang nyí, Poluq eq ngamoq gi, Yakuq lé ê huì le, hpúng suwún wuì le zîng nyi to lánng akô. ¹⁹ Poluq gi, yhangmoq eq ban shichyen jáng, yhang wùn waq laí lo é hpúng mù đông mai, Garai Gasang eq tûngbaù pé chyáng kut byi bê hkyô pé lé, jihkúm nuqguq shit kyô ri.

²⁰ Yhangmoq gi, haú lé wó gyo kôjáng, Garai Gasang lé hkya-ôn akô. Hau htâng, Poluq lé taí kô é gi, "Âmang ê, Yudaq byu pé má lumjîng é bang hkâ-myhó hkyîng mun nghut bê lé, nàng sê lhê. Haú bang lhunglhang gi, jep é tarâ má myit zuq to bê bang chyat nghut bum akô. ²¹ Nghut kôlhang, yhangmoq lhunglhang bang gi, tûngbaù pé chyáng nyó lúng tô é Yudaq byù banshoq bang lé, nàng, yhumsîng yhangzo yhangshû pé é matú ahpýo-kuq hpyit a ra nghu é eq nga-nhûng é htûng tarâ lé châng nyi a ra nghu luì, Mosheq é tarâ lé tô pyám râ đông mhoqshit rì gâ é dang lé, wó gyô yu bùm bekô nghut ri. ²² Nàng jé bê hkyô lé, yhangmoq wó gyo berâ za nghut lhê. Ahkuì, ngamoq hkâsu kut lo râ lúhú? ²³ Haú mù, ngamoq taí é đông kut aq, ngamoq chyáng danggidiq mó byi bê byù myi yuq nyi lhê. ²⁴ Nàng gi, haú bang lé jì yù mù, yhangmoq eq rahá lhoq san lhoq yúng yû aq, yhangmoq lé u wó wuq yù râ matú, ahpau le htoq byi aq. Haú

* 21:8 Lagyo 6:1-6

hkûn sheq, byù lhunghâng bang gi, yhangmoq wó gyô tô é hkyô a têng byuq é eq, nàng yhang lháng, jep é tarâ lé, châng kut nyí sù nghut é hkyô lé, sé kó râ nghut lhê. ²⁵ Lumjîng é tûngbaù pê é matú kúm gi, hparà lô pé lé tîng byî é zoshuq, sui, lingzing mai myhik sat é dusak sho eq ashop é dông gungsho zùm yap é hkyô pé lé, yhangmoq koi pyám râ matú, ngamoq chôm doqdan luî, kê hûn kat bê nghut lhê." ga akô.

²⁶ Haù mù luî, Poluq gi, hau htang nyí haù bang lé ji yù luî, yhangmoq eq rahá, lhoq san lhoq yúng yù mù, noqkuq yhûm má wàng luî, yhangmoq yuq hkanmó é matú hkungga wó byi shoq ga, yhangmoq é lhoq san lhoq yúng buinyi ngap bê hkyô lé, taí kyô ri.

Poluq Chyup Yù Huî É Hkyô

²⁷ Buinyi nyhit nyí haù ngap râ yàm má, Asia mau mâ é Yudaq byu pé ra-am gi, noqkuq yhûm má Poluq lé myàng kômù, shiwa byu pé lé shuí gabyong luî, yhang lé chyup yù mù, garû taí kô é dang gi, ²⁸ "Israelaq byu pé ê, garúm yù keq, shí yuq gi, nga-nhûng byuhú lé le, jep é tarâ lé le, jowò shí lé le, shut shai é dông jowò hkanmó mâ é byù banshoq lé mhogshit sù nghut ri. Hau htoq agó, noqkuq yhûm má Grik pé lé shuí háng é eq, chyoyúng jowò shí lé achayut kut é sù nghut ri." gâ akô.

²⁹ (Hkâsu mù gâ le, yhangmoq gi, Ehpesu myuq byù Trohpimu ga sù eq Poluq wà hkaù má rahá nghut kô é lé, myàng kômù, haù yuq lé noqkuq yhûm shut shuí háng nhô ngam pyám kô é yanmai nghut ri.)

³⁰ Rawà gón gabyông lo mù, shiwa byu pé lhîngkyuq mai din lé lô kôluî, Poluq lé chyup zing to uchyang, noqkuq yhûm shinggan shut she hkyut htoq ló akô. Haù hkûn jáng, hkum pé lé myhî pyám akô nghut ri. ³¹ Poluq lé yhangmoq sat râ dâ nyi kô é hkûn, Yerusalem wà gón gabyông nyi akô gâ é hkyô lé, Romaq dap up zaù é no má, lò jé ri. ³² Haù mù, yhang gi, radá dâm

shô up gyezau ra-am eq gyezô pé lé shuí chûng mù, byù hpúng shut, din yán gyó ló akô. Yhangmoq gi, gyezau eq gyezô pé lé lhom myàng kôjáng, Poluq lé nhuq nyi é mai hkyîng byuq akô nghut ri.

³³ Haù hkûn, dap up zau hpó gi, Poluq chyáng ê jé mù, yhang lé chyup yù luî, toqjáng tui í hkat eq tuí to nhang ri; hau htang, yhang ó yuq nghut é hkyô lé le, haì kut shut é hkyô lé le myî wú ri. ³⁴ Shiwa byu pé kúm gi, rayuq rajung ga garû bum akô. Haù mù, gyezau hpó gi, lûm garu kô é yanmai, têng é hkyô lé rago a wó sê yù jáng, Poluq lé gyewap má shuí ló nhang ri. ³⁵ Poluq gi, zumhtâng wang má jé lo é hkûn, byù moq mó lûm htim chyîn chyap lô kô é yanmai, gyezô pé gi, yhang lé waq doq ló akô. ³⁶ Shiwa byu pé gi, "Yhang lé sat pyám keq." ga châng garû nyi akô nghut ri.

Poluq, Yhumsing Gùng Mara A Bo É Lé Taí Sân Kyô É Hkyô

³⁷ Gyezô pé gi, Poluq lé gyewap má shuí wàng râ za nghut é hkûn, Poluq gi, dap up zau hpó lé, "Ngò nàng lé dang wó nyô râ lhú?" ga myi jáng, dap up zau hpó gi, "Nàng, Grik myíng dat mu lhê lhú? ³⁸ Nàng gi, hí hkûn gumlau kut mù, byù sat wún bang myi hkyîng lé, yoso shut shuí htoq ló é sù, Egutuq byù a nghut lhú?" ga tau myî ri.

³⁹ Haù hkûn, Poluq gi, "Ngò gi, Kiliki mau Tarshu myuq mâ é Yudaq byù nghut lhê; ngò nyi é wà gi, wà chyap wà zo za a nghut, jeju mai, byù shí bang lé ngò dang taí râ ahkáng byi laq." ga dúng ri.

⁴⁰ Gyedap up zau hpó ahkáng byi jáng, Poluq gi, zumhtâng má yap to mù, shiwa byu pé shut loq he ri. Haù hkûn, yhangmoq lhunghâng bang zim byuq kômù, Poluq, yhangmoq lé Hebre myíng dông taí é gi,

22

¹ "Gumang wuì eq îwa pé ê, ahkuì, ngò mara a bò nghu taí é dang lé gyô wú shi keq." gâ ri.

² Yhangmoq gi, yhang Hebre myíng dông taí é dang lé wó gyô bùm kôjáng, gyai yhang zím byuq bekô. Haú mù, Poluq xoq taí é gi, ³ "Ngò gi, Yudaq byù rayuq nghut lhê. Kiliki mau Tarshu myuq má choq hpyit kôlhang, wà mó shí má nyi kô lò sù nghut lhê. Ngò gi, nga-nhông íchí íwa pê é jep é tarâ lé, Gamalelaq é loq má jihkúm nuqguq mhoq yú luí, hkû-nyí lhê é nungmoq lhunglhâng bang su, Garai Gasang lé gyai myit zìng zuq é sù nghut lhê. ⁴ Ngò gi, shí Hkyô cháng bang lé shi é jé shoq, zing-rí wú é sù eq, myiwe yuqgè ó yuq lé nghut kôlhang, chyup yú mù htóng má lhung pyâm wú bê sù nghut lhê. ⁵ Hkyangjong mó eq byìn tú wap suwún wuí lhunglhâng bang gi, ngá é saksê pé nghut akô. Ngò gi, Damaskuq myuq má nyi é yhangmoq é Yudaq gumang wuì lé byi râ laiká yhangmoq chyáng mai wó yu chùng luí, haú mâ é bang lé le Yerusalem wà mó má dam byi râ matú, chyup tuí ló râ nghú, Damaskuq myuq shut e é nghut lhê.

⁶ Nyigùng tú zó lé, ngò Damaskuq myuq shut sô chyâng ló nyi é hkûn, maubó gi, ngá é lìnhhkyuq má mauhkûng mai byodân tung duqbó to bê nghut ri. ⁷ Haú mù, ngò myigùng má lêng gop tô le, wó gyô kat é danghtê gi, 'Sholuq, Sholuq, nàng ngo lé haí mù zing-rí nyi lhê lú?' gâ ri.

⁸ Ngò le, 'Yhumsîng ê, nàng ó nghut lhê lú?' nghu myí kat jáng, 'Ngò gi, nàng zing-rí wún é sù, Nazaret wà byù Yesuq nghut lhê.' ga luí, Yhang tú taí kat ri. ⁹ Ngò eq rahá e ló é bang kúm gi, maubó lé myàng kôlhang, ngo lé taí é danghtê lé a sê gyo kó nghut ri.

¹⁰ Dum, ngò gi, 'Yhumsîng ê, ngò haí kut ra râ lú?' nghu myi jáng, haú Yhumsîng gi, 'Toq mù, Damaskuq myuq má wang ló aq, nàng kut râ matú wò byí tô é hkyô pé lhunglhâng, nang lé haú má lhom taí kyo berâ nghut lhê.' ga ngo lé dum taí ri. ¹¹ Haú maubó é shingkâng é yanmai, ngò myoqjit byuq mù, ngá é byinzùm wuì

gi, Damaskuq myuq shut ngo lé loq mai she wang ló akô.

¹² Haú hkûn, Anani gâ é yuqgè rayuq ngá chyáng lé huí ri. Yhang gi, jep é tarâ lé gyuq hkunggâ é eq, haú má nyi é Yudaq byù lhunglhâng bâng é hí má myoqdong gyai wó é sù nghut ri. ¹³ Yhang gi, ngá nâm má yap to luí, 'Gumang Sholuq ê, nàng myoq myàng aq hko!' ga taí ri. Haú hkûn jáng yhang, yhang lé ngò wó myang kat bê nghut lhê.

¹⁴ Yhang dum xoq taí é gi, 'Nga-nhông íchí íwa pê é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sù lé wó myàng luí, Yhâng é nhut mâ é mungdang lé wó gyo sháng gaq ga luí le, hkyin to bê nghut ri. ¹⁵ Haú mù, nàng gi, nàng myang é eq wó gyô yu é hkyô pé lé, byù lhunglhâng bâng é hí má, Yhâng é matú saksé hkâm byi râ su dut râ nghut lhê. ¹⁶ Ahkuí, nàng haí lé lánng nyi ashí lú? Toq aq, Yhâng é myìng lé lang luí wui-myhup hkâm yu é eq, nàng é yubak mara pé lé chí sân pyám aq.' gâ ri.

¹⁷ Hau htâng, ngò gi, Yerusalem wà mó má dum taí jé ló mù, noqkuq yhùm má kyû ê dúng nyi le, moq byuq ló mù, ¹⁸ 'Nàng, ngá é hkyô lé saksé hkâm râ dang lé, yhangmoq a lhom hap yù kó râ nghut é yanmai, Yerusalem wà mó mai hân htoq ló aq.' ga Yhumsîng ngo lé taí nyi é lé, myoqwup shing-rán dông myang ri.

¹⁹ Haú mù, ngò gi, 'Yhumsîng ê, tarajong ralhùm htâng ralhùm má nang lé lumjìng bang lé, htóng má chyup lhung pyâm é eq, hkat bat lhing wún é hkyô lé, yhangmoq sê bum akô. ²⁰ Náng é saksé Stehpan sat hui luí suí shun u lé, ngò nàm má yhang yap to mù, haú hkyô lé myit bo hui luí, yhang lé sat pyám bâng é mebu lé zúng byí é nghut lhê.' nghu tú taí bê.

²¹ Haú hkûn, Yhumsîng gi, 'Ê aq, ngò, nang lé, wê gâng é tûngbaù pê chyáng nhang kat râ.' ga, ngo lé taí ri." gâ ri.

Poluq, Romaq Mingdán Byû Nghut É Hkyô

²² Shiwa byu pé gi, dang haû hkun jé za gyô yù kômù, "Shî sù é byù gi, myigùng htoq má nyi a gíng, sat pyám keq." ga, htê mó eq garû bum akô.

²³ Yhangmoq gi, haû su garu uchyang, yhumsing buhîng lé hkyut dú pyâm lhê, hpuilhup lé mauhkûng shut kyaq tâng lhê, kut nyi kôjáng, ²⁴ dap up zau hpó gi, Poluq lé gyewap má shuí hâng yù nhâng mù, yhang lé shiwa byu pé haî mù shî su ga garû bùm kô é hkyô lé wó sé shoq ga, nhuq bat nhâng luî, myi choq nhang ri. ²⁵ Nhuq bat râ matú shokuq tuî eq tui kôjáng, Poluq gi, nâm má yap tô é shô up gyezau lé, "Romaq mingdán byû ru nghut sù lé nhîng, lháng a jéyáng shimá, nungmoq nhuq bat le gi, tarâ wang akô lhú?" ga taî ri.

²⁶ Rashô up gyezau gi, dang haû lé wó gyo jáng, dap up zaû chyáng ló mù, "Nàng haî kut râ dâ nyi lhê lhú? Shí yuq gi, Romaq mingdán byû sheq ru nghut ri." ga luî, yhang lé ló taî kyô ri.

²⁷ Haû mù, dap up zau gi, Poluq chyáng ê mù, "Nàng gi, Romaq mingdán byû nghut lhê lhú? Taî kyô wú laq." ga myi ri.

Poluq gi, "Ngò, Romaq mingdán byû nghut lhê." ga tû taî ri.

²⁸ Haû hkûn, dap up zau hpó gi, "Ngò lháng ahpau myo myo byi pyám luî sheq, Romaq mingdán byû ru wó dut é nghut lhê." ga tû taî jáng, Poluq gi, "Ngò kúm gi, Romaq mingdán byû dut gû hku lé lo é sù nghut lhê." ga taî ri.

²⁹ Yhang lé myi choq wú râ gâ é bang gi, haû hkûn jáng, yhâng chyáng mai huî zut ló bùm bekô. Gyedap up zau hpó le, Poluq gi, Romaq mingdán byû nghut é lé sé jáng, yhang lé tuî pyám bê nghut é yanmai, gyuq byuq bê nghut ri.

Yudaq Byin Tú Wapdoq Suwún Wuî Gam Hkoq Byuq É Hkyô

³⁰ Htang nyi, dap up zau hpó gi, Yudaq byu pé mai Poluq lé hun é mara haî nghut é hkyô lé hkyak wó sé shoq ga, Poluq lé tuî hpyi pyám byi mù, hkyangjong agyi pé eq Yudaq byin tú wapdoq suwún wuî lhunglháng lé ji tsíng to luî, yhangmoq é gung gûng má Poluq lé shuí wàng mù, shap to bê nghut ri.

23

¹ Haû hkûn, Poluq gi, Yudaq byin tú wapdoq suwún wuî lé wú tsuq to mù, "Ngá gumang wuî ê, ngò gi, hkû-nyí jé shoq Garai Gasâng é hí má sansêng é i-myt eq asak dui nyi bê nghut lhê." ga taî ri. ² Haû mù luî, hkyangjong mó Anani gi, Poluq nâm má yap to bang lé, yhâng nhut má bat byi keq gâ ri. ³ Haû hkûn, Poluq gi, yhang lé, "But hpyu tô é xewâm* nàng ê, nàng lé sheq Garai Gasâng eq bat râ nghut lhê. Nàng gi, tarâ eq rajung za ngo lé jéyáng râ matú shî má zung to luî nhîng, haî mù tarâ eq shut shai é dông ngo lé bat nhang lhê lhú?" ga taî ri.

⁴ Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lhê lhú?" ga luî, chôm taî akô.

⁵ Poluq gi, "Gumang wuî ê, yhang gi, hkyangjong mó nghut é lé ngò a sé pyám mù nghut bê. Chyúmdang má le, 'Náng amyû lé up é sù lé wó rhoi râ a nghut.'* ga le kê tô é nghut lhê." ga tû taî ri.

⁶ Hau htâng, haû zîng tô é bang mâ é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byin tú wapdoq suwún wuî lé, "Gumang wuî ê, ngò gi, Hparishe awut ashín mâ é, Hparishe rayuq nghut lhê. Shî bê bang dum dui toq lô râ hkyô lé myit myoqbyû é yanmai, ngò jéyáng é huî nyi ri." ga luî, garû taî kat ri. ⁷ Yhang haû su ga taî kat jáng, Hparishe pé eq Saduke pé gi, dang jet jet lhûm lò kômù, Yudaq byin tú wapdoq hpong gi, gam hkoq ló byuq bekô nghut ri. ⁸ (Hkâsu mù gâ

* **23:3** But hpyu tô é xewâm gâ é gi, gegùn labyoq kut bang lé gâ lhê. ✧ **23:5** Htoq Ló 22:28

le, Saduke pé gi, dum dui toq hkyô a joq; maumang lagyo pé le, sobyo pé le, a nyi ga taí bum akô. Hparishe pé kúm gi, haú pé joq lhê ga, lumjínq bang nghut akô.)

⁹ Haú mù luí, gyai yhang taí garû bum akô. Haú hkûn, Hparishe hpúng má é tarâ sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang taí bê nghut jáng gi, hkâsu nghû kó râ lhú?" ga luí, zuq zuq taí htíng lhúm akô nghut ri. ¹⁰ Haú su kut gyai yhang taí htíng lhúm lò kôjáng, dap up zau hpó gi, Poluq lé lêng myha pyám kó râ lé chiq é yanmai, yhangmoq chyáng gyó é mù, Poluq lé haú bâng é gung gung mai é lú shuí lò luí, gyewap má shuí wang ló râ matú, gyezô pé lé nhang kat ri.

¹¹ Haú myîn, Yhumsîng gi, Poluq é nàm má yap to luí, "Hkâgyuq, Yerusalem wà mó má nàng ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lhê." ga, yhang lé taí ri.

Poluq Lé Sat Râ Haq Dâ É Hkyô

¹² Htâng napkyó, Yudaq byu pé gi, Poluq lé sat râ hpaqchyî chôm da kômù, yhang lé a wó sat sat gi, a zo a shuq râ nghut lhê ga, ó le ó dakam yu akô nghut ri. ¹³ Hpaqchyî shí lé chôm dâ é bang gi, myi xê yuq chyân nghut bum akô. ¹⁴ Yhangmoq gi, hkyangjong agyi pé eq suwún wui chyáng é kômù, "Poluq lé a wó sat sat gi, ngamoq haí le a zo nghû, chôm dakam yu to bê nghut lhê. ¹⁵ Hau é yanmai, ahkuí nungmoq gi, Yudaq byin tú wapdoq suwún wui eq rahá kut luí, Poluq é hkyô lé rago za myi gon wú râ nghu mhaú é dông, yhang lé nungmoq chyáng wut yù râ matú, dap up zaú chyáng dúng kat keq. Haú hkûn, ngamoq gi, hkyolat má yhang lé lhom sat pyám râ rì rì kut to râ nghut lhê." ga taí akô.

¹⁶ Nghut kôlhang, haú lhom haq sat kó râ gâ é hkyô lé, Poluq é yhâng nhammó é yhangzo yuqgè zo wó gyô yù luí, yhang gi, gyewap má wang é mù, Poluq lé é taí kyô ri.

¹⁷ Haú hkûn, Poluq gi, shô up gyezau rayuq lé ji yù mù, "Zorâm shí lé dap up zaú chyáng shuí ê aq, yhang, yhang lé shit kyo râ hkyô rajung joq lhê ga." ga taí ri. ¹⁸ Haú mù luí, shô up gyezau hpó gi, zorâm haú lé dap up zaú chyáng shuí ê mù, "Zorâm shí nang lé shit kyo râ hkyô rajung joq lhê gâ ri ga, yhang lé náng chyáng shuí lé râ matú, htóng byû Poluq gi, ngo lé ji yù mù taí ri." ga, yhang lé taí ri.

¹⁹ Haú jáng, dap up zau hpó gi, jauwò má zorâm haú lé yhâng loq mai she é mù, "Nàng ngo lé haí jung shit kyô nau ri lhú?" ga, yhang lé baú tsik za myi ri.

²⁰ Haú hkûn, zorâm haú gi, "Yudaq byu pé gi, Poluq lé rago za saí myi wú râ su kut mhaú mù, napmá, Yudaq byin tú wapdoq má shuí yù râ matú, náng chyáng dung kó râ ga, myit chôm huí to bekô nghut ri. ²¹ Haú mù luí, yhangmoq ô nau é dông hkâgyo byi, hkâsu mù gâ le, Poluq lé a wó sat sat gi, haí le a zo a shuq râ nghut lhê ga, byù myi xê yuq chyân yhang, ó le ó dakam yù bekô nghut ri. Haú bang gi, yhang lé lhom chyup yù râ matú haq lhom to lánq kó râ nghut lhê. Ahkuí lháng, yhangmoq gi, mù haú kut râ matú rì rì nghut bùm bekô; náng é ahkáng lé za lánq nyi bum akô nghut ri." ga shit kyô ri.

²² Haú hkûn, dap up zau hpó gi, zorâm haú lé, "Nàng, ngo lé shí hkyô shit kyo bê hkyô lé, ó yuq lé le hkâtaí kyo." ga, sidiq byi mù, taú nhang kat bê nghut ri.

Mingzau Hpilik Chyáng Poluq Lé Dé Kat É Hkyô

²³ Hau htâng, yhang gi, shô up gyezau í yuq lé ji yù mù, "Hkû-myîn sum hkyíng† má Kesare wà mó shut é râ matú, gyezô pé í shô, myang ji

† 23:23 Myîn sum hkyíng gi, nga-nhûng é myîn gau hkyíng nghut lhê.

bang nyhit xê, lhâm chûng bang í shô kut mù, rì rì hen to keq. ²⁴ Hau htoq agó, Poluq lé mingzau Hpilik chyáng ngón za wó dé kat râ matú, yhang jì râ myang pé le lajang byi keq." ga, yhangnhik lé pying kat ri.

²⁵ Laiká hun kat é le:

²⁶ "Aróng wó dik é mauzau Hpilik ê, ngò Klodi Lusi gi, ngingón danglù shit kyô kat lhê.

²⁷ Shí yuq lé gi, Yudaq byu pé èq chyup yû mù sat pyám râ dâ nyi bekô za nghut lhê. Nghut kôlhang, ngò gi, gyezô pé eq rahá ê wú le, yhang Romaq mingdán byû nghut é lé wó sê yu é yanmai, yhangmoq chyáng mai yhang lé hkyi lo é nghut lhê. ²⁸ Haû su mù, haî mù yhang lé mara hûn kô é hkyô lé sé nau é yanmai, yhangmoq é Yudaq byin tú wapdoq má yhang lé shuí jé byi wú bê nghut lhê. ²⁹ Haû hkûn, yhangmoq é tarâ hkyô eq séng luí za mara hun bùm kô é lé ngò myang ri. Nghut kôlhang, shî gíng é eq htóng lhúng gíng é mara haî le a bò nghut ri. ³⁰ Shí yuq lé sat pyám râ hpaqchyí da kô é hkyô, ngo lé shit kyo kô é hkûn, radá dâm, yhang lé ngò náng chyáng dé nhang kat bê. Yhang lé mara hûn nau é bang lé gi, nang hí má yhang hun lhum keq nghû pying kat bê nghut lhê." gâ ri.

³¹ Haû mù luí, gyezô pé gi, haû pying kat é dang eq rajung za, myín lé yhang, Antipatri wà mó jé shoq Poluq lé dé kat bekô nghut ri. ³² Htang nyi, myang jì bang lé ê châng dé nhâng kômù, yhangmoq gi, gyewap shut dum taù lò bekô nghut ri. ³³ Myang jì é gyezô pé gi, Kesare wà mó má jé kô é hkûn, mauzau hpó lé laiká byi mù, Poluq lé le jâng ap byi akô nghut ri. ³⁴ Haû hkûn, mauzau hpó gi, laiká haû lé ban nghap jáng, Poluq hká mau mâ é byû nghut é hkyô lé myi wú luí, Kiliki mau mâ é byû nghut é lé sé jáng, ³⁵ "Nang lé mara hûn bang jé jáng sheq, náng mù lé ngò gôn wú râ." ga taî ri. Hau htâng, yhang gi, Poluq lé Herut é hkohkâm-wâng má byam

zúng byi keq ga hkunmó hkyô tô ri.

24

Poluq, Mara Hûn Huí É Hkyô

¹ Hau htâng, ngo nyi lai jáng, hkyangjong mó Anani gi, suwún wui ra-am eq tarâ sé sù Tertulu lé shuí gyó ló mù, mauzau hpô hí má Poluq lé mara lé taî hun bum akô. ² Haû hkûn, Poluq lé hí má jì hâng tô é nghut mù, Tertulu, yhang lé mara hûn dang taî hi é gi, "Aróng wó dik é Hpilik ê, ngamoq gi, nyi-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Nang sê up sê hkgang é jeju lé, byû myû shí wó hkâm zô nyi é yanmai, ³ ngamoq gi, haû lé hkyô hkat hkgangmó eq jowò hkgangmó má jeju bûn é myit eq hkam yu nyi bê nghut lhê. ⁴ Nghut kôlhang, ngò nang lé lhoq hkyik é dông a dut sháng gaq, taî râ dang ratot zo lé, myit hîng hîng to mù gyo byi laq nghû dúng tôngbán lhê ô!

⁵ Shí yuq gi, byû lé gunjang sù, mingkan gón mâ é Yudaq byu pé lhunglhang lé shuí gabyong sù eq, haû Nazaret hpúng mâ é hkyô-u shê sù nghut é lé, ngamoq myang ri. ⁶ Hau htoq agó, yhang gi, noqkuq yhûm lé achag achyut kut râ dâ nyi luí, yhang lé ngamoq chyup yû mù, (ngamoq é tarâ dông jéyáng râ hen nyi é hkûn, ⁷ dap up zau Lusi gi, lé lô mù, ngamoq é loq mai yhang lé lé lú shuí yû luí, yhang lé mara hûn bang lé, náng chyáng jé keq ga hkunmó hkyô tô é nghut lhê.) ⁸ Haû mù, nang, yhang lé myi wú jáng, ngamoq yhang lé hun é mara banshoq têng é hkyô lé, nang wó sé râ nghut lhê." gâ ri.

⁹ Yudaq byu pé le, haû pé gi, têng lhê ga bo chôm taî akô nghut ri.

Poluq, Mara A Bò É Lé Taî Hung É Hkyô

¹⁰ Mingzau hpó gi, Poluq lé dang taî râ dông loq lik kat jáng, Poluq taî é gi, "Zau ê, shí mau bâng é ahtoq má, nang zanwut myo myo jéyáng byi nyi é hkyô lé, ngò sê é yanmai, ngò gabú myit èq yhumsing matú, mara a

bo é hkyô taí bá. ¹¹ Ngò, Yerusalem wà mó má noqkuq râ matú doq e é buinyì raxe í nyí lhang a chyân shi é gi, nàng luì za wó sé râ nghut lhê. ¹² Noqkuq yhùm má ngò ó yuq eq taí htíng lhùm é lé lhang, tarajong, a nghut jáng, wà hkaû hká jowò má le byu pé lé shuí gabyông é lé lhang, ngo lé mara hun é bang gi, a myàng kó. ¹³ Ahkuì, ngo lé yhangmoq hun é mara pé lé, náng hí má yhangmoq saksé lhang a wó tún shit kó nghut ri. ¹⁴ Nghut kôlhang, náng hí má ngò yín yû râ hkyô rahkat gi, yhangmoq èq shut shaí hkyô ga myhíng tô é Hkyô lé cháng luì, ngamoq é íchyí îwâ pé é Garai Gasang lé noqkuq nyi lhê. Jep é tarâ eq myiqhtoi laiká pé má kê tô é lhunglhang lé le lumjìng lhê. ¹⁵ Ngò gi, dingmán é bang eq a dingmán bâng é dum dui toq lô râ hkyô joq é lé, yhangmoq eq rajung za Garai Gasang má myit myoqbyu nyi é sù nghut lhê. ¹⁶ Haú mù luì, Garai Gasang eq byu é hí má, ngò gi, râ é hkyô a bo é za, myit é hkyô san za wó dut nyi shoq, shikut nyi lhê.

¹⁷ Zanwut tsómra laí é htàng má, ngò gi, ngá é byù myú mâ é myùng bang lé chyunghuq byi râ eq alu kat râ matú, Yerusalem wà mó shut lô jé bê nghut lhê. ¹⁸ Haú su kut nyi é hkûn, ngò eq rahá hai byù moq mó le a nyi, haí jung gabyông é hkyô le a htoq, ngò noqkuq yhùm má lhoq san lhoq yúng yû bê hkyô lé za, yhangmoq myang akô. ¹⁹ Nghut kôlhang, Asia mau mâ é Yudaq byù ra-am gi, haú má nyi tô é nghut lhê; yhangmoq mai ngo lé mara hùn râ hkyô joq kô é nghut le gi, shí náng é hí má yhangmoq lé jé kó ra nghut lhê. ²⁰⁻²¹ Haú a nghut jáng, shí má nyi tô é bang gi, ngò Yudaq byìn tú wapdoq hí má yap to mù, 'Shi byuq bâng é dum dui toq râ hkyô é yanmai, hkû-nyí nungmoq ngo lé jéyáng nyi akô.' nghú luì, garú é dang hkûn mai lai luì, ngò má gotú mara myàng shi kô é nghut le gi, yhangmoq yhang taí kyo kó sháng gaq." gâ ri.

²² Hpilik gi, Hkyô haú lé rago sé

lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi râ nghut lhê." ga luì, yhangmoq lé ahkyíng htot kat byí ri. ²³ Poluq lé le, zúng za zúng to mù, yhâng é buinùm ji-myi wuì mai yhang ra châ é hkyô lajang byi naú kô é bang nyi le gi, ahkáng byi keq ga luì, shò up gyezau lé hkunmó hkyô kat ri.

²⁴ Buinyì rayoq zo laí é htàng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng luì, yang, Hkrisduq Yesuq lé lumjìng hkyô taí kyô é le gyô yu ri. ²⁵ Poluq gi, dingmán hkyô, yhumsing gùng lé hkang é hkyô eq, jé lô râ tarâ dara hkyô lé mhogshit jáng, Hpilik gi, gyô gyuq mù, "Nàng ahkuì wó lô bê, ngò jìn jáng sheq nang lé dum ji yù râ nghut lhê." ga taí ri. ²⁶ Hpilik kúm gi, Poluq èq ngùn haq byi râ lé myit myoqbyù mù, yang lé anum num ji yù luì, yang eq nyo lhum lhum kut ri.

²⁷ Zanwut í zân lai jáng, Hpilik é mauzau ayá má Porku Hpestu lé htaí kat pyâm akô. Nghut kôlhang, Hpilik gi, Yudaq byu pé é hí má myoqdong wó nau é yanmai, Poluq lé htóng má jâng lhúng pyâm to bê nghut ri.

25

Poluq, Kehtaq Chyang Jé Râ Matú Dúng È Hkyô

¹ Hpestu gi, haú mau má jé é sum nyí lai jáng, Kesare wà mó mai Yerusalem wà mó shut doq lô ri. ² Haú hkûn, hkyangjong agyi pé eq Yudaq byù hkyô-u shê bang gi, yang lé Poluq é hkyô lé hkyang lhom shit kômù, ³ yhangmoq gi, Poluq lé hkyolat má lhom haq sat pyám râ dâ to kômù luì, jeju ralhüm kut byí é dōng Poluq lé Yerusalem wà mó shut dé kat byi râ matú, Hpestu lé lhom dúng akô. ⁴ Nghut kôlhang, Hpestu gi, "Poluq lé Kesare wà mó má sheq ru lhúng tô lhê, hkâ-myháng a myáng má, ngò yang le haú má dum taú lô râ nghut lhê. ⁵ Haú mù, nungmoq mâ é hkyô-u shê bang ra-am, ngò eq rahá gyô

ló mù, haú yuq kut shut é hkyô bo é nghut jáng gi, yhang lé mara lé hún kó sháng gaq." ga tũ taí ri.

⁶ Hau htâng, yhang gi, shit nyi, raxê nyi kô yhangmoq chyáng nyi yù luí, Kesare wà mó má taú ló mù, htang nyi gi, tarâ tanghkuq má zùng luí, Poluq lé yhâng hí má shuí wang lò rá matú hkunmó hkyô kat ri. ⁷ Poluq jé jáng, Yerusalem wà mó mai gyó lo é Yudaq byu pé gi, yhâng é lhínghkyuq má yap to kôluí, saksé a wó tũn shit é mara mó myo myo lé, yhâng é ahtoq má chôm taí hun akô nghut ri.

⁸ Haú hkûn, Poluq gi, "Yudaq byu pé é jep é tarâ eq shai é dông le, noqkuq yhûm lé shut é dông le, Kehtaq* lé shut é dông le, ngò a kut wú." ga luí, mara a bo é hkyô taí ri.

⁹ Nghut kôlhang, Hpestu gi, Yudaq byu pé é hí má myoqdong wó naú mù, Poluq lé, "Nàng, Yerusalem wà mó má doq ló luí, shí hkyô pé lé ngò haú má doqdan byi rá matú, nàng dóng lhé lú?" ga myí ri.

¹⁰ Poluq kúm gi, "Ngò gi, doqdan hui rá nghut jáng, shí doqdan é jowò, Kehtaq é tarâ hpyit wap má ahkuí yap to bê nghut lhé. Nàng sê é eq rajung za, ngò gi, Yudaq byu pé lé haí lhang a shut wú sũ nghut lhé. ¹¹ Laqmá mù, shí gíng é mara lé, ngò kut shut pyâm é nghut le gi, shí hkám rá hkyô lé ngò a he pyám; nghut kôlhang, shí Yudaq byu pé mai ngo lé mara hun é hkyô a teng é nghut jáng gi, ó yuq lhang ngo lé yhangmoq é loq má ap byi rá ahkáng wó rá a nghut, ngò gi, Kehtaq chyáng wang taí rá nghut lhé." ga tũ taí ri.

¹² Haú hkûn, Hpestu gi, yhâng é byìn tú wap bang eq ban hpyê lhum jáng, "Nàng Kehtaq chyáng wang taí rá ga bê nghut lhé, Kehtaq chyáng wang ló aq hkoi!" ga taí kat ri.

Poluq Lé, Hkohlkâm Agripa Hí Má Shuí Hâng Yu É Hkyô

¹³ Hau htâng, buinyi hkâ-myháng a myáng má, Hkohlkâm Agripa eq

yhanggu myiwe zo Bernike gi, Kesare wà mó má jé lé mù, Hpestu lé lé huí nyo akô nghut ri. ¹⁴ Haú mù, yhangnhik tâng gi, buinyi tsómra myáng nyi nyi é htâng má sheq, Hpestu gi, haú Poluq é hkyô lé hkohlkâm wa eq taí kyô lhûm é gi, "Hpilik, lhûng to lánng é htóng byu rayuq nyi ri. ¹⁵ Ngò Yerusalem wà mó má nyi tô é hkûn, hkyangjong agyi pé eq Yudaq byu pé é suwún wuú gi, haú yuq é hkyô lé taí kyo kôluí, haú yuq lé mara byi rá matú ngo lé chôm dũng akô.

¹⁶ Haú hkûn, ngò gi, mara hun é hui sũ, mara hun é bang eq chyung chyoq yoq kut luí, yhangmoq hun é mara lé yhumsing matú mara a bo é hkyô a wó taí shi lé, ó yuq lé ap byi pyám rá le, Romaq htung a joq nghu luí yhangmoq lé taí kyo bê nghut lhé. ¹⁷ Yhangmoq ngá htâng châng gyó lô kô é hkûn, ngò gi, a nô yu é za, htang nyi jáng tarâ tanghkuq má zùng luí, haú yuq lé shuí wang lò rá matú hkunmó hkyô kat é. ¹⁸ Haú hkûn, haú yuq lé yhangmoq mara chôm hun bùm kôle, ngò myit ngàm tô é su mara ralhũm le a hun htoq lô kó nghut ri. ¹⁹ Yhangmoq é noqkuq htung hkyô eq, haú dui nyi ri ga Poluq eq taí é, shi byuq bê Yesuq é hkyô lé za dang jet jet lhũm bum akô. ²⁰ Haú mù, ngò gi, haú hkyô lé hká dông gon yù rá le a sé lô é yanmai, haú hkyô lé Yerusalem wà mó má doqdan é ló hkam yù rá matú, yhang dóng a dóng é hkyô lé myí wú le, ²¹ Poluq yhang sheq, Hkoséng mó chyáng jé rá ga taí é yanmai, Kehtaq chyáng a dé kat shi é u lé, yhang lé zung nyi shirâ matú, ngò hkunmó hkyô kat é nghut lhé." gâ ri.

²² Haú hkûn, Agripa gi, "Ngò le haú yuq é dang gyô wú nau ri." ga, Hpestu lé taí jáng, yhang gi, "Napmá, nàng wó myang gyo rá nghut lhé." ga tũ taí ri.

²³ Htâng nyi, Agripa eq Bernike nhiktâng gi, shingkanng bò bò za lé lô mù, dap up zau wuú eq wà mâ é agyi suwún wuú eq rahá, rũng gok mó má wang zung tô bùm kô é hkûn, Hpestu

* **25:8** Kehtaq gâ é gi, "hkoséng" gâ é nghut lhé.

hkunmó hkyô kat jáng, Poluq lé shuí hâng tô akô. ²⁴ Haú hkûn, Hpestu taí é gi, "Hkohkâm Agripa eq ahkuí shí má zup zîng tô é lhunghâng bang ê, Yerusalem wà mó eq shí wà mâ é Yudaq byu pé banshoq bang, ngá chyáng lé taí kôluí, shí yuq lé asak a wó duì nhang to lo ga garû bùm é gi, ahkuí nungmoq myang é shí yuq yhang nghut bê. ²⁵ Nghut kôlhâng, shí yuq zui saí é má shí gíng é mara haí lé lháng ngò a myàng nghut ri. Yhang gi, Hkosêng chyáng wâng râ ga taí é yanmai, yhang lé Romaq myuq shut dé kat râ matú ngò myit hpyit to bê. ²⁶ Dé kat bá nghû jáng le, ngá é yhumsíng Hkosêng chyáng yhang é hkyô jihkúm nuqguq kâ hun kat râ haí le a bò nghut ri. Haú mù luí, yhang lé ban myí gôn wú jáng sheq, ká râ hkyô rajung jung hkálhâng ngò myàng abe nghû, nungmoq banshoq bâng é hí má le, je riyhang nàng Hkohkâm Agripa é hí má le, yhang lé ngò lhoq htoq shit é nghut lhê. ²⁷ Hkâsu mù gâ le, htóng byû rayuq yuq lé dé kat é hkûn, yhang lé hun é mara a wó tûn shit lé gi, a htuk nghû luí, ngò myit lhê." gâ ri.

26

Poluq É Hí Hpyang Lhê É Nyi Yap Hkyô

¹ Haú hkûn, Agripa gi, Poluq lé, "Nàng, náng matú dang taí râ ahkáng wó bê." ga taí ri.

Haú mù luí, Poluq loq tû kat mù mara a bo é hkyô taí é gi, ²⁻³ "Hkohkâm Agripa ê, nàng gi, Yudaq byu pé é htunghking banshoq eq taí htíng lhùm é hkyô hkat hkangmó lé, gyai sê to sù nghut é yanmai, Yudaq byu pé ngo lé hun é mara hkat hkangmó lé, ngò hkû-nyí náng é hí má mara a bò é hkyô myang taí é gi, ngá matú gabú hpo yhang nghut ri nghû myit yu nyi lhê; haú mù luí, ngá dang lé myit hing é eq gyô yù byi laq nghû, dúng tôngbán kat lhê.

⁴ Ngò gi, zoshâng hkûn mai, ngá amyú má le, Yerusalem wà mó má

le, hkâsu kut nyi kô lo é hkyô lé, Yudaq byu pé lhunghâng bang gi, sé gû nghut akô. ⁵ Yhangmoq gi, ngo lé hí hkûn mai sé kô é yanmai, ngò, ngamoq é noqkuq htùng mâ é tarâ htan dik é hpúng má bo é Hparishe rayuq nghut é hkyô lé, saksé hkám naú kô é nghut jáng, yhangmoq wó hkâm lhê. ⁶ Nghut kôlhâng, doqdân é hui zo râ matú, ahkuí ngò shí má yap tô é gi, Garai Gasang eq ngamoq é íchyí îwa pé lé byí tô é danggidiq lé myit myoqbyù nyi é yanmai nghut lhê. ⁷ Ngamoq é byù myû raxe í hú gi, danggidiq jeju haú lé wó hkam yù shoq ga, Garai Gasang lé nyí myín noqkuq dojaú shikut nyi bum akô; Hkohkâm wa ê, myit myoqbyù hkyô hau é yanmai, ngo lé Yudaq byu pé mara hun bum akô nghut ri. ⁸ Garai Gasang gi, shí bê bang lé dum lhoq tui lhê gâ é hkyô lé, a wó lúm nghû, haí mù myit yu akô lhú?

⁹ Ngò le, Nazaret wà byù Yesuq é myìng eq shai lhùm é đông myo myo wó kut râ nghut lhê nghû, gè gè yhang myit yu wú bê nghut lhê. ¹⁰ Gè gè haú đông le Yerusalem wà mó má kut wú bê nghut lhê; hkyangjong agyi pê chyáng mâ é ahkáng wó yû luí, ngò gi, sân-yúng bang myo myo lé htóng má kat pyâm é eq, yhangmoq sat hui kôjáng le, ngò myit bo huí wú bê nghut lhê. ¹¹ Ngò gi, tarajong banshoq má a lhíng lhíng yhangmoq lé dam byi luí, Yesuq lé rhoi dang taí kó shoq shikut wú bê nghut lhê; nhik mó góng yo luí, gó mau mâ é wà pé lháng jé shoq, yhangmoq lé châng zing-rí wú bê nghut lhê.

Poluq Hpúng Byû Dut Lo É Hkyô

¹² Haú hkûn, radàm lé, ngò gi, hkyangjong agyi pê chyáng mai ahko ahkáng eq hkunmó lé yu chùng mù, Damaskuq myuq shut e ló nyi le, ¹³ Hkohkâm wa ê, nyigùng tu ló zó lé, bui htoq má je duq é maubó gi, haú hkyô má, ngò eq ngá é luzúm wui é lhíng hkyuq má, mauhkûng mai duq bó htoq lo é lé myang ri. ¹⁴ Haú hkûn, ngamoq banshoq bang myigùng má

lêng gop tô bum le, Hebre myíng dông, 'Sholuq, Sholuq, nàng, ngo lé haí mù zing-rî nyi lhê lú? Zuchûn lé pik le gi, nàng é matú gyai yhang wuî lhê.' ga luí, ngo lé taí é danghtê lé ngò wó gyô kat ri.

¹⁵ Haú mù, ngò gi, 'Yhumsîng ê, nàng gi, ó yuq nghut lhê lú?' nghû luí, myi jáng, haú Yhumsîng tû taí é gi, 'Nàng zing-rî nyi é Yesuq nghut lhê.

¹⁶ Ahkuí toq yap aq, hkâsu mù gâ le, ahkuí, nàng, ngo lé myàng bê hkyô eq, ngò, nang lé tûn shit shirâ nghut é hkyô pê é matú, ngá é mù wùn râ byù eq saksé dut nhâng râ dông nang lé hkyin to râ nghû, ngò nàng chyáng lé htoq shit é nghut lhê. ¹⁷ Nàng é amyû pê é loq mai le, tûngbaù pê é loq mai le, ngò, nang lé hkyi yù nyi râ nghut lhê. ¹⁸ Yhangmoq, yubak hkyut pyám byí é jeju wó yû râ eq, ngo lé lumjîng é yanmai, lhoq sân-yúng huí é bang eq rahá silí wunlí wó hkam yù kó sháng gaq nghû, yhangmoq é myoq lhoq hpóng byi mù, mauchut hkaú mai maubó shut, Tsadán é a-tsam hkaú mai Garai Gasâng shut yhangmoq lhing ló râ matú, ngò, nàng lé yhangmoq chyáng nhang kat râ nghut lhê.' gâ ri.

Poluq Kut É Muzó Hkyô

¹⁹ Haú mù luí, hkohkâm Agripa ê, ngò gi, mauhkûng mâ é myoqwup shing-rán haú lé a gyô é a wó é nyi nghut lhê. ²⁰ Ngò gi, yhangmoq myit lhing luí, Garai Gasang shut lhing taú lò mù, myit lhing bê hkyô lé, hkyi zó loq zó dông mai tûn shit kó sháng gaq nghû, sâng-hi má Damaskuq myuq má nyi é bâng chyáng mai hí luí, Yerusalem wà mó mâ é bâng chyáng má le, Yuda mau gón mâ é bâng chyáng má le, tûngbaù pê chyáng má le, hkô kyo bê nghut lhê. ²¹ Hau é yanmai, Yudaq byu pé gi, ngo lé noqkuq yhûm má chyup yû luí, sat pyám râ da kô é nghut lhê. ²² Nghut kôlhang, ngò gi, hkû-nyí jé shoq Garai Gasâng eq garúm é lé wó yû luí, ahkuí shí má yap to mù, tiq ko banshoq bang lé saksé wó hkâm kyô é nghut lhê. ²³ Ngò taí

é má, Hkrisduq gi, hpuzo luí, shí bê bang mai sâng-hi dui toq lô mù, Yhâng é amyû eq tûngbaù amyû pé lé maubó é hkyô lé wó taí kyo râ nghut lhê ga luí, dut lò râ hkyô lé, myiqhtoí pé eq Mosheq taí tô é hkyô mai lai luí, ngò gotû haí le a taí é nghut lhê." gâ ri.

²⁴ Yhang haú su ga mara a bo é hkyô taí é lé, Hpestu gi, "Poluq ê, nàng na bê! Lûm mhoq myô yu é yanmai na bê nghut ri." ga luí, htê mó eq dang lat taí hpyit kat ri.

²⁵ Poluq kúm gi, "Aróng wó dik é Hpestu ê, ngò gi, nâ é a nghut, ngò taí é dang gi, tengmán é dang eq dang gyíng nghut lhê. ²⁶ Shí hkyô lé hkohkâm wa yhang le sê to gù nghut lhê mù, yhâng é hí má ngò a gyuq a kyum taí é nghut lhê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sê é gi, haí le a joq ra nghut lhê nghû, ngò myit lum nyi lhê. ²⁷ Hkohkâm Agripa ê, nàng gi, myiqhtoí pê é dang lé lumjîng lhê lú? Nàng lumjîng é hkyô lé ngò sê lhê." ga tû taí ri.

²⁸ Haú hkûn, Agripa gi, Poluq lé, "Razup za má, nàng, ngo lé Hkristan rayuq wó dut nhâng nhô ngam ri lú?" ga taí ri.

²⁹ Dum Poluq gi, "Razup za má nghut nghut, myáng myáng má nghut nghut, shí shamtoq-tuí pé mai lai luí, nàng za a nghut, hkû-nyí ngò taí é dang lé gyô nyi é lhunglhang bang, ngò su dut râ matú, ngò gi, Garai Gasang lé kyûdûng nyi lhê." ga tû taí ri.

³⁰ Haú hkûn, hkohkâm wa gi, ginwáng zau hpó eq Bernike le mù, haú má zùng tô é bang eq rahá toq yap ri. ³¹ Yhangmoq htoq ló kô é hkûn, "Shí yuq gi, sat gíng é mara eq htóng lhúng gíng é mara haí le a kut shut nghut ri." ga, rayuq eq rayuq taí lhum bum akô nghut ri.

³² Agripa gi, Hpestu lé, "Shí yuq gi, yhang mai Kehta q chyáng jé râ ga a taí tô é nghut le gi, yhang lé wó nhang pyám berâ nghut lhê." ga taí ri.

27

Poluq, Romaq Myuq Shut Wui-sanghpo Mai E Ló É Hkyô

¹ Ahkuî, ngamoq lé Itali ming shut wui-sanghpo mai gû dap ló nhâng râ matú myit hpyit to kôluî, yhangmoq gi, Poluq eq htongbyû góbang ra-am lé, Augustuq Hkosêng é gyewap mó má é, Yuliu gâ é shô up gyezaû é loq má ap byî kat akô. ² Haú hkûn, Asia mau má é wuimau gin-gau cháng luî wà pé má wang jón ló é, Adramuti myuq mai toq é wui-sanghpo má ngamoq wang ji bê nghut lhê. Htesaloni wà mó má é Aristakuq gâ é Makedoni byù rayuq le ngamoq eq rahá nghut lhê.

³ Htang nyí, ngamoq gi, Sidun myuq má no bê nghut lhê. Yuliu gi, Poluq lé shogyo mù, yhâng chyáng râ é hkyô lé yhâng é buinùm wui mai lhom lajang byi kó sháng gaq ga, yhangmoq eq é hui râ matú ahkáng byî kat ri. ⁴ Haú mai dum toq ló é hkûn, laì tau mut é yanmai, Kupru zinlóng lé lai hkaû uchyang jî laì ló mù, ⁵ Kiliki eq Pamhpuli mau má é wuimau dông laì byit ló le, Laiki mau má é Mura myuq má jé bê nghut lhê. ⁶ Haú má, shô up gyezau hpó gi, Itali ming shut dap e ló é, Alesandru myuq má é wui-sanghpo lé myang hkyup luî, ngamoq lé haú má ji nhâng bê nghut ri. ⁷ Haú mai buinyì myo myo yhó yhó lé za jî e ló luî, awui ahke yhang Kidu wà mó eq ang má wó jé ló jáng, laì tau mut é yanmai, hí shut a wó laì ló lo mù, ngamoq gi, laì lé cháng luî, Kreti zinlóng lé lai hkaû mù, Salamone kongzô é tû tap âng é mai laì ló é nghut lhê. ⁸ Haú má é wuiyam mai awui ahke ji ló lé, Lasea wà eq a wê lhûm é Yuqyo é Guhkan gâ é jowò má jé ri.

⁹ Ahkuî, buinyì tsómra lhoq lhai pyám luî, haú Zoshuq gám poì lai bê nghut é yanmai, wui-sanghpo mai sô wún le gi, gyuq chiq rá nám jé bê nghut ri. Haú mù, yhangmoq lé

Poluq taì pun taì kyîng é gi, ¹⁰ "Àhkaû pé ê, shí dàm lhê é wui hkyô gi, wuihke mó hui luî, wui-sanghpo eq zè pé sùm pyám râ htoq agó, nga-nhûng é asak lháng sum râ dut é hkyô lé, ngò byu myang ri." gâ ri. ¹¹ Nghut kôhang, shô up gyezau hpó gi, Poluq é dang lé gyo rá malaì, wui-sanghpo hkâng sù eq wui-sanghpo yhumsing é dang lé, je lum ri. ¹² Guhkan haú gi, gyoqmyò* wó lhoq lhai rá su a dut é yanmai, myo hpyang gi, Hponik guhkan má wó jé le jé mù, haú má gyoqmyò ló nyi lhai rá matú chôm myit huì akô. Guhkan haú gi, Kreti zinlóng má maupyî buiwàng hkyam eq mautsûng buiwàng hkyam shut hu tô é jowò nghut ri.

Wuimau Má, Laidun Mó Htûng Huì É Hkyô

¹³ Maupyî shut má é lai yhó le hik lô jáng, yhangmoq myit tô é má hkyak nghut bê su ngam pyám kôluî, shamtoq goknghe lé lhoq toq yû kômù, Kreti zinlóng yâm dông jî e ló bê nghut lhê. ¹⁴ Nghut kôhang, hkâ-myhâng a myáng má, Buihtoq mautsûng laì gâ é laidun mó gi, haú zinlóng mai mut lò luî, ¹⁵ wui-sanghpo lé lo mut htûng é yanmai, hí shut a wó ló lo jáng, ngamoq gi, laì mut ló é shut châng yông ló bê nghut lhê. ¹⁶ Ngamoq gi, Koda gâ é zinlóng zo lé lai hkaû uchyang yông ló nyi é hkûn, haú sakhkyîlhai lé gyai shikut é èq wó lêng yù luî, ¹⁷ wui-sanghpo ahtoq má lêng toq to bê. Wui-sanghpo lé gi, a byoq lo shoq tuì èq tuì kîng to bê nghut lhê. Dum, yhangmoq gi, Surti gâ é semuî bùm má ló kê gyâm to rá lé chiq kô é yanmai, wui-sanghpo má é panlong pé lé lhoq nyhum hkyô yù mù, châng yông ló bekô nghut ri. ¹⁸ Laidun mó lúm htan é yanmai, htang nyí yhangmoq gi, hpugá zè pé lé hkyom dú hkyó pyám bekô nghut ri. ¹⁹ Sum nyí nghu é nyí má, yhangmoq gi, wui-sanghpo zè pé lé yhumsing é loq èq yhang hkyô pyám bekô. ²⁰ Buinyì myáng myáng,

* 27:12 Gyoqmyò lé, haú mau má laidun mó lò lò dut mù, yông wún le gyuq chiq nám nghut lhê.

bui lé le, kyî pé lé le a myàng é eq, laidun mó za ru mut nyi é yanmai, wó lut râ nghû myit myoqbyu tô é hkyô lé, ngamoq tô pyám bê nghut lhê.

²¹ Yhangmoq zoshuq a zô é, buinyi tsómra myáng lô bê nghut mù luî, Poluq gi, yhangmoq é gung gung má yap to mù, "Àhkaú pé ê, nungmoq ngá é dang gyo luî, Kreti zinlóng mai a htoq lô é nghut le gi, shî su htên byoq é marop hui zo râ a nghut. ²² Ahkuî nghut kôlhang, ngò taî é dang lé gyô yù mù myit wum yù keq; nungmoq mâ é hká yuq lé asak sum râ a nghut, wui-sanghpo za sheq htên byoq byuq râ nghut lhê. ²³ Hkâsu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amàn ngá é nàm má lé yap to mù, ngo lé taî é gi, ²⁴ 'Poluq ê, hkâgyuq, Kehtaq é hí má nàng wó yap râ nghut lhê. Wui-sanghpo shî má nàng eq rahá ji tô é lhunglhang bâng é asak lé, Garai Gasang gi, nàng é yanmai, laí laí byi râ nghut lhê.' gâ ri. ²⁵ Hau é yanmai, àhkaú pé ê, myit wum yù keq, ngo lé taî kyô é eq rajung za dut lò râ nghut lhê nghû luî, Garai Gasang lé ngò lumjín nyi lhê. ²⁶ Nghut kôlhang, nga-nhúng gi, zinlóng ralhúum lhum má ló htúng chyap to râ nghut lhê." ga luî, yhangmoq lé i-myt taî tít ri.

²⁷ Buinyi raxe myi nyí myín má, gunggàm yoq lé, ngamoq gi, Adria wuimau má yông lhing wún é hkûn, sanghpo hkâng bang gi, dùng yàm eq chyâng lo nyi é su gâ é lé sê gyo kat akô. ²⁸ Haú su mù, wui nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za nik é lé myàng akô nghut ri. ²⁹ Haú mù luî, luqmó má ló záng htung râ lé chiq kômù, yhangmoq gi, wui-sanghpo htàng shut mâ é shamtoq goknghe myî lhum lé lhoq hkyô kat luî, mau hân bó sháng gaq ga kyûdúng nyi bum akô nghut ri. ³⁰ Wui-sanghpo hkâng bang gi, wui-sanghpo lé tô pyâm to luî hpâng râ dâ é myit eq, wui sanghpo-u shut mâ é shamtoq goknghe pé lé lhoq hkyô râ

su kut mhaú luî, sakhkyîlhaî lé wui má lhoq hkyô nyi bum akô. ³¹ Haú mù, Poluq gi, shô up gyezau eq gyezô pé lé, "Shí bang wui-sanghpo má a nyi le gi, nungmoq wó lut râ a nghut." ga taî ri. ³² Haú hkûn, gyezô pé gi, sakhkyîlhaî lé tuî tô é tui lé zân hpyit kat kôluî, sakhkyîlhaî gi, byit gyó byuq bê nghut ri.

³³ Maubó lô jáng, Poluq gi, yhangmoq banshoq bang lé zang zo râ matú myit wum byí é gi, "Nungmoq gi, myit chiq luî, zoshuq haî le a zô é, hkû-nyí raxe myi nyí myáng lô bê. ³⁴ Haú mù luî, zoshuq rajung jung zo keq! Haú gi, nungmoq wó lut râ matú nghut lhê. Nungmoq chyâng mâ é ó yuq é xâm rahkat lhang byuq râ a nghut." gâ ri. ³⁵ Haú su ga ban taî é eq, yhang gi, muk lé yù luî, yhangmoq banshoq bâng é hí má Garai Gasâng jeju lé hkya-on mù, muk lé hpé luî, zô hí bê nghut ri. ³⁶ Haú hkûn sheq, banshoq bang gi, myit wum wó yù kômù, zoshuq zô bùm bekô nghut ri. ³⁷ Wui-sanghpo haú mâ é byù lhunglhang gi, í sho nyhit xe hkyuq yuq nghut lhê. ³⁸ Yuq hkangmó bàn zô gyí é htàng má, wui-sanghpo sóm râ matú, sungso pé lé wui má dú kat pyâm akô nghut ri.

Wui-Sanghpo Htên Gyop Byuq É Hkyô

³⁹ Myoq san za myàng jáng, yhangmoq gi, jowò haú lé a sé kôlhang, semuî-jàng chyûn ralhúum lé byu myàng kôluî, wó dut é nghut jáng, haú má sanghpo lé kôn gyam râ matú chôm doqdân yu akô nghut ri. ⁴⁰ Haú mù, yhangmoq gi, shamtoq goknghe pé lé wuimau má hkyut hkyô pyâm tô akô. Lhaishap tui lé le hkyut yù luî, wui-sanghpo ulhum mâ é panlong lé lhoq toq yù mù, laí hkyô cháng luî wuiyàm shut mut ló bê nghut ri. ⁴¹ Nghut kôlhang, semuî lo bum tô é jowò ralhúum má, wui-sanghpo ló htúng chyap byuq luî, sanghpo u gi, a wó duí lo mù, sanghpo htàng lé gi, wuìheng èq lò bat hkyop myha pyám bê nghut ri.

⁴² Haú hkûn, gyezô pé gi, htongbyû pé wuili lí hpang byuq kó râ lé gyuq kô é yanmai, yhangmoq lé sat pyám râ chôm dá akô. ⁴³ Nghut kôlhang, shô up gyezau hpó gi, Poluq lé hkyi yù naú luí, yhangmoq dá é hkyô lé hkúm pyám mù, wuili dat li bang gi, wuì má byam gyó luí wuiyàm shut hí li dap ló kó sháng ga luí le, ⁴⁴ góbang gi, siklong eq wuì-sanghpo má é gotû zè pé má zui mù, gu dap ló sháng ga le, hkunmó hkyô kat ri. Haú dông mai lhunglhang bang gi, wuiyàm shut rago wó jé dap ló bekô nghut ri.

28

Malata Zinlóng Má Jé Nyi Tô É U Lhê Hkyô

¹ Ngamoq wó lut dap ló jáng sheq, zinlóng haú gi, Malata gâ é lé sê ri. ² Zinlóng byu pé gi, ngamoq lé shogyo myit gyai lhom tân shit akô. Mau ru jâng wo nyi luí gyoq é yanmai, yhangmoq gi, myi mut byi mù, ngamoq banshoq bang lé hkûlum yu akô. ³ Haú hkûn, Poluq gi, htang rawaq guq tsing yù mù, myihkyóm má kat kat é hkûn, myi soq htan lò jáng, duq htân lhangmuì radu gi, htoq ló mù, yhâng é loq má htê zing tô ri. ⁴ Zinlóng byu pé gi, Poluq é loq má lhangmuì haú htê lhang tô é lé myàng kôjáng, "Shí yuq gi, gè gè yhang byù sat é sù teng râ dut ri; wuì mai wó lut ló kôlhang, yhang asak dui nyi râ matú, Tengmán tarâ gi, a dóng lo nhung!" ga luí, rayuq eq rayuq taí lhum bum akô nghut ri. ⁵ Poluq kúm gi, lhangmuì haú lé myihkyóm má ko hkyô kat luí, haí le a dut é za nyi tô ri. ⁶ Yhangmoq gi, yhânggùng wâm lò berâ, haú a nghut jáng, byodàn ratung shi hkyaq lêng ló berâ, ga myit láng nyi bum akô. Nghut kôlhang, myáng myáng láng wú nyi bum le, yhang má haí le a dut lo é lé myàng kôjáng, yhangmoq é i-myt dum htaí pyám kôluí, shí yuq gi, hparâ rayuq sheq nghut ri ga dum taí bum akô nghut ri.

⁷ Hau é nàm má, zinlóng agyì hpó Popli sing é maumyí pé joq tô ri. Haú

yuq gi, ngamoq lé lhom te yù mù, yhâng yhâm má sum nyí yhang lalúm la-nye lhom hkûlum yu ri. ⁸ Haú u lé, Popli é yhângwa gi, alí nyé no nyi é eq wuiwam shun leq tô ri. Poluq gi, haú yuq chyáng wàng mù, kyûdung byi luí, yhâng é ahtoq má loq ke byi mù, yhang lé lhoq gê byi ri. ⁹ Haú su dut é yanmai, zinlóng má é nò byù góbang banshoq le, lé luí lhoq gê byi é hui bekô nghut ri. ¹⁰ Yhangmoq gi, ngamoq lé a hkyô hkyô dông hkungga kôluí, ngamoq wuì-sanghpo ji mù, dum toq ló râ hkûn, ngamoq râ é gû lé châng byi kat akô nghut ri.

Romaq Myuq Má, Poluq Jé É Hkyô

¹¹ Lhamó sum hkyap lai jáng, Aleksandru myuq má é, "Hparâ zozûm nhiktâng" gâ é alhô dap é wuì-sanghpo má, ngamoq wang jî htoq ló bê nghut lhê. Wuì-sanghpo haú gi, gyoqmyò lé zinlóng haú má joq lai é nghut ri. ¹² Surakusa wà mó má jé jáng, haú má ngamoq sum nyí nô yu é nghut lhê. ¹³ Haú mai jî xoq lhing ló le, ngamoq gi, Regi wà mó má jé ri. Htang nyí gi, maupyí lai hik lô mù luí, í nyí nyí má nghut jáng, Potioli wà mó má jé lô bê nghut lhê. ¹⁴ Haú má é gumang wuì ra-am eq hui luí, ngamoq lé nyhit nyí no râ matú lùng kômù, ngamoq gi, nô yù bê; hau htâng, Romaq myuq má jé ló bê nghut lhê. ¹⁵ Haú má é gumang wuì gi, ngamoq jé lo nyi é hkyô lé wó gyo kôjáng, te yù râ ga, Api Gai gâ é wà eq Bìng Yhâm Sûm Lhum gâ é wà jé shoq lé akô. Poluq gi, haú bang lé lhom myàng jáng, Garai Gasang lé hkya-on kungtôn mù, myit wum wó yù bê nghut ri. ¹⁶ Ngamoq, Romaq myuq má jé wang ló é hkûn, Poluq gi, yhang lé zúng râ gyezo rayuq eq gotû san nyi râ matú, ahkáng wó ri.

Poluq, Romaq Myuq Má, Mung-dang Hko Kyô É Hkyô

¹⁷ Buinyì sum nyí lai é htâng má, Poluq gi, haú má é Yudaq suwún wuì lé ji yu ri. Yhangmoq jé lé bûm kôjáng, yhang gi, "Gumang wuì ê, ngò gi, nganhung é amyû lé le, íchýí îwa pé é

htunghking lé le, shut shai é dông hai le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pé é loq má ap byi kat é hui bê nghut lhê. ¹⁸ Romaq zau wui kúm gi, ngo lé ban jep gôn wú jáng, ngá chyáng shi gíng é mara lé a myàng kô é yanmai, ngo lé nhang kat nau akô nghut ri. ¹⁹ Nghut kôlhang, haû lé Yudaq byu pé a dóng kô é yanmai, ngò hkâsu a dat kut lo mù, Ketaq chyáng jé rá matú dúng é nghut lhê. Haû nghut kôle, ngá amyû lé mara hûn rá jowò joq é yanmai gi, a nghut. ²⁰ Haû mù luí, Israelaq amyû é myit myoqbyù hkyô* é yanmai, shi shamtoq-tuí èq tuí é ngò hui zô é hkyô eq séng luí, nungmoq eq nyo kún rá matú, ngò, nungmoq lé ji kat é nghut lhê." ga luí, yhangmoq lé taí ri.

²¹ Haû hkûn, yhangmoq gi, "Náng é hkyô eq séng luí Yuda mau má é laiká ngamoq a wó yû nghut ri. Haû mai lé é gumang wui ó yuq le, nàng eq séng é a ge é luhkyang lé shit kyô é a bò kó nghut ri. ²² Nghut kôlhang, shi nàng lom é hpúng gi, jowò hkanmó má taí he pyâm é huí é hkyô lé, ngamoq sé é yanmai, nàng byu myang é hkyô lé ngamoq gyô wú nau ri." ga tú taí akô.

²³ Yhangmoq gi, yhang eq huí kún rá buinyi ding to kôluí, yhang bíng é yhûm má byù myo myo lé zing bum akô. Haû hkûn, yhang gi, napkyó mai myín htàng jé shoq, Garai Gasâng é mingdán hkyô lé saksé hkâm kyô é eq, Mosheq é tarâ eq myiqhtoi pé é dang má cháng mù, yhangmoq lé shikut luí, Yesuq é hkyô taí pun taí kyîng ri. ²⁴ Yhang taí é hkyô lé, ra-am gi, lumjîng bum akô; ra-am kúm gi, a lumjîng kó nghut ri. ²⁵ Yhangmoq rayuq eq rayuq haû su myit a huí lhûm bùm kô é yanmai, Poluq gi, yhangmoq lé, "Chyoiyúng Woi-nyí, Myiqhtoi Esai-aq é nhut mai nungmoq é íchýí îwâ pé lé taí é dang gi, gyai yhang têng ri. Dang haû gi,

²⁶ 'Byù haû hú chyáng ê mù,

"Nungmoq gyô tsuq to kôlhang, sê gyo kó rá a nghut;

wú tsuq to kôlhang, wú sé kó rá a nghut.", nghû é taí aq.

²⁷ Hkâsu mù gâ le, amyû shi é i-myit gi, htan byuq luí, yhangmoq é nohkyap gi, htu byuq bê nghut ri; yhangmoq é myoq gi, chûm byuq bê nghut ri;

haû a nghut le gi, yhangmoq é myoq èq myàng mù,

yhangmoq é nohkyap èq wó gyo luí,

yhangmoq é i-myit má sê hkyâng kômù,

ngá chyáng lhing lò kôluí, ngò yhangmoq lé lhoq gê byi berâ nghut lhê.✠

gâ ri.

²⁸ Haû mù luí, shi Garai Gasâng é hkyi yù hkyô lé, tûngbaù pé chyáng byi kat bê nghut luí, yhangmoq lhom gyô yù berâ hkyô lé, nungmoq yhang sê nyi keq ô!" ga luí, danghkun haû taí kat é htàng má, yhangmoq gi, htoq ló byuq bùm bekô nghut ri. ²⁹ (Poluq haû su ga taí é htàng má, Yudaq byu pé gi, yhangmoq yhangchang dang jet jet lhum uchyang ló byuq bekô nghut ri.)

³⁰ Poluq gi, yhang nghô lúng é yhûm má í zân tup nyi é u lé, yhâng chyáng lé má lé é bang lé lhom hkûlum yu ri.

³¹ Haû mù, a gyuq a kyum é za, Garai Gasâng é mingdán hkyô lé hko taí kyô é eq, Yhumsîng Yesuq Hkrisduq eq séng é hkyô lé mhòqshit byi ri; yhang lé, ó le a hkûm zing to kó nghut ri.

* **28:20** Israelaq amyû é myit myoqbyù hkyô gi, Mesaia gâ é hkyi yù sù lé myoqbyù nyi é nghut lhê.

✠ **28:27** Esai 6:9,10

ROMAQ Pê Chyang Hun Kat é Laiká (Romans)

¹ Hkrisduq Yesuq é dui-nhâng zoshâng eq lagyo dut râ matú, Garai Gasâng eq ji yu é hui luí, chyoiyúng Chyúmdang pé má, ² Garai Gasang gi, hí hí mai Yhâng é myiqhtoí pé dông danggidiq byí to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to huí é sù, ngò Poluq gi, Romaq myuq má nyi é, Garai Gasâng eq chyitdap é hui luí, sân-yúng bang dut râ matú jî yu é bang banshoq lé, dang kyô kat lhê. ³ Yhâng é Yuqzo haú gi, byù hkyam dông ga jáng, Dawiq é awut ashín nghut ri; ⁴ Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoiyúng hkyo é Woi-nyí dông mai, hpungwup a-tsâm eq sé nhâng bê nghut ri. Yhang gi, nga-nhúng é Yhumsing Yesuq Hkrisduq nghut ri. ⁵ Yhang dông mai le, Yhâng myíng é matú le, ngamoq gi, byù myú chângjup mai byù ji yù mù, lumjíng hkyô lé châng nyi nhâng rá matú, jeju eq lagyo ayá lé wó hkam yù bê nghut lhê. ⁶ Nungmoq le, Yesuq Hkrisduq eq séng rá matú jî yù huí é bang má lòm bekô nghut ri.

⁷ Nga-nhúng é Íwa Garai Gasang eq Yhumsing Yesuq Hkrisduq chyang má é jeju eq nguingón hkyô gi, nungmoq chyang ru joq nyí sháng gaq ô!

*Poluq, Romaq Myuq Má Ló Kum
Nau É Hkyô*

⁸ Nungmoq é lumjíng hkyô lé, mingkan gón má tai pyo ló bê nghut é yanmai, sân-hi má, ngò gi, Yesuq Hkrisduq é myíng mai, nungmoq banshoq bang é matú, ngá é Garai Gasang lé, jeju hkya-on lhê. ⁹ Ngá é kyúdung dang pé má, ngò, nungmoq lé hkâ-nhám le bûn nyi é hkyô lé,

Yhâng é Yuqzô é hkyô gabú danglu lé hko kyô nyi é má, ngá é myit nhiklum banshoq eq dojaú é Garai Gasang gi, ngá é saksé nghut lhê; ¹⁰ Garai Gasang ô nau é nghut jáng, hkâ-í a myáng má, ngò, nungmoq chyang wó jé lé rá hkyô htong byi rá matú, ahkuí, ngò kyúdung lhê.

¹¹ Ngò gi, nungmoq lé, woi-nyí hkyô eq sêng é chyunghuq wó gâm byi mù, nungmoq lé wum-o wó lhoq kíng byi rá matú, nungmoq lé gyai yhang myàng nau nyi ri. ¹² Haú su nghu é gi, nga-nhúng rayuq eq rayuq é lumjíng hkyô dông mai, nungmoq eq ngò, myit wum byí é hui rá matú nghut lhê. ¹³ Gumang wui ê, ngò gi, haú tungbaù pê chyang mai ashi wó yu é eq rajung za, nungmoq chyang mai le ashi wó yú rá matú, nungmoq chyang lé jé rá nghú adàm dàm dá wú é nghut kôlháng, ahkuí jé shoq hkùm tang pyám huí é hkyô lé, nungmoq lé sé nhâng nau ri.

¹⁴ Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chýin dap to sù nghut lhê. ¹⁵ Haú nghut é yanmai, ngò gi, Romaq myuq má é bang nungmoq lé le, haú gabú danglu gyai yhang hko kyo nau nyi é nghut lhê.

¹⁶ Haú gabú danglu hkyô má, ngò gi, a hoq é nghut lhê; hkâsu mù gâ le, haú gi, sân-hi má Yudaq byu pé, hau htâng tungbaù pé má, lumjíng é sù yuq hkanmó lé hkyi yu é wó hui nhâng rá nghut é, Garai Gasâng é hpungwup a-tsâm nghut lhê. ¹⁷ Hkâsu mù gâ le, lumjíng myit mai wó yú luí, lumjíng myit má gíng nyi é, Garai Gasâng chyang má é dingmán hkyô lé gi, gabú danglu haú má hpông shít bê nghut ri. Haú gi, "Haú dingmán sù gi, lumjíng myit mai asak dui rá nghut lhê." ✧ ga kâ tô é eq rajung za nghut ri.

*Xângzo Byu Pê Htoq Má Garai
Nhiqmo-yô É Hkyô*

¹⁸ Haú tengmán hkyô lé, yhumsing é agè ashop hkyo eq zik hkùm pyám é byu pê é agè ashop hkyô eq

✧ 1:17 Hbk 2:4

garai a bo é hkyô pé banshoq htoq má, mauhkûng mai Garai Gasâng é nhikmo-yo hkyô lé hpông shit bê nghut ri. ¹⁹ Haî mù gâ le, Garai Gasang gi, Yhang eq sêng é hkyô, yhangmoq lé san za tûn shit bê nghut é yanmai, Garai Gasang lé sé âng é hkyô gi, yhangmoq chyáng san za dut bê nghut ri. ²⁰ Hkâsu mù gâ le, mau htoq xâng hkun mai, hpan tô é zè pé lé wú jâng, Yhâng é a byu-myang é isâm nghut é, ahtum abyuq é hpungwup a-tsam eq Garaî é myit sâmlai lé gi, san za wó myâng, wó sê gyô é nghut lhê. Haû mù luí, byu pé gi, mara mai wó he lut râ hkyô a joq lo nghut ri.

²¹ Haî mù gâ le, yhangmoq gi, Garai Gasang lé sê to kôlhang, Yhang lé Garai dông a shigyaú kô é eq, jeju a hkya-on kó nghut ri; yhangmoq myit é hkyô pé gi, akôm dut byuq é eq, nhik a gyîng é yhangmoq é myit nhiklhum gi, chut byuq bê nghut ri. ²² Yhangmoq gi, hpaqchyî bò bang nghut lhê ga kôlhang, a-ngok é bang dut byuq bekô nghut ri. ²³ Haû mù, htên byoq a sê é Garai Gasâng é hpungwup shîngkang lé, htên byoq sê é byù zòng, nghoq lhô, dusak lhô eq yê jung dusak lhô pé èq, htaî lhik pyám bekô nghut ri.

²⁴ Hau é yanmai, Garai Gasang gi, yhangmoq é gungdu lé rayuq eq rayuq hpau a tap lhum kó râ matú, a sansêng é gungsho zùm-yap hkyô kut râ nghut é, yhangmoq é yut yut ô nau é i-myt má, yhangmoq lé ap pyám bê nghut ri. ²⁵ Yhangmoq gi, haû Garai Gasâng é tengmán hkyô lé, mhaû é hkyo èq htaî lhik pyám kômù, hpân Sû lé noqkuq dojaú râ malaî, mhaû hkyô nghut é hpan tô é zè pé lé noqkuq mù, dojaú akô nghut ri. Hpân Sû haû gi, ahtum abyuq hkya-on hui sù nghut ri. Amen.

²⁶ Haû nghut é yanmai, Garai Gasang gi, yhangmoq lé, ahoq ahî é yut yut ô naù hkyô má ap pyám bê nghut ri. Yhangmoq é myiwe wui lháng gi, htûng akying lé tô pyám kômù, haû eq shai é dông htaî lhik

pyâm nyi akô nghut ri. ²⁷ Haû eq rajung za, yuqgè wui le, myiwe wui eq zum é htûng akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-û hkyô kut shut lhum kôluí, yhangmoq kut shut é eq gingdán é yubak dam lé, yhumsing gûng yhumsîng hkam yù nyi bekô nghut ri.

²⁸ Hau htoq agó, haû Garai Gasang lé sê é hkyô gi, akyû bo é a nghut ga yhangmoq myit yù kô é yanmai, a kut âng é hkyô kut nhâng râ matú, Garai Gasang gi, yhangmoq lé, htên byoq sê é myit má ap pyâm é nghut lhê. ²⁹ Yhangmoq gi, agè agaú hkyô ajung jung, agè ashop hkyô, myoqnoq hkyô eq a jú lhûm é hkyô pé byíng jup tô é bang dut bekô nghut ri; manon é, byù sat é, mabyoq jîshûm htoq é, mhaû zô é eq myit goí bo é pé le byíng bum ri. ³⁰ Yhangmoq gi, lumu é bang, gansang é bang, Garaî lé a jú é bang, byù rhoi é bang, nghutbûn é bang, gyáng é bang, agè ashop kut râ hkyô lhoq htoq é bang, mó wui é jîno a gyô é bang nghut akô. ³¹ Yhangmoq gi, a gyîng a hâng é bang, gidiq a zung é bang, chyit myit a bo é bang, shogyo nhikmyin a sê é bang nghut akô. ³² Haû pé lé kut é bang gi, shî gíng lhê gâ é, Garai Gasâng é dingmán tarâ joq é lé, yhangmoq sê to kôlhang, haû pé lé, yhangmoq xoq kut nyi kô é htoq agó, haû hkyô lé kut é bang lé le, hkya-on waq toq akô nghut ri.

2

Garai Gasang Tarâ Jéyáng É Hkyô

¹ Haû mù luí, góyuq lé tarâ jéyáng é sù nàng ê, nàng gi, mara mai wó he lut râ hkyô a joq lo; hkâsu mù gâ le, nàng yhang jéyáng nyi luí, mù haû pé lé, nàng kut nyi é yanmai, byù góbang lé jéyáng é hkûn, náng gûng nàng mara byî nyi bê nghut ri. ² Haû dông kut nyi é bang lé, Garai Gasang gi, tengmán é dông tarâ jéyáng é lé, nga-nhúng sê nyi lhê. ³ Haû mù, byù za nghut to luí, góbang lé gi, jéyáng mù, yhumsîng gi,

haú dông roq châng kut nyi é sù nàng ê, nàng gi, Garai Gasâng é tarâ jéyáng hkyô mai wó hfang lut râ su ngam nyi lê lú? ⁴ Haú a nghut jáng, nàng gi, Garai Gasâng é ge é hkyo eq nang lé myit wó shuí lêng nhang é lé a sê é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyâm nyi lê lú?

⁵ Nghut kôlhang, náng é myit htân hkyô eq myit a lêng é nhiklhum é yanmai, haú Garai Gasang dingmán é dông tarâ jéyáng shit râ nghut é, Yhâng é nhikmo-yô é buinyi má hkâm zo râ nhikmo-yo hkyô lé, yhumsing gùng yhang hkong tô nyi bê nghut ri. ⁶ Garai Gasang gi, yuq hkanmó lé, ó le ó kut é má cháng luí, hkâm zo nhâng râ nghut lê. ⁷ Jân shirang mù, ge é hkyô kut nyi é dông, hpungwup shingkan lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak byi râ nghut lê. ⁸ Nghut kôlhang, haú yhumsing wuízat hkyô za hô luí, tengmán hkyô lé he-ngik pyám mù, agè ashop hkyô lé cháng bâng é matú gi, nhikmo-yo hkyô eq nhikjum yo hkyô jé râ nghut lê. ⁹ Wuíhke hkyô eq iyon yon hkyô gi, agè ashop kut é xângzo byu yuq hkanmó chyáng jé râ nghut lê; sâng-hi má Yudaq byu pê chyáng jé mù, tûngbaù pê chyáng le jé râ nghut lê. ¹⁰ Nghut kôlhang, hpungwup shingkan, aróng eq nguínón hkyô gi, haú ge é hkyô kut é bang yuq hkanmó chyáng jé râ nghut lê; sâng-hi má Yudaq byu pê chyáng jé mù, tûngbaù pê chyáng le jé râ nghut lê. ¹¹ Hkâsu mù gâ le, Garai Gasang gi, myoqdong a hkyin é Sù nghut lê.

¹² Haú jep é tarâ lé a sê é mara kut shut é bang lhungháng gi, jep é tarâ dông a nghut é za htên byoq kó râ nghut lê. Haú jep é tarâ hkaú má mara kut shut é bang lhungháng gi, jep é tarâ dông jéyáng é hui zo kó râ nghut lê.* ¹³ Hkâsu mù gâ le, haú jep é tarâ lé wó gyô é bang lé, Garai

Gasâng é hí má dingmán bang gâ é a nghut é za, jep é tarâ lé châng kut é bang za sheq, dingmán bang gâ é hui râ nghut lê. ¹⁴ Haú jep é tarâ lé a wó é tûngbaù pé gi, jep é tarâ hkyô lé, yhang baú yhang châng nyi kô é hkûn, jep é tarâ lé a wó kôlhang, yhumsing gùng yhumsing é matú tarâ dut bekô nghut ri. ¹⁵ Yhangmoq gi, haú jep é tarâ hkyô pé lé, yhangmoq é i-myit unghkaú má kâ to bê nghut é lé, tûn shit bekô nghut mù, yhangmoq é myit má hkâm zô é hkyô le, haú lé saksé hkâm byi nyi é eq, yhangmoq myit é hkyô gi, ahkuí mara hun kat, ahkuí mara hkyut kat kut nyi ri. ¹⁶ Haú hkyô gi, ngò taí pyo é gabú danglù eq rajung za, byu pê é zaú nghop tô é hkyô pé lé, Hkrisduq Yesuq dông mai Garai Gasâng eq tarâ jéyáng é buinyi má dut râ nghut lê.

Yudaq Byu Pé Eq Jep É Tarâ

¹⁷ Nghut kôlhang, nàng gi, náng gùng nàng Yudaq byu rayuq nghut lê ga mù, haú jep é tarâ lé lumhkaú nyi é eq Garai Gasang lé xoq é hkyô má nghutbun nyi é sù; ¹⁸ Yhâng ô nau é hkyô lé sê é eq haú jep é tarâ mhoqshit é hkyô wó yû bê nghut é yanmai, je ahkyak é hkyô lé sê gàm hkoq é sù; ¹⁹ haú jep é tarâ má, hpaqchyí eq tengmán hkyo é alik wó sù nghut é yanmai, haú myoqjit bâng é matú hkyô-u shê sù eq mauchut hkaú mâ é bâng é matú maubó nghut sù; ²⁰ byu ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi, ²¹ nàng, góbang lé mhoq byi sù nhing, yhumsing gùng yhumsing a mhoq yû lú? A wó hkau ga hko taí luí nhing, nàng gi, hkaú lê a nghut lú? ²² Su-myi sulàng lú hkyô a wó kut ga byu pé lé taí luí nhing, nàng gi, su-myi sulàng lú hkyô kut lê a nghut lú? Hpara lô lé a jú dik sù nàng gi, noqkuq yhum lé hpyoq zo hpyoq shuq nyi lê a nghut lú? ²³ Jep é tarâ eq séng luí nghutbun sù nàng gi, haú jep é

* **2:12** Haú jep é tarâ lé a sê bang gâ é gi, tûngbaù pé lé gâ é nghut luí, haú jep é tarâ hkaú má é bang gâ é gi, Yudaq byu pé lé gâ é nghut lê.

tarâ lé lu lai é dông, Garai Gasang lé a hkungga kut lê a nghut lú? ²⁴ Haú gi, "Garai Gasâng é myìng gi, nung-moq é yanmai, tûngbaù pé chyáng lhoq hpoí pyâm é huí ri."* ga kê tô é eq rajung za nghut ri.

²⁵ Haú jep é tarâ lé nàng châng é nghut jáng, ahpyo-kuq hpyit hkyô gi, akyû bò bê nghut ri. Nghut kôlhang, nàng, jep é tarâ lé lu lai é nghut jáng, a hpyit é eq rajung za dut bê nghut ri. ²⁶ Ahpyo-kuq a hpyit kôlhang, jep é tarâ hkyô pé lé châng é bang lé gi, ahpyo-kuq hpyit bê bang dông ge són byi lê a nghut kó lú? ²⁷ Kê tô é tarâ lé wó mù, ahpyo-kuq hpyit hkam to gù nghut é, tarâ lu lai é sù nàng lé, gungsho má ahpyo-kuq a hpyit kôlhang, jep é tarâ lé châng é sù gi, mara hún râ nghut lê.

²⁸ Hkâsu mù gâ le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpyit é gi, ahpyo-kuq hpyit kyîng a nghut. ²⁹ Ahte myit hkaú má Yudaq byù nghut sù za, Yudaq byù kyîng nghut lê. Kê tô é tarâ dông a nghut é za, Woi-nyí eq myit má ahpyo-kuq hpyit é gi, ahpyo-kuq hpyit kyîng nghut bê. Haú yuq é hkya-on kungtôn hkyô gi, byù mai lo é a nghut, Garai mai lo é ru nghut lê.

3

Garai É Lhumzui Hkyô

¹ Haú dông ga jang, Yudaq byù rayuq dut nyi é gi, hai akyû hkâm zo râ lú? Ahpyo-kuq hpyit hkyô gi, hai akyû bò râ lú? ² Hkyô hkangmó má gyai akyû bò lê! Je hí má gi, haú Garai Gasâng é mungdang lé yhang, yhangmoq lé ap byi bê nghut ri.

³ Yhangmoq mâ é ra-am lumjîng myit a bo é nghut le gi, hkâsu kó lú? Yhangmoq lumjîng myit a bo é yanmai, Garai Gasâng é lhumzui hkyô lé akyû a bò nhâng wó dut râ lú? ⁴ Hkâ dông le a wó dut!

* 2:24 Esai 52:5 * 3:4 Hkya-on 51:4

"Haú mù, nàng dang taí é hkûn, dingmán é hkyô wó lhoq htoq râ eq, nàng jéyáng huí é hkûn, ûng râ nghut lê."*

ga kê tô é eq rajung za, byù yuq hkangmó gi, byù-mhaú dut kôlhang, Garai Gasang gi, tengmán nyi sháng gaq.

⁵ Nghut kôlhang, nga-nhûng é a dingmán hkyô gi, Garai Gasâng é dingmán hkyô lé san za je lhoq htoq shit é nghut lê; haú nghut jáng, nga-nhûng hkâsu nghû taí râ lú? Nga-nhûng lé Garai Gasang nhikmo-yô é hkyô gi, Yhang a tarâ mù nghut lê lú? (Ngò gi, byù hkyam dông taí htîng é nghut lê.) ⁶ Ratsuí lhang a nghut! Haú su ru nghut le gi, haú mingkan lé, Garai Gasang hkâsu wó jéyáng râ lú? ⁷ Rayuq yuq, "Ngò mhaú é hkyô gi, Garai Gasang tengmán é hkyô lé lhoq ko jat mù, Yhâng é hpungwup shingkang lé je wó lhoq hu nhang é nghut le nhîng, haí mù luí, ngò, yubak byù rayuq dông mara byi é hui zô nyi ra shirâ lú?" ga taí dang-rháng râ nghut lê. ⁸ "Ge é hkyô htoq sháng gaq, nga-nhûng, agè ashop hkyô kut sháng." nghû haí mù a taí kô é lú? Dang haú lé ngamoq taí é nghut lê ga luí, ngamoq lé lumù gansang é dông byù ra-am taí akô. Haú bang gi, mara dam byi é hui zo gíng bang nghut akô.

Dingmán Byù A Nyi

⁹ Haú jáng, hkâsu nghû lo râ lú? Nga-nhûng gi, je gè bang nghut lê lú? Ratsuí lhang a nghut. Yudaq byù nghut nghut, tûngbaù pé nghut nghut, yubak mara hkaú mâ é bang chyat nghut lê nghû, ngamoq taí san kyô wú bê nghut lê. ¹⁰ Chyúmdang má kê tô é le,

"Dingmán é byù a nyi, rayuq lhang a nyi nghut ri;

¹¹ Sê gyô é byù rayuq le a nyi, Garai Gasang lé ho é byù le a nyi nghut ri;

12 Lhunglhang bang gi, lhing ló byuq bekô; yhangmoq gi, hpau a dap bang chyat dut byuq bekô nghut ri.

Ge é kut sù ó a nyi, rayuq lhang a nyi nghut ri."✧

gâ ri.

13 "Yhangmoq é hkyung gi, hpông tô é lup pé nghut akô; yhangmoq é shô gi, mhaû akô."✧

"Yhangmoq é nhutwuî pé má gi, shîduq bò lhangmuî é duq dap bum ri."✧

gâ tô ri.

14 "Yhangmoq é nhut pé gi, nhing myíng nhing htê eq myit nô danghko baú byíng zan tô ri."✧

gâ tô ri.

15 "Yhangmoq é hkyî pé gi, byù sat sui lhoq htoq râ matú, lawán nau akô;

16 Yhangmoq sô nyi é hkyô pé gi, htên byoq é eq wuîhkê é ahkô tông tô é nghut mù,

17 nguingón é hkyô lé gi, yhangmoq a sé kó nghut ri."✧

gâ tô ri.

18 "Yhangmoq é myoq hí má Garai Gasang lé gyuq hkunggâ é hkyô, a bò kó nghut ri."✧

gâ tô ri.

19 Byù yuq hkangmó é nhut gi, tô taí jang a joq dut byuq mù, mingkan gón gi, Garai Gasang é hí má mara bo é bang dut nyi sháng gaq ga, haû jep é tarâ má taí é lhunglhang gi, jep é tarâ ô má nyi é bang lé taí é nghut é hkyô lé, nga-nhúng sê lhê. 20 Haû mù luî, jep é tarâ lé châng é đông mai, ó yuq le, Yhang é hí má dingmán sù gâ é wó hui râ a nghut; jep é tarâ đông gi, yubak mara bo é hkyô lé wó sê yu é za nghut lhê.

Lumjíng Jáng, Dingmán Sù Wó Dut É Hkyô

21 Ahkuî kúm gi, jep é tarâ đông a nghut é za, haû jep é tarâ eq myiqhtoi laiká pé mai saksé hkâm tô é Garai Gasang chyáng má é dingmán hkyô

lé, sé nhâng bê nghut ri. 22 Garai Gasang chyáng má é dingmán hkyô haû gi, Yesuq Hkrisduq lé lumjíng é đông mai nghut mù, lumjíng bang banshoq htoq má jé é nghut lhê. Gamhkuî é hkyô a joq. 23 Hkâsu mù gâ le, lhunglhang bang gi, yubak mara kut shut bê bang chyat nghut mù, Garai Gasang é hpungwup shingkang lé a hkyit hkap byuq lo kó nghut ri. 24 Ahkuî kúm gi, Hkrisduq Yesuq mai lo é hkyi yù hkyô đông, Garai Gasang é jejú èq, mara hkyut san byî é laí laí wó hui bê nghut ri. 25 Garai Gasang gi, Yesuq é sui lé lumjíng bâng matú, shîhtaí gunglik hkungga ralhum đông, Yesuq lé byî pyám bê nghut ri. Haû gi, laí lò bê yubak mara lé lhut pyám byi shoq, Garai Gasang myit híng byi bê nghut é yanmai, Yhang é tengmán hkyô lé tún shit é nghut ri. 26 Garai Gasang haû su kut é gi, Yhanggùng yhang dingmán Sù nghut é eq, Yesuq lé lumjíng é sù lé mara hkyut san byî é Sù nghut râ matú, ahkuî lhê ipyat má, Yhang é tengmán hkyô lé shit byî é nghut lhê.

27 Haû su nghut jáng, nghutbun jowò joq ri l hú? A joq. Hai tarâ mai a joq dut byuq é l hú? Haû jep é tarâ châng é yanmai nghut lhê l hú? A nghut, lumjíng hkyo é yanmai sheq a joq dut byuq é nghut lhê. 28 Hkâsu mù gâ le, byù gi, haû jep é tarâ châng é đông a nghut é za, lumjíng luî, mara hkyut san byi huî é hkyô lé, ngamoq lum nyi lhê. 29 Garai Gasang gi, Yudaq byu pè é Garai Gasang za nghut lhê l hú? Tungbaù pè é Garai Gasang le a nghut l hú? Nghut lhê, tungbaù pè é Garai Gasang le nghut lhê. 30 Hkâsu mù gâ le, Garai Gasang gi, rayuq za nghut é yanmai, rajung za lumjíng luî, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê. 31 Haû nghut jáng, nga-nhúng gi, lumjíng myit hau èq, jep é tarâ lé lhoq hpoî pyám râ l hú? Ratsuí lhang a

✧ 3:12 Hkya-on 14:1-3 ✧ 3:13 Hkya-on 5:9 ✧ 3:13 Hkya-on 140:3 ✧ 3:14 Hkya-on 10:7 ✧ 3:17 Esai 59:7-8 ✧ 3:18 Hkya-on 36:1

nghut! Nga-nhúng gi, jep é tarâ haú lé lhoq ging tîng é bang ru nghut lê.

4

Abraham, Mara Hkyut San Huí É Hkyô

¹ Haú su nghut jáng, nga-nhúng é íchý íwa Abraham gi, haú hkyô mai haí wó sê yu ri nghû, taí râ lúhú?

² Abraham gi, zui saí é dông mai, mara hkyut san byi huí é ru nghut le gi, yhang nghutbun jang joq râ nghut lê; nghut kôlhang, Garai Gasâng é hí má gi, yhang haú dông a nghut.

³ Chyúmdang má hkâsu gâ tô ri lúhú gâ le, "Abraham gi, Garai Gasang lé lumjîng bê nghut mù, yhang lé, dingmán sù ga són byi bê nghut ri."✧ gâ ri.

⁴ Zui saí é sù gi, yhâng é zuihpau lé, chyunghuq dông wó yu é a nghut é za, wó yú gîng luí, wó yu é ru nghut lê.

⁵ Nghut kôlhang, zui saí é hkyô dông a nghut é za, haú agè ashop hkyô lé mara hkyut san byi é Garai Gasang lé lumhkau é sù gi, yhâng é lumjîng myit é yanmai, dingmán sù ga són byi huí é nghut lê. ⁶ Haú eq rajung za, yhang zui saí é hkyô dông a nghut é za, Garai Gasâng eq dingmán sù ga són byi huí é, Garai Gasâng chyáng mâ é shimân jeju wó é sù eq séng luí, Dawiq taí é gi,

⁷ "Tarâ lu lai é lé mara hkyut pyám byi huí é eq yubak mara lé nghop pyám byi huí é bang gi, hkungsô wó nyi ri.

⁸ Bo tô é mara lé, Yhumsing eq mara a són byi é hui sù gi, hkungsô wó nyi ri."✧

gâ ri.

⁹ Haú sù é jeju gi, ahpyo-kuq hpyit hkâm bâng é matú za nghut lê lúhú? Ahpyo-kuq a hpyit bâng é matú le nghut lê lúhú? Hkâsu mù gâ le, Abraham é lumjîng myit lé, dingmán sù ga són byi bê nghut lê nghû, ngamoq taí nyi bê nghut lê. ¹⁰ Haú su són byi é gi, hkâ-nhám nghut lê lúhú? Ahpyo-kuq hpyit hkâm é htâng má lúhú? A

nghut jáng, hí má lúhú? Haú gi, ahpyo-kuq hpyit hkâm é htâng má a nghut é za, hí má ru nghut lê. ¹¹ Hau htoq agó, Abraham gi, yhang, ahpyo-kuq hpyit a hkam yù shí é hkûn mai, lumjîng luí wó é dingmán hkyô gâ é dizik nghut é, ahpyo-kuq hpyit masat lé myang hkam yù bê nghut ri. Haú mù, yhang gi, haú ahpyo-kuq hpyit a hkam yù kôlhang, lumjîng é lhunglhâng bang lé dingmán bang ga són byi é wó hui râ matú, haú bâng é íwa dut bê nghut ri. ¹² Haú ahpyo-kuq hpyit hkâm é za a nghut, nga-nhúng é íwa Abraham, ahpyo-kuq hpyit a hkam yù shi má wó é lumjîng hkyô é hkyî-kám lé cháng luí ahpyo-kuq hpyit bâng é íwa le, yhang nghut ri.

¹³ Mingkân é amyû hkûng xoq pé dut râ ga, Abraham eq yhâng é awut ashín pé lé byi tô é danggidiq gi, jep é tara é yanmai a nghut é za, lumjîng hkyô mai lo é dingmán hkyô dông ru nghut lê. ¹⁴ Hkâsu mù gâ le, jep é tarâ dông nyi yap é bang gi, amyû hkûng xoq pé nghut é nghut jáng, lumjîng hkyô gi, akyû a bo é eq, danggidiq gi, hpau a dap é dut byuq lê. ¹⁵ Haú jep é tarâ gi, nhikmo-yo hkyô lhoq htoq é nghut lê; nghut kôlhang, jep é tarâ a joq jáng gi, tarâ lu lai hkyô le joq râ a nghut.

¹⁶ Haú mù luí, danggidiq gi, Abraham é awut ashín lhunglhâng bâng chyáng, jeju mai za lo é eq gingtîng nyi é dut sháng gaq ga, lumjîng hkyô mai lo é nghut lê. Haú gi, jep é tarâ má lòm bâng é matú baú za a nghut, Abraham é lumjîng hkyô má lòm bâng é matú le nghut lê. Abraham gi, nga-nhúng lhunglhâng bâng é íwa nghut ri. ¹⁷ "Ngò gi, nang lé, byù myû myô myô é íwa dut nhâng bê."✧ ga kê tô é eq rajung za, haú shi byuq bê bang lé wó lhoq dui é eq a joq wú é zè lé joq shoq wó kut é, yhang lumjîng é sù Garai Gasâng hí má, Abraham gi, nga-nhúng é íwa nghut lê.

¹⁸ "Náng é awut ashín pé le, haú eq rajung za myô lò râ nghut lê."✧

✧ 4:3 Apûn 15:6,22

✧ 4:8 Hkya-on 32:1-2

✧ 4:17 Apûn 17:5

✧ 4:18 Apûn 15:5

ga yhang lé taî kyô to bê eq rajung za, yhang gi, myit myoqbyù jowò haî a joq kôlhang, lumjîng luî myoqbyu nyi é nghut mù, byù myû myo myô é îwa dut bê nghut ri. ¹⁹ Yhang gi, rashô zàn kô jé byuq bê nghut mù, yhanggùng gi, shi é gyá dut é hui zô é eq Sarah é zoyhûm shibó le shum byuq kôlhang, yhang gi, lumjîng myit a yom byuq nghut ri. ²⁰ Hau htoq agó, Garai Gasang é danggidiq eq séng luî, a lumjîng a dut é eq hê myit mhô myit a dut é za, yhang é lumjîng myit lé saî lhoq ging tíng mù, Garai Gasang lé hkya-on kungtôn luî, ²¹ Garai Gasang gi, Yhang byî tô é danggidiq eq rajung za wó kut râ a-tsam bò sù nghut é lé, yhang myit zing nyi ri. ²² Hau é yanmai, "Yhang lé, dingmán sù ga són byi bê nghut ri."* gâ tô é nghut lhê. ²³ "Yhang lé, són byi bê." ga, kâ tô é dang gi, yhang é matú za a nghut, ²⁴ nga-nhúng é Yhumsîng Yesuq lé, shi é mai lhoq dui toq yû sù Garai Gasang lé lumjîng luî, Yhang èq dingmán bang ga són byi râ nghut é, nga-nhúng é matú le nghut lhê. ²⁵ Yhumsîng Yesuq gi, nga-nhúng é yubak marâ é matú, shî hkám byi râ dông ap pyâm é hui luî, nga-nhúng, mara hkyut san byî é hui râ matú, lhoq dui toq é hui bê nghut ri.

5

Nguingón Hkyô Eq Gabú Hkyô

¹ Haû mù luî, nga-nhúng gi, lumjîng é dông mai mara hkyut san byî é hui bê nghut é yanmai, nga-nhúng é Yhumsîng Yesuq Hkrisduq dông, Garai Gasang eq buinùm wó xoq yû bê nghut lhê. ² Yesuq é yanmai, nga-nhúng gi, ahkuî wó yu to bê jeju shî má, lumjîng luî wó wâng bê nghut mù, Garai Gasang é hpungwup shîngkang lé myoqbyù luî gabú gumrong nyi lhê. ³ Haû za a nghut, nga-nhúng gi, wuîhke jamjau hkyô pé má le gabú gumrong nyi lhê. Hkâsu mù gâ le, wuîhke jamjau hkyô gi, hkam jan hkyô lhoq htoq ri; ⁴ hkam jan hkyô

gi, myit a-tsam lhoq htoq lhê; myit a-tsam gi, myoqbyu to hkyô lhoq htoq é lé, nga-nhúng sê lhê. ⁵ Myoqbyu to hkyô haû gi, nga-nhúng lé myit wum gyui nhang é a nghut; hkâsu mù gâ le, Garai Gasang gi, Yhang é chyitdap myit lé, Yhang mai, nga-nhúng lé byî tô é Chyoiyúng Woi-nyî dông, nga-nhúng é i-myit unghkaû má hut kat byi bê nghut ri.

⁶ Hkâsu mù gâ le, nga-nhúng gi, a-tsam a bò dut tô ashî u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shî hkám byi bê nghut ri. ⁷ Gè gè ga jáng, dingmán su é matú shî hkám byi râ byù gi, shau râ nghut lhê; nghut kôlhang, byù gè rayuq é matú kúm gi, wám shî hkám é byù nyi sê lhê. ⁸ Nghut kôlhang, nga-nhúng gi, yubak dap bang nghut nyi ashî hkún, nga-nhúng é matú Hkrisduq shî hkám byî é má, Garai Gasang gi, Yhang é chyitdap myit, nga-nhúng lé shit byi bê nghut ri.

⁹ Nga-nhúng gi, ahkuî, Yhang é sui mai mara hkyut san byî é hui bê nghut mù, Yhang é yanmai, Garai Gasang é nhikmo-yo hkyô mai, hkyi yu é je riyhang hui râ nghut lhê. ¹⁰ Hkâsu mù gâ le, nga-nhúng gi, Garai Gasang é gyè pé nghut nyi ashî u le, Yhang Zo shî hkám byî é dông, Garai Gasang eq buinùm wó xoq yu é hui bê nghut lhê. Wó xoq yu to bê nghut jáng, nga-nhúng gi, Yhang é asak dông mai, gè gè yhang hkyi yu é hui râ nghut lhê. ¹¹ Haû su za a nghut, nga-nhúng gi, nga-nhúng é Yhumsîng Yesuq Hkrisduq dông mai, buinùm wó xoq yu é jeju lé, ahkuî wó yu to bê nghut mù, Yhang é yanmai, Garai Gasang má le, gabú gumrong nyi lhê.

Shi É Gi, Adam É Yanmai, Dui É Asak Gi, Hkrisduq É Yanmai

¹² Byù rayuq dông mai, yubak mara gi, mingkan má jé wâng bê nghut luî, shî-nò hkyô gi, yubak marâ é yanmai châng jé bê nghut ri; haû dông mai, byù lhunglhang bang gi, yubak dap

* 4:22 Apûn 15:6

bang chyat nghut byuq mù, shî-nò hkyô gi, byù lhunglhang bâng chyáng jé bê nghut ri. ¹³ Hkâsu mù gà le, haù jep é tarâ lé a byi shimá, yubak mara gi, mingkan má joq to bê nghut lhê. Nghut kôlhang, jep é tarâ a joq shî é hkùn gi, yubak mara lé mara su a ngàm shî é nghut lhê. ¹⁴ Haù su ga kôlhang, Adam su hkunmó lé lu lai é dông mara a kut shut bâng é ahtoq má lhang, shî-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azòng nghut ri.

¹⁵ Nghut kôlhang, jeju chyunghuq gi, haù mara kut shut é hkyô su a nghut; hkâsu mù gà le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gà é byù rayuq é jeju mai lo é chyunghuq gi, byù myo myô é htoq má hkâ-í yhang bying mui nyi ri-nhung! ¹⁶ Garai Gasâng jeju chyunghuq gi, byù rayuq kut é yubak mara su a nghut; hkâsu mù gà le, tarâ jéyáng é hkyô gi, byù rayuq é mara má cháng mù, mara dam byî é hkyô lhoq htoq é nghut lhê; nghut kôlhang, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lhê. ¹⁷ Hau htoq agó, byù rayuq tarâ lu lai lui, haù rayuq é yanmai, shî-nò hkyô up nyi bê nghut lhê, ahkuí kúm, haù Garai Gasâng é agùn agó shimân jeju eq dingmán hkyo é chyunghuq lé hap yu é bang gi, Yesuq Hkrisduq gà é byù rayuq dông mai, je riyhang asak dui hkyô má uphkan nyi kó râ nghut lhê.

¹⁸ Haù mù lui, tarâ lu lai é hkyô ralhûm é yanmai, byù lhunglhang bang gi, mara dam byî é hui zo kô é su, dingmán hkyo é muzó ralhûm é yanmai, byù lhunglhang bang gi, asak dui hkyô eq sêng é mara hkyut san byi hkyô lé wó bê nghut ri. ¹⁹ Hkâsu mù gà le, byù rayuq jìno a gyô é yanmai, myo myo gi, yubak dap bang dut byuq é su, byù rayuq jìno gyô é yanmai, myo myo gi, dingmán bang

gâ é hui kó râ nghut lhê.

²⁰ Haù jep é tarâ jat é gi, tarâ lu lai hkyô je myo râ matú nghut lhê. Nghut kôlhang, yubak mara myô jat é hkùn, jeju gi, je riyhang myô jat lo é nghut lhê. ²¹ Haù mù, yubak mara gi, shî-nò hkyô dông uphông bê su, jeju gi, nga-nhung é Yhumsing Yesuq Hkrisduq é yanmai, ahtum abyuq é asak wó byî é dingmán hkyô dông up râ nghut lhê.

6

Hkrisduq Eq Rading Ralhum

¹ Haù nghut jáng, nga-nhung gi, hkâsu nghû tai râ l hú? Jeju myô jat lò sháng gaq nghû, nga-nhung, yubak mara kut xoq nyi râ l hú? ² Haù su a nghut sháng gaq! Nga-nhung gi, yubak mara eq shi gang bê bang nghut lhê; hkâsu mù haù má wó dui nyi lo râ l hú? ³ Hkrisduq Yesuq eq rading ralhum za dut râ matú, wui-myhup hkâm yù bê bang nga-nhung banshoq gi, Yhâng é shî hkám hkyô má le rading ralhum za dut râ matú, wui-myhup hkâm yù bê nghut é lé, nungmoq a sé kó l hú? ⁴ Haù mù lui, Hkrisduq gi, Íwâ é hpungwup shingông èq, shî bê mai lhoq dui toq huí é su, nga-nhung le, asak asik dông wó dui nyi sháng gaq nghû, nga-nhung gi, wui-myhup hkâm é dông, Yhang eq rahá, shî hkâm é eq myhup yhum é hui bê nghut lhê.

⁵ Nga-nhung gi, Yhang shî hkám é hkyô má, Yhang eq rading ralhum za dut bê nghut jáng, Yhâng é dum dui toq hkyô má le, Yhang eq rading ralhum za hkyak dut râ nghut lhê. ⁶⁻⁷ Hkâsu mù gà le, shî bê sù gi, yubak mara mai lhoq lhut é hui bê nghut é yanmai, nga-nhung gi, yubak marâ é jùn dut nó a ra lo mù lui, yubak mara gùng gi, lhoq htên pyâm é hui râ matú, nga-nhung é byù xau gi, Yhang eq rahá jén sat pyâm é hui bê nghut é hkyô lé, nga-nhung sê lhê.

⁸ Haù mù, nga-nhung gi, Yhang eq rahá shî hkám bê nghut jáng, Yhang eq rahá dui nyi râ nghut lhê nghû,

lumjǎng lhê. ⁹ Hkâsu mù gâ le, Hkrisduq gi, shî bê mai lhoq dui toq é hui bê nghut mù, Yhang gi, dum wó shi lo râ a nghut é lé, nga-nhúng sê lhê; shî-nò hkyô gi, Yhang lé hkâ-nhám le wó sing to râ a nghut lo. ¹⁰ Yhang shî hkâm é shî-nò hkyô gi, banshoq bâng é matú, yubak mara eq séng luí radám za shî hkâm byi bê nghut ri; nghut kôlhang, Yhang dui nyi é asak gi, Garai Gasâng hí má dui nyi é nghut lhê.

¹¹ Haú eq rajung za, nungmoq gi, yubak mara eq shi gang luí, Hkrisduq Yesuq dông Garai Gasâng é matú asak dui nyi lhê nghú, sôn yù keq. ¹² Haú mù luí, nungmoq é htên byoq sê é gungdu má, yubak mara lé hkâ-uphkâng nhâng, uphkâng nhâng kô é nghut jáng, gungdu yut yut ô nau é agè ashop hkyô lé, nungmoq châng é nghut bê. ¹³ Nungmoq é gungdu showui showang pé lé, agè ashop hkyô é chùng zè pé dông yubak mara má hkâ-ap byi pyám kó, shî bê mai lhoq dui toq yú huí é bang su, yhumsing gùng yhumsing, Garai Gasâng chyáng kúm ap byi keq; nungmoq é gungdu showui showang pé lé, dingmán hkyô é chùng zè pé dông, Garai Gasâng chyáng ap byi keq. ¹⁴ Hkâsu mù gâ le, nungmoq gi, jep é tarâ hkaú má a nghut lô é za, jeju hkaú má nghut nyí bekô yanmai, yubak mara gi, nungmoq lé sǎng sù wó dut râ a nghut lo.

Dingmán Hkyô É Jùn Pé

¹⁵ Haú jáng gi, hkâsu kó lhú? Nga-nhúng gi, jep é tarâ hkaú má a nghut lo é za, jeju hkaú má nghut nyí bekô yanmai, mara wó kut shut kó râ lhú? Haú su a wó kut! ¹⁶ Nungmoq gi, rayuq yuq é jino gyo râ matú, yhumsing gùng lé jùn pé dông ap pyám é hkún, shî-nò hui râ nghut é yubak marâ é jùn dông nghut kôlhang, dingmán hkyô wó râ nghut é jino gyo hkyô nghut kôlhang, nungmoq châng nyi é nghut le gi, nungmoq, haú é jùn dut bê lé, a sé kó lhú? ¹⁷ Nungmoq gi, yubak marâ é jùn dut wú bê bang nghut kôlhang, nungmoq hkam yu

to bê mhoqshit hkyô lé, nungmoq é myit nhiklhum banshoq èq cháng bekô nghut é yanmai, Garai Gasâng lé jeju hkya-on sháng. ¹⁸ Nungmoq gi, yubak mara mai lhoq lhut é hui bang nghut kômù, dingmán hkyô é jùn dut bekô nghut ri.

¹⁹ Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ dông ngò tái râ ga jáng: nungmoq gi, nungmoq é gungdu showui showang pé lé, a sansêng é hkyô eq agè ashop hkyô myô jat nhang é má jùn dông lhang ap byi wú bekô nghut é su, ahkuí gi, chyoiyúng hkyô wó yú râ matú, haú pé lé, dingmán hkyô má jùn dông ap byi keq. ²⁰ Nungmoq gi, yubak marâ é jùn dut nyi kô é hkún, dingmán hkyô èq uphkang é mai lut nyi kô é nghut lhê. ²¹ Ahkuí, nungmoq hoqjung nghú wú htoq é pé gi, haú u lé, hai akyú wó yú kô é lhú? Hau pé gi, shi byuq é má htúm é chyat nghut ri. ²² Nghut kôlhang, ahkuí gi, nungmoq, yubak mara mai lhoq lhut é hui bekô nghut mù, Garai Gasâng é jùn dut bekô nghut ri; hau é akyú gi, chyoiyúng hkyô wó yu é nghut mù, ahtum abyuq é asak wó râ nghut lhê. ²³ Hkâsu mù gâ le, yubak marâ é ahpau gi, shi é hkyô nghut ri; nghut kôlhang, Garai Gasâng é chyunghuq gi, nga-nhúng é Yhumsing Hkrisduq Yesuq é yanmai, ahtum abyuq é asak nghut ri.

7

Tarâ Mai Lut É Hkyô

¹ Gumang wui ê, ngò gi, tarâ lé sê é bang nungmoq lé tái nyi lhê: haú tarâ gi, byù rayuq lé, yhang, asak dui nyi é u lé za wó uphkang é lé, nungmoq a sé kó lhú? ² Dangké, ikun wàng bê myiwe myhí rayuq gi, yhâng é yhumsing hpó asak dui nyi é ahkying má, tarâ èq up zing tô é hui ri; nghut kôlhang, yhâng é yhumsing hpó shi byuq é nghut jáng gi, haú ikun wàng tarâ mai, yhang wó lut bê nghut ri. ³ Haú nghut é yanmai, yhâng é

yhumsîng hpó asak dui nyi ashî u lé, yuqgè góyuq eq hâng lhûm é nghut jáng gi, yhang lé, sulàng lú sù ga kó râ nghut lhê. Nghut kôlhang, yhang é yhumsîng hpó shi byuq é nghut jáng gi, yhang, tarâ haû mai lut bê nghut luí, yuqgè góyuq eq hâng lhum kôlhang, sulàng lú sù a nghut lo.

⁴ Haû mù luí, ngá é gumang wuî ê, nungmoq le, haû shi byuq é mai lhoq dui toq yù hui bê sù Yuqgè chyáng wó xoq mù, nga-nhúng gi, Garai Gasang lé ashî wó zui byi sháng gaq ga, Hkris-duq é gungdu dông mai, jep é tarâ eq shi gang bê nghut lhê. ⁵ Hkâsu mù gâ le, nga-nhúng, yubak gungsho má nghut nyi é hkûn, nga-nhúng gi, shî-nò hkyô é ashî zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhúng é gungdu pé má mù zui nyi é nghut lhê. ⁶ Nghut kôlhang, ahkuí gi, nga-nhúng lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kê tô é hkyô xau dông a nghut é za, Woi-nyí é hkyô sik dông nga-nhúng dojaú nyi é nghut lhê.

Jep É Tarâ Eq Yubak Mara

⁷ Haû jáng, nga-nhúng hkâsu tai rá lhú? Jep é tarâ gi, yubak mara nghut lhê lhú? Ratsuí lháng a nghut! Gè gè ga jáng, haû jep é tarâ dông mai za a nghut le, yubak mara lé, ngò wó sê é a nghut. Hkâsu mù gâ le, "myoqnoq myit hkâbô"✧ ga jep é tarâ má a tai tô é nghut jáng, myoqnoq é hkyô lé, ngò sé rá a nghut. ⁸ Nghut kôlhang, yubak mara gi, hkunmó é ahkáng lé chûng mù, ngò má myoqnoq hkyô jung hkanmó lhoq htoq byî ri; hkâsu mù gâ le, jep é tarâ hkaú má a nghut jáng, yubak mara gi, shi é za nghut lhê. ⁹ Ngò gi, tarâ hkaú má a nghut é za asak dui wú bê nghut lhê; nghut kôlhang, haû hkunmó htoq lô jáng, yubak mara gi, dui lò mù, ngò gi, shî bê nghut lhê. ¹⁰ Haû mù luí, asak dui nhâng rá matú nghut é hkunmó haû gi, shî-nò hkyô dut byuq é lé, ngò wó sê é nghut lhê. ¹¹ Hkâsu mù gâ le,

yubak mara gi, hkunmó é ahkáng lé chûng mù, ngo lé mhaû yù luí, hau èq ngo lé shî nhang ri. ¹² Hau pé lé wú jáng, jep é tarâ gi, chyoiyúng ri; haû hkunmó gi, chyoiyúng, dingmán é eq ge é nghut ri.

¹³ Haû nghut jáng, ge é hkyô haû gi, ngá é matú shî-nò hkyô dut byuq bê lhú? Haû dông a nghut! Nghut kôlhang, yubak mara lé gi, yubak mara dông hkyak wó lhoq htoq shit rá matú, haû ge é hkyô dông mai, yubak mara gi, ngò má shî-nò hkyô lhoq htoq bê nghut luí, yubak mara gi, gè gè yhang agè ashop dut é lé, hkunmó dông mai tân shit é nghut lhê.

¹⁴ Hau htoq agó, jep é tarâ gi, woi-nyí eq sêng é hkyô nghut é lé, nga-nhúng sê lhê; nghut kôlhang, ngò má gi, gungsho eq sêng é hkyô za bo é nghut luí, yubak mara má jùn dông ung zô é hui bê nghut lhê. ¹⁵ Ngò haî kut nyi é hkyô lé, ngò a sé. Hkâsu mù gâ le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê. ¹⁶ Ngò a kut nau é lé kut é nghut jáng gi, haû jep é tarâ ge é lé, ngò myit huí é nghut lhê. ¹⁷ Ahkuí gi, haû lé ngò yhang kut nyi é a nghut lo, ngò má lúng tô é haû yubak sheq kut é ru nghut lhê. ¹⁸ Ngò má, nghut bê, ngá é yubak gungsho má ge é hkyô haî le a bo é lé, ngò sê lhê. Hkâsu mù gâ le, ge é hkyô lé kut nau é myit ngò má bò kôlhang, haû lé a wó kut htoq nghut ri. ¹⁹ Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri. ²⁰ Ahkuí, a kut nau é hkyô lé ngò kut nyi é nghut jáng, haû lé ngò yhang kut nyi é a nghut lo é za, ngò má lúng tô é haû yubak sheq haû lé kut nyi é ru nghut lhê.

²¹ Haû mù, ge é hkyô lé ngò kut nau é hkûn, ngò má agè ashop hkyô htoq lô lô mù é tarâ lé, ngò myang ri. ²² Hkâsu mù gâ le, ngò gi, Garai Gasang é tarâ lé, ngá é i-myit unghkaú má myit nguì gabú nyi lhê. ²³ Nghut kôlhang, ngá é gungdu

✧ 7:7 Htoq Lô 20:17

showui showang pé má bo é gotú tarâ gi, ngá é i-myt tarâ eq majan zân lhûm é nghut luí, ngá é gungdu showui showang hkaú má mú zui nyi é yubak é tarâ má, ngo lé shúmbyû dut nhang é lé, ngò myang ri. ²⁴ Ngò gi, shogyo rayhup dut sù nghut ri-nhung! Shî nhang é gungdu shî mai, ó yuq wá, ngo lé wó hkyi yù râ lhú? ²⁵ Nga-nhung é Yhumsing Yesuq Hkrisduq dông mai wó lut bê nghut mù, Garai Gasang lé jeju hkya-ôn nyi lhê!

Haû mù luí, ngò yhang, myit é dông gi, Garai Gasang é tarâ lé châng lhê, nghut kôlhang, yubak gungsho dông gi, yubak é tarâ lé châng lhê.

8

Haû Woi-nyí Mai Asak Dui É Hkyô

¹ Haû mù luí, ahkuí, Hkrisduq Yesuq má nghut nyi bâng é matú gi, mara byí é hkyô a joq lô é nghut lhê.

² Hkâsu mù gâ le, asak dui hkyô eq sêng é Woi-nyí é tarâ gi, Hkrisduq Yesuq dông, yubak mara eq shî-nò hkyô é tarâ mai, ngo lé lhoq lhut yû bê nghut lhê. ³ Haû jep é tarâ gi, yubak gungshô é yanmai, wum nyhóm luí a wó kut é hkyô lé, Garai Gasang gi, yubak mara hkungga dut nhang râ matú, yubak byu é gungshô dông, Yhang Zo sîng lé nhang kat é dông kut pyám bê nghut ri. ⁴ Haû mù, Garai Gasang gi, yubak gungsho dông asak a dui é za Woi-nyí dông asak dui bang nghut é nga-nhung má, haû jep é tarâ má bo é hkyô pé lé, wó lhoq dik râ matú, gungsho ralhum má, mara lé doqđân pyám bê nghut ri.

⁵ Haû yubak gungsho dông asak dui é bang gi, gungsho yut yut ô nau é hkyô pé lé myit zuq nyi akô; haû Woi-nyí dông asak dui é bang kúm gi, Woi-nyí ô nau é hkyô pé lé myit zuq nyi akô nghut ri. ⁶ Haû yubak byu é myit gi, shi é hkyô nghut ri; haû Woi-nyí eq hkang to huí su é myit kúm gi, asak eq nguingón hkyô nghut ri. ⁷ Haû yubak myit gi, Garaí é tarâ ô má a nyi é htoq

agó, haú lé a wó cháng kut é yanmai, Garaí é gyè nghut ri. ⁸ Haû yubak gungshô eq hkang tô é hui bang gi, Garaí Gasang lé a wó gabú nhang kô nghut ri.

⁹ Nghut kôle, Garaí Gasang é Woi-nyí gi, nungmoq chyáng lúng nyi bê nghut jáng, nungmoq gi, haû yubak gungshô eq hkang to huí é bang a nghut lô é za, Woi-nyí eq hkang to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê. ¹⁰ Nghut kôlhang, nàng má Hkrisduq nyi nyi é nghut jáng, nàng é gungdu gi, yubak mará é yanmai shî kôlhang, nàng é woi-nyí gi, dingmán hkyo é yanmai dui nyi ri. ¹¹ Hau htoq agó, Yesuq lé shi é mai lhoq dui toq yû Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yû Sù gi, nungmoq má nyi nyi é, Yhâng é Woi-nyí dông mai, nungmoq é, shî sê é gungdu pé lé le, asak dui nhang râ nghut lhê.

¹² Haû mù luí, Gumang wui é, nga-nhung gi, yubak gungsho dông asak dui râ matú, wò wó é bang a nghut. ¹³ Hkâsu mù gâ le, haû yubak gungsho dông asak dui kô é nghut jáng, nungmoq gi, shî râ nghut lhê; nghut kôlhang, haû gungshô é shut shaí hkyô lé, Woi-nyí eq sat pyám kô é nghut jáng, nungmoq gi, asak dui râ nghut lhê. ¹⁴ Garaí Gasang é Woi-nyí eq shuí u é hui bang gi, Garaí Gasang é yhangzô pé nghut lhê. ¹⁵ Hkâsu mù gâ le, nungmoq gi, gyuq râ matú, nungmoq lé jùn dum taú dut nhang é woi-nyí lé, a hap yu é za, nga-nhung lé zo yín yu é Woi-nyí lé hap yu tô é bang ru nghut lhê; haû mù, nga-nhung gi, Yhang é yanmai, "Aba, * Áwa ê" nghu wut é nghut lhê. ¹⁶ Nga-nhung gi, Garaí Gasang é yhangzô pé nghut é lé, Woi-nyí haû gi, nga-nhung é woi-nyí eq rahá saksé hkâm nyi ri. ¹⁷ Ahkuí, nga-nhung gi, zo wui nghut bê yanmai, Hkrisduq eq rahá, Garaí Gasang é amyû hkungxoq pé wó dut é

* **8:15** Aba gâ é gi, Aramaik dang dông "áwa" gâ é lichyúm nghut lhê.

nghut lhê. Nga-nhúng gi, Hkrisduq é wuîhke jamjau pé lé, gè gè yhang bo hui zô é nghut jáng, Yhâng é hpungwup shing kang lé le, bo myang hkam yù râ nghut lhê.

Htângnùng Lhê É Hpungwup Shing kang

¹⁸ Nga-nhúng é ahkuî lhê é wuîhke jamjau hkyô pé gi, nga-nhúng lé shit râ nghut é hpungwup shing kang eq whuí râ a gingdán nghû, ngò wó myit ri. ¹⁹ Haû hpan to huî é lhunglháng gi, Garai Gasâng é yhangzô pé lé lhoq htoq shit byi râ lé, gyai yhang myit lánng nyi akô nghut ri. ²⁰ Hkâsu mù gâ le, haû hpan to huî é lhunglháng gi, akyû a bo é chyat dut byuq bê nghut ri. Haû gi, yhumsîng hkyin yu é dông a nghut é za, haû su dut nhâng Sû ô nau é dông kut é nghut ri. ²¹ Haû hpan to huî é lhunglháng gi, htên byoq byuq râ matú shúm dut é mai lhoq lhut é hui luî, Garai Gasâng é yhangzo pê é hpungwup bo é luthkyô má wó wâng râ matú, myoqbyu tô é nghut lhê.

²² Haû hpan to huî é lhunglháng gi, ahkuî hkyîng jé shoq, zohkû-nò no é su nò-kying kyîng nyi kô é lé, nga-nhúng sê lhê. ²³ Haû pé za a nghut, Woi-nyí é sâng-hi ashi† lé wó yû bê bang nga-nhúng le, zo pé dông yín yu é jeju lé lánng uchyang, i-myt unghkaû má nò-kying kyîng é nghut lhê. Zo pé dông yín yu é jeju haû gi, nga-nhúng é gungdu hkyi xe yù hkyô nghut lhê. ²⁴ Hkâsu mù gâ le, nga-nhúng gi, myit myoqbyù hkyô haû mai hkyi yu é hui bê nghut lhê. Nghut kôlháng, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsîng myang to bê é lé, ó yuq wá myit myoqbyù shirâ lhú? ²⁵ Nghut kôlháng, nga-nhúng gi, a wó shî é lé myit myoqbyu é nghut jáng, myit hîng hîng kut lánng é nghut lhê.

²⁶ Haû eq rajung za, Woi-nyí gi, nga-nhúng wum nyhôm é hkyô má garúm byi ri. Nga-nhúng gi, haî dung râ é lé a sé kôlháng, haû Woi-nyí yhang

gi, dang mai a wó taî htoq é nò-kying htê dông, nga-nhúng é matú bo dúng xoq byi ri. ²⁷ Nga-nhúng é i-myt unghkaû lé gôn wú é Sû gi, haû Woi-nyí myit é hkyô lé sê lhê, hkâsu mù gâ le, haû Woi-nyí gi, Garai Gasâng ô nau é dông, sân-yúng bâng é matú bo dúng xoq byi ri.

Banshoq Lé Je Wó Ung Pyâm Râ Hkyô

²⁸ Garai Gasang gi, Yhang myit sôn tô é eq rajung za, ji yù luî, Yhang lé chyitdap bâng é matú, lhunglháng lé ge é dông chyat kut é hkyô lé, nga-nhúng sê lhê. ²⁹ Hkâsu mù gâ le, Yhang Zo gi, gumang wuî myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó púng nhâng râ matú, hí mai masat to bê nghut ri. ³⁰ Hau htoq agó, Yhang, hí mai masat to bê bang lé gi, ji yu ri; ji yù bê bang lé gi, mara hkyut san byi ri; mara hkyut san byi é hui bang lé gi, hpungwup shing kang bò nhang ri.

³¹ Haû jáng gi, shí hkyô eq séng luî, nga-nhúng haî taî shirâ lhú? Garai Gasang gi, nga-nhúng hkyam shut nghut jáng, nga-nhúng lé, ó yuq wá gyè wám kut râ lhú? ³² Yhumsîng é Yhangzo lé lháng a ha bûn é za, nga-nhúng banshoq bâng é matú ap byi pyâm é Sû gi, Yhang lé le, lhunglháng lé le, rahá láí láí byi râ a nghut lhú? ³³ Garai Gasâng eq hkyin yu to bê bang lé, ó yuq wá mara wó hûn râ lhú? Garai Gasang gi, mara hkyut san byi Sû nghut ri. ³⁴ Hkrisduq Yesuq gi, shî hkám luî, shî hkâm é htoq agó, shî é mai lhoq dui toq yu é hui mù, Garai Gasâng é loqyo hkyam má nghut nyi luî, nga-nhúng é matú bo dúng xoq byi nyi bê nghut é yanmai, ó yuq wá mara wó byi râ lhú? ³⁵ Hkrisduq é chyitdap myit mai, nga-nhúng lé, haî eq wá wó lhoq kang râ lhú? Gunjang huî é hkyo eq luq? Wuîhke huî é hkyo eq luq? Zing-ri huî é hkyo eq luq? Mutmó huî é hkyo eq luq? Gùng chin

† 8:23 Woi-nyí é sâng-hi ashi gâ é gi, Woi-nyí gi, Garai Gasang byi é chyunghuq pé mâ é sâng-hi lhum nghut lhê.

dut huî é hkyo èq luq? Gyuq jung èq luq? Sham èq luq? ³⁶ Haû gi,

"Náng é yanmai, ngamoq, nyí wuî sat pyâm é huî nyi ri;

sat râ matú nyhi tô é sau pé lé su, ngamoq lé myit pyâm akô."[☆]

ga kê tô é eq rajung za nghut ri.

³⁷ A wó lhoq kang; nga-nhúng lé chyitdap Su é yanmai, nga-nhúng gi, haú pé banshoq lé je wó ung pyâm é nghut lhê. ³⁸ Hkâsu mù gâ le,

shî kôhang, byùn kôhang, maumang lagyô pé nghut kôhang, agè ashop é nat pé nghut kôhang, shí ipyat nghut kôhang, htang pyat nghut kôhang, haí jung a-tsam pé nghut kôhang,

³⁹ htoq tsáng mâ é nghut kôhang, a-ô tsáng mâ é nghut kôhang, hpan tô é gotú haí nghut kôhang, nga-nhúng é Yhumsîng Hkrisduq Yesuq má bo é Garai Gasâng é chyitdap myit mai, nga-nhúng lé wó lhoq kang pyâm râ a nghut nghû, ngò gi, hkyak wó sê yu ri.

9

Garai Gasang Hkyin Yu É Israelaq Byu Pé

¹ Ahkuî, ngò gi, Hkrisduq má tengmán é dang taí râ; ngò a mhaû é lé, haû Chyoiyúng Woi-nyí gi, ngá é unghkaû myit má hkyak saksé hkâm nyi ri. ² Ngò gi, ngá é myit nhiklum má, gyai yhang yón kuq nyi é eq ayang hpuzô nyi lhê. ³ Hkâsu mù gâ le, ngò gi, ngá é byuhú, ngá é gumang wui é matú, nhîng é huî luí Hkrisduq eq gang le lháng gè râ su gâ ri. ⁴ Haú bang gi, Israelaq byu pé nghut lhê. Zo yín yû huî é hkyô le,

hpungwup shingkang le, dangshikaq pé le, tará lé myang hap yu é hkyô le, noqkuq yhûm má noqkuq é hkyô le, danggidiq pé lé le, yhangmoq wó yu akô nghut ri. ⁵ Haû myîng hû é îchyí îwâ pé gi, yhangmoq é îchyí îwâ pé nghut luí, byu é hkyam dông gon jáng, Hkrisduq gi, yhangmoq amyû má é nghut ri. Yhang gi, lhunglháng

lé up é, ahtum abyuq hkya-on huî é Garai Gasang nghut ri! Amen.

⁶ Haû gi, Garai Gasâng é danggidiq akôm dut byuq bê nghû nau é a nghut. Hkâsu mù gâ le, Israelaq byu pé banshoq bang gi, Israelaq byù akying chyat a nghut kó nghut ri. ⁷ Abraham é awut ashín banshoq bang gi, yhâng é zo wuî akying chyat nghû a wó taí é nghut lhê. Hau é malaî, "Isak dông mai lo é lé, náng é awut ashín nghû sôn byi râ nghut lhê."[☆] gâ tô ri.

⁸ Radông taí sháng ga jáng, gungsho mai hku é zo wuî gi, Garai Gasâng é zo wuî akying a nghut kó, danggidiq eq sêng é zo wuî za sheq, Abraham é awut ashín pé dông sôn byî é nghut lhê. ⁹ Hkâsu mù gâ le, "Masat tô é ahkyíng má, ngò dum taû lé mù, Sarah gi, yuqzo hkû râ nghut lhê."[☆] ga taí tô é danggidiq é yanmai nghut lhê.

¹⁰ Haû za a nghut, Rebeka é yhangzô nhiktang é îwa gi, nga-nhúng é îwa nghut su Isak rayuq za nghut lhê. ¹¹⁻¹² Nghut kôhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yù Su é yanmai nghut é lé, wó gîng nyi sháng gaq ga, haû zozûm nhik a hku lé shî é htoq agó, ge é eq a ge é muzó haí lháng a kut shimá, "Haû ko sù yuq gi, tiq sù yuq lé dojaú râ nghut lhê."[☆] ga, Rebeka lé taí kyô tô é nghut lhê. ¹³ Haû gi, "Yakup lé, ngò chyitdap lhê, nghut kôhang, Eso lé gi, a ngui é nghut lhê."[☆] ga kê tô é eq rajung za nghut ri.

¹⁴ Haû nghut é yanmai, nga-nhúng hkâsu nghû taí râ? Garai Gasang gi, a tará é sù nghut lhê lhú? Ratsuí lháng a nghut! ¹⁵ Hkâsu mù gâ le,

"Ngò, shogyo nhikmyin naù sù lé, shogyo nhikmyin râ nghut lhê; Ngò, jeju byi naù sù lé, jeju byi râ nghut lhê."[☆]

ga, Mosheq lé Yhang taí ri. ¹⁶ Haû mù luí, haû hkyin yu é hkyô gi, byù yut yut ô nau é yanmai le a nghut, shikut é yanmai le a nghut, Garai Gasâng é

☆ 8:36 Hkya-on 44:22 ☆ 9:7 Apûn 21:12 ☆ 9:9 Apûn 18:10,14 ☆ 9:11-12 Apûn 25:32 ☆ 9:13 Mal 1:2-3 ☆ 9:15 Htoq Ló 33:19

shogyo nhikmyîn é yanmai za nghut lhê. ¹⁷ Hkâsu mù gà le, Chyúmdang má, "Náng chyáng Ngá é a-tsam wó tún shit rá eq mingkan gón má Ngá é myìng lhoq pyo é hui rá matú sheq, Ngò, nang lé lhoq toq kat é nghut lhê."* ga, Hpara-uq lé taí ri. ¹⁸ Haû mù luí, Garai Gasang gi, shogyo nhikmyin naù sù lé, shogyo nhikmyin mù, myit lhoq htân byi naù sù lé, myit lhoq htân byi ri.

¹⁹ Nungmoq mâ é rayuq yuq, "Haû jáng, Garai Gasang gi, ngamoq lé haí mù mara hun nyi ashí lhú? Yhang ô nau é hkyô lé, ó yuq wá wó hkûm pyâm lhê lhú?" ga, ngo lé taí kó rá nghut lhê. ²⁰ Nghut kôhang, Garai Gasang lé dang tu sù byù nang gi, ó yuq wá nghut lhê lhú? Saí to hui bê é zè pé gi, "Nàng, haí mù ngo lé shí su kut saí tô lhê lhú?" nghû saí é Sù lé wó taí rá lhú? ²¹ Tso-au saí sù gi, tsohtung ralhum mai za, hkik é tso-au pé eq a hkik é tso-au pé saí rá ahkáng wó lhê a nghut kô lhú?

²² Garai Gasang gi, Yhâng é nhikmo-yo hkyô tún shit luí, Yhang é a-tsam lé sé nhâng naù kôhang, htên byoq rá matú hen tô é, nhikmo-yo gíng é tso-au pé lé, myit hîng hîng shirang pyâm nyi é hkyô lé, taí rá jang haí joq ashí lhú? ²³ Hpungwup shingkâng é matú noq mai hen to bang nghut é, Yhang shogyo nhikmyin hui é bang lé, Yhâng é agùn agó é hpungwup shingkang lé sé nhâng naù mù, Yhang haû su kut é nghut jáng, taí rá haí joq ashí lhú? ²⁴ Haû bang gi, Yudaq byu pé mai za a nghut, tûngbaù pé mai le jì yù hui é bang nga-nhúng nghut lhê. ²⁵ Haû eq rajung za, Hosea laiká má Yhang taí tô é gi,

"Ngá é byù myû a nghut é bang lé,
 'Ngá é byù myû' nghû;
 Ngò a chyit é byizo lé 'Ngò chyit
 sù' nghû wut rá nghut lhê."*

gâ ri. ²⁶ Haû mù,
 "'Nungmoq gi, ngá é byù myû pé a
 nghut.' nghû yhangmoq lé taí

é jowò má yhang,
 yhangmoq gi, 'Rû dui nyi é Garai
 Gasâng yhangzô pé' ga wut é
 hui kó rá nghut lhê."*

gâ ri.

²⁷ Esai-aq le, Israelaq byu pé eq séng luí garu taí é gi,

"Israelaq yhangzo yhangshû pé gi,
 wuìshuq lung-aû yâm mâ é se-
 muí su myo kôhang,
 myit gyó tô é bang za sheq hkyi
 yu é hui kó rá nghut lhê.

²⁸ Hkâsu mù gà le, haû Yhumsîng gi,
 myidàm htoq má Yhâng é tarâ
 jéyáng hkyô lé hân hân lhoq dik
 lhoq htûm pyám rá nghut lhê."*

gâ ri.

²⁹ Haû eq rajung za, hí lé Esai-aq taí tô é gi,

"A-tsam dik shoq bò sù haû Yhumsîng
 za, nga-nhúng lé, awut ashín a
 myhit to byi é nghut jáng,
 nga-nhúng gi, Sodom wà su dut
 byuq luí, Gomoraq myuq eq
 pung byuq rá nghut lhê."*

gâ ri.

*Israelaq Byu Pé A Lumjîng Kô É
 Hkyô*

³⁰ Haû mù, nga-nhúng hkâsu nghû
 taí rá lhú? Dingmán hkyô lé a châng
 hkat é tûngbaù pé gi, haú lé wó yù
 bekô; haû gi, lumjîng hkyo é yan-
 mai wó yu é dingmán hkyô nghut
 ri. ³¹ Nghut kôhang, tarâ eq séng é
 dingmán hkyô lé châng hkat é Israe-
 laq byu pé gi, haú lé a wó yù kó nghut
 ri. ³² Haí mù a wó yù kô é lhú? Yhang-
 moq gi, lumjîng myit èq châng hkat kô
 é a nghut é za, muzó pé èq châng hkat
 kô é yanmai, a wó yù kô é nghut ri.
 Yhangmoq gi, "htung htê rá luqgok"
 má htûng leng bekô nghut ri. ³³ Haû,
 "Wú keq, htûng leng rá luqgok eq
 myit leqbat nhâng rá luqmó
 cham lé, Ngò, Zi-un bùm má
 lheq to luí,
 Yhang lé lumhkaû sù gi, hkâ-
 nhám le hoq hpu é hui rá a
 nghut."*

* 9:17 Htoq Ló 9:16 * 9:25 Hos 2:23 * 9:26 Hos 1:10 * 9:28 Esai 10:22-23 * 9:29 Esai 1:9

* 9:33 Esai 8:14; 28:16

ga kê tô é eq rajung za nghut ri.

10

¹ Gumang wuê ê, ngò gi, haù Israe-laq byu pé hkyi yu é hui kó sháng gaq nghú, gyai yhang myit shirông luí, Garai Gasâng chyáng yhangmoq é matú kyûdung byi nyi lhê. ² Hkâsu mù gâ le, yhangmoq gi, Garai Gasâng é hkyô lé gyai yhang myit zuq é bang nghut é lé, ngò saksé hkâm lhê; nghut kôlhang, yhangmoq myit zuq é hkyô gi, hpaqchyí bo é dông a nghut kó. ³ Yhangmoq gi, Garai Gasâng chyáng mai jé lé é dingmán hkyô lé a sé kômù, yhumsing dingmán bûn é hkyô lé za ho shikut nyi kô é yanmai, Garai Gasâng é dingmán hkyô hkaú má a nyi kó nghut ri. ⁴ Hkrisduq gi, lumjîng bang yuq hkanmó, dingmán é má wó jé kó sháng gaq ga, jep é tarâ lô htûm jang dut bê nghut ri.

⁵ Mosheq gi, "Haú pé dông châng é sù gi, haú pé mai asak duì râ nghut lhê."* ga, jep é tarâ eq sêng é dingmán hkyô lé kê sân kyô tô é nghut lhê. ⁶ Nghut kôlhang, lumjîng hkyô eq sêng é dingmán hkyô gi, "Náng é myit nhiklhum má, 'Mauhkûng má, ó yuq doq lô râ lúhú?'"* (Haù gi, Hkrisduq lé shuí gyó lò râ gá nau é nghut lhê), ⁷ haù a nghut jáng, 'Nik é jang má, ó yuq gyó wâng râ lúhú?'"* (Haù gi, Hkrisduq lé, shi é mai dui toq nhâng râ gá nau é nghut lhê.), nghú hkâtaí kó." gâ tô ri. ⁸ Haù jáng, hkâsu gâ tô ri lúhú? "Haù mungdang gi, nàng eq chyâng nyi ri; náng é nhut má le, náng é myit nhiklhum má lé nghut nyi ri."* gâ tô ri. Haù gi, ngamoq hko taí é lumjîng hkyô eq sêng é mungdang nghut lhê. ⁹ Haù mù, "Yesuq gi, Yhumsing nghut ri." nghú náng é nhut eq yín yú mù, Garai Gasang gi, Yhang lé, shi é mai dui toq nhâng bê nghut lhê nghú, náng é myit nhiklhum má lumjîng é nghut jáng, nàng gi, hkyi yu é hui râ nghut lhê. ¹⁰ Hkâsu mù gâ le, byù gi, myit nhiklhum má

lumjîng jáng, mara hkyut san byi é hui mù, nhut mai yín yú jáng, hkyi yu huí é nghut lhê. ¹¹ Haù Chyúmdang taí é gi, "Yhang lé lumhkau é sù ó yuq le, hkâ-nhám lháng hoq hpû é hui râ a nghut."* gâ ri. ¹² Hkâsu mù gâ le, Yudaq byù eq tûngbaù pé é gyoro má gam hkoq é hkyô haí le a joq é za, haù Yhumsing gi, banshoq bâng é Yhumsing nghut lhê mù, Yhang lé wut dung bang lhunglháng lé, agùn agó shimân byi ri. ¹³ Hkâsu mù gâ le, "Haù Yhumsing é myìng lé lêng é bang yuq hkanmó gi, hkyi yu é hui râ nghut lhê."* gâ tô ri.

¹⁴ Haù nghut lé gi, yhangmoq a lumjîng é sù lé nhîng, hkâsu wó wut dung kó râ lúhú? Yhangmoq a wó gyô wú é sù lé nhîng, hkâsu wó lumjîng kó râ lúhú? Hko kyô é sù a nyi le nhîng, hkâsu wó gyo kó râ lúhú? ¹⁵ Nhang kat é a hui le gi, yhangmoq hkâsu kut wó hko kyo kó râ lúhú? Haù eq rajung za, "Gabú danglù pé hko kyo bâng é hkyi-kám pé gi, hkâ-í yhang yúng ri myhi-nhung!"* ga kê tô ri.

¹⁶ Nghut kôlhang, Israe-laq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, "Yhumsing ê, ngamoq é danglù lé ó yuq wá lumjîng é lúhú?"* ga taí ri. ¹⁷ Haù nghut mù luí, lumjîng myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê. ¹⁸ Nghut kôlhang, ngò myi kó lé: yhangmoq gi, a wó gyô wú kô é nghut lhê lúhú? Yhangmoq gi, wó gyo gù za nghut lhê, haù eq rajung za,

"Yhangmoq é htê gi, myidàm htoq banshoq má jam bê nghut ri; yhangmoq é mungdang pé gi, mîngkan htungchyûn hkanmó má jé bê nghut ri."* gâ tô ri. ¹⁹ Ngò dum myi kó lé: Israe-laq byu pé gi, a sê gyo kô é nghut lhê lúhú? Mosheq sâng-hi má taí é gi, "Byù rahú lháng a nghut bang eq, Ngò, nungmoq lé manôn nhâng râ;

* 10:5 Nhang 18:5 * 10:6 Tarâ Pun 30:12 * 10:7 Tarâ Pun 30:13 * 10:8 Tarâ Pun 30:14
 * 10:11 Esai 28:16 * 10:13 Yol 2:32 * 10:15 Esai 52:7 * 10:16 Esai 53:1 * 10:18 Hkya-on 19:4

sê gyo nyan a bo é amyú èq, Ngò,
nungmoq lé wú nhik-yo nhâng
râ nghut lhê."✧
gâ ri. ²⁰ Hau htoq agó, Esai-aq a gyuq
a wàm taí é gi,
"Ngo lé a ho é bang gi, Ngo lé myang
hô bekô nghut ri;
Ngá hkyô lé a myí é bang lé, Ngò
htoq shit bê nghut lhê."✧
gâ ri. ²¹ Nghut kôlhâng, Israelaq byu
pé eq séng luí, Yhang taí é gi,
"Ngò gi, jìno a gyô é eq ngegáng-htu
é byù myú lé, nyí wuí Ngá loq
lham mù ji nyi lhê."✧
gâ ri.

11

Israelaq Byu Pé Lé A He-ngik Pyám

¹ Haú mù luí, ngò myi kó lé, Garai
Gasang gi, Yhâng é byu pé lé he-ngik
pyám bê nghut lhê lú? Ratsuí lháng
a nghut! Ngò yhang le, Israelaq byu
myú nghut luí, Abraham é awut ashín
eq Ben-yamyin hú má é sù nghut lhê.
² Garai Gasang gi, Yhang te sê to gú
nghut é, Yhâng é byu pé lé a he-ngik
pyám é nghut lhê. Eliyaq eq séng é
hkyô Chyúmdang má bo tô é lé, nung-
moq a sé kó lú? Garai Gasang é hí
má, yhang, Israelaq byu pé lé mara
hún é gi, ³ "Yhumsing ê, yhangmoq gi,
Náng é myiqhtoí pé lé sat pyám kô é
eq Náng é hkungga gyap pé lé tu lhêng
pyám akô nghut ri; ngò rayuq za myit
gyó tô é nghut luí, ngo lé sat râ matú
le yhangmoq ho nyi akô nghut ri."✧ gâ
ri. ⁴ Garai Gasang gi, yhang lé, hkâsu
ga tû taí é nghut lhê lú? Haú gi,
"Balaq hpara é hí má hkyihput a htug
shí é byù nyhit hkyíng lé, Ngá é matú
myhit to lhê."✧ gâ é nghut lhê. ⁵ Haú
eq rajung za, ahkuí gi, jeju yanmai
hkyin yù huí é bang za myit gyó tô
é nghut lhê. ⁶ Jeju yanmai nghut é
nghut le gi, muzó é yanmai a nghut lo;
muzó dông ru nghut le gi, jeju gi, jeju
a nghut lo.
⁷ Haú nghut jáng, hkâsu lú? Israe-
laq byu pé gyai ho shikut kôlhâng, a

wó kô é lé, hkyin htoq yù huí é bang
kúm gi, wó bekô nghut ri. Góbang gi,
myit lhoq htân byí é hui akô nghut ri;
⁸ haú gi,
"Garai Gasang gi, hkû-nyí jé shoq,
yhangmoq lé nhikshi jit é woi-
nyí lé le, a wó myang é myoqjí
lé le, a wó gyô é nohkyap lé le,
byí to bê nghut ri."✧
ga kâ tô é eq rajung za nghut ri.
⁹ Dawiq taí é le,
"Yhangmoq é zangbó gi, yhangmoq
é matú, dumzo eq lhaí, myit
leqbat jowò eq lató hpuq hkyô
dut sháng gaq;
¹⁰ Yhangmoq myoq a wó myâng shoq,
myoqjí lhoq chut pyám byí é
hui sháng gaq;
yhangmoq é nunghkûng gi,
ayang wòlai wun goí nhang é
hui sháng gaq."✧
gâ ri.

Tûngbau Pé Lé Hkyi Yu É Hkyô

¹¹ Ngò dum myi kó lé: Israelaq
byu pé gi, a wó dum gè râ í leqbat
byuq bekô lú? Ratsuí lháng a nghut!
Yhangmoq é tarâ lu lai hkyo é yan-
mai, yhangmoq lé manôn nhâng râ
matú, hkyi yù hkyô gi, tûngbau pé
chyáng jé byuq é nghut lhê. ¹² Nghut
kôlhâng, yhangmoq é tarâ lu lai hkyô
gi, mingkân é matú wó sùt hkyô
eq, yhangmoq sum pyám é hkyô gi,
tûngbau pé é matú wó sùt hkyô dut
é nghut jáng, yhangmoq é byíng jup
hkyô gi, je riyhang kô é wó sùt hkyô
dut râ nghut ri-nhung!
¹³ Nungmoq tûngbau pé lé ngò taí
nyi lhê: ngò gi, tûngbau pé é lagyo
nghut nyi é u má, ngá é hpungmú
lé hpautap nyi lhê. ¹⁴ Haú gi, ngá é
amyú pé lé manôn myit wó bô nhâng
mù, yhangmoq ra-am lé wó hkyi yù
râ lé myit myoqbyu é hkyô nghut lhê.
¹⁵ Hkâsu mù gâ le, yhangmoq lé he-
ngik pyám é hkyô gi, mingkân é matú
Garai eq buinùm xoq hkyô dut bê
nghut jáng, yhangmoq lé dum hap yu

é hkyô gi, shi é mai dui toq é đông dut bê a nghut lhi? ¹⁶ Hau htoq agó, sâng-hî ashî đông nhông byî é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haû amyit gi, chyoiyúng é nghut jáng, akoq pé le chyoiyúng é nghut lhê.

¹⁷ Haû tsanlun akoq pé* ra-am gi, lhoq hkyui pyâm é hui luî, yosô tsanlun a-nyuq† nghut sù nàng gi, haû pé má xoq é hui mù, haû tsanlun amyit é xù lé bo shuq lom é nghut jáng, ¹⁸ akoq haû pé lé hkâwú tiq pyâm kó. Nungmoq haû su kut é nghut jáng, nungmoq gi, haû amyit lé htuq é a nghut é za, amyit haû sheq nungmoq lé htuq é hkyô lé, nungmoq myit sé keq. ¹⁹ Nungmoq kúm gi, "Ngò, haû má xoq é hui râ matú sheq, akoq haû pé gi, lhoq hkyui pyâm é hui é ru nghut lhê." ga taí râ nghut lhê. ²⁰ Haû su gi, nghut lhê. Nghut kôlhang, yhangmoq gi, a lumjîng é yanmai, lhoq hkyui pyâm é hui kômù, nungmoq kúm gi, lumjîng é yanmai, wó ging tîng nyi é nghut lhê. Hká gumrong nyi, gyuq kyum nyi keq. ²¹ Hkâsu mù gâ le, Garai Gasang gi, akoq akying pé lé a ha bún é nghut le gi, nungmoq lé le ha bun râ a nghut.

²² Haû mù luî, Garai Gasâng é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyâm kôlhang, nungmoq gi, Yhâng é shogyo nhikmyin hkyô má xoq nyi nyi é myháng, nungmoq lé gi, shogyo nhikmyin nyi râ nghut lhê. Haû a nghut jáng, nungmoq le, zân hpyit pyâm é hui râ nghut lhê. ²³ Yhangmoq gi, a lumjîng hkyô lé tô pyâm kô é nghut jáng, dum xoq yu é hui kó râ nghut lhê; hkâsu mù gâ le, Garai Gasang gi, yhangmoq lé dum wó xoq yu é Sù nghut lhê. ²⁴ Haî mù gâ le, yosô tsanlun gàm akoq nghut gù nungmoq lé hpyit yû mù, htûng a nghut é đông, hô é tsanlun agàm má xoq é nghut le gi, haû akoq akying pé nghut é

yhangmoq gi, ó le ó é tsanlun-ngut akying má xoq yu é lé je riyhang hui râ nghut lhê ô!

Israelaq Byu Pé Hkyi Yu É Hui Râ Hkyô

²⁵ Haû mù, gumang wuî ê, nungmoq a nghutbun kó sháng gaq nghû, zau tô é hkyô shî lé, nungmoq a sé dut râ lé, ngò a ô nau é nghut lhê: haû gi, tûngbaù pé wang lo é laké byíng é hkûn jé shoq, Israelaq byu pé ra-am gi, myit lhoq htan é huî é hkyô nghut lhê. ²⁶ Hau htâng sheq, Israelaq amyû banshoq bang hkyi yu é hui râ nghut lhê. Haû gi,

"Hkyi yù Sù gi, Zi-un bùm mai htoq lô râ nghut lhê;

Yhang gi, Garai lé nunghtáng tô pyâm é hkyô lé, Yakup é awut ashín mai huî sêng pyâm byi râ nghut lhê.

²⁷ Ngò, yhangmoq é yubak mara lé huî sêng pyâm byi jáng, haû gi, yhangmoq lé Ngò byî tô é Ngá é dangshikaq nghut lhê."☆ ga kê tô é eq rajung za nghut ri.

²⁸ Haû gabú danglù eq séng luî ga jang, yhangmoq gi, nungmoq é matú gye nghut akô; nghut kôlhang, hkyin htoq yû hkyô eq séng luî ga jang, yhangmoq gi, myîng hû é îchyí îwa pê é yanmai, chyitdap é huî akô nghut ri; ²⁹ hkâsu mù gâ le, Garai Gasâng é chyunghuq pé eq Yhang ji yu é hkyô lé gi, wó htaí lhik pyâm é a nghut. ³⁰ Nungmoq gi, Garai Gasâng é jîno a gyô é bang radàm dut wú kô é nghut kôlhang, yhangmoq jîno a gyô é yanmai, ahkuî kúm, shogyo nhikmyin hkyô wó hkam yù bekô nghut é su, ³¹ ahkuî, yhangmoq gi, nungmoq wó hkam yu é Garai Gasâng é shogyo nhikmyin hkyo é yanmai, shogyo nhikmyin hkyô lé wó hkam yù kó sháng gaq ga, yhangmoq le, ahkuî, jîno a gyo bang dut bekô nghut ri. ³² Hkâsu mù gâ le, Garai Gasang gi, byù lhunghâng bang lé, shogyo nhikmyin hkyô wó tûn shit shoq ga,

* **11:17** Tsanlun akoq pé gi, Israelaq byu pé lé taí nau é nghut lhê. † **11:17** Yosô tsanlun a-nyuq gi, tûngbaù pé lé taí nau é nghut lhê. ☆ **11:27** Esai 59:20-21; 27:9

lhunglhâng bang lé, jìno a gyo hkyo é shúm dut nhang to bê nghut ri.

Hkya-on Kungtôn Dang

³³ Ô! Garai Gasâng é agùn agó é sùt nghut é, hpaqchyí byéng-yá eq nyan hpaqchyí gi, hkâ-í yhang nik ri-nhung!

Yhâng é tarâ jéyáng hkyô gi, ung sê jung a nghut nhung!

Yhang kut é hkyô pé gi, hkâ-í yhang ho htoq wuí jung nghut ri-nhung!

³⁴ "Haû Yhumsing é myit lé, ó yuq wá ung sê lhê l hú? Yhâng é hpaqchyí byi sù gi, ó yuq wá dut wú é l hú?"[☆] gâ ri.

³⁵ "Garai Gasâng èq jeju dum tau byi râ dut shoq, ó yuq wá, Garai Gasang lé byi wú é l hú?"[☆] gâ ri.

³⁶ Hkâsu mù gâ le, joq mijog gi, Yhâng chyáng mai nghut mù, Yhang dông mai nghut luí,

Yhâng é matú chyat nghut ri. Haû hpungwup shìngkang gi,

Yhâng chyáng ahtum abyuq ru joq nyí sháng gaq ô! Amen.

12

Dui É Hkungga Pé Dut Râ Hkyô

¹ Haû mù luí, gumang wuí è, nungmoq é gungdu pé lé, Garai Gasang myit nguì ô nau é eq chyoiyúng é, dui é hkungga dông nhông byi keq nghû, Garai Gasâng é shogyo nhikmyin hkyô mai, ngò, nungmoq lé wum byí kat lhê. Haû gi, woi-nyí hkyô dông nungmoq noqkuq dojaú é hkyô nghut lhê. ² Mingkan shí lhûm é sâmlai dông a cháng lo é za, myit sik wó yû râ dông nungmoq é a-kyang lé htaí pyám byi nhâng keq. Haû hkûn sheq, Garai Gasâng é ge é, myit nguì é eq gumjup é ô nau hkyô lé, nungmoq wó chyâm, wó sê gàm hkoq yû kó râ nghut lhê.

³ Hkâsu mù gâ le, ngo lé byi tô é jeju yanmai, nungmoq yuq hkangmó lé

ngò taí kôlé: nungmoq gi, yhumsing gùng lé lai shoq a nghutbûn é za, ó le ó lé, Garai Gasâng èq lumjìng myit tsing gàm byi to bê eq rajung za, myit yù gíng é í za myit yù keq. ⁴ Nga-nhúng yuq hkangmó é gungdu ralhum má gi, gungdu showui showang pé myo myo bo é nghut luí, gungdu showui showang haû pé banshoq gi, jai chûng jang a pung é nghut lhê.

⁵ Haû eq rajung za, myo myo nghut é nga-nhúng le, Hkrisduq má gungdu ralhum za dut luí, yuq hkangmó gi, rayuq eq rayuq gungsho sêng lhûm é bang chyat nghut lhê. ⁶ Nga-nhúng lé byi tô é jeju yanmai, nga-nhúng wó é chyunghuq gi, gotû tû nghut lhê. Byù rayuq é chyunghuq gi, myiqhtoi htoí é nghut jáng, yhâng é lumjìng hkyô eq rajung za htoi sháng gaq; ⁷ dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq; ⁸ myit wum byi é nghut jáng, myit wum byi sháng gaq; ra châ é bang lé garúm byi é nghut jáng, a ha bûn é za byi sháng gaq; shuí u é nghut jáng, lumluq tung shuí u sháng gaq; shogyo nhikmyin hkyô shit é nghut jáng, gabú myit èq kut sháng gaq.

Chyitdap Myit

⁹ Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuí nyí keq. ¹⁰ Rayuq eq rayuq, gumang chyitdap myit mai lhumzui lhum keq. Rayuq eq rayuq, yhumsing gùng htoq je hpautap lhum keq. ¹¹ Myit zuq hkyô má, hkâ-nhám le wum a lhoq shôm é za, nungmoq é woi-nyí hkyô má myit toq nyí mù, haû Yhumsing lé dojaú nyí keq. ¹² Myit myoqbyù hkyô má gabú keq; wuîhke hkyô má hkam jan keq; kyúdung hkyô má lhumzui keq. ¹³ Ra châ tô é Garai Gasâng é byu pé lé gàm byi keq. Bìng hkulum é lé rago kut keq.

¹⁴ Nungmoq lé zing-rî é bang lé shimân byi keq; shimân byi keq, hkâ-nhing kó. ¹⁵ Gabú é bang eq rahá bo gabú keq; yón é bang eq rahá bo yón

keq. ¹⁶ Rayuq eq rayuq byin hpyé gohut huí nyi keq. A nghutbûn é za, nyi yap hkyô nyhûm bang eq zùm yap keq. Hpaqchyí bo é sù su hkâ-myt ngàm kó.

¹⁷ Ó yuq lé le, agè ashop é yanmai, agè ashop é dông lató hkâhpuq kó. Yuq hkangmó é myoq hí má ge é lé kut rá rago myit keq. ¹⁸ Wó dut é nghut jáng, nungmoq wó dut é í, yuq hkangmó eq nguingón shoq nyi keq. ¹⁹ Ngá é buinùm wuì ê, lató a hpuq é za, Garai Gasâng é nhikmo-yo hkyô lé sheq láng nyi keq. Hkâsu mù gâ le, "Ngò sheq lató hpuq rá sù nghut lhê; ngò lató hpuq rá."* ga, haù Yhumsîng taí ri ga kâ tô ri. ²⁰ Haù mù, "Nungmoq lé gyè kut sù zòmut é nghut le gi, byi tso keq; yhang wuìshit é nghut le gi, rajung jung byi huq keq.

Haù dông kut jáng, nàng, yhâng é ulhum htoq má gyúng é myigye bum to byí é nghut lhê.* ga le kâ tô ri. ²¹ Agè ashop é gi, nungmoq lé a ung pyám sháng gaq, ge é hkyo èq agè ashop é lé ung pyám keq.

13

Ahkáng Ayá Wó Bàng Ô Má Nyi Râ É Hkyô

¹ Yuq hkangmó gi, up é ahkáng ayá wó bàng é a-ô má nyi ra rá nghut lhê; hkâsu mù gâ le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng èq byí tô é chyat nghut lhê. ² Hau é yanmai, up é ahkáng ayá lé gumlau toq é sù gi, Garai Gasâng byí tô é up é ahkáng ayá lé gumlau toq é sù nghut ri; haù su kut é bang gi, tarâ jéyáng é hui zo rá hkyô lé ho yù nyi é bang nghut akô. ³ Hkâsu mù gâ le, uphkan é bang gi, ge é hkyô kut bàng é matú gyuq nán hpo a dut é za, shut shaí hkyô kut bàng é matú sheq dut é ru nghut lhê. Up é ahkáng wó sù lé gyuq é mai lut

nau lhê a nghut lí? Haù jáng, ge é hkyô kut aq, haù hkûn, yhang, nang lé hkyô-on rá nghut lhê. ⁴ Hkâsu mù gâ le, yhang gi, náng é matú ge é akyú kut byi rá nghut é, Garai Gasâng é dui-nhâng zoshâng nghut lhê. Nghut kôlhâng, nàng, shut shaí hkyô kut é nghut le gi, gyuq nán nyi aq; haù mù gâ le, yhang gi, shâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaí hkyô kut sù lé dam byi rá matú nhikmo-yo Su é gunglik nghut lhê. ⁵ Haù mù luí, dam byi rá lé chiq é yanmai za a nghut, yhumsîng nhik bô rá é yanmai le, haù up é ahkáng ayá wó bàng é a-ô má nyi rá dut lhê.

⁶ Nungmoq hkansê kat rá é gi, hau é yanmai le nghut lhê; hkâsu mù gâ le, haù up é ahkáng ayá wó bang gi, Garai Gasâng é dui-nhâng zoshâng wuì nghut lhê mù, uphkan é mù lé, ahkýng byíng shoq wùn waq nyi akô nghut ri. ⁷ Yuq hkangmó lé byi âng é eq rajung za byi keq: hkansê kat byi ang sù lé gi, hkansê kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

Rayuq Eq Rayuq Chyitdap Lhum Râ Hkyô

⁸ Rayuq eq rayuq chyitdap lhúm é chyín mai lai luí, hai chyín le hkâdap lhum kó; hkâsu mù gâ le, góyuq lé chyitdap é sù gi, haù jep é tarâ lé lhoq dik bê sù nghut ri. ⁹ "Su-myi sulàng lú hkyô hkâkut," "Byù hkâsat," "Hkâhkau," "Hkâ-myoqnoq,"* gâ tô é hkunmó pé eq gotú hkunmó haì nghut nghut, "Náng gûng lé nàng chyitdap é su, náng é chyangnâm mâ é bang lé le chyitdap aq."* gâ é tarâ má lo jup to bê nghut lhê. ¹⁰ Chyitdap myit gi, chyangnâm mâ é byù lé a ge é haì le a kut é nghut lhê. Haù mù luí, chyitdap myit gi, haù jep é tarâ lé lhoq dik é hkyô nghut ri.

* 12:19 Tarâ Pun 32:35 * 12:20 Sânghkyang 25:21-22 * 13:9 Htoq Ló 20:13-15 * 13:9 Nhung 19:18

11 Haû mù, ahkuî lhê é ahkyíng yàm-yoq lé sê gyo luî, haû hkyô lé kut keq. Nungmoq yhup mui é mai bûn gyíng râ ahkyíng jé bê; haî mù gâ le, nga-nhúng é hkyi yù hkyô gi, lumjíng hi é hkun lhê htoq má ahkuî je chyáng bê nghut ri. 12 Haû myín ahkyíng gi, lai byuq lô râ za nghut bê; nyí ahkyíng gi, jé lô berâ nghut lhê. Haû mù luî, mauchut é muzó lé tô pyám mù, maubó é gyehting lé wut to sháng. 13 Ye lhai é eq shuq wut é, ashop é dông gungsho zùm yap é eq shut é dông nyi zô lhúm nau é myit bo é, mabyoq jishúm htoq é eq manon é pé a kut é za, nyí-káng lhê su, ge é a-kyang dông nyi yap sháng. 14 Hau htoq agó, Yhumsíng Yesuq Hkrisduq lé, mebu su wut to keq; yubak gungsho ô nau é dông lhoq dik râ matú hkâ-myit kó.

14

Gumang Wuì Lé A Jéyáng Râ Hkyô

1 Lumjíng myit má wum nyhóm sù lé, myíng myo nhô zâ é hkyô pé lé a jéyáng byi é za hap yù keq. 2 Byù rayuq é lumjíng myit gi, jung hkanmó zô ri; nghut kôlhang, lumjíng myit nyhóm sù gotú rayuq gi, mhan-haq hpoqnoq za zô ri. 3 Jung hkanmó zo sù gi, a zo sù lé a ge wú tiq pyám; jung hkanjung mó a zo sù gi, zo sù lé mara a ge byi; hkâsu mù gâ le, Garai Gasang gi, yhang lé hap yu to bê nghut ri. 4 Nang gi, ó yuq wá nghut mù, góyuq é dui-nhâng zoshâng lé jéyáng lhê lhú? Yhang, yap ging kôlhang, leqbat kôlhang, yhâng é yhumsing myit za nghut lhê. Yhang gi, wó yap ging râ nghut lhê; hkâsu mù gâ le, haû Yhumsíng gi, yhang lé wó yap ging nhâng Sù nghut lhê.

5 Rayuq myit é gi, buinyi ra-nyí gi, gó nyí htoq je ge lhê gâ ri; dum rayuq myit é gi, nyí wuî rajung za nghut lhê gâ ri. Yuq hkanmó gi, yhumsíng myit yu é lé a úng-âng nyi sháng gaq. 6 Buinyi ra-nyí lé, ahkyak lhê ga myit yù sù gi, haû Yhumsing é matú kut é

nghut ri. Zô é sù gi, Garai Gasang lé jeju hkya-ôn é yanmai, haû Yhumsíng lé bun luî zô nyi ri; a zo sù le, haû Yhumsíng lé bun luî Garai Gasang lé jeju hkya-ôn nyi ri. 7 Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut. 8 Nga-nhúng asak dui nyi le gi, haû Yhumsing é matú dui é ru nghut lhê; nga-nhúng shi byuq le gi, haû Yhumsing é matú shi é ru nghut lhê. Haû mù, asak dui nyi kôlhang, shi byuq kôlhang, nga-nhúng gi, haû Yhumsíng eq sêng é bang nghut lhê.

9 Haû su mù, Hkrisduq gi, shi byuq bang eq asak dui bâng é Yhumsíng dut sháng gaq ga, shí hkám mù dum dui toq é nghut lhê. 10 Haû mù, nang gi, haî mù nang é gumang hpó lé jéyáng nyi lhê lhú? Haî mù nang é gumang hpó lé wú tiq nyi lhê lhú? Nga-nhúng lhunglhâng bang gi, Garai Gasang é tarâ jéyáng tanghkuq hí má yap râ bang chyat nghut lhê. 11 Hkâsu mù gâ le,

"Haû Yhumsíng gi, 'Ngò rû dui nyi é eq rajung za, Ngá é hí má hkyihput hkanmó htuq râ nghut lhê;

Garai Gasang lé, shô hkanmó eq yín yù kó râ nghut lhê.' ga tái ri."✧

ga kâ tô ri. 12 Haû mù luî, nga-nhúng yuq hkanmó gi, yhumsíng kut lai lo é hkyô lé, Garai Gasang chyáng shit ra râ nghut lhê.

13 Haû nghut mù, nga-nhúng gi, rayuq eq rayuq tarâ jéyáng lhúm é hkyô lé tô pyám sháng. Ó yuq nghut kôlhang, yhumsing é gumang é hkyowuî má, myit leqbat jowò eq htung htê jowò a to byi râ matú, myit sidiq keq. 14 Haû Yhumsíng Yesuq má nghut nyi é sù ngò gi, haî jung zoshuq nghut kôlhang, yhang baú yhang a sansêng a dut é hkyô lé, hkyak wó sé luî, jíng nyi lhê. Nghut kôlhang, ó yuq le, rajung jung lé a sanséng ga myit yu é nghut jáng, yhang é matú,

✧ 14:11 Esai 45:23

zè haû gi, a sansêng é nghut lhê. ¹⁵ Nàng zô é zoshuq yanmai, náng é gumang hpó myit a ngón é nghut le gi, nàng, chyitdap myit mai sô nyi é sù a nghut lo. Hkrisduq shí hkám byi bê sù nghut é, náng é gumang hpó lé, nàng zoshuq é dông mai hkâlhoq hten pyám. ¹⁶ Nàng, ge ri nghû myit yu é hkyô lé, agè ashop é dông hkâtaí pyám nhâng. ¹⁷ Hkâsu mù gà le, Garai Gasâng é mingdán gi, zo zo shuq shuq hkyô a nghut é za, dingmán hkyô, nguingón hkyô eq Chyoiyúng Woi-nyí má gabú é hkyô ru nghut lhê. ¹⁸ Haî mù gà le, shí hkyô dông mai Hkrisduq lé dojaú é sù gi, Garai Gasang ô nau é sù eq byu pê èq hkya-ôn é hui sù nghut ri.

¹⁹ Haû mù luí, nguingón hkyô má nyi râ eq, rayuq eq rayuq wum byi lhum râ hkyô lé, shikut nyi keq. ²⁰ Zoshuq é yanmai, Garai Gasâng é muzó lé hkâlhoq hten pyám. Zoshuq lunglhang gi, sansêng é chyat nghut lhê; nghut kôlhang, góyuq lé myit leqbat nhang é jung lé zô é sù gi, shut é nghut lhê. ²¹ Tsibiyiq wing shuq é eq sho zô é hkyô má nghut kôlhang, gotû haî jung kut é nghut kôlhang, náng é gumang hpó lé myit leqbat nhang é nghut le gi, a kut le je ge lhê.

²² Haû mù, haú pé eq séng luí, nàng lumjínng é haî nghut kôle, nàng eq Garai Gasâng gyoro má za joq nyi sháng gaq. Yhumsíng ge lhê gà é èq, yhumsíng gùng yhumsíng mara byi jang a joq é sù gi, hkungsô wó nyi ri. ²³ Nghut kôlhang, úng-âng é myit èq zô é nghut le gi, mara byí é hui ri, haî mù gà le, yhang zô é gi, lumjínng myit mai a nghut; lumjínng myit mai a kut é haî nghut kôlhang, mara nghut ri.

15

Góyuq Lé Myit Ngón Nhâng Râ Hkyô

¹ Lumjínng hkyô má wum-o bo é nga-nhúng gi, yhumsíng myit ngón râ hkyô lé a ho é za, wum-o a bò bâng é wum nyhóm hkyô lé, hkam jan

byí nyi râ dut lhê. ² Nga-nhúng yuq hkangmó gi, yhumsíng é chyangnâm mâ é su é ge é hkyô dut râ matú, yhang wó kô myhang lò shoq, yhang lé lhoq ngón byí nyi sháng. ³ Hkâsu mù gà le, Hkrisduq lhang gi, Yhânggùng yhang lhoq ngón é a nghut; haû gi, "Nang lé rhoi bâng é dang gi, Ngá chyáng gyó ke bê nghut ri."* ga, kê tô é eq rajung za nghut ri. ⁴ Hkâsu mù gà le, laí lò bê hkûn kê tô é lunglhang gi, nga-nhúng lé mhoq byi râ matú chyat kê tô é nghut lhê; haû gi, Chyúmdang mâ é hkam jan hkyô eq myit wum byi hkyô dông mai, nga-nhúng myit myoqbyù hkyô wó râ matú nghut lhê.

⁵ Haû hkam jan hkyô eq myit wum byi hkyô lé byí é Garai Gasang gi, nungmoq, Hkrisduq Yesuq é htâng châng nyi é u lé, nungmoq yhangchang rading ralhum za dut é woi-nyí byi sháng gaq; ⁶ haû jáng sheq, nungmoq gi, i-myit rahkat eq nhut htê ralhum èq za, nga-nhúng é Yhumsíng Yesuq Hkrisduq é Yhângwa nghut Sù, Garai Gasang lé, wó hkya-on kungtôn kó râ nghut lhê.

⁷ Haû mù luí, Hkrisduq gi, nungmoq lé hap yù bê é eq rajung za, Garai Gasâng é hpungwup shingkang lé lhoq htoq shit râ matú, nungmoq le, rayuq eq rayuq hap yu lhum keq. ⁸ Hkâsu mù gà le, ngò, nungmoq lé taí kôlé, haû myíng hú é íchyí íwâ pé lé byí tô é danggidíq pé lé lhoq ging râ matú, Hkrisduq gi, Garai Gasâng é tengmán hkyo é malaí, Yudaq byu pê é dui-nhâng zoshâng dut bê nghut ri. ⁹ Haû mù, Garai Gasâng é shogyo nhikmyin hkyo é yanmai, haû tûngbaù pé, Garai Gasang lé wó hkya-on kungtôn kó râ nghut lhê. Haú hkyô gi,

"Haû mù luí, tûngbaù pé chyáng má, Nang lé, ngò hkya-on râ nghut lhê;

Náng é myíng lé, ngò hkya-on mahkôn râ nghut lhê."*

ga kê tô é eq rajung za nghut ri. ¹⁰ Dum,

"Tungbaù pé ê, Yhâng é byu pé eq rahá gabú nyi keq."✧

gâ tô ri. ¹¹ Dum,

"Nungmoq tungbaù pé lunglhang bang ê, haù Yhumsing lé hkya-on keq, byù myù lunglhang bang ê, Yhang lé hkya-on mahkôn hkôn keq."✧

gâ tô ashî nghut ri. ¹² Hau htoq agó, Esai-aq taí é gi,

"Yese é Amyit gi, yuq htoq lô luí, Yhang gi, byù myù chângjup é ahtoq má up râ sú nghut lhê;

tungbaù pé gi, Yhang má myit myoqbyù kó râ nghut lhê."✧

gâ ri.

¹³ Haù myit myoqbyù hkyô byí é Garai Gasang gi, Yhang lé lumhkau nyi é bang nungmoq lé, gabú hkyô banshoq eq nguingón hkyô lhoq pyíng byi sháng gaq; haù jáng sheq, nungmoq gi, Chyoiyúng Woi-nyí é wum-o a-tsâm eq, myit myoqbyù hkyô wó byíng mui nyi kó râ nghut lhê.

A Gyuq A Wam É Za, Poluq Laiká Kâ É Hkyô

¹⁴ Ngá é gumang wui ê, nungmoq gi, ge é hkyô byíng jup é bang, hpaqchyí má gumjup é bang, rayuq eq rayuq mhoqshit lhùm é má kung é bang nghut é lé, ngá gung ngò yhang hkyak lumjáng lhê. ¹⁵ Ngò gi, nungmoq lé dum lhoq pùn é dông, ahkyak é pé ra-am lé a gyuq a wàm kâ kat bê nghut lhê. ¹⁶ Hkâsu mù gâ le, tungbaù pé gi, Chyoiyúng Woi-nyí dông mai lhoq sân-yúng é hui luí, Garai Gasang eq hap yù gíng é hkungga wó dut kó sháng gaq ga, Garai Gasang é gabú danglù lé hkô râ hkyangjong é wò dông, tungbaù pé chyáng, Hkrisduq Yesuq é hpungmù wùn sù dut rá matú, Garai Gasang, ngo lé jeju byí é yanmai nghut lhê.

¹⁷ Haù mù luí, ngò gi, Garai Gasang lé dojaú é hkyô eq séng luí, Hkrisduq Yesuq má nghutbùn nyi lhê. ¹⁸ Ngò gi, ngò taí é eq zui saí é muzó dông

le, haù Woi-nyí é a-tsam chùng mù, kumlhá pé eq laklaí kumlhá pé dông le, tungbaù pé lé, Garai Gasang é jìno gyo shoq shuí ú é má, ngo lé Hkrisduq nhang é muzó hkyô lé taí é mai lai luí, gotú haí lé le wám taí é a nghut. ¹⁹ Haù mù luí, ngò gi, Yerusalem wà mó mai Ilurikhkam mau jé shoq é hkyô awui ayàm jàm shoq, Hkrisduq é gabú danglù lé hko kyo bê nghut lhê. ²⁰ Ngò hkâ-nhám le myit tuí nyi é hkyô gi, góyuq hi tô é apùn awang má dum a puq saí pyâm é za, Hkrisduq lé a sé shi é jowò má gabú danglù hko kyo râ hkyô nghut lhê. ²¹ Haù gi,

"Yhâng é hkyô lé, taí kyô é a hui shí é bang, myàng kó râ nghut luí, a wó gyô wú é bang, sê gyo kó râ nghut lhê."✧

ga kâ tô é eq rajung za nghut ri. ²² Haù mù luí, ngò, nungmoq chyáng lé jé râ lé, anum num hkyikyo luqlhum dut nyi é gi, muzó hau é yanmai nghut lhê.

Romaq Myuq Lé Ló Kum Râ Sôn É Hkyô

²³ Nghut kôlhang, ahkuí gi, shí mau pé má ngò zui saí râ jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za, ²⁴ ngò, Sipin ming shut ló é hkùn, nungmoq chyáng wàng râ sôn tô lhê. Ngò gi, lai ló é hkùn, nungmoq lé lò sô kum mù, nungmoq eq rayoq zo zùm yap ngón é htàng má sheq, ngá é hkyowui matú, nungmoq haù mai htupbang kat râ lé, ngò myoqbyu tô lhê. ²⁵ Ahkuí, ngò kúm gi, Yerusalem wà mó mâ é sân-yúng bang lé dojaú râ matú, haù wâ shut e ló é hkyolat má nghut nyi lhê. ²⁶ Hkâsu mù gâ le, Makedoni eq Ahkaia mau mâ é bang gi, Yerusalem wà mó mâ é sân-yúng bâng chyáng mâ é myùng bâng é matú, garúm chyunghuq hkyui tsing nau bùm bekô nghut ri. ²⁷ Yhangmoq gi, haù su kut nau bùm bekô nghut ri, gè gè ga jáng, haù gi, yhangmoq chyín dap tô é dông ru nghut lhê. Hkâsu

mù gâ le, haû Yudaq byu pê é woi-nyí eq sêng é shimân jeju lé, tungbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chôm chûng râ chyîn dap tô é dông nghut lhê. ²⁸ Haû mù luî, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é htâng má, Sipin ming shut ló râ nghut mù, laí ló uchyang, nungmoq chyáng lé sô kum râ nghut lhê. ²⁹ Ngò gi, nungmoq chyáng lé jé é hkûn, nungmoq é matú Hkrisduq é shimân jeju byíng jup é èq jé lé râ nghut é lé, ngò sê lhê.

³⁰ Gumang wuì ê, ngá é matú Garai Gasâng chyáng kyûdung byí é dông, ngò wum kat yhang shikut é hkyô má nungmoq bo wàng lòm râ matú, nganhûng é Yhumsîng Yesuq Hkrisduq eq Woi-nyí é chyitdap myit é yanmai, ngò, nungmoq lé wum taí tsuq kat lhê. ³¹ Yuda mau mâ é a lumjîng bâng chyáng mai, ngò hkyi yu é wó hui luî, Yerusalem wà mó má ngò wùn waq é muzó lé, haû mâ é sân-yúng bang hap yù gíng é wó dut râ matú kyû bo dung byi keq. ³² Haû jáng sheq, ngò gi, Garai Gasang ô nau é dông mai, gabú myit èq nungmoq chyáng wó jé lé mù, nungmoq eq rahá wum-o wó yú râ nghut lhê. ³³ Haû nguîngón hkyo é Garai Gasang gi, nungmoq banshoq bang eq rahá rû nyi nyi sháng gaq ô. Amen.

16

Shi-kyám Dang

¹ Ngò gi, Kenhkrea noqkuq hpúng mâ é hpungtê, nga-nhûng é gu-nhá Hpobe lé, nungmoq chyáng shichyen byí kat lhê. ² Nungmoq gi, sân-yúng bang kut gíng é eq rajung za, haû Yhumsîng má yhang lé hap yù luî, yhang râ tô é hkyô haí nghut kôle, yhang lé htuqbang keq. Hkâsu mù gâ le, yhang gi, byù myo myo lé le, ngo lé le, gyai yhang garúm lai bê sù nghut lhê.

³ Hkrisduq Yesuq má ngò eq mù wùn luzúm nhik nghut é, Priskila

eq Akula lé bo shi-kyám byi keq. ⁴ Yhangnhik gi, ngá é asak é matú, yhangnhik é asak sum râ í yhang dut wú kô é nghut mù, ngò za a nghut, tungbaù pé é noqkuq hpúng pé banshoq le, yhangnhik lé jeju bûn lhê.

⁵ Yhangnhik é yhûm má chôm huí zup é noqkuq hpúng lé le, bo shi-kyám byi keq.

Asia mau má, Hkrisduq lé sâng-hi lumjîng wang lo é, ngò chyitdap é Epanetu lé bo shi-kyám byi keq.

⁶ Nungmoq é matú gyai yhang shikut wú bê sù nghut é Mariq lé bo shi-kyám byi keq.

⁷ Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shi le nyi bê sù nhik nghut akô.

⁸ Haû Yhumsîng má, ngò chyitdap é sù, Ampliatu lé bo shi-kyám byi keq.

⁹ Hkrisduq má, ngamoq é mù zui luzúm nghut é Orban eq ngá é chyitdap luzúm Staku lé, bo shi-kyám byi keq.

¹⁰ Hkrisduq má chyam é hui mù, wó lûm bê sù, Apele lé bo shi-kyám byi keq.

Aristobulu eq sêng é yhumbyù wuì lé bo shi-kyám byi keq.

¹¹ Ngá é buinùm Herudion lé bo shi-kyám byi keq.

Haû Yhumsîng má nghut nyí bê bang, Narkiso é yhumbyù wuì lé bo shi-kyám byi keq.

¹² Haû Yhumsîng má mù zui shikut é myiwê nhik, Truhpena eq Truhposa lé bo shi-kyám byi keq.

Haû Yhumsîng má mù zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.

¹³ Haû Yhumsîng má hkyin yu é hui bê sù, Ruhpu lé le, ngá nu dông nghut wú bê nghut é Ruhpû é yhangnu lé le, bo shi-kyám byi keq.

¹⁴ Asunkritu, Hpelegon, Herme, Patroba, Herma eq yhangmoq eq rahá

nyi é gumang wuì lé, bo shi-kyám byi keq.

¹⁵ Hpilologu, Yulia, Nerea eq yhâng é nhammó eq, Olumpa, yhangmoq eq rahá nyi é sân-yúng bang banshoq lé, bo shi-kyám byi keq.

¹⁶ Rayuq eq rayuq, chyoiyúng bopuq é èq shi-kyâm lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akô nghut ri.

¹⁷ Gumang wuì ê, nungmoq é lumjínq hkyô má, nungmoq mhoq hkam yù bê nghut é mhoqshit hkyô eq shai lhûm é, gam hkoq hkyô pé eq myit leqbat hkyô pé lhoq htoq é bang lé sidiq keq nghû, wum tai tsuq kat lhê. Yhangmoq lé koi pyám keq.

¹⁸ Hkâsu mù gà le, haû sù é bang gi, nga-nhûng é Yhumsîng Hkrisduq lé dojaú é bang a nghut é za, yhumsîng é wamdaû matú dojaú é bang nghut akô. Yhangmoq gi, myit nú-nhâm é bang lé, dang ngón dang nguì dông mhaú zô akô nghut ri. ¹⁹ Nungmoq, jìno gyo kô é hkyô lé, yuq hkangmó wó gyo bê nghut ri; haû mù, ngò gi, nungmoq é matú gyai yhang gabú nyi lhê; nghut kôhang, ge é hkyô eq séng luí gi, nungmoq hpaqchyî bò mù, agè ashop hkyô eq séng luí gi, nungmoq a bo lòm râ lé, ngò ô nau ri.

²⁰ Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám râ nghut lhê.

Nga-nhûng é Yhumsîng Yesuq é jeju gi, nungmoq eq rahá nghut nyí sháng gaq ô.

²¹ Ngá é mù zui luzúm Timohti gi, nungmoq lé shi-kyám dang sang kat ri; haû eq rajung za, ngá é buinùm wuì Luki, Yason eq Sosipata pé le, shi-kyám dang sang kat akô nghut ri.

²² Laiká shî lé bo ká sù ngò Tertiu gi, haû Yhumsîng má nungmoq lé shi-kyám kat lhê.

²³ Ngo lé le, noqkuq hpúng gón lé le, bíng hkulum é sù Ge-u gi, nungmoq lé shi-kyám dang sang kat ri.

Haû wa mâ é ngùnzui sù Erastu eq nga-nhûng é gumang hpó Kuartu gi, nungmoq lé shi-kyám dang sang kat akô. ²⁴ Nga-nhûng é Yhumsîng Yesuq Hkrisduq é jeju gi, nungmoq lhunglhâng bang eq rahá nghut nyí sháng gaq. Amen.*

²⁵ Byù myû chângjup bang lumjínq luí, Yhang é jìno gyo sháng gaq ga, anham pyat mai haq tô é hui kôhang, ²⁶ ahkuí, ahtum abyuq é Garai Gasâng é hkunmó é yanmai, myiqhtoi laiká pé dông hpông shit é eq sé nhâng bê nghut é, sé gyo wuì é hkyo é shing-rán má cháng luí, ngá é gabú danglù eq Yesuq Hkrisduq é hkyô tai pyo é dông, nungmoq lé wó lhoq ging tíng byí é, ²⁷ rayuq za é hpaqchyî bo sù Garai Gasâng chyáng, Yesuq Hkrisduq dông mai, hpungwup shingkang gi, ahtum abyuq ru joq nyí sháng gaq ô! Amen.

* **16:24** Chyúmding ra-am má chyúbun 24 shî a bo é nghut lhê.

KORINHTUQ Pê Chyáng Hî Dàm Hun Kat é Laiká (1 Corinthians)

¹ Garai Gasang ô nau é eq rajung za, Hkrisduq Yesuq é lagyo dut rá matú ji yù huí é sù ngò Poluq eq, ngamoq é gumang hpó Sositeni gi, ² jowò hkanmó má nga-nhùng é Yhumsing Yesuq Hkrisduq é mying lé lãng é bang eq rahá, chyoyúng bang dut rá matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq mâ é, Garai Gasang é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsing nghut lhê.

³ Nga-nhùng é Îwa Garai Gasang eq Yhumsing Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyí sháng gaq ô.

Hkrisduq É Yanmai Wó É Jeju

⁴ Garai Gasang jeju lé Hkrisduq Yesuq dông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê. ⁵ Hkâsu mù gâ le, nungmoq gi, Hkrisduq dông mai, nungmoq dang taí é hkyô banshoq eq nungmoq é sumsé hpaqchyí banshoq má je lhoq gumjup é hui bekô nghut ri. ⁶ Haú gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê. ⁷ Haú mù, nga-nhùng é Yhumsing Yesuq Hkrisduq dum htoq shit rá lé, nungmoq gyai myoqbyu lãng nyi é u má, nungmoq gi, woi-nyí hkyô eq séng é chyunghuq haí lé le langhpyut kó rá a nghut. ⁸ Nga-nhùng é Yhumsing Yesuq Hkrisduq é buinyi má, nungmoq lé mara hún rá hkyô a bò shoq, Hkrisduq gi, nungmoq lé, htáng shoq gingtíng nhang nyi rá nghut lhê. ⁹ Nga-nhùng é Yhumsing nghut é Yhang Zo Yesuq Hkrisduq eq rahá zùm yap rá matú, nungmoq lé ji

yù bê sù Garai Gasang gi, lhumzui Sù nghut ri.

Noqkuq Hpúng Má Gam Hkoq Lhâm É Hkyô

¹⁰ Gumang wui ê, nungmoq hkaú má gam hkoq lhâm é hkyô pé a joq é za, nungmoq é myit eq myit sôn wú é hkyô má gumjup shoq rading ralhum za dut nyi sháng gaq, nungmoq lhunglhâng bang rayuq eq rayuq byin hpyé gohut huí nyi keq nghú, ngò, nungmoq lé, nga-nhùng é Yhumsing Yesuq Hkrisduq é mying mai dúng tôngbán kat lhê. ¹¹ Ngá é gumang wui ê, Hkloe é yhúm byù wui gi, nungmoq hkaú má mabyoq htoq hkyô joq é lé, ngo lé hkyáng lo shit akô. ¹² Ngò haú su nghú taí é gi, nungmoq mâ é rayuq yuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga, dum rayuq gi, "Ngò gi, Kehpa htâng châng lhê." ga, dum góyuq gi, "Ngò gi, Hkrisduq htâng châng lhê." ga, taí bùm kô é yanmai nghut lhê.

¹³ Hkrisduq gi, gam hkoq é hui bê lhú? Ngò Poluq gi, nungmoq é matú tapzîng má jén sat é hui bê lhú? Nungmoq gi, ngá é mying mai wui-myhup hkâm yù kô é lhú? ¹⁴ Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkâm byí wú é yanmai, ¹⁵ nungmoq ó yuq le, ngá é mying mai wui-myhup hkâm yù bê nghú a wó taí é nghut mù, ngò, Garai lé jeju hkya-ôn lhê. ¹⁶ (Stehpana é yhumbyù wui lé le, ngò wui-myhup hkâm byí é nghut lhê, haú mai lai luí gotô ó lé hkâm byí záng ashî laq, ngò a myit bun lo nghut ri.) ¹⁷ Hkâsu mù gâ le, Hkrisduq, ngo lé nhang kat é gi, wui-myhup hkâm byi rá matú a nghut, gabú danglù hko kyo rá matú sheq nhang kat é ru nghut lhê; nghut kôlhâng, waxâng zô wui é hpaqchyí byéng-yá dang dông hko kyô é a nghut mù, Hkrisduq é tapzîng é a-tsam gi, akôm a dut byuq é nghut lhê.

Garai É A-tsam Eq Hpaqchyí Byéng-yá Gi, Hkrisduq

¹⁸ Hkâsu mù gâ le, tapzîng má Yesuq shî hkâm é hkyô eq sêng é danglù gi, htên byoq hui râ bâng é matú, dang-gang dut byuq ri; nghut kôlhang, hkyi yu é huí nyi bang nga-nhung é matú gi, Garai Gasâng é a-tsam nghut ri. ¹⁹ Hkâsu mù gâ le, Chyúmdang má kâ tô é gi,

"Hpaqchyî bò bâng é hpaqchyî byéng-yá lé, Ngò lhoq htên pyám râ nghut lhê; nyan bò bâng é nyan lé, Ngò, ajè dut pyám nhâng râ nghut lhê."*

ga ri.

²⁰ Hpaqchyî byéng-yá bò bang gi, hkâmá lhú? Hpaqchyî laiká kung bang gi, hkâmá lhú? Ipyat shi é dang tái kung bang gi, hkâmá lhú? Garai Gasang gi, mingkân é hpaqchyî byéng-yá lé lhoq ngok pyám bê a nghut lhú? ²¹ Hkâsu mù gâ le, Garai Gasâng é hpaqchyî byéng-yá mai ga jang, mingkan zo wui gi, yhumsing é hpaqchyî byéng-yá dông mai Garai Gasang lé a wó sé kô é yanmai, dang-gang gâ pyám byi kô é mungdang lé hko kyô é dông lumjîng bang lé hkyi yù râ matú, Garai Gasang myit hpyit é nghut lhê. ²² Yudaq byu pé gi, limik kumlhá pé lé dúng akô; Grik byu pé gi, hpaqchyî byéng-yá lé ho akô nghut ri.

²³ Nghut kôlhang, ngamoq gi, tapzîng má jén sat huí é Hkrisduq é hkyô lé hko kyô lhê. Haú gi, Yudaq byu pé é matú myit leqbat jowò eq tûngbau pè é matú danggang dut byuq ri.

²⁴ Nghut kôlhang, Garai Gasâng eq ji yù huí é Yudaq byu pé eq Grik byu pé é matú, Hkrisduq gi, Garai Gasâng é a-tsam eq Garai Gasâng é hpaqchyî byéng-yá nghut ri. ²⁵ Hkâsu mù gâ le, Garai Gasâng é ngok hkyô gâ é lháng gi, byu é hpaqchyî byéng-yá htoq má je gyaú ri; Garai Gasâng é wum nyhóm hkyô gâ é lháng gi, byu é wum-o htoq má je gyaú ri.

²⁶ Gumang wui ê, Garai Gasang, nungmoq lé ji yu é hkûn, nungmoq hkâsu dut nyi é hkyô lé myit wú keq. Waxâng zô wui é nyi yap a-tsáng dông

hpaqchyî byéng-yá bo é bang, ahkáng ayá wó é bang, zaugun suwún amyú mâ é bang a myô é nghut lhê. ²⁷ Nghut kôlhang, Garai Gasang gi, hpaqchyî byéng-yá bò bang lé hoq lhoq hpu râ matú, mingkan mâ é ngok bang gâ é lé hkyin yu é nghut lhê; Garai Gasang gi, wum bò bang lé hoq lhoq hpu râ matú, mingkan mâ é wum nyhóm bang gâ é lé hkyin yu é nghut lhê. ²⁸ Yhang gi, mingkân eq ahkyak tô é lé lhoq htên pyám râ matú, haí a nghut é lé le, mingkan mâ é aróng a bo é eq wú tiq pyám huí é lé le, hkyin yu é nghut lhê. ²⁹ Haú gi, ó yuq le, Yhâng é hí má a ge nghutbun râ matú nghut ri. ³⁰ Garai Gasâng é yanmai, nungmoq gi, Hkrisduq Yesuq má nghut nyi bekô nghut ri; Hkrisduq gi, nga-nhung é matú, Garai Gasâng chyáng mâ é hpaqchyî byéng-yá dut bê nghut ri. Haú gi, nga-nhung é dingmán hkyô, chyoiyúng hkyô eq hkyi yù hkyô nghut ri. ³¹ Haú mù luí, "Gumrong é sù gi, haú Yhumsing má gumrông sháng gaq."* ga kâ tô é eq rajung za nghut ri.

2

Woi-nyí Mai Lo É Garai Gasâng É Hpaqchyî Byéng-yá

¹ Gumang wui ê, ngò gi, Garai Gasang eq sêng é saksé hkyô lé nungmoq chyáng tái pyô râ matú jé lé é hkûn, dang tái kûng é eq hpaqchyî byéng-yá mó bo é dông lé é a nghut.

² Hkâsu mù gâ le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huí é hkyô mai lai luí, jung hkangmó lé tô-myhí pyám râ nghu myit hpyit yù bê nghut lhê. ³ Ngò gi, nungmoq chyáng jé lé é hkûn, wum nyhóm é eq gyai yhang gyuq nán é nghut lhê. ⁴ Ngá é danglù eq ngò hko kyô é hkyô gi, hpaqchyî bo é eq mhuí yu é dang pé dông a nghut é za, Woi-nyí é a-tsâm eq nungmoq lé shit é dông ru nghut mù, ⁵ nungmoq é lumjîng myit gi, byù é hpaqchyî byéng-yá má a nghut é za,

* 1:19 Esai 29:14 * 1:31 Yer 9:24

Garai Gasâng é hpungwup a-tsam má nghut nyi lhê.

⁶ Nghut kôlhang, ngamoq gi, myit dîng bê bang lé hpaqchyî byéng-yá dông nyo lhê; shí pyat lhê é hpaqchyî byéng-yá eq htên byoq nyi huî é shí pyat mâ é zaú wui é hpaqchyî byéng-yá dông kúm a nghut. ⁷ Ngamoq taî é gi, haq tô é eq, ahkyíng nghu é lhang a joq shi mai nga-nhung é hpungwup shingkang é matú Garai Gasang tô to byi é hpaqchyî byéng-yá nghut é, Garai Gasâng é zaú tô é hpaqchyî byéng-yá lé taî é ru nghut lhê. ⁸ Shí pyat lhê é zau wui gi, hpaqchyî byéng-yá haú lé rayuq lhang a sê gyo kó nghut ri; yhangmoq sê gyo kô é ru nghut le gi, hpungwup shingkang bo é Yhumsing lé tapzing má jén sat pyám kó râ a nghut. ⁹ Nghut kôlhang, Chyúmdang má,

"Ó yuq èq le a myang wú, ó yuq èq le a wó gyô wú, ó yuq èq le a bûn myit wú é hkyô lé, Garai Gasang gi, Yhang lé chytidap bang é matú lajang to byi bê nghut ri."*

ga kê tô é eq rajung za nghut ri. ¹⁰ Nghut kôlhang, Garai Gasang gi, haú hkyô lé, Yhang é Woi-nyí dông nga-nhung lé hpông shit bê nghut ri.

Woi-nyí haú gi, jung hkanmó lé ho gôn wú é nghut luí, Garai Gasâng é zaú tô é hkyô lé lhang ho gôn wú é sù nghut ri. ¹¹ Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lhê lú? Haú eq rajung za, Garai Gasâng é Woi-nyí za a nghut jáng, Garai Gasang myit é hkyô lé, ó yuq le wó sê é a nghut. ¹² Nga-nhung gi, mingkân é woi-nyí lé hap yu tô é a nghut é za, Garai Gasâng èq nga-nhung lé byi to bê jeju lé, ngamoq wó sê gyo râ matú, Garai Gasâng chyáng má é Woi-nyí lé sheq hap yu tô é ru nghut lhê. ¹³ Haú mù luí, ngamoq gi, waxâng zô wui é hpaqchyî byéng-yá èq mhoq byi é dang dông taî é a nghut, Garaí é Woi-nyí èq mhoq byi

é dang dông taî é sheq ru nghut mù, woi-nyí eq sêng é tengmán hkyô lé woi-nyí eq sêng é dang dông taî sân kyô é nghut lhê. ¹⁴ Haú Woi-nyí lé a wó é sù gi, Garai Gasâng é Woi-nyí mai lo é hkyô pé lé a hap yu é nghut lhê; haú mù gâ le, haú pé gi, yhang é matú ngok é hkyô nghut luí, woi-nyí hkyô dông mai haú hkyô lé a wú é yanmai, yhang gi, haú pé lé a wó sê gyo nghut ri. ¹⁵ Woi-nyí eq sêng é byù gi, lhunglhang lé wó jéyáng lhê, nghut kôlhang, yhang lé kúm gi, ó yuq èq le wó jéyáng é a nghut. ¹⁶ Chyúmdang má,

"Hkâsu mù gâ le, ó yuq wá, haú Yhum-sing é myit lé sé mù, Yhang lé wó mhoqshit wú é lú?"*
ga kê tô ri. Nghut kôlhang, nga-nhung gi, Hkrisduq é myit lé wó é bang nghut lhê.

3

Noqkuq Hpúng Má Gam Hkoq Lhûm É Hkyô

¹ Gumang wui é, hí hkûn, ngò gi, nungmoq lé, Woi-nyí eq sêng é bang lé dông wó taî é a nghut; mingkan eq sêng é bang dông nghut kômù, Hkrisduq má zonú su dut bang lé dông sheq taî wú é nghut lhê. ² Nungmoq gi, zoshuq apat lé a wó zo shi kó nghut é yanmai, ngò gi, nungmoq lé náu byi huq é nghut lhê.* Ahkuí lhang, nungmoq gi, zoshuq apat lé a wó zo shi kó nghut ri. ³ Nungmoq gi, mingkan eq sêng é bang ru nghut nyi ashî kó nghut ri. Hkâsu mù gâ le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wui su nyi yap bum lhê a nghut kó luq? ⁴ Rayuq gi, "Ngò gi, Poluq htang châng lhê." ga, góyuq gi, "Ngò gi, Apolo htang châng lhê." ga taî nyi bùm kô é nghut jáng, nungmoq gi, mingkan zo wui nghut nyi bum lhê a nghut kó luq?

* 2:9 Esai 64:4 ✧ 2:16 Esai 40:13 * 3:2 Nungmoq lé náu byi huq é, gâ é gi, lui é hkyô pé lé hí mhoq byi é lé gâ lhê.

⁵ Apolo gi, ó wá nghut lhê? Poluq gi, ó wá nghut lhê? Nga-nhik gi, Garai é dui-nhâng zoshâng za nghut luí, ó le ó lé, haú Yhumsing eq hun tô é muzó eq rajung za wùn waq é nghut luí, nungmoq gi, ngá-nhik dông mai wó lumjáng kô é ru nghut lhê. ⁶ Ngò gi, gabú danglù amyui lé hô kat, Apolo gi, wui hpyun byi, nghut kôlhang, yuq kô lò nhang é gi, Garai Gasang za ru nghut lhê. ⁷ Haú mù, amyui hô kat sù eq wui hpyun byi sù gi, ahkyak mó a nghut, yuq kô lò nhang é Garai Gasang za sheq ahkyak ru nghut lhê. ⁸ Amyui hô kat sù eq wui hpyun byi su nhik myoqbyu tô é hkyô gi, rajung za nghut ri; nghut kôlhang, yhumsing shikut é eq rajung za, ó le ô é shigyaú chyunghuq wó yú kó rá nghut lhê. ⁹ Hkâsu mù gâ le, ngamoq gi, Garai Gasâng é mù zui luzúm wui nghut lhê; nungmoq gi, Garai Gasâng é yò, Garai Gasâng é yhùm nghut nyi akô.

¹⁰ Garai Gasang, ngo lé byi to bê jeju eq rajung za, yhùm saí kung sù rayuq dông, ngò gi, yhùm apûn awang hi to bê nghut lhê; gotú byù gi, hau é ahtoq má saí toq jat nyi é nghut lhê. Nghut kôlhang, yuq hkgangmó gi, yhumsing saí é má rago sidiq rá lhê. ¹¹ Hkâsu mù gâ le, hi to gù nghut é, Yesuq Hkrisduq nghu é yhùm apûn awang mai lai luí, ó yuq le, gotú yhùm apûn awang lé wó saí é a nghut. ¹² Yhùm apûn awang hau é ahtoq má, hîng, ngùn, hpaudap luqgok pé, sik, mhan, hkowá pé lé chûng mù saí jat kô é nghut jáng, ¹³ yuq hkgangmó é muzó hkâsu nghut é hkyô lé lhoq htoq shit é hui rá nghut lhê. Haí mù luí gâ le, haú Yesuq é Buinyi gi, haú lé byu-myàng nhâng mù, haú buinyi lé gi, myí eq lhoq htoq shit rá nghut lhê. Haú myi gi, yuq hkgangmó saí é muzó hkasú é nghut é lé chyâm rá nghut lhê. ¹⁴ Rayuq yuq saí é yhùm gi, ru gîng nyi é nghut jáng, haú yuq gi, yhang é shigyaú chyunghuq wó yú rá nghut lhê. ¹⁵ Nghut kôlhang, yhùm haú nyé gyó byuq é nghut jáng,

yhang gi, yhùm sùm byuq é hui zo rá nghut lhê; yhang gi, asak lut kôlhang, myishâm mai wó lut é byù su dut rá nghut lhê.

¹⁶ Nungmoq gi, Garai Gasâng é noqkuq yhùm nghut luí, Garai Gasâng é Woi-nyí gi, nungmoq má lúng nyí bê hkyô lé a sé kó lúhú? ¹⁷ Rayuq yuq, Garai Gasâng é noqkuq yhùm lé lhoq htên é nghut jáng, Garai Gasang gi, haú yuq lé lhoq htên pyám rá nghut lhê. Hkâsu mù gâ le, Garai Gasâng é noqkuq yhùm gi, chyoiyúng lhê; nungmoq gi, noqkuq yhùm haú nghut akô.

¹⁸ Nungmoq gi, yhumsing gùng yhumsing hkâlhoq nghoq kó. Nungmoq mâ é rayuq yuq, shí ipyat mâ é byù nyi a-tsáng dông hpaqchyí byéng-yá bò sù ga myit é nghut jáng, hpaqchyí byéng-yá akying bò sù wó dut sháng gaq, yhang gi, a-ngok sù dut rá lhê. ¹⁹ Hkâsu mù gâ le, mingkan shí mâ é hpaqchyí byéng-yá gi, Garai Gasâng é hí má ngok é hkyô nghut ri. Haú gi, "Garai Gasang gi, hpaqchyí byéng-yá bò bang lé, yhangmoq é hpaqchyí má yhang myí to nhang ri."* ga kâ tô é eq rajung za nghut ri. ²⁰ Hau htoq agó, "Haú Yhumsing gi, hpaqchyí byéng-yá bò bang myit é hkyô pé akôm nghut é lé sê lhê."* ga le kâ tô ri. ²¹ Haú mù luí, ó yuq le, byù eq sêng é hkyô má gyáng é dang a taí kó sháng gaq! Lhunglhang gi, nungmoq é chyat nghut lhê. ²² Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lhê hkyô eq htângnùng mâ é hkyô le, banshoq gi, nungmoq é chyat nghut ri. ²³ Nungmoq gi, Hkrisduq é nghut akô; Hkrisduq gi, Garai Gasâng é nghut ri.

4

Hkrisduq É Lagyô Pé

¹ Haú mù luí, byu pé gi, ngamoq lé, Hkrisduq é dui-nhâng zoshâng wui dông eq Garai Gasâng é zaú tô é hkyô pé lé taí pyô rá matú ap byi tô é

* 3:19 Yob 5:13 * 3:20 Hkya-on 94:11

hui bang đông sôn yù râ lhê. ² Haú đông nghut jáng, ap byí tô é hui bang gi, yhumsing lhumzui hkyô lé saksé shit râ dut lhê. ³ Nungmoq eq nghut nghut, waxâng zô wui é tarâ rûng mai nghut nghut, ngo lé jéyáng kô le, ngá é matú atiq azo za nghut lhê; gè gè ga jáng, ngá gûng ngò lhang a jéyáng é nghut lhê. ⁴ Haú mù gâ le, ngá gûng ngò mara a bò bûn é nghut kôlhang, haú gi, ngo lé wó lhoq sân-yúng byí é a nghut. Ngo lé jéyáng é sù gi, haú Yhumsing nghut lhê. ⁵ Haú mù, masat tô é ahkying a jé shimá haí lé le a jéyáng é za, haú Yhumsing jé lé shoq, lánng nyí keq. Yhang gi, mauchut hkaú má haq tô é pé lé byu-myàng nhâng mù, byu pê é myit nhiklhum má lúng é hkyô lé lhoq htoq shit râ nghut lhê. Haú hkûn, yuq hkanngmó gi, ó le ó wó gíng é hkya-ôn hkyô lé, Garai Gasang chyáng mai wó yù râ nghut lhê.

⁶ Gumang wui ê, ngò gi, "Kâ tô é gû mai hkâlai." gâ é sanghkyâng é lichyúm lé, ngamoq chyáng mai nungmoq wó mhoq yù sháng gaq nghu, nungmoq é akyu é matú, ngò eq Apolo má haú pé lé yù mù dangtú kut é nghut lhê. Haú hkûn, nungmoq gi, nghutbûn é đông, rayuq lé gi, wú ko, góyuq lé gi, wú shóm, a kut kó râ nghut lhê. ⁷ Ó yuq wá, nang lé, góyuq eq shaí shoq kut lhê lú? Nang hap yu é a nghut le gi, wó râ lú? Nang, hap yu é nghut le gi, a hap yu é đông haí mù nghutbûn nyi lhê lú?

⁸ Nungmoq gi, râ é lhunglhang gumjup bang nghut bekô hung! Nungmoq gi, wó bang dut gù nghut bekô hung! Ngamoq a lom é za, nungmoq gi, hkohkam pé dut bekô hung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ lé, ngò hkâ-í yhang ô nau nyi lhê ô! ⁹ Nghut kôlhang, sat râ matú doqdan huí é shúm byù pé lé su, Garai Gasang gi, lagyô pé nghut é ngamoq lé de de kut htoq shit bê nghu, ngò wó myit ri. Ngamoq gi, nyi mi-nyí, joq mijoq, maumang

lagyô pé eq waxâng zô wui é hí má, wú kûn jung đông dut nhang é huí nyi gù bê nghut lhê. ¹⁰ Ngamoq gi, Hkrisduq é yanmai ngok é bang đông sôn yu é huí kôlhang, nungmoq kúm gi, Hkrisduq má hpaqchyí gyaí bo é bang đông dut bekô hung! Ngamoq gi, wum nyhôm é bang đông sôn yu é huí kôlhang, nungmoq kúm gi, wúm bo é bang đông dut bekô hung! Nungmoq gi, hkunggâ é huí akô; ngamoq kúm gi, hkunggâ é a huí hung! ¹¹ Shí hkying shí u jé shoq, ngamoq gi, zòmut wuìshit huí é, mebu ajeq amyhá dut huí é, nhuq bat huí é, yhumsing é nyi jowò a wó é bang nghut nyi lhê. ¹² Ngamoq gi, yhum-sing loq eq yhang mù zui wum kat nyi lhê. Ngamoq gi, nhing pyâm é huí jáng, shimân byí, zing-rí é huí jáng, jân pyám kut lhê. ¹³ Ngamoq gi, lumù gansang é huí jáng, dang ngón dang nguí tû nyo lhê. Ngamoq gi, ahkuí jé shoq, myidàm htoq mâ é hpoqkyuq hpoqpyâng eq mingkân é buzaq pé đông sôn yu é huí nyi lhê.

¹⁴ Ngò gi, nungmoq lé hoq lhoq hpu râ matú haú pé lé kâ é a nghut, ngá é chyitdap zo wuí lé đông lhoq pûn ky-ing râ matú ru nghut lhê. ¹⁵ Nungmoq gi, Hkrisduq má mhoqshit bang ra mun wó kô é nghut kôlhang, îwâ pé myo shoq wó kô é a nghut; hkâsu mù gâ lé, ngò gi, haú gabú danglù đông mai, Hkrisduq Yesuq má nungmoq é îwa dut é nghut lhê. ¹⁶ Haú mù luí, ngò kut é su cháng keq nghu, ngò, nungmoq lé lung kat lhê. ¹⁷ Hau é yanmai, ngò gi, haú Yhumsing má lhumzui sù nghut é, ngò chyitdap é ngá zo đông nghut sù Timohti lé, nungmoq chyáng nhang kat é nghut lhê. Yhang gi, Hkrisduq Yesuq mâ é ngá é asak duí hkyô lé, jowò hkanngmó mâ é noqkuq hpúng hkanngmó lé ngò mhoq byí é eq rajung za, nungmoq lé lhoq pun byi râ nghut lhê.

¹⁸ Nungmoq mâ é ra-am gi, nungmoq chyáng ngò a dum jé lé râ su ngam pyám kômù, nghutbûn byuq bekô nghut ri. ¹⁹ Nghut kôlhang, haú

Yhumsing gyô é nghut jáng, ngò gi, nungmoq chyáng hân za jé lé râ nghut lhê; haú hkûn, ngò gi, nghutbûn é byù haú bang hai taí é hkyô lé za a nghut, yhangmoq hai a-tsam wó é hkyô lé le gôn htoq râ nghut lhê. ²⁰ Hkâsu mù gâ le, Garai Gasâng é mingdán gi, taí é dang má bo é a nghut, a-tsam má sheq ru nghut lhê. ²¹ Nungmoq hká đông ô nau akô lú? Ngò gi, nungmoq chyáng, nuichûm hkat eq, a nghut jáng, chyitdap é eq nú-nhâm é myit mai lé lô ra râ lú?

5

Ashop É Đông Gungsho Zùm Yap É Hkyô Kut É Sû Lé Lhoq Htoq Pyám Râ Hkyô

¹ Nungmoq chyáng, ashop é đông gungsho zùm yap é hkyô joq é lé, hkyak taí hû lò bekô; haú gi, a lumjîng bâng chyáng lhang a dut wú é hkyô nghut é, yuqgè rayuq gi, yhangwâ é myiwe eq nyi zô lhum nyi é hkyô nghut ri. ² Nghut kôle, nungmoq gi, nghutbûn nyi bum akô hung! Haú đông a nghut é za, nungmoq gi, yón é myit tûn shit mù, haú su kut é byù lé, nungmoq é hpúng mai lhoq htoq pyám le, a gè kó lú? ³ Ngò gi, ngá gungdu, nungmoq eq rahá a nyi to kôlhang, ngá é i-myit gi, nungmoq eq rahá nghut nyi lú, gungdu jé nyi tô é đông mai, haú hkyô kut é sù lé jéyáng doqdan gù nghut lhê. ⁴ Nungmoq gi, nga-nhông é Yhumsing Yesuq é mying mai zup zing mù, ngá é i-myit gi, nungmoq eq rahá nghut nyi lú, nga-nhông é Yhumsing Yesuq é a-tsam le, nungmoq eq rahá nghut nyi é hkûn, ⁵ byù haú yuq lé, Tsadán é loq má ap byi pyám keq.* Haú jáng, Yhumsing é buinyi má, yhang é woi-nyí gi, hkyi yu é hui râ matú, yhang é yubak gungsho gi, lhoq htên pyám é hui râ nghut lhê.

⁶ Nungmoq é nghutbun hkyô gi, ge é a nghut. Mún† ra tsuí zo gi, muk

long gón lé wó lhoq daú nhang é lé, nungmoq a sé kó lú? ⁷ Nungmoq gi, múnchi a bo é bang nghut nyi kô é eq rajung za, múnchi a bo é muk htung asik su wó dut kô sháng gaq, múnchi axau lé lhuí pyám keq. Hkâsu mù gâ le, nga-nhông é Lhoqlhai Poí sauzo, Hkrisduq gi, hkungga nhong é hui bê nghut lhê. ⁸ Haú mù lú, nga-nhông gi, agè agáu hkyô eq hpuzo nhâng hkyô nghut é múnchi axau bo é đông a nghut é za, lhumzui hkyô eq tengmán hkyo é muk nghut é, múnchi a bo é muk eq, Poí haú lé kut nyi sháng.

⁹ Ashop é đông gungsho zùm yap é bang eq hkâzûm kó nghû, ngò, nungmoq lé, ngá é laiká má kê kat byi bê nghut lhê. ¹⁰ Nghut kôlhang, mingkan shi eq sêng é, ashop é đông gungsho zùm yap é bang, myoqnoq é bang, mhaú zô é bang eq hparà noq é bang lé hkâzûm yap kó nghû é gi, a nghut. Haú su ru nghut le gi, mingkan htoq shi mai nungmoq htoq lô byuq ra kô râ nghut lhê. ¹¹ Nghut kôlhang, yhanggùng yhang gi, gumang ga kôle, ashop é đông gungsho zùm yap é, myoqnoq é, hparà noq é, lumù gansang é, i shuq wut é, mhaú zô é sù ó yuq eq le a ge zùm yap kô râ nghut lhê nghû, ahkuí, ngò, nungmoq lé kê kat nau é nghut lhê. Haú sù é byù eq gi, rahá lhang hkâzo kó.

¹² Haú noqkuq hpúng shinggan mâ é bang lé jéyáng râ gi, ngò eq hai sêng lhê lú? Nghut kôlhang, hpúng ahkaú mâ é bang lé nungmoq jéyáng râ dut lhê. ¹³ Hpúng shinggan mâ é bang lé gi, Garai Gasang jéyáng râ nghut lhê. Nghut kôlhang, "Haú agè agáu é sù lé, nungmoq chyáng mai lhoq htoq pyám keq."* gâ tô ri.

6

Lumjîng Bâng Hkaú Má Jéyáng Lhâm É Hkyô

* **5:5** Tsadán é loq má ap byi pyám keq gâ é gi, hpúng byù wui eq a zùm yap nhâng lo râ lé taí é nghut lhê. † **5:6** Mún gâ é gi, yubak mara lé taí nau é nghut lhê. Lhoqlhai Poí jé jáng, Israelaq byu pé gi, yhangmoq wó é múnchi banshoq lé lhuí pyám mù, múnchi a bo é muk saí kô é nghut lhê. ✨ **5:13** Tará Pun 17:7

1 Nungmoq mâ é rayuq yuq gi, gumang góyuq eq dang-rhâng lhûm tô é nghut jáng, haû hkyô lé jéyáng nhâng râ matú, haû sân-yúng bâng é hí má taí râ malaí, Garai a wó bâng é hí má wám taí râ lhú? 2 Haû sân-yúng bang gi, mingkan lé jéyáng râ nghut é hkyô lé, nungmoq a sé kó lhú? Nungmoq gi, mingkan lé jéyáng râ bang nghut kôle nhîng, tiq é mù pé lé wó jéyáng é bang a nghut kó lhú? 3 Nganhúng gi, maumâng pé lé jéyáng râ nghut é hkyô lé, nungmoq a sé kó lhú? Haû mù, shí pyat mâ é hkyô pé lé, gè gè yhang wó jéyáng kô râ nghut lhê ô! 4 Haû mù luí, nungmoq gi, dang-rhâng lhûm é mù pé joq é nghut jáng, noqkuq hpúng má ahkyak a nghut é bang lé tarâ agyi kut nhâng kô râ lhú? 5 Ngò, haû su nghû taí é gi, nungmoq lé hoq hpu nhâng râ matú nghut lhê. Lumjîng bâng chyáng dang-rhâng lhûm é hkyô lé wó jéyáng râ hpaqchyí luq shoq bo é byù, nungmoq chyáng rayuq lháng a nyì dut kô râ lhú? 6 Nghut kôlhang, nungmoq gi, gumang yhangchang rayuq eq rayuq, a lumjîng bâng é hí má lháng rûng shok lhum akô nhung!

7 Nungmoq hkaû má mù jéyáng lhûm é hkyô joq é nghut jáng, nungmoq gi, sum lugù nghut bê. Góyuq èq shut le lháng rû ge lhê a nghut kô lhú? Mhaû zô é huí le lháng rû gè lhê a nghut kô lhú? 8 Nghut kôle, nungmoq yhang gi, mhaû zo kô é eq shut kô é nghut luí, haû gi, nungmoq é gumang wuì lé kut é nghut lhê.

9 Agè agau é bang gi, Garai Gasâng é mingdán mâ é shimân jeju a myang hkam yù kó râ nghut é hkyô lé, nungmoq a sé kó lhú? Hkâ-nâ nyì kó. Ashop é dông gungsho zùm yap é bang le, hparà noq é bang le, sumyi sulàng lú é bang le, shiwa hpó kut é bang le, yuqgè yhangchang nyì zô lhûm é mara kut shut é bang le, 10 hkau bang le, myoqnoq bang le, î shuq wut bang le, lumù gansang é bang le, mhaû zô é bang le, Garai

Gasâng é mingdán mâ é shimân jeju lé myang hkam yù kô râ a nghut.

11 Nungmoq mâ é ra-am gi, haû su kut kô é bang nghut akô. Nghut kôlhang, nungmoq gi, nga-nhûng é Garai Gasâng é Woi-nyí eq Yhumsîng Yesuq Hkrisduq é myìng mai, mara hkyut san byî é, lhoq sân-yúng é eq chî sân pyám byî é hui bekô nghut ri.

Ashop É Dông Gungsho Zùm Yap É Hkyô

12 "Jung hkangmó kut râ ahkáng ngò wó lhê." Nghut kôlhang, jung hkangmó gi, akyû byî é a nghut. "Jung hkangmó kut râ ahkáng ngò wó lhê." Nghut kôlhang, haí jûng èq le ngo lé wó sing pyám râ a nghut. 13 "Zoshuq gi, wamdaû é matú nghut mù, wamdau gi, zoshuq é matú nghut ri." ga nungmoq ra-am taí kó râ nghut lhê. Nghut kôlhang, Garai Gasang gi, haû í jûng é lé lhoq htên pyám râ nghut lhê. Gungdu gi, ashop é dông gungsho zùm yap hkyô é matú a nghut é za, haû Yhumsîng é matú nghut mù, haû Yhumsîng gi, gungdû é matú nghut ri. 14 Garai Gasang gi, Yhâng é a-tsâm èq, haû Yhumsîng lé, shi é mai lhoq dui toq yû bê nghut mù, nga-nhúng lé le lhoq dui toq yû râ nghut lhê. 15 Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kó lhú? Haû nghut le nhîng, Hkrisduq é gungsho showui showang pé lé yù mù, shiwa myhî pé eq rading ralhum za kut pyám nhâng kô râ lhú? Hkâ-nhám le a ge dut nhâng! 16 Shiwa myhî eq gungsho zum é sù gi, yhang eq gungsho ralhum za dut bê hkyô lé, nungmoq a sé kó lhú? Hkâsu mù gâ le, "Yhangnhik gi, gungsho ralhum za dut kô râ nghut lhê."* ga taí tô ri. 17 Nghut kôlhang, haû Yhumsîng eq rading ralhum za dut é sù gi, woi-nyí má Yhang eq ralhum za dut bekô nghut ri.

18 Ashop é dông gungsho zùm yap é hkyô lé koi pyám keq. Byù rayuq kut shut é gotû mara pé banshoq gi,

* 6:16 Apûn 2:24

yhâng é gungdu shinggan má nghut lhê; nghut kôlhang, ashop é đông gungsho zùm yap é hkyô kut shut é sù gi, yhumsing gùng lé mara shut é sù nghut ri. ¹⁹ Nungmoq é gungdu gi, Garai Gasâng chyáng mai nungmoq wó yû bê nghut é, nungmoq má lúng nyi é Chyoiyúng Woi-nyí é noqkuq yhùm nghut é lé, nungmoq a sé kô lúhú? Nungmoq gi, yhumsing gùng lé sing é bang a nghut. ²⁰ Hkâsu mù gâ le, nungmoq gi, ahpau ralhum byi mù wui hpyit tô é hui bê bang nghut akô. Haû mù luí, nungmoq é gungdû èq, Garai Gasang lé, hkunggâ é hkyô shit nyí keq.

7

Myí Yu É Eq Sêng É Hkyô

¹ Ahkuí, nungmoq kâ kat é hkyô pé eq séng luí ga jang, yuqgè rayuq gi, myi a yu le gè ri. ² Nghut kôlhang, ashop é đông gungsho zùm yap é hkyô gyai myô é yanmai, yuqgè hkanmó gi, yhumsing é myiwe wó râ lhê; myiwe hkanmó gi, yhumsing é yuqgè wó râ lhê. ³ Haû yhumsing hpó gi, wò joq é eq rajung za, yhang yhumsing myhí eq zùm sháng gaq; haû đông za, yhumsing myhí le, yhang yhumsing hpó eq zùm sháng gaq. ⁴ Haû yhumsing myhí é gungdu gi, yhanggùng yhang za sêng é a nghut, yhang é yhumsing hpó eq le sêng lhê. Haû eq rajung za, yhumsing hpô é gungdu gi, yhanggùng yhang za sêng é a nghut, yhang é yhumsing myhí eq le sêng lhê. ⁵ Nungmoq myit huí lhum luí, kyûdùng é má rago ap nóng râ ahkyíng ayoq za a nghut jáng gi, rayuq eq rayuq hkâhe lhum kó. Nungmoq yhumsing gùng lé a wó hkan é yanmai, Tsadán èq gunglaú é a hui kô sháng gaq, ahkyíng ayoq haû lai jáng, rahá dum zùm keq. ⁶ Ngò, haû su nghú taí é gi, hkunmó hkyô é đông a nghut, ahkáng byí kat é đông ru nghut lhê. ⁷ Byù banshoq bang gi, ngò su nyí râ lé ô nau ri. Nghut kôlhang, yuq hkanmó gi, ó le ô é chyunghuq lé Garai Gasâng chyáng

mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

⁸ Ahkuí, myiwe a yù lô é bang eq chuimó pé lé ngò taí kôlé, ngò su, haû đông jâng nyi pyám kô é nghut le, yhangmoq é matú ge é hkyô nghut ri. ⁹ Nghut kôlhang, yhumsing gùng lé a wó hkâng kô é nghut le gi, yhangmoq, myi yû myi ló râ lhê; hkâsu mù gâ le, myi su nyé luí ô nau nyí râ malaí, myi yu myi ló le je ge lhê.

¹⁰ Myi yû bê bang lé, ngò, hkunmó hkyó kôlé, shí gi, ngò đông hkyô é a nghut, Yhumsing chyáng mâ é ru nghut lhê: Yhumsing myhí gi, yhang é yhumsing hpô chyáng mai a ge gang râ nghut lhê. ¹¹ Nghut kôlhang, yhang gâng é nghut jáng, myi a dum ló é za nyí râ lhê, haû a nghut jáng, yhang é yhumsing hpó eq dum xoq yû râ lhê. Yhumsing hpó le, yhang é yhumsing myhí lé a ge kâng pyám râ nghut lhê.

¹² Góbang lé ngò shí su nghú taí kôlé, shí gi, Yhumsing chyáng mâ é a nghut, ngò đông mai taí é ru nghut lhê. Gumang rayuq yuq gi, lumjíng sù a nghut é yhumsing myhí wó é nghut le, myiwe haû, yhang eq rahá nyí nau é nghut jáng, yhang lé a ge kâng pyám râ nghut lhê. ¹³ Myiwe rayuq gi, lumjíng sù a nghut é yhumsing hpó wó é nghut le, yuqgè haû, yhang eq rahá nyí nau é nghut jáng, yhang eq a ge gang râ nghut lhê. ¹⁴ Hkâsu mù gâ le, haû a lumjíng sù yhumsing hpó gi, yhang yhumsing myhí đông mai lhoq sân-yúng é hui bê nghut mù, a lumjíng sù yhumsing myhí le, lumjíng sù nghut é yhang é yhumsing hpó đông mai lhoq san lhoq yúng é hui bê nghut ri. Haû a nghut jáng, nungmoq é zo wuí gi, a sanséng dut kô râ nghut lhê; nghut kôlhang, yhangmoq gi, haû đông mai, chyoyúng bekô nghut ri.

¹⁵ Nghut kôlhang, haû a lumjíng sù gâng ló naú jáng gi, gâng ló sháng gaq. Lumjíng é yuqgè nghut nghut, myiwe nghut nghut, haû sù é hkyô pé má gi, hkâm zing tô é hkyô a joq é nghut lhê. Garai Gasang gi, nga-nhúng lé,

nguingón shoq nyi sháng gaq ga ji yù bê nghut lhê. ¹⁶ Yhumsîng myhí ê, náng é yhumsîng hpó lé wó hkyi yù râ nghû, hkâsu wó sé râ lhú? Yhumsîng hpó ê, náng é yhumsîng myhí lé wó hkyi yù râ nghû, hkâsu wó sé râ lhú?

¹⁷ Hká dông nghut kôlhang, yuq hkangmó gi, Garai Gasang, yhang lé ji yu tô é hkûn, haû Yhumsîng mai yhang lé nyi nhang tô é dông asak dui nyi râ lhê. Haû gi, noqkuq hpúng pé banshoq má ngò tô to byî é tarâ nghut lhê. ¹⁸ Byù rayuq gi, ji yu é huí é hkûn, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sù dông a dut byuq sháng gaq. Byù rayuq gi, ji yu é huí é hkûn, ahpyo-kuq hpyit a hkam yu to shî é nghut jáng, ahpyo-kuq hpyit a hkam yù sháng gaq. ¹⁹ Ahpyo-kuq hpyit hkâm hkyô gi, haî ahkyak a nghut; ahpyo-kuq hpyit a hkâm hkyô gi, haî ahkyak a nghut. Garai Gasâng é hkunmó pé lé châng nyi é za sheq ahkyak nghut lhê. ²⁰ Yuq hkangmó gi, yhang lé Garai Gasâng eq ji yu é hkûn lhê su xoq nyi nyi râ lhê. ²¹ Nang gi, ji yù huí é hkûn jùn dut nyi é lhú? Haû hkyô lé hkâ-myt chiq. Nghut kôlhang, nang gi, luthkyô wó yu é nghut jáng, haû dông nyi aq. ²² Hkâsu mù gâ le, haû Yhumsîng eq ji yu é huí é hkûn, jùn dut nyi é sù gi, haû Yhumsîng eq lhoq lhut yu é byù nghut bê. Haû eq rajung za, ji yu é huí é hkûn, luthkyô wó é sù gi, Hkrisduq é jùn nghut ri. ²³ Nungmoq gi, Garai Gasâng eq ah-pau byi mù wui hpyit yu é huí bê bang nghut akô. Haû mù, byu pé é jùn hkâdut kó. ²⁴ Gumang wui ê, yuq hkangmó gi, yhumsîng lé Garai Gasâng eq ji yu é huí to bê dông, Yhâng é hí má xoq nyi nyi râ lhê.

²⁵ Ahkuî, zomyi zorâm wui é hkyô taí kôlé. Haû Yhumsîng chyáng mâ é hkunmó gi, ngò a wó; nghut kôlhang, Yhumsîng é shogyo nhikmyîn é yan-mai, lumgíng sù rayuq nghut nyi é dông, ngò, nungmoq lé hkyô shit

râ nghut lhê. ²⁶ Ahkuî hui zô é wuîhke hkyo é yanmai, nungmoq gi, yhumsîng nyi to é su xoq nyi nyi le je ge ri nghû, ngò wó myit ri. ²⁷ Nang, myiháng bê a nghut lhi? Lhoq kang râ hkâda lo. Nang, myi a háng shi a nghut lhi? Myi hkâhò lo. ²⁸ Nghut kôlhang, nang, myihâng é nghut le gi, mara a nghut. Zomyi gi, myi ló é nghut jáng, mara a nghut. Nghut kôlhang, myihâng é bang gi, shí pyat má wuîhke hkyô pé myo myo hui kó râ nghut mù, ngò, nungmoq lé haû mai hkyi yù nau ri.

²⁹ Gumang wui ê, ngò taí nau é lichyúm gi, ahkyíng tot byuq bê nghut mù, ahkuî mai, myi wó é bang gi, a wó é bang dông nyi kó sháng gaq.* ³⁰ Yón ngaû huí é bang gi, a huí é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su; ³¹ haû mingkan zè pé lé chung é bang gi, haû pé lé a myit tuí é bang su, nghut kó sháng gaq. Hkâsu mù gâ le, shî mingkân é ahkuî lhê é azông isâm gi, laî ló nyi é nghut lhê.

³² Ngò gi, nungmoq lé a myit myo nhâng nau. Myi a yù shî é sù gi, haû Yhumsîng lé hkâsu wó gabú nhâng râ matú, haû Yhumsîng é muzó lé myit chiq nyi ri. ³³ Nghut kôlhang, myi yù bê sù gi, yhâng é yhumsîng myhí lé hkâsu wó gabú nhâng râ matú, mingkan shi é muzó eq séng luí myit chiq nyi ri. ³⁴ Haû mù, yhâng shirong é myit gi, byo myín nyi ri. Myi a ló é myiwe nghut nghut, zomyi gyíng nghut nghut gi, yhâng é gungdu eq woi-nyí má haû Yhumsîng lé rago wó ap nóng râ matú, Yhumsîng é muzó pé eq séng luí myit chiq nyi ri. Nghut kôlhang, myi ló bê myiwe gi, yhâng é yhumsîng hpó lé hkâsu wó gabú nhâng râ matú, mingkan shi é muzó eq séng luí myit chiq nyi ri. ³⁵ Ngò, haû su nghû taí é gi, nungmoq é matú ge é hkyô nghut lhê; nungmoq lé tara eq zû zing é a nghut é za, myit a byò lo shoq Yhumsîng lé wó ap nóng râ

* 7:29 A wó é bang dông nyi kó sháng gaq gâ é gi, Garai mù lé je myit zuq nyi sháng gâ nau é nghut lhê.

matú, jô é đông asak wó duí kô sháng gaq nghu é hkyô ru nghut lhê.

³⁶ Nghut kôlhang, rayuq yuq gi, yhang dúng tô é zomyi gyíng lé a htuk é đông kut nyi é su wó myit ngàm jáng, myiwe haû asak kô lo nyi mù, hâng yù râ dut bê nghû myit é nghut le gi, yhang ô nau é đông kut sháng gaq. Yhang mara kut é a nghut. Yhangn-hik gi, hâng lhum râ lhê. ³⁷ Nghut kôlhang, yhang gi, haú hkyô lé yhâng é myit mai wó lhoq zím pyâm é nghut mù, yut yut ô nau hkyo é ahkaû má a nghut é za, yhumsíng ô nau é hkyô lé wó hkúm zing pyâm é sù nghut luí, haû zomyi gyíng lé a hâng yù râ matú wó myit hpyit bê sù nghut é nghut jáng, yhang gi, ge é hkyô kut bê nghut ri. ³⁸ Haû mù luí, zomyi gyíng haû lé hâng yu é sù gi, jô é hkyô kut bê nghut ri; nghut kôlhang, zomyi gyíng haû lé a hâng yu é sù gi, je ge é hkyô kut bê nghut ri.

³⁹ Myiwe rayuq gi, yhâng é yhumsíng hpó rú dui nyi nyi, yhang eq xoq tô ashí nghut lhê. Nghut kôlhang, yhâng é yhumsíng hpó shi byuq é nghut jáng, yhang gi, myi ló râ ahkáng dum wó bê nghut lhê, nghut kôle, haû yuq gi, Yhumsíng eq sêng é sù dut râ lhê. ⁴⁰ Ngò jéyáng é đông ga jáng, myi a dum ló é wó nyi le gi, yhâng é matú je gabú hkyô dut râ nghut lhê. Ngò le, Garai Gasâng é Woi-nyí wó sù nghû wó myit ri.

8

Hparà Lhô Lé Tíng Byí É Zoshuq

¹ Ahkuí, hparà lhô pé lé tíng byí é zoshuq hkyô: nga-nhúng banshoq bang gi, haú hkyô eq séng luí sê lhê. Sê é hkyô gi, nghutbun sê lhê; nghut kôlhang, chyitdap myit gi, lhoq kô myhang lhê. ² Byù rayuq yuq gi, rajung jung lé sé bûn é nghut le, yhang sé âng é lé lhang a sé shi nghut ri. ³ Nghut kôlhang, Garai Gasâng lé chyitdap é sù gi, Garai Gasâng eq sê é sù nghut ri.

⁴ Haû mù luí, hparà lhô pé lé tíng byí é zoshuq lé zô é eq séng luí gi: hparà lhô gi, mingkan má haí lhang

a nghut é hkyô lé le, Garai Gasang gi, Yhang rayuq mai lai luí gotú a nyi é lé le, nga-nhúng sê lhê. ⁵ Hkâsu mù gâ le, mauhkûng htoq má nghut nghut, myigùng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsing pé" myo myo nyi kôlhang ⁶ nga-nhúng é matú gi, Íwa nghut é Garai Gasang rayuq za nyi é nghut mù, lhunglhang gi, Yhang mai hpan é nghut luí, nga-nhúng gi, Yhâng é matú asak dui nyi é nghut lhê. Yesuq Hkrisduq nghu é Yhumsíng rayuq za nyi é nghut mù, lhunglhang gi, Yhang đông mai hpan é nghut luí, nga-nhúng gi, Yhang đông mai asak dui nyi é nghut lhê.

⁷ Nghut kôlhang, yuq hkangmó gi, haú hkyô lé sê gam hkoq yu é a nghut. Ra-am gi, ahkuí jé shoq hparà lhô pé má mán byuq kô é yanmai, haû sù é zoshuq lé yhangmoq zô é hkûn, hparà lhô lé tíng byí é zoshuq đông myit sôn yu akô. Yhangmoq myit sôn sê é hkyô wum nyhôm é yanmai, mara wó bûn akô nghut ri. ⁸ Nghut kôlhang, zoshuq gi, nga-nhúng lé, Garai Gasâng shut shuí chyâng e é a nghut. Nga-nhúng a zô é nghut le gi, je sùm byuq ló é a nghut, zô é nghut le gi, je ge lo é a nghut.

⁹ Haû su ga kôlhang, nungmoq a htung a htê zô é hkyô gi, lumjíng myit wum nyhôm bâng é matú myit leqbat jowò a dut shoq sidiq keq. ¹⁰ Hkâsu mù gâ le, sumsé hpaqchyí wó é bang nungmoq gi, hparà lho é noqkuq yhûm má zô nyi kô é lé, haû myit sôn sê é hkyô má wum nyhôm é sù rayuq yuq myang é nghut jáng, hparà lhô pé lé tíng byí é zoshuq lé, yhang wám zo râ lé wum byí é a dut kó râ lú? ¹¹ Haû mù, Hkrisduq shí hkám byi bê nghut é, wum nyhôm é gumang hpó haû yuq gi, nungmoq é sumsé hpaqchyí eq lhoq htên pyâm é hui berá nghut lhê. ¹² Nungmoq gi, haú hkyô đông mai, nungmoq é gumang wui lé mara kut shut é eq, yhangmoq é myit sôn sê é hkyô wum nyhôm é lé nò nhang é hkûn, Hkrisduq lé mara kut shut é

nghut bekô. ¹³ Haû mù luî, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhâng sháng gaq, ngò, hkâ-nhám le, sho lé a zo lo râ nghut lhê.

9

Lagyo Rayuq É Ahko Ahkáng

¹ Ngò gi, lut sù a nghut lhú? Ngò gi, lagyo rayuq, a nghut lhú? Ngò gi, nga-nhông é Yhumsing Yesuq lé myang wú bê sù, a nghut lhú? Nungmoq gi, haû Yhumsing má, ngò zui saí é muzó é ashi pé chyat, a nghut kô lhú? ² Ngò gi, góbâng chyáng lagyo a nghut kôlháng, nungmoq chyáng gè gè nghut lhê! Hkâsu mù gâ le, nungmoq gi, haû Yhumsing má, ngò lagyo nghut é hkyô saksé dizik nghut bum akô.

³ Ngá ahtoq má jéyáng bang lé, ngá gûng ngò taí hung kat kôlé. ⁴ Ngamoq gi, zo râ shuq râ ahko ahkáng a wó é bang nghut lhê lhú? ⁵ Gotû lagyo pé eq Yesuq é yhanggu yuqzô pé eq Kehpa kut é su, lumjîng sù nghut é yhumsing myhí shuí chûng râ, ngamoq, ahko ahkáng a wó é nghut lhê lhú? ⁶ Ngò eq Barnaba baú za, asak duì hkyô é matú mù zui ra râ lhú?

⁷ Ó yuq wá, yhumsing zoshuq wùn luî, gyè mù wùn waq râ lhú? Ó yuq wá, tsibiyiq hkyâm saí mù, haû má é tsibiyiq shi a zo kut râ lhú? Ó yuq wá, sau rém mù, sau naú a shuq kut râ lhú? ⁸ Ngò gi, shí hkyô pé lé xângzo hkyam dông za taí é nghut lhê lhú? Haû tarâ má le, rajung za taí tô lhê, a nghut lhú? ⁹ Hkâsu mù gâ le, haû Mosheq é tarâ má, "Guq nâng nyi é no lé nhuttsung hkâ-tsûng to byi."* ga kâ tô ri. Garai Gasang gi, no eq séng luî za chiq é nghut lhê lhú? ¹⁰ Gè gè yhang, yhang gi, nga-nhông é matú taí é a nghut kô lhú? Nghut lhê, haû gi, nga-nhông é matú kâ to byi é nghut lhê. Haî mù gâ le, yò hpuq sù, yò hpuq é eq, guq bat sù, guq bat é gi, kyô chôm shú yù râ lé myoqbyù luî, kut kô é nghut lhê. ¹¹ Ngamoq gi,

nungmoq chyáng woi-nyí amyui sân kat bê nghut mù, nungmoq chyáng mâ é mingkan zè lé shú yu é nghut jáng, lûm myô é dut byuq bekô lhú? ¹² Góbâng gi, nungmoq chyáng mai garúm é ahko ahkáng wó kô é nghut jáng, ngamoq gi, haû lé je wó râ lhê a nghut kô lhú?

Nghut kôlháng, ngamoq gi, ahko ahkáng haû lé a yu é nghut lhê. Haû yù râ malaî, Hkrisduq é gabú danglù gi, hkûm zing pyâm é a hui râ matú sheq, jung hkangmó lé ngamoq hkam jân nyi lhê. ¹³ Haû noqkuq yhûm má mù zui é bang gi, yhangmoq é zoshuq lé haû noqkuq yhûm mai wó é hkyô eq, hkungga gyap má dojaú é bang gi, hkungga gyap má nhông byi é ram lé myàng zô é hkyô lé, nungmoq a sé kô lhú? ¹⁴ Haû eq rajung za, gabú danglù hko kyô é bang gi, gabú danglù hkyô mai yhangmoq é asak baú râ lhê ga, haû Yhumsing hkunmó hkyô to bê nghut ri.

¹⁵ Nghut kôlháng, ngò gi, ahko ahkáng haû pé haî lé le a yu é nghut lhê. Nungmoq, ngo lé haû su lhom kut byi râ lé myoqbyù mù, ngò, shí hkyô lé kâ é a nghut. Hkâsu mù gâ le, ngò haû su gumrong é hkyô lé, rayuq yuq lhoq htên pyâm byi râ htoq má, ngò shi byuq le lháng je ge ri. ¹⁶ Nghut kôlháng, gabú danglù lé ngò hko kyô é hkûn, ngò gumrong jang a joq; hkâsu mù gâ le, haû gi, ngò a kut a ge é ngá wô nghut lhê. Haû gabú danglù lé ngò a hko kyô é nghut le gi, ngò dingnyé wó râ nghut lhê. ¹⁷ Yhumsing nau é myit mai ngò hko é nghut jáng, shigyaú chyunghuq wó râ nghut lhê; yhumsing nau é myit mai a nghut jáng gi, ngo lé lûm luî ap tô é lé, agon za wùn waq nyi é dut râ nghut lhê. ¹⁸ Haû mù luî, ngá é shigyaú chyunghuq gi, haî nghut lhê lhú ga jang, haû gabú danglù lé hko kyô é hkûn, ngò gi, ahpau a yu é za wó ap nóng luî, gabú danglù hko kyo hkyô má é ngá é ahko ahkáng pé lé ngò a yu é amyat nghut lhê.

* 9:9 Tarâ Pun 25:4

¹⁹ Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù râ matú, ngá gùng ngò, yuq hkanmó é jùn kut nyi lhê. ²⁰ Ngò gi, Yudaq byu pé lé shuí lhing yù râ matú, Yudaq byu pé chyáng nghut nyi é hkùn, Yudaq byù rayuq dông dut nyi lhê. Ngò gi, tarâ hkaû má nyi sù a nghut kôlhang, tarâ hkaû má é bang lé shuí lhing yù râ matú, tarâ hkaû má nyi bâng chyáng nghut nyi é hkùn, tarâ hkaû má é byù rayuq dông dut nyi lhê. ²¹ Ngò gi, tarâ a wó bang lé shuí lhing yù râ matú, tarâ a wó bâng chyáng nghut nyi é hkùn, tarâ a wó sù rayuq dông dut nyi lhê. Nghut kôlhang, gè gè ga jáng, Garai Gasang é tarâ mai a lut htoq é za, Hkrisduq é tarâ hkaû má nyi sù nghut lhê. ²² Ngò gi, wum nyhóm bang lé shuí lhing yù râ matú, wum nyhóm bâng chyáng nghut nyi é hkùn, wum nyhóm sù rayuq dông dut nyi lhê. Ngò gi, wó dut é hkyô dông mai byù ra-am lé wó hkyô sháng gaq nghú, byù lhunglhang bâng chyáng, byù ajà jà dông nyi nyi lhê. ²³ Ngò gi, gabú danglù mai wó é shimân jeju pé lé wó chòm hkam yù sháng gaq nghú, gabú danglù é yanmai haú pé banshoq lé kut é nghut lhê.

²⁴ Dìn shingjóng poi má dìn râ bang banshoq dìn kôlhang, rayuq za shigyaú chyunghuq wó é hkyô lé, nungmoq a sé kô lú? Chyunghuq wó râ matú dìn keq. ²⁵ Sup poi má shingjóng lhum é bang yuq hkanmó gi, yhum-sing gùng yhumsing tarâ htan é dông lhoq mhân yù râ lhê. Yhangmoq gi, gíng nyi râ a nghut é janmaú wó râ matú, haú su kut é nghut akô; nghut kôlhang, nga-nhúng gi, ahtum abyuq gíngtíng nyi râ nghut é janmaú wó râ matú shikut é nghut lhê. ²⁶ Haú mù luí, ngò gi, jum dìn dìn é byù rayuq su dìn é sù a nghut. Ngò gi, lai lé bat é byù rayuq su, akôm má bat é sù le a nghut. ²⁷ Ngò gi, góbâng chyáng mungdang hko é htang má, ngá gùng

ngò, shigyaú chyunghuq eq a gíngdán sù a dut sháng gaq nghú, ngá gùng lé gyai yhang lhoq mhân yù mù, ngá gung lé jùn kut yu nyi lhê.

10

Israelaq Pé É Labaú Mai Sidiq Byi É Hkyô

¹ Gumang wui ê, ngò gi, dut lai lo é hkyô lé, nungmoq lé a sé a dut nhâng nau é nghut lhê; hí hkùn, nga-nhúng é íchýi íwa pé banshoq bang gi, mhutdúm ô má nyi mù, Nhong Nè mai wó lai byit kô é nghut lhê.* ² Yhangmoq banshoq bang gi, mhutdúm eq Nhong Nè má, Mosheq é chángzô pé dông bapisma hkam yu é bang chyat nghut bekô. ³ Yhangmoq banshoq bang gi, rajung zâ é woi-nyí zang zo kô é eq, ⁴ rajung zâ é woi-nyí wui shuq kô é nghut lhê; hkâsu mù gâ le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lhê; luqbum mó haú gi, Hkrisduq nghut bê. ⁵ Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhîn so san kut pyâm é hui bekô nghut ri.

⁶ Haú hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit tuí nyi râ matú nga-nhúng é azòng dut bê nghut ri. ⁷ "Byu pé gi, zùng mù, zo luí shuq luí, a lumjìng bang kut é dông, toq mù, ye bum akô."* ga kâ tô é eq rajung za, yhangmoq mâ é ra-am hparà noq é bang dut byuq é su, nungmoq hkâdut kó. ⁸ Yhangmoq mâ é ra-am gi, ashop é dông gungsho zùm yap é hkyô shut kômù, ra-nyí má za í mún sum hkyíng yuq shi byuq é su, ashop é dông gungsho zùm yap é hkyô le, nga-nhúng gi, a ge kut shut râ nghut lhê. ⁹ Yhangmoq mâ é ra-am gi, haú Yhumsing lé chyâm luí, lhangmui pé eq hte sat é huí bùm kô é su, haú Yhumsing lé, nga-nhúng gi, a

* **10:1** Bun zo ralhú mai raxê lhum gi, Htoq Ló Laiká má bo é Mosheq htang cháng bâng é hkyô lé kâ tô é nghut lhê. * **10:7** Htoq Ló 32:6

ge chyâm râ nghut lhê. ¹⁰ Yhangmoq mâ é ra-am gi, nhutluq shô-myo kôluî, lhoq htên é maumâng èq sat pyâm é hui kô é su, nungmoq gi, nhutluq shô-myo hkâkut kó.

¹¹ Yhangmoq chyáng wú yû râ azòng dông haú pé dut htoq luî, ló htáng râ ipyat pé má nyi âng to bang nga-nhúng é matú sidiq byi râ dông kê to bê nghut ri. ¹² Haú mù luî, nungmoq gi, yap gîng nyi bê su ngàm kô é nghut jáng, a leqbat râ matú sidiq nyi keq! ¹³ Byu chyáng htoq sê é gunglaú hkyô za nungmoq hui râ nghut lhê. Garai Gasang gi, lhumzui sù nghut lhê mù, nungmoq a wó jân é gunglaú hkyô lé hui nhâng râ a nghut. Nghut kôlhang, nungmoq gunglaú huî é hkûn, Yhang gi, haú lé nungmoq wó jan râ matú, hkyô htong byi râ nghut lhê.

Hparà Lhô Noq Hkyô Lé Koi Pyám Râ Hkyô

¹⁴ Haú mù luî, ngò chyitdap é luzúm wui ê, hparà lhô noq hkyô lé koi pyám keq. ¹⁵ Nhik gying bang lé ngò taî lhê; ngò haî taî nyi é hkyô lé nungmoq gùng myit sôn yù keq. ¹⁶ Nga-nhúng, jeju bún nyi é jeju góm lé shuq é hkûn, Hkrisduq é sui má chôm zùm bê a nghut kó lhú? Nga-nhúng, myhik hpê é muk lé zô é hkûn, Hkrisduq é gungdu má chôm zùm bê a nghut kó lhú? ¹⁷ Haî mù gâ le, muk htung ralhum za nghut mù, nga-nhúng gi, myo myo nghut kôle ragùng za nghut nyi lhê. Hkâsu mù gâ le, nga-nhúng banshoq bang gi, haú rahtung zâ é muk lé chôm gàm zô é bang chyat nghut lhê.

¹⁸ Israelaq byu pé é hkyô lé myit wú keq. Haú hkungga lé zô é bang gi, hkungga gyap má chôm lom é bang nghut lhê, a nghut kó lhú? ¹⁹ Hparà lhô, a nghut jáng, hparà lhô lé tîng byi é hkungga gi, rajung jung nghut lhê nghû, ngò taî é lhú? ²⁰ Haú su taî é a nghut, a lumjîng bâng é hkungga gi, Garai Gasang lé nhông byi é a nghut,

nat gâng pé lé tîng byi é ru nghut lhê. Ngò gi, nungmoq, nat gâng pé eq chôm zum nyi bang dut râ lé a ô nau é nghut lhê. ²¹ Nungmoq gi, haú Yhumsing é góm lé le, nat gâng pé é góm lé le, ge shuq râ a nghut; nungmoq gi, haú Yhumsing é zangbó má le, nat gâng pé é zangbó má le, rahá ge bo lòm râ a nghut. ²² Nga-nhúng gi, haú Yhumsing lé manôn nhâng nau é bang dut râ a nghut kó lhú? Nga-nhúng gi, Yhâng htoq je wúm bo é bang nghut lhê lhú?

Lumjîng Su É Luthkyô

²³ "Jung hkanmó kut râ ahkáng wó lhê." nghut kôlhang, jung hkanmó gi, akyû wó é a nghut. "Jung hkanmó kut râ ahkáng wó lhê." nghut kôlhang, jung hkanmó gi, byù lé wó kô làm nhang é a nghut.† ²⁴ Ó yuq le, yhumsing é gè hkyo matú ho é a nghut é za, góbâng é gè hkyo é matú hô râ dut lhê.

²⁵ Sho ûng gai má ûng é haî lé lé, úng-âng é myit èq a myi gôn é za zo keq. ²⁶ Hkâsu mù gâ le, "Myidàm htoq eq haú má joq é jung hkanmó gi, Yhumsing é chyat nghut lhê."* gâ tô ri.

²⁷ A lumjîng bang ra-am, nungmoq lé zang zo jì mù, nungmoq ê nau é nghut jáng, úng-âng é myit èq a myi gôn é za, nungmoq hí má to byi é gû lé zo keq. ²⁸ Nghut kôlhang, rayuq yuq, nungmoq lé, "Shi gi, hparà lhô lé tîng byi bê nghut lhê." ga taî kyô é nghut jáng, nungmoq lé taî kyo su é yanmai le, myit úng-âng é yanmai le, haú lé hkâzo kó. ²⁹ Úng-âng é myit haú gi, nungmoq é a nghut, góyuq é úng-âng é myit lé taî nau é ru nghut lhê. Ngá é luthkyô lé, haî mù góyuq é úng-âng é myit èq jéyáng é hui nhang lhê lhú? ³⁰ Ngò jeju bún é myit mai bo zo bo shuq yu é nghut jáng, Garai Gasang lé jeju hkya-on bê nghut é zoshuq hau é yanmai, haî mù lumu pyâm é ngò hui râ lhú?

³¹ Haú mù luî, nungmoq zo kôlhang, shuq kôlhang, haî kut kôlhang, Garai

† **10:23** Bun zo 23 mâ é dangngho gi, Korinhtuq byu pé lhaq taî é dang nghut lhê. * **10:26** Hkya-on 24:1

Gasâng é hpungwup shingkâng é matú chyat kut keq. ³² Ngò gi, yuq hkanmó lé, hkyô hkanmó má shikut luí myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasâng é noqkuq hpúng má é byù lé nghut nghut, ó yuq lé le myit hkâleqbat nhâng kó. ³³ Hkâsu mù gâ le, ngò gi, yhangmoq hkyi yu é wó hui kó sháng gaq nghû, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

11

¹ Ngò gi, Hkrisduq é alik châng é su, nungmoq gi, ngá é alik cháng keq.

Noqkuq É Má Htap Htuk Râ Hkyô

² Nungmoq gi, hkyô hkanmó má ngo lé bún nyi kô é yanmai le, nungmoq lé ngò lai byi bê mhoqshit hkyô pé lé myhik zing nyi kô é yanmai le, ngò, nungmoq lé hkya-ôn lhê.

³ Ahkuí, ngò, nungmoq lé sê hkyâng nhâng nau é hkyô gi: yuqgè hkanmó é ulhum gi, Hkrisduq nghut ri; myiwe hkanmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri. ⁴ Yuqgè hkanmó gi, kyûdûng le nghut nghut, myiqh-toi htoi le nghut nghut, yhâng é ulhum lé nghop tô é nghut jáng, yhâng é ulhúm é aróng lé lhoq hpoi pyâm é nghut bê. ⁵ Myiwe hkanmó gi, kyûdûng le nghut nghut, myiqh-toi htoi le nghut nghut, yhâng é ulhum lé a nghop tô é nghut jáng, yhâng é ulhúm é aróng lé lhoq hpoi pyâm é nghut bê. Haú gi, yhâng é ulhum lé wuq pyâm é eq rajung za nghut ri. ⁶ Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyâm ra rá nghut lhê. Nghut kôhang, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoi lhê nghut jáng, yhang gi, yhâng é ulhum lé nghop to ra rá nghut lhê. ⁷ Yuqgè gi, Garai Gasâng é azòng isâm eq hpungwup shingkang

nghut é yanmai, yhâng é ulhum lé a nghop rá é nghut lhê. Myiwe kúm gi, yuqge é hpungwup shingkang nghut ri. ⁸ Hkâsu mù gâ le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê. ⁹ Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqge é matú hpan tô é ru nghut lhê. ¹⁰ Haú nghut é yanmai le, maumang lagyo pé é yanmai le, myiwe gi, ahko ahkáng kumlhá đông yhâng é ulhum lé nghop rá dut lhê.

¹¹ Nghut kôhang, haú Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê. ¹² Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôhang, jung hkanmó gi, Garai Gasang mai lo é nghut lhê. ¹³ Myiwe rayuq, ulhum a nghop é za Garai Gasang lé kyûdûng é gi, htuk kô rá lú? Nungmoq, yhumsing gung é matú doqđân yù keq. ¹⁴ Yuqgè xâm hîng tô é nghut jáng, yhâng é matú aróng hpoi é hkyô dut é nghut kôle, ¹⁵ myiwe xâm hîng tô é nghut jáng, yhâng é matú hpungwup shingkang nghut é hkyô lé, htûnglí eq nungmoq lé mhoqshit lhê, a nghut kô lú? Hkâsu mù gâ le, xâm hîng tô é gi, nghop rá zè đông yhang lé byi tô é nghut lhê. ¹⁶ Rayuq yuq, haú hkyô lé taí dang-rháng nau é nghut jáng, ngamoq chyáng le, Garai Gasâng é noqkuq hpúng pé chyáng le, gotú htûnglí a joq é nghut lhê.

Yhumsing É Myinzang

¹⁷ Nungmoq é zuphpong pé gi, gè hkyô kut rá htoq má akyû a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut. ¹⁸ Sâng-hi má, noqkuq hpúng ralhum đông nungmoq zup zîng é hkûn, nungmoq hkaú má gam hkoq hkyô joq é lé wó gyô é nghut luí, têng é le bò rá nghû, ngò lumjîng lhê. ¹⁹ Ô pé gi, Garai Gasang o é hkyam shut

✧ 11:8 Apûn 2:21-23

nghut é lé wó shit râ matú, nungmoq ahkaú má gam hkoq lhum hkyô joq râ dut lhê. ²⁰ Nungmoq rahá zup zing kô é hkûn, nungmoq gi, haú Yhumsing é myinzang zô é a nghut kó. ²¹ Hkâsu mù gâ le, nungmoq zô é hkûn, góyuq lé le a lág é za, ó le ó hí yù zô akô. Haú mù, rayuq gi, zo mut huí nyì, góyuq gi, shuq wut to dut akô nghut ri. ²² Nungmoq gi, zo jang shuq jang yhûm a wó bang nghut akô lhú? Garai Gasâng é noqkuq hpúng lé wú tiq pyám kô é eq, a wó bang lé hoq hpu nhâng kô é, nghut akô lhú? Nungmoq lé ngò hkâsu nghû tái kó râ lhú? Haú pé é yanmai, ngò, nungmoq lé hkya-on râ lhú? Ratsuí lháng a wó dut!

²³ Hkâsu mù gâ le, haú Yhumsing chyáng mai ngò wó hap yu é gû lé, nungmoq lé hai byi bê nghut lhê: Haú Yhumsing Yesuq gi, Yhang lé ap pyám huí é myìn má, muk lé yù mù, ²⁴ jeju hkya-ôn é htâng má, haú lé myhik hpé mù, tái é gi, "Shî gi, nungmoq é matú Ngá é gungsho nghut lhê; Ngo lé bún nyì râ matú, shî su kut nyí keq." gâ ri. ²⁵ Haú eq rajung za, myinzang bàn zô é htâng má, Yhang gi, góm lé le yù mù, "Góm shî gi, Ngá é sui mâ é dangshikaq asik nghut lhê; hkâ-nhám le, nungmoq shî shuq é hkûn, Ngo lé bún nyì râ matú shî su kut keq." gâ tái ri. ²⁶ Hkâsu mù gâ le, nungmoq gi, muk shî lé zo luí, góm shî lé shuq é hkangmó, haú Yhumsing shî hkâm é hkyô lé, Yhang jé lé shoq, shit kyô nyì râ lhê.

²⁷ Haú mù luí, ó yuq nghut kôle, a gingdán é dông Yhumsing é muk haú lé zo mù, góm haú lé shuq é nghut jáng, haú Yhumsing é gungdu eq sui lé shut é mara wó bê nghut lhê. ²⁸ Haú mù, ó yuq le, muk zo góm shuq râ hí má, yhumsing gùng yhumsing jep wú ra râ nghut lhê. ²⁹ Hkâsu mù gâ le, ó yuq nghut kôle, haú Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhanggùng yhang mara zô bô shuq bo yu é nghut lhê. ³⁰ Haú nghut é yanmai, nungmoq mâ é byù myo myo

gi, wum nyhôm é, nõhpyo huí é nghut bum akô. Ra-am gi, shî ló byuq bekô nghut ri. ³¹ Nghut kôlhang, nga-nhúng gi, yhumsing gùng yhumsing hí sôn sê yu é nghut jáng tarâ jéyáng é hui râ a nghut. ³² Nga-nhúng gi, mingkan eq rahá, mara byí é a hui zo sháng gaq ga, nga-nhúng lé haú Yhumsing eq jéyáng é hkûn, nga-nhúng gi, mhoqshit é hui nyì gù bê nghut lhê.

³³ Haú mù luí, ngá é gumang wui ê, nungmoq gi, zo râ nghû rahá zup zing é hkûn, rayuq eq rayuq lág lhum keq. ³⁴ Nungmoq rahá zup zing é hkûn, jéyáng é a hui zo kó sháng gaq, rayuq yuq zòmut é nghut jáng, yhûm má zô chûng râ lhê.

Gotû myit tô é hkyô pé gi, ngò jé lé é hkûn sheq shit kyo râ nghut lhê.

12

Woi-nyí Hkyô Eq Sêng É Chyunghuq Pé

¹ Gumang wui ê, woi-nyí hkyô eq sêng é chyunghuq pé lé, nungmoq a sê gyo râ lé ngò a ô nau é nghut lhê.

² Nungmoq gi, a lumjing bang nghut nyí kô é hkûn lé, dang a nyo é hparà lhô noq râ matú hkyô shuí nghoq é hui kô é hkyô lé, nungmoq sê lhê.

³ Haú mù luí, "Yesuq gi, nhing pyám é hui sháng gaq." ga, Garai Gasâng é Woi-nyí mai tái é byù ó yuq le a nyí é eq, haú Chyoiyúng Woi-nyí mai za a nghut jáng, "Yesuq gi, Yhumsing nghut lhê." ga, ó yuq le a wó tái é nghut lhê nghû, ngò, nungmoq lé tái kyô é nghut lhê.

⁴ Woi-nyí hkyô eq sêng é chyunghuq ajung jung joq lhê; nghut kôlhang, Chyoiyúng Woi-nyí mai chyat nghut lhê. ⁵ Dojaú é hkyô ajung jung joq lhê; nghut kôlhang, Yhumsing rayuq lé za dojaú é nghut lhê. ⁶ Zui saí é hkyô ajung jung joq lhê, nghut kôlhang, Garai Gasang yhang za, byù lunglhang bang má, haú pé banshoq lé kut é nghut lhê.

⁷ Woi-nyí é hpông shit hkyô gi, byù pé é gè hkyô matú, yuq hkangmó lé

byi bê nghut ri. ⁸ Rayuq lé gi, Woi-nyí haú mai, hpaqchyí byéng-yá byíng é danglù byí é nghut ri; góyuq lé gi, Woi-nyí hau èq za, sumsé hpaqchyí byíng é danglù byí é nghut ri; ⁹ góyuq lé gi, Woi-nyí hau èq, lumjíng myit byí é nghut ri; dum góyuq lé gi, Woi-nyí hau èq, nò lhoq ge é chyunghuq byí é nghut ri; ¹⁰ dum, góyuq lé gi, hpung-wup a-tsam pé; dum, góyuq lé gi, myiqhtoi htoí é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng; dum, góyuq lé gi, dang haú pé é lichyúm taí sân kyô é ahkáng, byí é nghut ri. ¹¹ Chyunghuq haú pé banshoq gi, Woi-nyí hau èq za kut é loqmú chyat nghut mù, Yhang myit hpyit é dông yuq hkangmó lé haú pé tsing gàm byí é nghut ri.

Gungbun Myo Kôlhang, Ra Gùng Za

¹² Gungdu gi, gungsho showui showang pé myo myo lé pong tô é nghut kôlhang, ragùng za nghut ri; gungsho showui showang pé banshoq myo myo nghut kôlhang, gungdu ra gùng za dut tô é nghut ri. Haú eq rajung za, Hkrisduq eq le haú dông nghut ri. ¹³ Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yú bê bang nghut lhê.

¹⁴ Haú gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê. ¹⁵ Haú hkyí gi, "Ngò, loq a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut. ¹⁶ Dum, haú nohkyap gi, "Ngò, myoqjí a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut. ¹⁷ Ragùng dû é gi, myoqjí za nghut é nghut jáng, gyô é hkyô gi, hkâmá nghut râ l hú? Ragùng du é gi,

nohkyap za nghut é nghut jáng, shôm nam é hkyô gi, hkâmá nghut râ l hú? ¹⁸ Nghut kôlhang, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê nghut ri. ¹⁹ Gungsho showui showang gi, ra bun za nghut é nghut jáng, gungdu gi, hkâmá nghut râ l hú? ²⁰ Hkyak ga jang, gungsho showui showang pé myo kôlhang, gungdu gi, ragùng za nghut ri.

²¹ Haú myoqjí gi, loq lé, "Ngò, nang lé a ra!" nghû a ge taí. Haú ulhum gi, hkyí lé, "Ngò, nang lé a ra!" nghû a ge taí. ²² Haú za a nghut, gungdu mâ é gungsho showui showang pé má wum je nyhôm é su dut é pé le, a bò a ge é chyat nghut lhê. ²³ Hau htoq agó, hpau a lùm tap râ su myit ngam é gungsho showui showang pé lé, nga-nhúng je hpautap râ lhê. Haú a shit é jung gungsho pé lé, nga-nhúng hpautap é dông rago nghop râ lhê. ²⁴ Nga-nhúng é wó shit é gungsho pé kúm gi, haú hkyô a ra nghut ri. Nghut kôlhang, Garai Gasang gi, gungdû é gungsho showui showang pé lé pong to mù, aróng nyhum é lé, je riyhang aróng byi bê nghut ri. ²⁵ Haú mù, gungdu má gamhkuí lhôm é hkyô a bo é za, gungsho showui showang pé ralhum eq ralhum, rajung za kut wó myit tê byí lhum kó râ nghut lhê. ²⁶ Haú gungsho showui showang ralhum jamjau huí é nghut jáng, lhum hkangmó bo jamjau râ nghut lhê. Ralhum hpautap huí é nghut jáng, lhum hkangmó bo gabú é nghut lhê.

²⁷ Ahkuí, nungmoq gi, Hkrisduq é gungdu nghut kôluí, nungmoq yuq hkangmó gi, haú é gungsho showui showang pé nghut akô. ²⁸ Garai Gasang gi, noqkuq hpúng má, sâng-hi lé, lagyô pé, í lhum nghû râ má, myiqhtoi pé, sùm lhum nghû râ má, mhoqshit bang, hau htâng má, laklaí kumlhá pé kut râ bang, nò wó lhoq gê râ chyunghuq wó é bang lé le, góbang lé wó garúm é bang, shuí-u râ chyunghuq wó é bang, laklaí dang

ahú hú ge taí é bang lé, masat to bê nghut ri. ²⁹ Banshoq bang gi, lagyô pé nghut lhê lhú? Banshoq bang gi, myiqhtoi pé nghut lhê lhú? Banshoq bang gi, mhoqshit bang nghut lhê lhú? Banshoq bang gi, laklai kumlhá kut akô lhú? ³⁰ Banshoq bang gi, nô lhoq ge é chyunghuq wó é nghut lhê lhú? Banshoq bang gi, laklai dang ahú hú ge taí lhê lhú? Banshoq bang gi, dang haú pé é lichyúm ge taí sân kyô lhê lhú? ³¹ Nghut kôlhang, nungmoq gi, je gyaú é chyunghuq lé gyai yhang ô nau nyi keq.

Chyitdap Myit

Hau htoq agó, ahkuí, ngò, nungmoq lé, je gyaú dik é hkyô ralhum shit kôlé.

13

¹ Ngò gi, byu pé é eq maumang lagyô pé é myíng pé lé sê taí é nghut kôlhang, chyitdap myit a bo é nghut jáng, myíng hung htê bo é ut eq myíng tui htê bo é chapchéng su za dut byuq râ nghut lhê. ² Ngò gi, myiqhtoi htoi é chyunghuq, zaú tô é hkyô pé banshoq lé sê gyô é nyan, sumsé hpaqchyí banshoq lé wó é eq, bùm pé lé wó htot nhang é lumjínng myit bo é nghut kôlhang, chyitdap myit a bo é nghut jáng, ngò hai a nghut sú dut berâ nghut lhê. ³ Ngò gi, wó é sutze banshoq myùng bang lé byi pyâm é eq, ngá é gungdu lé nyhé pyâm râ matú ap pyâm é nghut kôlhang, chyitdap myit a bo é nghut le gi, hai akyú a bò nghut ri.

⁴ Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a taí, a nghutbún é nghut lhê. ⁵ Chyitdap myit gi, hpau a dap é hkyô a kut, yhumsing é akyú baú za a hô, lui za nhikjum a yo, shut é mara a matsíng é nghut lhê. ⁶ Chyitdap myit gi, agè ashop é má a gabú é za, haú tengmán hkyô má gabú nyi ri. ⁷ Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

⁸ Chyitdap myit gi, hkâ-nhám le htúm byuq é a nghut. Myiqhtoi htoi é hkyô pé gi, byuq byuq râ nghut lhê; laklai dang ahú hú ge taí é hkyô gi, zim byuq râ nghut lhê; sumsé hpaqchyí hkyô gi, lai ló byuq râ nghut lhê. ⁹ Hkâsu mù gâ le, nga-nhúng sê é gi, ra-am rahtâng ru nghut lhê. Nga-nhúng myiqhtoi htoi é gi, ra-am rahtâng ru nghut lhê. ¹⁰ Nghut kôlhang, gumjup hkyô jé lé é hkún, a gumjup hkyô gi, byuq byuq râ nghut lhê. ¹¹ Ngò, zoshâng nghut ashí hkún gi, zoshâng dông dang taí, zoshâng dông myit, zoshâng dông myit sôn wú é nghut lhê. Ngò, suwún nghut jáng gi, zoshâng nyi yap hkyô pé lé tô pyám bê nghut lhê. ¹² Ahkuí, nga-nhúng gi, myoqjâm hkaú mâ é rago a sân é wupzo lé za myàng é nghut lhê; nghut kôlhang, htâng má, myoqdong hkyúm wó myàng râ nghut lhê. Ahkuí, ngò gi, ra-am rahtâng za sê é ru nghut lhê; nghut kôlhang, Garai Gasang gi, ngo lé gumjup shoq sê é su, ngò le, htâng má, gumjup shoq sé râ nghut lhê.

¹³ Ahkuí, lumjínng myit, myit myoqbyu hkyô, chyitdap myit shi sùm lhum myit tô ri. Nghut kôlhang, haú pé mâ é kô dik é gi, chyitdap myit nghut ri.

14

Myiqhtoi Htoi É Chyunghuq Pé Eq Laklai Dang Nyo É Chyunghuq Pé

¹ Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyi keq. Myiqhtoi htoi é chyunghuq lé je riyhang myit o nyi keq. ² Hkâsu mù gâ le, laklai dang ahú hú nyo é sú ó yuq le, byù lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haú Woi-nyí eq nyo htoq é nghut ri. ³ Nghut kôlhang, myiqhtoi htoi é sú yuq hkangmó gi, byu pé lé wum byi dang eq nhik títng dang taí ri. ⁴ Laklai dang rahú nyo é sú gi, yhumsing gùng lé htuqbang byi ri, nghut kôlhang, myiqhtoi htoi é sú gi, noqkuq

hpúng lé htuqbang byî ri. ⁵ Ngò gi, nungmoq yuq hkangmó laklaí dang ahú hú pé nyò râ lé ô nau ri, nghut kôlhang, nungmoq myiqhtoi htoi râ lé je ô nau é nghut lhê. Hkâsu mù gâ le, laklaí dang ahú hú nyo é sù gi, haû noqkuq hpúng lé wó htuqbang râ matú, lichyúm lé taí sân kyô é za a nghut jáng, myiqhtoi htoi sù gi, yhang htoq je gyaú é nghut lhê.

⁶ Ahkuí, gumang wuì ê, ngò gi, nungmoq chyáng lé jé mù, laklaí dang pé nyo é nghut kôle, shing-rán nghut nghut, sumsé hpaqchyî nghut nghut, myiqhtoi dang nghut nghut, mhoqshit dang nghut nghut, nungmoq lé a taí kyô é nghut le gi, nungmoq é matú ngò hai akyû htoq râ lhú? ⁷ Htê lhoq htoq é asak a bo jung zè pé má lhang gi, sampyí nghut nghut, títng nghut nghut, gam hkoq tô é htê a joq é nghut jáng, mut myhíng bat myhíng é htê haí nghut é lé, hkâsu wó sé râ lhú? ⁸ Dum, tut htê le gam hkoq é đông a mut kyô é nghut jáng, majan htoq râ rì rì ó yuq wá hên râ lhú? ⁹ Nungmoq chyáng le haú đông nghut lhê. Nang, laklaí dang ahú hú nyo le, sê gyô é danghkun mai nyo é za a nghut jáng, nang haí taí nyi é lé ó yuq wá hkâsu wó sé râ lhú? Nungmoq gi, maulat má za taí hâng pyâm nyi kó râ nghut lhê. ¹⁰ Mingkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê. ¹¹ Haû mù luí, rayuq yuq haí taí nyi é lichyúm lé ngò a dat chyup é nghut jáng, ngò gi, haû dang taí su é matú maigan byù dut mù, yhang gi, ngá é matú maigan byù dut é nghut lhê. ¹² Nungmoq chyáng le haú đông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyi bekô nghut mù, haû noqkuq hpúng lé kô myhâng nhang é chyunghuq pé lé je ho shikut nyi keq.

¹³ Haû nghut é yanmai, laklaí dang ahú hú taí é sù ó yuq le, yhang haû taí é lichyúm wó taí sân kyo sháng

gaq, kyûdung râ dut lhê. ¹⁴ Hkâsu mù gâ le, laklaí dang ahú hú đông ngò kyûdung é nghut jáng, ngá é woi-nyí mai dúng é nghut lhê; nghut kôlhang, ngá é myitnyân é matú, hai akyû a wó nghut ri. ¹⁵ Haû mù, ngò hkâsu kut râ lhú? Ngò gi, ngá é woi-nyí mai le kyûdung râ, ngá é myitnyan mai le kyûdung râ nghut lhê; ngò gi, ngá é woi-nyí mai le mahkôn hkôn râ, ngá é myitnyan mai le mahkôn râ nghut lhê. ¹⁶ Nungmoq gi, nungmoq é woi-nyí mai za Garai Gasang lé hkya-on kô é nghut jáng, a sê gyô é bang mâ é rayuq gi, nungmoq haí taí é lé a sê é nghut mù, nungmoq jeju hkya-ôn é hkûn, "Amen" ga hkâsu wó taí râ lhú? ¹⁷ Nungmoq gi, ge dik shoq jeju hkya-on kô é abe, nghut kôlhang, góbang gi, htuqbang é a hui kó nghut ri.

¹⁸ Ngò gi, nungmoq banshoq bâng htoq má laklaí dang ahú hú je wó taí é yanmai, Garai Gasang lé jeju bûn ri. ¹⁹ Nghut kôlhang, noqkuq hpúng má, laklaí dang rahú đông danghkun ramun ngò taí râ htoq má, góbang lé mhoqshit râ akyû bo é dang ngo hkun taí râ lé ngò je ô nau ri.

²⁰ Gumang wuì ê, zoshâng wuì su myit nyi é lé nô pyám keq. Agè ashop hkyô eq sêng é má gi, nyheqnú đông kut mù, nungmoq myit é hkyô má gi, ko bang đông kut keq. ²¹ Haû jep é tarâ má kê tô é gi,

"A wó gyô wú é dang đông mai le, góming byu pê é nhutwuì đông mai le, byù shí bang lé ngò taí râ nghut lhê;

nghut kôlhang, yhangmoq gi, ngá dang gyo kó râ a nghut.'

ga Yhumsîng taí ri."✠
gâ ri.

²² Haû mù, laklaí dang ahú hú nyo é hkyô gi, lumjîng bâng matú kumlhá a nghut é za, a lumjîng bâng matú sheq ru nghut lhê. Myiqhtoi dang kúm gi, a lumjîng bâng matú a nghut é za, lumjîng bâng matú sheq ru nghut lhê. ²³ Haû nghut mù, noqkuq hpúng gón chôm zing mù, yuq hkangmó

laklaí dang ahú hú nyò kô é nghut jáng, a sê gyô é bang nghut nghut, a lumjǐng é bang nghut nghut, wang lé kô é hkùn, yhangmoq gi, nungmoq nâ bùm bekô ga a taí kó râ nghut lhê lhú? ²⁴ Nghut kôlhang, yuq hkangmó, myiqhtoi dang taí nyi é u má, a lumjǐng sũ nghut nghut, a sê gyô é sũ nghut nghut, wang lé é nghut jáng, yhang gi, yubak dap sũ rayuq nghut é lé, banshoq èq lhoq pùn kyǐng é hui râ eq, banshoq èq jéyáng é hui râ nghut é htoq agó, ²⁵ yhâng é i-myt má zaú tô é hkyô pé lé de de lhoq htoq shit é hui râ nghut lhê. Haú mù, yhang gi, ngóm gop luí, Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga taí pyo htoq kat râ nghut lhê.

Shuq Shuq Tap Tap Za Noqkuq Râ Hkyô

²⁶ Haú jáng, gumang wui ê, nganhúng haí taí râ lhú? Nungmoq rahá lé chôm zǐng é hkùn, yuq hkangmó gi, Garai hkyá-on mahkôn nghut nghut, mhòqshit é dang nghut nghut, shing-rán nghut nghut, laklaí dang ahú hú nyo é hkyô nghut nghut, taí sân kyô é nghut nghut pé lé, wó le ge ri. Haú pé banshoq gi, noqkuq hpúng lé wum-o byi râ matú chyát kut é dut râ lhê. ²⁷ Rayuq yuq, laklaí dang ahú hú nyo é nghut jáng, í yuq eq myô htum sum yuq mai a laí é za, rayuq htàng rayuq nyò râ dut é htoq agó, rayuq yuq haú lé taí sân kyo ra râ dut lhê. ²⁸ Taí san kyô é sũ a nyi é nghut jáng, laklaí dang ahú hú nyo é sũ gi, noqkuq hpúng má zim za nyi râ dut mù, yhânggùng yhang eq Garai Gasang lé za nyo râ dut lhê.

²⁹ Myiqhtoi í yuq nghut nghut, sum yuq nghut nghut taí kyo râ dut lhê; góbang gi, haí taí é lé rago gyô chyam wú râ dut lhê. ³⁰ Nghut kôlhang, zung tô é sũ rayuq yuq chyáng shing-rán jé é nghut jáng, hí taí nyi é sũ gi, nô byuq râ dut lhê. ³¹ Hkâsu mù gâ le, yuq hkangmó gi, mhòqshit é eq myit wum byi é wó hui kó sháng gaq, nungmoq banshoq bang gi, rayuq htàng rayuq

myiqhtoi wó htoi é nghut lhê. ³² Haú myiqhtoi pé é woi-nyí pé gi, myiqhtoi pé uphkang é a-ô má nghut nyi ri. ³³ Hkâsu mù gâ le, Garai Gasang gi, atau ahú dut é Garai Gasang a nghut é za, nguǐngón hkyo é Garai Gasang ru nghut lhê.

Sân-yúng bâng zing tô é hpúng banshoq má é eq rajung za, ³⁴ myiwe wui gi, noqkuq hpúng pé má zim za nyi râ dut lhê. Yhangmoq gi, dang taí ahkáng a wó é nghut mù, haú jep é tarâ má bo é eq rajung za a-ô má nyi kó sháng gaq. ³⁵ Yhangmoq gi, rajung jung sé naú kô é nghut jáng, yhùm má yhangmoq é yhumsǐng hpô pé chyáng myi kó sháng gaq; hkâsu mù gâ le, myiwe rayuq noqkuq hpúng má dang taí é gi, ahoq ahí hkyô nghut ri.

³⁶ Haú Garai Gasang é mungdang gi, nungmoq chyáng mai htoq lo é nghut lhê lhú? Haú gi, nungmoq chyáng za lé jé bê nghut lhê lhú? ³⁷ Rayuq yuq, yhang gi, myiqhtoi, a nghut jáng, woi-nyí chyunghuq byi é hui sũ nghut lhê ga myit é nghut jáng, ngò, nungmoq lé ká byi é pé gi, haú Yhumsǐng é hkunmó nghut é lé, yhang sê yù sháng gaq. ³⁸ Yhang gi, haú lé haí su a ngàm kut é nghut jáng, yhânggùng le, haí su a ngàm kut é hui zo râ nghut lhê.

³⁹ Haú mù luí, ngá é gumang wui ê, myiqhtoi htoi râ lé ô nau nyi mù, laklaí dang ahú hú nyo é lé hkâhkùm pyám kó. ⁴⁰ Nghut kôlhang, jung hkangmó gi, htuk é dōng eq shuq shuq tap tap zâ é hkyô dōng kut é dut râ lhê.

15

Hkrisduq É Dui Toq Hkyô

¹ Gumang wui ê, ngò, nungmoq lé hko kyo bê nghut mù, nungmoq le hap yù luí, nungmoq yap gǐng tô é jowò nghut é gabú danglù hkyô lé, ahkuí, ngò, nungmoq lé lhoq pùn kat nau ri. ² Ngò, nungmoq lé hko kyo bê é mungdang lé, nungmoq gǐng gǐng myhik zing nyi kô é nghut jáng, nungmoq gi, gabú danglù hau é yanmai

hkyi yù huí é nghut akô. Haú a nghut jáng, nungmoq lumjínng é gi, akôm dut bê nghut lhê.

³ Ngò hap yu tô é pé lé, sâng-hi ahkyak é dông, ngò, nungmoq lé lhai byi bê nghut lhê. Haú pé gi: Chyúmdang eq rajung za, Hkrisduq gi, nga-nhông é yubak marâ é matú shí hkám byi bê gâ é nghut ri; ⁴ Yhang gi, myhup yhôm é hui luí, Chyúmdang eq rajung za sum nyí nghu é nyí má lhoq dui toq é hui bê nghut mù, ⁵ Petruq lé htoq shit luí, haú lagyo raxe í yuq lé le htoq shit ri. ⁶ Hau htâng má, Yhang gi, ra-u má za, gumang wui ngo shô yuq chyân lé htoq shit ri. Haú bang má é myo hpyang gi, ahkuí jé shoq asak dui nyi bum akô; ra-am kúm gi, shi ló byuq bekô nghut ri. ⁷ Hau htâng, Yhang gi, Yakuq lé htoq shit mù lagyo pé banshoq bang lé htoq shit ri. ⁸ Ló htâng má, Yhang gi, hkû buinyi a jé shí é má hku é dông nghut sù ngo lé le htoq shit bê nghut ri.

⁹ Hkâsu mù gâ le, ngò gi, lagyo pé má é tiq dik sù nghut lhê. Haú Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghu rá lhang a gingdán é sù nghut lhê. ¹⁰ Nghut kôlhang, ngò ahkuí ísu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za, ngò gi, yhangmoq banshoq bâng htoq má je riyhang mù wùn waq shikut lhê. Haú gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê. ¹¹ Haú mù luí, ngò nghut nghut, yhangmoq nghut nghut, ngamoq hko kyô é gi, haú hkyô chyat nghut lui, nungmoq lumjínng é le, haú hkyô nghut ri.

Shi Byuq Bâng É Dui Toq Hkyô

¹² Nghut kôlhang, haú Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq má é ra-am gi, shi byuq bâng é dui toq hkyô a joq nghu, hkâsu wó tái kó rá lú? ¹³ Shi byuq bâng é dui toq hkyô a joq é ru nghut le gi, Hkrisduq le lhoq dui toq é hui berâ a nghut. ¹⁴ Hau

htoq agó, Hkrisduq gi, lhoq dui toq é a huí é ru nghut le gi, ngamoq hko kyô é hkyô eq, nungmoq é lumjínng hkyô gi, akôm dut byuq rá nghut lhê. ¹⁵ Hau htoq agó, Garai Gasang gi, haú Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq rá za nghut lhê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat rá a nghut. ¹⁶ Hkâsu mù gâ le, haú shi byuq bang lhoq dui toq é a huí é nghut jáng, Hkrisduq le, lhoq dui toq é hui berâ a nghut. ¹⁷ Hkrisduq gi, lhoq dui toq é a huí é nghut jáng, nungmoq é lumjínng hkyô gi, akôm dut luí, nungmoq gi, nungmoq é yubak mara hkaú má ru nyi nyi shi kó rá nghut lhê. ¹⁸ Haú nghut jáng, Hkrisduq má shi ló byuq bê bang le, htên byoq byuq rá za nghut lhê. ¹⁹ Nga-nhông gi, shí ipyat lhê é matú za, Hkrisduq má myit myoqbyù hkyô wó é nghut jáng, byù banshoq bâng htoq má shogyo rayhup dut é je hui zo bang dut kó rá nghut lhê.

²⁰ Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi ló byuq bâng é sâng-hi ashi dut bê nghut ri. ²¹ Hkâsu mù gâ le, shí-nò hkyô gi, byù rayuq dông mai lò bê nghut é eq rajung za, shi byuq bâng é dui toq hkyô le, byù rayuq dông mai lo é nghut lhê. ²² Hkâsu mù gâ le, lhunglhang bang gi, Adam é yanmai shi byuq é su, lhunglhang bang gi, Hkrisduq eq rading ralhú za nghut é yanmai lhoq dui toq é hui rá nghut lhê. ²³ Nghut kôlhang, yuq hkanmó gi, ó le ó âng é hkûn lhoq dui toq é hui rá nghut lhê: Hkrisduq gi, sâng-hi lhoq dui toq huí é sù nghut lhê. Hau htâng má, Yhang jé lé é hkûn, Yhang eq sêng é bang lhoq dui toq é hui rá nghut lhê. ²⁴ Hau htâng, jihâm jé rá nghut lhê; haú hkûn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haú Íwa

nghut sù Garai Gasang lé mingdán ap byi râ nghut lhê. ²⁵ Hkâsu mù gâ le, Yhang gi, Yhâng é gye pé banshoq lé, Yhâng é hkyî wang ô má tô pyâm é hkûn jé shoq up nyi ra râ nghut lhê. ²⁶ Haû lhoq htên pyâm é hui râ nghut é ló htâng é gye gi, shî-nò hkyô nghut ri. ²⁷ Hkâsu mù gâ le, "Garai Gasang gi, jung hkanmó lé, Yhâng é hkyî wang ô má tô pyâm bê nghut ri."* gâ Chyúmdang má kâ tô ri. "Jung hkanmó lé" Yhâng é a-ô má tô pyâm bê ga taí é hkûn, jung hkanmó lé Hkrisduq é a-ô má tô pyâm bê sù Garai Gasang yhang kúm a lom é hkyô, san za nghut nyi ri. ²⁸ Yhang gi, haû hkyô ban kut é htâng má, haû Zo yhang le, jung hkanmó lé Yhâng é a-ô má to byi bê sù Garai Gasang é a-ô má nyi sù dut nhang é hui râ nghut mù, Garai Gasang gi, lhunglhâng htoq má gyaú sù nghut luí, lhunglhâng lé sîng sù nghut râ nghut lhê.

²⁹ Dui toq hkyô a joq é ru nghut le gi, shi byuq bê bâng é matú wui-myhup hkám byi bùm kô é gi, hai akyû bò kó râ lhú? Haû shi byuq bang lhoq dui toq é a hui kô é ru nghut le gi, yhangmoq matú haí mù byu pé wui-myhup hkám yù kó râ lhú? ³⁰ Ngamoq gi, ngamoq é matú, hkyíng hkanmó haí mù chiq râ jowò má nyi râ lhê lhú? ³¹ Gumang wui ê, ngò gi, nyí wui aluq shoí shoí shi é hui zô é nghut lhê. Haû su nghû é gi, nganhûng é Yhumsîng Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê. ³² Ngò gi, xângzo hkyam dông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyû bò râ lhú? Shi byuq bang lhoq dui toq é a huí é ru nghut le gi,

"Nga-nhúng gi, napmá shî râ nghut é yanmai,

zo sháng, shuq sháng."*

ngû râ za nghut lhê.* ³³ "A ge é zùm yap luzúm wui gi, ge é nyi yap sâmlai lé hten nhang é nghut lhê." gâ

é sanghkyang eq rajung za, hkyô shuí nghoq é hkâhui zo kó! ³⁴ Nungmoq gi, tau bún gyîng lò mù, mara hkâkut shut lo kó; hkâsu mù gâ le, Garai Gasang lé a sê é byù ra-am nyi akô. Ngò haû su nghû taí é gi, nungmoq hoq bun râ matú nghut lhê.

Dui Toq É Gungdu

³⁵ Nghut kôlhâng, rayuq yuq gi, "Haû shi byuq bê bang, hkâsu kut lhoq dui toq é hui kó râ lhú? Yhangmoq gi, hkasû é gungdu nghut kó râ lhú?" ga myi râ nghut lhê. ³⁶ Haû-í nghâ sù ê! Nàng hô hkyô kat é pé gi, shi byuq é za a nghut jáng, yuq htoq lô râ a nghut mhaí. ³⁷ Nàng, kyô hkyô é hkûn, yuq lò râ nghut é agàm lé hô hkat e a nghut é za, sungso amyui nghut nghut, gotû amyui rajung jung nghut nghut lé za hô kat é ru nghut lhê. ³⁸ Nghut kôlhâng, Garai Gasang gi, Yhang myit hpyit to bê eq rajung za haû lé gungdu ralhum byi mù, kyôshi myui hkanmó lé, ó le ô é gungdu byi ri. ³⁹ Gungsho lhunglhâng gi, rajung za a nghut. Byù pé é gungsho gi, rajung, dusak pé é gi, gó jung, nghoq pé é gi, gó jung, ngozo pé é gi, gó jung ru nghut lhê. ⁴⁰ Mauhkûng gùng pé le joq é nghut luí, myidam gùng pé le joq ri; nghut kôlhâng, mauhkûng gùng pé é shing kang gi, rajung, myidam gùng pé é shing kang gi, gó jung ru nghut lhê. ⁴¹ Haû buí má bo é shing kang gi, rajung, lhamó mâ é gi, gó jung, kyí pé mâ é gi, gó jung ru nghut lhê; kyí racham eq rachâm é shing kang le gotû tú shai lhum lhê.

⁴² Haû mù, shi byuq bê bâng é dui toq hkyô le, haû eq rajung za nghut ri. Haû hô hkyô kat é gungdu gi, htên byoq sê é nghut luí, lhoq dui toq huí é gungdu kúm gi, htên byoq a sê é nghut lhê. ⁴³ Hô hkyô kat é hkûn gi, aróng a bò, lhoq dui toq huí é hkûn gi, hpungwup shing kang bo ri. Hô hkyô kat é hkûn gi, wum nyhóm mù, lhoq dui toq huí é hkûn gi, a-tsam bo ri.

* 15:27 Hkya-on 8:6 * 15:32 Esai 22:13 *

15:32 Dang ngho shî gi, a lumjîng bang taí é dang

44 Gungsho gungdu gi, hô hkyô é hui mù, woi-nyí gungdu gi, lhoq dui toq é huí ri.

Gungsho gungdu joq é nghut le gi, woi-nyí gungdu le joq é nghut lhê. 45 Haú nghut mù, "Haú sâng-hi yuq byù Adam gi, asak dui é xângzo dut bê nghut ri."* ga kê tô ri. Haú ló htâng é Adam kúm gi, asak byí é woi-nyí nghut ri.† 46 Haú woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê. 47 Haú sâng-hi yuq byù gi, myidàm mâ é tseyûn lé saí é nghut mù, htang lhê yuq byù gi, mauhkûng htoq mâ é nghut ri. 48 Haú myidàm byù nghut sù su, myidàm eq sêng é bang le nghut nyi akô; haú mauhkûng htoq mâ é byù nghut sù su, mauhkûng eq sêng é bang le nghut nyi akô. 49 Nga-nhúng gi, myidàm byù é gunghkyâng isâm lé hkam yù bê nghut é su, mauhkûng htoq mâ é byu é gunghkyâng isâm lé le myang hkam yù râ nghut lhê.

50 Gumang wui ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yù râ a nghut, htên byoq sê é le, htên byoq a sê é silí wunlí lé wó yù râ a nghut. 51 Gyo to keq, zaú tô é hkyô lé, ngò, nungmoq lé taí kyo kôlé: Nga-nhúng banshoq bang gi, shi byuq râ a nghut é za, htaí lhik é hui râ ru nghut lhê. 52 Haú gi, ló htâng é tut htê mying é hkûn, ralháp za, myoqkuq ralap má dut râ nghut lhê. Hkâsu mù gâ le, tut htê mying râ nghut lhê, haú hkûn, shi byuq bê bang gi, htên byoq a sê é shut lhoq dui toq yu é hui râ nghut mù, nga-nhúng gi, htaí lhik é hui râ nghut lhê. 53 Hkâsu mù gâ le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù râ dut é nghut lhê. 54 Haú htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkûn sheq, "Shî-nò hkyô gi, ûng budâng èq myui pyâm

é hui bê nghut ri."* ga kê tô é eq, 55 "Shî-nò hkyô ê, náng é ûng budang gi, hkâmá lhú? Shî-nò hkyô ê, náng é nyin gi, hkâmá lhú?"* gâ tô é sanghkyang gi, dik râ nghut lhê. 56 Haú shî-nò hkyô é nyin gi, yubak mara nghut ri; yubak marâ é a-tsam gi, jep é tarâ nghut ri. 57 Nghut kôlhang, Garai Gasang lé jeju hkyâ-ôn lhê! Yhang gi, nga-nhúng é Yhumsing Yesuq Hkrisduq dông mai, nga-nhúng lé ûng budang byí é nghut ri.

58 Haú mù luí, ngá é chytidap gumang wui ê, yap gingtîng nyi keq. Hai èq le, nungmoq lé hkâlhoq dui nún nhâng kó. Nungmoq gi, haú Yhumsing má nungmoq wùn waq é muzó akôm a nghut é lé sé kê é nghut lhê yanmai, haú Yhumsing é muzó lé ayang wùn waq shikut nyi keq.

16

Yerusalem Wà Mó Mâ É Lumjîng Bâng É Matú Alu Hkyuî Râ Hkyô

1 Ahkuí, Garai Gasâng é byu pê é matú alu hkyuî râ hkyô eq séng luí gi, haú Galatiq mau mâ é noqkuq hpûng pé lé ngò kut nhang é su kut keq. 2 Ngò jé lé é hkûn, alu hkyuî râ hkyô a kut ra râ dông, bat hkanmó mâ é sâng-hi nyí má, yuq hkanmó gi, yhumsing wó ho é má cháng mù, gam tô to lánq keq. 3 Ngò jé lé é hkûn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó má é dé nhâng râ nghut lhê. 4 Ngò le é ang râ dut é nghut jáng, yhangmoq gi, ngá é byinzùm kut râ nghut lhê.

Poluq Lum Kat É Hkyô Pé

5 Ngò gi, Makedoni mau laí byit é htâng, nungmoq chyáng jé lé râ nghut lhê. Hkâsu mù gâ le, ngò gi, Makedoni mau laí byit râ za nghut lhê. 6 Ngò hkâmá ê kôlhang, ngá é hkyowui má nungmoq wó garúm kat kó râ matú, ngò gi, rayoq zo nghut nghut, gy-oqmyò lhang lai shoq nghut nghut,

* 15:45 Apûn 2:7 † 15:45 Ló htâng é Adam gi, Yesuq lé taí nau é nghut lhê. * 15:54 Esai 25:8
* 15:55 Hos 13:14

nungmoq eq rahá nyi abe. ⁷ Ngò gi, laí ló uchyang za nungmoq lé lé kum râ nghut mù, ahkuí wó myâng râ lé a nau é nghut lhê; ngò gi, haú Yhumsîng dóng é nghut jáng, nungmoq eq rahá rayoq nyi râ lé myit myoqbyu lhê. ⁸ Nghut kôlhang, ngò gi, Penteko-ti poi buinyi jé shoq Ehpesu myuq má nyi râ nghut lhê. ⁹ Haí mù gâ le, ngo lé htuoq htîng é bang myo myo nyi é nghut kôlhang, akyû htoq é muzó é matú hkum mó ngo lé hpông to byi é yanmai nghut lhê.

¹⁰ Timohti jé lé jáng, yhang, nungmoq eq rahá nyi é u má, gyuoq é hkyô haí le a joq râ matú wú byi keq; hkâsu mù gâ le, yhang gi, haú Yhumsîng é muzó lé, ngò su wùn waq wún é sù nghut lhê. ¹¹ Haú mù, ó yuq le, yhang lé hkâwú shóm kó. Yhang gi, ngá chyáng wó dum taú jé sháng gaq, yhâng é hkyowuì má nguínón é dông nhang kat keq. Haú gumang wuì eq rahá lò kó râ lé, ngò myit láng nyi lhê.

¹² Ahkuí, nga-nhông é gumang Apolo é hkyô eq séng luí ga jang; yhang gi, haú gumang wuì eq rahá nungmoq chyáng lé râ lé, ngò, gyai yhang wum taí tsuq lhê. Yhang kúm gi, ahkuí lé nau é myit a dê bò shi, nghut kôlhang, yuqyo é ahkyíng wó jáng, yhang lé lô râ nghut lhê.

¹³ Machya nyi keq; lumjínng hkyô má ging ging tíng tíng yap nyi keq; gyuoq kyum myit hkâbô kó; wum bo nyi keq. ¹⁴ Jung hkangmó lé, chyitdap myit eq zui saí keq.

¹⁵ Stehpana eq yhâng é yhumbyù wuì gi, Ahkaia ming má sâng-hi hpúng wâng bang nghut luí, yhangmoq gi, yhumsîng gùng lé, haú sân-yúng bâng é dojaú hkyô má ap nóng bekô lé, nungmoq sê akô nghut ri. Gumang wuì é, ngò, nungmoq lé wum taí tsuq kat kôlé, ¹⁶ haú sù é bâng é a-ô má le, haú muzó má bo wang lòm mù, mú zui shikut bang yuq hkangmó é a-ô má le, nyi keq. ¹⁷ Ngò gi, Stehpana, Hportunatu eq Ahkaiku pé jé lo é hkûn, gyai gabú é nghut lhê, haí mù gâ le, yhangmoq gi, nungmoq a

kut byi é hkyô lé, lhoq pyíng byi bekô nghut ri. ¹⁸ Hkâsu mù gâ le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haú sù é bang lé, hpautap nyi keq.

Ló Htông É Shi-kyâm Dang

¹⁹ Asia mau mâ é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhùm má chôm huí é noqkuq hpúng lé, haú Yhumsîng má nungmoq lé gyai yhang shi-kyâm kat akô. ²⁰ Shí má nyi é gumang wuì banshoq bang gi, nungmoq lé shi-kyâm kat akô. Rayuq eq rayuq chyoiyúng é chyitpuq eq shi-kyâm lhum keq.

²¹ Ngò, Poluq gi, shi-kyâm dang shí lé, ngá é loq eq yhang ká é nghut lhê.

²² Rayuq yuq, haú Yhumsîng lé a chyitdap é nghut jáng, haú yuq gi, nhîng pyâm é hui sháng gaq. Yhumsîng ê, jé lé aq hkoi!

²³ Haú Yhumsîng Yesuq é jeju gi, nungmoq eq rahá nghut nyi sháng gaq.

²⁴ Ngá é chyitdap myit gi, Hkrisduq Yesuq má nungmoq banshoq bâng chyáng joq nyi sháng gaq. Amen.

KORINHTUQ Pê Chyáng Htang Dàm Hun Kat é Laiká (2 Corinthians)

¹ Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhúng é gumang Timohti le kut, Korinhtuq myuq mâ é, Garai Gasâng é noqkuq hpúng lé le, Ahkaia mau gón mâ é sân-yúng bang banshoq chyáng le, dang kyô kat lhê: ² Nga-nhúng é Íwa nghut é Garai Gasang eq haû Yhumsîng Yesuq Hkrisduq chyáng mâ é jeju eq ngu-ingón hkyô gi, nungmoq chyáng ru joq nyî sháng gaq.

Nhik tíng hkyô banshoq é Garai Gasang

³ Nga-nhúng é Yhumsîng Yesuq Hkrisduq é Yhângwa eq Garai Gasang, shogyo nhikmyin hkyo é Íwa eq nhik tíng hkyô banshoq é Garai Gasang gi, hkya-on kungton é huî nyî sháng gaq. ⁴ Garai Gasâng chyáng mai ngamoq wó yû bê nghut é nhik tíng hkyo èq, hkasû é wuîhke hkyô hui bang lé le nga-nhúng wó nhik tíng byi sháng gaq ga, Yhang gi, ngamoq é wuîhke hkyô banshoq má nhik tíng byî ri. ⁵ Hkâsu mù gà le, Hkrisduq hui zô é jamjau hkyô myo myo lé ngamoq bo hui zô é su, Hkrisduq dông mai, ngamoq é nhik tíng hkyô le byíng mui nyi é nghut lhê. ⁶ Ngamoq, myit myo uhkyî é huî é nghut jáng, nungmoq é nhik tíng hkyô eq hkyi yù hkyo é matú nghut nyi ri; ngamoq, nhik tíng é huî é nghut jáng, nungmoq é nhik tíng hkyo é matú nghut luî, haû gi, ngamoq jamjau é eq rajung za nghut é jamjau hkyô lé, myit hing é dông mai wó jân pyám rà a-tsam, nungmoq chyáng lhoq htoq byî é nghut lhê. ⁷ Haû mù, ngamoq é jamjau hkyô pé má nungmoq bo lòm bekô nghut é su, ngamoq é nhik tíng hkyô má le nungmoq bo lòm bekô nghut é hkyô

lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

⁸ Gumang wuî ê, Asia mau má, wuîhke jamjau é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lháng htum shoq hpuzô é nghut luî, ngamoq gi, asak duì lo rà lháng a myit myoqbyu lô é nghut lhê. ⁹ Gè gè yhang, ngamoq gi, sat hui berâ nghû, ngamoq é i-myit má lumjîng pyâm é nghut lhê. Nghut kôlhang, haû gi, ngamoq gùng ngamoq a lumhkau é za, shî bê bang lé lhoq duì toq sù Garai Gasang lé lumhkaû rà matú dut é nghut lhê. ¹⁰ Garai Gasang gi, haû sù é shî rà hkyô mai hkyi yù bê nghut mù, ngamoq lé hkyi yù rà za nghut lhê. Yhang gi, ngamoq é matú nungmoq kyûdung byî nyi é u má, xoq luî ngamoq lé hkyi yù rà za nghut lhê nghû, ngamoq gi, Yhang lé myit myoqbyu to bê nghut luî, ¹¹ myo myo kyûdung byî é lé gyo byî é má ngamoq shimân jeju wó mù, byù myo myo gi, ngamoq wó é shimân jeju é yanmai Garai Gasang lé jeju hkya-on kó rà nghut lhê.

Poluq, Hen Tô É Muzó Htaî Pyâm É Lé Tai Hung É Hkyô

¹² Ngamoq nghutbùn é gi, Garai Gasâng chyáng mâ é chyoiyúng hkyô eq lhumzui hkyô má, mingkan zo wuî eq ngamoq asak duì bê hkyô lé le, je luî nungmoq eq zùm yap é hkyô lé le, ngamoq é myit sôn sê é hkyo èq, saksé hkám byî é hkyô nghut lhê. Ngamoq haû su kut é gi, mingkan hpaqchyî byéng-yá dông mai kut é a nghut é za, Garai Gasâng é jeju dông mai kut é ru nghut lhê. ¹³ Hkâsu mù gà le, ngamoq gi, nungmoq a dat nghap é eq a sê gyô é haî le a ká byî kat é nghut lhê. Ngò, myit myoqbyu kat é gi, ¹⁴ nungmoq gi, ngamoq é hkyô ra-am lé wó sê gyô yù bê eq rajung za, haû Yhumsîng Yesuq é buinyî má nungmoq é hkyô lé ngamoq nghutbun rà nghut é su, ngamoq é hkyô lé nungmoq wó nghutbun rà matú,

nungmoq, banshoq lé sê gyo kó râ nghut lhê.

¹⁵ Haú hkyô lé, ngò hkyak myit lum to bê nghut é yanmai, nungmoq gi, akyû í dam wó hkam yù kó sháng gaq nghû, ngò gi, nungmoq chyáng hí lé kum râ matú hen to bê nghut lhê. ¹⁶ Ngò gi, Makedoni mau shut e ló é hkyowuì má nungmoq lé hí lé kum mù, Makedoni mau mai nungmoq chyáng dum taû lò luì, Yuda mau shut e é hkyowuì má, nungmoq, ngo lé garúm kat kó râ lé myit lum to bê nghut lhê. ¹⁷ Ngò gi, haú hkyô hen é hkûn, agon za hen hkyut é nghut lhê lhú? Haú a nghut jáng, ngò hen é pé gi, ra-u má za, "Nghut lhê, nghut lhê." nghû é eq, "A nghut, a nghut." nghu é wó taí râ matú, mingkan myit đông hen é nghut lhê lhú?

¹⁸ Gè gè yhang, Garai Gasang gi, lhumzui sù yhang nghut é eq rajung za, ngamoq é danglù gi, nungmoq chyáng "Nghut lhê" lé, "A nghut" nghu é a nghut. ¹⁹ Hkâsu mù gà le, ngo èq le, Sila èq le, Timohti èq le, nungmoq chyáng hko kyo bê nghut é sù, Garai Gasang é Yhangzo Yesuq Hkrisduq gi, "Nghut lhê" nghu é eq "A nghut" nghu é sù a nghut é za, Yhang má gi, hkâ-nhám le "Nghut lhê" nghu é za joq lhê. ²⁰ Hkâsu mù gà le, Garai Gasang gi, danggidiq hkâ-myhó to kôle, haú pé gi, Hkrisduq má "Nghut lhê" chyat nghut lhê. Haú mù, Garai Gasang é hpungwup shingkâng é matú, Yhâng đông mai, nga-nhúng gi, "Amen" nghû taí é nghut lhê. ²¹ Ngamoq eq nungmoq lé Hkrisduq má yap gingtíng nhang é sù gi, Garai Gasang nghut ri. Yhang gi, nga-nhúng lé masat é xû but byi mù, ²² Yhang sing lhê gà é dizik, nga-nhúng lé htúng tap byi luì, jé lô râ hkyô pé hkyak joq lhê nghu é masat zè đông, Yhâng é Woi-nyí lé nga-nhúng é i-myit unghkaû má kat byi bê nghut ri.

²³ Ngò gi, nungmoq hkyamsa râ matú, Korinhtuq myuq má a dum taû lé é hkyô têng é lé, ngá é saksé dut râ đông Garai Gasang lé wut dúng lhê.

²⁴ Haú gi, nungmoq é lumjíng hkyô lé ngamoq sing pyám byi é a nghut é za, nungmoq é gabú hkyo é matú, nungmoq eq rahá chôm zui saí é ru nghut lhê; haí mù gà le, lumjíng myit mai za nungmoq wó yap gíng nyi bùm kô é ru nghut lhê.

2

¹ Haú mù luì, ngò gi, nungmoq lé myit nò nhâng é dut râ đông, lé dum kúm é a kut râ nghû, myit hpyit to bê nghut lhê. ² Hkâsu mù gà le, nungmoq lé ngò yón kuq nhang é nghut le gi, ngò yón kuq nhâng bê bang nungmoq mai lai luì, ó yuq wá ngo lé wó gabú nhâng râ lhú? ³ Ngò jé lé é hkûn, ngo lé gabú nhâng râ âng é bâng èq, ngo lé myit nò nhang é a hui sháng gaq nghû, ngò gi, ngò kut é eq rajung za laiká kâ kat bê nghut lhê. Ngá é gabú hkyô lé nungmoq banshoq bang wó bo gabú kó râ nghut lhê nghû, nungmoq banshoq bang lé ngò hkyak myit lum tô lhê. ⁴ Hkâsu mù gà le, ngò gi, nungmoq lé laiká kâ é hkûn, myit myo uhkyí mó èq le, myit má yón kuq é èq le, ngaubyi ngau-nhap é èq le, kâ kat bê nghut lhê. Haú gi, nungmoq lé yón kuq é hui nhâng râ matú a nghut é za, nungmoq lé ngò hkâ-í chyitdap é hkyô lé sé nhâng râ matú ru nghut lhê.

Mara Hkyut Byi Lhum Râ Hkyô

⁵ Yón kuq hkyô lhoq htoq é sù gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haú hkyô eq séng luì, ngò gyai wá yhang zuq zuq a taí nau é nghut lhê. ⁶ Nungmoq myo hpyâng èq yhang lé mara dam byi é hkyô gi, yhâng é matú gé bê nghut ri. ⁷ Nghut kôlhang, ahkuì, nungmoq gi, yhang a wó jan loshoq myit yón é a hui zo râ matú, yhang lé mara hkyut pyám byi mù, nhik tíng byi keq. ⁸ Haú mù luì, nungmoq é chyitdap myit gi, yhang é ahtoq má dum lhoq gíng shit nyi keq nghû, nungmoq lé ngò wum taí tsuq kat lhê. ⁹ Ngò, nungmoq lé haí mù

laiká ká byî kat é hkyô gi, nungmoq chyam wú huî é hkyô lé wó jân é hkyô eq jung hkgámó má jìno gyo hkyô bò a bo é lé, wó sé râ matú le nghut lhê. ¹⁰ Nungmoq, rayuq yuq lé mara hkyut byî é nghut le gi, ngò le, haú yuq lé mara hkyut byî lhê. Mara hkyut râ rajung jung joq é nghut jáng, ngò mara hkyut é gi, Tsadán èq nga-nhúng lé a wó ùng râ matú, nungmoq é yanmai, Hkrisduq é myoq hí má ngò mara hkyut byi bê nghut lhê. ¹¹ Hkâsu mù gâ le, Tsadán hen é hkyô pé lé nga-nhúng a sê é a nghut.

Dangshikaq Asik Mâ É Hpungmû Wùn Bang

¹² Ngò gi, Hkrisduq é gabú danglù hko kyo râ matú, Troa myuq má ê jé é hkûn, haú Yhumsîng gi, ngo lé hkum hpóng byî é lé, ngò myang ri. ¹³ Nghut kôlhang, ngò gi, ngá é gumang Tituq lé haú má a myang ho é yanmai, myit myo mù, yhangmoq lé shi-kyâm to luí, Makedoni mau shut xoq e ló é nghut lhê.

¹⁴ Nghut kôlhang, Hkrisduq má, ngamoq lé hkâ-nhám le ùng budang hkyô shut shuí-ù yù mù, Hkrisduq lé sê é sumsé hpaqchyi é nam ngón shôm lé, ngamoq dông mai jowò hkgámó má taí pyo é sù, Garai Gasang gi, jeju hkya-ôn é huî nyi sháng gaq. ¹⁵ Hkâsu mù gâ le, ngamoq gi, hkyi yu é huî nyi bâng chyáng le, htên byoq ló é huî nyi bâng chyáng le, Garai Gasâng é matú Hkrisduq é nam ngón shôm nghut nyi lhê. ¹⁶ Ngamoq gi, htên byoq nyi bâng é matú shî-nò hkyo é shôm dut mù, hkyi yù huî nyi bâng é matú nghut jáng, asak hkyo é nam ngón shôm dut é nghut lhê. Haú mù, ó yuq wá muzó shî eq htuk râ lú? ¹⁷ Ngamoq gi, amyat wó râ matú Garai Gasâng é mungdang lé hkat ung zô é byù myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé dông lhumzui myit mai taí é nghut lhê.

3

¹ Ngamoq gi, yhumsîng gùng yhumsîng dum owaq hi ló é nghut lhê lú? Byù ra-am kut é su, nungmoq chyáng, ngamoq é matú htuqluq htuqbáng laiká ká byi kô é ngamoq ra râ luq, nungmoq yuq ngamoq é matú ká byi ra kó râ luq? ² Nungmoq gùng yhang gi, ngamoq é myit nhikhum má kâ tô é, yuq hkgámó èq nghap luí sê yu é laiká gùng pé nghut akô. ³ Nungmoq gi, nungmoq chyáng ngamoq hpungmû wùn waq é yanmai, Hkrisduq chyáng mâ é laiká nghut kô é hkyô lé shit nyi akô. Haú gi, kâ jung chí èq kâ tô é dông a nghut é za, rú dui nyi é Garai Gasâng é Woi-nyí èq kâ tô é nghut é htoq agó, luqlong pé má kâ tô é dông a nghut é za, xângzo byu é myit nhikhum long pé má kâ tô é ru nghut lhê.

⁴ Haú su nghû hkyak wó myit lum é hkyô gi, Garai Gasâng é hí má, Hkrisduq dông mai ngamoq wó yu é nghut lhê. ⁵ Ngamoq gi, yhumsîng gùng haí lé le wó kut lhê nghu é a nghut, ngamoq é a-tsam gi, Garai Gasâng chyáng mai lo é nghut lhê. ⁶ Yhang gi, ngamoq lé, dangshikaq asik lé wó wùn waq râ a-tsam byi bê nghut ri. Dangshikaq asik haú gi, tarâ laiká mai lo é a nghut é za, Woi-nyí mai lo é ru nghut lhê. Hkâsu mù gâ le, laiká gi, shî dâm byi lhê, Woi-nyí kúm gi, asak byî é nghut lhê.

Dangshikaq Asik É Hpungwup Shingkanq

⁷ Ahkuí, haú Mosheq é myoqdong mâ é hpungwup shingkâng é yanmai, haú Israelaq byu pé gi, yhâng é myoqdong lé a wó wú tsuq to kó nghut ri. Hpungwup shingkanq haú shùm lo byuq sê é nghut kôlhang, luqlong má dok kâ tô é, shî-nò hkyô lhoq htoq é tarâ muzó gi, hpungwup shingkanq eq rahá jé lé é nghut lhê. ⁸ Haú su nghut jáng, haú Woi-nyí é muzó gi, hpungwup shingkanq je riyhang dut râ a nghut kó lú? ⁹ Gè gè yhang, haú byù lé mara byî é tarâ muzó lhang, hpungwup shingkanq bo é nghut le

gi, dingmán nhang é hkyô sik gi, je riyhang hpungwup shingkang bo é nghut lhê ô! ¹⁰ Hkâsu mù gâ le, hpungwup shingkang bo é tarâ muzó gi, hpungwup shingkang je bo é dangshikaq asik eq whuí é hkûn, hpungwup shingkang a bò lo dut byuq bê nghut ri. ¹¹ Shum byuq ló é tarâ lháng gi, hpungwup shingkang eq rahá lé jé bê nghut le gi, ru gîng nyi é dangshikaq asik é hpungwup shingkang gi, je riyhang gyaú râ nghut lhê ô!

¹² Haû mù luî, ngamoq gi, haû sù é myoqbyù hkyô wó é yanmai, gyuq kyum myit a bo é hkyô shit é nghut lhê. ¹³ Ngamoq gi, Mosheq su a nghut. Yhang gi, duqbang é hkyô shûm byuq ló é hkûn, haû Israelaq byu pé haû lé a wú tsuq râ matú, yhâng é myoqdong lé myoqgo èq nghop pyâm é sù nghut ri. ¹⁴ Nghut kôlhang, yhangmoq é myit gi, lhoq chut byi é hui bekô nghut ri; hkâsu mù gâ le, hkû-nyí jé shoq, dangshikaq axau lé nghap é hkûn, rajung zâ é myoqgò gi, ru nghop to byi ashí nghut ri. Haû gi, hui sêng pyâm é a hui shi, haî mù gâ le, Hkrisduq dông za haû lé wó yu pyâm é nghut lhê. ¹⁵ Hkû-nyí jé shoq lháng, Mosheq é laiká lé nghap é hkûn, yhangmoq é myit nhiklhum má myoqgò èq nghop tô é nghut ri. ¹⁶ Nghut kôlhang, ó yuq le, Yhumsîng chyáng hká u lhîng lò kôlhang, haû hkûn jáng, myoqgò gi, hî pyâm byi é hui râ nghut lhê. ¹⁷ Yhumsîng gi, haû Woi-nyí nghut mù, Yhumsîng é Woi-nyí nyi é jowò má, luthkyô le joq lhê. ¹⁸ Haû Yhumsîng é hpungwup shingkang lé lhoq htoq shit é bang banshoq nghut é myoqdong má myoqgò a nghop é bang nga-nhúng gi, ru myo jat nyi é hpungwup shingkang lhoq htoq byi hkyô nghut é, Yhâng é isâm shut htaî lhik wang é hui nyi bê nghut lhê. Haû hkyô gi, haû Woi-nyí nghut sù Yhumsîng chyáng mai lo é nghut lhê.

* 4:4 Ipyat shi é garai gâ é gi, Tsadán lé gâ é nghut lhê. ✨ 4:6 Apûn 1:3 † 4:7 Tseyam pé gâ é gi, nga-nhúng é wum nyhôm é gungdu lé gâ é nghut lhê.

4

Tseyam Pé Má Bo É Sutzè

¹ Ngamoq gi, Garai Gasâng jeju mai muzó hkyô haû wó é nghut mù, myit wum a gyui é nghut lhê. ² Ngamoq gi, zaú tô é eq hoq htoq é hkyô pé lé tô pyâm luî, mhaú zô é hkyô le a kut, Garai Gasâng é mungdang lé le ahpuq alhik a kut é bang nghut lhê. Haû su kut râ malaî, ngamoq gi, haû tengmán hkyô lé san za lhoq htoq shit é dông, Garai Gasâng é hí má yuq hkanmó é myit sôn sê é hkyô má, yhumsîng gùng yhumsîng htuk shoq nyi lhê. ³ Ngamoq é gabú danglù gi, myoqgo èq nghop pyâm é hui é nghut jáng, haû gi, htên byoq nyi bâng chyáng za nghop pyâm hui é ru nghut lhê. ⁴ Haû Garai Gasâng é azòng isâm nghut sù, Hkrisduq é hpungwup shingkang bo é gabú danglù é maubó lé, a lumjîng bang a wó myâng kó sháng gaq ga, ipyat shi é garai* gi, yhangmoq é myit lé lhoq chit byi bê nghut ri. ⁵ Haû nghut é yanmai, ngamoq gi, yhumsîng gùng eq séng luî hko kyô é a nghut é za, Yesuq Hkrisduq gi, Yhumsîng nghut é hkyô lé le, Yesuq é matú, ngamoq gùng yhang gi, nungmoq é jùn pé nghut é hkyô lé le, hko kyô é ru nghut lhê! ⁶ Hkâsu mù gâ le, "Mauchut hkaû mai maubó htoq lô sháng gaq." ✨ ga taî é Garai Gasâng gi, Yesuq Hkrisduq é myoqdong má é Garai Gasâng é hpungwup shingkang é maubó lé sê gyô é nyan lé, nga-nhúng lé byi é dông, Yhâng é maubó lé, nga-nhúng é i-myt unghkaû má duqbó nhâng bê nghut ri.

⁷ Nghut kôlhang, ngamoq gi, sutzè haû bo é tseyam pé† nghut nyi lhê. Haû gi, gyaú dik é a-tsam mó gi, ngamoq chyáng má é a nghut é za Garai Gasâng chyáng má é nghut é hkyô lé tân shit râ matú nghut lhê. ⁸ Ngamoq gi, wuîhke hkyo èq lhîngkyuq mai gyai yhang nhê zik é hui kôlhang, a gyop byuq é nghut lhê; myit lhoq

nhùng pyâm é hui kôlhang, myit a htâm byuq é nghut lhê; ⁹ zing-rî é hui kôlhang, kâng pyâm huî é a nghut; bat lhêng pyâm é hui kôlhang, htên byoq huî é a nghut. ¹⁰ Haû Yesuq é asak duì hkyô le, ngamoq é gungdu má lhoq htoq shit é hui sháng gaq nghû, ngamoq gi, Yesuq shi é hkyô lé, hkâ-nhám le, ngamoq é gungdu má wùn waq wún é nghut lhê. ¹¹ Hkâsu mù gâ le, Yesuq é asak duì hkyô gi, nga-nhúng é shî sê é gungdu má lhoq htoq shit é hui sháng gaq nghû, asak duì nyi é bang ngamoq gi, Yesuq é matú é yanmai, hkâ-nhám le, shi byuq hkyô shut ap pyâm é huî nyi ri. ¹² Haû mù luî, shi byuq hkyô gi, ngamoq má mù zuî nyi ri; asak duì hkyô kúm gi, nungmoq má mù zuî nyi é nghut ri.

¹³ "Ngò gi, lumjúng bê nghut lhê, haû mù, ngò taî é nghut lhê." ✧ ga kâ tô é eq rajung za, ngamoq le, lumjúng hkyô hau èq yhang, lumjúng bê nghut mù taî é nghut lhê. ¹⁴ Haî mù gâ le, haû Yhumsîng Yesuq lé shi é mai lhoq duì toq é Sû gi, ngamoq lé le, Yesuq eq rahá lhoq duì toq mù, nungmoq eq rahá, ngamoq lé Yhâng é hí má shuî jé râ nghut é lé, ngamoq sê lhê. ¹⁵ Haû jeju wó é byu pé gi, je riyhang myô jat lò mù, Garai Gasâng é hpungwup shingkâng é matú, jeju hkya-ôn é hkyô gi, byíng mui nyi sháng gaq ga, haû pé banshoq gi, nungmoq é akyu é matú nghut nyi ri.

¹⁶ Haû mù luî, ngamoq gi, myit wum a gyuí é nghut lhê. Ngamoq é shinggan gungdu gi, htên byoq lô nyi kôlhang, i-myit unghkaû gi, ra-nyí eq ra-nyí asik dut nhang é huî nyi ri. ¹⁷ Hkâsu mù gâ le, ngamoq é tiq é eq razup zâ é wuîhke hkyô pé gi, ngamoq é matú haû pê htoq gyai hkik é ahtum abyuq é hpungwup shingkang lé, wó yû nhang ri. ¹⁸ Haû mù, nga-nhúng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gâ le, byu-myang é gi, razup rahtâng

zâ é nghut mù, a byu-myang é kúm gi, ahtum abyuq é nghut lhê.

5

Mauhkûng Htoq Mã É Yhûm

¹ Haû myidàm zúm nghut é nga-nhúng lúng nyi é gungdu gi, htên byoq sê é nghut kôlhang, byu loq èq saî é a nghut é za, mauhkûng htoq má joq é ahtum abyuq é yhûm* nghut é, Garai Gasâng chyáng mã é yhûm lé, nga-nhúng wó é hkyô lé, nga-nhúng sê lhê.

² Nghut kôlhang, ahkuî, nga-nhúng gi, nga-nhúng é mauhkûng yhûm lé tù hut byî é lé gyai yhang hui naû mù, nò-kying su kyîng nyi lhê. ³ Haî mù gâ le, nga-nhúng gi, hut byî é hui jáng, gungdu a bò bang a dut lo râ nghut lhê. ⁴ Hkâsu mù gâ le, nga-nhúng gi, zúm shî má lúng nyi é u lé, wòlai wùn mù, nò-kying su kyîng nyi lhê; haû gi, shî byuq sê é lé, asak duì é èq wó htaî lhik pyâm sháng gaq nghû, nga-nhúng gi, a hut byî é hui râ lé a ô nau é za, nga-nhúng é mauhkûng yhûm lé tù hut byî é hui râ lé ô nau é yanmai nghut lhê. ⁵ Ahkuî kúm, jeju haû hkam yù râ matú, nga-nhúng lé lajâng to byî é sù gi, Garai Gasang nghut mù, jé lò râ hkyô gi, hkyak joq lhê nghû é masat zè đông, nga-nhúng lé haû Woinyí byi bê nghut ri.

⁶ Haû mù luî, ngamoq gi, hkâ-nhám le hkyak lum tô lhê. Gungdu shî má yhûm đông ru lúng nyi nyi gi, haû Yhumsîng eq wê gâng nyi ashî nghut é lé ngamoq sê nyi lhê. ⁷ Ngamoq gi, byu-myang é đông mai a nghut é za, lumjúng myit mai asak duì é ru nghut lhê. ⁸ Ngamoq gi, hkyak myit lum tô lhê nghû, ngò taî lhê, haû mù, gungdu shî mai wê gang luî, haû Yhumsîng eq rahá nyi râ lé ngamoq je riyhang ô nau é nghut lhê. ⁹ Haû mù, ngamoq gi, gungdu shî má yhûm đông lúng nyi é nghut nghut, haû mai wê gâng é nghut nghut, ngamoq myit myoqbyu tô é jowò gi, Yhang lé gabú nhâng

✧ 4:13 Hkya-on 116:10 * 5:1 Mauhkûng htoq má joq é ahtum abyuq é yhûm gâ é gi, nga-nhúng, mauhkûng mingdán má jé é hkûn wó râ gungdu asik lé gâ é nghut lhê.

râ matú nghut lhê. ¹⁰ Hkâsu mù gâ le, yuq hkangmó gi, gungdu shî má yhûm đông lúng nyi é u lé, ge é nghut nghut, a ge é nghut nghut, kut é eq rajung za hkam yù râ matú, Hkrisduq é tarâ jéyáng tanghkuq hí má, nga-nhúng banshoq bang htoq shit ra râ nghut lhê.

Nguingón Hkyô Xoq É Muzó

¹¹ Haû mù, Yhumsing lé gyuq hkungga râ hkyô haî nghut é lé ngamoq sê é nghut luí, ngamoq gi, byu pé lé taí pûn kyíng shikut lhê. Ngamoq haî nghut é gi, Garai Gasâng chyáng san za nghut nyi mù, nungmoq é myit sôn sê é hkyô má le san za nghut râ lé, ngò myit lum lhê. ¹² Haû myit nhiklhûm má bo é lé gumrông rá malaî, byu-myang é lé gumrong é bang lé, nungmoq wó tû taí kó sháng gaq nghû, ngamoq gi, nungmoq chyáng yhumsing gùng lé dum owaq shikut é a nghut é za, ngamoq é hkyô lé, nungmoq wó gumrông rá ahkáng, nungmoq lé byi é ru nghut lhê. ¹³ Ngamoq a gyíng é đông nghut le gi, Garai Gasâng é matú a gyíng é nghut lhê; ngamoq gyíng é đông nghut le gi, nungmoq é matú gyíng é nghut lhê. ¹⁴ Hkâsu mù gâ le, Hkrisduq é chyitdap myit eq ngamoq lé kut nhang nyi é nghut lhê. Haû gi, banshoq bâng é matú rayuq shî hkám byi bê nghut mù, banshoq bang shi é đông nghut bê nghû, ngamoq hkyak sê gyô é yanmai nghut lhê. ¹⁵ Yhang gi, asak dui nyi é bang, yhangmoq yhumsing gung é matú a dui lô é za, yhangmoq é matú shî hkám byi luí, lhoq dui toq é huí Su é matú dui kó sháng gaq ga, banshoq bâng é matú shî hkám byi bê nghut ri.

¹⁶ Haû mù, ngamoq gi, ahkuî mai, ó yuq eq séng luí le, mingkan hkyam đông mai a wú lô é nghut lhê. Ngamoq gi, hí hkûn Hkrisduq lé haû đông wú é nghut kôlhang, haû su hkâ-nhám le a kut lô é nghut lhê. ¹⁷ Haû nghut mù luí, rayuq yuq gi, Hkrisduq má nghut nyi é nghut jáng,

yhang gi, asik hpân hui sù dut bê nghut ri; haû axau gi, byuq byuq mù, lhunglhang asik dut bu-nhung!

¹⁸ Haû pé banshoq gi, Garai Gasâng chyáng mâ é chyat nghut lhê. Yhang gi, Hkrisduq đông mai nga-nhúng lé Yhânggùng eq nguingón hkyô xoq yû luí, nguingón hkyô xoq é muzó ngamoq lé byi bê nghut ri. ¹⁹ Haû gi, Garai Gasang gi, byu pé é mara lé a matsíng byi é za, Hkrisduq đông mingkan lé Yhânggùng eq nguingón hkyô xoq yû bê nghut luí, Yhang gi, nguingón hkyô xoq yu é mungdang haû lé, ngamoq lé ap byi to bê nghû nau é nghut lhê. ²⁰ Haû mù luí, ngamoq gi, Hkrisduq é gunglik pé nghut lhê mù, Garai Gasang gi, ngamoq đông mai nungmoq lé lhoq pûn kyíng nyi é nghut lhê. Garai Gasang eq nguingón hkyô xoq yû keq nghû, ngamoq gi, Hkrisduq é gunglik đông nungmoq lé dúng tôngbán nyi lhê. ²¹ Nga-nhúng gi, Hkrisduq đông mai Garai Gasâng é dingmán bang wó dut kó sháng gaq ga, Garai Gasang gi, yubak mara a bò Sú lé, nga-nhúng é matú yubak mara hkungga dut nhâng bê nghut ri.

6

¹ Ngamoq gi, Garai Gasâng é mù zui byinzùm wuì nghut nyi é eq rajung za, Garai Gasâng jeju lé akyû a bo é đông hkâhap yù kó nghû, nungmoq lé wum taí tsuq kat lhê. ² Hkâsu mù gâ le,

"Ngò ô nau é ahkyíng má, nang lé ngò gyo byi bê nghut mù, hkyi yù hui râ buinyi má, nang lé ngò garúm bê nghut lhê."^{*}

ga luí, Yhang taí ri. Ngò, nungmoq lé taí kyo kôlé, ahkuî gi, Garai Gasang ô nau é ahkyíng, ahkuî gi, hkyi yu é buinyi nghut ri.

Poluq É Wuîhke Hkyô Pé

³ Ngamoq é hpungmû gi, taí hpoi pyâm é a hui sháng gaq nghû, ngamoq gi, ó yuq é hkyô má le, leqbat jung a to byi é nghut lhê. ⁴ Haû kut râ

^{*} 6:2 Esai 49:8

malaî, ngamoq gi, Garai Gasâng é dui-nhâng zoshâng wuì nghut é hkyô lé, hkyô hkgangmó má yhumsing gùng yhumsing shit nyi lhê. Gyai hkam jân é hkyô má le, jamjau hkyô pé má le, wuîhke hkyô pé má le, myit myo uhkyí hkyô pé má le shit nyi lhê. ⁵Nhuq bat huí é pé má le, htóng lhúng huí é eq toq gabyông é má htím é huí é má le, mú zui shikut é má le, a myang yhup é myín pé má le, zòmut huí é má le, shit nyi lhê. ⁶Sân-yúng é má le, sê gyô é hkyô má le, myit hing é eq myit ge é má le, Chyoiyúng Woi-nyí eq chytidap myit akying má le, ⁷tengmán é mungdang hko é má le, Garai Gasâng é a-tsam má le, loqyò loqpai má dingmán hkyô nghú é laknak pé dông le, shit nyi lhê. ⁸Hpungwup shingkan byí é hui kô é dông eq a hkunggâ é hui kô é dông nghut kôle, a ge é luhkyang eq ge é luhkyang taí kôle, shit nyi lhê. Ngamoq gi, tengmán kôhang, mhaú zo bang dông sôn yu akô nghut ri. ⁹Ngamoq lé sé kôhang, a sê é dông kut akô nghut ri; shi ló nyí kôhang, rú dui nyi é bang nghut lhê; nhuq bat é hui kôhang, sat pyâm é a hui shí é bang nghut lhê. ¹⁰Yón hkyô byíng nhâng kôhang, hkâ-nhám le gabú nyi lhê; myùng kôhang, byù myo myo lé wó sùt nhang nyi lhê; haí le a wó kôhang, jung hkgangmó lé sing é dông nghut lhê.

¹¹Korinhtuq bang ê, ngamoq gi, nungmoq lé san za taí bê nghut luí, ngamoq é myit nhiklhum lé, nungmoq é matú làm shoq hpông to byi bê nghut lhê. ¹²Ngamoq gi, ngamoq é chytidap myit lé, nungmoq chyáng mai láng taú yu nyi é a nghut, nungmoq sheq, ngamoq chyáng mai láng taú yu nyi kô é ru nghut lhê. ¹³Nungmoq le, myit nhiklhum lé làm shoq dum taú hpóng keq nghú, ngò gi, ngá zô pé lé dông taí lhê.

A Lumjínq Bang Eq A Nhungkut Râ Hkyô

* **6:15** Beliala gâ é gi, Tsadán é myìng rajà nghut lhê.

☆ **6:17** Esai 52:11; Ezk 20:34,41 ☆ **6:18** 2 Sam 7:14

¹⁴A lumjínq bang eq rahá kandang hkâwaq kó. Hkâsu mù gâ le, dingmán é hkyô eq agè ashop é hkyô gi, haí sêng lhum lhê lhú? Maubó eq mauchut gi, hkâsu wó zùm yap kó râ lhú? ¹⁵Hkrisduq eq Beliala* gi, hkâsu kut myit wó huí lhum kó râ lhú? Lumjínq sù rayuq eq a lumjínq sù gi, hkâsu wó pung lhum kó râ lhú? ¹⁶Garai Gasâng é noqkuq yhùm eq hparà lhô pé gi, hkâsu wó hùm râ lhú? Hkâsu mù gâ le, nga-nhúng gi, rú dui nyi é Garai Gasâng é noqkuq yhùm nghut lhê. Haú gi, "Ngò gi, yhangmoq eq rahá nyi mù, yhangmoq chyáng sô nyi râ nghut luí, Ngò gi, yhangmoq é Garai Gasang dut mù, yhangmoq gi, Ngá é byu pé dut kó râ nghut lhê."☆ ga Garai Gasang taí tô é eq rajung za nghut ri.

¹⁷"Haú mù luí, yhangmoq chyáng mai htoq lô mù, gotú san za nyi keq. A sansêng é zè lé hkâzang kó, haú hkùn, Ngò, nungmoq lé lhom hap yù râ nghut lhê."☆ ga haú Yhumsing taí ri.

¹⁸"Ngò gi, nungmoq é Íwa dut mù, nungmoq gi, Ngá é byizo yuqzô pé dut kó râ nghut lhê."☆ ga haú wum-o a-tsam dik shoq bò Sù Yhumsing taí ri.

7

¹Chytidap é luzúm wuì ê, nga-nhúng gi, danggidiq haú pé lé wó tô é bang nghut é yanmai, gungdu eq woi-nyí lé agot a-û dut nhang é jung hkgangmó mai, yhumsing gùng yhumsing lhoq sân-yúng yú luí, Garai Gasang lé gyuq hkunggâ é myit eq chyoiyúng hkyô má lhoq gumjup yu nyi sháng.

Poluq É Gabú Hkyô

²Nungmoq é i-myt unghkaú má ngamoq lé jowò byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaú zô wú é nghut lhê. ³Ngò gi, nungmoq lé mara byi râ matú haú su taí é a nghut.

☆ **6:16** Nhung 26:12; Yer 32:38; Ezk 37:27

Ngamoq gi, asak duì kôle, shî kôle, nungmoq eq rahá wó dut shoq, nungmoq gi, ngamoq é i-myt unghkaû má lúng nyi é nghut lhê nghû, hí hkûn ngò taí wú bê nghut lhê. ⁴ Ngò gi, nungmoq lé, hkyak yhang myit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byí é gyai yhang huí ri; jamjau hkyô pé myo myo ngamoq hui kôlhang, ngò, gyai yhang gabú nyi lhê.

⁵ Hkâsu mù gâ le, ngamoq gi, Makedoni mau má jé é hkûn, ngamoq é gungdu gi, zim za a myang nyi é htoq agó, hkyô hkanmó má ngamoq wuîhke jamjau hui zô é nghut lhê. Shinggan má gi, mabyoq htoq, ahkaû má gi, gyuq kyum nyi é nghut lhê. ⁶ Nghut kôlhang, nhik ngê bang lé nhik tîng é Garai Gasang gi, Tituq lé jé lé nhang é dông mai, ngamoq lé nhik tîng byi bê nghut ri. ⁷ Yhang jé lé é dông mai za a nghut, yhang lé nungmoq nhik tîng byí é hkyô dông mai le nghut lhê. Ngá é gabú hkyô gi, gó nám lhê htoq má je myo sháng gaq ga, yhang gi, nungmoq ngo lé myit tuí nyi é hkyô, nungmoq gyai yhang shut bûn é hkyô, ngá é matú nungmoq gyai myit chiq byí é hkyô pé lé, ngamoq lé taí kyo bê nghut ri.

⁸ Ngá é laikâ èq, nungmoq lé yón nhang é nghut kôle, ngò gi, nungngham wó é a nghut. Sâng-hi le, ngò nungngham wó é nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê. ⁹ Nghut kôlhang, ngò gi, ahkuí gabú lhê; haû gi, nungmoq lé yón hui nhang é yanmai a nghut é za, nungmoq é yón hkyo èq, nungmoq lé myit lîng nhang é yanmai ru nghut lhê. Nungmoq gi, Garai Gasang ô nau é dông yón huí é bang dut bekô nghut mù, nungmoq lé, ngamoq èq hai akyû le a lhoq yôm byí é nghut lhê. ¹⁰ Hkâsu mù gâ le, Garai o é dông yón kuq huí é hkyô gi, nungngham wó hkyô a bo é za, hkyi yù hkyô wó shoq, myit lîng nhang é nghut ri. Nghut kôlhang,

mingkân é yón kuq hkyô gi, shi é hkyô lhoq htoq é nghut ri. ¹¹ Garai o é dông, nungmoq chyáng akyû lhoq htoq byí é yón kuq hkyô lé wú wú keq! Haû gi, gyai yhang myit zuq é hkyô, yhumsing gùng mara a bo é lé tûn shit râ lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byí é hkyô, tengmán hkyô kut râ rì rì nghut é hkyô pé nghut lhê. Nungmoq gi, haû hkyô má mara a bo é lé hkat hkanmó má saksé tûn shit bekô nghut ri. ¹² Haû mù luí, ngò, nungmoq lé kê kat é nghut kôlhang, kut shut su é yanmai le a nghut, kut shut é hui zo su é yanmai le a nghut é za, ngamoq lé nungmoq hkâ-í ap nóng byí é hkyô lé, Garai Gasâng hí má nungmoq gùng nungmoq wó myâng râ matú kê kat é sheq ru nghut lhê. ¹³ Haû pé banshoq dông mai, ngamoq gi, myit wum byí é huí ri.

Ngamoq myit wum byi huí é htoq agó, Tituq hkâ-í yhang gabú é lé myàng mù, ngamoq gi, je riyhang myit gabú é nghut lhê. Haí mù yhang gabú é gâ lé, nungmoq banshoq bâng èq yhâng é myit lé lhoq nguingón byi kô é yanmai nghut ri. ¹⁴ Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpû é nghut lhê. Nungmoq lé ngamoq taí é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le têng lhê. ¹⁵ Nungmoq banshoq bang jîno gyo kômù, gyuq nán é myit mai yhang lé lhom hap yù kô é lé, yhang myitbûn é hkûn, yhang nungmoq lé chyitdap é myit gi, je riyhang kô dik nyi ri. ¹⁶ Ngò gi, nungmoq lé banshoq wó lum to bê lé sê é yanmai, gabú nyi lhê.

8

Byí É Hkyô

¹ Gumang wuî è, ahkuí, ngamoq gi, Makedoni mau mâ é noqkuq hpûng pé lé Garai Gasang byí é jeju eq sêng é hkyô, nungmoq lé sé nhâng nau

ri. ² Yhangmoq gi, wuîhke jamjau hkyô myo myô êq chyam lik é huî é nghut kôlhang, yhangmoq é a ung taí loshoq gabú é hkyô eq yhangmoq é gyai yhang myung é hkyô gi, agùn agó byí nau é myit bò nhang ri. ³ Hkâsu mù gâ le, yhangmoq gi, yhangmoq wó dut é myhó byi kô é htoq agó, yhangmoq é a-tsam lai shoq lháng byi kô é hkyô lé, ngò saksé hkám lhê. Yhangmoq gi, yhangmoq é myit hkaû mai yhang haû su kut kô é nghut ri. ⁴ Yhangmoq gi, haû sân-yúng bang lé wó bo dojaú râ matú, ngamoq lé gyai yhang ahkáng dung kô é nghut ri. ⁵ Yhangmoq gi, ngamoq myit ngam tô é htoq má lháng lai shoq, Garai Gasang ô nau é hkyô lé châng é dông, yhangmoq gùng lé hí haû Yhumsing lé ap byí pyám kômù, hau htâng sheq ngamoq lé ap kô é nghut ri. ⁶ Haû mù luí, Tituq yhang hí kut hi nyi bê nghut é yanmai, ngamoq gi, jeju haû lé nungmoq chyáng le shuí lhoq byíng jup byi râ matú, yhang lé wum byi bê nghut lhê. ⁷ Nungmoq gi, lumjíng myit má, dang nyo é hkyô má le, sumsé hpaqchyí hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkanmó má agùn agó dut bekô eq rajung za, nungmoq gi, byí nau é jeju shí má le agùn agó dut rá lé, bún nyi keq.

⁸ Ngò gi, nungmoq lé hkunmó hkyô é a nghut, nghut kôlhang, góbâng é myit zuq é hkyô eq whuí wú é dông, nungmoq é chyitdap myit jet é hkyô lé chyam wú naû luí sheq ru nghut lhê. ⁹ Hkâsu mù gâ le, nungmoq gi, nga-nhúng é Yhumsing Yesuq Hkrisduq é jeju lé sê akô nghut ri. Yhang gi, Yhâng é myùng hkyô dông mai nungmoq wó bang dut kó sháng gaq ga, jung hkanmó wó sù nghut kôlhang, nungmoq é matú é yanmai, myùng sù dut bê nghut ri.

¹⁰ Shí hkyô eq sêng é má, nungmoq é matú ge dik é hkyô ngò hpaqchyí byi kôlé: A-nhik, nungmoq gi, sân-

hi, byí hí kô é za a nghut, haû su kut nau é myit bo é bang le nghut akô. ¹¹ Nungmoq wó dut é eq rajung za, haû lé lhoq pân é dông nungmoq é gyai yhang kâm kut é myit lé wó lhoq dik ko sháng gaq, ahkuí, muzó haû lhoq pân keq. ¹² Hkâsu mù gâ le, byí nau é myit bo é nghut jáng, chyunghuq haû gi, yhang a wó é má cháng luí a nghut é za, yhang wó é má cháng luí, hap yù gíng é nghut lhê.

¹³ Nungmoq é matú gi, wólai dut, góbang gi, hkyamsâ nyi râ lé, ngamoq ô nau é a nghut, rawuí za wó dut kó râ lé sheq ô nau é ru nghut lhê.

¹⁴ Nungmoq haí râ tô é lé, yhangmoq agùn agó wó é mâ é wó dum taû htupbang byi kó sháng gaq, ahkui lhê é ahkýing má, yhangmoq haí râ tô é lé, nungmoq agùn agó wó é mâ é htupbang byi keq. Haû jáng sheq, wuí wuí za wó dut kó râ nghut lhê. ¹⁵ Haû gi, "Myo myo tsing yu é sù gi, lûm myo shoq wó é a nghut, shau za tsing yu é sù gi, lûm shau shoq wó é a nghut."* ga kâ tô é eq rajung za nghut ri.

Tituq Lé Korinhtuq Myuq Shut Nhang Kat É Hkyô

¹⁶ Nungmoq é matú ngò myit chiq byí é eq rajung zâ é myit lé, Tituq é i-myt má kat byí é Garai Gasang lé, ngò jeju hkya-ôn lhê. ¹⁷ Hkâsu mù gâ le, Tituq gi, ngamoq dúng tôngbán é lé za lhom hap yu é a nghut, gyai yhang myit toq mù, yhânggùng yhang myit hpyit yú luí, nungmoq chyáng lé lô gù za nghut ri. ¹⁸ Ngamoq gi, haû gabú danglù lé dojaú é má noqkuq hpûng pé banshoq eq hkya-on huí é gumang hpó haû lé le, yhang eq rahá nhang kat lhê. ¹⁹ Hau htoq agó, ngamoq garúm râ myit bo nyi é hkyô lé tân shit mù, haû Yhumsing lé hkungga râ matú ngamoq wú gôn nyi hkyô nghut é, alu lé ngamoq yu chung é hkún, ngamoq é byinzùm kut rá matú, noqkuq hpûng pé eq hkyin yu é sù le yhang nghut lhê. ²⁰ Ngamoq gi, myit lòm luí byí é chyunghuq shí lé ngamoq wú gôn nyi é hkyô má, ó

* 8:15 Htoq Ló 16:18

yuq eq le mara hô râ hkyô a htoq shoq sidiq nyi lhê. ²¹ Hkâsu mù gâ le, jô é hkyô kut râ matú ngamoq shikut nyi é gi, haû Yhumsing é myoq hí má za a nghut, byu pê é myoq hí má le nghut lhê.

²² Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sù, ngamoq é gotû gumang hpó lé le yhangnhik eq rahá nhang kat lhê. Yhang gi, ahkuí lháng, nungmoq lé gyai yhang myit lum tô é yanmai, shirông myit je riyhang bo nyi ri. ²³ Tituq é hkyô ga jáng, yhang gi, ngá é zùm yap luzúm eq ngò eq rahá nungmoq chyáng mù zui sù nghut ri. Nga-nhông é gumâng nhik é hkyô ga jáng, yhangnhik gi, noqkuq hpûng pê é gunglik eq Hkrisduq é aróng nghut akô. ²⁴ Haû mù luí, haû noqkuq hpûng pé wó myâng kó sháng gaq, nungmoq má ngamoq haí mù gumrong é hkyô eq nungmoq é chyitdap myit é saksé lé, haû bang lé tûn shit keq.

9

¹ Ngò gi, haû sân-yúng bang lé htuqbang râ hkyô eq séng luí, nungmoq lé kâ kat râ a ra nghut ri. ² Hkâsu mù gâ le, nungmoq gyai garúm nau é myit lé ngò sê lhê, haû mù, ngò gi, Makedoni mau bang lé, haû hkyô eq séng luí gumrong kyo mù, a-nhik mai yhang, Ahkaia mau má nungmoq byi râ rì rì nghut bê hkyô lé, yhangmoq lé taí kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaû toq byi bê nghut ri. ³ Nghut kôlhang, shí hkyô má nungmoq eq séng luí ngamoq gumrong é gi, hká dông le dangsôm a dut byuq sháng gaq, ngò taí bê eq rajung za nungmoq rì rì wó hen to râ matú, ngò gi, gumang wuì lé nhang kat é nghut lhê. ⁴ Hkâsu mù gâ le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu

râ a nghut, ngamoq le, nungmoq lé lûm yhang lum pyâm é yanmai, hoq bo hpu râ nghut lhê. ⁵ Haû mù luí, nungmoq danggidiq byi to bê nghut é, chyunghuq lé rago wó lajâng pân to râ matú, gumang wuì lé wum taí tsuq mù, nungmoq lé hí, lé kum nhâng râ gi, ra yhang râ lhê nghu ngò wó myit ri. Haû hkûn sheq, a nau é dông byi é a nghut é za, byi nau é chyunghuq dông hen tô é dut râ nghut lhê.

Agùn Agó Byi É Hkyô

⁶ Shau za sân hkyô sù gi, shau za shû yù râ nghut mù, agùn agó sân hkyô sù gi, agùn agó shû yù râ nghut lhê gâ é dang lé, myitbûn nyi keq.

⁷ Yuq hkangmó gi, a kâm byi é eq byi nhang é dông a nghut é za, yhumsing myit má byi nau é myhó lé myit hpyit yù mù byi é dông dut râ lhê. Hkâsu mù gâ le, Garai Gasang gi, gabú myit eq byi sù lé chyitdap ri. ⁸ Haû mù, ahkýing hkangmó jung hkangmó má, nungmoq râ é banshoq wó mù, ge é muzó hkangmó lé nungmoq je myo wó kut kó sháng gaq ga, Garai Gasang gi, jeju lhunglháng lé, nungmoq lé wó byi é sù nghut lhê. ⁹ Haû gi,

"Yhang gi, a ha bûn é za myùng bang lé yhâng é chyunghuq tsing gâm byi bê nghut ri; Yhâng é dingmán hkyô gi, ahtum abyuq gîng nyi ri."*

ga kâ to eq rajung za nghut ri. ¹⁰ Kyô hkyô sù lé kyôshi, zoshuq matú muk byi é Sù gi, nungmoq lé kyôshi byi mù, lhoq myô jat byi râ eq, nungmoq é dingmán hkyô é ashi lé myô lò nhâng râ nghut lhê. ¹¹ Nungmoq gi, ayoq abun hkangmó má agùn agó byi é bang wó dut kó râ matú, hkyô hkangmó má sùt wó é bang dut é hui kó râ nghut lhê. Nungmoq agùn agó byi é hkyô lé, ngamoq hai byi mù, Garai Gasang lé jeju hkya-ôn é hkyô dut râ nghut lhê.

¹² Nungmoq dojaú é hkyô shi gi, Garai Gasang é byu pé râ é hkyô lé lajang byi é za a nghut, Garai Gasang lé jeju bûn é dang bying mui nyi nhang é

* 9:9 Hkya-on 112:9

le nghut lhê. ¹³ Dojaú hkyô hau é yanmai, nungmoq lhumzui hkyô saksé tân shit bekô nghut mù, byu pé gi, Hkrisduq é gabú danglù lé nungmoq yín yû luí jìno gyo kô é yanmai le, yhangmoq eq yuq hkanmó lé, nungmoq é a ha bûn é myit mai shuí gam chûng kô é yanmai le, Garai Gasang lé hkyá-on kó râ nghut lhê. ¹⁴ Hau htoq agó, Garai Gasang gi, nungmoq lé jeju lai shoq byí tô é yanmai nungmoq é matú yhangmoq kyûdung byí é u má, yhangmoq é myit nhiklhum gi, nungmoq chyáng htoq jé râ nghut lhê. ¹⁵ A ung htoq taí é Garai Gasang é chyunghuq é yanmai, jeju hkyá-on hkyô gi, Yhâng chyáng ru nghut nyí sháng gaq ô!

10

Poluq, Yhâng É Hpungmû Lé Taí Hung É Hkyô

¹ Nungmoq eq myoqdong hkyûm nghut é hkûn gi, gyuq kyûm myit bo ri ga, wê gâng é hkûn gi, a gyuq a wám dut ri ga kô é sù, ngò Poluq gi, Hkrisduq é nûm é hkyô eq núnhâm é hkyô dông mai, nungmoq lé pying kat lhê. ² Shí mingkân é nyi yap a-tsang dông ngamoq asak dui ri ga myit ngam é byù ra-am lé, ngò a gyuq a wám é myit lé shit râ dâ tô lhê. Ngò jé lé é hkûn, nungmoq lé haú sù é myit a shit ra sháng gaq, ngò nungmoq lé dúng tôngbán kat lhê. ³ Hkâsu mù gâ le, ngamoq gi, mingkan shí má asak dui nyi kôlhang mingkan byu pé kut é dông majan zân é a nghut. ⁴ Ngamoq majan zân é laknak gi, mingkan shí é laknak a nghut é za, shut shai é dông dangrháng hkyô nghut é, gingtîng é gyedap pé lé lhoq htên pyám râ matú Garai é a-tsam byíng é laknak ru nghut lhê. ⁵ Ngamoq gi, dang-rháng rhâng lhûm é hkyô pé eq Garai Gasang lé sê é hkyô lé shut shaí shoq yhumsing gùng yhumsing lhoq myhang mhaú é hkyô hkanmó lé lhoq htên pyám mù, Hkrisduq é jìno gyo râ matú, myit sôn é hkyô hkat hkanmó lé shúm kut yu

é nghut lhê. ⁶ Nungmoq é jìno gyo hkyô gi, gumjup é hkûn, jìno a gyô é hkyô hkanmó lé ngamoq dam byi râ rì rì dut râ nghut lhê.

⁷ Nungmoq gi, ahtoq pyâm lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bûn sê nyi sháng gaq. ⁸ Hkâsu mù gâ le, nungmoq lé lêng hkyô râ nó gi, nungmoq lé kô myhâng nhâng râ matú, ngamoq lé haú Yhumsing byí é ahko ahkáng lé gyai gumrong le lháng, ngò gi, hoq hpû é hui râ a nghut. ⁹ Ngò gi, ngá é laiká pé eq nungmoq lé kyuq é su a dut nhâng nau é nghut lhê. ¹⁰ Hkâsu mù gâ le, ra-am gi, "Yhâng é laiká pé gi, gàng bo é eq wum-o bo é nghut ri; nghut kôlhang, yhânggùng gi, byuwup a bo é nghut mù, yhang taí é dang pé gi, haí a nghut." ga taí akô. ¹¹ Ngamoq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui saí râ nghut é hkyô lé, haú sù é bang sê gyo râ dut lhê.

¹² Ngamoq gi, haú yhumsing gùng yhumsing owaq é bâng é hpúng má bo lom é hkyô nghut nghut, yhangmoq eq whuí é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chín lhûm wú é eq yhangmoq gùng yhangmoq whuí lhûm wú kô é hkûn, hpaqchyí a bo é bang dut bekô nghut ri. ¹³ Nghut kôlhang, ngamoq gi, âng é mai lai shoq gumrông râ a nghut é za, ngamoq lé Garai Gasang masat to byí é, nungmoq chyáng lháng hkyit jé shoq nghut é maukyo hkaú má za gumrông râ nghut lhê. ¹⁴ Ngamoq gi, nungmoq chyáng a jé lé wú é dông mai, gyai yhang gumrong nyi râ a nghut; hkâsu mù gâ le, ngamoq gi, Hkrisduq é gabú danglù chûng mù, nungmoq chyáng lháng lé jé bê nghut lhê. ¹⁵ Dum, ngamoq gi, góbang kut é muzó lé le, âng é mai lai luí gumrong

lhai é a nghut. Ngamoq myoqbyu é hkyô gi, nungmoq é lumjîng myit kô myhang jat nyî jâng sheq, nungmoq chyáng ngamoq zui saî é jowò gyaî wó lhoq lâm râ nghut lhê. ¹⁶ Haû gi, nungmoq é mau lháng lai shoq, gabú danglù lé ngamoq wó hko kyo râ matú nghut lhê. Hkâsu mù gâ le, ngamoq gi, góyuq èq zui saî to bê loqzó eq séng luí, gumrông nau é a nghut. ¹⁷ Nghut kôlhang, "Gumrong é sù gi, haû Yhumsîng má gumrông sháng gaq."* ga kê tô ri. ¹⁸ Hkâsu mù gâ le, yhumsîng gùng yhumsîng owaq é sù gi, hap yù huí é a nghut é za, haû Yhumsîng èq owaq byî é sù sheq, hap yù huí é ru nghut lhê.

11

Lagyo Apyoq Pé Eq Poluq

¹ Ngò gi, ngá é ratsuí ngok é dang lé, nungmoq jân pyám byi râ lé myoqbyu é nghut lhê; gè gè yhang, nungmoq gi, haû su kut nyî gù nghut bekô. ² Haî mù gâ le, ngò gi, Garai Gasang mai nungmoq lé magum é myit èq, nungmoq é matú magûm byî lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghû, Hkrisduq nghut é yhumsîng hpô chyáng za nungmoq lé byi zo râ nghû, danggidîq byî to bê nghut lhê. ³ Nghut kôlhang, Ewaq gi, lhangmuí hpaqchyî dâ é èq mhaû zô é huí é su, nungmoq myit é hkyô pé gi, Hkrisduq chyáng nungmoq é lhumzui é eq sansêng é i-myit ap nóng é hkyô mai shuí nghoq ló byuq é hui râ lé, ngò myit chiq ri. ⁴ Hkâsu mù gâ le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é dông hko kyô é nghut nghut, nungmoq hap yu to bê Woi-nyî eq a pung é woi-nyî lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haû lé lui lui za lhom hap yu é dut bekô nghut ri. ⁵ Nghut kôlhang, ngò gi, "Ahkyak-lagyo pé" ga

bâng é htoq má ratsuí lháng gyamgyi gyó sù a nghut nghû myit ngam é nghut lhê. ⁶ Ngò gi, dang taí hpaqchyî kung sù rayuq a nghut kôlhang, sumsé hpaqchyî bò sù nghut lhê. Ngamoq gi, hkyô hkangmó má, nungmoq lé haû hkyô hkyâng shoq sé nhâng bê nghut lhê.

⁷ Ngò, nungmoq lé, Garai Gasang é gabú danglù lé ahpau a yu é za hko kyô é dông, nungmoq lé waq toq râ matú, ngá gùng ngò lhoq nyhum é gi, ngá é mara dut byuq bê lhú? ⁸ Ngò, nungmoq lé dojaú râ matú, gotû noqkuq hpûng pé mai htuqbâng é lé hap yu é gi, haû bâng chyáng mai ngò zik lú yu é dông dut bê nghut lhê. ⁹ Ngò gi, nungmoq eq rahá nyî mù, rajung jung râ é hkûn, ó yuq lé le wòlai a dut nhang é nghut lhê; hkâsu mù gâ le, Makedoni mau mai lé jé é gumang wui gi, ngò haî râ é lé htuqbang byi kô é yanmai nghut lhê. Hká dông nghut kôlhang, ngò gi, ngá gûng lé, nungmoq é matú wòlai a dut nhâng shoq kut bê nghut mù, xoq luí le haû dông kut nyî râ nghut lhê. ¹⁰ Haû Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mâ é bang ó yuq lháng, ngò haû su gumrong é hkyô lé wó hkûm zîng râ a nghut. ¹¹ Haî mù lhú? Ngò, nungmoq lé a chytidap é yanmai nghut lhê lhú? Ngò, nungmoq lé chytidap é hkyô lé, Garai Gasang sê lhê. ¹² Ngò gi, yhangmoq zui saî é lé gumrong é hkyô pé má ngamoq eq rawuí za són byi râ ahko ahkáng ô nau é bang lé ahkáng a byi râ matú, ngò kut nyi é su xoq lui kut shi râ nghut lhê.

¹³ Hkâsu mù gâ le, haû sù é bang gi, lagyo apyoq pé, mhaû zô é mù zui bang, Hkrisduq é lagyo pé dông kut mhaû é bang nghut akô. ¹⁴ Haû gi, maú ra hkyô a joq, hkâsu mù gâ le, Tsadán lháng gi, maubó é mau-mang lagyo rayuq dông kut mhaû é sù nghut lhê. ¹⁵ Haû mù, Tsadán é dui-nhâng zoshâng wui gi, dingmán hkyo é dui-nhâng zoshâng wui dông

* 10:17 Yer 9:24

kut mhaû é nghut jáng, maú dân râ hkyô a joq é nghut lhê. Yhangmoq é ló htâng má gi, yhangmoq kut é eq rajung za hui zo kó râ nghut lhê.

Yhâng É Wuîhke Jamjau Hkyô Eq Séng Luî, Poluq Gumrong É Hkyô

¹⁶ Ngò puq taí kôlé, ó yuq le, ngo lé byù gò dông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrông sháng gaq, byù gò lé nungmoq hap yu é su, ngo lé hap yù kó laq. ¹⁷ Ngò, haû su gumrong é hkyô gi, haû Yhumsîng o é dông ngò taí nyi é a nghut, byù gò rayuq dông taí nyi é ru nghut lhê. ¹⁸ Byù myo myo gi, mingkân é hkyô dông gumrong nyi bum lhê nghut mù, ngò le gumrông râ nghut lhê. ¹⁹ Nungmoq gi, hpaqchyî lûm bo kô é nghut mù, byù go pé lé gabú myit eq jân nyi akô nhung! ²⁰ Gè gè yhang, nungmoq gi, nungmoq lé jùn kut é sù lé le, nungmoq lé rhoî zô é sù lé le, nungmoq chyáng akyû hô zô yu é sù lé le, yhang gûng yhang owaq é sù lé le, nungmoq lé bo-pyuq pyuq é sù lé le, jân nyi akô nghut ri. ²¹ Ngamoq gi, nungmoq lé haû hkyô kut râ má wum gyai nyhôm lhê nghû yín yû râ lé, ngò, hoq ri!

Rayuq yuq, haî lé wám gumrong é nghut jáng, ngò le, haû lé wám gumrong lhê nghû, byù gò rayuq dông ngò taí nyi é nghut lhê. ²² Yhangmoq gi, Hebre byu pé nghut akô lhú? Ngò le nghut lhê. Yhangmoq gi, Israelaq byu pé nghut akô lhú? Ngò le nghut lhê. Yhangmoq gi, Abraham é awut ashîn pé nghut akô lhú? Ngò le nghut lhê. ²³ Yhangmoq gi, Hkrisduq é dui-nhâng zoshâng wuî nghut akô lhú? (Ngò gi, myit a gyîng é sù dông haû su taí é nghut lhê.) Ngò gi, je nghut lhê. Ngò gi, mù zui je shikut bê, htóng anum num je lúng wú bê, je riyhang bat é huî wú bê, shî râ î é adàm dàm huî wú bê nghut lhê. ²⁴ Ngò gi, Yudaq byu pé nuichum eq bat é myi xê dàm byîng râ radàm ra ra dut é, ngo lîng hui zô wú é nghut lhê.

²⁵ Ngò gi, dumbáng eq nhuq huî é sum dàm, shî sháng gaq ga luqgok eq dú huî é radàm, wuî-sanghpo byoq huî é sum dàm, wuimau má myû byôm é ranyí ra-myìn hui zô wú bê nghut lhê.

²⁶ Ngò gi, xoq xoq hkyowuî htoq e ló é hkûn, wuî gû é gyuq chiq jung, damyaq huî é gyuq chiq jung, ngá é amyû wui chyáng mâ é gyuq chiq jung, tûngbaù pé chyáng mâ é gyuq chiq jung, myuq hkaû pé mâ é gyuq chiq jung, yoso pé mâ é gyuq chiq jung, wuimau mâ é gyuq chiq jung eq gumang apyoq pé chyáng mâ é gyuq chiq jung pé hui zô wú bê nghut lhê. ²⁷ Ngò gi, mù lé zui ngú zui hkyik mù, anum num a myang yhup shoq dut wú bê nghut lhê. Ngò gi, zòmut wuî shit huî é eq zoshuq a wó é anum num huî laî lo wú bê nghut lhê. Ngò gi, gyoq hpû é eq gùngchîn dut é huî wú bê nghut lhê. ²⁸ Haû pé lhunglhâng htoq má, noqkuq hpûng pé banshoq é matú ngò myit chiq byî é hkyô gi, nyí wuî ngò má wòlai dut nyi ri. ²⁹ Rayuq yuq wum nyhóm le, ngò le wum a nyhóm râ lhú? Rayuq yuq mara shuí kut shut é hui le, ngò myit a nyé râ lhú?

³⁰ Ngò gumrông râ dut é nghut le gi, ngò wum nyhôm é hkyô lé tûn shit é pé lé gumrông râ nghut lhê. ³¹ Ngò a mhaû nyi é hkyô lé pyat dedu hkya-on huî é sù, haû Yhumsîng Yesuq é Íwa eq Garai Gasang sê lhê. ³² Damaskuq myuq má, Hkohkâm Areta é a-ô mâ é mauzau gi, ngo lé chyup râ matú, myuq lé zúng nhang é nghut lhê. ³³ Nghut kôlhang, ngò gi, manghkoq má lúng mù, myuq xêwâm mâ é hko-hot dong mai lhoq hkyô kat é hui luî, yhâng é loq mai wó lut é nghut lhê.

12

Poluq É Myoqwup Shing-rán Pé

¹ Ngò gi, rû gumrông nyi râ za nghut lhê. Akyû wó râ a nghut kôlhang, haû Yhumsîng chyáng mai lo é myoqwup shing-rán pé eq hpông shit é shing-rán pé lé gumrông râ nghut lhê. ² Ngò gi, laî lò bê raxe myi zân

hkûn, mauhkûng sum tsáng nghu é má shuí toq yu huí é, Hkrisduq má é byù rayuq* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê. ³Yhang hparadisú má shuí toq yu huí é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhang, Garai Gasang gi, sê lhê. ⁴Yhang gi, byu pé taí kyô htoq râ ahkáng a wó é hkyô pé nghut é, a wó taí sân kyô é hkyô pé lé wó gyô ri. ⁵Ngò gi, haú yuq sù é byu é hkyô eq séng luí gumrông râ nghut lhê; nghut kôlhang, ngò gi, ngá é wum nyhóm hkyô eq séng luí, gumrong é mai lai luí, ngá gûng ngò gumrông râ a nghut. ⁶Ngò gi, gumrông hkyô lé hkyin yù râ dut é nghut jáng lhang, byù gò dut râ a nghut, haí mù gâ le, ngò gi, tengmán hkyô taí nyi râ nghut lhê. Nghut kôlhang, ó yuq le, ngò kut é eq ngò taí é mai myit lum to kô é htoq má, ngo lé, je a myit lo ko sháng gaq nghú, ngò a gumrông kut pyâm nyi lhê.

⁷Haú laklaí dik é dông ngo lé hpông shit é shing-rán mó pé é yanmai, ngò a nghutbûn byuq sháng gaq ga, ngo lé gunjang râ matú, Tsadán é lagyo nghut é zu lé, ngá é gungsho má kat byi to bê nghut ri. ⁸Haú lé ngá chyáng mai yu pyám byi râ matú, ngò, Yhumsing lé sum dâm dûng tóngbán wú bê nghut lhê. ⁹Nghut kôlhang, Yhang gi, "Ngá é jeju gi, náng é matú luq dun é nghut lhê; hkâsu mù gâ le, Ngá é a-tsam gi, wum nyhôm é hkyô má lhoq gumjup é hui ri." ga luí, ngo lé taí ri. Haú mù luí, Hkrisduq é a-tsam gi, ngò má wó joq nyi sháng gaq nghú, ngò gi, ngá é wum nyhôm é hkyô pé eq séng luí, gabú myit mai je riyhang gumrông râ nghut lhê. ¹⁰Haú nghut mù luí, ngò gi, Hkrisduq é yanmai, wum nyhôm é hkyô pé má le, rhoi huí é hkyô pé má le, wuihke jam-jau huí é hkyô pé má le, zing-ri huí é hkyô pé má le, awui ahke dut é hkyô

pé má le, gabú nhik dik nyi lhê. Hkâsu mù gâ le, ngò wum nyhôm é hkûn sheq, ngò wúm bo é nghut lhê.

Poluq Chiq Byi É Hkyô

¹¹Ngò gi, ngá gûng ngò byù gò lhoq kut yu bê nghut ri, nghut kôlhang, haú gi, nungmoq kut nhang é nghut lhê. Ngò gi, nungmoq eq owaq é hui ang sù nghut lhê; hkâsu mù gâ le, ngò gi, haí a nghut kôlhang, "Ahkyak lagyo pé" ga bâng é htoq má ratsuí lhang gyamgyi gyó sù a nghut. ¹²Lagyo rayuq é masat kumlhá nghut é, kumlhá pé, mauhpo muzó pé eq laklaí kumlhá pé lé, ngò gi, gyai yhang hkam jan mù nungmoq chyáng kut bê nghut lhê. ¹³Ngò gi, nungmoq é matú, hkâ-nhám le wòlai a dut é nhing, nungmoq gi, hkâsu mù, gotú noqkuq hpûng pé htoq má gyamgyi gyó nyi akô lhu? Ngò, haú hkyô má shut é nghut jáng, mara hkyut pyám byi kó laq!

¹⁴Ahkuí, ngò gi, nungmoq lé, sum lhang nghú râ dâm, lé kum râ ri ri nghut bê mù, nungmoq é matú wòlai gi, a dut râ nghut lhê. Haí mù gâ le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká dông nghut kôle, zo wui gi, mó wui é matú sutzè hkong to byi râ dut é a nghut, mó wui sheq, zô wui é matú hkong to byi râ dut é nghut lhê. ¹⁵Haú mù luí, ngò gi, gyai yhang gabú é myit mai, ngò wó é jung hkanmó lé nungmoq é matú chung jai râ nghut mù, ngá gûng lé lhang chûng jai râ nghut lhê. Ngò, nungmoq lé myô chyitdap é yanmai, nungmoq gi, ngo lé shaú chyitdap kó râ lhu? ¹⁶Ngò gi, nungmoq chyáng wòlai a dut é hkyô têng lhê. Nghut kôlhang, ngò gi, hpaqchyí haq da sù dut mù, mhaú lhiq é dông nungmoq lé chyup yu sù dut byuq bê ga nungmoq ram myit akô myhi-nhung! ¹⁷Ngò gi, nungmoq chyáng nhang kat byi é byù dông, nungmoq chyáng amyat kut zô yù bê nghut lhê lhu? ¹⁸Ngò gi, Tituq lé

* 12:2 Hkrisduq má é byù rayuq gâ é gi, Poluq yhanggûng yhang lé taí nyi é nghut lhê.

nungmoq chyáng lé râ matú wum taí tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq chyáng amyat kut zô é nghut lhê lú? Nga-nhik gi, rajung zâ é myit dông chyat kut mù, rajung zâ é hkyô lé chyat châng é su nhik nghut lhê, a nghut kó lú?

¹⁹ Ngamoq gi, nungmoq hí má ngamoq gùng ngamoq taí hung yu nyi ri nghû, ahkuí jé shoq myit nyi akó lú? Ngamoq gi, Hkrisduq mâ é byu pé dông, Garai Gasâng hí má taí nyi é nghut lhê. Chyitdap é gumang wui ê, ngamoq kut é jung hkanmó gi, nungmoq é akyu matú chyat nghut lhê. ²⁰ Hkâsu mù gà le, ngo lé jé é hkûn, ngò, nungmoq lé dut nhâng nau é su, nungmoq a wó dut kó râ eq, nungmoq, ngo lé dut nhâng nau é su, ngò a wó dut râ lé, ngò myit gyuq ri. Ngò gi, mabyoq jishûm htoq é, manon é, nhik-ûn buq é, byù hpûng gam é, gansang é, lumu é, gyai nghutbûn é eq atau ahû dut é hkyô pé joq râ lé gyuq ri. ²¹ Ngò dum lé jé é hkûn, ngá é Garai Gasang gi, nungmoq é hí má ngo lé myit nyhûm nhâng mù, yhangmoq ô nau é myit châng é má shut é dông nyi zô lúum nau é i-myit, gungsho zùm yap é yubak mara eq a sân-yúng é hkyô kut shut é mai myit a lêng bang myo myô é yanmai, yón kuq é hui zo râ lé, ngò myit chiq ri.

13

Ló Htáng Má Sidiq Byi É Dang Pé

¹ Ahkuí, ngò, nungmoq chyáng lé kum râ gi, sum lêng nghû râ dàam nghut lhê. Haû gi, "Mara hun é hkyô hkanmó lé, í yuq sum yuq saksé hkâm é eq lhoq teng ra râ nghut lhê."* ga kê tô é eq rajung za nghut lhê. ² Ngò gi, í lêng nghû râ dàam nungmoq eq rahá nyi é hkûn, nungmoq lé sidiq byi gû bê nghut lhê. Ahkuí le, nungmoq eq wê gâng tô é u lé, dum taí kôlé, ngò dum jé lé é hkûn, noq mai mara shut tô é bang lé nghut nghut, góbang ó yuq lé nghut nghut,

hkyamsa a byi lo râ nghut lhê. ³ Haû gi, ngò dông mai Hkrisduq dang taí nyi é hkyô saksé shit râ lé, nungmoq dúng nyi kômù nghut lhê. Yhang gi, nungmoq é hkyô lé hkâsu kut shuí-û é hkyô má wum nyhôm é a nghut, nungmoq chyáng a-tsam mó shit sù sheq ru nghut ri. ⁴ Hkâsu mù gà le, Yhang gi, wum nyhôm é má jén sat é hui bê nghut kôlhang, Garai Gasâng é a-tsâm eq dui nyi é gi, hkyak têng lhê. Haû eq rajung za, ngamoq gi, Yhang su wum nyhóm kôlhang, nungmoq lé dojaú râ matú, Garai Gasâng é a-tsâm eq, Yhang eq rahá dui nyi râ nghut lhê.

⁵ Nungmoq gi, lumjîng hkyô má nghut nyi lhê luq, yhumsing gùng yhumsing myi wú keq. Yhumsing gùng yhumsing chyam wú keq. Nungmoq gi, chyam é má sùm byuq é za a nghut jáng, nungmoq chyáng Hkrisduq Yesuq lúng nyi bê hkyô lé sé kó râ nghut lhê. ⁶ Ngamoq gi, chyam é má a sùm é hkyô lé, nungmoq wó sé kó râ nghut lhê nghû, ngò hkyak lum tô lhê. ⁷ Ahkuí, ngamoq gi, nungmoq shut é hkyô haí a kut kó râ matú, Garai Gasâng chyáng kyûdung byi lhê. Haû gi, ngamoq chyam hui lui wó lut é hkyô lé byu pé myàng kó râ matú a nghut é za, ngamoq sùm é su dut kôlhang, nungmoq ge é hkyô kut kó râ lé myàng râ matú nghut lhê. ⁸ Hkâsu mù gà le, ngamoq gi, haû tengmán hkyô eq shaí é dông haí le a ge kut é za, tengmán hkyo é matú za kut râ dut é nghut lhê. ⁹ Ngamoq wum nyhóm kôlhang, nungmoq wúm bo é hkûn, ngamoq gabú é nghut lhê; ngamoq kyûdung é gi, nungmoq gumjup râ matú nghut lhê. ¹⁰ Ngò gi, wê gâng tô é hkûn, haû hkyô pé lé haí mù kê é gà le, ngò jé lé é hkûn, ahkáng ayá lé ngò chung é má htân htân a kut râ matú nghut lhê. Ahkáng ayá haû gi, nungmoq lé lhoq htên pyám râ matú a nghut, nungmoq lé kô myhang lo nhâng râ matú, haû Yhumsing ngo lé byi é sheq ru nghut lhê.

* 13:1 Tarâ Pun 19:15

Ló Htâng É Shi-kyám Dang

¹¹ Ló htáng má ngò tái nau é gi, gumang wuì ê, nguingón yuqyo nyì keq. Gumjup hkyô shut sô nyì keq, ngò dũng tôngbán é dang lé gyo keq, myit rahkat za dut nyì keq, nguingón shoq asak duì nyì keq. Haú hkûn, chyitdap hkyô eq nguingón hkyo é Garai Gasang gi, nungmoq eq rahá nyì nyì râ nghut lhê.

¹² Chyoiyúng é bopuq puq é èq, rayuq eq rayuq shi-kyâm lhum keq.

¹³ Sân-yúng bang banshoq gi, nungmoq lé shi-kyâm kat akô.

¹⁴ Haú Yhumsîng Yesuq Hkrisduq é jeju, Garai Gasâng é chyitdap myit eq Chyoiyúng Woi-nyí é zùm yap hkyô gi, nungmoq banshoq bâng chyáng ru joq nyí sháng gaq ô.

GALATIQ Mau Bâng Chyáng Hun Kat é Laiká (Galatians)

¹ Byu pê chyáng mai le a nghut, ó yuq èq nhang é le a nghut e za, haù Yesuq Hkrisduq lé shí bê mai dum lhoq dui toq yu é sù Íwa Garai Gasang eq Yesuq Hkrisduq chyáng mai nhang kat é lagyo rayuq nghut sù, ngò Poluq gi, ² ngò eq rahá nyi é gumang wui banshoq bang le mú, Galatiq mau má é noqkuq hpûng pê chyáng dang kyô kat lhê.

³ Nga-nhûng é Íwa Garai Gasang eq Yhumsîng Yesuq Hkrisduq chyáng má é, jeju eq nguîngón hkyô gi, nungmoq chyáng ru joq nyi sháng gaq ô. ⁴ Haù Hkrisduq gi, nga-nhûng é Íwa Garai Gasang ô nau é eq rajung za, agè ashop é ipyat shí mai, nga-nhûng lé xe yù râ ga, nga-nhûng é yubak marâ é matú yhânggùng lé Yhang byi pyâm bê nghut ri. ⁵ Haù hpungwup shingkang gi, Garai Gasâng chyáng pyat dedu ahtum abyuq ru joq nyi sháng gaq ô. Amen.

Gotú Gabú Danglù A Joq É Hkyô

⁶ Ngò gi, haù Hkrisduq é jeju mai nungmoq lé ji yù Sù lé, nungmoq haù-í han kâng pyâm to kôluí, shaí é gabú danglù shut lhing ló nyi kô é hkyô lé, gyai yhang maú nyi ri. ⁷ Danglù haù gi, gabú danglù rat-suí lhang a nghut. Byù ra-am mai nungmoq lé lhoq shuk byi luí, haù Hkrisduq é gabú danglù lé, shikut luí lhoq shai nhang pyâm nyi kô é hkyô za nghut lhê. ⁸ Nghut kôlhang, nungmoq lé ngamoq hkô kyo bê gabú danglù mai lai luí, ngamoq nghut nghut, mauhkûng htoq má é mau-mang lagyo rayuq nghut nghut, shaí é gabú danglù, nungmoq lé hko kyô é nghut jáng, haù yuq gi, ahtum abyuq dam byi é hui zo sháng gaq ô! ⁹ Ngamoq taí wú bê eq rajung za,

ahkuí le, ngò dum taí kôlé: rayuq yuq mai, nungmoq hap yu to bê é gabú danglù mai lai luí, gotú hko nyi e nghut jáng, haù yuq gi, ahtum abyuq dam byi é hui zo sháng gaq ô!

¹⁰ Haù su nghu taí é gi, ahkuí, ngò, byù é hí má myoqdong wó râ matú shikut nyi é nghut lhê lhú? Haù a nghut jáng, Garai Gasâng é hí má myoqdong wó râ matú shikut nyi é nghut lhê lhú? Byù lé gabú nhâng râ matú, ngò shikut nyi é nghut lhê lhú? Ngò gi, byu pé lé za ru gabú nhâng nau nyi é nghut le gi, Hkrisduq é dui-nhâng zoshâng dut râ a nghut.

Poluq Lé, Garai Gasang Ji Yu É Hkyô

¹¹ Gumang wui ê, ngò hko kyô é gabú danglù haù gi, byu èq kut htoq é hkyô a nghut é lé, ngò, nungmoq lé sé nhâng nau ri. ¹² Ngò gi, haù lé, byu chyáng mai wó yu é le a nghut, góyuq èq mhoq byi é le a nghut e za, Yesuq Hkrisduq èq shing-rân byi é dông wó hap yu é ru nghut lhê.

¹³ Ngò, Yudaq noqkuq htûng má nghut nyi ashí hkûn, Garai Gasâng é noqkuq hpûng lé ladu lai shoq hkâsu kut zing-ri luí, haù lé lhoq htên shikut wún é, ngá é hí hpyang lhê é asak dui hkyô lé, nungmoq wó gyô wú bekô râ nghut lhê. ¹⁴ Ngò gi, ngò eq rakyam zâ é Yudaq byu pé myo myô é htoq má, Yudaq noqkuq htûng lé je cháng sù nghut é htoq agó, ngá é îchyí íwa pê é htûngli lé ladu lai shoq myit zìng zuq sù nghut lhê. ¹⁵ Nghut kôlhang, ngá nû é unghkaù mai yhang hkyin to luí, Yhang é jeju yanmai ngo lé ji yu é Garai Gasang gi, ¹⁶ haù Yhang Zô é hkyô gabú danglù lé, ngò mai tûngbaù pê chyáng hko kyo sháng gaq ga, Yhang Zo lé ngá chyáng htoq shit nhâng râ matú myit hpyit yu é hkûn, ngò gi, ó yuq eq le a hpyê yù, ¹⁷ Yerusalem wà mó má doq ló luí, ngá hí má lagyo kut é bang lé le a ló huí e za, radá dâm Arabiq mau shut ê luí, Damaskuq myuq má dum taú ló bê nghut lhê.

¹⁸ Sum zân lai é htâng má, ngò gi, Yerusalem wà mó má doq ló mù, Petruq* lé ló hui luí, yhang eq raxe ngo nyí, ló nyi nyi é nghut lhê. ¹⁹ Haú má, Yhumsing é yhanggu Yakuq mai lai luí, lagyo góbang lé ngò a myàng nghut ri. ²⁰ Nungmoq lé ngò ká byí kat é má, mhaú é hkyô a bò nghú luí, Garai Gasâng hí má, hkyak, ngò taí lhê. ²¹ Hau htâng má, ngò gi, Suriq mau eq Kiliki mau má ê jé é nghut lhê. ²² Haú hkûn, haú Hkrisduq má nghut é, Yuda mau má é noqkuq hpúng byû wui gi, ngo lé myoqno a shú kó nghut ri. ²³ Yhangmoq gi, "Hí hkûn, nga-nhúng lé zing-ri sù gi, yhang mai lhoq hten râ matú radàm shikut wú é lumjíng hkyô haú lé, ahkuí hko nyi ri." gâ é hkyanglù lé wó gyô wú kôluí za, ²⁴ ngá é yanmai, Garai Gasang lé hkya-ôn bum akô nghut ri.

2

Poluq Lé Lagyô Pé Lhom Hap Yu É Hkyô

¹ Raxe myi zân lai é htâng má, ngò gi, Barnaba eq rahá Yerusalem wà mó má dum doq ló é hkûn, Tituq lé le shuí chung é nghut lhê. ² Garai Gasang byí é shing-rán eq rajung za doq ló luí, ngò kut wú bê muzó eq ahkuí kut é muzó pé akôm a dut pyám sháng gaq nghú, tungbaù pè chyáng ngò hko kyô nyi é gabú danglù lé, haú suwún dut bâng é hí má za shap kyô é nghut lhê. ³ Nghut kôlhang, ngò eq rahá nghut é Tituq gi, Grik byû nghut kôle, yhang lé ahpyo-kuq a hpyit nhâng kó nghut ri. ⁴ Haú hkaú wang lo é mhaú é gumang wui gi, Hkrisduq Yesuq má ngamoq wó é luthkyô má jowú luí, nga-nhúng lé jùn dut nhâng râ dâ kô é yanmai, haú hkyô gabyông htoq lo é nghut ri.* ⁵ Nghut kôlhang, haú gabú danglù é tengmán hkyô gi, nungmoq chyáng joq gíng nyi sháng gaq nghú, razup za

lháng, yhangmoq é dang lé ngamoq gyo byí é a nghut.

⁶ Ahkyak é byû su dut é bang gi, yhangmoq haí jung kut kôlhang, ngò eq a séng nghut ri; Garai Gasang gi, du lé wú mù jéyáng é sù a nghut; byû haú bang gi, ngá é mungdang má haí le a jat kat e za, ⁷ Petruq gi, Yudaq byu pé† lé, haú gabú danglù hko kyo râ mù má lum tô é hui bê eq rajung za, ngò gi, tungbaù pé‡ lé, haú gabú danglù hko kyo râ mù má lum tô é hui bê hkyô lé za, yhangmoq myang akô nghut ri. ⁸ Hkâsu mù gâ le, Yudaq byu pé é matú Petruq lé lagyo ayá dang byí é sù Garai Gasang gi, tungbaù pé matú ngo lé le lagyo ayá dang byi bê nghut lhê. ⁹ Haú hkungmó-zíng su ahkyak é, Yakuq, Petruq eq Yohan pé gi, ngo lé byi tô é jeju lé myang sé kôjáng, ngò eq Barnaba lé, zùm yap hkyô gâ é loqyo loq eq shi-kyâm yù kôluí, yhangmoq gi, Yudaq byu pé shut, ngá-nhik lé gi, tungbaù pé shut é râ lhê ga, myit hui bekô nghut ri. ¹⁰ Yhangmoq gi, ngá-nhik mai myùng bang lé ru bún nyi râ matú za pying kat akô; haú gi, ngò gyai yhang kut nau nyi é hkyô nghut lhê.

Petruq Lé Poluq Htuq Htîng É Hkyô

¹¹ Antioku wà mó má Petruq jé lé é hkûn, yhang lé mara hún râ hkyô joq é yanmai, ngò gi, byu hí má yhang, yhang lé lhom htuq htîng é nghut lhê. ¹² Hkâsu mù gâ le, Yakuq chyáng mai lé é bang a jé shí é u lé, yhang gi, tungbaù pé eq rahá chôm zo chôm shuq lhaq kut ri. Nghut kôlhang, haú bang jé é hkûn, yhang gi, ahpyo-kuq hpyit râ lhê gâ é hpúng má lom é bang lé gyuq é yanmai, tungbaù pè chyáng mai htoq gang luí, yhang baú nyi tô ri. ¹³ Yhang, gegùn labyoq kut é hkyô má, gotû Yudaq byu pé le bo châng kut akô nghut mù luí, Barnaba lháng yhangmoq kut é gegùn labyoq hkyô má bo châng ngoq ló bê nghut ri.

* **1:18** Petruq lé Kehpa le gâ lhê. * **2:4** Yudaq byu pé ra-am gi, hpúng asik wang é bang lé Yudaq htung tarâ cháng nhâng nau akô nghut ri. † **2:7** Grik má ahpyo-kuq hpyit hkam é bang ga bo tô ri. ‡ **2:7** Grik má ahpyo-kuq hpyit a hkam é bang ga bo tô ri.

14 Haû gabú danglu é tengmán hkyô eq rajung za, yhangmoq a cháng kô é lé myàng jáng, ngò gi, yhangmoq ban-shoq bâng é hí má, Petruq lé, "Nàng gi, Yudaq byù nghut to mù luí, Yudaq byù rayuq dông a nyi e za, tûngbaù rayuq dông nyi luí nhîng, tûngbaù pé lé Yudaq byu pê é htûngli hkâsu kut wó cháng nhâng râ lúhú?

15 Ngamoq gi, yubak dap bang gâ é tûngbaù pé a nghut e za, hkû é buinyi mai yhang, Yudaq byû nghut gû bê nghut lhê. 16 Byù gi, jep é tarâ lé cháng luí mara hkyut san byi huí é a nghut e za, Yesuq Hkrisduq lé lumjîng é yanmai sheq mara hkyut san byi huí é hkyô lé, ngamoq sê lhê. Haû mù luí, ngamoq gi, jep é tarâ lé cháng luí a nghut e za, Yesuq Hkrisduq lé lumjîng é yanmai, mara hkyut sân pyâm byî é hui sháng gaq nghû, Yesuq Hkrisduq lé lumjîng bê nghut lhê; hkâsu mù gâ le, ó yuq le, jep é tarâ lé châng é yanmai, mara hkyut san byî é hui râ a nghut.

17 Ngamoq gi, Hkrisduq má ngamoq é mara hkyut san byî é hui râ hkyô ho nyi é hkûn, yubak dap é bang ngamoq nghut é lé myang é nghut jáng, mara lé gi, Hkrisduq mai kut nhang é nghut lhê lúhú? Ratsuí le a nghut. 18 Ngò gi, ngò hpyoq pyâm bê hkyô lé dum saí kut é nghut jáng, tarâ lu laí é byù ngò nghut é lé tún shit ri. 19 Ngò gi, jep é tarâ eq sêng é má, jep é tarâ é yanmai shî jáng sheq, Garai Gasâng é matú wó dui nyi râ nghut lhê. 20 Ngò gi, Hkrisduq eq rahá jén sat é hui bê nghut mù luí, ngá gûng ngò dui nyi é a nghut lo, Hkrisduq sheq ngò má dui nyi é ru nghut lhê. Ahkuí, ngò gungsho má asak dui nyi é gi, ngo lé chyitdap luí, ngá é matú yhânggûng lé Yhang byî pyâm é, haû Garai Gasâng é Yhangzo lé lumjîng é yanmai ru nghut lhê. 21 Ngò gi, Garai Gasâng é jeju lé tô pyâm é a nghut, hkâsu mù gâ le, dingmán é hkyô lé, jep é tarâ dông wó yu é ru nghut le

gi, Hkrisduq shî hkâm é gi, akôm dut byuq râ nghut lhê." nghû taí é nghut lhê.

3

Lumjîng Myit Lúhú? Jep É Tarâ Lúhú?

1 Galatiq mau má é byùbâm pé ê! Yesuq Hkrisduq gi, tapzîng má jén sat hui bê hkyô lé, nungmoq é myoq má bò nhang to bê le nhîng, ó yuq èq wá nungmoq lé lâng nghoq yû bekô lúhú? 2 Nungmoq gi, haû Woi-nyí lé, jep é tarâ cháng luí wó yû kô é nghut lhê lúhú? A nghut jáng, nungmoq wó gyô yu é gabú danglù lé lumjîng luí wó yû kô é nghut lhê lúhú? Haû rahkat lé za, ngò sê yû nau ri. 3 Nungmoq gi, haû-í yhang bâm akô lúhú? Haû Woi-nyí lé lumhkaû mù kut hî kôluí nhîng, ahkuí, gungsho wum-o lé lumhkaû mù, yhumsîng myit tô é hkyô lé lhoq pán râ matú shikut nyi akô lúhú? 4 Nungmoq, myo myo hpuzô pyâm é gi, akôm nghut akô lúhú? Gè gè yhang, haû gi, akôm nghut byuq bekô lúhú? 5 Garai Gasang, nungmoq lé Yhâng é Woi-nyí byî é htoq agó, nungmoq chyáng laklaí kumlhá kut é gi, jep é tarâ lé nungmoq châng é yanmai nghut akô lúhú? A nghut jáng, nungmoq wó gyô é gabú danglù lé, nungmoq lumjîng é yanmai nghut akô lúhú?

6 "Abraham gi, Garai Gasang lé lumjîng luí, yhang lé dingmán sù ga sôn yu é hui bê nghut ri."* ga, Abraham eq séng luí taí tô é lé myit wú keq. 7 Haû mù luí, lumjîng myit bo é bang gi, Abraham é yhangzô pé* yhang dut bê nghut é hkyô lé sé keq. 8 Lumjîng myit é yanmai, tûngbaù pé lé Garai Gasang mara hkyut san byi râ nghut lhê ga, Chyúmdang mai hí byu-myang to bê nghut mù luí, Abraham lé hí shit kyô tô é gabú danglù gi, "Nang é yanmai, byuhú chângjup gi, shimân jeju wó yû kó râ nghut lhê."* gâ ri. 9 Haû mù luí, lumjîng myit bo é bang gi, lumjîng myit bo é Abraham eq

* 3:6 Apûn 15:6 * 3:7 Abraham é yhangzô pé gâ é gi, Garai Gasâng é yhangzô pé lé gâ é nghut lhê.

* 3:8 Apûn 12:3

rahá, shimân jeju lé myang hkam yù kó rá nghut lhê.

¹⁰ Jep é tarâ châng é hkyô má ngè hkau é lhunglhâng bang gi, nhîng pyâm é hui bang chyat nghut lhê. Hkâsu mù gâ le, "Tarâ laiká má kê tô é lhunglhâng lé a xoq kut é sù, ó yuq nghut kôle, nhîng pyâm é hui kó rá nghut lhê."✧ ga luí, kê tô ri. ¹¹ Hau htoq agó, "Haù dîngmán sù gi, lumjîng myit mai asak duì rá nghut lhê."✧ ga kê tô é yanmai, ó yuq nghut kôle, Garai Gasâng é hí má jep é tarâ lé châng luí, mara hkyut san byí é a huí é hkyô gi, san za nghut bê nghut ri. ¹² Haù jep é tarâ gi, lumjîng myit eq haí a sêng é nghut luí, "Haù pé dông châng é sù gi, haù pé mai asak duì rá nghut lhê."✧ ga kê tô ri. ¹³ Haù Chyúmdang má, "Sik zîng má jén lhâng to huí é sù ó yuq nghut kôle, nhîng pyâm é hui sù nghut ri."✧ ga kê tô é eq rajung za, Hkrisduq gi, nga-nhûng é matú nhîng pyâm é hui sù dut bê nghut é yanmai, jep é tarâ má é nhîng é hkyô mai nga-nhûng lé hkyi yù bê nghut ri. ¹⁴ Haù Abraham lé byí tô é shimân jeju gi, Hkrisduq Yesuq é yanmai tûngbaù pé chyáng le jé sháng gaq ga, Yhang nga-nhûng lé hkyi yu é nghut ri; haù mù, nga-nhûng gi, danggidiq byí tô é Woi-nyí haù lé, lumjîng myit mai wó yù rá nghut lhê.

Jep E Tarâ Eq Danggidiq

¹⁵ Gumang wuì ê, nyí wuì é asak duì hkyô má é lé dangtú yù mù, ngò nungmoq lé taí kôlé, byù mai chòm tô tô é dangshikaq lé, ó yuq eq le wó lhoq hpyoq pyám rá a nghut, ó yuq eq le haù má wó jat kat rá a nghut. ¹⁶ Abraham eq yhâng é awut ashín lé byi tô é danggidiq le haù eq rajung za nghut ri. "Awut ashín pé lé" gâ é dang gi, byù myo myo lé gâ lhê; nghut kôlhâng, haù Chyúmdang má, haù lé taí nau é a nghut e za, "náng é awut ashín lé"✧ ga taí nau é ru nghut lhê, haù é lichyúm gi, byù rayuq lé za taí é

nghut lhê, haù gi, Hkrisduq nghut ri; ¹⁷ haù mù luí, ngò taí nau é gi, Garai Gasang, dangshikaq tô tô é htâng, myí sho sum xê zàn má lé joq é tarâ gi, dangshikaq haù lé le wó lhoq hpyoq pyám rá a nghut, danggidiq lé le wó lhoq htên pyám rá a nghut. ¹⁸ Hkâsu mù gâ le, haù silí wunlí gi, jep é tarâ eq sêng lhûm é nghut jáng, danggidiq eq gi, haí le a sêng lhûm lo nghut ri; nghut kôlhâng, Garai Gasang gi, Yhâng é jeju yanmai, Abraham lé danggidiq dông silí wunlí haù byí to bê nghut ri.

¹⁹ Haù su nghut jáng, haù jep é tarâ gi, hai akyû bò rá lú? Haù gi, danggidiq dông lhoq âng tô é Awut ashín nghut é sù jé lé é hkûn jé shoq, mara kut shut nyi bùm kô é yanmai, jat kat tô é nghut lhê; jep é tarâ haù gi, maumang lagyô pé mai gyoro sô xoq byi sù† é loq dông byí tô é ru nghut lhê. ²⁰ Gyoro sô xoq byi sù gi, rahkyam shut mâ é bang eq baù sêng é a nghut, nghut kôlhâng, Garai Gasang gi, rayuq za nghut lhê.

²¹ Haù mù luí, jep é tarâ gi, Garai Gasâng é danggidiq pé eq htuq htîng lhûm lhê lú? Ratsuí le a nghut. Hkâsu mù gâ le, duì é asak wó byí é jep é tarâ lé byi to bê nghut le gi, gè gè yhang, dîngmán hkyô gi, jep é tarâ mai lò rá nghut lhê. ²² Nghut kôlhâng, mingkan gón mâ é bang gi, yubak marâ é htongbyu pé chyat nghut akô ga Chyúmdang má bo tô ri; haù mù luí, haù byí to bê danggidiq lé gi, Yesuq Hkrisduq lé lumjîng é bang lé byi rá nghut lhê.

²³ Lumjîng hkyô haù a jé shimá, nga-nhûng gi, haù jep é tara eq htongbyû dông lhûng tô é hui luí, lumjîng hkyô haù htoq shit é hkûn jé shoq myhî lhûng tô é huí wú bê nghut lhê. ²⁴ Haù mù luí, nga-nhûng gi, lumjîng é yanmai mara hkyut san byí é hui sháng gaq ga, jep é tarâ gi, nga-nhûng lé Hkrisduq chyáng shuí é rá matú, nga-nhûng é hkyô-u shê sù dut bê nghut ri. ²⁵ Ahkuí kúm

✧ **3:10** Tarâ Pun 27:26 ✧ **3:11** Hbk 2:4 ✧ **3:12** Nhong 18:5 ✧ **3:13** Tarâ Pun 21:23 ✧ **3:16** Apûn 12:7; 13:15; 24:7 † **3:19** Gyoro so xoq byi sù gi, Mosheq nghut ri.

gi, haû lumjîng hkyô jé bê nghut é yanmai, nga-nhúng gi, haû jep é tarâ mai hkyô-u shê é loq hkaû má a nghut lo.

Garai Gasâng É Yhangzô Pé

²⁶ Nungmoq lhunghâng bang gi, Hkrisduq Yesuq lé lumjîng é yanmai, Garai Gasâng é yhangzô pé nghut bê; ²⁷ Hkrisduq má wui-myhup hkâm bê é bang nungmoq banshoq gi, Hkrisduq lé mebu su wut to bekô nghut ri. ²⁸ Nungmoq lhunghâng bang gi, Hkrisduq Yesuq má rading ralhum za nghut é yanmai, Yudaq byù nghu é eq Grik nghu é, jùn nghu é eq luthkyô nghu é, yuqgè nghu é eq myiwe nghu é, a gam hkoq lo nghut ri. ²⁹ Nungmoq gi, Hkrisduq eq séng bekô nghut jáng, Abraham é awut ashîn pé le, haû danggidiq eq rajung za silí wunlí hkam yù bang le, nghut akô nghut ri.

4

¹ Ngò tái nau é lichyúm gi, haû amyû hkûng xoq dut râ sù gi, ikun sutzè banshoq lé sîng ang sù nghut kôlhâng, yhang, zoshâng nghut ashî hkûn gi, jùn hpó eq haî a shaî nghut ri. ² Yhang gi, yhâng wa masat tô é ahkyíng jé shoq, yhang lé zúng é sù eq yhûm lé up su é a-ô má ru lúng nyi ashî nghut ri. ³ Haû eq rajung za, nga-nhúng le zoshâng* nghut é hkûn gi, mingkan uphkâng tarâ ô má jùn dut nyi é bang nghut lhê. ⁴ Nghut kôlhâng, ahkyíng lo ngap jáng, zo dut râ ahkáng lé byíng shoq, nga-nhúng wó yù sháng gaq ga, Garai Gasang gi, jep é tarâ hkaû mâ é byu pé lé hkyi yù râ matú, ⁵ jep é tarâ hkaû má, myiwe mai hku kat nhang é Yhang Zo lé, nhang kat byi bê nghut ri. ⁶ Hkâsu mù gâ le, nungmoq le, zo wuî nghut bê yanmai, "Aba, Áwa ê." ga dat wut é, Yhang Zô é Woi-nyí lé, Garai Gasang gi, nga-nhúng é i-myt unghkaû má kat byi bê nghut ri. ⁷ Haû mù luí, nàng gi,

jùn a nghut lô e za, zo rayuq nghut bê nghut ri; nàng gi, zo rayuq nghut é yanmai, Garai Gasang gi, nang lé Yhâng é amyû hkûng xoq dut nhâng bê nghut ri.

Galatiq Mau Bang Lé Poluq Myit Chiq Byi É Hkyô

⁸ Hí hkûn, Garai Gasang lé nungmoq a sé shî é u lé, nungmoq gi, nat hparà lhâng a nghut bâng é a-ô má jùn dut é bang nghut ri. ⁹ Ahkuî kúm, Garai Gasang lé nungmoq sé bê nghu é htoq agó, Garai Gasang gi, nungmoq lé sé bê nghut le nhîng, nungmoq gi, hkâsu mù, haû wum nyhôm é eq akyû a byi é, mingkan uphkang é tarâ shut dum lhîng taû ló nyi akô lhú? Nungmoq gi, haû pé èq jùn zô é dum hui zó nau akô lhú? ¹⁰ Nungmoq gi, buinyi wú, lhohkyap wú, ahkyíng yam-yoq wú, zanwut wú é hkyô pé lé, ahkyak kut nyi ashî kó nhung! ¹¹ Nungmoq chyáng ngò wum kat pyâm é hkyô gi, akôm dut bê abe nghu, nungmoq é matú ngò myit chiq nyi ri.

¹² Gumang wui é, ngò gi, nungmoq su dut bê nghut é yanmai, nungmoq le ngò su dut keq† nghu, nungmoq lé dúng tôngbán kat lhê. Nungmoq gi, ngo lé haî le a kut shut wú kô é nghut lhê. ¹³ Sâng-hî dâm ngò nungmoq lé gabú danglù hko kyo é hkyô gi, nungmoq sê é eq rajung za, ngò nòhpyo huí é yanmai nghut lhê. ¹⁴ Ngá é nòhpyo gi, nungmoq é matú wuîhke hkyô dut kôlhâng, nungmoq gi, ngo lé a wú tiq pyám kô é htoq agó, a wú chaq pyám kó e za, Garai Gasâng é maumang rayuq lé su le, Hkrisduq Yesuq lé su yhang le, ngo lé lhom hap yù kô é nghut lhê. ¹⁵ Haû sù é nhîng, nungmoq é gabú hkyô banshoq gi, haî dut byuq bekô lhú? Nungmoq gi, ru wó dut é nghut jáng, nungmoq é myoqjí lé choq yù mù, ngo lé wám byi pyám kó râ í dut lai lò bê hkyô lé, ngò saksé wó hkâm lhê. ¹⁶ Ahkuí, ngò gi, nungmoq lé haû tengmán hkyô tái

* **4:3** Bun zo shî má, zoshâng gâ é lichyúm gi, Yesuq lé a lumjîng shî é bang lé gâ lhê. † **4:12** Ngò su dut keq gâ é lichyúm gi, nungmoq le ngò su jep é tarâ mai lut htoq keq gâ nau é nghut lhê.

kyô é yanmai, nungmoq é gyè dut to bê nghut lhê lú?

17 Haû byù góbang gi, nungmoq lé gyai shirong é hkyô tún shit ri; nghut kôlhang, ge é hkyô haî a bò; yhangmoq ô nau é hkyô gi, yhangmoq lé nungmoq taû shirông kó abe ga, nungmoq lé ngamoq chyáng mai lhoq kâng yù râ matú ru nghut lhê. 18 Ge é hkyô lé shirong é gi, ge lhê; ngò eq rahá nyi é hkûn za a nghut, hkâ-nhám le haû su shirong le ge lhê. 19 Ngò chyitdap é zo wuí ê, Hkrisduq é a-kyang nungmoq má gumjup lo é jé shoq, ngò gi, zo hkû nô no é sù radàm dum hkâm zô nyi luî, 20 nungmoq é hkyô lé myit wuîhkê tô é yanmai, ahkuî, nungmoq eq rahá myang nyi mù, ngò taî é danghtê wó htaî râ matú, gyai yhang myoqbyu nyi lhê ô.

Hagara eq Sarah Nhik É Hkyô

21 Haû jep é tarâ ô má nyi nau é bang ê, nungmoq gi, jep é tarâ má taî é hkyô lé a sê gyo kô é nghut lhê lú? Ngo lé taî kyô wú kó laq. 22 Hkâsu mù gâ le, Abraham gi, yuqzo í yuq wó ri; rayuq gi, jùn myhî é yhangzo, rayuq gi, jùn myhî a nghut su é yhangzo, ga kê tô ri. 23 Haû jùn myhî é yhangzo gi, gungsho dông hku lé é sù nghut kôlhang, jùn myhî a nghut su é yhangzo kúm gi, danggidiq eq rajung za hku lé é sù ru nghut lhê.

24 Haû hkyô pé gi, dangtú ru nghut lhê, myiwe haû í yuq gi, dangshikaq í lhum eq wuí lhê; dangshikaq ralhum gi, Sinaq Bùm mâ é† nghut luî, jùn dut râ nghut é zo wuí lé hku kat é Hagara lé taî nau é nghut ri. 25 Hagara haû gi, Arabiq mau mâ é Sinaq Bùm lé taî nau é nghut luî, ahkuî lhê é Yerusalem eq wuí nyi ri. Hkâsu mù gâ le, Yerusalem haû gi, yhang zô pé eq rahá, jep é tara é jùn dut nyi kô é yanmai nghut lhê. 26 Nghut kôlhang, ahtoq mâ é Yerusalem gi, jùn myhî a nghut sù nghut luî, nga-nhông é înu nghut ri. 27 Hkâsu mù gâ le,

"Zoshâng a hku é baùdung myhî ê, gabú nyi aq. Zo hkû nô a no wú shî é myiwe gi, gabú luî, gabú garû nyi aq;

hkâsu mù gâ le, haû chamchyuiyui dut é myiwe myhî gi, làng wó é myiwê htoq má zo wuí je myô wó bê nghut ri."

ga kê tô ri.✧

28 Gumang wuí ê, ahkuî, nungmoq gi, Isak su, danggidiq byî tô é zo wuí nghut bê nghut ri. 29 Haû hkûn lé, haû gungsho dông hku lé lo é sù gi, Woinyî wum-o dông hku lé lo é sù lé zing-rî ri. Haû eq rajung za, ahkuî le dut nyi ri. 30 Nghut kôlhang, Chyúmdang má hkâsu ga kê tô ri lhú gâ le, "Haû jùn myhî eq yhangzo yuqzo lé hkat htoq pyám aq; hkâsu mù gâ le, haû jùn myhî é yhangzo yuqzo gi, jùn myhî a nghut su é yhangzo yuqzo eq rahá, silí wunlí lé wó chôm hkam yù râ a nghut."✧ gâ ri. 31 Haû mù luî, gumang wuí ê, nga-nhông gi, jùn myhî é yhangzô pé a nghut e za, jùn myhî a nghut su é yhangzô pé ru nghut lhê.

5

Hkrisduq Mâ É Luthkyô

1 Nga-nhông luthkyô wó râ matú, Hkrisduq gi, nga-nhông lé lhoq lhut kat bê nghut ri. Haû mù luî, haû má ru gîng nyi mù, yhumsing gùng lé jun é wólai hkaû má hkâtaû bainaî nyi kó.

2 Ngá dang lé matsing yù keq! Ngò Poluq, nungmoq lé taî kyo kôlé, nungmoq ahpyo-kuq hpyit hkam yù kô é nghut jáng, Hkrisduq gi, nungmoq é matú hai akyû le bò kó râ a nghut.

3 Hau htoq agó, ahpyo-kuq hpyit hkam yu é sù ó yuq lé nghut kôle, ahpyo-kuq hpyit é sù gi, jep é tarâ lunglhang lé châng kut râ lhê nghú, ngò kyô kat lhê. 4 Jep é tarâ châng shikut é dông mara hkyut san byî é hui naû bang, nungmoq gi, Hkrisduq eq gâng lhúm to bekô nghut luî, haû Garaî jeju mai le byit gyó byuq bekô nghut ri. 5 Ngamoq kúm gi,

† 4:24 Sinaq Bùm mâ é dangshikaq gi, jep é tarâ eq sêng é dangshikaq nghut lhê. ✧ 4:27 Esai 54:1

✧ 4:30 Apûn 21:10

myit myoqbyu tô é dingmán hkyô lé, haû Woi-nyí é yanmai lumjǐng myit èq gyai yhang láng nyi é bang nghut lhê.
⁶ Hkâsu mù gâ le, Hkrisduq Yesuq má gi, ahpyo-kuq hpyit é nghut nghut, ahpyo-kuq a hpyit é nghut nghut, hai akyû a bò nghut ri; chyitdap myit mai htoq lo é lumjǐng myit za sheq, akyû bo lhê.

⁷ Nungmoq gi, rago din wú bekô* nghut é wá, haû tengmán hkyô lé a cháng sháng gaq ga, nungmoq lé ó yuq èq hkùm zing pyám kô é l hú? ⁸ Haû su kut mhoq hpyoq yu é hkyô gi, nungmoq lé ji yù Su chyáng mai htoq lo é a nghut. ⁹ "Mún ratsuí zo gi, muk long gón lé wó lhoq daú lhê."† gâ é dang joq lhê. ¹⁰ Nghut kôlhang, nungmoq gi, gotû hkyô dông a lhom yù kó râ nghut lhê nghû, Hkrisduq má hkyak ngò myit lum nyi lhê. Nungmoq lé lhoq byok byí é sù, ó yuq nghut kôle, yhumsing é mara eq rajung za dam byí é hui zo râ nghut lhê. ¹¹ Gumang wuì ê, ahpyo-kuq hpyit é hkyô lé, ngò rû hko nyi ashî nghut le gi, haî mù luí, zing-rí é lé ngò hui zô nyi râ l hú? Haû su kut é nghut jáng, haû tapzǐng eq séng luí, manghkáng joq râ a nghut lo. ¹² Nungmoq lé lhoq byok nyi é bang gi, hau htoq chyân luí, yhumsing gùng yhumsing ban-shoq hpyit pyám kó sháng gaq nghû, ngò wó myit ri.

¹³ Gumang wuì ê, nungmoq gi, luthkyô wó râ matú ji yù huí é bang nghut akô; nghut kôlhang, nungmoq é luthkyô ahkáng lé, yubak gungsho má hkácháng nhâng kó, chyitdap myit mai kúm gi, rayuq eq rayuq dojaú lhûm nyi keq. ¹⁴ Hkâsu mù gâ le, "Náng gùng lé nàng chyitdap é su, náng é chyagnâm mâ é bang lé le chyitdap aq."* gâ é hkunmó má za, jep é tarâ banshoq lo bo to bê nghut lhê. ¹⁵ Nungmoq, rayuq eq rayuq ngat lhum myui lhûm nyi kô é nghut le gi, rayuq eq rayuq lhoq htên pyám

lhum kó râ nghut é lé, sidiq nyi keq.

Woi-nyí Èq Asak Dui Râ Hkyô

¹⁶ Nghut kôlhang, ngò taí kôlé, Woi-nyí shuí û é dông asak dui nyi keq; haû hkûn, nungmoq gi, yubak gungsho ô nau é hkyô cháng kó râ a nghut. ¹⁷ Hkâsu mù gâ le, yubak gungsho ô nau hkyô gi, Woi-nyí eq shai lhûm nyi; Woi-nyí gi, yubak gungsho ô nau hkyô eq shai lhûm nyi, dut ri. Haû í lhum gi, gyè dut lhûm ri; haû mù, nungmoq gi, yhumsing ô nau é dông hkâkut kó. ¹⁸ Nghut kôlhang, nungmoq lé Woi-nyí èq hkyô hî é nghut jáng, nungmoq gi, jep é tarâ ô má a nghut lo nghut ri.

¹⁹ Yubak gungsho é muzó gi, de de yhang nghut lhê; haû pé gi, ashop é dông gungsho zùm yap é hkyô, a sân-yúng é hkyô, shut é dông nyi zô lhûm nau é myit, ²⁰ hparà noq hkyô, myoqheq mù kut é hkyô, a jú é hkyô, byoq lhûm é hkyô, manon é hkyô, nhiksoq sup é hkyô, yhumsing wuizat é hkyô, gâng lhum sê é hkyô, hpúng gam é hkyô, ²¹ ningsû é hkyô, í shuq wut é hkyô, zo yê shuq yê mù ahaq achyut kut é hkyô pé eq haû pé su kut é gotû hkyô pé nghut ri; haû su kut nyi yap é bang gi, Garai Gasâng mingdán é silí wunlí lé wó hkam yù râ a nghut nghû, ngò, hí hkûn nungmoq lé taí wú bê eq rajung za, ahkuí lé, nungmoq lé ngò sidiq byí nyi lhê.

²² Nghut kôlhang, Woi-nyí é ashî gi, chyitdap hkyô, gabú hkyô, ngu-íngón hkyô, myit hǐng hkyô, nhik-u nû é hkyô, ge é hkyô, lhumzui hkyô, ²³ nûm é hkyô, yhumsing gùng lé wó hkan é hkyô pé nghut ri. Haû hkyô pé lé hkùm zing pyám râ tarâ haî le a joq nghut ri. ²⁴ Hkrisduq Yesuq eq séng bê bang kúm gi, yubak gungsho ô nau hkyô lé le, hau é yut yut ô nau myit eq shirong é hkyô pé lé le, tapzǐng má jén sat pyám bekô nghut ri. ²⁵ Nga-nhúng gi, Woi-nyí mai asak

* 5:7 Rago din wú bekô gâ é gi, woi-nyí hkyô má kô myhang laí lò bê lé taí nau é nghut lhê. † 5:9 Shut é dông mhoqshit é hkyô ratsuí gi, muk long gón lé mún èq wó lhoq daú é su, nungmoq banshoq lé wó lhoq nghoq yu pyám lhê. ✨ 5:14 Nhung 19:18

dui bê nghut mù, haû Woi-nyí htâng châng nyí sháng. ²⁶ Nga-nhúng gi, akôm gyáng dang taí luí, rayuq eq rayuq jeq ho lhùm é eq manon lhùm é bang, a dut nyí sháng gaq.

6

Lhunglhang Bang Lé, Ge É Hkyô Kut Byi Râ Hkyô

¹ Gumang wuì ê, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nùm é myit èq haú yuq lé lhoq pun lhoq kyíng yù keq. Nghut kôlhang, nàng gi, gunglaú é a hui sháng gaq, sidiq nyí aq. ² Rayuq eq rayuq é wòlai lé té byí lhùm nyí keq; haú dông mai, nungmoq gi, Hkrisduq é tarâ lé wó lhoq dik kó râ nghut lhê. ³ Rayuq yuq gi, yhumsing gùng haí le a nghut é wá, ahkyak su ngam é nghut jáng, haú yuq gi, yhumsing gùng lé mhaú pyâm é sù nghut ri. ⁴ Yuq hkangmó gi, yhumsing nyí yap é hkyô lé taú myit wú keq; haú hkún, yhumsing gùng lé góbang eq whuí nó a râ e za, yhumsing gùng má aróng wó yû râ nghut lhê. ⁵ Hkâsu mù gâ le, yuq hkangmó gi, ó le ô wò lé wùn waq ra râ dut lhê.

⁶ Haú mungdang lé mhoq yu é sù gi, mhoqshit byi sù lé, ge é zè banshoq gàm byi sháng gaq.

⁷ Garai Gasang lé gi, wó rhoí râ a nghut, yhumsing gùng yhumsing mhauzô é hkâhui nhâng kó; byù gi, hô kat é eq rajung za, shù yù râ nghut lhê. ⁸ Haú yhumsing é yubak gungsho lé lhoq ngón râ matú hô kat é sù gi, myit haú mai htên byoq é hkyô lé myang hkam yù râ nghut lhê; haú Woi-nyí lé lhoq ngón râ matú hô kat é sù kúm gi, Woi-nyí haú mai ahtum abyuq é asak lé myang hkam yù râ nghut lhê. ⁹ Nga-nhúng gi, ge é hkyô kut é má nú byuq é bang a dut sháng gaq, hkâsu mù gâ le, haú lé nga-nhúng a tô pyâm é nghut jáng, ahkyíng yamyoq jé é hkún, nga-nhúng gi, akyû myang hkam yù râ nghut lhê. ¹⁰ Haú

mù luí, nga-nhúng gi, kut râ ahkyíng wó tô é u lé, byù lunglhang bang lé ge é hkyô kut byi sháng, haú lumjíng hkyô eq sêng é ikun byu pé lé, je riyhang kut byi sháng.

Ahpyo-kuq Hpyit É Hkyô A Nghut E Za, Byù Sik Hpân Huí É Hkyô

¹¹ Ngò, nungmoq lé, ngá é loq èq hkâ-í kô é laiká cham kâ kat byí é lé, wú wú keq!

¹² Ahtoq pyâm za ge é hkyô lé kut shit nau é bang gi, ahpyo-kuq hpyit kó sháng gaq ga, nungmoq lé zik shikut nyi é bang nghut akô; yhangmoq haú su kut é hkyô gi, Hkrisduq é tapzing é yanmai zing-ri huí é hkyô lé, koi pyám râ matú za nghut ri. ¹³ Hkâsu mù gâ le, haú ahpyo-kuq hpyit é bang lhang jep é tarâ lé a cháng kó nghut ri; nghut kôlhang, yhangmoq gi, nungmoq é gungsho eq séng luí wó gumrông kó sháng gaq ga, nungmoq lé ahpyo-kuq hpyit nhâng nau akô nghut ri. ¹⁴ Ngò kúm gi, nga-nhúng é Yhumsing Yesuq Hkrisduq é tapzing eq séng luí gumrong é mai lai luí, haí má le a gumrông sháng gaq; Yhang é yanmai, mingkan gi, ngá é matú jén sat é hui bê; ngò gi, mingkân é matú jén sat é hui bê nghut lhê. ¹⁵ Ahpyo-kuq hpyit é hkyô nghut nghut, a hpyit é nghut nghut, hai akyû a bò; byù sik hpân huí é hkyô za sheq, ahkyak é nghut lhê. ¹⁶ Tarâ haú lé châng é lunglhang bâng é ahtoq má le, haú Garai Gasang é Israelaq byu pé* é ahtoq má le, nguínón hkyô eq shogyo nhikmyin hkyô gi, ru joq nyí sháng gaq ô.

¹⁷ Ahkuí mai gi, ó yuq le ngo lé jamjau a lhoq htoq byi lo sháng gaq; hkâsu mù gâ le, ngò gi, Hkrisduq é dui-nhâng zoshâng nghut é saksé damhkô lé wun wùn lhê.

¹⁸ Gumang wuì ê, nga-nhúng é Yhumsing Yesuq Hkrisduq é jeju gi, nungmoq é woi-nyí eq ru joq nyí sháng gaq. Amen.

* **6:16** Bun zo shí lhum mâ é Israelaq byu pé gâ é gi, hpúng byù wuì banshoq lé taí nau é nghut lhê.

EHPESU Pê Chyáng Hun Kat é Laiká (Ephesians)

¹ Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyi é, Hkrisduq Yesuq má lhumzui bang nghut é, haû sân-yúng bâng chyáng nguingón dang shit kyô kat lhê.

² Nga-nhung é Îwa Garai Gasang eq Yhumsîng Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyí sháng gaq ô!

Hkrisduq Mâ É, Woi-nyí Hkyô Shimân Jeju Pé

³ Mauhkûng htoq tsáng myhâng má, woi-nyí hkyô eq sêng é shimân jeju jung hkgangmó lé, Hkrisduq má nga-nhung lé shimân byi sù, nga-nhung é Yhumsîng Yesuq Hkrisduq é Yhângwa, Garai Gasang gi, hkungsô wó nyí sháng gaq. ⁴ Hkâsu mù gâ le, nga-nhung gi, Garai Gasâng é hí má, chyoiyúng é bang eq mara a bo é bang dut râ matú, Garai Gasang gi, mingkan lé a hpân shi mai, Hkrisduq Yesuq má nga-nhung lé hkyin yu to bê nghut ri. ⁵ Hau htoq agó, Yhang, nga-nhung lé chyitdap é yanmai, Yhang myit nguì ô nau é eq rajung za, Yesuq Hkrisduq mai yhangzô pé kut yu râ matú, hí mai nga-nhung lé masat to bê nghut ri. ⁶ Haû mù, Yhang chyitdap é Sù* má, nga-nhung lé laí laí byi bê nghut é, hpungwup shingkang bo é jeju chyunghuq lé, chôm hkya-on sháng. ⁷ Garai Gasâng é agùn agó é jeju yanmai, nga-nhung mara hkyut byi é hui luí, Yhang Zô é sui dông mai, nga-nhung gi, Yhang má hkyi yù hkyô wó yu é nghut lhê. ⁸ Jeju haû lé gi, hpaqchyí byéng-yá eq sê gyô é nyan banshoq le kut, Yhang, nga-nhung lé agùn agó byi bê nghut lhê. ⁹ Garai Gasang gi, Yhang myit nguì é

eq rajung za, Hkrisduq dông mai kut râ matú hen to bê nghut é, Yhâng é zaú tô é hkyô lé, nga-nhung lé shit bê nghut ri. ¹⁰ Sê gyo wuí é hkyô haû gi, lhoq dik râ ahkyíng jé jáng, mauhkûng htoq eq myigùng htoq mâ é lhunglhang lé, Hkrisduq má rading ralhum za kut râ nghut é hkyô nghut lhê.

¹¹ Hkrisduq má sâng-hi myit myoqbyù bang nghut é nga-nhung gi, Yhâng é hpungwup shingkang lé hkya-on kungtôn sháng gaq ga, ¹² Garai Gasang gi, Yhang myit sôn tô é lhunglhang lé ban kut mù, Yhâng ô nau é dông, hí mai myit hpyit doqdân to bê eq rajung za, nga-nhung lé le, Hkrisduq má hkyin yu to bê nghut ri. ¹³ Hau htoq agó, nungmoq le, nungmoq é hkyi yù hkyo é gabú danglù gâ é tengmán mungdang lé wó gyo kô é hkûn, Hkrisduq eq sêng é bang dut bekô nghut ri. Nungmoq gi, Hkrisduq lé lumjîng bekô nghut é yanmai, haû gidiq byi tô é Chyoiyúng Woi-nyí dizik htung tap byi é hui bekô nghut ri. ¹⁴ Garai Gasâng é hpungwup shingkang lé hkya-on râ matú, Yhang eq sêng é byu pé hkyi xe yù huí é hkyíng jé shoq, Chyoiyúng Woi-nyí haû gi, nga-nhung é muizè lé hkyak wó yù râ nghu é masat nghut ri.

Poluq Kyûdung Byi É Hkyô

¹⁵ Haû mù luí, Yhumsîng Yesuq lé nungmoq lumjîng é hkyô eq sân-yúng bang lhunglhang lé nungmoq chyitdap é hkyô lé, ngò wó gyô é yanmai, ¹⁶ ngò gi, ngá é kyûdung dang má nungmoq lé myit bun uchyang, anum yhang, nungmoq é matú jeju hkya-on nyi lhê. ¹⁷ Nga-nhung é Yhumsîng Yesuq Hkrisduq é Garai Gasang nghut é, hpungwup shingkang bò sù haû Îwa gi, Yhang lé nungmoq je sé râ matú, hpaqchyí byéng-yá wó byi é eq san za wó sé nhang é Woi-nyí, nungmoq lé byi sháng gaq nghû, ngò, Yhâng chyáng dúng nyi lhê. ¹⁸ Hau htoq agó, Yhang,

* **1:6** Yhang chyitdap é Sù gâ é gi, Yesuq lé tái nau é nghut lhê.

nungmoq lé ji yu é myit myoqbyù hkyô, hkasû é nghut é lé le, Yhâng é hpungwup shingkang bo é muizè gi, sân-yúng bâng chyáng agùn agó joq nyi é hkyô lé le, Yhâng é kô dik é a-tsam mó gi, lumjǐng bang nga-nhúng é matú nghut é lé le, ¹⁹ nungmoq wó sé rã matú, nungmoq é myit myoqjí lhoq gyeng byí é hui sháng gaq nghú, ngò kyúdung byí nyi lhê. A-tsam mó haú gi, Garai Gasang, Hkrisduq lé shi é mai lhoq dui toq yú mù, ²⁰ mauhkúng htoq tsáng myhâng má, Yhâng é loqyò hkyam shut zùng nhang é hkûn, chung é wum-o a-tsam mó eq rajung za nghut ri. ²¹ Hkrisduq gi, uphkan é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhâng é myìng lhunghâng é htoq má le, je gyaú é sù nghut lhê. ²² Hau htoq agó, Garai Gasang gi, lhungháng lé Yhâng é hkyiwa ô má tô to luí, haú noqkuq hpúng é matú, Yhang lé, jung hkangmó é ushuq dut rã dông masat to bê nghut ri. ²³ Noqkuq hpúng haú gi, Hkrisduq é gungdu nghut luí, hkyô hkangmó má jung hkangmó lhoq byíng jup é Hkrisduq byíng nyi é nghut ri.

2

Hkrisduq Má Asak Dui É Hkyô

¹ Laí ló bê hkûn, nungmoq gi, tarâ lu laí é eq mara kut shut é hkyô pé é yanmai, shi tô é bang dut kô é nghut lhê. ² Haú hkûn, nungmoq gi, mingkan ngón hkyô pé má lhaq châng nyi kô é htoq agó, haú tarâ a châng bâng é myit má ahkuí mù zúi nyi é sobyô nghut é, maulat lé up sù htang châng nyi kô é bang nghut lhê. ³ Nga-nhúng banshoq bang le, yhangmoq su kut nyi laí lo é bang chyat nghut mù, yubak mara byíng é suisho ô nau gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé dông za châng wú é bang nghut lhê. Haú mù, góbang eq rajung za, nga-nhúng gi, Garai Gasang é nhikmo-yo hkyô

eq gingdán wú é bang chyat nghut lhê. ⁴ Nghut kôlháng, shogyo nhikmyin myit gyaí bo é Garai Gasang gi, nga-nhúng, tarâ lu lai luí shi byuq bê bang dut kôlháng, Yhâng é chyitdap myit mó èq, nga-nhúng lé chyitdap luí, Hkrisduq eq rahá asak dui nhâng bê nghut ri. ⁵ Haú mù, nungmoq gi, Garai jejú èq za hkyi yu é hui bekô nghut ri. ⁶ Garai Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung taí é Yhâng é jeju lé, htang pyat má wó shit sháng gaq ga, ⁷ nga-nhúng lé, Hkrisduq eq rahá lhoq dui toq yú mù, mauhkúng htoq tsáng myhâng má, Yhang eq rahá zùng nhang to bê nghut ri. ⁸ Hkâsu mù gâ le, nungmoq gi, lumjǐng é dông mai Garai jejú èq za hkyi yu é hui bekô nghut ri. Haú gi, nungmoq chyáng mã é a nghut, Garai Gasang jeju chyunghuq za ru nghut lhê. ⁹ Haú gi, yhumsing é muzó mai wó é a nghut é yanmai, ó yuq le nghutbun rã hkyô a joq. ¹⁰ Hkâsu mù gâ le, nga-nhúng gi, Garai Gasang é loqmú pé nghut mù, nga-nhúng zui saí rã matú, hí hí mai, Garai Gasang hen lajâng tô é ge é muzó pé lé zui saí rã matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

¹¹ Haú mù luí, nungmoq gi, hí hkûn, hku lé lo é mai yhang tungbaù pé nghut é hkyô lé le, byu loq èq za gungsho má kut é, "ahpyo-kuq hpyit hkâm bang" gâ é bang mai, nungmoq lé, "ahpyo-kuq hpyit a hkâm bang" ga byi kô é hkyô lé le, myitbun keq. ¹² Haú u lé, nungmoq gi, Hkrisduq eq gâng lhùm tô é bang; Israelaq mingbyû a nghut é bang; danggidiq eq sêng é dangshikaq pé má gó mingbyû nghut é bang; mingkan htoq má, myoqbyù jowò a joq é eq Garai a wó é bang nghut é lé, myitbun keq. ¹³ Nungmoq gi, hí hkûn wê gâng nyi é bang nghut kôlháng, ahkuí kúm, Hkrisduq é sui dông mai Hkrisduq Yesuq má shuí chyâng htep é hui bekô nghut ri.

¹⁴Hkâsu mù gâ le, Yhânggùng yhang gi, nga-nhùng é nguingón hkyô nghut ri. Yhang gi, gyoro mã kyo tô é madin nghut é a naù a wom hkyô lé hpyoq hpyi pyám byi luí, haù í myû* dut nyi é lé, rahú za dut nhâng bê nghut ri. ¹⁵Haù hkunmó pé eq hkang tô é tarâ pé bo é jep é tarâ lé, Yhâng é gungsho má lhoq htùm pyám bê nghut ri. Haù mù, Yhang ô nau é hkyô gi, haù í myû dut tô é lé, Yhânggùng má yhang, byù sik ra-myû za hpan to râ matú nghut ri; haù đông, simsaq hkyô kut byi bê nghut ri. ¹⁶Yhang gi, a naù a wôm lhùm é hkyô lé, haù tapzîng má lhoq htùm pyám byi mù, haù tapzîng đông mai, byù myu í myu é lé ragùng za kut luí, Garai Gasang eq xoq byi bê nghut ri. ¹⁷Yhang gi, wê gâng nyi é bang† nungmoq lé le, chyâng htep nyi é bang‡ lé le, simsaq hkyo é danglù lé hko kyo bê nghut ri. ¹⁸Hkâsu mù gâ le, nga-nhúng í myû gi, Yhang đông mai, Woi-nyí ralhum zâ eq, haù Íwâ chyáng wàng râ hkyô dong bê nghut ri.

¹⁹Hau é yanmai, nungmoq gi, tûngbaù pé eq byù bíng pé a nghut lô é za, Garaí é byu pé eq rahá, mingbyû wuì eq yhumbyù wuì chyat nghut bekô nghut luí, ²⁰haù lagyô pé eq myiqhtoí pé, hi tô é apùn awang htoq má xuq tô é bang chyat nghut akô; Hkrisduq Yesuq yhang, haù mã é ahkyak é htungchyûn luqgok dut bê nghut ri. ²¹Yhang má, wahpang lhùm gón xoq lhùm bùm é nghut mù, haù Yhumsîng má chyoiyúng noqkuq yhùm ralhum dut lò bê nghut ri. ²²Woi-nyí đông mai, Garai Gasang nyi râ jang dut râ matú, nungmoq le, Yhang má, wahpang su tsuq é chôm huí nyi bùm bekô nghut ri.

3

Poluq, Tûngbaù Pé É Tarâ Hkô Sará

¹Haù su nghut mù, Hkrisduq Yesuq é hkyô lé, nungmoq tûngbaù pé

chyáng hko kyo é yanmai, htongbyû dut sù, ngò Poluq gi, nungmoq é matú kyûdung byi lhê.

²Nungmoq lé dojaù râ é matú, ngo lé byi tô é Garai Gasâng jeju ayá shí lé, nungmoq gè gè wó gyô wú bekô râ nghut lhê. ³Haù gi, hí hkûn, ngò, tot é đông kê tô wú bê eq rajung za, haù zaù tô é hkyô lé, shing-rán đông ngo lé sé nhang é nghut ri. ⁴Haù hkyô lé, nungmoq nghap wú é hkûn, Hkrisduq eq sêng é zaù tô é hkyô, ngò rago sê é lé, nungmoq wó sé kó râ nghut lhê. ⁵Haù lé, laí lò bê ipyat pé mã é byu pé lé a sé nhang é nghut kôlhâng, ahkuí gi, Garai Gasâng é chyoiyúng é, lagyô pé eq myiqhtoí pé lé, haù Woi-nyí eq hpông shit bê nghut ri. ⁶Zaù tô é hkyô haù gi, gabú danglù đông mai, Hkrisduq Yesuq má, Israe-laq byu pé eq rahá, tûngbaù pé le, hkûng xoq bang wó dut luí, gungdu ralhum é gungsho showui showang pé chyat dut é eq, danggidiq byi tô é lé wó chôm hkam yu é bang dut é hkyô nghut ri.

⁷Yhâng é hpungwup a-tsam mai, ngo lé byi tô é Garai Gasâng jeju chyunghuq é yanmai, ngò gi, gabú danglù shí taí râ dui-nhâng zoshâng dut é nghut lhê. ⁸Ngò gi, haù Garaí Gasâng é byu pé mã é tiq dik sù htoq má lháng je tiq sù nghut kôlhâng, haù Hkrisduq é a ung htoq taí é wó sùt hkyô lé, tûngbaù pé chyáng hko kyo râ matú le, ⁹haù lhunglháng lé hpan é Garai Gasang má, laí lò bê ipyat pé mã zaù tô é, zaù tô é hkyô haù lé hkâsu kut tô é lé, yuq hkangmó lé taí sân kyo râ matú le, jeju shí, ngo lé byi bê nghut ri. ¹⁰Haù gi, nga-nhùng é Yhumsîng Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za, ¹¹haù Garaí Gasâng é hpaqchyí mó góng lé, noqkuq hpúng đông mauhkûng htoq tsáng myhâng mã é uphkâng bang eq ahkáng ayá wó bang lé, ahkuí sé nhâng râ matú

* **2:14** I myû gâ é gi, Israe-laq byu pé eq tûngbaù pé lé gâ lhê. † **2:17** Wê gâng nyi é bang gâ é gi, tûngbaù pé lé gâ lhê. ‡ **2:17** Chyâng htep nyi é bang gâ é gi, Israe-laq byu pé lé gâ lhê.

nghut lhê. ¹² Nga-nhúng gi, nga-nhúng é Yhumsîng Hkrisduq Yesuq eq rading ralhum za nghut é yanmai le, Yhang lé lumjîng é yanmai le, Garai Gasang chyáng, wám é myit eq a gyuq a wám é myit eq wó htep é é nghut lhê. ¹³ Haû mù luî, ngò, nungmoq lé dúng tôngbán nau é gi, nungmoq é matú, ngò wuîhke jamjau hui zô é yanmai, nungmoq i-myit hkâgyui kó; haû gi, nungmoq é matú akyû bò râ hkyô nghut lhê.

Ehpesu Myuq Byu Pé Lé Kyûdung Byî É Hkyô

¹⁴ Haû pê é yanmai, ngò gi, haû Îwâ é hí má hkyihput htuq luî kyûdung é nghut lhê. ¹⁵ Mauhkûng eq myigùng htoq mâ é Yhâng é ikun byù lhunglhang gi, Yhâng chyáng mai myîng wó yu é chyat nghut lhê. ¹⁶ Nungmoq é lumjîng myit mai, nungmoq é i-myit unghkaû má Hkrisduq wó nyi nyi sháng gaq nghû, ¹⁷ Yhang é hpungwup shingkang bo é agùn agó wó sùt é mai, nungmoq é i-myit unghkaû mâ é sù lé, Yhâng é Woi-nyî dúng, hpungwup a-tsâm eq wum-o lhoq kîng byi râ matú, ngò kyûdung byi lhê. Hau htoq agó, nungmoq gi, chyitdap myit má amyit chin to luî, awang hi to mù, ¹⁸ sân-yúng bang eq rahá, hau é apyî, a-tsûng, myhâng, nik, hkâ-í nghut é lé, rago wó sé kôluî, ¹⁹ Garai Gasâng é gumjup é hkyô lhunglhang eq wó lhoq gumjup yù kó sháng gaq nghû, sê é nyan htoq má gyaú é Hkrisduq é chyitdap hkyô lé, nungmoq wó sé râ matú, ngò kyûdung byi lhê.

²⁰ Ahkuî, nga-nhúng é hkaû má mù zuî nyi é, Yhâng é wum-o a-tsâm é yanmai, nga-nhúng dúng é banshoq eq myit é hkyô lhunglhang htoq je wó kut byî é Su chyáng, ²¹ haû noqkuq hpûng é yanmai le, Hkrisduq Yesuq é yanmai le, pyat pyat zaí zaí, ahtum abyuq, hpungwup shingkang rû bo nyi sháng gaq ô! Amen.

✧ 4:8 Hkya-on 68:18

4

Hkrisduq É Gungdu Má Rading Ralhum Za

¹ Haû mù luî, nungmoq gi, nungmoq lé wut yù bê nghut mù, wut yu é hkyô eq gingdán é dúng asak duì keq nghû, haû Yhumsîng é yanmai, htóng lúng sù ngò Poluq gi, nungmoq lé lhoq pun lhoq kyîng kat lhê. ² Hkyô hkat hkangmó má i-myit lhoq nyhum é eq i-myit nú-nhâm nyi keq; myit hing é eq chyitdap myit mai rayuq eq rayuq hkam jân lhûm nyi keq. ³ Haû Woi-nyî eq byî é myit hui hkyô lé, nguîngón hkyô dúng mai châng nyi râ matú, wó dut é í shikut nyi keq. ⁴ Nungmoq gi, wut yù hui kô é hkûn, myit myoqbyù hkyô rashut za wut yù hui bekô nghut é eq rajung za, gungdu ralhum eq Woi-nyî ralhum za nghut nyi ri. ⁵ Yhumsîng rayuq za, lumjîng hkyô rahkat za, bapisma ralhum za nghut nyi ri. ⁶ Banshoq bâng é Îwa nghut sù Garai Gasang le, rayuq za nghut nyi ri; Yhang gi, banshoq bâng é ahtoq má nghut luî, lhunglhang dúng mai mù kut é eq lhunglhang é ahkaû má lúng nyi sù nghut ri.

⁷ Nghut kôlhang, nga-nhúng yuq hkangmó gi, jeju chyunghuq lé, Hkrisduq mai ké byî é dúng wó yu é nghut lhê. ⁸ Hau é yanmai,

"Yhang gi, myhang é jowò shut doq ló é hkûn, shúm zung é bang lé gi, shuí chùng mù, byu pé lé gi, chyunghuq tsing gam byi ri."✧

ga, Chyúmdang má taî tô é nghut lhê. ⁹ Haû "doq ló" gâ é lichyúm gi, myigùng é a-o tsáng má le, Yhang gyó jé bê nghut lhê, gá naû é a nghut lhi? ¹⁰ Haû gyó lé é Sù gi, junghkang jungmó lé lhoq byîng jup râ matú, mauhkûng banshoq é ahtoq má doq ló é Sù yhang nghut lhê. ¹¹ Yhang gi, ra-am lé, lagyô pé, ra-am lé, myiqhtoî pé, ra-am lé, gabú danglù hko kyo râ bang, ra-am lé, hpúng-up pé eq sará pé kut tsing byi to bê nghut ri. ¹² Haû bang gi, Garai Gasâng é byu pé lé wùn

waq âng é muzó pê é matú, hen lajâng é bang nghut ri. Haú hkûn sheq, Hkrisduq é gungdu gi, ¹³ haú lumjîng hkyô eq Garai Gasâng é Yhangzo lé sê é hkyô má, nga-nhúng banshoq bang rading ralhum za wó dut mù, kô dîng bang dut luí, Hkrisduq é gumjup é isâm banshoq lé wó yu é hkûn jé shoq, wó kô jat nyi râ nghut lhê.

¹⁴ Haú mù, nga-nhúng gi, wuibaù pé eq hí shut htâng shut bat myhú é su dut é eq, byu pê é agè ashop é eq haq dâ é mhoq hpyoq hpaqchyî pé eq mhoqshit hkyô laidun hkanmó èq, shí shut hé shut mut tâng é su dut é lé hui zô é zoshâng wuì su a nghut lô é za, ¹⁵ chyitdap myit mai tengmán é dang lé tai nyi jáng, Hkrisduq nghu é ulhum má hkyô hkanmó kô myhang lò râ nghut lhê. ¹⁶ Yhang dông mai, gungdu gón gi, ralhum eq ralhum htuqbâng é gungsho showui showang pé lé xoq byî to bê nghut mù, gungsho showui showang haú pé gi, yhumsing é muzó lé zui saî nyi é nghut jáng, gungdu haú gi, chyitdap myit má, yhanggùng yhang kô lò myhang lò râ nghut lhê.

Byù Sik Đông Asak Dui Râ Hkyô

¹⁷ Haú mù luí, haú Yhumsing é ahko ahkáng mai ngò nungmoq lé tai nau é hkyô gi, haú tûngbaù pé gi, akyû a bo é lé myit mù, asak dui kô é su, nungmoq gi, hkâkut kó. ¹⁸ Yhangmoq gi, sê gyô é nyan chut byuq bekô nghut é eq yhangmoq myit htan nyi kô é nghut mù, haí le a sé kô é yanmai, Garai Gasang byî é asak eq wê gâng byuq bekô nghut ri. ¹⁹ Yhangmoq gi, gyuq hoq hkyô a bo byuq lo kô é yanmai, myoqnoq myit dông a sansêng é hkyô jung hkanmó lé je wó kut xoq nyi shoq ga, yhumsing gùng lé, gungsho ô naù gadaú é hkyô má ap pyám bekô nghut ri.

²⁰ Nungmoq kúm gi, Hkrisduq é hkyô lé haú dông mhoq yû kô é a nghut. ²¹ Nungmoq gi, Yesuq chyáng má é tengmán hkyô dông, Yhâng é hkyô lé wó gyô wú é eq mhoq yu

wú bekô nghut lhê. ²² Haú mù, nungmoq gi, hí hpyang lhê é nungmoq é nyi yap sâmlai nghut é, ô naù gadaú luí, yhumsing gùng yhumsing mhaú pyám é dông htên byoq ló nyi é nungmoq é byù xau lé tô pyám râ matú mhoq yû bê eq rajung za, ²³ nungmoq é i-myit lé asik htaí pyám nhâng keq; ²⁴ hau htoq agó, nungmoq gi, tengmán é eq sêng é dîngmán hkyô eq chyoiyúng hkyô má, Garai Gasang eq dù shoq hpan to hui bê nghut é byù sik lé, yu wut to keq.

²⁵ Haú mù, nga-nhúng banshoq bang gi, gungdu ralhum é gungsho showui showang pé chyat nghut é yanmai, nungmoq yuq hkanmó gi, mhaú é hkyô lé tô pyám luí, yhumsing é chyangnâm mâ é sù lé, tengmán é dang tai ra râ nghut lhê. ²⁶ "Nungmoq nhikjum yô é hkûn, mara hkâkut kó."* nungmoq gi, buì wàng shoq nhikjum hkâyô nyi kó. ²⁷ Nat Tsadán lé le, jowò hkâbyi kó. ²⁸ Hkau sù gi, a dum hkau lo sháng gaq; râ nyi é bang lé, rajung jung wó gâm byi shoq, yhumsing é loq èq akyû bo é hkyô pé lé kut nyi luí, muzó zuí shikut ra râ nghut lhê.

²⁹ Nungmoq é nhut mai agè agaú é dang haí le hkâhtoq nhâng kó; wó gyô é bang akyû bò shoq, yhangmoq râ tô é má cháng luí, haú bang kô lam lò râ dang za tai keq. ³⁰ Haú hkyi yù râ buinyi é matú, dizik dông nungmoq lé tap to byî é Garai Gasâng é Chyoiyúng Woi-nyí lé hkâlhoq yón kó. ³¹ Haú myit tot é, nhikjum yô é, nhik-yô é, byoq lhum byoq cheq é eq lumù gansang é, agè agaú é hkyô pé banshoq lé, nungmoq tô pyám keq. ³² Nungmoq gi, rayuq eq rayuq, ge é hkyô eq shogyo nhikmyin é hkyô tûn shit lhum luí, Garai Gasang gi, Hkrisduq má, nungmoq lé mara hkyut byî é su, nungmoq yhangchang le mara hkyut byî lhûm nyi keq.

5

¹ Haú mù, nungmoq gi, chyitdap dik é zoshâng wuì nghut é yanmai,

* 4:26 Hkya-on 4:4

Garai Gasang lé alik yu é bang kut keq. ²Hkrisduq gi, Yhânggùng lé namngón jung hkungga eq shigu hkungga dông, nga-nhùng é matú Garai Gasâng chyáng Yhânggùng yhang ap byî pyám shoq, nga-nhùng lé chyitdap é su, nungmoq le chyitdap myit eq asak dui nyi keq.

³Hau htoq agó, ashop é dông gungsho zùm yap é hkyô, a sansêng é hkyô hkanmó eq myoqnoq é hkyô pé lé, nungmoq taí lhang hkâtaí kó; hkâsu mù gà le, nungmoq gi, Garai Gasâng é chyoiyúng byu pé nghut lhê. ⁴Haù eq rajung za, a taí gíng é, ahoq ahî dang, dangsôm eq hkunchoq dông gyâ é dang pé lé a taí é za, jeju hkya-on dang za taí nyi keq. ⁵Hkâsu mù gà le, ashop é dông gungsho zùm yap é hkyô kut shut sù, a sansêng é sù eq hparà noq é sù nghut é myoqnoq sù ó yuq nghut kôlhang, Hkrisduq eq Garai Gasâng é mingdán má muizè a wó é hkyô lé, nungmoq sê nyi keq. ⁶Ó yuq nghut kôle, dangsôm* dông mai nungmoq lé a wó mhaú kó sháng gaq; hkâsu mù gà le, haù hkyô pé é yanmai, Garai Gasâng é nhikmo-yo hkyô gi, haù jino a gyo bâng é ahtoq má jé râ nghut lhê. ⁷Haù mù luí, haù bâng chyáng hkâbo wang lóm kó.

⁸Hkâsu mù gà le, nungmoq gi, hí hpyang mauchut tuq dut é bang nghut lhê; nghut kôlhang, ahkuí gi, haù Yhumsíng má maubó pé nghut bekô nghut ri. ⁹Haù Yhumsíng ô nau é hkyô haí nghut é lé ho htoq yù mù, maubó é yhangzô pé dông asak dui keq. ¹⁰Hkâsu mù gà le, haù maubó é ashí gi, ge é hkyô banshoq, dingmán é hkyô eq tengmán hkyô chyat nghut ri. ¹¹Haù ashí a zuí é mauchut tuq muzó má a bo wang lom é za, yhangmoq é mara lé tân shit keq. ¹²Hkâsu mù gà le, haù jino a gyo bang haq zaú kut é hkyô lé gi, taí htoq le lhang hoq hpo nghut ri. ¹³Nghut kôlhang, junghkang jungmó lé, haù maubó eq tân shit jáng gi, wó byu-myang é chyat

dut râ nghut lhê. ¹⁴Hkâsu mù gà le, junghkang jungmó lé byu-myàng nhang é gi, maubó nghut ri. Hau é yanmai,

"Yhup ngón nyi sù ê, toq aq, haù shi é mai dui toq aq hkoi; haù jáng, Hkrisduq gi, nang lé duqbó byi râ nghut lhê."†

ga luí taí tô é nghut lhê.

¹⁵Haù mù luí, nungmoq hkâsu kut asak dui é hkyô má gyai sidiq nyi keq; hpaqchyí a bò bang su a nghut é za, hpaqchyí bò bang su kut nyi keq. ¹⁶Buinyi ahkyíng shí pé gi, agè ashop é yanmai, wó é ahko ahkáng banshoq lé ge dik é dông chung jai keq. ¹⁷Hau é yanmai, byù ngok pé a dut é za, haù Yhumsíng ô nau é hkyô gi, haí nghut é lé, sê gyô yu nyi keq. ¹⁸Haù achay achyut é yubak hkyô lhoq htoq é í lé hkâshuq wut kó; Woi-nyí lé kúm byíng nhang nyi keq. ¹⁹Nungmoq gi, hkya-on kungtôn dang dông le, hkya-on mahkôn dang dông le, woi-nyí eq sêng é mahkôn dông le, rayuq eq rayuq dáng nyo lhum luí, nungmoq é i-myt unghkaù mai, haù Yhumsíng lé mahkôn hkôn mù, lhoq ngón nyi keq. ²⁰Nga-nhùng é Yhumsíng Yesuq Hkrisduq é myíng lé lang luí, jung hkanmó é matú, haù Íwa Garai Gasang lé, hkâ-nhám le jeju hkya-on nyi keq.

²¹Hkrisduq lé hkungga hpautap é myit eq, rayuq eq rayuq hpautap lhùm nyi keq.

Myi Eq Làng

²²Ikun myhí pé ê, haù Yhumsíng uphkang é dông châng é su, nungmoq é ikun hpô pé uphkang é dông châng nyi keq. ²³Hkâsu mù gà le, Hkrisduq gi, haù noqkuq hpúng é ulhum nghut é su, haù ikun hpó gi, ikun myhí é ulhum nghut nyi ri; Hkrisduq gi, haù Yhâng gungdu nghut é noqkuq hpúng lé hkyi yù Sù nghut ri. ²⁴Haù noqkuq hpúng gi, Hkrisduq uphkang é dông châng é su, ikun myhí pé le, hkyô hkat

* **5:6** Dangsôm gà é gi, Garai Gasâng é nhikmo-yo hkyô a jé râ ga taí é dang nghut lhê. † **5:14** Dang ngho shí gi, hí lhê é noqkuq hpúng pé taí gyó lo é dang nghut lhê.

hkanqmó má, yhangmoq é ikun hpô pé uphkanq é dông châng nyi râ lê.

²⁵ Ikun hpô pé ê, Hkrisduq gi, haû noqkuq hpúng lé chyitdap luí, hau é matú Yhânggùng lé Yhang ap pyâm é su, nungmoq é ikun myhî pé lé chyitdap nyi keq. ²⁶ Yhang haû su kut é gi, haû noqkuq hpúng lé, mungdang dông wui má chí pyám luí, lhoq sân-yúng yû râ eq, ²⁷ haû noqkuq hpúng gi, agè agau é eq a-ká akông é hkyô haí le a bo é za, mara hûn râ hkyô a bo é eq chyoyúng é, hpungwup shinkang bo é noqkuq hpúng dông, Yhânggùng lé wó ap byi râ matú nghut lê. ²⁸ Haû eq rajung za, ikun hpô pé gi, yhangmoq é ikun myhî pé lé, yhumsing gungdu lé su chyitdap râ dut lê. Yhumsing é ikun myhî lé chyitdap é sù gi, yhumsing gùng lé le, chyitdap é sù nghut bê. ²⁹ Ó yuq le, yhumsing gùng lé a chyitdap a kut é za, Hkrisduq gi, haû noqkuq hpúng lé kut byi nyi é su, yhumsing gùng lé byi tso byi huq luí, rago wú zúng nyi é nghut lê. ³⁰ Hkâsu mù gâ le, nga-nhung gi, Yhâng é gungdu é gungsho showui showang pé chyat nghut lê. ³¹ Haû mù, "Hau é yanmai, yuqgè gi, înu îwa eq gang luí, yhangmyi eq zùm-yap mù, yhangnhik í yuq gi, gungsho ralhum za dut kó râ nghut lê." * gâ tô ri. ³² Haû hkyô gi, gyai yhang zaú tô é hkyô nghut ri. Nghut kôhang, ngò gi, haû Hkrisduq é hkyô eq noqkuq hpúng é hkyô lé taí nyi é nghut lê. ³³ Haû mù, nungmoq yuq hkanqmó gi, yhumsing gùng lé chyitdap é su, yhumsing é ikun myhî lé le chyitdap râ dut lê; haû ikun myhî le, yhâng é ikun hpô lé hkungga râ dut lê.

6

Zo Wuí Eq Mó Wui É Hkyô

¹ Zoshâng wui ê, haû Yhumsing má, nungmoq é mó wui é jìno gyo keq; hkâsu mù gâ le, haû gi, kut gíng é hkyô nghut ri. ² "Náng é înu îwa lé hkungga aq. ³ Haû jáng, nàng, nyi ngón yuqyô

mù, myidàm htoq má náng é asak chyungxe hing nyi râ nghut lê." * gâ é dang gi, danggidiq lom é sânq-hî lhum hkunmó nghut ri.

⁴ Îwa pé ê, nungmoq é zo wui lé nhikjum a lhoq yô é za, haû Yhumsing é mhoq kyo hkyô eq mhoqshit lhoq pun hkyô dông yhangmoq lé baú kô nyi keq.

Jùn Pé Eq Junsing Pé É Hkyô

⁵ Jùn pé ê, nungmoq gi, Hkrisduq é jìno gyô é su, gyuq hkunggâ é eq lhumzui é myit mai, nungmoq é myidàm htoq má é junsing pé é jìno gyo keq. ⁶ Nungmoq gi, yhangmoq é hí má za, myoqdong ho é dông kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myit unghkaû mai châng kut nyi keq. ⁷ Byù lé za dojaú é dông a nghut é za, haû Yhumsing lé dojaú nyi é dông le, shirông myit eq dojaú nyi keq. ⁸ Hkâsu mù gâ le, jùn nghut nghut, luthkyô wó sù nghut nghut, ge é hkyô kut nyi é nghut jáng, haû Yhumsing gi, yuq hkanqmó lé shigyaú râ nghut é lé, nungmoq sê nyi lê.

⁹ Junsing pé ê, nungmoq le, nungmoq é jùn pé lé haû eq rajung za kut byi nyi keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsing hpô gi, mauhkung htoq má nyi é nghut luí, Yhang gi, myoqdong hkyin é hkyô a bo é sù nghut lê.

Garai Gasâng É Gyè Hking

¹⁰ Ló htâng má, taí nau é hkyô gi, haû Yhumsing eq Yhâng é hpungwup a-tsam mó má wum-o bo nyi keq. ¹¹ Haû nat Tsadán wá dâ é hpaqchyí pé lé, nungmoq wó he-ngik pyám kó sháng gaq, haû Garai Gasâng é gyè hking banshoq lé wut to keq. ¹² Hkâsu mù gâ le, nga-nhung gi, gungsho eq sui lé htúq htíng é bang a nghut é za, haû uphkanq bang, ahkáng ayá wó bang, mauchut tuq dut é mingkan shi é a-tsam pé eq mauhkung htoq

tsáng myhâng mâ é agè ashop é byò eq sêng é wum-o pé lé, htuq htîng é bang ru nghut lhê. ¹³ Haû mù luî, Garai Gasâng é gyè hking banshoq lé wut to keq; haû hkûn sheq, nungmoq gi, agè ashop hkyô jé é buinyi má, yhumsîng jowò má wó yap gîng to mù, hkyô hkat hkangmó lé ban kut jáng, wó yap gîng tîng nyi kó râ nghut lhê. ¹⁴ Haû mù, nungmoq é hpyidum má tengmán hkyô hpyihit hit mù, dingmán hkyô wànggò-long lé gò luî, ¹⁵ nungmoq é hkyi má gi, haû simsaq hkyô byi é gabú danglù hkô râ rì rì kut to mù, gîng gîng yap nyi keq. ¹⁶ Hau htoq agó, haû agè ashop su é myidug é myoshi lhungháng lé wó sat ung pyám râ matú, lumjîng hkyô nghu é golong lé chung to keq. ¹⁷ Hkyi yù hkyô shamtoq muq lé tsûng to luî, Garai Gasâng é mungdang nghut é, haû Woi-nyí é shâm lé wun chûng keq. ¹⁸ Ahkyíng hkangmó má, kyûdung dang eq dîng tôngbán é dang ajung jûng eq, haû Woi-nyí má kyûdung nyi luî, machya nyi uchyang, sân-yúng bang banshoq é matú, hkâ-nhám le, xoq xoq kyûdung byi nyi keq. ¹⁹ Haû gabú danglù é yanmai, shamtoq-tui hut huî é lagyo rayuq ngò nghut nyi kôhang, haû gabú danglù nghut é zaú tô é hkyô lé, a gyuq a wàm wó taí kyo luî, ²⁰ ngò taí râ dut é lé, a gyuq a wàm wó taí sân kyo shoq, ngá nhut hpóng hkangmó, ngò taí râ mungdang pé lé byi sháng gaq, ngá é matú le, kyû bo dung byi nyi keq.

Shi-kyám Dang

²¹ Haû Yhumsîng má, chyitdap é gumang eq lhumzui é dui-nhâng zoshâng nghut sù, Tuhkiku gi, nungmoq lé jung hkangmó taí kyo râ nghut luî, ngò hkâsu nghut nyi é hkyô eq haî kut nyi é hkyô lé, nungmoq wó sé kó râ nghut lhê. ²² Ngamoq hkâsu nghut nyi é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù luî, yhang lé, ngò, nungmoq chyáng nhang kat é nghut lhê.

²³ Îwa Garai Gasang eq Yhumsîng Yesuq Hkrisduq chyáng mâ é lumjîng hkyô má bo é chyitdap myit eq nguingón hkyô gi, haû gumang wui chyáng ru joq nyi sháng gaq ô! ²⁴ A dat htûm é chyitdap myit mai, nganhung é Yhumsîng Yesuq Hkrisduq lé chyitdap é lhunghâng bang chyáng, Garaî jeju gi, ru joq nyi sháng gaq ô!

HPILIPÍ Pê Chyáng Hun Kat é Laiká (Philippians)

¹ Hkrisduq Yesuq é jùn nhik, Poluq eq Timohti gi, Hpilipi wà mó má nyí é, Yesuq Hkrisduq má sân-yúng bang lhunglháng eq, hpúng-up, hpungte pé lé, dang kyô kat lhê.

² Nga-nhùng é Îwa Garai Gasang eq Yhumsing Yesuq Hkrisduq chyáng má é jeju eq nguingón hkyô gi, nungmoq chyáng ru joq nyí sháng gaq ô.

Jeju Hkya-ôn É Hkyô

³ Ngò gi, nungmoq lé myit bún kat hkanqmó, ngá é Garai Gasang lé jeju hkya-ôn nyí lhê. ⁴ Ngò gi, kyûdung hkanqmó, hkâ-nhám le nungmoq banshoq bâng é matú gabú myit eq dung byí nyí lhê. ⁵ Hkâsu mù gâ le, nungmoq gi, sânghí nyí mai ahkuí jé shoq, gabú danglù má ngò eq chôm zùm yap nyí é yanmai nghut lhê. ⁶ Haú nungmoq má ge é muzó kut hi é sù Garai Gasang gi, Yesuq Hkrisduq é buinyí jé shoq muzó haú lé lhoq pán rá nghut lhê nghû, ngò hkyak myit lum tô lhê.

⁷ Nungmoq banshoq bang gi, ngá é i-myit má bo to bê bang nghut é yanmai, nungmoq banshoq bang eq séng luí, ngò shí dông myit nyí é gi, gíng lhê; hkâsu mù gâ le, ngò kyum hut huí tô é u lé le, haú gabú danglù hkyô lé taí húng luí, lhoq gíng é u lé le, nungmoq gi, ngò eq rahá Garai Gasang jeju chôm hkâm yu é bang nghut lhê. ⁸ Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyí é hkyô lé, Garai Gasang gi, ngá é saksé nghut lhê.

⁹ Hau htoq agó, nungmoq gi, je ge é hkyô lé dat gam hkoq mù, Hkrisduq é buinyí má sanséng luí mara a bo é za, ¹⁰ Garai Gasang é hpungwup shingkang eq hkya-on kungtôn hkyô é matú, Yesuq Hkrisduq é yanmai

lo é dingmán hkyô é ashi wó byíng nyí sháng gaq nghû le; ¹¹ nungmoq é chyitdap myit gi, tengmán é hpaqchyí eq wó sê é nyan banshoq má je riyhang kô jat lò sháng gaq nghû le, ngò kyûdung nyí lhê.

Dui Nyi Le Gi, Hkrisduq É Matú

¹² Gumang wuì ê, ahkuí ngò nungmoq lé sé nhâng nau é hkyô gi, ngò má haí dut laí lò bê hkyô pé gi, gè gè yhang gabú danglù ríng jat lò rá matú dut lò bê nghut ri. ¹³ Hau é yanmai, haú hkohkâm-wâng zúng é lhunglháng bang eq gotú banshoq bâng é hí má, Hkrisduq é yanmai ngò kyum hut huí é hkyô, de de dut htoq bê nghut ri. ¹⁴ Hau htoq agó, ngò htóng lúng é yanmai, haú Yhumsing Yesuq má gumang wuì nghut é myo mi-myó gi, myit wum wó yú kômù, Garai Gasang é mungdang lé, je riyhang a gyuq a kyum wám hko kyo bekó nghut ri.

¹⁵ Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyí bum akô. Nghut kôhang, byù ra-am gi, ge é myit mai hko kyô bum akô nghut ri. ¹⁶ Ge é myit mai hko é bang gi, gabú danglù lé húng rá matú ngo lé hkyin é hkyô lé, yhangmoq sé kômù, chyitdap myit eq hko kyô é bang nghut akô. ¹⁷ Haú góbang chyaú gi, sanséng é i-myit eq a nghut é za, ngò kyum wut é hkyô má wuîhke jamjau jat byi rá matú, myit nyí bùm kô é nghut mù luí, Hkrisduq é hkyô lé yhumsing é wuizat é dông za, hko taí nyí bum akô nghut ri. ¹⁸ Nghut kôhang, haú gi, haí rá ri lú? Yhumsing wuizat é dông hko é nghut nghut, tengmán é dông hko é nghut nghut, hkyô hkat hkanqmó má Hkrisduq é hkyô lé hko pyo kat é nghut mù luí, ngò gi, hau é yanmai, gabú nyí lhê.

Gè gè yhang, ru gabú nyí shirá nghut lhê. ¹⁹ Hkâsu mù gâ le, nungmoq kyûdung byí é eq Yesuq Hkrisduq é Woi-nyí garúm é yanmai, ngò má dut laí lò bê hkyô gi, ngò wó

luthkyô dut râ nghut é lé ngò sê lhê. ²⁰Ngò myit láng tô é eq myit myoqbyù tô é má, ngò gi, hoq nó hái a râ é za, hí hkun lhê su, ahkuí le, dui nyi kôlhang, shi byuq kôlhang, gyuq kyum myit a bo é hkyô lé wó yù mù luí, Hkrisduq gi, ngá gûng má hkya-on waq toq é hui râ nghut lhê. ²¹Hkâsu mù gâ le, ngò, asak dui nyi le gi, Hkrisduq é matú, shí jáng gi, ngá e amyat nghut ri. ²²Nghut kôlhang, ngò gi, gungsho má rû dui nyi mù, ngò kut é muzó má ashi zuí lo é nghut le gi, hká lhum lé sheq hkyin yu le gè râ lhu? ²³Ngò gi, hkyô í hkat gyoro má hká hpyang le a hkap dut tô ri; shi ló luí Hkrisduq eq rahá nyi râ lé gi, ngò ô nau ri, hkâsu mù gâ le, haú gi, je ge é hkyô nghut ri. ²⁴Nghut kôlhang, ngò gungsho má dui nyi le gi, nungmoq é matú akyù je bò râ nghut lhê. ²⁵Haú mù, ngò gi, shí hkyô lé hkyak myit lum to luí, lumjîng hkyô má nungmoq kô jat lo é eq gabú nyí râ matú, nyi gyó luí, nungmoq lhunglhang bang eq nyi nyi râ hkyô lé, ngò sê lhê. ²⁶Haú mù luí, ngò nungmoq chyáng dum jé lé é hkûn, ngá é yanmai, Hkrisduq Yesuq má nungmoq é gabú hkyô gi, je riyhang jat lò râ nghut lhê.

²⁷Haí wà dut kôlhang, nungmoq gi, Hkrisduq é gabú danglù eq gingdán é dông nyiyap keq. Haú jáng, ngò, nungmoq chyáng jé mù huí lhûm é hkûn nghut nghut, we gang lhum tô é hkûn nghut nghut, nungmoq gi, woi-nyí ralhum má za yap gîng to mù, haú gabú danglù lé lumjîng hkyô má, i-myit rahkat zâ èq shikut nyi kô é hkyô lé le; ²⁸nungmoq gi, hká hkyô má nghut kôlhang, gyè pè èq kyuy zô é lé a gyuq lò kô é hkyô lé le, ngò sé râ nghut lhê. Haú gi, yhangmoq é matú htên byoq hui râ kumlhá dut lò bê nghut lhê; nghut kôlhang, nungmoq gi, hkyi yù hui râ nghut lhê. Haú gi, Garai Gasang kut é nghut lhê. ²⁹Hkâsu mù gâ le, Hkrisduq má wó lumjîng râ é jeju za a nghut, Yhang é matú wuîhke jamjau hui râ jeju le, nungmoq hkam yù bekô nghut ri. ³⁰Haú gi, hí hpyang

nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

2

Yesuq, Myit Lhoq Nyhum É Hkyô

¹Hkrisduq eq rading ralhum za nghut nyi é yanmai, myit wum byí é hkyô, Yhâng é chyitdap myit mai nhik tîng é hkyô, Woi-nyí eq zùm yap é hkyô, nú-nhâm é myit eq shogyo nhik-myîn é hkyô rajung jung lé, nungmoq wó yu é nghut le gi, ²nungmoq gi, haú i-myit huí é hkyô rahkat za, chyitdap myit rajung za, myit nhiklhum eq myit é hkyô má ralhum za kut nyi é dông, ngá é gabú hkyô lé, byíng jup nhâng keq. ³Yhumsing é wuízat é dông le, akôm gyáng pyâm é dông le, hái le a kut é za, myit lhoq nyhum nyi mù, góbang gi, nungmoq htoq má je gyaú lhê nghû myit yu nyi keq. ⁴Nungmoq yuq hkanmó gi, yhumsîng eq sêng é lé za a nghut, góbang eq sêng é lé le, myit byi râ lhê.

⁵Hkrisduq Yesuq má bo é myit yhang, nungmoq chyáng bò râ dut lhê.

⁶Yhang gi, Garai Gasang su roq za nghut nyi kôlhang, Garai Gasang eq rawuí za nghut é hkyô lé lú zing nyi râ matú a myit é za,

⁷Yhânggùng lé lhoq gôm pyám luí, dui-nhâng zôshang é gungghyâng lé yu chùng mù, xângzo byù gûng roq lé dut bê nghut ri.

⁸Xângzo byù rayuq dông nghut nyi é hkûn, Yhânggùng lé Yhang lhoq nyhum pyám luí,

haú tapzîng htoq má lhang tap sat pyâm é hui shoq jîno gyô ri.

⁹Haú mù luí, Garai Gasang gi, Yesuq é myîng lé mauhkûng htoq mâ é hkyihput,

myidàm htoq mâ é hkyihput eq moming mâ é hkyihput hkanmó htuq paí luí,

¹⁰haú Íwa Garai Gasâng é hpungwup shingkâng é matú, Yesuq

Hkrisduq gi, Yhumsîng nghut
 lhê nghû,
 nhut shô hkangmó yín yû sháng
 gaq ga,
 11 myhang htâng é jowò má Yhang
 lé lhoq toq tô é eq, myîng
 lhunglhâng é htoq má gyaú é
 myîng haû,
 Yhang lé byî to bê nghut ri.

Kyî Pé Su Duqbó Nyî Râ Hkyô

12 Haû mù luî, ngò chyitdap é luzúm
 wuî ê, nungmoq gi, hkâ-nhám le jîno
 gyô nyî é eq rajung za, ngò, nungmoq
 eq rahá nyî é u lé su za a nghut, ngò eq
 wê gâng tô é hkûn le, nungmoq hkyî
 yù hui bê hkyô lé, gyai gyuq hkunggâ
 é myit eq je riyhang lhoq htoq nyî
 keq. 13 Hkâsu mù gâ le, Garai Gasang
 gi, Yhang ô nau é hkyô lé, kut nau râ
 myit èq wó kut râ hkyô lé nungmoq
 má lhoq htoq byî nyî é sù nghut lhê.

14 Haî kut kôlhang, taí put lhûm
 é dông, haû a nghut jáng, dang jet
 jet lhûm é dông hkâkut kó. 15 Haû
 jáng sheq, myit goí é, agè ashop é
 pyat hkaû má, nungmoq gi, mara a
 bo é, sân-yúng é, shut hkyô a bo é,
 Garai Gasâng é yhangzô pé dut kó râ
 nghut lhê. 16 Hau htoq agó, nungmoq
 gi, asak mungdang lé chung htoq
 uchyang, mauhkûng mâ é kyî pé su,
 yhangmoq chyáng wó duqbó nyî kó
 râ nghut lhê. Haû hkûn, ngò gi, ajè
 a din pyâm é, a nghut jáng, muzó lé
 akôm a zui pyâm é yanmai, Hkris-
 duq é buinyî má gumrông jowò wó
 berâ nghut lhê. 17 Nghut kôlhang, ngò
 gi, shuq jung hkungga* ralhûm su,
 nungmoq é lumjîng myit mai nhong-
 jaú byî é shigu hkungga ahtoq má
 hut gyûn pyâm é hui le lháng, gabú
 luî, nungmoq banshoq bang eq rahá
 chôm gabú nyî lhê. 18 Haû eq rajung
 za, nungmoq le gabú luî, ngò eq rahá
 chôm gabú nyî râ dut lhê.

Timohti Eq Epahprodi Nhik Lé Nhang Kat Râ Gâ É Hkyô

* 2:17 Shuq jung hkungga gâ é gi, tsibiyiq wing ragóm lé myî htoq má hut pyâm é dông Garai lé gyuq
 hkunggâ é hkyô lé tân shit é nghut lhê. Bun zo shí má shí hkâm é hkyô lé taí nau é nghut lhê.

19 Ngò gi, nungmoq chyáng Timohti
 lé hân za wó nhang kat râ lé, haû
 Yhumsîng Yesuq má myit myoqbyu
 nyi lhê; haû hkûn sheq, nungmoq eq
 sêng é ludang lé ngò wó sé jáng, ngò
 myit ngón râ nghut lhê. 20 Nungmoq
 é hkyô lé, yhang su hkyak za ge myit
 chiq byî é byù gotû rayuq le ngò a
 wó. 21 Hkâsu mù gâ le, yuq du jup gi,
 Yesuq Hkrisduq eq sêng é hkyô lé a
 nghut é za, ó le ó eq sêng é hkyô lé
 za ho nyi bum akô nghut ri. 22 Yhang
 kúm gi, zo rayuq mai îwa lé htuqbâng
 é su, haû gabú danglù hkyô má ngò
 eq rahá dojaú é yanmai, yhâng lum-
 luq é hkyô tân shit é lé, nungmoq sê
 nyi lhê. 23 Haû mù luî, ngò gi, ngò
 má hkâsu dut râ lé sê é hkûn yhang,
 yhang lé nhang kat râ matú ngò myit
 myoqbyu nyi lhê. 24 Hau htoq agó,
 hkâ-myháng a myáng má, ngò yhang
 le nungmoq chyáng wó jé nhâng râ
 nghut lhê nghû, haû Yhumsîng má
 hkyak lum nyi lhê.

25 Nghut kôlhang, ngò gi, ngá é gu-
 mang hpó le nghut mù, mù zui luzúm
 eq sarhé luzúm nghut é, ngò râ é hkyô
 má wú gon byi râ matú nungmoq
 nhang kat é, nungmoq é gunglik le
 nghut é sù, Epahprodi lé nungmoq
 chyáng dum nhang taú kat byi râ lhê
 nghû, ngò myit hpyit to bê nghut lhê.
 26 Hkâsu mù gâ le, yhang gi, nungmoq
 lhunglhâng bang lé myàng nau nyi é
 za a nghut, yhang no é hkyô lé nung-
 moq wó gyo bekô nghut é yanmai,
 gyai yhang myit myo myit chiq nyi
 ri. 27 Gè gè yhang, yhang gi, aluq shoî
 shî shoq no pyâm é nghut lhê. Nghut
 kôlhang, Garai Gasang gi, yhang lé
 shogyo nhikmyîn yu ri; yhang lé baú
 a nghut, ngò yón htoq yón a dut nyi
 râ matú, ngo lé le shogyo nhikmyîn
 yu ri. 28 Haû mù luî, yhang lé nung-
 moq lhom dum myàng jáng, nung-
 moq myang gabú râ matú le, ngò yón
 é hkyô yom lô byuq râ matú le, yhang
 lé ngò hân hân nhang kat byî nau
 ri. 29 Nungmoq gi, gyai yhang gabú

é myit èq, haù Yhumsîng má yhang lé lhom hkûlum yù mù, yhang su dut é bang lé hkungga keq. ³⁰ Hkâsu mù gâ le, yhang gi, ngo lé nungmoq a wó garúm é hkyô lé garúm râ matú, yhang é asak lé lhang a ha loshoq kut mù, haù Hkrisduq é muzó é yanmai, aluq shoî shoî shi é hui zô ri.

3

Gungsho Má Lumhkaù Râ Hkyô A Joq

¹ Hau htoq agó, ngá é gumang wui ê, haù Yhumsîng má gabú nyí keq! Rajung zâ é hkyô lé, nungmoq é matú dum puq ká byi râ gi, ngò má wui é hkyô haì a joq, nungmoq é matú akyú dut râ matú sheq ru nghut lhê.

² Haù, hkuí pé lé le; agè ashop é muzó jizó kut é bang lé le; gungsho yâm é bang lé le; sidiq nyi keq.*

³ Hkâsu mù gâ le, Garai Gasâng é Woi-nyí èq noqkuq é bang, Hkrisduq Yesuq má gabú gumrong nyi é bang, gungsho má a lumhkaù é bang, nga-nhúng gi, ahpyo-kuq hpyit hkam yu é bang akying† nghut lhê. ⁴ Ngò kúm gi, gungsho má lumhkaù râ hkyô wó ang sù nghut lhê.

Góbang rayuq yuq, haù gungsho má lumhkaù râ hkyô wó âng lhê ga myit é nghut le gi, ngò gi, je riyhang wó sù nghut lhê. ⁵ Ngò gi, hkû lé é htâng shit nyí nghû râ nyí má ahpyo-kuq hpyit bê sù; Israelaq amyû mâ é, Benyamyn é awut ashín nghut sù, Hebre byù mâ é Hebre rayuq nghut lhê; jep é tarâ dông ga jang, ngò gi, Hparishe rayuq nghut lhê; ⁶ shirong é hkyô eq séng luí ga jang, ngò gi, haù noqkuq hpúng lé zing-rí wú bê nghut lhê; jep é tarâ mâ é dingmán hkyô eq séng luí ga jang, ngò gi, shut é hkyô a bo wú sù nghut lhê.

⁷ Nghut kôlhang, ngá é amyat ngu é pé lhunglhang gi, ahkuí, Hkrisduq é yanmai sùm byuq é chyat nghut bê nghû myit yù bê nghut lhê. ⁸ Hau

htoq agó, ngò gi, ngá é Yhumsîng Hkrisduq Yesuq lé wó sê é ko dik é jeju lé sôn kat jáng, jung hkangmó lé buzaq dông myit yù bê. Hkâsu mù gâ le, lhunglhang lé ngò tô pyâm é gi, Yhang é yanmai nghut lhê. ⁹ Ngò gi, Hkrisduq lé wó yù râ eq, Yhang eq rahá wó nghut nyí râ matú, haù jung hkangmó lé buzaq nghû myit yu pyâm bê. Garai Gasâng chyáng mai lo é dingmán hkyô lé ngò jep é tarâ dông wó ho yu é a nghut, Hkrisduq lé lumjîng é yanmai za wó yu é ru nghut lhê; haù gi, lumjîng myit mai wó é nghut lhê. ¹⁰ Ngò gi, Hkrisduq lé le, Yhang dui toq hkyô é hpungwup a-tsam lé le, Yhang hpuzô é hkyô má wó zùm yap râ lé le, Yhang shî hkâm é hkyô lé wó cháng râ lé le, sé nau ri. ¹¹ Haù jáng gi, ngò le, shi byuq bê mai dum dui toq é hkyô lé wó myoqbyù râ nghut lhê.

Myit Myoqbyu Tô É Jowò Shut Din Nyi Râ Hkyô

¹² Ngò gi, haù pé banshoq lé wó gû bê le a nghû naù, ngò gumjup gû bê le a nghû naù. Nghut kôlhang, Hkrisduq Yesuq gi, ngo lé lhom yù bê eq rajung za, ngò gi, haù lé wó lhom yù sháng gaq nghû, châng hkat nyi lhê. ¹³ Gumang wui ê, ngò yhang ngò gi, haù lé wó hap yù bê nghû a myit; nghut kôlhang, ngò kut é muzó ralhum gi, nunghtáng mâ é lé tô-myhî pyâm mù, myoq hí mâ é lé wó yù shoq nghû shikut luí, ¹⁴ Hkrisduq Yesuq má Garai Gasâng èq ngo lé ahtoq shut jì yu é chyunghuq lé wó yù râ matú, myoqbyu tô é jowò shut châng hkat din nyi lhê.

¹⁵ Gumjup bê bang nga-nhúng lhunglhang gi, haù sù é myit bò râ lhê. Rajung jung má nungmoq myit é hkyô shai nyi kô é nghut le gi, haù lé le, Garai Gasang gi, nungmoq lé san za tûn shit râ nghut lhê. ¹⁶ Hká dông nghut kôlhang, nga-nhúng gi, ahkuí jé

* **3:2** Bun zo shi lhum gi, ahpyo-kuq hpyit hkyô má noqzuq nyi é bang lé taí nau é nghut lhê. † **3:3** Ahpyo-kuq hpyit hkam yu é bang akying gâ é gi, Garai Gasâng é yhangzo hkyak nghut bê bang lé gâ lhê.

shoq châng nyi bê hkyô eq rajung za châng kut nyi shâng.

¹⁷ Gumang wui ê, nungmoq gi, ngò kut é đông chòm kut nyi keq, ngamoq mai nungmoq lé kut shit é alik eq rajung za châng é bang lé wú yû keq. ¹⁸ Hkâsu mù gâ le, hí hkûn ngò, nungmoq lé anum num taí kyô wú luí, ahkuí lhang, ngaù byí èq dum taí kyô é eq rajung za, Hkrisduq é tapzîng lé gyè kut é bang myo myo nyi bum akô nghut ri. ¹⁹ Yhangmoq é jhtûm gi, htên byoq hkyô nghut ri; yhangmoq é garai gi, yhangmoq é wamdau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myit gi, mingkan zè htoq má za nghut ri. ²⁰ Nghut kôlhang, nga-nhông é yhummau gi, mauhkông mingdán má nghut lhê. Nga-nhông gi, haú mâ é Yhumsîng Yesuq Hkrisduq gâ é hkyi yû Sû lé, myoqbyu láng nyi é bang nghut lhê. ²¹ Yhang gi, jung hkangmó lé, Yhang uphkan é a-ô má wó kut tô é Yhâng é a-tsâm èq nga-nhông é htên byoq sê é gungdu lé htaí lhik pyám byi luí, Yhâng é hpungwup bo é gungdu su dut nhâng râ nghut lhê.

4

¹ Haú mù luí, chyitdap é luzúm wui le nghut mù, ngò chyitdap bûn nghâm nyi é, ngá é gabú jowò eq janmaú nghut nyi é, ngá é gumang wui ê, haú gi, Yhumsîng má nungmoq hkâsu kut yap gîng nyi râ hkyô nghut lhê.

Lhoq Pun Lhoq Kyîng É Hkyô

² Ngò gi, Uodia eq Suntuki nhik lé, haú Yhumsîng má rayuq eq rayuq myit huí lhûm nyi râ matú, gyai yhang pying kat lhê. ³ Ngá é mù wùn luzúm kyîng ê, ngò gi, myiwe shí nhik lé garúm yû laq nghû, nang lé le dúng tôngbán kat lhê; yhangnhik gi, Klemen eq le, asak jihpán laiká buk má mying bo é, ngá é mù wùn luzúm wui góbang eq le, haú gabú danglù hkyô má ngò eq rahá gyai shikut wú bê sù nhik nghut lhê.

⁴ Haú Yhumsîng má hkâ-nhâm le gabú nyi keq! Ngò dum taí lhê, gabú

nyi keq! ⁵ Nungmoq nú-nhâm é hkyô, byù banshoq bang lé sé nhâng keq. Haú Yhumsîng gi, chyáng bê nghut ri. ⁶ Haí eq séng luí le, myit hkâ-myô hkâchiq kó; hkyô hkangmó má jeju hkya-on uchyang, kyûdúng é eq dúng tôngbán é đông, nungmoq dúng é hkyô pé lé, Garai Gasâng chyáng shit kyô nyi keq. ⁷ Haú hkûn, sé gyô é nyan banshoq htoq má gyaú é, Garai Gasâng é ngingón hkyô gi, nungmoq é myit nhiklum eq nungmoq myit é hkyô lé, Hkrisduq Yesuq má upzúng byí nyi râ nghut lhê.

⁸ Jhtûm má, gumang wui ê, tengmán é, hpautap gíng é, dingmán é, sansêng é, wó chyitdap é, hkungga gíng é, haí má nghut kôlhang, aróng wó dik é hkyô rajung jung, a nghut jáng, hkya-on gíng é hkyô rajung jung bo é nghut le gi, haú sù é hkyô pé lé myit nyi keq. ⁹ Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haí lé le châng kut nyi keq. Haú hkûn, ngingón hkyô byí é Garai Gasang gi, nungmoq eq rahá nyi nyi râ nghut lhê.

Jeju Bûn É Hkyô

¹⁰ Ahkuí kúm gi, ngá é hkyô lé nungmoq dum myit chiq byi kô é yanmai, ngò gi, haú Yhumsîng má gyai yhang gabú nyi lhê; gè gè yhang, nungmoq myit chiq byi nyi kôlhang, haú lé tûn shit râ ahkáng a wó kó nghut ri. ¹¹ Ngò îsu nghû taí nyi é gi, ngò má râ é hkyô bo tô é yanmai taí é a nghut, hkâsu mù gâ le, ngò gi, ngò hui mihui má, nhik dik nyi râ matú mhoq yû bê nghut lhê. ¹² Ra châ tô u lé, hkâsu kut râ ngò sê lhê; agùn agó wó u lé, hkâsu kut râ ngò sê lhê; hkyô hkangmó eq dut tô é ahkyo lum jup má, wam gyi kôlhang, zòmut kôlhang, agùn agó wó tô nyi kôlhang, ra châ to kôlhang, myit dik nyi râ hpaqchyí lé ngò wó mhoq yû bê nghut lhê. ¹³ Ngò gi, ngo lé wum-o a-tsâm byi sù Hkrisduq é yanmai, hkyô hkat hkangmó wó kut lhê.

¹⁴ Nghut kôlhang, ngò wuîhke jam-jau huî nyi é hkûn, nungmoq garúm yû kô é gi, ge é hkyô kut bekô nghut ri. ¹⁵ Hau htoq agó, Hpilipi byu pé nungmoq sê é eq rajung za, haû gabú danglù lé, ngò hkô mù nungmoq wó gyô yu hi é buinyi pé má, ngò Make-doni mau mai htoq ló râ hkûn, haû byi é hkyô eq lhom yu é hkyô má, nungmoq mai lai luî, noqkuq hpúng gotû ralhum lhang, ngo lé garúm kat é hkyô a bo é nghut lhê. ¹⁶ Ngò Ht-esaloni wà mó má nyi tô é hkûn lé lhang, nungmoq gi, ngò ra châ é hkyô lé adam dâm hûn byi bekô nghut ri. ¹⁷ Ngò gi, chyunghuq chyunghtang lé ho nyi é a nghut, nungmoq mai ashi je myo zuî jat râ matú lé za sheq ho nyi é nghut lhê. ¹⁸ Ngò gi, haî le gúm shoq myang yu é htoq agó, chyân shoq lhang nghut bê. Ahkuî, haû nungmoq hun kat é chyunghuq lé, Epah-prodi chyáng mai ngò lhom myang yù luî, ngò má agùn agó nghut nyi bê. Haû pé gi, namngón jung hkungga su, Garai Gasang lé gabú nhang é, hap yù gíng é hkungga ralhum nghut ri. ¹⁹ Ngá é Garai Gasang gi, Yhang agùn agó wó sùt nyi é eq rajung za, nungmoq râ é hkyô banshoq lé, Hkrisduq Yesuq má lhoq gúm lhoq jup byi râ nghut lhê.

²⁰ Hpungwup shingkang gi, nganhûng é Îwa Garai Gasâng chyáng pyat dedu ahtum abyuq ru joq nyi sháng gaq ô! Amen.

Shi-kyám Dang

²¹ Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wuî gi, nungmoq lé shi-kyâm kat akô nghut ri. ²² Sân-yúng bang banshoq gi, nungmoq lé shi-kyâm kat akô; Kehtaq é yhûm mâ é sân-yúng bang gi, je riyhang shi-kyâm kat akô nghut ri.

²³ Yhumsîng Yesuq Hkrisduq é jeju gi, nungmoq banshoq bang eq rahá ru joq nyi sháng gaq ô!

KOLOSE Pê Chyáng Hun Kat é Laiká (Colossians)

¹ Garai Gasâng èq hkyin yù mù, Hkrisduq Yesuq é lagyo dut sù, ngò Poluq eq nga-nhùng é gumang Tim-ohti gi, ² Kolose wà mó má nyi bang nghut é, Hkrisduq má chyoiyúng bang nghut é, lhumzuí é gumang wui chyáng dang kyô kat lhê. Nga-nhùng é Íwa Garai Gasâng chyáng má é jeju eq nguingón hkyô gi, nungmoq chyáng ru joq nyi sháng gaq.

Jeju Hkya-ôn É Eq Kyûdûng É Dang

³ Ngamoq gi, nungmoq é matú kyûdung byi é hkûn, nga-nhùng é Yhumsîng Yesuq Hkrisduq é Íwa nghut é Garai Gasâng lé ayang jeju hkya-ôn lhê. ⁴ Haí mù gâ le, Hkrisduq Yesuq má nungmoq lumjîng hkyô eq Yhâng é sân-yúng bang banshoq lé nungmoq chyitdap é hkyô lé, ngamoq wó gyô é yanmai nghut lhê. ⁵ Lumjîng myit eq chyitdap myit haú gi, nungmoq é matú mauhkûng htoq má hkong to byi é myit myoqbyù hkyô* mai lo é nghut lhê. Myit myoqbyù hkyô haú lé gi, nungmoq chyáng jé to bê gabú danglù nghut é tengmán mungdang mai, nungmoq wó gyô to gû nghut lhê. ⁶ Nungmoq gi, gabú danglù haú lé wó gyo lui, Garai Gasâng jeju eq sêng é tengmán hkyô lé sê hkyang é buinyi mai, nungmoq chyáng ashí zuí é eq kô myhang nyi bê nghut é eq rajung za, gabú danglù haú gi, mingkan gón má ge é ashí zuí nyi é eq kô myhang nyi bê nghut ri. ⁷ Nungmoq gi, haú hkyô lé, ngamoq é chyitdap byinzùm Epahpra chyáng mai mhoq yu é nghut lhê. Yhang gi, ngamoq é gunglik dông, Hkrisduq é lhumzuí é hpúng mù wùn sù nghut lhê. ⁸ Yhang gi, haú Woi-nyí èq

nungmoq lé byi tô é chyitdap hkyô lé, ngamoq lé tai kyo sù le nghut ri.

⁹ Haú nghut é yanmai, ngamoq gi, nungmoq eq sêng é hkyô lé wó gyô é nyi mai, nungmoq é matú ayang kyûdung byi nyi lhê. Garai Gasâng ô nau é hkyô lé sé râ hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq dông mai nungmoq chyáng lhoq pyíng byi sháng gaq nghû, Yhâng chyáng kyûdung byi nyi lhê. ¹⁰ Haú su kut kyûdung byi é gi, haú Yhumsîng ô nau é hkyô eq gingdán é dông nungmoq asak wó duí lui, hkyô hkangmó má Yhang lé wó gabú nhâng râ matú nghut lhê. Hau dông mai, nungmoq gi, ge é muzó hkangmó má ashí zuí nyi lui, Garai Gasâng lé sê é hpaqchyí má kô myhang nyi kó râ nghut lhê. ¹¹ Hau htoq agó, nungmoq gi, Yhâng é hpungwup a-tsam dông mai a-tsam banshoq èq wum-o lhoq kîng byi é huí nyi kó râ nghut lhê. Haú mù, nungmoq gi, gyai hkam jân é hkyô eq myit hing é hkyô lé, gabú myit mai wó yú kó râ nghut lhê. ¹² Maubó é mingdán má, sân-yúng bang eq sêng é muizè lé wó bo hkam yù râ matú, nungmoq lé gingdán nhang é sù haú Íwa lé le, jeju wó hkya-on kó râ nghut lhê. ¹³ Hkâsu mù gâ le, Íwa haú gi, nga-nhúng lé, mauchut èq up é hkaú mai hkyi htoq yú lui, Yhang chyitdap é Yhang Zô é mingdán má shuí hâng é Sù nghut lhê. ¹⁴ Nga-nhúng gi, haú Yhang Zo dông mai, hkyi xe yu é hui mù, yubak mara hkyut pyám byi é hui bê nghut lhê.

Jung Hkangmó É Ushuq, Hkrisduq

¹⁵ Hkrisduq gi, myoq èq a byu-myàng é Garai Gasâng é gungghyâng isâm nghut lui, zomún dông hpan tô é lhunglhâng htoq má gyaú é sù nghut ri. ¹⁶ Hkâsu mù gâ le, mauhkûng eq myigùng htoq má joq é azíng zé pé, myoq èq byu-myang é eq a byu-myang é pé nghut kôle, hkohkâm ayá pé, a-tsam pé, uphkâng bang, ahkáng ayá wó bang nghut kôle, lhunglháng

* **1:5** Bun zo shí má bo é myit myoqbyù hkyô gi, Yesuq lé tai é nghut lhê.

gi, Yhâng èq hpan to huí é chyat nghut lhê. Lhunglháng gi, Yhâng é matú, Yhâng èq hpan to huí é chyat nghut ri. ¹⁷ Yhang gi, lhunglhâng é hí mâ é nghut mù, lhunglháng gi, Yhâng é yanmai joq gîng bum é chyat nghut lhê. ¹⁸ Yhang gi, noqkuq hpúng nghu é gungdû é ulhum nghut ri; Yhang gi, jung hkgangmó má gyaú dik é ushuq dut sháng gaq ga, sâng-hi awang nghut sù eq shí é bang mâ é hí dui toq é zomún dut sù nghut ri. ¹⁹ Hkâsu mù gâ le, Garai Gasang gi, Yhâng é byíng jup hkyô banshoq, Yhang Zo má joq nyi râ lé myit ngui ô nau é nghut mù, ²⁰ haú tapzîng má htoq byí é Yhang Zô é sui dông mai nguingón hkyô kut byí é èq, myigùng htoq mâ é azíng zê nghut nghut, mauhkûng mâ é azíng zê nghut nghut, lhunglháng lé, Yhang Zo dông mai, Yhang eq nguingón simsaq hkyô xoq yú bê nghut ri.

²¹ Nungmoq gi, Garai Gasang eq wê gâng é bang dut wú kôluí, nungmoq é agè ashop nyi yap sâmlaí é yanmai, nungmoq i-myit má, Yhâng é gyè dut wú bekô nghut lhê. ²² Nghut kôlhang, ahkuí, Garai Gasang gi, nungmoq lé, râ é hkyô a bo é eq mara hún râ hkyô a bo é za, chyoyúng é dông Yhâng é hí má shit râ matú, Hkrisduq é gungsho gungdu shí hkâm é dông, nungmoq eq nguingón simsaq hkyô xoq yú bê nghut ri. ²³ Haú gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gíngtîng nyi mù, nungmoq é lumjîng hkyô má xoq nyi nyi é nghut jáng sheq dut râ nghut lhê. Gabú danglù shí gi, nungmoq wó gyô wú bê nghut é htoq agó, mauhkûng ô má hpan tô é jung hkgangmó lé hko kyô nyi bê nghut lhê. Ngò, Poluq le, gabú danglù hau é dui-nhâng zoshâng dut é nghut lhê.

Noqkuq Hpúng É Matú Poluq Wùn Waq É Hkyô

²⁴ Ahkuí, ngò gi, nungmoq é matú jamjau huí é má gabú lhê; hau htoq

agó, Hkrisduq é gungdu nghut é, noqkuq hpúng é matú, râ tô ashí nghut é, Yhang hpuzô é hkyô lé, ngá é gùng má ngò lhoq gumjup yu nyi lhê. ²⁵ Ngò gi, Garai Gasâng é mungdang lé, nungmoq chyáng gumjup shoq hko kyo râ matú, Garai Gasang, ngo lé hun tô é wò mai, noqkuq hpúng hau é mù wùn sù dut é nghut lhê. ²⁶ Mungdang haú gi, gohkûn mai apyat pyat haq tô gyó lo é zaú tô é hkyô nghut kôlhang, ahkuí gi, haú sâng-yúng bang lé hpông shit bê nghut ri. ²⁷ Garai Gasang, haú su kut é gi, zaú tô é hkyô hau é agùn agó hpungwup shingkang, tûngbaú pè chyáng hkâsu nghut é hkyô, yhangmoq lé sé nhâng râ matú nghut lhê. Zaú tô é hkyô haú gi, hpungwup shingkang lé myoqbyù é hkyô nghut é, nungmoq má Hkrisduq dui nyi bê hkyô lé gâ é nghut lhê.

²⁸ Hkrisduq má gumjup é dông, byù yuq hkgangmó lé wó shuí jé sháng gaq nghú, ngamoq gi, Hkrisduq é hkyô lé taí pyô luí, yuq hkgangmó lé, hpaqchyí byéng-yá banshoq èq taí pun taí kyíng é eq mhoqshit nyi é nghut lhê. ²⁹ Ngò, haú-í yhang wó wùn waq shikut é gi, ngò má wum-o a-tsam byíng byíng mú zuí nyi Su é wum-o banshoq èq wùn waq shikut nyi é ru nghut lhê.

2

¹ Ngò gi, nungmoq é matú le, Ladoki wá mó bâng é matú le, ngò eq myoqdong hkyúm a huí wú shí é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri. ² Haú su awui ahke shikut é hkyô gi, yhangmoq, myit má wum-o byí é hui râ eq chyitdap myit má rading ralhum za wó dut râ matú nghut lhê. Haú hkûn, yhangmoq gi, Garai Gasâng é zaú tô é hkyô nghut é, Hkrisduq lé wó sé râ matú, sê gyô é nyan lhunglhâng é isut byíng shoq lé wó yú kó râ nghut lhê. ³ Haú Hkrisduq má kúm gi, hpaqchyí byéng-yá eq sumsé hpaqchyí gâ é sutzè lhunglháng lé tsîng tô ri. ⁴ Nungmoq lé ngò haú

hkyô taí kyô é gi, ó yuq le, dang ngón dang ngui èq mhoq hpyoq é dông, nungmoq lé a wó mhaú zo râ matú nghut lhê. ⁵ Hkâsu mù gâ le, ngá gungdu nungmoq eq rahá a nyi kôhang, ngá é myit gi, nungmoq eq rahá nghut nyi luí, nungmoq shuq shuq tap tap za nghut nyi kô é eq Hkrisduq lé lumjínq é má hkâ-í gíngtíng nyi kô é lé myàng mù, ngò gabú nyi lhê.

Hkrisduq Đông Mai Wó É Gumjup É Asak Dui Hkyô

⁶ Haú mù luí, nungmoq gi, Hkrisduq Yesuq lé Yhumsínq nghú hap yù bekô nghut é eq rajung za, Yhang má asak xoq dui nyi keq. ⁷ Yhang má apún amyit chin gíng nyi mù, kô myhang lò luí, nungmoq mhoq yù bê eq rajung za, lumjínq hkyô má wum-o lhoq kíng mù, jeju hkya-ôn é hkyô byíng zan nyi keq.

⁸ Hkrisduq chyáng mâ é a nghut é za, mingkan shí mâ é uphkâng tarâ pé eq xângzo wui é htúngli cháng luí, mhaú zô é myit sôn hpaqchyí eq akyû a bo é dang dông, ó yuq èq le, nungmoq lé a wó shuí nghoq yú kó sháng gaq, sidiq nyi keq.

⁹ Hkâsu mù gâ le, Garai Gasâng é gumjup hkyô banshoq gi, Hkrisduq é gungdu hkyangmân má lúng nyi mù, ¹⁰ nungmoq gi, a-tsam bo é banshoq eq ahkáng ayá wó é banshoq é ushuq nghut é Hkrisduq eq sêng é bang nghut kômù, gumjup é bang dut bekô nghut ri. ¹¹ Yhang má, nungmoq gi, byu loq èq kut é ahpyo-kuq hpyit hkyô dông a nghut é za, ahpyo-kuq hpyit é su, Hkrisduq èq yubak gungsho mara lé hkyut sêng pyâm é hkyô lé hkam yù bekô nghut ri. ¹² Nungmoq gi, wui-myhup hkâm é hkûn Hkrisduq eq rahá myhup yhûm é hui bekô nghut mù, Yhang lé shi é mai lhoq dui toq yu é, Garai Gasâng é a-tsam lé nungmoq lumjínq kô é

yanmai, Yhang eq rahá lhoq dui toq yu é hui bekô nghut ri.

¹³ Nungmoq é yubak mara pê é yanmai le, nungmoq é yubak gungsho mara lé huí sêng pyâm é a hkam yu é yanmai le, nungmoq shi tô é hkûn, Garai Gasang gi, nungmoq lé, Hkrisduq eq rahá asak dui nhâng bê nghut ri. Yhang gi, nga-nhúng é yubak mara lhunglhang lé hkyut pyám byi luí, ¹⁴ nga-nhúng eq shai lhum mù, nga-nhúng lé htuq htíng é, tarâ pé bo é jéyáng râ jihpán lé huí sêng pyám byi bê nghut ri. Yhang gi, haú lé tapzínq htoq má dok tap pyâm é dông yu pyám byi bê nghut lhê.* ¹⁵ Haú dông mai, a-tsam bò bang eq ahkáng ayá wó bâng a-tsam lé lang hkyut hkyô pyám mù, Yhang gi, tapzínq èq yhangmoq lé ung pyâm é dông, byù pé é hí má yhangmoq lé de de kut to bê nghut ri.

¹⁶ Haú mù luí, nàng haí zo haí shuq é yanmai le, noqkuq htúng eq sêng é poí buinyi, Lhoxan Lhosik poí, Bánno buinyi eq séng luí le, nungmoq lé, ó yuq èq le a wó jéyáng kó sháng gaq. ¹⁷ Haú pé gi, dut lò râ hkyô pê é wupzo chyat nghut lhê; haú gùng gyíng gi, Hkrisduq yhang nghut nyi ri. ¹⁸ Myit lhoq nyhum mhaú é eq maumang lagyô pé lé noqkuq é lé myit ngui é sù ó yuq èq le, nungmoq lé, chyunghuq eq a gíngdán râ dông hkâkut nhâng kó. Haú su é yuq gi, yhumsínq byu-myang é lét† za taí shikut mù, yhum-sínq é gungsho myit mai, akôm yhang nghut é lé gyáng dang taí é sù nghut ri. ¹⁹ Yhang gi, Garai Gasang kô myhâng nhang é su, gungdu gón é gungsho showui showang pé eq shogyi pé lé htuqbang byi mù rahá lêng tsing tô é haú ulhum nghut é Hkrisduq eq xoq é hkyô lé byoq ló nhâng bê nghut ri.

²⁰⁻²¹ Nungmoq gi, Hkrisduq eq rahá, mingkan shí mâ é tarâ pé eq shi gang bekô nghut le nhíng, haí mù,

* **2:14** Yhang gi, haú lé tapzínq htoq má dok tap pyâm é dông yu pyám byi bê nghut lhê gâ é gi, Hkrisduq tapzínq má shí hkâm byí é hkûn, nga-nhúng é yubak mara banshoq lé, Garai Gasâng èq hkyut pyám byí é lé taí nau é nghut lhê. † **2:18** Byu-myang é lé gâ é gi, yhang myit htoq é shing-rán lé gâ lhê.

haû eq sêng lhum nyi ashî kó lhú? "Hkâzui, hkâchyâm, hkâzâng." gâ é tarâ ô má nyi nyi ashî kó lhú? ²² Haú pé gi, waxâng zô wui é hkunmó pé eq mhoqshit hkyô pé nghut é yanmai, jai chung é hkûn, htên byuq râ chyat nghut lhê. ²³ Haû sù é tarâ pé gi, yhumsîng yhang noqkuq shikut é, myit lhoq nyhum mhaû é eq gungdu lé gunjâng é pé nghut luí, hpaqchyí byéng-yá bo é su dut kôlhang, gungshô é agè ashop yut yut ô nau hkyô lé wó hkûm zing pyám râ má, hai akyû a bò nghut ri.

3

Chyoiyúng É Đông Asak Dui Râ Hkyô

¹ Haû mù luí, nungmoq gi, Hkrisduq eq rahá lhoq dui toq é hui bekô nghut jáng, Garai Gasâng é loqyo hkyam* má zung tô é Hkrisduq é jowò má joq é, ahtoq mâ é azíng zê pé lé myit ô nau nyi keq. ² Nungmoq gi, myidàm htoq mâ é azíng zê lé myit tuí é a nghut é za, ahtoq mâ é azíng zê lé myit tuí nyi keq. ³ Hkâsu mù gâ le, nungmoq gi, shî bekô nghut luí, ahkuí, nungmoq é asak gi, Hkrisduq eq rahá, Garai Gasang má haq tô é hui bekô nghut ri. ⁴ Nungmoq é asak nghut sù, Hkrisduq htoq shit é hkûn, nungmoq le, Yhang eq rahá, hpungwup shingkang hkaû má htoq shit kó râ nghut lhê.

⁵ Haû mù luí, nungmoq é mingkan hkyô eq sêng é, ashop é đông gungsho zùm yap é hkyô, agot a-û nyi zô lhúm é hkyô, ye lhaí nau é hkyô, agè ashop yut yut ô nau é hkyô eq, hparà noq hkyô nghut é myoqnoq hkyô pé haí lé le sat pyám keq. ⁶ Haú hkyô pé é yanmai, Garai Gasâng é nhikmo-yo hkyô gi, jìno a gyo bâng é ahtoq má† jé râ za nghut lhê. ⁷ Laí lò bê hkûn, nungmoq le, haú hkyô pé đông sô wú kô é nghut lhê. ⁸ Nghut kôlhang, ahkuí,

nungmoq gi, nhikjum yô é, nhikmo-yô é, agè ashop é đông nò shoq kut é, lumù gansang é eq, nungmoq é nhutwui mai hkunchooq taí é hkyô shí pé banshoq lé, yhumsîng gùng yhumsîng tô pyám râ dut lhê. ⁹ Rayuq eq rayuq hkâ-mhaû lhum kó; hkâsu mù gâ le, nungmoq gi, nungmoq é byù xau eq byù xaú é nyi yap hkyô lé hkyut pyám mù, ¹⁰ byù sik lé tû wut yû kô é nghut lhê; byù sik haû gi, sumsé hpaqchyí đông mai, yhang lé hpân Su é gungdu isâm má asik jat lò nhang é huí nyi ri. ¹¹ Byù sik má gi, Grik eq Yudaq byù nghu é, ahpyokuq hpyit hkâm bang eq a hkâm bang nghu é, byù bíng eq byù jum nghu é, jùn eq jùn a nghut sù nghu é a nyi lô é za, Hkrisduq gi, banshoq nghut mù, banshoq má nyi nyi ri.

¹² Haû mù luí, Garai Gasâng èq hkyin yù huí é bang, Yhâng èq gyai yhang chyitdap é huí é chyoiyúng bang đông, shogyo myit, gè hkyô shit é myit, lhoq nyhum é myit, nú nhâm é myit eq myit hing é hkyô pé lé, yhumsîng gùng yhumsîng mebu su wut to keq. ¹³ Nungmoq yhangchang mara kut shut é hkyô joq é nghut jáng, hkam jan byí lhum luí, rayuq eq rayuq mara hkyut byí lhum keq. Haû Yhumsîng gi, nungmoq é mara hkyut pyám byí é su, nungmoq le mara hkyut byi keq. ¹⁴ Haû ge é sâmlai banshoq wó é htoq agó, gumjup é rading ralhum za dut é hkyô má, banshoq lé rahá wó tuí zing tô é chyitdap myit lé puq wut to keq.

¹⁵ Nungmoq gi, nguínón hkyô wó râ matú ji yu é hui bekô nghut mù, gungdu ralhum mâ é bang chyat nghut bekô yanmai, Hkrisduq é nguínón hkyô lé, nungmoq é myit má up nhang nyi keq. Haû mù, jeju hkya-ôn nyi keq. ¹⁶ Nungmoq, rayuq eq rayuq, hpaqchyí byéng-yá banshoq èq mhoqshit é eq lhoq pun lhoq kyíng lhúm é hkûn le, Garai Gasang lé nungmoq jeju bún é myit mai, jihkyang dang,

* **3:1** Loqyo hkyam nghu é gi, ahko ahkáng wó é jowò lé gâ é nghut lhê. † **3:6** Jìno a gyo bâng é ahtoq má, gâ é dang, chyúmding ra-am má a bò nghut lhê.

hkyá-on mahkôn, woi-nyí eq sêng é mahkôn pé hkon é hkûn le, haû Hkrisduq é mungdang lé, nungmoq é myit nhiklhûm má agùn agó bò nhang nyí keq. ¹⁷ Nungmoq haî wá kut kut, dang dông nghut nghut, zui saî é dông nghut nghut, banshoq lé Yhumsîng Yesuq é myîng mai kut é hkûn, haû Íwa nghut é Garai Gasang lé Yhang dông mai jeju hkyá-on keq.

Hkristan Ikun Byu Pé Nyí Yap Râ Hkyô

¹⁸ Ikun myhî pé ê, ikun hpô pé uphkanq é ahkaû má nyí keq. Haû gi, Yhumsîng é hí má kut gîng é hkyô nghut lhê.

¹⁹ Ikun hpô pé ê, ikun myhî pé lé chyitdap nyí keq. Yhangmoq lé dang htân hkâ-nyô kó.

²⁰ Zo wuí ê, jung hkanqmó má nungmoq é mó wuí é jîno gyo keq; hkâsu mù gâ le, haû gi, Yhumsîng ô nau é hkyô nghut lhê.

²¹ Íwâ pé ê, nungmoq é zo wuí lé myit hkâ-nô nhâng kó, nô nhâng jâng gi, yhangmoq, myit wum gyûi byuq kó râ nghut lhê.

²² Jùn pé ê, hkyô hkanqmó má nungmoq é myidâm htoq mâ é jùn sîng bang uphkanq é ahkaû má nyí keq; yhangmoq é myoq hí má za zui saî luí, myoqdong ho é dông a nghut é za, haû Yhumsîng lé gyuq hkunggâ é eq lhumzui é myit mai zui saî nyí keq. ²³ Nungmoq haî wá kut kôle, byu é matú kut é a nghut, haû Yhumsîng é matú kut nyí é dông, nungmoq é myit nhiklhûm banshoq eq zui saî nyí keq. ²⁴ Haî mù gâ le, nungmoq gi, haû Yhumsîng chyáng mai, muizé lé chyunghuq dông wó yû kó râ nghut é lé, sé kô é yanmai nghut lhê. Nungmoq dojaú nyí é sù gi, Yhumsîng Hkrisduq ru nghut lhê. ²⁵ Kut shut sù gi, yhang kut shut é marâ matú dam byí é huí zo râ nghut lhê, haî mù gâ le, Garai Gasang gi, myoqdong hkyin é hkyô a joq.

4

¹ Jùn sîng bang ê, nungmoq é jùn pé lé, tengmán é eq gîng âng é dông lajang byí nyí keq; haî mù gâ le, nungmoq le, mauhkûng htoq má Yhumsîng rayuq wó é lé sé kô é yanmai nghut lhê.

Xoq Lui Pying Kat É Hkyô

² Nungmoq gi, kyûdûng é má myit zîng zuq nyí mù, machyâ luí, jeju hkyá-ôn nyí keq. ³ Ngò, shamtoq-tui hut huí nyí shoq dut é, Hkrisduq é zaú tô é hkyô lé ngamoq wó taí pyô sháng gaq, Garai Gasang gi, mungdang lé ngamoq taí râ hkyô hkum hpóng byi râ matú kyû bo dung byi kó laq. ⁴ Haû Hkrisduq é zaú tô é hkyô lé, ngò taí âng é dông san za wó taí pyô sháng gaq, kyû bo dung byi kó laq. ⁵ Nungmoq gi, a lumjîng bang eq zùm yap é hkûn hpaqchyí bo nyí keq; wó yu é ahkyíng hkanqmó lé rago yhang chung jai keq. ⁶ Nungmoq gi, yuq hkanqmó lé hkâsu tû taí râ hkyô wó sé kó shoq, dáng nyo é má, xô èq nghám nhang é su, hkâ-nhám le jeju byíng é dang bo nyí sháng gaq.

Ló Htâng É Shi-kyâm Dang

⁷ Tuhkiku gi, ngá hkyô eq sêng é danglù banshoq, nungmoq lé taí kyo râ nghut lhê. Yhang gi, ngá é chyitdap gumang, haû Yhumsîng má, lhumzui é hpúng mù wùn sù eq byinzùm nghut lhê. ⁸ Ngò, yhang lé nungmoq chyáng nhang kat é hkyô gi, ngamoq chyáng dut nyí é hkyô lé nungmoq wó sé râ eq, nungmoq lé myit wum wó byi râ matú nghut lhê. ⁹ Yhang gi, nungmoq chyáng mâ é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhangnhik gi, shî má dut nyí é hkyô jung hkanqmó lé taí kyo kó râ nghut lhê.

¹⁰ Ngò eq rahá htóng lúng sù Aris-takuq gi, nungmoq lé shi-kyâm kat ri. Barnaba é yhâng za-aû Markuq le, nungmoq lé shi-kyâm kat ri. (Markuq eq séng luí pying kat é hkyô lé nungmoq wó yû to bê nghut mù, nungmoq chyáng, yhang jé lé é nghut jâng, lhom hkûlum yû keq.) ¹¹ Yustu le gâ

é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm mù zui bang má, haú bang za Yudaq byu pé nghut kômù, yhangmoq gi, ngo lé nhik títng byî é bang nghut akô. ¹² Nungmoq chyáng má é byù nghut sù eq Hkrisduq Yesuq é mù wùn sù, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lhunglháng má hkyak lùm to mù, gumjup luí wó gíngtítng nyí sháng gaq ga, Yhang gi, ayang nungmoq é matú kyûdung shikut byî nyi ri. ¹³ Nungmoq é matú le, Ladoki wà mó eq Herapoli wà mó bâng é matú le, yhang gi, gyai yhang mù zui shikut byî é hkyô lé, yhang é matú ngò saksé hkâm lhê. ¹⁴ Ngamoq é chyttdap chi sará Lukaq eq Demaq gi, nungmoq lé shi-kyâm kat akô nghut ri. ¹⁵ Ladoki wà mó má é gumang wui lé le, Numhpa eq yhâng yhùm má é noqkuq hpúng lé le, bo shi-kyám byi keq.

¹⁶ Laiká shî lé, nungmoq lé nghap kyô é htâng má, Ladoki byu pé é noqkuq hpúng má le nghap nhâng mù, Ladoki wà bâng chyáng hùn kat é laiká lé le, nungmoq nghap wú keq.

¹⁷ "Haú Yhumsing chyáng mai nàng hap yù to bê é muzó lé rago za lhoq pán pyám aq." nghû, Arhkipò lé tái kyo keq.

¹⁸ Ngò, Poluq gi, ngá é loq èq yhang shi-kyám dang shî lé kê kat é nghut lhê. Ngò, shamtoq-tui wut tô é lé bûn nyí keq. Jeju gi, nungmoq chyáng ru joq nyí sháng gaq ô.

HTESALONI Pê Chyáng Hî Dàm Hun Kat é Laiká (1 Thessalonians)

¹ Ngò Poluq, Sila* eq Timohti pé gi, Íwa Garai Gasang eq Yhumsîng Yesuq Hkrisduq má nghut nyî bê bang, haû Htesaloni wà mó byu pê é noqkuq hpúng lé dang kyô kat lhê. Garai jeju eq nguingón hkyô gi, nungmoq chyáng ru joq nyî sháng gaq.

Jeju Hkya-ôn É Hkyô

² Ngamoq gi, hkâ-nhám le, nungmoq banshoq bâng é matú, Garai Gasang lé jeju hkya-on luí, ngamoq é kyûdung dang má nungmoq lé bo dúng lhôm nyî lhê. ³ Nungmoq é lumjîng myit mai zui saí é nungmoq é muzó lé le; chyitdap myit é yanmai, nungmoq shikut é hkyô lé le; nga-nhûng é Yhumsîng Yesuq Hkrisduq má myit myoqbyu tô é yanmai, nungmoq hkam jân é hkyô lé le, nga-nhûng é Íwa Garai Gasang é hí má, ngamoq ru bûn nyî lhê.

⁴ Garai Gasang chyitdap é gumang wui ê, Yhang nungmoq lé hkyin yù bê lé, ngamoq sê lhê. ⁵ Hkâsu mù gâ le, ngamoq é gabú danglù gi, nhutdang đông za nungmoq chyáng jé é a nghut, wum-o a-tsam đông le, Chyoiyúng Woi-nyí đông le, tengmán hkyô byíng jup é đông le, jé bê nghut é yanmai nghut lhê. Ngamoq, nungmoq eq rahá nyi é hkûn, nungmoq é matú hkâsu kut laí lo é hkyô lé, nungmoq sé gù nghut lhê. ⁶ Nungmoq gi, wuihke jamjau myo myo hui zo kôlhang, Chyoiyúng Woi-nyí byí é gabú myit mai, danglù haû lé lhom yù kôluí, ngamoq lé le, haû Yhumsîng lé le, alik kut yu é bang dut bekô nghut ri. ⁷ Haû mù, Makedoni mau eq Ahkaia mau mâ é lumjîng bang banshoq é alik, nungmoq dut bekô nghut ri. ⁸ Nungmoq chyáng mai, Makedoni

mau eq Ahkaia mau má, haû Yhumsîng é mungdang hû htoq ló e za a nghut, Garai Gasang má nungmoq lumjîng hkyô gi, jowò hkangmó jàm ló bê nghut luí, ngamoq gi, haí le taí nó a ra lo nghut ri. ⁹ Hkâsu mù gâ le, ngamoq lé nungmoq hká đông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hparà lhô pé lé tô pyám luí, Garai Gasang shut hkâsu kut lhing lò mù, rû dui nyi é eq tengmán é Garai Gasang lé dojaú nyi é hkyô lé le; ¹⁰ mauhkûng mâ é haû Yhang Zo lé láng nyi é hkyô lé le, yhangmoq taí kyô akô. Yhangzo haû gi, Yhang eq shi é mai lhoq dui toq yu é hui luí, jé lô râ nhikmó yo hkyô mai nga-nhûng lé hkyi yù sù, Yesuq nghut ri.

2

Poluq, Htesaloni Wà Mó Má Garai Mû Wùn Waq É Hkyô

¹ Gumang wui ê, nungmoq chyáng ngamoq lé kûm é hkyô gi, akôm a nghut é lé, nungmoq yhang sê lhê. ² Nungmoq sê é eq rajung za, ngamoq gi, hí hkûn, Hpilipi wà mó má wuihke jamjau eq rhoí é huí wú bê nghut lhê; nghut kôlhang, nga-nhûng é Garai Gasang garúm é yanmai, gyaí lhom htut htîng é hui kôle, Garai Gasang é gabú danglù lé, a gyuq a kyum nungmoq lé wám taí kyô é nghut lhê. ³ Hkâsu mù gâ le, ngamoq lhoq pun lhoq kyîng é hkyô gi, shut é, a nghut jáng, a sansêng é i-myit đông eq nungmoq lé mhaú zô é đông a nghut e za, ⁴ haû gabú danglù lé chûng gíng é bang ga, Garai Gasang chyáng mai ahkáng wó é đông za, ngamoq taí é nghut lhê. Ngamoq gi, byu pé lé gabú nhâng râ matú a nghut, ngamoq é myit lé chyam wú nyi é Garai Gasang lé, gabú nhâng râ matú shikut é ru nghut lhê. ⁵ Hkâsu mù gâ le, nungmoq sê é eq rajung za, ngamoq gi, lhoq ngón mhaú é dang le hkâ-nhám a chûng wú, nghop tô é myoqnoq myit

* 1:1 Sila lé gi, Salwanu le gâ lhê.

le hkâ-nhâm a bò, Garai Gasang gi, ngamoq é saksé nghut lhê. ⁶ Ngamoq gi, byu pé mai le, nungmoq mai le, gotû ó yuq mai le hkya-on râ lé ho nyi é a nghut, Hkrisduq é lagyô pé nghut é eq rajung za, nungmoq lé wòlai hùn naù jáng wó hun lhê; nghut kôlháng, ⁷ înu rayuq, yhang é zoshâng zô pé lé hku baú é su, nungmoq chyáng nú-nhâm é dông nyi laí lò bê nghut lhê. ⁸ Ngamoq gi, nungmoq lé gyai yhang chyitdap luí, Garai Gasâng é gabú danglù za a nghut, ngamoq é asak pé nungmoq lé byí pyâm le lháng nhik dik lhê; hkâsu mù gâ le, nungmoq gi, ngamoq chyitdap dik é bang dut bekô nghut é yanmai nghut lhê. ⁹ Gumang wui ê, nungmoq gi, ngamoq gyai yhang mù zui shikut é hkyô lé, gè gè bun kó râ nghut lhê; Garai Gasâng é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wòlai a byi sháng gaq nghû, ngamoq gi, nyí lé, myín lé, mù zui é nghut lhê.

¹⁰ Ngamoq gi, lumjîng bê bang nungmoq é hí má, hkâsu chyoiyúng é eq dingmán é, mara hùn râ a bo é bang dut laí lo é hkyô lé, nungmoq le, Garai Gasang le, saksé nghut lhê. ¹¹ Hkâsu mù gâ le, ngamoq gi, îwa rayuq mai yhumsing yhangzô pé lé kut byí é su, nungmoq yuq hkangmó lé, myit wum byí nyi é hkyô lé le, nhik taí tîng nyi é hkyô lé le, ¹² Yhang é mingdán eq hpungwup shingkang má, nungmoq lé wut yu é Garai Gasang eq gingdán é dông, nungmoq asak wó dui nyi sháng gaq nghû, nungmoq lé wum byí nyi é hkyô lé le, nungmoq yhang sê nyi lhê.

¹³ Ngamoq gi, ngamoq chyáng mai nungmoq wó gyô yu é Garai Gasâng é mungdang lé, nungmoq lhom yu é hkûn, byu é dang lé lhom yu é dông a nghut e za, lumjîng é bang nungmoq má mù zui nyi é, haù Garai Gasâng é mungdang lé yhang, lhom yù kô é yanmai, Garai Gasang lé xoq xoq jeju hkya-ôn nyi lhê. ¹⁴ Gumang wui ê, nungmoq gi, Hkrisduq Yesuq má nghut nyi é, Yuda mau má joq é Garai

Gasâng é noqkuq hpúng pé lé, alik kut yu é bang dut bekô nghut ri. Noqkuq hpúng haù pé gi, Yudaq byu pé zing-rí é lé hui zô é su, nungmoq le, yhumsing mau mâ é byu pé zing-rí é lé hui zô akô nghut ri. ¹⁵ Yudaq byu pé gi, haù Yhumsîng Yesuq eq myiqhtoí pé lé sat pyâm kôluí, ngamoq lé le hkat htoq akô. Yhangmoq gi, Garai Gasang a ô nau é hkyô kut é bang, byù lhunglháng eq gyè dut é bang nghut akô. ¹⁶ Tûngbaù pé hkyi yù hui râ matú, ngamoq hko kyô é hkyô lé, yhangmoq hkûm akô; yhangmoq gi, hkâ-nhâm le, yhumsing é mara lé dik shoq haù dông lhoq jat myô yù akô nghut ri. Haù mù, Garai Gasâng é nhikmo-yô é hkyô gi, yhangmoq ahtoq má jé bê nghut ri.

Htesaloni Byu Pé Lé Poluq Huí Nau Nyi É Hkyô

¹⁷ Gumang wui ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lhê; nungmoq lé gyai bun-nghâm nyi luí, wó myang hui shoq nghû, ngamoq gyai yhang shikut nyi lhê. ¹⁸ Nungmoq chyáng ngamoq jé lé naù mù luí, ngò Poluq yhang, adàm dàm shikut wú bê; nghut kôlháng, Tsadán gi, ngamoq lé hkûm tang pyâm ri. ¹⁹ Hkâsu mù gâ le, nganhûng é Yhumsîng Yesuq Hkrisduq é hí má, Yhang jé lé é hkûn, ngamoq é myit myoqbyù hkyô, gabú hkyô eq gumrông râ janmaú gi, haí jung wá nghut lhê gâ le, nungmoq yhang nghut nyi lhê a nghut kó lhú? ²⁰ Gè gè yhang, nungmoq gi, ngamoq é gumrông jowò eq gabú hkyô nghut nyi ri.

3

¹ Haù mù luí, ngamoq gi, haù lé a wó jân nyi lo jáng, Ahten myuq má ngamoq baú nyi gyó le je gè râ nghut lhê nghû, myit hpyit yù mù, ² wuîhke jamjau shí pê é yanmai, ó yuq le, myit a hten kó sháng gaq nghû, nungmoq é lumjîng hkyô má, nungmoq lé wum-o byi râ eq myit wum byi râ matú,

³ Hkrisduq é gabú danglù lé hko kyô é hkyô má, ngamoq é gumang eq Garai Gasâng é mú wùn luzúm nghut é Timohti lé, nhang kat é nghut lhê. Nga-nhúng gi, wuîhke jamjau pé hui zo râ matú, hkyin to huî é bang nghut é lé, nungmoq yhang rago sê nyi lhê. ⁴ Nga-nhúng gi, zing-ri hui zo râ nghut lhê nghû, ngamoq, nungmoq eq rahá nghut nyi é hkûn, noq mai nungmoq lé ngamoq taí kyô nyi gù nghut bê. Nungmoq rago sê é eq rajung za, haú dông dut bê nghut ri. ⁵ Hau é yanmai, ngò a wó jân nyi lo jáng, haú gungláu sù mai nungmoq lé gungláu yû luî, ngamoq wùn waq bê muzó gi, akôm dut byuq râ lé, myit chiq mù, nungmoq é lumjîng hkyô lé wó sé râ matú, yhang lé ngò nhang kat é nghut lhê. Gungláu sù gi, nat Tsadán nghut lhê.

Timohti Lo Shit Kyô É Wum Byi Dang

⁶ Ahkuî kúm, Timohti gi, nungmoq é lumjîng hkyô eq chytidap myit eq sêng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhám le, ngamoq lé rago bún nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang lo taí kyo bê nghut ri. ⁷ Haú mù luî, gumang wuî ê, ngamoq myit myo uhkyî é hkyô eq zing-ri huî é hkyô pé banshoq má, nungmoq é lumjîng hkyo é yanmai, nungmoq eq séng luî myit wum byi é hkyô lé ngamoq wó yû bê nghut lhê. ⁸ Ahkuî, ngamoq gi, haú Yhumsîng má nungmoq yap gîng nyi kô é yanmai, gè gè nyi ngón bê nghut lhê. ⁹ Nga-nhúng é Garai Gasâng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkâsu kut jeju ûng hkya-on râ lhú? ¹⁰ Ngamoq gi, nungmoq lé dum myàng râ matú eq, nungmoq é lumjîng myit má langhpyut é hkyô lé wó lhoq hkúm byi râ matú, nyí, myín,

gyai yhang lhumzui luî kyûdûng nyi lhê.

¹¹ Nungmoq chyáng ngamoq lé râ matú, nga-nhúng é Yhumsîng Yesuq eq nga-nhúng é Îwa Garai Gasang yhang ngamoq lé hkyô hpóng byi sháng gaq. ¹² Nungmoq lé ngamoq chytidap nyi é su, haú Yhumsîng gi, nungmoq é chytidap myit lé, rayuq eq rayuq é ahtoq má le, yuq hkangmó é ahtoq má le, lhoq kô jat, lhoq pyíng byi sháng gaq. ¹³ Nga-nhúng é Yhumsîng Yesuq gi, Yhâng é chyoiyúng bang banshoq eq rahá lé é hkûn, nga-nhúng é Îwa Garai Gasâng é hí má, nungmoq gi, mara hûn jowò a joq é eq chyoiyúng é bang dut râ matú, nungmoq é myit nhikhlum má, haú Yhumsîng mai wum-o lhoq kíng byi nyi sháng gaq. Yhâng é chyoiyúng bang gâ é gi, byù lé, a nghut jáng, maumang lagyô pé lé, taí záng lhê.

4

Garai Gasang Ô Nau É Dông Asak Dui Râ Hkyô

¹ Xoq luî taí nau é gi, gumang wuî ê, ngamoq gi, ahkuî nungmoq cháng nyi é eq rajung za, nungmoq hkâ dông nyi yap luî, Garai Gasang lé gabú nhâng râ hkyô nungmoq lé mhòqshit byi bê nghut lhê. Ahkuî le, ngamoq gi, shí hkyô lé nungmoq hau htoq je wó châng jat râ matú, Yhumsîng Yesuq má nungmoq lé dúng tôngbán luî, myit wum byi kat lhê. ² Hkâsu mù gâ le, nungmoq gi, haú Yhumsîng Yesuq é ahko ahkáng dông, ngamoq mai, nungmoq lé mhòqshit to byi é hkyô pé lé, sê akô nghut ri.

³ Garai Gasang ô nau é hkyô gi, haú nungmoq sân-yúng é hui râ matú le, ashop é dông gungsho zùm yap é hkyô lé koi pyám râ matú le; ⁴ nungmoq yuq hkangmó gi, haú Garai Gasang lé a sê é, a lumjîng bang kut é su, gungsho yut yut ô nau é hkyô a châng e za, ⁵ haú chyoiyúng é eq hkungga gíng é sù wó dut shoq, yhumsing gùng lé wó hkang é hkyô mhòq yû râ matú le; ⁶ shí hkyô eq séng luî, ó yuq le,

yhumsing é gumang lé, a ge shut, a ge lhungzo râ matú le nghut lhê. Ngamoq, nungmoq lé taí kyo mù, lhoq pun lhoq kyíng gù nghut bê eq rajung za, haú Yhumsing gi, haú hkyô shut é banshoq lé, dam byi râ nghut lhê. ⁷ Hkâsu mù gâ le, Garai Gasang gi, nga-nhung lé a sân-yúng é bang dut râ matú wut yu é a nghut, chyoiyúng é dông asak dui nyi râ matú sheq wut yu é ru nghut lhê. ⁸ Haú mù luí, mhoqshit hkyô shí lé he-ngik pyâm é sù gi, byù lé he-ngik é a nghut, haú nungmoq lé, Yhâng é Chyoiyúng Woi-nyí byí tô é sù, Garai Gasang lé he-ngik pyâm é sheq ru nghut lhê.

⁹ Rayuq eq rayuq chyitdap lhum râ matú, nungmoq yhang, Garai Gasang eq mhoqshit é hui bekô nghut é yan-mai, gumang yhangchang chyitdap lhúm é hkyô eq séng luí, ngamoq gi, nungmoq chyáng kâ kat byi a ra lo nghut ri. ¹⁰ Haú eq rajung za, nungmoq gi, Makedoni mau gón mâ é gumang wui banshoq lé chyitdap nyi akô nghut ri. Nghut kôlhang, gumang wui é, haú su je myo kut râ matú nungmoq lé ngamoq wum byí lhê.

¹¹⁻¹² Nungmoq é nyí wui lhê é asak dui hkyô má, gotú byu pê eq hkunggâ é wó yú luí, ó yuq lé le, lumhkaú a ra wó dut sháng gaq, hí hkûn nungmoq lé ngamoq taí kyô tô é eq rajung za, num num byù zè râ hkyô lé le, yhumsing eq a séng é hkyô a kut wún râ lé le, yhumsing loq eq zui saí mù nyi râ lé le, nungmoq é myit myoqbyù jowò kut yú keq.

Haú Yhumsing Gyó Lé Râ Hkyô

¹³ Gumang wui é, myit myoqbyù hkyô a wó é byù góbang su, nungmoq, iyon ningtsáng a dut kó sháng gaq, haú yhup ngón byuq é bang eq séng luí, nungmoq a sé râ lé, ngamoq a ô nau é nghut lhê. Yhup ngón byuq é bang gâ é gi, lumjíng luí shí ló byuq é bang lé gâ é nghut lhê. ¹⁴ Hkâsu mù gâ le, Yesuq shí luí, dum dui toq bê hkyô lé nga-nhung lumjíng é yanmai, Garai Gasang gi, Yesuq má yhup ngón byuq é bang lé, Yesuq eq rahá shuí lé râ

nghut lhê nghû, nga-nhung lumjíng é nghut lhê. ¹⁵ Haú Yhumsing taí é dang eq rajung za, nungmoq lé ngamoq taí kyo kôlé, haú Yhumsing dum lé é hkûn, asak dui nyi é eq myit gyo tô é bang nga-nhung gi, yhup ngón byuq bê bang htoq ratsuí le wó hí râ a nghut. ¹⁶ Hkâsu mù gâ le, haú Yhumsing yhang gi, htê mó hkunmó eq le, maumang lagyo mó é hte eq le, Garai Gasang é tutmó mut hte eq le, mauhkûng mai gyó lé lô luí, haú Hkrisduq má shí ló bê bang hí dui toq râ nghut lhê. ¹⁷ Hau htâng, asak dui nyi é eq myit gyo tô é bang nga-nhung gi, yhangmoq eq rahá mhut htoq má shuí toq yu é hui luí, maulat má haú Yhumsing eq hui râ nghut lhê. Haú hkûn, nga-nhung gi, haú Yhumsing eq ahtum abyuq nyi nyi berâ nghut lhê. ¹⁸ Haú mù luí, nungmoq gi, dang shí pé mai rayuq eq rayuq myit wum byí lhúm nyi keq.

5

¹ Nghut kôlhang, gumang wui é, ahkyíng buinyi eq séng luí, nungmoq lé ngamoq kâ hún byi a ra lo nghut ri. ² Hkâsu mù gâ le, haú Yhumsing é buinyi gi, myín lé hkau sù wang é su jé lé râ nghut é hkyô lé, nungmoq rago za sê akô nghut ri. Yhumsing é buinyi gi, Yesuq dum jé lé râ buinyi lé taí nau é nghut lhê. ³ Byu pé gi, 'Ngingón yuqyo ri.' ga taí nyi bùm kô é u lé, gùng laí é myiwe rayuq zohkû-nò no lo é su, htên byoq hkyô gi, byodàn tung yhangmoq chyáng jé luí, hká dông lé yhangmoq wó hpang lut kó râ a nghut.

⁴ Nghut kôlhang, gumang wui é, nungmoq gi, mauchut hkaú má nyi é bang a nghut é yanmai, buinyi haú gi, hkau sù lé é su, nungmoq é matú byodàn tung dut râ a nghut. ⁵ Nungmoq lhunghâng bang gi, maubó é yhangzô pé eq nyí é yhangzô pé nghut lhê. Nga-nhung gi, myín eq mauchut hkaú eq séng é bang a nghut. ⁶ Haú mù luí, nga-nhung gi, byù góbang su a yhup nyi e za, machyâ

luî, gyíng gyíng kut nyî sháng. ⁷ Hkâsu mù gâ le, yhup é bang gi, myín lé yhup akô; î shuq wut é bang le, myín lé shuq wut akô. ⁸ Nghut kôlhang, nga-nhúng gi, nyí eq sêng lhê nghut é yanmai, gyíng gyíng kut nyî luî, lumjíng myit eq chyitdap myit lé gi, wànggò-long lé su gò to, hkyi yù hui râ lé myit myoqbyù tô é hkyô lé gi, shamtoq-muq lé su tsung to, kut sháng. ⁹ Hkâsu mù gâ le, Garai Gasang gi, Yhâng nhikmo-yô é hkyô lé hkâm zo râ matú, nga-nhúng lé hkyin tô é a nghut e za, nga-nhúng é Yhumsíng Yesuq Hkrisduq mai, hkyi yù hkyô lé nga-nhúng wó yú râ matú hkyin to bê nghut lhê. ¹⁰ Yesuq gi, nga-nhúng yhup bûn nyi kôlhang, yhup ngón to kôlhang, Yhang eq rahá wó nyi nyi sháng gaq ga, nga-nhúng é matú shí hkám byi bê nghut ri. ¹¹ Haû mù luî, nungmoq gi, ahkuî, nungmoq kut nyi é eq rajung za, rayuq eq rayuq myit wum byi lhum mù, htuqluq htuqbang kut lhûm nyi keq.

Ló Htâng Lhê É Mhoqshit Hkyô

¹² Gumang wuì ê, nungmoq mâ é muzó shikut luî, haû Yhumsíng má nungmoq lé up nyi é eq lhoq pun lhoq kyíng nyi é bang lé, nungmoq hkungga râ matú le; ¹³ yhangmoq zui saí é muzó jizó é yanmai, yhangmoq lé chyitdap myit dông gyai yhang hkungga râ matú le, nungmoq lé ngamoq sang kat lhê. Nungmoq le, rayuq eq rayuq nguínón lhûm nyi keq. ¹⁴ Gumang wuì ê, nungmoq lé ngamoq wum byi kat nau é gi, lagôn é bang lé lhoq pun lhoq kying keq; nhiknge é bang lé myit wum byi keq; wum nyhôm é bang lé htuqluq htuqbang kut keq; yuq hkanmó lé, i-myit hîng byi nyi keq; ¹⁵ ó yuq lé nghut kôlhang, a ge é hkyo é yanmai, a ge é dông a taú kut râ lé lhoq pun lhoq kyíng nyi keq; nungmoq rayuq eq rayuq le, góbang banshoq eq le, shikut luî, hkâ-nhám le, ge é hkyô kut byi lhum nyi keq.

¹⁶ Hkâ-nhám le, ru gabú nyi keq; ¹⁷ abyit alan kyûdûng nyi keq; ¹⁸ hkyô

hkat hkanmó má jeju hkyá-ôn nyi keq, hkâsu mù gâ le, haû pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

¹⁹ Haû Woi-nyí lé hkâlhoq jôm pyám kó; ²⁰ myiqhtoi htoí é lé, haí su a ngàm hkâkut kó. ²¹ Jung hkanmó lé, chyam wú luî, ge é hkyô lé zui zing nyi mù, ²² agè ashop é hkyô hkanmó lé, koi pyám keq.

²³ Nguínón hkyo é apûn awang nghut é Garai Gasang yhang, nungmoq lé, lhunglhang lhoq sân-yúng pyám byi sháng gaq; nga-nhúng é Yhumsíng Yesuq Hkrisduq dum lé é hkûn, nungmoq é woi-nyí, myit nhikhum, gungdu gi, mara hûn râ hkyô a bò sháng gaq. ²⁴ Nungmoq lé ji yu é Sû gi, lhumzui é Sû nghut lhê mù, Yhang, shí hkyô lé kut râ nghut lhê.

²⁵ Gumang wuì ê, ngamoq é matú kyû bo dung byi kó laq. ²⁶ Gumang wuì banshoq bang lé, chyoiyúng é chyitpuq puq é dông bo shí-kyám byi kó laq. ²⁷ Gumang wuì banshoq bang lé, hun kat é laiká shí nghap kyo râ matú, haû Yhumsíng é myíng mai, ngò, nungmoq lé pyíng kat lhê.

²⁸ Nga-nhúng é Yhumsíng Yesuq Hkrisduq é jeju gi, nungmoq chyáng ru joq nyi sháng gaq ô!

HTESALONI Pê Chyáng Htang Dàm Hun Kat é Laiká (2 Thessalonians)

¹ Ngò Poluq eq Sila, Timohti pé gi, nga-nhông é Íwa Garai Gasang eq Yhumsing Yesuq Hkrisduq má nghut nyi bê bang, haû Htesaloni wà mó byu pé é noqkuq hpúng lé dang kyô kat lhê.

² Haû Íwa Garai Gasang eq Yhumsing Yesuq Hkrisduq chyáng má é jeju eq nguingón hkyô gi, nungmoq chyáng ru joq nyi sháng gaq ô!

Jeju Hkya-on É Eq Kyûdung É Hkyô

³ Gumang wui ê, ngamoq gi, hkâ-nhâm le, nungmoq é matú Garai Gasang lé jeju hkya-on râ dut ri; haû gi, gíng lhê; hkâsu mù gâ le, nungmoq é lumjínng myit gi, je je kô jat lo nyi luí, nungmoq yuq hkangmó é chyitdap myit le, rayuq eq rayuq é ahtoq má je myô jat lo nyi é yanmai nghut lhê. ⁴ Haû mù luí, ngamoq gi, nungmoq zing-ri huí é hkyô pé eq wuîhke jamjau huí é hkyô pé banshoq lé, nungmoq wó jân nyi kô é yanmai, nungmoq é hkam jan hkyô eq lumjínng hkyô lé, Garai Gasang é noqkuq hpúng pé é hí má gumrong nyi lhê.

⁵ Shí hkyô banshoq gi, haû Garai Gasang dingmán é dông jéyáng é hkyô lé saksé tân shit é nghut lhê; haû mù luí, nungmoq gi, Garai Gasang é mingdán é matú wuîhke jamjau hui zo bekô nghut é yanmai, mingdán haû eq gingdán é bang gâ é hui kó râ nghut lhê; ⁶ Garai Gasang gi, tengmán Sû nghut lhê; haû mù, nungmoq lé jamjau byi é bang lé, Yhang mai jamjau byi râ eq, ⁷ jamjau huí nyi é bang nungmoq lé le, ngamoq lé le lhoqlhut byi râ nghut lhê. Shí hkyô gi, haû Garai Gasang lé a sê é bang eq nga-nhông é Yhumsing Yesuq eq sêng é gabú danglù lé a gyo a châng é bang lé, jéyáng râ matú, ⁸ haû Yhumsing

Yesuq, wum-o a-tsam byíng é Yhâng é maumang lagyô pé eq rahá, myishâm eq mauhkông mai htoq shit é hkôn, dut râ nghut lhê. ⁹ Yesuq jé lé lô mù, Yhâng é chyoiyúng bang má hpungwup shingkang wó yu é eq lumjínng bang banshoq mai mauhong é huí é buinyi má, yhangmoq gi, htên byoq hkyô lé ahtum abyuq jéyáng é hui zo kó râ nghut lhê. ¹⁰ Hau htoq agó, haû Yhumsing é hí mai le, Yhâng é a-tsam kô làm é mai le, lhoq kâng pyâm é hui kó râ nghut lhê. Ngamoq é saksé dang lé nungmoq lumjínng bekô nghut é yanmai, haû lumjínng bang má nungmoq le lòm bekô nghut lhê.

¹¹ Haû mù luí, nga-nhông é Garai Gasang gi, nungmoq lé, Yhang ji yu é hkyô eq gingdán ri ga râ le, haû Yhang é wum-o a-tsam mai, nungmoq myit tô é ge é hkyô hkangmó eq nungmoq é lumjínng myit eq sêng é muzó lhumjup lé, lhoq dik byi sháng gaq nghu le, nungmoq é matú, hkâ-nhâm le, ngamoq kyûdung byi nyi lhê. ¹² Ngamoq haû su dung byi nyi é hkyô gi, nga-nhông é Garai Gasang eq Yhumsing Yesuq Hkrisduq é jeju yanmai, haû nga-nhông é Yhumsing Yesuq é myíng gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó râ matú nghut lhê.

2

A Tara É Sû

¹ Gumang wui ê, haû nga-nhông é Yhumsing Yesuq Hkrisduq dum lé râ hkyô, Yhang eq nga-nhông rahá zup nyi to râ hkyô eq séng luí, nungmoq lé ngamoq pying kat nau é gi, ² haû Yhumsing é buinyi gi, jé to gù nghut bê gâ é myiqhtoi dang, luhkyang, laiká pé rajung jung, ngamoq chyáng mâ é nghut lhê ga nungmoq chyáng jé é nghut jáng, nungmoq é myit lui za hkâduí kó, hkâgyuq dàn kó. ³ Hkâsu mù gâ le, haû htên byoq é yhangzo nghut é a tarâ Sû htoq shit luí, haû gumlau toq é hkyô hí a htoq htoq gi, buinyi haû jé râ a nghut, haû mù

luí, nungmoq lé, ó yuq èq, hká dông mai mhaú kôlhang hkâjîng kó. ⁴ Haú yuq gi, Garai ga noqkuq huí é zè lhungháng lé htuq htîng luí, haú pé banshoq é htoq má yhânggùng yhang lhoq gyaú yû râ nghut lhê; haú mù luí, Garai Gasâng é noqkuq yhûm má zung to luí, yhânggùng yhang Garai Gasang nghut lhê ga taí râ nghut lhê.

⁵ Ngò gi, nungmoq eq rahá nyi tô é hkûn, shí hkyô pé lé lhaq taí kyo kyo kut é hkyô lé, nungmoq a bun lo kó lú? ⁶ Haú yuq gi, ahkyíng yam-yoq jé jáng sheq htoq shit sháng gaq ga, ahkuí, yhang lé hai èq hkûm zing tô é hkyô lé, nungmoq sê lhê. ⁷ Haú a tara é hkyô é haq dâ é a-tsam gi, mù zui nyi gù nghut bê; nghut kôlhang, haú lé hkûm zing nyi sù gi, hui htot pyám huí é hkûn jé shoq, haú lé hkûm zing nyi shirâ nghut lhê. ⁸ Haú hui htot pyám huí é hkûn, a tarâ Sû htoq shit râ nghut lhê; haú Yhumsîng Yesuq kúm gi, Yhâng nhut mâ é soq èq yhang lé sat pyám râ eq, Yhang gyó lo u lhê é hpungwup mó èq, yhang lé lhoq htên pyám râ nghut lhê. ⁹ Haú a tarâ Sû lé lo é gi, Tsadán a-tsam dông lak-lá kumlhá pé, kumlhá pé, mauhpo muzó pé ajung jung kut mhaú é eq, ¹⁰ htên byoq huí nyi é bang lé mhaú zo râ agè ashop é hkyô jung hkan gmó lé tûn shit râ nghut lhê. Yhangmoq htên byoq é gi, haú tengmán hkyô lé chyitdap luí hkyi yù hui râ nghut é hkyô lé he-ngik pyám kô é yanmai nghut ri. ¹¹ Haú é yanmai, Garai Gasang gi, haú tengmán hkyô lé a lumjîng e za agè ashop hkyô má ô nau é lhunghâng bang mara byi é hui kó sháng gaq ga, ¹² mhaú é dang lé jîng kó râ matú, a-tsam mó bo é lum shut râ hkyô lé, yhangmoq chyáng nhâng byi bê nghut ri.

Mhoqshit é hkyô má gîng nyi râ hkyô

¹³ Nghut kôlhang, haú Yhumsîng chyitdap é gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri. Hkâsu mù gâ le, haú Woi-nyí èq

lhoq sân-yúng nyi é muzó dông le, tengmán hkyô lé lumjîng é dông le, hkyi yù hui râ matú, Garai Gasang gi, nungmoq lé, sân-hi mai hkyin yù bê nghut ri. ¹⁴ Yhang gi, nga-nhûng é Yhumsîng Yesuq Hkrisduq é hpungwup shingkang má, nungmoq wó bo lòm shoq ga, ngamoq é gabú danglù dông nungmoq lé shí hkyô má ji yù bê nghut lhê. ¹⁵ Haú mù luí, gumang wui ê, nhutdang dông nghut nghut, laiká dông nghut nghut, nungmoq lé ngamoq lhai byi é mhoqshit hkyô lé zui gîng nyi luí, gîng gîng yap nyi keq.

¹⁶ Yhâng é jeju yanmai, nga-nhûng lé, ahtum abyuq é myit wum byi hkyô eq ge é myit myoqbyù hkyô lé byi é, nga-nhûng lé chyitdap é, nga-nhûng é Íwa Garai Gasang eq nga-nhûng é Yhumsîng Yesuq Hkrisduq gi, ¹⁷ nungmoq é i-myt má wum byi luí, ge é muzó eq ge é nhutdang lhumjup má, nungmoq lé wum-o lhoq kîng byi sháng gaq ô!

3

Kyû Dung Byi Râ Matú Lung Kat É Hkyô

¹ Gumang wui ê, je htâng má pying kat nau é hkyô gi, nungmoq chyáng dut wú bê eq rajung za, haú Yhumsîng é mungdang gi, hân hân byo myín ló mù, lhoq gyaú é hui sháng gaq, ngamoq é matú kyû bo dung byi kó laq. ² Yuq hkan gmó gi, lumjîng myit bo é a nghut é yanmai, haú achayut agè ashop é byu pé chyáng mai ngamoq wó lut râ matú le, kyû bo dung byi kó laq. ³ Nghut kôlhang, haú Yhumsîng gi, lhumzui é sù nghut é yanmai, Yhang nungmoq lé wum-o lhoq kîng byi mù, haú agè ashop su chyáng mai nungmoq lé hung yù râ nghut lhê. ⁴ Nungmoq gi, ngamoq pying tô é dang pé lé kut nyi mù, xoq luí le kut nyi râ nghut lhê nghû, haú Yhumsîng má ngamoq hkyak myit lum tô lhê. ⁵ Haú Yhumsîng gi, nungmoq lé Garai Gasâng é chyitdap hkyô eq Hkrisduq é hkam jân é hkyô má, shuí wàng sháng gaq ô!

Mû Zui Shikut Râ É Hkyô

⁶ Gumang wui ê, ngamoq gi, ngamoq chyáng mai nungmoq hap yù bê ngamoq mhoqshit é hkyô dông a nyi yap é eq lagôn é gumang ó yuq eq le, we we nyi keq nghû, haû Yhumsîng Yesuq Hkrisduq é myìng mai nungmoq lé hkunmó hkyô kat lhê. ⁷ Hkâsu mù gâ le, ngamoq kut é alik lé hká dông cháng râ dut é gi, nungmoq yhang sê lhê. Ngamoq gi, nungmoq eq rahá nyi tô é hkûn, lagôn é hkyô a bo wú é htoq agó, ⁸ ó yuq é zoshuq lé le, ngùn a byi é a zo wú é nghut lhê. Nungmoq má ó yuq lé le wólai a byi sháng gaq nghû, ngamoq gi, muzó shikut hkyô eq wuîhke hkyô má, nyi lé, myín lé, zui saí é nghut lhê. ⁹ Ngamoq gi, nungmoq lé garúm nhâng râ ahkáng a wó é a nghut, yhumsîng gùng lé nungmoq cháng râ matú alik dut sháng gaq nghû sheq, haû su kut é ru nghut lhê. ¹⁰ Hkâsu mù gâ le, ngamoq, nungmoq eq rahá nyi é hkûn, "Mû a kâm zui sù gi, a zo sháng gaq." nghû, nungmoq lé ngamoq mai sang to bê nghut lhê.

¹¹ Hkâsu mù gâ le, nungmoq chyáng mâ é byù ra-am lagon luî, haî mù le a zuí e za, mù châng lhoq gyô byi wún akô gâ é hkyô lé, ngamoq wó gyô é yanmai nghut lhê. ¹² Ngamoq gi, haû su kut é bang lé, zim za nyi mù zui saí luî, yhumsîng é zoshuq ho nyi kó sháng gaq nghû, haû Yhumsîng Yesuq Hkrisduq é myìng lé lang luî, hkunmó hkyô kat mù, wum byi kat lhê. ¹³ Gumang wui ê, nungmoq kúm gi, ge é muzó kut é hkyô má, hkâ-nhám le, hkâ-ngú byuq bùm kó.

¹⁴ Byù rayuq yuq gi, laiká shî má ngamoq mhoqshit é hkyô lé, a châng é nghut jáng, haú yuq lé rago chôm matsîng yù mù, yhang hoq bun sháng gaq, yhang eq hkâzûm yap kó. ¹⁵ Nghut kôhang, yhang lé gyè rayuq dông a sôn e za, gumang rayuq dông lhoq pun lhoq kyíng nyi keq.

Ló Htâng Lhê É Shi-kyám Dang

¹⁶ Haû nuingón hkyo é Yhumsîng yhang gi, ahkyíng hkangmó eq hkyô

hkat hkangmó má, nungmoq lé nuingón hkyô byi nyi sháng gaq. Haû Yhumsîng gi, nungmoq banshoq bang eq ru nyi nyi sháng gaq.

¹⁷ Ngò, Poluq gi, ngá é loq mai yhang shi-kyám dang shî lé kê kat lhê; shî gi, ngò kê é laiká banshoq má kumlhá nghut lhê. Ngò kê é gi, shí dông chyat nghut lhê.

¹⁸ Nga-nhûng é Yhumsîng Yesuq Hkrisduq é jeju gi, nungmoq banshoq bang chyáng ru joq nyi sháng gaq ô!

TIMOHTI Chyáng Hî Dàm Hun Kat é Laiká (1 Timothy)

¹ Nga-nhông é hkyi yù Sû Garai Gasang eq nga-nhông é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Poluq gi, ² haù lumjínng hkyô má ngá zo sîng nghut sù, Timohti lé dang kyô kat lhê; haù Íwa Garai Gasang eq nga-nhông é Yhumsîng Hkrisduq Yesuq chyáng mâ é, jeju eq shogyo nhikmyin hkyô, nguingón hkyô gi, náng chyáng ru joq nyî sháng gaq ô.

Sará Pyoq Pé Lé Sidiq Râ Hkyô

³ Ngò, Makedoni mau má jé wang ló é hkûn, pying to hkô é eq rajung za, Ehpesu myuq má nyi tó shi aq; haù hkûn sheq, nàng gi, shut shai é mhoqshit hkyô lé mhoqshit é bang a mhoq xoq lo râ matú le, ⁴ myit htoq mhô-myi dang eq a dat htûm é byù xik labaù má yhangmoq a ap nóng râ matú le, haù bang lé hkunmó wó hkyó râ nghut lhê. Haù hkyô pé gi, lumjínng myit mai kut htoq é Garai Gasang é muzó lé lhoq htoq râ malaî, mabyoq jishûm za sheq lhoq htoq nyi é nghut lhê. ⁵ Haù hkunmó hkyó luî myit myoqbyu tô é hkyô gi, chyitdap myit yhang nghut ri; chyitdap myit haù gi, sansêng é i-myit, mara a bò bûn é myit eq lumjínng myit akying mai lo é nghut lhê. ⁶ Byù ra-am gi, haù hkyô pé mai htoq ló kôluî, dangsôm taî é hkyô shut lhing ló byuq bekô nghut ri. ⁷ Haù bang gi, jep é tarâ sará pé dut naù kôlhang, yhangmoq haî taî nyi é hkyô lé le, hkyak, haî lé mhoqshit é hkyô lé le, a sé kó nghut ri.

⁸ Rayuq yuq, jep é tarâ lé rago chung é nghut jáng, jep é tarâ gi, ge é hkyô nghut é lé, nga-nhông sê lhê. ⁹ Haù jep é tarâ gi, dingmán bâng é matú tô tô é a nghut e za, tarâ lu laî é

bang eq gumlau toq bâng é matú, tarâ a hkunggâ é bang eq mara kut bâng é matú, a chyoiyúng é bang eq lumjínng hkyô a cháng bâng é matú, yhangmoq é yhângwa lé nghut nghut, yhângnu lé nghut nghut, sat pyám bâng é matú, byù sat bâng é matú, ¹⁰ ashop é dông gungsho zùm yap é bang eq yuqgè yhangchang nyi zo lhum bâng é matú, jùn dông byù ung zo bang, mhaù é bang eq dakam mhaù bâng é matú, tengmán mhoqshit hkyô eq shai lhûm é lhunglhang bâng é matú sheq, jep é tarâ tô tô é nghut é lé, nga-nhông sê lhê. ¹¹ Tengmán mhoqshit hkyô haù gi, hkungsô wó é Garai Gasang eq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

Poluq Chyáng Yhumsing É Jeju Joq Nyi É Hkyô

¹² Ngò gi, ngo lé wum-o byi é, nga-nhông é Yhumsîng Hkrisduq Yesuq lé jeju hkya-ôn lhê; hkâsu mù gâ le, Yhang gi, ngo lé lhumzui sù rayuq dông sôn yù luî, Yhâng é muzó jizó má hkyin kat yu é yanmai nghut lhê. ¹³ Hí hkûn, ngò gi, Garai Gasang lé taî hpoi sù, zing-ri sù eq byù rhoî sù nghut wú kôlhang, a sé shi mù lumjínng myit a bo e za kut é yanmai, shogyo nhikmyin yu é hkyô lé ngò wó yu é nghut lhê. ¹⁴ Nga-nhông é Yhumsîng é jeju lé le, Hkrisduq Yesuq eq sêng é lumjínng myit eq chyitdap myit lé le, ngá chyáng agùn agó hut hkyô kat byi bê nghut ri.

¹⁵ Yubak dap bang lé hkyi yù râ matú, Hkrisduq Yesuq gi, mingkan má jé lé bê gâ é dang gi, lumjínng é mungdang nghut luî, gè gè yhang lhom yù gíng é dang nghut lhê. Haù yubak dap bang má, ngò gi, yubak je ko sù nghut é nghut lhê. ¹⁶ Nghut kôlhang, Hkrisduq Yesuq gi, Yhang lé lumjínng luî ahtum abyuq é asak lé wó yù râ bâng é alik dut râ matú, yubak dap bang má yubak je ko sù nghut é, ngá é ahtoq má, Yhâng é hkam jan hkyô lhunglhang wó tûn shit sháng gaq ga, Garai Gasang gi, ngo lé shogyo

nhikmyîn yu ri. ¹⁷ Haû mù, haû aróng eq hpungwup shingkang gi, ahtum abyuq é, a dat htên byoq é, myoq èq a byu-myang é Hkohlâm nghut sù, rayuq zâ é Garai Gasâng chyáng pyat dedu ahtum abyuq ru joq nyî sháng gaq ô! Amen.

¹⁸ Ngá zo Timohti ê, nàng eq séng luí myiqhtoi dang joq wú é eq rajung za, ngò gi, nang lé haû dông mhoqshit kat lhê; haû mù, nàng gi, haû pé lé chung nyî luí, ge é majan zan mù, ¹⁹ lumjínq myit eq mara a bò bûn é myit bo nyî sháng gaq. Byù ra-am gi, haû hkyô pé lé he-ngik pyám kô é nghut luí, yhangmoq é lumjínq myit gi, wuî-sanghpo htên byoq ló é su htên byoq byuq bekô nghut ri. ²⁰ Haû bang má, Húmenu eq Alesander le bò kômù, Garai Gasang lé taí hpoi é dang a taí râ matú mhoq yù kó sháng gaq nghû, ngò, yhangnhik lé Tsadán é loq má ap pyám bê nghut lhê.

2

Noqkuq Hkyô Eq Séng Luí Mhoqshit Byî É Hkyô

¹ Haû mù luí, ngò, hí pying kat nau é gi, tarâ hkunggá é eq hkungga gíng é hkyô banshoq má, nga-nhúng wó nguínqon yuqyo nyî sháng gaq, hkohlâm pé eq ahkáng ayá wó bang banshoq é matú le, ² yuq hkangmó é matú le, dúng tóngbán byi, kyûdung byi, dúng xoq byi, jeju hkya-on byi, kut aq nghû nau ri. ³ Haû gi, ge é hkyô nghut mù, nga-nhúng é hkyi yù Sû Garai Gasang ô nau é hkyô nghut ri. ⁴ Yhang gi, byù lhunglhâng bang hkyi yu é hui mù, tengmán é mungdang lé sê gyo râ lé, ô nau nyi ri. ⁵ Hkâsu mù gâ le, Garai Gasang gi, rayuq za nghut luí, Garai Gasang eq byu é gyoro má sô xoq byi sù le rayuq za nghut lhê; haû yuq gi, xângzo byù nghut é Hkrisduq Yesuq nghut ri. ⁶ Yhang gi, byù lhunglhâng bâng é matú shíhtaí gunglik hkungga dông Yhânggùng lé byî pyám bê nghut ri; haû gi, ahkyíng yam-yoq jé é hkûn,

saksé htoq shit bê nghut lhê. ⁷ Ngò gi, tûngbaù pé lé, tengmán é lumjínq hkyô mhoqshit râ matú, hkô kyo sù rayuq eq lagyo rayuq dông hkyin tô é hui sù nghut lhê. Ngò, haû su taí é gi, mhaû taí é a nghut, têng é hkyô lé za taí nyi é ru nghut lhê.

⁸ Yuqgè wuî gi, nhikjum yô é hkyô eq dang htíng htíng lhúm é hkyô a bo e za, jowò hkangmó má chyoiyúng é loq tú mù kyûdung râ lé, ngò ô nau ri.

⁹ Myiwe wuî gi, xâm nik nik é, hîng zè, palhé, hpaû jung mebû èq a mhôn chung e za, siri bo é mebu wut chûng mù, tap tap za, shuq shuq za kut luí, ¹⁰ Garai Gasang lé noqkuq é myiwe wuî eq gíng shoq, ge é muzó èq yhum-sing gùng lé mhôn nyi râ lé le, ngò ô nau ri.

¹¹ Myiwe gi, uphkang tô é dông châng nyi mù, zim za mhoq yù kó sháng gaq. ¹² Myiwe gi, yuqgè lé mhoqshit râ hkyô lé le, yuqgè lé uphkang râ hkyô lé le, ngò ahkáng a byi; myiwe gi, zim za kut nyi ra râ nghut lhê.

¹³ Hkâsu mù gâ le, Adam lé hí hpan to mù, Ewaq lé hpan é ru nghut lhê.

¹⁴ Hau htoq agó, Adam gi, mhaû é hui zo sù a nghut; haû myiwe sheq mhaû é hui zo luí, mara kut shut é ru nghut lhê. ¹⁵ Nghut kôlhâng, myiwe wuî gi, lumjínq myit, chyitdap myit eq chyoiyúng hkyô má, shuq shuq za kut mù, yhangmoq xoq châng nyi kô é nghut jáng, zoshâng hku é dông mai hkyi yu é hui kó râ nghut lhê.✧

3

Hpúng-up Eq Hpungtê Kut Râ Bâng É Hkyô

¹ Rayuq yuq, hpúng-up ayá lé ô nau nyi é nghut jáng, haû yuq gi, aróng wó é muzó lé ô nau nyi ri gâ é dang gi, lumgíng é dang nghut nyi ri. ² Haû mù luí, hpúng-up rayuq gi, mara hûn râ hkyô a bo é sù, myiwe rayuq za wó é sù, dat sidiq é sù, yhum-sing gùng lé wó hkang é sù, hkungga gíng é sù, byù bíng lé dat hkulum é sù, dat mhoqshit é sù, ³ îhpê é jùn a dut é sù,

✧ 2:15 Apûn 3:16

byoq lhum byoq cheq a kut e za nûm é sù, mabyoq jishûm a lhoq htoq é sù, ngunzè lé a chyitdap é sù, nghut râ lhê. ⁴ Yhang gi, yhâng é ikun lé rago dat uphkâng luí, yhang zô pé mai hkungga myit bo é èq yhâng dang lé gyo byí é sù le, nghut râ lhê. ⁵ Rayuq yuq, yhumsing é ikun lé lháng a dat uphkang é nghut le gi, Garai Gasâng é noqkuq hpúng lé gi, hkâsu kut wó wú gon râ lhu? ⁶ Chángzo dut é a myáng shi é sù gi, hpúng-up wó kut râ a nghut, kut é nghut jáng, yhang gi, nghutbûn lò luí, jéyáng é hkyô lé nat Tsadán hui zô é su hui zo abe. ⁷ Hpúng-up rayuq gi, tûngbaù pé hí má ge é myíng wó é sù le dut râ lhê; haù jáng, yhang gi, taí hpoí pyâm é lé le a hui, nat Tsadán é tuihkyó má le a myí, dut râ nghut lhê.

⁸ Haù eq rajung za, hpungtê pé gi, hkungga gíng é bang, shô-kó a xân é bang, íhpê é jùn a dut é bang, a tengmán é amyat lé a ho é bang, nghut râ lhê. ⁹ Yhangmoq gi, lumjíng hkyô má é nik é mauhpo tengmán hkyô pé lé, sansêng é i-myt èq châng nyí ra râ nghut lhê. ¹⁰ Yhangmoq gi, chyam é lé hí huí wú kó sháng gaq, hau htâng, yhangmoq lé mara hûn râ hkyô haí a bò lo jáng, hpungtê mù lé wùn kó sháng gaq.

¹¹ Haù eq rajung za, yhangmoq é yhumsing myhí pé le, myit no nhang é dang a taí e za, dat sidiq é eq hkyô hkangmó má lumgíng luí, hkungga gíng é myiwe wuì, nghut ra râ dut lhê.

¹² Hpungtê rayuq gi, myiwe rayuq za wó é sù, yhangzô pé eq yhâng ikun lé rago za dat wùn waq é sù, dut ra râ nghut lhê. ¹³ Hpungtê mù lé rago za wùn waq bê bang gi, yhumsing é matú aróng lé le, Hkrisduq Yesuq lé yhangmoq lumjíng hkyô má, gyuq kyum é hkyô a bo é myit mó lé le, hkyak wó yu akô nghut ri.

¹⁴ Ngò gi, hkâ-myháng a myáng má náng chyáng lé jé râ matú, myit myoqbyu to kôlhang, ahkyíng du myáng pyâm le, ¹⁵ Garai Gasâng é ikun hkaù má, byu pé hká dông nyí yap râ é hkyô

lé, nàng sé sháng gaq nghû, pying kat é dang shi pé lé ká byí kat lhê; ikun haù gi, rû dui nyi é Garai Gasâng é noqkuq hpúng nghut luí, tengmán hkyô é hkungmó-zíng eq apûn awang nghut ri. ¹⁶ Tarâ hkungga hkyô é zaù tô é hkyô gi, ko dik é nghut é lé, ó yuq le wó he-ngik pyâm é a nghut;

haù gi, Yhang, byù gungsho má htoq shit mù, haù Woi-nyí mai Yhang lé saksé hkám byi luí, maumang lagyô pé gi, Yhang lé myàng bê nghut ri;

byuhú ahú hú má Yhâng é hkyô lé hko kyo mù, Yhang lé mingkan byu pé lumjíng luí, hpung-wup shingkang eq Yhang lé mauhkûng shut shuí toq yû bê nghut ri.

4

Timohti Lé Mhoqshit É Hkyô

¹ Jihtûm buinyí pé má, byù ra-am gi, lumjíng hkyô mai htak htoq ló luí, mhaù zô é woi-nyí pé htâng cháng kó râ eq nat gang mai lo é mhoqshit hkyô pé lé gyo byi kó râ nghut lhê ga, haù Woi-nyí gi, san za taí ri. ² Haù sù é mhoqshit hkyô pé gi, gegùn labyoq kut é byù-mhaù pé chyáng mai lo é nghut lhê; haù bâng é myit nhiklhum gi, nyhê nhe tô é shamtoq èq nyhê man tô é su dut byuq bê nghut ri.

³ Haù bang gi, hâng lhûm é hkyô lé hkûm tang é hkyô lé le, haù lumjíng luí tengmán hkyô lé sê é bang mai jeju hkya-on mù hap yù ge é, Garai Gasang hpan to byí é zoshuq lé koi pyám nhang é le, kut akô nghut ri.

⁴ Garai Gasang hpan tô é lhungháng gi, ge é chyat nghut ri; Garai Gasâng é mungdang eq kyûdûng é dang dông haù pé lé lhoq sân-yúng nyi é nghut é yanmai, ⁵ jeju hkya-on luí hap yu é nghut le gi, haí jung lé lháng he-ngik pyám râ hkyô a bò nghut ri.

⁶ Haù gumang wuì lé, nàng haù hkyô pé lhoq pun lhoq kyíng é nghut le gi, nàng gi, haù nàng cháng bê ge é mhoqshit hkyô eq lumjíng hkyô má é tengmán hkyô má, kó myhâng sù

nàng nghut râ htoq agó, Hkrisduq Yesuq é ge é hpungmû wùn sù le dut râ nghut lhê. ⁷ Garai a bo é myit htoq mhô-myi dang eq hpô-myhí mâng pê é mhô-myi dangsôm lé koi pyám luí, tarâ hkunggâ é hkyô má yhumsing gùng lé lhoq kùng yù aq. ⁸ Hkâsu mù gâ le, gungsho lé lhoq kùng é hkyô gi, akyû shau za htoq é nghut lhê; nghut kôlhang, tarâ hkunggâ é hkyô kúm gi, jung hkangmó é matú akyû bo lhê nghut mù luí, shí ipyat má le, htang pyat má le, akyû bo nyi ri.

⁹ Haú gi, banshoq hap yù gíng é, lumgíng é mungdang nghut lhê. ¹⁰ Haú mù luí, xângzo byù banshoq bâng é hkyi yù Sù nghut é, je riyhang, lumjíng bâng é hkyi yù Sù nghut é, rû dui nyi é Garai Gasang má, nga-nhúng, myit myoqbyu to bê nghut é yanmai, nga-nhúng gi, gyai yhang shikut nyi lhê.

¹¹ Haú pé lé, hkunmó hkyó luí mhoqshit byi nyi aq. ¹² Náng é zorâm pyat lé, ó yuq èq le a wú tiq pyám sháng gaq, dang taí é má le, nyi yap é hkyô má le, chyitdap é hkyô má le, lumjíng hkyô má le, sansêng é hkyô má le, lumjíng bâng é matú alik kut shit nyi aq. ¹³ Náng chyáng ngò jé lé é buinyi jé shoq, nàng gi, Chyúmdang nghap kyô é má le, hko kyô é má le, mhoqshit é má le, ap nóng nyi aq. ¹⁴ Nàng gi, hpúng suwún wui náng é ahtoq má loq ke byi é hkûn, myiqhtoi dang đông nang lé Garai Gasang byi to bê nghut é, woi-nyi hkyô eq sêng é chyunghuq lé, haí su a ngàm hkâkut pyám.

¹⁵ Haú hkyô pé lé, myit zìng zuq luí zui saí nyi aq; nàng kô myhang lo é hkyô lé, yuq hkangmó byu-myàng kó sháng gaq, nàng gùng banshoq haú pé má ap nóng nyi aq. ¹⁶ Náng é asak dui hkyô má le, nàng mhoqshit é hkyô má le, rago sidiq nyi aq. Haú pé má ru gíng nyi aq, hkâsu mù gâ le, nàng haú su kut é nghut jáng, náng é asak lé le, náng chyáng mai gyô yu é bang lé le, nàng wó hkyi yù râ nghut lhê.

5

Suwún Wuì, Chuimó Pé, Jùn Pé Eq Séng Luí Hpaqchyí Byí É Hkyô

¹ Asak ko sù lé dang htân a tân e za, yhumsing é îwa lé su, yhang lé lhoq pun lhoq kying aq. Zorâm wui lé gi, gumang wui lé su, ² asak kô é myiwe wui lé gi, înu pé lé su zùm yap luí, zomyi wui lé gi, nhammó wui lé su sansêng é i-myit banshoq èq zùm yap nyi aq.

³ Gè gè yhang garúm râ dut é chuimó myhí pé lé, hkunggâ nyi keq. ⁴ Nghut kôlhang, chuimó myhí rayuq yuq gi, zoshâng nghut nghut, gashu nghut nghut, wó é nghut jáng, haú bang gi, yhumsing é ikun lé wú gon luí, înu îwa eq îchyí îwhoí pé lé jeju taú é đông, yhangmoq é lumjíng hkyô lé, zui saí é má lhoq mhán nhâng râ lé hí mhoq yû ra râ nghut lhê; hkâsu mù gâ le, haú gi, Garai Gasang ô nau é hkyô nghut ri. ⁵ Haú lùm râ ó yuq le a wó mù, gè gè yhang râ tô é chuimó myhí gi, Garai Gasang chyáng myit myoqbyu nyi luí, nyi, myín xoq xoq kyûdung mù, Garai Gasang garúm râ hkyô lé dúng nyi ri. ⁶ Nghut kôlhang, ngón hkyô za cháng luí asak dui é chuimó myhí gi, asak dui nyi kôlhang, shí gù nghut bê nghut ri. ⁷ Yhangmoq lé, ó yuq èq le mara a hûn kó sháng gaq, haú hkyô pé lé le mhoqshit byi nyi aq. ⁸ Rayuq yuq, yhâng é buinùm ji-myi wui lé a baú é htoq agó, je luí yhumsing é ikun byù lé a baú é nghut le gi, haú lumjíng hkyô lé hengik pyám bê nghut luí, a lumjíng su htoq má je ashop é sù dut bê nghut ri.

⁹ Hkyuq xê zàn byíng bê é chuimó myhí za a nghut jáng, chuimó jihpán má wó kat râ a nghut; hau htoq agó, yhang gi, yuqgè rayuq za wó wú é sù; ¹⁰ zoshâng wui lé hku baú é sù, bíng lé rago dat hkulum é sù, sân-yúng bê bang é hkyi lé chi byi é sù, wuîhke huí tô é bang lé garúm luí, ge é muzó junghkang jungmó má yhum-sing gùng yhang ap nóng nyi ri ga, yhang kut é ge é muzó má myíng hú é sù le, nghut râ lhê.

11 Asak tiq é chuimó myhî pé lé, jihpán haú má hkâkat. Hkâsu mù gâ le, gungsho ô nau é hkyo eq Hkrisduq chyáng yhangmoq ap nong tô é hkyô lé ung pyâm é hkûn, yhangmoq gi, myi lô naú kó râ nghut lhê. 12 Haú mù, yhangmoq gi, sâng-hi lé yhangmoq tô tô é danggidiq lé lhoq hpyoq pyám kô é yanmai, tarâ darâ é hui zo kó râ nghut lhê. 13 Hau htoq agó, yhangmoq gi, rayhûm htâng rayhûm châng wang wún kômù, lagôn mán byuq kó râ nghut lhê. Lagôn é bang za dut kó râ a nghut, lumù gansang é bang eq yhangmoq taí a ge é pé lé taí kômù, yhumsing eq a sêng é mù má châng wang nyo wún é bang le, dut kó râ nghut lhê. 14 Haú mù luí, gyè pé mai lumù gansang dang a wó taí pyám kó sháng gaq, asak tiq é chuimó myhî pé gi, myi lô mù, zoshâng hkû luí, yhangmoq é ikun lé gôn lajang rá matú, ngò, yhangmoq lé hpaqchyí byí kat lhê. 15 Hkâsu mù gâ le, ra-am gi, lhing taú ló kôluí, Tsadán é htâng châng nyi lugù nghut bekô nghut ri.

16 Lumjín é myiwe rayuq yuq gi, yhang é ikun má chuimó myhí wó é nghut le, haú yuq é matú noqkuq hpúng lé wólai a hun e za, yhang mai garúm yú ra rá nghut lhê; haú hkûn sheq, noqkuq hpúng gi, gè gè yhang rá tô é chuimó myhî pé lé wó garúm rá nghut lhê.

17 Haú noqkuq hpúng lé rago za shuí ú é hpúng suwún wuí gi, akyú í tú hkam yú gíng lhê; haú mungdang hko é hkyô eq mhoqshit é hkyô má shikut é suwún wuí gi, je riyhang hkam yú gíng lhê. 18 Hkâsu mù gâ le, "Guq nâng nyi é no lé, nhuttsung hkâ-tsûng to byi."* ga le, "Mû zui sù gi, yhang é zuihpau wó yú gíng lhê."* ga le, Chyúmdang má taí tô ri. 19 Hpúng suwún rayuq lé mara hun é hkyô lé, í yuq sum yuq mai saksé hkâm e za a nghut le gi, hkâlhóm yú. 20 Nghut kôlháng, lhoq pun lhoq kyíng é hkyô lé góbang wó yú kó sháng gaq, mara kut

shut é bang lé, shiwa byu pê hí má tân mhoqshit aq.

21 Pying kat é dang shi pé lé, gamhkui myit a bo e za châng nyi rá eq, myoqdong hkyín luí haí le a kut rá matú, Garai Gasang eq Hkrisduq Yesuq é hí má le, hkyin yú huí é maumang lagyô pê é hí má le, ngò, nang lé pying kat lhê.

22 Ó yuq é ahtoq má le loq ke* byi rá lé hkâhân; góbâng é mara hkaú má le hkâbo lóm. Yhumsing yhang yhumsing sâng-yúng shoq kut nyi aq.

23 Náng é wamdau ra luí, anum num no lò lò dut é yanmai, nang gi, wuí za shuq é hkyô lé nô pyám luí, tsibiyiq wing le ratsuí tsuí shuq byi aq.

24 Byú ra-âm é mara pé gi, de de dut é nghut mù luí, tarâ jéyáng é jang má hí ló jé ri; ra-âm é mara kúm gi, hau é htâng má châng byông htoq lo ri. 25 Haú eq rajung za, ge é muzó pé gi, de de nghut nyi luí, haú su de de a nghut é pé lé le, wó zaú to rá a nghut.

6

1 Jùn dut é wólai hkaú má nyi é lhunglhâng bang gi, yhangmoq é yhumsing wuí lé gyai yhang hkungga gíng lhê nghú, myit yú rá dut lhê; haú hkûn sheq, Garai Gasang é mying eq nga-nhûng é mhoqshit hkyô gi, lumù gansang é a hui rá nghut lhê.

2 Lumjín é yhumsing wuí é jùn gi, gumang wuí nghut é yanmai, yhangmoq lé a wú myuq é za, yhangmoq dojaú luí akyú myang hkâm zô é bang gi, lumjín bang eq chyitdap gíng é bang nghut é yanmai, yhangmoq lé je ge é dông dojaú rá lhê. Shí hkyô pé lé, nang gi, yhangmoq lé mhoq byí nyi é eq lhoq pun lhoq kying byí nyi aq.

Ngùn Lé Chyitdap É Hkyô

3 Rayuq yuq gi, shut é lumjín hkyô lé mhoqshit luí, nga-nhûng é Yhumsing Yesuq Hkrisduq é tengmán mhoqshit hkyô eq tarâ hkunggâ é mhoqshit hkyô lé a myit huí é nghut jáng, 4 haú yuq gi, nghutbún é sù eq

* 5:18 Tarâ Pun 25:4 * 5:18 Luk 10:7 * 5:22 Hau hkun lhê bang gi, hpúng suwún kut rá matú hkyin to bê bang lé, loq ke kyúdung byí é nghut lhê.

haí lé le a sê gyô é sù nghut ri. Yhang gi, htuq htîng lhûm é hkyô pé lé ô nau é, a ge é myit bò luí, dang eq séng mù mabyoq lhoq htoq ri; haú mai, manon é hkyô, byoq lhum byoq cheq é hkyô, lumù gansang é hkyô, agè ashop é dông myit ngam pyâm é hkyô eq,⁵ haú tengmán hkyô lé lhoq hpyuq pyám mù, tarâ hkungga hkyô gi, ngùn zé wó hkyô za nghut ri ga myit yu é, i-myit lhoq htên pyám bê bâng é gyoro má, byìn a huí é hkyô pé lé, lhoq htoq kat ri.

⁶ Nghut kôlhang, tarâ hkunggâ hkyô má nhik dik é hkyô bo é nghut le gi, amyat mó nghut nyi ri. ⁷ Hkâsu mù gâ le, nga-nhúng gi, mingkan htoq má haí jung le a yu wang lé, haú mai le haí wó yu htoq ló râ a nghut. ⁸ Haú mù luí, nga-nhúng gi, wutbu wutmè eq zoshuq wó é nghut jáng, hau èq nhik dik nyi sháng. ⁹ Wó nau sùt nau é byu pé gi, gunglaú hkyô eq tuihkyó má le, haú byoq yeq hkyô eq htên byoq hkyô má, byu pé lé myup shî nhang é, ngha é hkyô myo myo eq myit nò nhâng nau é hkyô má le, byit gyó wâng kó râ nghut lhê. ¹⁰ Hkâsu mù gâ le, ngùn lé chyitdap é hkyô gi, agè ashop hkyô ajung jûng é apûn awang nghut nyi ri. Byù ra-am gi, ngùn lé ô nau luí, haú lumjîng hkyô mai sô nghoq ló mù, yhumsing gùng lé yhumsîng, haú yón kuq hkyo èq htaú rot pyám bekô nghut ri.

Timohti Lé Pying Kat É Dang

¹¹ Nghut kôlhang, Garai Gasâng é byù nàng gi, haú pé banshoq lé koi pyám luí, dingmán hkyô, tarâ hkungga hkyô, lumjîng hkyô, chyitdap hkyô, hkam jan hkyô eq nú-nhâm é hkyô pé lé châng hkat nyi aq. ¹² Lumjîng hkyô eq sêng é ge é majan le zân nyi aq. Hap yù lumjîng bê ga, saksé myo myô pé é hí má, ge é dông nàng yín yu é hkûn, wut yu é hui luí wó é ahtum abyuq é asak lé, zuí zing nyi aq. ¹³ Haú lhunglhang lé asak byí é Garai Gasâng é hí má le, Pontu Pilat chyáng saksé hkâm nyi é hkûn, ge é dông yín yu é Hkrisduq

Yesuq é hí má le, ngò, nang lé pying kat lhê: ¹⁴ Yhâng é ahkyíng yam-yoq jé jáng, Garai Gasang htoq shit nhâng râ nghut é sù, nga-nhúng é Yhumsîng Yesuq Hkrisduq htoq shit é buinyi jé shoq, ¹⁵ nàng gi, agot a-u é hkyô eq mara hûn râ hkyô a bo e za, hkunmó shî lé châng nyi aq. Garai Gasang gi, hkungsô wó sù, Yhang za up sù, hkohkam pé é Hkohkâm, yhumsing pé é Yhumsîng, ¹⁶ Yhang za ahtum abyuq dui nyi sù, a ge chyáng htep e é maubó má dui nyi sù, ó yuq èq le a myang wú é, a wó myang é sù nghut nyi ri. Aróng eq hpungwup a-tsam gi, Yhâng chyáng ahtum abyuq ru joq nyi sháng gaq ô! Amen.

¹⁷ Shí ipyat má wó sùt é bang gi, a gumrông râ eq a gîng é sutzè má yhangmoq é myit myoqbyù hkyô a tô e za, nga-nhúng nguingón yuqyo nyi râ matú junghkang jungmó lé agùn agó byí é sù, Garai Gasâng chyáng za, yhangmoq myit myoqbyu nyi râ matú, hkunmó hkyó aq. ¹⁸ Ge é hkyô kut luí, ge é muzó má wó sùt nyi mù, a chum e za, gam chûng nau é myit bò râ matú, yhangmoq lé hkunmó hkyó aq. ¹⁹ Haú dông mai, yhangmoq gi, jé lô râ ipyat é matú gîng é apûn awang dông, yhangmoq é matú sutzè wó tsîng to kó râ nghut lhê; haú hkûn sheq, yhangmoq gi, asak kyîng nghut é asak haú le wó zuí zing to kó râ nghut lhê.

²⁰ Timohti ê, nang lé ap to bê hkyô lé, zúng nyi aq. Tarâ a hkunggâ é po-mîng ming bâng èq hpaqchyí nghut lhê ga myhîng shut é htuq htîng lhum lhum kut é hkyô lé, koi pyám aq. ²¹ Byù ra-am gi, haú lé hpaqchyí nghut lhê ga yín yù kôluí, haú lumjîng hkyô mai so nghoq htoq ló byuq bekô nghut ri.

Jeju gi, nungmoq chyáng ru joq nyi sháng gaq ô.

TIMOHTI Chyáng Htang Dàm Hun Kat é Laiká (2 Timothy)

¹ Hkrisduq Yesuq chyáng mâ é asak byi râ gâ é danggidiq eq rajung za, Garai Gasang ô nau é dông, Hkrisduq Yesuq é lagyo nghut sù, ngò, Poluq gi, ngò chyitdap é ngá zo Timohti lé, dang kyô kat lê.

² Haû Íwa Garai Gasang eq nga-nhông é Yhumsing Hkrisduq Yesuq chyáng mâ é jeju eq shogyo nhikmyin hkyô, nguingón hkyô gi, ru joq nyí sháng gaq ô!

Lumluq Râ Matú Myit Wum Byî É Hkyô

³ Ngò gi, ngá é kyûdung dang má, nyí, myín, abyit alan nang lé bûn nyi uchyang, sân-yúng é i-myit mai, ngá é íchyí íwâ pé dojaú é su, ngò dojaú nyi é Garai Gasang lé, jeju hkya-ôn nyi lê. ⁴ Ngò gi, ngò má gabú hkyô bying jup sháng gaq nghû, náng é ngaubyi lé myit bûn nyi mù, nang lé gyai yhang myàng nau nyi ri. ⁵ Ngò gi, nang é gyíng é lumjing myit lé lhoq pûn yù mù, náng whoí Lu-i eq náng nu U-ni nhik chyáng má hí bo é lumjing myit, ahkuí, náng chyáng le bo ri nghû, hkyak myit lum nyi lê. ⁶ Hau é yanmai, ngò loq ke byí é dông, náng má bo tô é Garai Gasang é chyunghuq lé, gyúng nhang nyi râ matú, nang lé ngò lhoq pûn kat lê. ⁷ Hkâsu mù gâ le, Garai Gasang gi, gyuq sê é myit nga-nhông lé a kat byí e za, a-tsam bo é myit, chyitdap sê é myit, yhumsing gùng lé dat hkan é myit sheq kat byí tô é ru nghut lê.

⁸ Haû mù luí, náng gi, nga-nhông é Yhumsing eq séng luí saksé hkâm é hkyô má le, Yhâng é yanmai htóng byû dut to sù ngá é hkyô má le, hoq myit a bo é za, Garai Gasang é wum-o mai, haû gabú danglu é matú, ngò eq rahá wuîhke jamjau chòm hui goq. ⁹ Garai Gasang gi, nga-nhông zui sai

é muzó dông a nghut e za, Yhânggùng yhang myit sôn tô é hkyô eq Yhâng é jeju yanmai za, nga-nhông lé, hkyi yù luí chyoiyúng é asak duí hkyô má ji yù bê nghut ri. Ahkyíng nghu é lhang a joq shi mai yhang, jeju haû gi, Hkrisduq Yesuq má nga-nhông lé byi to gù nghut bê. ¹⁰ Nghut kôhang, nga-nhông é hkyi yù Sù, Hkrisduq Yesuq pô htoq é dông, ahkuí, haû lé lhoq htoq shit bê nghut ri. Yhang gi, shî-nò hkyô lé lhoq htên pyám luí, haû gabú danglu dông mai, asak lé le, a dat htên byoq é hkyô lé le, lhoq htoq shit bê nghut ri. ¹¹ Ngò gi, gabú danglu é matú hko kyo sù, lagyo eq mhoqshit sù dông, hkyin tô é hui sù nghut lê. ¹² Hau é yanmai, ngò gi, wuîhke jamjau shî lé huí nyi é nghut lê. Nghut kôhang, ngò gi, ó yuq lé lumjing bê nghut é hkyô lé, sê é htoq agó, Yhang lé ngò ap tô é pé lé, haû buinyi jé shoq, Yhang wó zúng râ nghut lê nghû hkyak myit lum tô é yanmai, ngò a hoq.

¹³ Náng gi, ngá chyáng mai wó gyô yu é tengmán dang pé lé, Hkrisduq Yesuq má, lumjing myit eq chyitdap myit mai alik kut yu nyi aq. ¹⁴ Náng lé ap byí to bê, haû ge é mungdang lé, nga-nhông chyáng bo tô é Chyoiyúng Woi-nyí é wum-o mai zúng nyi aq.

¹⁵ Asia mau mâ é bang yuq hkanmó gi, ngo lé pyâm to kô é hkyô lé, náng sê lê; haû bang má, Hpugelu eq Heramoge nhik le bo akô nghut ri.

¹⁶ Haû Yhumsing gi, Onesihpurû é yhumbyù lé shogyo nhikmyin é hkyô tûn shit sháng gaq; hkâsu mù gâ le, yhang gi, ngo lé anum num myit lhoq ngón é htoq agó, ngò wut é shamtoqtuî é yanmai, a hoq e za, ¹⁷ yhang, Romaq myuq má jé nyi é hkûn, ngo lé myang hui shoq, ho shikut é sù nghut ri. ¹⁸ Haû Yhumsing gi, haû buinyi má, yhang lé haû Yhumsing é shogyo nhikmyin hkyô byi sháng gaq! Ehpesu myuq má, yhang ngo lé hkâm-yhó garúm bê nghut é gi, náng rago yhang sê lê.

2

¹ Haû mù, ngá zo ê, nàng gi, Hkrisduq Yesuq mâ é jeju hkaû má, wúm bo nyi aq. ² Nàng gi, saksé myo myô é hí má ngá chyáng mai wó gyô yù bê hkyô pé lé, góbang lé dat mhoshit é, wó lum é bang lé ap byi aq. ³ Hkrisduq Yesuq é ge é gyezo rayuq su, wuîhke hkyô lé chôm jan nyi sháng. ⁴ Gyezo rayuq dông gyè mù wùn waq nyi é sù, ó yuq nghut kôle, gotû muzó má a bo lom é za, yhang lé hkunmó hkyô nyi é gyezau lé, gabú nhâng nau é chyat nghut lhê. ⁵ Haû eq rajung za, shingjóng é sù rayuq le, shingjóng lhum poî wang é hkûn, tô tô é tarâ dông a châng e nghut le gi, ung é aróng chyunghuq lé wó yû râ a nghut. ⁶ Yo-mû zûi shikut é sù gi, kyôshi lé sâng-hi myang hkam yù râ sù nghut lhê. ⁷ Haû Yhumsîng gi, shí pé banshoq lé wó sê é nyan nang lé byi râ nghut é yanmai, ngò taî é hkyô pé lé myit wú aq;

⁸ Haû Dawiq é awut ashín nghut sù, Yesuq Hkrisduq gi, shi é mai dum dui toq bê hkyô lé myit bun aq; haû gi, ngá é gabú danglù nghut lhê. ⁹ Gabú danglù hau é yanmai, mara bò sù rayuq lé su, ngò gi, kyum hut é hui luí, hpuzô nyi é nghut lhê. Nghut kôlhang, Garai Gasâng é mungdang gi, kyum hut huí é a nghut. ¹⁰ Haû mù luí, ngò gi, Hkrisduq Yesuq chyáng mâ é hkyi yù hkyô eq ahtum abyuq é hpungwup shingkang lé wó yû kó sháng gaq nghû, haû hkyin yù hui bâng é matú, jung hkangmó lé hkam jân nyi lhê.

¹¹ A-ô mâ é dang gi, lungíng é dang nghut lhê:

Nga-nhúng gi, Yhang eq rahá shí bê
nghut jáng, Yhang eq rahá dui
râ nghut lhê.

¹² Nga-nhúng gi, hkam jân é nghut
jáng, Yhang eq rahá up râ
nghut lhê.

Nga-nhúng gi, Yhang lé he-ngik pyâm
é nghut jáng, Yhang le, nga-

nhúng lé he-ngik pyâm râ
nghut lhê.

¹³ Nga-nhúng gi, lhumzui myit a bò
kôlhang, Yhang gi, lhumzui nyi
râ nghut lhê. Hkâsu mù gâ le,
Yhang gi, yhânggùng yhang wó
he-ngik pyâm é a nghut.

Garai Gasâng Hí Má Myoqdong Wó É Mû Zui Sù

¹⁴ Nàng gi, yhangmoq lé, shí hkyô pé xoq luí lhoq pûn nyi aq. Dang pé eq séng luí, a byoq lhum nyi kó sháng gaq, Garai Gasâng hí má yhangmoq lé sidiq byi aq. Haû gi, akyû a bo é htoq agó, wó gyô é bang lé htên byoq nhang é hkyô za nghut lhê. ¹⁵ Nàng gi, haû tengmán é mungdang lé jo shoq chung jai é eq, hoq nó a râ é mù zui sù rayuq dông Garai Gasâng hí má myoqdong wó shoq, wó dut é myhó shikut aq. ¹⁶ Tarâ a hkunggâ é po-ming ming bang lé koi pyâm aq. Hkâsu mù gâ le, haû su kut é bang gi, tarâ a hkunggâ é hkyô má je riyhang wang nân lô byuq é bang dut kó râ nghut lhê. ¹⁷ Yhangmoq é mhoshit hkyô gi, mong ana su byo myín lô râ nghut lhê; haû bang má Humenu eq Hpilitu nhik le bò kôluí, ¹⁸ haû tengmán hkyô mai sô nghoq lô byuq akô. Yhangnhik gi, haû dum dui toq hkyô dut lai bê ga taí kômù, ra-âm é lumjîng hkyô lé lhoq htên pyâm byi akô nghut ri. ¹⁹ Nghut kôlhang, "Haû Yhumsîng gi, Yhang eq séng é bang lé sê lhê."* ga luí le, "Haû Yhumsîng é myîng lé yín yu é bang yuq hkangmó gi, agè ashop hkyô mai lhing tau ra kó râ nghut lhê." ga luí le, dizik haû htung tap tô é, Garai Gasâng é ging tîng é apûn awang gi, gîng nyi ri.

²⁰ Yhûm mó ralhum má gi, hîng auhkoq zè, ngùn auhkoq zè baú za joq é a nghut, sik auhkoq zè, tse auhkoq zè le joq lhê; ra-am gi, aróng hkyo é matú, ra-am gi, aróng hkyo é matú a nghut. ²¹ Haû mù luí, haû pé mai yhumsîng gùng lé lhoq sansêng pyâm é sù gi, chyoiyúng luí, haû Yhumsîng chung jai gîng é sù, ge

* 2:19 Gyung So 16:5

é muzó hkanmó kut râ hen tô é sú nghut é yanmai, aróng hkyo é matú chungzè dut râ nghut lhê.

²² Zoram é agè ashop é ô nau hkyô lé koi pyám mù, haù sân-yúng é myit mai, Yhumsing lé wut dúng é bang eq rahá, dingmán hkyô, lhumzui hkyô, chytidap hkyô, nguingón hkyô pé lé, châng hkat nyí aq. ²³ Go é eq ngok é dông dang jet jet lhùm é hkyô gi, mabyoq lhoq htoq é hkyô nghut é lé, nàng sê lhê nghut é yanmai, haù hkyô lé koi pyám aq. ²⁴ Haù Yhumsing é dui-nhâng zoshâng gi, mabyoq a lhoq htoq é za, yuq hkanmó lé dat myit tê byí é, wó mhoqshit é, a dat nhik-yô é su dut ra râ nghut lhê. ²⁵ Yhang gi, yhang lé htuq htîng é bang lé, nú-nhâm é dông mhoqshit byi ra râ nghut lhê; haù hkûn, Garai Gasang gi, yhangmoq lé myit lhîng hkyô byi mù, tengmán hkyô lé sê gyo nhâng lui, ²⁶ yhangmoq gi, bûn gyîng lò mù, nat Tsadán ô nau é hkyô lé kut byi râ matú, chyup yû huí é, nat Tsadán é tuihkyó mai wó hfang lut lò kó abe nghû, myit lum kat lhê.

3

Jihtûm Buinyì Pé Má Dut Lò Râ Hkyô

¹ Jihtûm buinyì pé má, wuîhkê é ahkýing pé joq lò râ nghut é lé, nàng matsing to aq. ² Hkâsu mù gâ le, haù u lé, byu pé gi, yhumsing gùng lé za chytidap é bang, ngùn lé myoqnoq é bang, gumrong é bang, nghutbûn é bang, góbang lé taîhpoí é bang, înu îwa nyo é lé a gyô é bang, jeju a dat bûn é bang, a chyoiyúng é bang, ³ chytidap myit a bo é bang, mara hkyut byi a sê é bang, lumù gansang é bang, yhumsing gùng lé hkâng a sê é bang, byuwuî pé, ge é hkyô lé a ngui é bang, ⁴ haq gumlaù é bang, a bun a so dut wún é bang, yhumsing gùng lé za hkik bûn é bang, Garai Gasang lé chytidap é bang dut râ malaî ngón kún hkyô lé za chytidap é bang, dut bùm kó râ nghut lhê. ⁵ Yhangmoq gi, tarâ hkunggâ é bang su dut kôlhang, haù pé é a-tsam

lé he-ngik pyâm akô nghut ri; haù sú é bang lé, nàng koi pyâm nyí aq.

⁶ Yhangmoq gi, hpaqchyí da mù yhùm pé má wàng kôluí, mara wòlai lé wun é, agè ashop é ô nau hkyô ajung jung má sô nghoq ló byuq é, ⁷ hkâ-nhâm le mhoq yu nyí kôlhang, haù tengmán hkyô lé a sê gyô é, myit nyhôm é myiwe wuî lé wó láng nghoq yu é bang nghut akô. ⁸ Yanne eq Yambre nhik gi, Mosheq lé htuq htîng é su, haù bang le, haù tengmán hkyô lé htuq htîng akô nghut ri; yhangmoq gi, myit é hkyô htên byuq kôluí, haù lumjîng hkyô má lhum a zuí é bang nghut akô. ⁹ Nghut kôlhang, haù nhik é hkyô byông htoq lo é su, yuq hkanmó é hí má, yhangmoq ngok é hkyô byông htoq lô râ nghut mù, haù mai lai lui yhangmoq wó kut jat kó râ a nghut.

Timohti Lé Pying Kat É Dang

¹⁰ Nàng kúm gi, ngá é mhoqshit hkyô, ngá é nyiyap hkyô, ngò myit myoqbyu tô é hkyô, ngá é lumjîng hkyô, myit hîng hkyô, chytidap hkyô, hkam jan hkyô, ¹¹ zing-ri huí é hkyô eq wuîhke jamjau hkyô pé lé le, Antioku wà mó, Ikoni wà mó eq Lustra wà mó pé má ngò hui zô é, zing-ri hkyô pé lé, ngò hkam jan bê hkyô lé le, nàng rago sê lhê. Nghut kôle, haù Yhumsing gi, haù pé banshoq mai ngo lé xe yù bê nghut ri. ¹² Gè gè yhang, agè ashop é byu pé eq mhaù kut é bang gi, mhaù zô nyi bum é eq mhaù zô é huí nyi bùm kôluí, a ge é hkyô shut je riyhang myô jat lò kô é hkûn, ¹³ Hkrisduq Yesuq má tarâ hkunggâ é asak dông nyiyap nau é bang yuq hkanmó gi, zing-rî é hui kó râ nghut lhê. ¹⁴ Nghut kôlhang, nàng gi, ô pé chyáng mai nàng mhoq yû bê hkyô lé le, Hkrisduq Yesuq lé lumjîng jáng hkyi yu é hui shoq, ¹⁵ nang lé hpaqchyí byéng-yá wó byí é chyoiyúng Chyúmdang pé lé, zoshâng hkûn mai nàng sê to bê hkyô lé le, nàng sê é yanmai, nàng mhoq yu to bê hkyô eq hkyak lumjîng to bê hkyô má, xoq kut nyí aq. ¹⁶ Chyúmdang

hkanqmó gi, Garai Gasâng é soq hâng tô é pé chyat nghut é yanmai, mhoqshit é hkyô, tân mhoq é hkyô, lhoq jo byi é hkyô eq dingmán hkyô lé tân shit byi é hkyô pé é matú, akyû bo ri; ¹⁷ haû mù luí, haû Garai Gasâng é byù gi, ge é muzó jizó hkanqmó lé kut râ matú, wó gumjup râ nghut lhê.

4

¹ Garai Gasâng é hí má le, dui nyi bang eq shi byuq bang lé tarâ dara râ sù Hkrisduq Yesuq é hí má le, Yhang htoq shit râ hkyô eq Yhâng mingdán é yanmai, ngò, nang lé pying kat é gi, ² haû mungdang lé hko kyo aq; ahkyíng yam-yoq ang kôlhang, a ang kôlhang, rì rì hen to aq; myit gyai hing é eq rago za mhoqshit é dông, lhoq jo byi, tân mhoqshit é eq myit wum byi kut nyi aq. ³ Hkâsu mù gâ le, byu pé gi, tengmán mhoqshit hkyô lé a kâm gyô é ahkyíng jé mù, yhangmoq ô nau yut yut é hkyô cháng luí, yhangmoq é no yo bui nau é nohkyap gyô nau é hkyô taí nhâng râ matú, sará pé rajùm rayò lé lhinghkyuq má lhoq tsiing to kó râ nghut lhê. ⁴ Yhangmoq gi, haû tengmán hkyô mai yhangmoq é nohkyap lé lhing pyám mù, myit htoq mhô-myi dang shut lhing ló kó râ nghut lhê. ⁵ Nghut kôlhang, nang gi, dut tô é hkyô banshoq má rago sidiq nyi aq; wuîhke jamjau hkyô lé hkam jân nyi aq; gabú danglù hko kyô é muzó kut nyi aq; nang é hpungmû banshoq lé wùn waq nyi aq.

⁶ Hkâsu mù gâ le, ngò gi, shuq jung hkungga ralhum dông hut pyâm é huí nyi gù nghut mù luí, mingkan mai ngò htoq ló râ ahkyíng jé bê nghut ri. ⁷ Ngò gi, haû ge é majan le zan bê; din shingjóng lhûm é hkyô le bàn bê; haû lumjíng hkyô le chang bê nghut lhê. ⁸ Ahkuí, haû tengmán é tarâ Agyi nghut sù, Yhumsíng gi, haû buinyi má ngo lé ap byi râ nghut é, haû dingmán hkyô é janmaú lé, ngá matú tô to byi bê nghut lhê. Haû gi, ngá é matú za a nghut, Yhang htoq shit râ hkyô lé

myit láng nyi é bang banshoq é matú le nghut lhê.

Timohti Lé Jì Kat É Hkyô

⁹ Nang gi, ngá chyáng wó dut é í hân hân lé lô aq. ¹⁰ Hkâsu mù gâ le, Demaq gi, mingkan shi lé chyitdap é yanmai, ngo lé pyám to luí, Htesaloni wà mó shut; Krezen gi, Galatiq mau shut; Tituq gi, Dalamati mau shut, e ló byuq bekô nghut é yanmai nghut lhê. ¹¹ Lukaq za ngò eq rahá nghut nyi lhê. Markuq lé, nang eq rahá shuí lé lò aq; yhang gi, ngá é hpungmû má wó htuqbáng râ sù nghut lhê. ¹² Ngò gi, Tuhkiku lé Ehpesu myuq shut nhang kat bê nghut lhê. ¹³ Nang gi, lé lo é hkûn, Troa myuq má, Karpu chyáng ngò tô tô é buhíng haû lé le, ngá é chyúmding lé le, je luí eq haû shokuq chyúmding pé lé le, yù lé lô byi aq.

¹⁴ Haû ningdup hpó Alesander gi, ngo lé a ge é myo myo kut bê nghut ri; haû Yhumsíng gi, yhang kut é eq rajung za, yhang lé dam byi râ nghut lhê. ¹⁵ Yhang gi, ngamoq é danglù lé wum kat htuq htíng bê sù nghut é yanmai, nang le, yhang lé sidiq ra râ nghut lhê.

¹⁶ Sâng-hi dàm, ngá gûng lé ngò taí hung é hkûn, yuq hkanqmó gi, ngá é hkyam shut a bo lom e za, ngo lé pyâm tô akô. Nghut kôlhang, haû gi, yhangmoq ahtoq má mara a dut sháng gaq. ¹⁷ Nghut kôlhang, ngò dông mai danglù haû lé rago wó hko pyo kat luí, tûngbaù pé banshoq bang wó gyo kó sháng gaq ga, haû Yhumsíng gi, ngá hkyam shut yap to mù, ngo lé wum-o byi é nghut lhê. Hau htoq agó, ngò gi, hkanghkyi é nhut mai le hkyi yù hui bê nghut lhê.* ¹⁸ Haû Yhumsíng gi, ngo lé agè ashop é hkyô hkanqmó mai hkyi yù luí, Yhang é mauhkûng mingdán má ngón za shuí jé râ nghut lhê. Hpungwup shingkang gi, Yhâng chyáng ahtum abyuq ru joq nyi sháng gaq ô. Amen.

Shi-kyám Dang

* **4:17** Haû hkûn lé, Romaq byu pé, byù sat lé gi, hkanghkyi lé tsô pyâm lhê.

¹⁹ Priskila eq Akula nhik lé le, Onesihpuru yhumbyù wui lé le, bo shi-kyám byi laq. ²⁰ Erastu gi, Korinhtuq myuq má nyi gyó to bê; Trohpimu lé gi, nõ luî, Melitu wà mó má ngò nyhi pyâm to bê nghut lhê. ²¹ Nang gi, wó dut é í, gyoqmyò a wàng shi lé, shî má jé lé lò aq. Úbulu gi, nang lé shi-kyâm kat ri; haû eq rajung za, Pudén, Línu, Klodia eq gumang wui banshoq bang gi, nang lé shi-kyâm kat akô nghut ri.

²² Haû Yhumsîng gi, nang é woi-nyí eq rahá nghut nyí sháng gaq. Jeju gi, nungmoq chyáng ru joq nyí sháng gaq ô.

TITUQ Chyáng Hun Kat é Laiká (Titus)

¹ Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chòm myit myoqbyu é yan-mai, Garai Gasang hkyin yu to bâng é lumjínq hkyô jat râ eq, tengmán hkyô lé wó sé mù, tarâ hkungga sé nhâng râ matú, hkyin yù huí é sù nghut lhê.

² Haù ahtum abyuq é asak hkyô lé, mhaù a sê é Garai Gasang gi, ahkyínq nghu é lháng a joq shi mai danggidiq byi to mù, Yhang masat tô é ahkyínq yam-yoq má sheq mungdang hko kyô é đông lhoq htoq shit luí, ³ nga-nhûng é hkyi yù Sù, Garai Gasang hkunmó hkyô tô é eq rajung za, haù mungdang hko é hkyô lé ngá é loq má ap byi bê nghut ri.

⁴ Nga-nhûng chòm lumjínq é hkyô đông mai, ngá zo sîng nghut é Tituq lé laiká kê kat lhê. Íwa Garai Gasang eq nga-nhûng é hkyi yù Sù Hkrisduq Yesuq chyáng mâ é jeju eq nguínqón hkyô gi, náng chyáng ru joq nyí sháng gaq ô.

Kreti Zinlóng Má, Tituq Wùn Waq Râ Muzó

⁵ Ngò, nang lé Kreti zinlóng má nyhi hkyô tô é gi, ngò, nang lé pyíng tô é eq rajung za, ngò a ban zui saí é loqzó pé lé lhoq pán râ matú eq, wà hkanqmó má hpúnq suwún ayá dâng to byi râ matú nghut lhê. ⁶ Haù hpúnq suwún kut râ sù gi, mara hûn râ hkyô a bo é sù; yhangmyi rayuq za wó é sù; yhang zô pé le, agè ashop é eq jîno a gyô é ga, mara hûn râ jowò a joq é lumjínq bang nghut é sù, nghut râ lhê.

⁷ Hkâsu mù gâ le, hpúnq-up rayuq gi, Garai Gasâng é sùt zum sù rayuq đông nghut lhê mù, mara hûn râ hkyô a bo é sù nghut râ lhê; yhang gi, yhumsing myit a cháng; i-myit a lûm tot; îhpê é jùn a dut; mabyoq jishûm a kut; a sansêng é ngùn híng lé a myit ô nau é

sù nghut râ lhê. ⁸ Yhang gi, byù bíng lé dat hkulûm sù; ge é hkyô lé chyitdap sù; nûm é sù, dîngmán sù; chyoiyúng sù; yhumsing gùng lé wó hkang é sù; ⁹ mhoq yu to bê hkyô eq rajung za, lumjínq é mungdang lé gîng gîng zui zing nyi é sù nghut râ lhê. Haù hkûn sheq, yhang gi, góbang lé tengmán é mhoqshit hkyô đông myit wum wó byí é eq, haù eq shai lhum é bang lé, shut é hkyô wó tûn shit râ nghut lhê.

¹⁰ Hkâsu mù gâ le, gumlau kut é bang, dangsôm taí é bang eq mhaù zô é bang myo myo nyi ri. Ahpyo-kuq hpyit é hpúnq bang je riyhang myo akô. ¹¹ Haù bâng é nhut shô lé gi, xaù pyâm byi râ lhê. Hkâsu mù gâ le, yhangmoq gi, a tengmán é đông sutzè lé wó yù shoq ga luí, mhoqshit a gîng é hkyô pé lé mhoqshit mù, rayhum bang bang lé lhoq hpyoq lhoq htên nyi akô nghut ri. ¹² Kreti byù mâ é myiqhtoi rayuq lháng gi, "Kreti byu pé gi, ayang mhaù é bang, tân jung yosô dusak pé, lagôn é zo myoqnoq bang nghut akô." ga taí wú ri. ¹³ Saksé shî gi, têng ri. Haù mù luí, yhangmoq gi, Yudaq byu pé é myit htoq mhô-myi dang lé le; tengmán hkyô lé he-ngik pyâm é bang pyíng tô é dang pé lé le, a gyo kô é za, ¹⁴ haù lumjínq hkyô má gîng tîng nyi kó sháng gaq, yhangmoq lé htân htân tân mhoqshit byi nyi aq. ¹⁵ Sân-yúng bâng é matú gi, azíng zê lhunglháng sân-yúng ri; a sân-yúng bang eq a lumjínq bâng é matú kúm gi, haí le a sân-yúng é chyat nghut nyi ri; hkâsu mù gâ le, yhangmoq é myit nhiklhum eq myit sôn sê é hkyô pé gi, gè gè yhang, a sân-yúng dut byuq bekô nghut ri. ¹⁶ Yhangmoq gi, Garai Gasang lé sê lhê ga kôlháng, yhumsîng zui saí é loq zó đông, Yhang lé he-ngik pyâm é bang nghut akô. Yhangmoq gi, achayut é bang, jîno a gyô é bang eq, ge é mù joq mijoq eq a htuk é bang nghut akô nghut ri.

2

Hká Đông Nyi Yap Râ Hkyô

¹ Nàng kúm gi, tengmán é mhoqshit hkyô eq wui é dông mhoqshit nyi râ dut lê. ² Hpô-mâng pé lé gi, i-myt shirâm sé râ hkyô; hkungga gíng é byù dut râ hkyô; yhumsing gùng lé wó hkàng râ hkyô eq, lumjíng myit gíng râ, chyitdap myit gíng râ, hkam jan hkyô gíng nyi râ hkyô pé lé, mhoqshit byi nyi aq.

³ Haù eq rajung za, hpô-myhí mâng pé lé gi, hkungga gíng é a-kyang bo nyi râ hkyô; lumù gansâng dang a taí râ hkyô; íhpê é jùn a dut râ hkyô eq ge é hkyô lé za dat mhoqshit é bang wó dut râ matú mhoqshit byi aq. ⁴ Haù hkùn, Garai Gasâng é mung-dang gi, lumu pyâm é a hui sháng gaq, yhangmoq gi, hpô-myhí zô pé lé, yhumsing yhanglâng eq, yhangzô pé lé chyitdap é, ⁵ yhumsing gùng lé wó hkàng é, siri bo é, ikun lé dat wùn waq é, ge é myit wó tûn shit é, yhumsing é yhanglâng uphkang é dông dat châng é bang dut râ matú, ge mhoqshit é hpô-myhí mâng pé dut râ nghut lê.

⁶ Haù eq rajung za, zorâm wui lé le, yhumsing gùng lé wó hkàng nyi kó sháng gaq, lhoq pun lhoq kyíng nyi aq. ⁷ Hkyô hkat hkangmó má, yhangmoq lé nàng yhang ge é muzó alik tûn shit nyi aq. ⁸ Nàng lé lhom htúq htíng é bang gi, nga-nhúng é hkyô má mara a wó hùn kômù hoq hpû nyi kó sháng gaq, nàng mhoqshit é hkyô má, taí pyám râ hkyô a bò shoq, têng é, siri bo é, eq sansêng é dang taí nyi aq.

⁹⁻¹⁰ Nga-nhúng é hkyi yù Sù Garai Gasang eq sêng é mhoqshit é hkyô pé hkat hkangmó yúng nyi sháng gaq, hkyô hkat hkangmó má, jun pé lé, yhangmoq é yhumsing wui pé é a-ô má nyi mù, yhumsing wui é i-myt ngón shoq dang a tu râ; a hkau râ; wó lum tô é bang dut râ hkyô pé lé, mhoqshit byi aq.

¹¹ Hkâsu mù gà le, hkungsô wó é myit myoqbyù hkyô ga é, nga-nhúng é kô myhang é Garai Gasang eq hkyi yù Sù, Yesuq Hkrisduq gi, hpungwup shingkang eq htoq shit râ hkyô lé láng nyi é hkùn, ¹² tarâ a hkunggâ é

myit eq mingkan myit ô nau é hkyô koi pyám lui, shí ipyat má yhumsing gùng lé wó hkàng râ, dingmán râ eq, tarâ hkunggâ é hkyô wó cháng shoq, ¹³ nga-nhúng lé mhoqshit byi râ matú, Garai Gasâng jeju chyunghuq gi, htoq shit bê nghut mù lui, byù lhunglhang bang lé hkyi yù hkyô hpóng byi bê nghut ri. ¹⁴ Haù Yesuq Hkrisduq gi, agè ashop é hkyô banshoq mai nga-nhúng lé hkyi yù mù, ge é muzó hkangmó lé châng kut nau é, Yhànggùng yhang sing é byuhú rahú dut râ matú wó lhoq sân-yúng yù shoq ga, nga-nhúng é matú Yhànggùng lé ap byi pyám bê nghut ri.

¹⁵ Nang lé ó yuq eq le, a wú shôm pyám kó sháng gaq; nàng gi, ahko ahkáng banshoq eq, yhangmoq lé shí hkyô pé mhoqshit nyi aq; myit wum byi é eq, tân mhoqshit é hkyô lé le kut nyi aq.

3

Ge É Muzo Zui Sai Râ Hkyô

¹ Nàng gi, lumjíng bang lé, zau wui eq ahko ahkáng wó bâng é a-ô má nyi mù, jìno gyô nyi râ eq, hkâ-nhám le ge é muzó hkangmó zui sai râ lé hen nyi uchyang, ² ó yuq lé le lù a mù râ; nguingón hkyô hô râ; myit tê byi é hkyô tûn shit râ eq; byù banshoq lé nûm é i-myt tûn shit nyi kó sháng gaq, lhoq pun lhoq kyíng nyi aq.

³ Hkâsu mù gà le, nga-nhúng le, hí hpyang gi, byù ngok pé, jìno a gyô é bang, mhaú zo huí é bang eq, gungsho ô nau é hkyô eq mingkan ngón hkyô ajung jûng eq jùn kut é hui bang, dut mù lui, agè ashop é eq manon lhùm é hkyô kut nyi mù, rayuq eq rayuq a jú lhùm é dông nyi laí lò bê nghut lê. ⁴ Nghut kôlhang, nga-nhúng é hkyi yù Sù Garai Gasâng jeju eq chyitdap myit htoq shit é hkùn, ⁵ nga-nhúng yhang kut é dingmán é muzó eq a nghut é za, Yhàng é shogyo nhikmyin é jeju yanmai sheq, Garai Gasang gi, nga-nhúng lé hkyi yù bê nghut ri. ⁶ Yhang gi, nga-nhúng é hkyi yù Sù Yesuq Hkrisduq é yanmai,

nga-nhông é ahtoq má agùn agó hut hkyó byí é Chyoiyúng Woi-nyí eq nga-nhúng lé chí san chí sêng pyám byi mù, woi-nyí má dum hku é hui nhâng luí, myit sik htaí byí é hkyô dông nga-nhúng lé hkyi yù bê nghut ri. ⁷ Haù mù luí, Yhâng é jeju mai mara hkyut san byí é hui bê nghut é yanmai, ah-tum abyuq é asak lé myit myoqbyu nyi é eq rajung za, nga-nhúng gi, silí wunlí wó hkam yu é bang dut lò râ nghut lhê. ⁸ Dang shí pé gi, lumgíng é dang nghut lhê mù luí, Garai Gasang lé lumjíng é bang gi, ge é muzó lé myit lòm luí rago zui saí nyi kó sháng gaq, haù hkyô pé lé nàng wum zuq tung mhoqshit byi râ lé, ngò ô nau nyi lhê. Shí pé gi, byù lhunglhâng bâng é matú ge é eq, akyû bo é hkyô nghut lhê.

⁹ Nghut kôlhang, ana apâ ga luí taí htíng lhûm é hkyô lé le; byùxik labaù gôn é hkyô lé le; nyo byoq lhûm é hkyô lé le; jep é tarâ eq séng mù byoq lhûm é hkyô pé lé le koi pyâm nyi aq, hkâsu mù gâ le, haù pé gi, akyû a bo é hkyô eq chûng a ge é hkyô pé nghut ri. ¹⁰ Gam hkuí é myit bò sù lé gi, í dâm mhoqshit wú mù, a wó jáng, yhang lé baù tô pyám aq. ¹¹ Haù su kut sù gi, yhang kut é muzó má mara wó to bê nghut mù, yhumsing gùng lé yhumsing mara hun é sù nghut é lé, nàng sê to lo aq.

Je Htâng Má Pying É Dang

¹² Ngò gi, Nikopoli wà má gyoqmyò lhoq lhai râ dông myit hpyit tô é yanmai, Artima lé, a nghut jáng Tuhkiku lé, nàng chyáng nhang kat byi râ, jé eq yhang, nàng gi, shikut luí, haù wà shut ngá chyáng lé lô aq. ¹³ Nàng gi, tarâ sê é sù Zena eq Apolo nhik lé, yhangnhik é hkyowù má râ é hkyô banshoq, shikut luí garúm kat aq. ¹⁴ Nga-nhông é byu pé gi, nyí wuú râ é hkyô lé wó htuq é eq ashi zuí é bang dut kó sháng gaq, ge é muzó lé myit lòm mù zui saí nyi râ hkyô lé mhoq yù râ lhê.

¹⁵ Ngò eq rahá nyi é bang yuq hkanmó gi, nang lé shi-kyâm kat akô. Lumjíng hkyô má ngamoq lé

chyitdap é bang lé, bo shi-kyám byi aq.

Garaí é jeju gi, nungmoq eq rahá joq nyi sháng gaq ô!

HPILEMON Chyáng Hun Kat é Laiká (Philemon)

¹ Hpilemon ê, Hkrisduq Yesuq é yanmai htóng lúng nyi sù, ngò Poluq eq nga-nhông é gumang Timohti nhik gi, ngá-nhik chyitdap é mù wùn luzúm nghut é sù nang lé le, ² ngá-nhik é gu-nhá Ahpiaq lé le, ngá-nhik é sarhé luzúm Arhkipò lé le, náng é yhùm má huì lhum lhum kut é noqkuq hpúng lé le, dang kyô kat lhê.

³ Nga-nhông é Îwa Garai Gasang eq Yhumsing Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyi sháng gaq ô!

Jeju Hkya-ôn É Hkyô Eq Kyûdung Dang

⁴⁻⁵ Ngò gi, Yhumsing Yesuq lé nàng lumjìng é hkyô lé le, sân-yúng bang banshoq lé nàng chyitdap é hkyô lé le, wó gyô é yanmai, ngò kyûdung é hkûn, nang lé myit bûn nyi luì, hkâ-nhám le ngá é Garai Gasang lé jeju hkya-ôn nyi lhê. ⁶ Ngò gi, Hkrisduq é matú nga-nhông chyáng bo tô é ge é mù lhumjup lé sê gyô é hkyô lé, nàng wó yù sháng gaq nghû, náng é lumjìng hkyô lé, nàng saksé hkâm é má akyû htoq râ matú, kyûdung byi nyi lhê. ⁷ Náng é chyitdap myit gi, ngo lé gyai gabú nhang é eq wum-o wó yù nhang ri; hkâsu mù gâ le, gumang hpó ê, náng é yanmai, sân-yúng bâng é i-myit má nguingón yuqyo é hkyô wó yù bekô nghut ri.

Onesimu É Matú Tôngbán Byi É Hkyô

⁸ Haù su mù, nàng kut gíng é muzó hkyô, ngò, nang lé pying kat lhê. Hkrisduq má, ngò gi, a gyuq a kyum é za nang lé haù wó kut nhang lhê nghut kôlhang, chyitdap myit đông za nang lé pying kat lhê. ⁹ Ngò, Poluq gi, mang bê htoq agó, ahkuì Hkrisduq Yesuq é yanmai htóng lúng sù le nghut luì, ¹⁰ ngò kyum hut huì nyi é u lé ngá

zo dut lo é Onesimu é matú nang lé ngò dúng tôngbán kat lhê. ¹¹ Yhang gi, hí hpyang náng é matú akyû a bo é nghut kôlhang, ahkuì gi, náng é matú le, ngá é matú le, akyû bò bê nghut ri.

¹² Ngò nhik htông é Onesimu lé náng chyáng dum taù nhang kat lhê. ¹³ Haù gabú danglu é yanmai, ngò htóng lúng nyi é má náng é malaì ngo lé garúm râ matú, yhang lé ngò shuí nyi to naù kôlhang, ¹⁴ ngò gi, nàng myit a huì le haì le a kâm kut. Hau é yanmai, ngò, nang lé kut nhang é đông a nghut e za, nàng ô nau é đông kut é san za nghut sháng gaq. ¹⁵ Hkâsu mù gâ le, náng chyáng mai yhang rayoq rabun zo gâng nyi é gi, yhang dum taù lò mù hkâ-nhám le nàng eq rahá dum wó nyi nyi râ matú nghut lhê abe. ¹⁶ Yhang gi, htông hpyang, jùn rayuq đông a nghut e za, jùn htoq má je ge é chyitdap gumang hpó dut râ nghut bê; ngá matú, yhang gi, ngò chyitdap dik é sù nghut lhê; náng matú kúm gi, byù rayuq đông le, Yhumsing Yesuq má gumang hpó rayuq đông le, je riyhang chyitdap râ sù dut bê nghut ri.

¹⁷ Haù mù luì, nàng, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù aq. ¹⁸ Yhang, nang lé rajung jung shut pyâm é nghut le le, chyín dap tô é nghut le le, haù gi, ngá chyáng dap é chyín nghû sôn yù aq. ¹⁹ Ngò, Poluq gi, chyín haù xap râ nghû luì, ngá loq èq yhang kê kat kôlhang, nàng yhang lhang, ngo lé asak chyín xap râ sù nghut é lé bûn nham aq. ²⁰ Nghut bê, gumang hpó ê, nang é yanmai, haù Yhumsing má ngò gabú é hkyô wó yu nyi sháng gaq, Hkrisduq má ngá é i-myit lé lhoq ngui lhoq ngón byi é đông, shi, ngò pying kat é dang lé gyo byi laq. ²¹ Nàng gi, ngò taì kat é htoq má je lhom kut râ nghut é lé, hkyak za sé luì, ngò kê kat é nghut lhê.

²² Hau htoq agó, ngá é matú nyi râ gok lajang lánq aq. Hkâsu mù gâ le, nungmoq kyûdung byi é yanmai, ngò gi, nungmoq chyáng dum wó jé râ lé

myit myoqbyu nyi lhê.

²³ Hkrisduq Yesuq é yanmai, ngá é htóng lúng luzúm nghut é sù Epahpra gi, nang lé shi-kyâm kat ri. ²⁴ Ngá é htuq luq htuq bang nghut é Markuq, Aristakuq, Demaq, Lukaq pé le, nàng lé shi-kyâm kat akô.

²⁵ Yhumsîng Yesuq Hkrisduq é jeju gi, nungmoq é woi-nyí eq rahá za ru joq nyí sháng gaq ô!

HEBRE Pê Chyang Hun Kat é Laiká (Hebrews)

*Garai Yhangzo Gi, Maumang
Lagyô Pê Htoq Je Gyaú É Hkyô*

¹ Laí ló bê ipyat pé má, Garai Gasang gi, nga-nhông é íchyí íwâ pé lé myiqhtoí pé đông alhông lhing eq adông đông mai dáng nyo wú bê nghut lhê. ² Nghut kôlhang, ló htâng é buinyì shí pé má, Yhang gi, Yhâng Zo đông mai nga-nhông lé dang nyô bê nghut ri; Yhang gi, lhunglhang lé sîng sù dut râ matú haú Zo lé masat to mù, Zo đông mai, nyì mi-nyì, joq mijoq lé hpan to bê nghut ri. ³ Haú Zo gi, Garai Gasang é hpungwup shingkang duqbo é hkyô eq Yhâng é gunghkyâng isâm roq nghut nyi mù, lhunglhang lé Yhâng é a-tsam bying é dang eq zui zing tô ri. Yhang gi, yubak mara lé lhoq sân-yúng é hkyô lé ban kut é htâng, mauhkung htoq má Hkikhkam dik Sù Garai Gasang é loqyo hkyam má zung to bê nghut ri. ⁴ Haú mù luí, Yhang gi, maumang lagyô pé é mying htoq gyaú é mying lé wó sing yù bê nghut é eq rajung za, yhangmoq htoq je riyhang gyaú sù dut bê nghut ri.

⁵ Hkâsu mù gâ le, Garai Gasang gi, "Nàng gi, Ngá Zo nghut ri. Hkû-nyì, Ngò gi, Náng Wa dut bê nghut lhê."✧

ga le, dum,

"Ngò gi, Yhâng Wa dut râ nghut mù, Yhang gi, Ngá Zo dut râ nghut lhê."✧

ga le, maumang lagyo hká yuq lé hkâ-nhám wá taí wú é nghut lhê lú?

⁶ Dum, Garai Gasang gi, Yhâng é zomún lé mingkan shut nhang hâng kat é hkûn,

"Ngá é maumang lagyô pé banshoq gi, Yhang lé noqkuq kó sháng gaq."✧

ga taí ri. ⁷ Maumang pé eq séng luí Garai Gasang taí é má,

"Yhang gi, Yhâng é maumang lagyô pé lé laí su dut nhang mù, Yhâng é dui-nhâng zoshâng wui lé, myishâm pé su dut nhang é nghut ri."✧

gâ ri. ⁸ Nghut kôlhang, haú Zo eq séng luí, Yhang gi,

"Garai Gasang ê, Náng é hkohkâm-tanghkuq gi, pyat dedu ahtum abyuq gîng nyi mù,

Náng é dingmán hkyô gi, Náng é mingdán lé uphâng é hkyô dut râ nghut lhê.

⁹ Nàng gi, dingmán hkyô lé chyitdap bê nghut mù, agè ashop é hkyô lé a ngui byuq lô é nghut lhê.

Haú mù luí, Garai Gasang, náng é Garai Gasang gi, Nang lé, gabú nhang é xú but byí é đông, Náng é luzúm wui htoq je lhoq gyaú to bê nghut ri."✧

ga taí ri. ¹⁰ Hau htoq agó, Yhang gi,

"Yhumsing ê, Nàng gi, a-nham sâng-hi má myidàm é apûn awang lé hi tô é nghut mù,

mauhkung pé gi, Náng é loqmú chyat nghut ri.

¹¹ Haú pé gi, htên byoq byuq râ nghut lhê; nghut kôlhang, nàng gi, ru gîng nyi râ nghut lhê; haú pé banshoq gi, mebu su xau byuq râ nghut lhê.

¹² Nàng gi, haú pé lé, bumó lé su ding yup râ nghut lhê; Nàng gi, haú pé lé, mebu su htaí pyám râ nghut lhê.

Nghut kôlhang, Nàng gi, rajung za ru gîng nyi râ nghut mù, Náng é zanwut pé gi, hkâ-nhám le htûm râ a nghut."✧

ga le taí ri. ¹³ Garai Gasang gi,

"Ngò, náng é gye pé lé, náng é hkyi nang tanghkuq kut pyám byí é hkying jé shoq,

Ngá é loqyo hkyam shut zung nyi shi aq."✧

ga maumang lagyo hká yuq lé hkâ-nhám wá taí wú é lhú? ¹⁴ Maumâng pé banshoq gi, hkyi yù hkyô lé hkam yù râ nghut é bang lé dojaú râ matú, nhang kat huí é mú wùn woi-nyí pé chyat za nghut akô, a nghut kó lhú?

2

Sadiq Byî É Hkyô

¹ Haû mù luî, nga-nhúng gi, châng nghoq ló byuq é a hui zo sháng gaq, haû nga-nhúng wó gyô yu to bê hkyô lé je riyhang rago châng nyi râ dut lhê. ² Hkâsu mù gâ le, maumang lagyo pé èq taí bê mungdang gi, gíng nyi mù, shut shaí lu laí é hkyô eq jìno a gyô é hkyô hkangmó kut é sù gi, yhumsíng eq gíng é mara dam byî é hui zo kô é nghut le gi, ³ nga-nhúng gi, haû-í yhang gyaú é hkyi yù hkyô lé haí su a ngàm kut é nghut jáng, nga-nhúng hkâsu wó hpang lut râ lhú? Hkyi yù hkyô haû gi, haû Yhumsing èq hí taí pyo htoq é nghut mù, Yhâng chyáng mai wó gyô yu é bang gi, haû hkyô têng é lé, ngamoq chyáng saksé shit bekô nghut ri. ⁴ Garai Gasang le, kumlhá pé, mauhpo muzó pé, laklaí kumlhá myo myo eq, Yhang ô nau é eq rajung za Chyoiyúng Woi-nyí chyunghuq pé lé gâm byî é dông mai, haû hkyô lé saksé shit bê nghut ri.

Hkyi Yù Hkyô Hpóng Byi Sù

⁵ Garai Gasang gi, maumang lagyo pé lé, ngamoq taí nyi é jé lô râ mingkan lé, uphkâng nhâng râ a nghut. ⁶ Rayuq yuq mai, rawò má saksé hkâm tô é gi,

"Byù gi, haí wá nghut mù, Nàng, yhang lé bún nyi lhê lhú?

Byu Yhangzo gi, haí wá nghut mù, Nàng, yhang lé wú gôn nyi lhê lhú?

⁷ Nàng gi, yhang lé, maumang lagyo pé htoq ratsuí lhoq nyhum to bê nghut ri.

Nàng gi, yhang lé, hpungwup shíngkang eq aróng bò nhâng mù,

⁸ jung hkangmó lé, yhâng é hkyiwa ô má tô to bê nghut ri."*

gâ ri. Jung hkangmó lé yhâng é a-ô má tô to bê gâ é gi, Garai Gasang, haí lháng a myhit to loshoq yhang uphkâng é a-ô má tô to bê nghut é lé gâ lhê. Nghut kôlháng, yhang é a-ô má tô tô é jung hkangmó lé, ahkuí, nga-nhúng a myàng shî é za nghut lhê. ⁹ Nghut kôlháng, nga-nhúng gi, maumang lagyo pé htoq ratsuí zo lhoq nyhúm huí é sù Yesuq lé myang é nghut lhê. Yhang gi, Garai Gasang jeju mai, yuq hkangmó é matú shî hkám byî é hui zo sháng gaq ga, shî-nò jamjau hkyô lé hkâm zo bê nghut é yanmai, ahkuí, Yhang lé hpungwup shíngkang eq aróng bò nhâng bê nghut ri.

¹⁰ Zo wuí myo myo lé hpungwup shíngkang wó hkam yù nhâng sháng gaq ga, jung hkangmó lé Yhang é matú chyat eq Yhang dông mai chyat joq nyi nhang é Garai Gasang gi, wúihke jamjau hui nhang é dông, yhangmoq é hkyi yù Sù lé lhoq gumjup byi râ matú htuk âng nyi ri. ¹¹ Haû byu pé lé chyoiyúng nhang é Sù eq lhoq chyoiyúng huí é bang gi, ikun ralhum za mâ é bang chyat nghut lhê. Haû mù, Yesuq gi, yhangmoq lé, gumang wui nghú rá lé a hoq é nghut lhê.

¹² "Ngò gi, Náng myíng lé, Ngá gumang wui chyáng taí pyô râ nghut lhê;

Ngò gi, shiwa hpông é myoq hí má, Nang lé hkya-on mahkôn hkôn râ nghut lhê."*

ga, Yhang taí ri. ¹³ Yhang gi,

"Ngò gi, Yhang lé lumhkau nyi râ nghut lhê."*

ga le dum taí ri. Hau htoq agó,

"Ngò gi, Garai Gasang ngo lé byî é zoshâng wui eq shî má nyi nyi lhê."*

ga, Yhang dum taí ri.

¹⁴ Haû zoshâng wui gi, sui sho eq nghut é yanmai, Yhang le, yhang-

moq é xângzo gùng bo hkam yù bê nghut ri. Hau é yanmai, Yhang gi, Yhâng é shî-nò hkyô dông mai, shî-nò hkyô é a-tsam lé zuí zìng é sù nghut é nat Tsadán lé wó lhoq htên pyám râ eq, ¹⁵ yhangmoq é shî-nò hkyô lé gyuq é eq, yhangmoq é asak gón lé jùn dông zuí zìng to huí é bang lé, wó lhoq lhut râ nghut lhê. ¹⁶ Gè gè yhang, Yhang gi, maumang lagyô pé lé garúm é a nghut é za, Abraham é awut ashín pé lé garúm é sheq ru nghut lhê. ¹⁷ Haù nghut é yanmai, Yhang gi, Garai Gasang lé dojàú é má shogyo nhikmyîn é eq lhumzuí é hkyangjong mó wó dut râ eq, byu pé é yubak marâ é matú shîhtaí gunglik hkungga wó kut râ matú, hkyô hkangmó má Yhâng é gumang wuì eq dù shoq kut é huí râ dut é nghut lhê. ¹⁸ Yhang gi, gunglaú huí é hkûn, Yhânggùng yhang jamjau huí zo bê nghut é yanmai, gunglaú huí nyi é bang lé wó garúm yu é nghut lhê.

3

Yesuq Gi, Mosheq Htoq Gyaú É Hkyô

¹ Haù mù luí, mauhkûng mai wut yù huí é, chyoiyúng é gumang wuì ê, lagyo eq hkyangjong mó nghû nga-nhúng yín yu é Yesuq é hkyô lé rago myit wú keq. ² Mosheq, Garai Gasâng é yhûm gón má lhumzuí é su, Yesuq le, Yhang lé masat yù sù Garai Gasâng chyáng lhumzui sù dut bê nghut ri.* ³ Yhûm kut sù gi, yhûm htoq je gyaú é aróng lé wó é su, Mosheq htoq, Yesuq gi, je gyaú é aróng lé wó gíng é lé myàng ri. ⁴ Hkâsu mù gà le, yhûm hkangmó gi, rayuq yuq eq saí é chyat nghut ri. Nghut kôlhang, Garai Gasang gi, jung hkangmó lé saí é sù nghut lhê. ⁵ Mosheq gi, Garai Gasâng é yhûm gón má dui-nhâng zoshâng rayuq dông lhumzui mù, Garai Gasang taí râ nghut é lé saksé hkám bê nghut ri. ⁶ Nghut kôlhang, Hkrisduq gi, lhumzuí é zo

rayuq dông Garai Gasâng é yhûm lé up ri. Nga-nhúng kúm gi, nga-nhúng lé wám é myit bò nhang é hkyô eq nga-nhúng gumrong nyi é myoqbyù hkyô lé myhik zìng nyi é nghut jáng, Yhâng é yhûm nghut nyi bê.

A Lumjìng Bang Lé Sidiq Byî É Hkyô

⁷ Haù mù luí, haù Chyoiyúng Woi-nyí taí é eq rajung za, "Hkû-nyí, nungmoq gi, Yhâng é danghtê lé wó gyo kô é nghut jáng, ⁸ yoso má Yhang lé chyâm kô é u lé, gumlau toq é hkûn nungmoq é íchýí îwâ pé kut kô é su, nungmoq é i-myt lé hkâlhoq htan to kó. ⁹ Nungmoq é íchýí îwâ pé gi, myi xê zàn yhang Ngò kut é muzó lé myàng kôle, yoso haù má Ngo lé chyam lik bekô nghut ri. ¹⁰ Haù nghut é yanmai, Ngò gi, ipyat haù lé nhikjum yo mù, "Yhangmoq é myit nhiklum gi, hkâ-nhám le hkyô ngoq byuq akô; yhangmoq gi, ngá é hkyô pé lé a sé kômù nghut ri." nghû taí é nghut lhê. ¹¹ Haù mù, "Ngá é bánno jowò má yhangmoq hkâ-nhám le wó wâng kó râ a nghut." nghû, Ngò, nhikjum yô é eq dakâm dang taí bê nghut lhê."*

gâ ri.

¹² Gumang wuì ê, nungmoq mâ é ó yuq le, haù rû dui nyi é Garai Gasâng chyáng mai, lhing taú ló byuq sê é, yubak mara byíng é, a lumjìng é i-myt a bò sháng gaq, sidiq nyi keq. ¹³ Nungmoq gi, ó yuq le, yubak marâ é mhaù zô é hkyo eq i-myt lhoq htan pyâm é a huí kó sháng gaq, "hkû-nyí" nghû ru wó taí nyi nyi gi, nyí wuì, rayuq eq rayuq myit wum byî lhum nyi keq. ¹⁴ Nga-nhúng gi, sâng-hi mai wó to bê myit lùm hkyô lé, ló htáng shoq zuí gíng nyi é nghut jáng, Hkrisduq eq chôm zùm yap nyi é bang dut bê nghut ri. ¹⁵ Haù gi,

* **3:2** Bun zo shî eq bun zo 5, 6 lhum mâ é Garai Gasâng é yhûm gà é gi, Garai Gasâng é byu pé lé gà é nghut lhê. ✧ **3:11** Hkya-on 95:7-11

"Hkû-nyí, nungmoq, Yhâng é danghtê lé wó gyô é nghut jáng, gumlau toq é hkûn, nungmoq é îchyí îwâ pé kut kô é su, nungmoq é i-myit lé hkâlhoq htan to kó."✧
ga taí é eq rajung za nghut ri.

16 Wó gyô yù mù, gumlau toq é bang gi, ô pé nghut akô lú? Haú bang banshoq gi, Egotuq ming mai Mosheq èq shuî htoq lo é bang nghut bum lê, a nghut kó lú? 17 Myi xê zàn yhang Garai Gasang lé nhikjum yó nhang é bang gi, ô pé nghut akô lú? Haú bang gi, mara kut shut mù, yoso má shi leq byuq é bang nghut bum lê, a nghut kó lú? 18 Jìno a gyô bùm kô é nghut jáng, Yhâng é bánno jowò má yhangmoq hkâ-nhám le wó wâng kó râ a nghut ga, Garai Gasâng èq dakam é bang gi, ô pé nghut akô lú? 19 Haú mù, yhangmoq a lumjìng kô é yanmai, a wó wâng kô é lé, nga-nhúng myang é nghut lê.

4

Garai Gasâng É Byu Pé É Matú Bánno Buinyì Đông Nghut É Bánno Jowò

1 Haú nghut mù luí, Garai Gasâng é bánno jowò má wàng râ danggidiq ru gîng nyí ashî nghut é yanmai, nungmoq mâ é ó yuq le, haú má a hkyit hkap é a dut râ matú, nga-nhúng sidiq nyí sháng. 2 Hkâsu mù gâ le, yhangmoq lé gabú danglù haú hko kyo bê su, ngamoq lé le hko kyo bê nghut lê; nghut kôlhang, yhangmoq wó gyô é mungdang gi, yhangmoq é matú akyû a bò, haí mù gâ le, haú wó gyô é bang gi, lumjìng myit mai a lhom hap yù kô é yanmai nghut ri. 3 Nga-nhúng lumjìng bê bang za, bánno jowò haú má wó wang é nghut lê. Haú hkyô gi,

"Haú mù, 'Ngá é bánno jowò má yhangmoq hkâ-nhám le wó wâng ko râ a nghut.' nghû, Ngò, nhikjum yô é èq dakâm dang taí bê nghut lê."✧

ga Garai Gasang taí bê eq rajung za dut é nghut ri. Nghut kôlhang, Yhâng é muzó gi, mau htoq xâng hkun mai ban kut to bê nghut lê. 4 Hkâsu mù gâ le, "Garai Gasang gi, nyhit nyí nghû râ buinyì má Yhâng é muzó banshoq mai bánno bê nghut ri."✧ gâ é dang pé má, haú nyhit nyí nghû râ buinyì eq sêng é hkyô lé rawò má Yhang taí tô ri. 5 Bánno jowò joq é eq séng luí, Yhang dum taí tô é gi, "Ngá é bánno jowò má yhangmoq hkâ-nhám le wó wâng kó râ a nghut."✧ gâ ri.

6 Bánno jowò haú má wàng râ bang ra-am nyí é danggidiq joq tô ashî nghut ri; hí hkûn, gabú danglù haú wó gyô wú bê bang kúm gi, yhangmoq jìno a gyo kô é yanmai, a wàng kô é nghut lê. 7 Haú mù luí,

"Hkû-nyí, nungmoq, Yhâng é danghtê lé wó gyo kô é nghut jáng, nungmoq é i-myit lé hkâlhoq htan kó."✧

gâ é lé, ngò hí lé taí bê eq rajung za, Garai Gasang gi, gyai myáng é htâng má Dawiq dòng mai taí é hkûn, "Hkû-nyí" gâ é buinyì ra-nyí dum masat to bê nghut ri. 8 Hkâsu mù gâ le, yhangmoq lé, Yoshuq èq bánno jowò byi bê ru nghut le gi, Garai Gasang gi, htâng má, gotû buinyì eq séng luí taí râ a nghut lo. 9 Haú mù luí, Garai Gasâng é byu pé é matú gi, Bánno buinyì dòng nghut é bánno jowò ru joq tô ashî nghut lê. 10 Hkâsu mù gâ le, Garai Gasang gi, Yhâng é muzó mai bannô é su, Garai Gasâng é bánno jowò má wàng é sù gi, yhumsing é muzó mai bánno râ nghut lê. 11 Haú nghut mù, yhangmoq é jìno a gyo hkyô é alik lé cháng mù leqbat é, ó yuq le a bò sháng gaq, nga-nhúng gi, bánno jowò haú má wó wâng shoq, a-tsam bo é í shikut sháng.

12 Hkâsu mù gâ le, Garai Gasâng é mungdang gi, rû dui nyí é eq a-tsam bo é nghut lê. Haú gi, shamsó íshut dap é sham htoq má je htoq é nghut mù, myit nhikhum eq woi-nyí lé le,

✧ 3:15 Hkya-on 95:7-8 ✧ 4:3 Hkya-on 95:11
Hkya-on 95:7-8

✧ 4:4 Apùn 2:2 ✧ 4:5 Hkya-on 95:11 ✧ 4:7

wuimyoq pé eq wui-nyún lé le, wó gam hkoq hkyang rot é nghut lhê; haû gi, nga-nhúng myit é hkyô pé eq myit sôn é hkyô pé lé wó jéyáng é nghut lhê. ¹³ Hpan tô é lhunglháng gi, Garai Gasâng é hí mai wó haq pyâm é haî le a joq é nghut lhê. Jung hkangmó gi, nga-nhúng, jihpán shit ra râ Su é myoq hí má a wó nghop tô é hkyô, de de dut é nghut lhê.

Je Gyaú É Hkyangjong Mó Yesuq

¹⁴ Haû mù luí, nga-nhúng gi, Garai Gasâng é Yhangzo Yesuq nghut sù, mauhkúng pè shut hkyang doq ló bê nghut é gyaú é hkyangjong mó lé wó é nghut é yanmai, nga-nhúng yín yu to bê lumjín hkyô lé ging ging myhik zing nyí sháng. ¹⁵ Hkâsu mù gâ le, nga-nhúng gi, nga-nhúng wum nyhôm é hkyô pé lé a sê gyo byí é hkyangjong mó wó é a nghut é za, nga-nhúng su hkyô hkangmó má gunglaú é huí wú kôlhang mara a bo é sù hkyangjong mó lé sheq wó é ru nghut lhê. ¹⁶ Haû mù luí, nga-nhúng gi, shogyo nhik-myín é hkyô wó yú râ eq, nga-nhúng ra châ é u má nga-nhúng le wó garúm râ jeju lé myang hô sháng gaq, hkyak lum é myit mai Garaî jeju tanghkuq shut chyáng htep ê sháng.

5

¹ Hkyangjong mó yuq hkangmó gi, byu pè chyáng mai hkyin htoq yú huí é nghut mù, mara pè é matú, chyunghuq pé eq hkungga pé nhông byi hkyô nghut é, Garai Gasang eq séng é muzó pé má, yhangmoq é gunglik dông, hkyin masat to huí é bang nghut akô. ² Yhânggùng yhang gi, wum nyhóm hkyo é a-ô má nghut nyi é yanmai, yhang gi, bun a bóng é eq hkyô nghoq ló é bang lé nú-nhâm é dông wó shuí-û é nghut lhê. ³ Wum nyhôm é yanmai, yhang gi, byu pè é marâ é matú le, yhânggùng yhâng é marâ é matú le, hkungga nhông byi râ dut é nghut lhê.

⁴ Ó yuq le, yhumsing gùng yhumsing aróng haû lé wó yu é a

nghut; Arun lé su, Garai Gasâng eq wut yu é hui jáng sheq wó é nghut lhê. ⁵ Haû eq rajung za, Hkrisduq le, hkyangjong mó dut lo é hpungwup shingkang lé, Yhânggùng yhang kut yu é a nghut. Garai Gasang sheq, Yhang lé,

"Nàng gi, Ngá Zo nghut ri; Ngò, hkû-nyí Náng Wa dut bê nghut lhê."*

ga taí é nghut lhê. ⁶ Hau htoq agó, "Nàng gi, Melahkizedek wó é hkyangjong ayá hkyô dông mai ahtum abyuq hkyangjong rayuq nghut nyi ri."*

ga, gó wô má le, Yhang taí to ashî nghut ri.

⁷ Yesuq gi, myidàm htoq má asak dui nyi é buinyi pé má, Yhang lé, shi é mai wó hkyi yú Su chyáng, ngaubyi ngau-nhap eq wut garû é èq, kyûdung é eq dung tôngbán bê nghut mù, Yhâng é hkungga gíng é ap nóng hkyo é yanmai, gyo byí é hui bê nghut ri. ⁸ Yhang gi, Zo rayuq nghut to kôle, Yhang hui zô é wuîhke jamjau hkyô mai jino gyo hkyô wó mhoq yú bê nghut ri. ⁹ Yhang gi, lhoq gumjup huí é hkûn, Yhang é jino gyo bang banshoq é matú, ahtum abyuq é hkyi yú hkyo é awang dut byuq bê nghut é eq, ¹⁰ Melahkizedek wó é hkyangjong ayá hkyô dông mai hkyangjong mó dut râ matú, Garai Gasâng eq hkyin masat é hui bê sù nghut ri.

Woi-nyí Má Wáng Ra Bê Hkyô

¹¹ Ngamoq gi, shí hkyô eq séng lui taí râ gyai joq lhê; nghut kôlhang, nungmoq gi, ra lui za a sê gyô é bang nghut kô é yanmai, taí sân kyo wuî ri. ¹² Gè gè ga jáng, ahkui lhê ahkyíng má, nungmoq gi, sará dut gíng bê bang nghut lhê; nghut kôlhang, Garai Gasâng é mungdang mâ é tengmán hkyo é awang lé, rayuq yuq eq nungmoq lé dum taú mhoq byi râ ru dut nyi akô nghut ri. Nungmoq gi, htan é zoshuq râ é bang a nghut, naú wing râ é bang ru nghut nyi ashî kó myih-nhung! ¹³ Naú wing shuq râ é sù

* 5:5 Hkya-on 2:7 * 5:6 Hkya-on 110:4

ó yuq le, zonú nghut nyi ashî mù, dîngmán é hkyô lé mhoqshit é má a mán shi nghut ri. ¹⁴ Nghut kôlhang, htan é zoshuq gi, ge é hkyô eq agè ashop é hkyô lé wó sê gam hkoq yû shoq, hkâ-nhám le yhumsing gùng yhumsing lhoq mhân yu nyi é, kô dîng bê bang é matú ru nghut lhê.

6

¹ Haû mù luî, nga-nhúng gi, Hkris-duq eq sêng é mhoqshit hkyô awang lé tô to mù, myit kô dîng é hkyô shut xoq sô ê sháng. Nga-nhúng gi, shî-nò hkyô shut shuî jé é muzó mai myit lhîng hkyo é, Garai Gasang lé lumjîng hkyo é, ² baptisma pé, loq ke byi hkyô, shî é mai dum dui toq hkyô eq ahtum abyuq jéyáng hkyô eq sêng é mhoqshit hkyo é, apûn awang dum hî nó a ra lô é nghut lhê. ³ Garai Gasang gyô é nghut jáng, nga-nhúng gi, myit kô dîng hkyô shut xoq so râ nghut lhê.

⁴ Myoq lhoq bóng é radàm hui bê bang, mauhkûng chyunghuq lé myang hap yù bê bang, haû Chy-oiyúng Woi-nyí lé chôm hkam yù bê bang, ⁵ Garai Gasang é mungdâng é gè hkyô eq jé lo nyi é ipyat é a-tsam pé lé myang chyam wú bê bang, ⁶ yhangmoq hpuq lhik ló byuq é nghut le gi, hká dông lé myit lhîng dum ge wó râ a nghut lo, haû mù gâ le, yhangmoq gi, Garai Gasang é Yhangzo lé dum jén sat pyâm é dut mù, Yhang lé de de rhoi pyâm kô é nghut lhê.

⁷ Yhâng ahtoq má wo gyûn é mau wuî lé shuq yû mù, yò mù sai bâng é matú akyû bo é hôwa nuqhpýi lhoq htoq byî é maumyî gi, Garai Gasang é shimân jeju myang hap yu é nghut ri. ⁸ Nghut kôlhang, zu gâm eq myoq gâm yuq htoq nhang é maumyî gi, akyû a bò mù, nhîng pyâm é hui zo râ lé chiq râ ri. Haû gi, ló htáng má nyhê hkyô pyâm é hui râ nghut lhê.

⁹ Nghut kôlhang, chyitdap é gumang wuî ê, ngamoq gi, haû su nghû tai é nghut kôlhang, nungmoq é hkyi yù

hkyô eq sêng é je ge é jung pé, nungmoq wó bekô râ nghû hkyak myit lum tô lhê. ¹⁰ Garai Gasang gi, a tara é sù a nghut. Yhang gi, nungmoq é muzó lé le, Yhâng é byu pé lé nungmoq garúm bê eq xoq luî garúm nyi é dông, Yhang lé nungmoq chyitdap é myit shit kô é hkyô lé le, a tô-myhí râ nghut lhê. ¹¹ Ngamoq gi, nungmoq é i-myt myoqbyù hkyô wó byîng jup râ matú, nungmoq yuq hkangmó ipyat htum shoq xoq shikut nyi kó râ lé gyai ô nau ri. ¹² Ngamoq gi, nungmoq lagon bang dut byuq râ lé a ô nau é za, Garai danggidiq byî to bê é lé, lumjîng myit eq myit hîng hkyô dông mai hkam yu é bang su châng kut kó râ lé ô nau é ru nghut lhê.

Garai Gasang É Danggidiq Gîng Nyi É Hkyô

¹³ Garai Gasang gi, Abraham lé danggidiq tô é hkûn, Yhâng htoq gyaú é dakâm myîng lang râ rayuq lháng a nyi é nghut mù, Yhânggùng lé Yhang lang luî dakam é gi, ¹⁴ "Ngò gi, nang lé teng yhang shimân byi mù, nang lé awut ashín myo myo byi râ nghut lhê."* gâ ri. ¹⁵ Haû mù, Abraham gi, myit hîng hîng láng yu é htâng má, byî tô é danggidiq lé wó yû bê nghut ri.

¹⁶ Byu pé gi, yhangmoq htoq gyaú su é myîng lé lang luî, dakâm kô é eq, yhangmoq dakam é dang lé saksé kut mù, dang-rháng é hkyô pé ban-shoq lé lhoq pân pyâm akô nghut ri. ¹⁷ Garai Gasang gi, Yhang myit hpyit tô é hkâ-nhám le a htaî lhik é hkyô lé, danggidiq byî tô é lé hkam yù râ bâng chyáng san za shit nau ri; haû mù luî, dakâm dang eq lhoq gîng to bê nghut ri. ¹⁸ Garai Gasang gi, mhaú a ge é yanmai, hkâ-nhám le a htaî lhik é hkyô í hkat nghut é danggidiq eq dakâm dang joq é nghut mù, Yhang haû su kut é gi, nga-nhúng hí má tô to byî é myit myoqbyù hkyô lé myhik zîng râ matú gâú é jowò shut hpang wàng bê bang nga-nhúng lé wum mó

* 6:14 Apûn 22:17

byi é dut râ matú nghut lhê. ¹⁹ Nga-nhúng gi, myit nhiklhùm é shamtoq goknghe đông myit myoqbyù hkyô haù lé wó é nghut mù, haù gi, gingtúng é eq gaù é hkyô nghut ri. Myit myoqbyù hkyô haù gi, mauhkúng no-qkuq yhùm mâ é pân-gyang ahkaù mâ é sâ-n-yúng gok má jé wang é nghut ri. ²⁰ Jowò haù gi, nga-nhúng é akyu é matú, nga-nhúng é hí má wàng byi é sù Yesuq wang jé é jowò nghut ri. Yhang gi, Melahkizedek wó é hkyangjong ayá hkyô đông mai, ahtum abyuq é hkyangjong mó dut bê nghut ri.

7

Hkyangjong Melahkizedek É Hkyô

¹ Melahkizedek gi, Salem myuq é hkohkâm eq Myhang Htâng é Garai Gasâng é hkyangjong nghut ri. Yhang gi, hkohkâm pé lé sat ûng pyám lui dum taù lo é Abraham lé hui mù, shimân byi bê nghut ri. ² Haù mù, Abraham gi, wó lo é jung hkangmó mâ é, xê gambùm mâ é ragambùm, yhang lé byi bê nghut ri. Sâng-hi lhê é Melahkizedek é mying lichyùm gi, "dingmán hkyo é hkohkâm" gâ é nghut mù, htâng lhê é "Salem é hkohkâm" gâ é gi, "nguingón hkyo é hkohkâm" gâ é nghut lhê. ³ Yhâng é înu îwa é hkyô eq byùxik labaù le, hi é buinyi eq asak htùm é hkyô le a kê to nghut ri. Yhang gi, Garai Gasâng é Yhangzo su, ahtum abyuq hkyangjong ru nghut nyi ri.

⁴ Yhang hkâ-í hkik lhê nghù é lé, myit wú keq. Haù îchyí îwa Abraham lháng gi, wó lo é mâ é xê gambùm mâ é ragambùm, yhang lé byi ri-nhung! ⁵ Hkyangjong dut bang Lewiq é awut ashín pé gi, yhangmoq é gumang wui, Abraham mai nyi gyó lo é bang nghut kôle, tarâ má bo é eq rajung za, haù bâng chyáng mai xê gambùm mâ é ragambùm lé hkyui yù râ dut é bang nghut akô. ⁶ Nghut kôlhang, Melahkizedek gi, Lewiq mai gyó lo é amyû a nghut kôle, danggidiq pé wó to sù nghut é Abraham chyáng

mai xê gambùm mâ é ragambùm hap yù mù, shimân byi ri. ⁷ Shimân byi sù gi, shimân byi é lé hkam yù sù htoq je gyaù sù nghut é lé, ó yuq le úng-áng râ hkyô a joq é nghut lhê. ⁸ Hkyangjong pé eq séng lui ga jang, shi byuq sê é byu eq, xê gambùm mâ é ragambùm lé hkyui yu é nghut lhê; nghut kôlhang, Melahkizedek eq séng lui nghut jáng, asak dui nyi é ga taí pyô byi é hui su eq hkyui yu é nghut lhê. ⁹ Xê gambùm mâ é ragambùm hkyui yù sù, Lewiq lháng gi, Abraham đông mai xê gambùm mâ é ragambùm byi bê nghù wó taí ri. ¹⁰ Haù mù gâ le, Melahkizedek gi, Abraham lé hui é hkùn, Lewiq gi, yhâng é îchyí îké é gungdu hkaù má ru bo tô ashí nghut ri.

Melahkizedek Eq Dù É Yesuq

¹¹ Haù Lewiq hkyangjong amyû pé é ipyat má, byu pé gi, jep é tarâ lé wó yu bùm kô é nghut mù, hkyangjong ayá haù mai gumjup hkyô wó yù kô é nghut le gi, haù mù lui, Arun wó é hkyangjong ayá hkyo đông a nghut é za, Melahkizedek wó é hkyangjong ayá hkyo đông lo é sù gotù hkyangjong rayuq ra shirâ l hú? ¹² Hkâsu mù gâ le, hkyangjong amyû htaí é hkùn gi, tarâ le htaí yhang htaí râ dut é nghut lhê. ¹³ Haù su nghù taí é hkyô pé eq séng é Sù gi, gotù byuhú mâ é sù nghut mù, byuhú haù mai gi, ó yuq le hkungga gyap má dojaù wú é a nghut. ¹⁴ Hkâsu mù gâ le, nga-nhúng é Yhumsîng gi, Yudaq byuhú mai gyó lo é awut ashín nghut é hkyô, san za nghut nyi ri. Mosheq kúm gi, byuhú haù eq séng é hkyô má, hkyangjong pé eq séng lui haù lé a taí é nghut lhê. ¹⁵ Melahkizedek eq dù é gotù hkyangjong rayuq pô htoq bê nghù, ngamoq taí bê hkyô gi, je riyhang san za dut bê nghut ri. ¹⁶ Yhang gi, îwa rayuq é awut ashín pé nghut râ lhê gâ é tarâ đông hkyangjong rayuq lé dut é a nghut é za, a wó lhoq htên é asak é a-tsam eq rajung za lé dut é ru nghut lhê. ¹⁷ Hkâsu mù gâ le,

"Nàng gi, Melahkizedek wó é hkyangjong ayá hkyô dông mai, ahtum abyuq hkyangjong rayuq nghut nyi ri."*

ga Yhang eq séng luí taí pyo tô é nghut lhê.

¹⁸ Haû hí lhê é cháng rã tarã gi, wum nyhôm é eq akyû a bo é yanmai, tô pyám bê nghut lhê. ¹⁹ Hkãsu mù gã le, haû jep é tarã gi, gumjup hkyô haí a wó kut byí é nghut lhê. Haû mù, je ge é myit myoqbyù hkyô lajang byí é nghut luí, nga-nhúng gi, myit myoqbyù hkyô haû mai Garai Gasâng chyáng wó chyâng htep ê é nghut lhê.

²⁰ Myit myoqbyù hkyô haû gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjong pé wó dut bekô nghut ri. ²¹ Nghut kôlhang, Yesuq kúm gi,

"Nàng gi, ahtum abyuq hkyangjong rayuq nghut lhê.'

ga haû Yhumsing dakâm bê nghut mù, Yhang myit é hkyô htaí rã a nghut."*

ga, Yhang eq séng luí Garai Gasang taí é hkûn, dakâm dang haû mai hkyangjong rayuq dut bê nghut ri.

²² Dakâm dang hau é yanmai, Yesuq gi, je ge é dangshikaq é pahkám wò yù sù dut bê nghut ri.

²³ Hkyangjong pé myo myo nyi rã dut é gi, yhangmoq é muzó a wó xoq zui shoq shi byuq hkyô èq hkûm zing pyám kô é yanmai nghut ri. ²⁴ Nghut kôlhang, Yesuq gi, ahtum abyuq dui nyi sù nghut é yanmai, Yhang gi, hkyangjong mù ayang ru zui nyi rã nghut lhê. ²⁵ Haû mù luí, Yhang gi, Yhang dông mai Garai Gasâng chyáng lé jé é bang lé, hkã-nhám le wó hkyi yu é nghut lhê; haí mù gã le, Yhang gi, yhangmoq é matú dúng tóngbán byi nyi rã matú, rû dui nyi é sù nghut lhê.

²⁶ Yesuq gi, chyoiyúng é sù, mara hûn rã hkyô a bo é sù, sân-yúng é sù, yubak dap bang eq rahá a nghut shoq gotû san kut huí é sù, mauhkûng pé ahtoq má lhoq toq lhoq gyaú yu huí é sù nghut ri. Haû sù é hkyangjong mó

gi, nga-nhúng rã é lé lajang byi rã htuk ang ri. ²⁷ Nyí nyí bui bui, yhumsing é marã é matú hí hkungga nhông byi mù, byu pé é marã matú le hkungga nhông byi é gotû hkyangjong mó pé su, Yhang gi, a kut rã é sù nghut lhê. Yhang gi, Yhânggùng lé Yhang nhông byi é hkûn, yhangmoq é yubak marã é matú banshoq radãm za hkungga nhông byi pyám bê nghut ri. ²⁸ Hkãsu mù gã le, haû jep é tarã gi, wum nyhôm é byu pé lé hkyangjong mó pé dông masat é nghut ri. Nghut kôlhang, Garai Gasang gi, haû jep é tarã é htâng má lé jé é dakâm dang èq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup hui bê nghut ri.

8

Dangshikaq Asik É Hkyangjong Mó Yesuq

¹ Ngamoq taí nyi é dangkâng gi, shí dông nghut lhê: Nga-nhúng gi, haû sù é hkyangjong mó lé wó é bang nghut lhê. Yhang gi, mauhkûng htoq má, Hkikhkam dik Sù Garaí é hkohkãm-tanghkuq é loqyò hkyam shut zùng to mù, ² byu èq saí é a nghut é za, haû Yhumsing èq saí é saksé zúm akying hkaû mã é, sân-yúng dik gok má dojaú é sù nghut ri.

³ Hkyangjong mó hkangmó gi, chyunghuq pé eq hkungga pé lé nhông byi rã matú wò hun to huí é chyat nghut lhê. Haû mù luí, hkyangjong mó shí yuq le, rajung jung nhông byi ra rã nghut lhê.

⁴ Yhang gi, mingkan htoq má nyi tô é ru nghut le gi, hkyangjong dut rã a nghut; hkãsu mù gã le, jep é tarã dông ga jang, chyunghuq nhông jaú é byu pé nyi to gù bê nghut lhê.

⁵ Yhangmoq, sân-yúng dik gok má dojaú é hkyô gi, mauhkûng htoq má joq é azòng eq wupzo dông nghut ri. Haû nghut é yanmai, Mosheq gi, saksé zúm saí rã nghut é hkûn, "Nang lé, bùm mã tûn shit é azòng eq rajung za jung hkangmó wó saí shoq kut

aq."* ga sidiq byi huî é nghut lhê.
 6 Nghut kôlhang, Yesuq, gyoro sô xoq byi é dangshikaq gi, axaû lhûm htoq má je gyaú é eq rajung za Yhang hap yu tô é dojaú hkyô gi, yhangmoq é dojaú hkyo htoq má je gyaú é nghut lhê. Haû mù, dangshikaq haû gi, je ge é danggidiq pê htoq má awang hi tô é nghut lhê.

7 Hkâsu mù gà le, sâng-hi lhê é dangshikaq má râ é hkyô haî a bo é ru nghut le gi, gotû ra râ a nghut lo.
 8 Nghut kôlhang, Garai Gasang gi, byu pê chyáng mara bo é myàng mù, taî é gi,

"Haû Israelaq é yhumbyù wuì eq le, Yudaq é yhumbyù wuì eq le,

Ngò, dangshikaq asik to râ ahkyíng jé lo nyi ri ga haû Yhumsíng taî pyo ri.

9 Haû gi, Ngò, yhangmoq é îchyí îwâ pé lé loq èq zui mù, Egutuq ming mai shûi htoq lo é hkûn,

yhangmoq eq tô tô é dangshikaq su dut râ a nghut.

Haî mù gà le, yhangmoq gi, Ngá é dangshikaq lé a xoq cháng kô é nghut mù,

Ngò gi, yhangmoq chyáng mai lhing ló byuq é nghut lhê ga haû Yhumsíng taî pyo ri.

10 Shî gi, ahkyíng haû laî é htâng má, Israelaq é yhumbyù wuì eq Ngò to râ nghut é dangshikaq nghut lhê ga haû Yhumsíng taî pyo ri.

Ngò gi, Ngá é tarâ pé lé, yhangmoq é imyit má kat byi mù, yhangmoq é myit nhiklhûm má kê to byi râ nghut lhê.

Ngò gi, yhangmoq é Garai Gasang nghut mù, yhangmoq gi, Ngá é byu pé dut kó râ nghut lhê.

11 'Haû Yhumsíng lé sé keq.' ga, yhâng é gumang hpó lé nghut nghut, yhâng é chyangnâm mâ é sù lé nghut nghut, mhoqshit é byù nyi râ a nghut lo,

haî mù gà lé, yhangmoq lhunglhâng bang gi, tiq htáng sù mai kô htáng sù jé shoq Ngo lé sé kó râ nghut lhê.

12 Hkâsu mù gà le, Ngò gi, yhangmoq é agè ashop hkyô lé mara hkyut pyám byi mù, yhangmoq é mara pé lé dum a bun byi lo râ nghut lhê."*

gâ ri.

13 Dangshikaq haû lé, Yhang "asik" gà é gi, sâng-hi lhûm lé, axau kut pyâm é nghut ri; xau ló byuq é haî le, hkâm-yháng a myáng má byuq ló byuq râ nghut lhê.

9

Myidàm Saksé Zúm Má Noqkuq É Hkyô

1 Sâng-hi lhê é dangshikaq gi, noqkuq râ htúngtarâ pé eq noqkuq râ myidàm sân-yúng dik gok bo é nghut ri. 2 Saî tô é saksé zúm é sâng-hi gok má gi, haû myibung tsúng jang, siboî eq haû nhông byi é muk joq mù, haû gok lé gi, Chyoiyúng Jowò ga myhîng ri. 3 Í dang nghû râ gok pán-gyang é ahkaû mâ é gok lé gi, Chyoiyúng Htâng é Jowò gà é nghut lhê. 4 Gok haû má gi, namngón jung nyhê é hîng hkungga gyap eq hîng shup dangshikaq sidek joq ri. Dangshikaq sidek haû má gi, mannaq muk bo é hîng yam, ahaq nyún tô é, Arun é dumbáng eq, dangshikaq luqlong pé bo tô ri. 5 Dangshikaq sidek é ahtoq má gi, shîhtaî gunglik hkungga byi jang htoq má wup tô é, Hpungwup shingkang bò Sù é hkerubim* pé joq tô ri. Nghut kôlhang, ngamoq gi, ahkuî haû pé lé jihkúm nuqguq a wó taî san kyo é nghut lhê.

6 Haû dông jung hkangmó ban lajang tô é hkûn, hkyangjông pé gi, ayang sâng-hi gok má wàng mù, yhangmoq é dojaú muzó lé wùn waq bekô nghut ri. 7 Nghut kôlhang, ahkaû gok má gi, hkyangjong mó za, yhânggùng é matú le, a sê é za byu pé

* 8:12 Yer 31:31-34

* 9:5 Hkerubim gà é gi, byù su su, dusak su su dut é, dùng dap é maumang

lagyo rahú nghut lhê.

kut shut é marâ é matú le, nhông byi râ sui chùng mù, razàn má radàm za wang é nghut lhê. ⁸ Haù Chyoiyúng Woi-nyí gi, haù pé dông mai, sâng-hi é saksé zúm ru joq nyi nyi, haù Chyoiyúng Htâng é Jowò wàng hkyô a hpông shit shi é lé, tân shit nyi ri. ⁹ Haù gi, ipyat shi é matú tân shit é azông nghut mù, nhông byi é chyunghuq pé eq shigu hkungga pé gi, dojaú sù é i-myt lé a wó lhoq sân-yúng byi é hkyô lé taí nau é nghut lhê. ¹⁰ Haù pé gi, zojung, shuqjung eq chí san chí séng hking ahú hú eq za séng é nghut mù, htungli asik, lé joq é ahkyíng jé shoq za tô é gungsho eq séng é tarâ pé nghut ri.

Hkrisduq É Sui

¹¹ Hkrisduq gi, shi má joq to gù nghut é gè hkyô pé é hkyangjong mó dông lé jé é hkún, hpan tô é má a lom nghú nau é, byu èq saí é a nghut é, je kô é eq je gumjup é saksé zúm mai wang lai bê nghut lhê. ¹² Yhang gi, Chyoiyúng Htâng é Jowò má wang é hkún, bainám eq nojúng zo pé é sui lé chùng mù wang é a nghut é za, Yhâng é suí eq yhang banshoq é matú radàm za ahtum abyuq é hkyi yù hkyô wó yù bê nghut ri. ¹³ Htungli dông agot a-ù dut é bang lé lhoq sân-yúng râ matú, bainám eq nohtó zo pé é sui eq no-pyâ é myi-mhop lé, yhangmoq é ahtoq má hpyun gyun é hkún, yhangmoq gi, ahtoq gungsho pyâm wó lhoq sanséng é hui kô é nghut lhê. ¹⁴ Haù nghut jáng, Garai Gasâng é hí má ra a bo é Yhânggùng lé, ahtum abyuq é Woi-nyí dông mai nhông byi é Hkrisduq é sui gi, rú dui nyi é Garai Gasang lé nga-nhúng wó dojaú sháng gaq ga, shi é hkyô shut shuí jé é nyi yap sâmlai mai nga-nhúng é myit sôn sê é hkyô lé, je riyhang wó lhoq sanséng yu ri-nhung mhaí!

¹⁵ Haù nghut é yanmai, Hkrisduq gi, danggidiq byi tô é ahtum abyuq é muizè lé, ji yù huí é bang wó hap yù kó sháng gaq ga, dangshikaq asik é gyoro sô xoq byi sù nghut nyi ri.

Haù su wó kut é gi, sâng-hi lhê é dangshikaq ahkaù má mara kut shut é bang lé lhoq lhut yù râ matú, yubak chyín xap zê ralhum dông, Yhang shi hkám byi yanmai nghut ri.

¹⁶ Madat dang eq séng luí ga jang, madat dang taí sù haù shi bê hkyô saksé shit râ lhê. ¹⁷ Haí mù gà le, madat dang gi, rayuq yuq shi jáng za sheq lichyúm htoq é nghut lhê. Madat dang taí sù rú dui nyi nyi, haù gi, hkâ-nhám le lichyúm htoq râ a nghut. ¹⁸ Haù nghut é yanmai, sâng-hi lhê é dangshikaq lhang gi, sui a bo lòm jáng lichyúm a htoq é nghut lhê. ¹⁹ Mosheq gi, haù jep é tarâ má bo é hkunmó hkangmó lé, shiwa byù banshoq bang lé ban taí pyo é hkún, zam zam ne é saumaú eq jàm kyâng lé yù mù, nojúng zô é sui eq bainám sui eq wui nyhò tô é lé, chyúmding má le, shiwa byù banshoq bang lé le, hpyun gyùn é nghut ri. ²⁰ Yhang gi, "Sui shi gi, nungmoq cháng râ matú, Garai Gasang, hkunmó hkyô to bê nghut é, dangshikaq tô tô é sui nghut lhê."✧ ga taí ri. ²¹ Yhang gi, saksé zúm eq dojaú é má chung é zè pé má le, haù eq rajung za sui haù hpyùn gyùn ri. ²² Gè gè gi, haù jep é tarâ má bo é dông ga jang, azíng zê aluq banshoq gi, suí èq lhoq sân-yúng é hui râ dut é nghut mù, sui htoq hkyô a joq jáng, mara hkyut byi hkyô le joq é a nghut.

²³ Haù mù, mauhkúng zè pé é azông pé gi, hkungga haù pé èq lhoq sân-yúng é hui râ é nghut lhê. Nghut kôlhang, mauhkúng zè pé yhang gi, haù pé htoq je ge é hkungga pé èq lhoq sân-yúng é hui râ dut é nghut lhê. ²⁴ Hkâsu mù gà le, akying lhùm é azông za nghut é, byu èq saí é chyoiyúng dik é jowò má Hkrisduq wang é a nghut é za, Yhang gi, mauhkúng má yhang wang é nghut mù, ahkuí gi, nga-nhúng é matú Garai Gasâng é hí má bo yap byi nyi é nghut lhê. ²⁵ Yhang gi, haù hkyangjong mó mai yhumsíng é sui a nghut é sui lé chùng mù, Chyoiyúng Htâng é Jowò má zàn

✧ 9:20 Htoq Ló 24:8

wuì wàng luí kut é su, yhanggùng lé dum nhông byi byi kut râ matú mauhkông má wang é le a nghut. ²⁶ Haú dông ru nghut le gi, Hkrisduq gi, mau htoq xâng hkùn mai shí hkâm é adàm myo myo nghut berâ nghut lhê. Nghut kôlhang, ahkuí, Yhang gi, yubak mara huí sêng pyám byi râ matú, yhanggùng lé hkungga nhông byi râ ga ipyat pé ló htâng ló nyi é má, banshoq é matú radàm za htoq shit bê nghut ri. ²⁷ Byù gi, radá za shí râ nghut mù, hau htâng má tarâ jéyáng é hui râ nghut é eq rajung za, ²⁸ Hkrisduq gi, byù myo myô é yubak mara lé yu pyám byi râ matú, radá za hkungga nhông é hui bê nghut ri. Haú mù, Yhang gi, yubak mara wun pyám byi râ a nghut lo é za, Yhang lé lánng nyi é bang lé hkyi yù hkyô yu lé byi râ matú, htâng má í dâm nghú râ dàm htoq shit râ nghut lhê.

10

Hkrisduq É Gùng Lé, Banshoq É Matú Radàm Za Nhông Byi É Hkyô

¹ Haú jep é tarâ gi, jé lô râ nghut é gè hkyô pé é akyîng a nghut é za, wupzo za nghut ri. Haú nghut é yanmai, jep é tarâ gi, zàn wuì ru nhông byi byi kut nyi é eq rajung zâ é shigu hkungga pé dông mai, noqkuq râ matú chyâng lé é bang lé hkâ-nhám lé wó lhoq gumjup é a nghut. ² Tarâ haú wó lhoq gumjup byi é ru nghut le gi, yhangmoq nhông byi é hkyô nô pyám kó râ a nghut lí? Hkâsu mù gâ le, haú noqkuq é bang gi, banshoq é matú radàm za lhoq sanséng huí é nghut jáng, yhangmoq é yubak marâ é matú, hkâ-nhám le mara a bò bun lo kó râ nghut lhê. ³ Nghut kôlhang, shigu hkungga haú pé gi, zàn wuì yubak mara pé lé lhoq pun byi é zè nghut ri. ⁴ Haí mù gâ le, nohtó pé eq bainám pé é sui gi, yubak mara lé huí sêng pyám é hkyô wó dut é a nghut.

⁵ Haú mù luí, Hkrisduq, mingkan má lé jé é hkùn, Yhang taí é gi,

"Shigu hkungga eq hkungga lé Nàng a o é nghut mù,

Nàng kúm gi, Ngá é matú gungdu hen to byi bê nghut ri.

⁶ Myi nyhé hkungga pé eq mara hkyut hkungga pé gi, Nang lé gabú nhang é a nghut.

⁷ Hau htâng, Ngò gi, 'Garai Gasang é, Ngò eq séng luí chyúmding má kê tô é eq rajung za,

Nàng ô nau é hkyô kut râ matú, Ngò, shí má nyi lhê.' nghú taí é."☆

gâ ri. ⁸ Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haú pé lé Nàng a gabú é nghut lhê." ga taí ri. Haú jep é tarâ dông haú pé lé kut râ dut kôlhang taí é nghut ri. ⁹ Hau htâng má, Yhang gi, "Nàng ô nau é hkyô kut râ matú, Ngò, shí má nyi lhê." ga taí ri. Haú gi, Yhang, htang lhum dangshikaq lé htaí masat to râ matú, sâng-hi lhum lé tô pyám é nghut ri. ¹⁰ Myit ô naù hkyô hau é yanmai, Yesuq Hkrisduq, Yhâng é gungdu lé hkungga dông banshoq é matú radàm za nhông byi é dông mai, nga-nhúng gi, lhoq chyoiyúng é hui bê nghut ri. ¹¹ Hkyangjong hkangmó gi, nyí nyí bui bui, yap mù, yhâng é hkyangjong muzó lé zui saí é nghut lhê. Yhang gi, yubak mara lé hkâ-nhám lhang a wó huí séng pyám byi é, rajung zâ é shigu hkungga lé, dum nhông byi byi kut é nghut lhê. ¹² Nghut kôlhang, hkyangjong mó nghut é Hkrisduq gi, yubak mara hkyut byi râ hkungga ralhum lé za, ahkyíng banshoq é matú ban nhông byi é hkùn jáng, Garai Gasâng é loqyo hkyam shut zung to bê nghut ri. ¹³ Haú hkùn mai, Yhang gi, Yhâng é gyè pé lé, Yhâng é hkyi nang jang kut byi râ lé lánng nyi é nghut ri. ¹⁴ Haí mù gâ le, Yhang gi, lhoq chyoiyúng é huí nyi bang lé, hkungga ralhum eq za, pyat dedú é matú lhoq gumjup byi bê nghut ri.

☆ 10:7 Hkya-on 40:6-8

¹⁵ Haû Chyoiyúng Woi-nyí le, haû hkyô eq séng luí nga-nhúng lé saksé hkâm kyô ri. Sâng-hi má, Yhang taí é gi,

¹⁶ "Haû Yhumsíng taí ri, shí gi, ahkyíng haû laí htâng má, Ngò, yhangmoq eq to râ dangshikaq nghut lhê.

Ngò gi, Ngá é tarâ pé lé, yhangmoq é myit nhiklhum hkaû má kat byi mù, yhangmoq é i-myt má kâ to byi râ nghut lhê."☆

gâ ri. ¹⁷ Hau htâng, Yhang taí jat é gi, "Ngò gi, yhangmoq é yubak mara pé eq tarâ a chung é muzó pé lé, bûn lô râ a nghut."☆

gâ ri. ¹⁸ Haû mù, mara haû pé lé hkyut pyám byi bê nghut jáng, yubak marâ é matú hai hkungga le a ra lo nghut ri.

Hkam Jan Râ Hkyô

¹⁹ Haû mù luí, gumang wui ê, nga-nhúng gi, Yesuq é sú eq, haû Chyoiyúng Htâng é Jowò má wàng râ matú hkyak wó lum to bê nghut lhê. ²⁰ Haû gi, Yesuq é gungdu nghut é pán-gyang dông mai, nga-nhúng é matú hpóng byi bê nghut é asik eq rû dui nyi é hkyô nghut lhê. ²¹ Haû nghut é yanmai le, Garai Gasâng é yhúm lé up é gyaú é hkyangjong lé nga-nhúng wó é yanmai le, ²² nga-nhúng gi, gingtíng é lumjíng hkyô mai sanséng é i-myt èq, Garai Gasâng chyáng ê mù, mara bò bûn é myit sôn sé é hkyô mai, nga-nhúng lé lhoq sanséng râ matú nga-nhúng é i-myt lé hpyun gyûn é hui nhâng luí, nga-nhúng é gungdu gi, sânyúng wui èq chi byí é hui yù sháng.

²³ Nga-nhúng gi, nga-nhúng yín yu é myit myoqbyù hkyô lé zúí gingtíng nyi sháng; hkâsu mù gâ le, danggidiq byí to bê Sú gi, lhumzui Sú nghut lhê.

²⁴ Chyitdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaû toq byí lhum râ hkyô lé, dat myit nyi sháng. ²⁵ Chôm huí zup lhúm nyi é hkyô lé, ra-am lhaq tô pyâm nyi kô é su, nga-nhúng gi, a tô

pyâm é za, haû Buinyi chyâng lò bê nghut é lé nungmoq sé é eq rajung za, rayuq eq rayuq je riyhang myit wum byí lhúm nyi sháng.

²⁶ Nga-nhúng gi, tengmán hkyô lé sé yu é htâng má, shi-ngé ngé mara dum kut shut shut kut é nghut jáng, mara hkyut byi râ hkungga a joq lo.

²⁷ Tarâ jéyáng hkyô eq Garai Gasâng é gyè pé lé nyhê hkyô pyám râ nghut é nhikmo-yô é myi lé za, gyuq chiq myit mai láng nyi râ dut bê nghut lhê.

²⁸ Mosheq é tarâ lé he-ngik é sú ó yuq le, saksé í sum yuq é dâng é yanmai, shogyo nhikmyin a huí é za sat pyâm é hui bê nghut lhê. ²⁹ Haû jáng, Garai Gasâng é Yhangzo lé hkyiwa ô má nâng pyeq bê sú, yhumsíng lé lhoq sânyúng byi bê nghut é dangshikaq é sui lé a chyoiyúng é zè dông kut pyám bê sú eq, jeju byí é Woi-nyí lé rhoi é sú gi, hkâ-í yhang gyaú é mara dam byí é hui gíng râ nghut lhê nghû, nungmoq wó myit akô lhu?

³⁰ Hkâsu mù gâ le, "Lató hpuq râ gi, Ngò ru nghut lhê; Ngò lató hpuq râ."☆ ga le, "Haû Yhumsíng gi, Yhâng é byu pé lé tarâ jéyáng râ nghut lhê."☆ ga le, taí é Sú lé, nga-nhúng sé lhê. ³¹ Haû rû dui nyi sú Garai Gasâng é loq hkaû má byit gyó wang é gi, gyuq chiq jung yhang nghut ri.

³² Nungmoq, haû maubó lé hap yu é* htâng, wuîhke jamjau huí é má gyai yhang shikut kólú wó jân pyám bê nghut é, hí lhê buinyi pé lé myit bun keq. ³³ Ra-u u má, nungmoq gi, byu pé hí má de de rhoi shit é eq zing-rí é hui zo bekô nghut ri; ra-u u má, nungmoq gi, haû su hui zo bang eq rahá bo hui zo bekô nghut ri. ³⁴ Nungmoq yhang, je ge é eq ru gíng nyi é zè pé wó é lé sé kô é yanmai, nungmoq gi, htóng lúng bang lé shogyo nhikmyin bekô eq, nungmoq é sutzè pé lé sing yu pyám byí é bang lé, gabú myit eq jân pyám bekô nghut ri.

³⁵ Haû mù luí, nungmoq é hkyak myit lum tô é hkyô lé hkâdú pyám kó;

☆ 10:16 Yer 31:33 ☆ 10:17 Yer 31:34 ☆ 10:30 Tarâ Pun 32:35 ☆ 10:30 Tarâ Pun 32:36 * 10:32 Haû maubó lé hap yu é gâ é gi, gabú danglù lé sâng-hi wó hap yu é lé gâ lhê.

agùn agó chyunghuq shigyaú é hui kó rã nghut lhê. ³⁶ Nungmoq gi, Garai Gasâng é ô naù hkyô lé kut é hkûn, Yhâng danggidiq byi tô é lé wó hap yù rã matú, nungmoq hkam jan rã dut é nghut lhê. ³⁷ Hkâsu mù gâ le, razup zo nghut jáng,

"Haù lé lô rã Sù gi, jé lé rã nghut mù, ahkyíng lhoq myáng rã a nghut.

³⁸ Nghut kôlhang, Ngá é dingmán sù gi, lumjíng myit mai asak duì rã nghut lhê.

Yhang nungzut zut é nghut le gi, Ngò, Yhang lé myit nguì rã a nghut."*

ga tô ri. ³⁹ Nghut kôlhang, nga-nhúng gi, nungzut zut mù htên byoq huì é bang a nghut é za, lumjíng mù hkyi yù huì é bang ru nghut lhê.

11

Lumjíng Myit Mai

¹ Lumjíng myit ngu é gi, nga-nhúng myit myoqbyu tô é lé hkyak wó rã ngu é eq nga-nhúng a myàng shi é lé joq lhê nghû hkyak sê é hkyô nghut lhê. ² A-nham lhê bang gi, lumjíng myit haù mai Garaì eq owaq é hui kô é nghut lhê.

³ Lumjíng myit mai, nga-nhúng gi, nyi mi-nyi, joq mijoq lhunglhang lé Garai Gasâng é hkunmó eq hpan tô é hkyô sê gyô é nghut lhê. Haù mù, myoq eq wó myang é pé gi, byu-myang é pé mai saì htoq tô é a nghut.

⁴ Lumjíng myit mai, Abelaq gi, Ka-in kut é htoq je ge é hkungga, Garai Gasang lé nhông byi é nghut ri. Lumjíng myit mai, yhang gi, yhâng é hkungga eq séng luì Garai Gasang hkya-ôn é hkûn, dingmán sù rayuq dông owaq é hui bê nghut ri. Haù mù, lumjíng myit mai, yhang gi, shi byuq bê nghut kôlhang, dang rû nyo nyi ashî nghut lhê.

⁵ Lumjíng myit mai, Eruk gi, shi é a hui zo shoq, asak shi mai mauhkûng shut shuì yu é hui bê. Yhang lé, Garai Gasang shuì ló byuq bê nghut é yan-mai, yhang lé a wó myâng lo nghut

ri. Hkâsu mù gâ le, yhang gi, shuì yu é a hui shi é hí má, Garai Gasang lé nguì nhâng sù rayuq dông owaq é hui sù nghut ri. ⁶ Lumjíng myit a bo é nghut le gi, Garai Gasang lé a wó nguì nhang é nghut lhê. Haù mù gâ le, Yhâng chyáng shikut luì lé jé é sù gi, Yhang nyi é hkyô lé le, lhumzui myit mai Yhang lé hô bang lé, Yhâng eq shigyaú é lé le, lumjíng rã dut é nghut lhê.

⁷ Lumjíng myit mai, Noaq gi, a myang wú shi é hkyô pé eq séng luì sidiq byi huì é hkûn, yhâng é yhumbyù wuì lé hkyi rã matú, gyuq hkunggâ é dông mai wuì-sanghpo saì bê nghut ri. Yhâng é lumjíng myit mai, mingkan lé mara byi é nghut mù, lumjíng myit mai lo é dingmán hkyo é jeju lé hkam yù sù dut bê nghut ri.

⁸ Lumjíng myit mai, Abraham gi, yhâng é muizè dông, htâng má yhang hap yù rã nghut é, Garai Gasang byi é jowò shut e ló rã matú ji yu é huì é hkûn, jìno gyo mù, yhang hká shut e ló é a sé kôlhang, ê bê nghut ri. ⁹ Lumjíng myit mai, yhang gi, gó ming má nyi é byù bíng rayuq su, danggidiq byi tô é mau má nyi bê nghut ri. Yhang gi, zúm pé má lúng é nghut mù, rajung zâ é danggidiq é muizè lé hkam yu é Isak eq Yakup le, zúm pé má lúng bekô nghut ri. ¹⁰ Hkâsu mù gâ le, Abraham gi, Garai Gasâng eq azông hên mù saì tô é, gíng é apùn awang pé eq mu é myuq lé myit myoqbyu nyi é nghut ri.

¹¹ Lumjíng myit mai, Abraham gi, yhâng é asak ipyat laì ló byuq é eq, Sarah le baùdung nghut to kôlhang, haù danggidiq byi Sù, lhumzui sù nghut lhê ga myit sôn yu é yanmai, îwa rayuq wó dut é hui bê nghut ri.

¹² Haù mù luì, yhang gi, shi gùng dông nghut kôle, yhang rayuq mai lo é awut ashín pé gi, mauhkûng mâ é kyì pé eq wuimau yàm mâ é a ung nghap é semuì myhó myô lò bê nghut ri.

¹³ Byù haù bang banshoq gi, yhang-moq shi é hkûn jé shoq lumjíng myit

* 10:38 Hbk 2:3-4

mai asak dui nyi kô é nghut lhê. Yhangmoq gi, danggidiq byi tô é pé lé a hap yù kô nghut ri; nghut kôlhang, haú pé lé myàng za myàng kômù, we mai te yu akô. Yhangmoq gi, myidàm htoq má gó ming byu pé eq byù bíng pé nghut é lé yín yù bekô nghut ri. ¹⁴ Haú su yín yu é byu pé gi, yhangmoq yhumsing é ming lé ho nyi é bang nghut é lé tún shit é nghut akô. ¹⁵ Yhangmoq htoq lo é ming lé, yhangmoq myit tui nyi kô é ru nghut le gi, dum tau ló rá ahkáng wó kó rá nghut lhê. ¹⁶ Ahkuí kúm, yhangmoq gi, je ge é ming nghut é, mauhkûng mingdán lé myit tuí nyi akô nghut ri. Haú mù luí, Garai Gasang gi, yhangmoq é Garai Gasang nghu é hui rá lé a hoq é nghut lhê. Hkâsu mù gâ le, Yhang gi, yhangmoq é matú myuq ralhum lajâng to byi bê yanmai nghut ri.

¹⁷ Lumjín myit mai, Abraham gi, Garai Gasâng èq yhang lé chyam é hkûn, Isak lé hkungga ralhum dông nhông byi bê nghut ri. Haú gi, danggidiq pé lé hap yu to bê sù gi, yhang é yuqzo zote lé nhông byi rá dâ é nghut lhê. ¹⁸ Garai Gasang gi, "Isak dông mai lo é lé, náng é awut ashín nghu sôn byi rá nghut lhê."* ga yhang lé danggidiq byi to bê nghut kôle, yhang haú su kut é nghut ri. ¹⁹ Abraham gi, shi é mai Garai Gasang wó lhoq dui toq lhê ga myit yu ri. Taí sháng ga jáng, Isak lé, shi byuq bê mai, yhang dum wó hap yu é nghut ri.

²⁰ Lumjín myit mai, Isak gi, Yakup eq Eso nhik é htàngnùng lhê é matú, shimân byi bê nghut ri.

²¹ Lumjín myit mai, Yakup gi, yhang shi ló rá u má, Yosep é yhangzô nhik lé shimân byi mù, yhang é dumbáng-u má ngè luí, noqkuq bê nghut ri.

²² Lumjín myit mai, Yosep gi, yhang asak htâm ló rá u lé, Israelaq byu pé Egutuq ming mai htoq lò rá eq séng luí taí mù, yhang é showui pé eq

séng luí hkâsu kut rá hkyô lé pying to bê nghut ri.

²³ Lumjín myit mai, Mosheq é yhangnu eq yhangwâ nhik gi, yhang hku lé é htàng má, yhang lé lhamó sum hkyap haq to bekô nghut ri. Haí mù gâ le, yhangnhik gi, zoshâng haú yúng é myàng kômù, hkohkam é mungdang lé a gyuq kó nghut ri.*

²⁴ Lumjín myit mai, Mosheq gi, yhang kô lo é hkûn, Hpara-uq é byizô é yhangzo ga rá lé he-ngik pyâm ri. ²⁵ Yhang gi, yubak marâ é ngón hkyô má rayoq zo ngón kún rá malaí Garai Gasâng é byu pé eq rahá hpuzô é hui rá lé sheq hkyin yù bê nghut ri. ²⁶ Yhang gi, haú Hkrisduq é matú rhoí huí é lé, Egutuq ming mâ é sutzè htoq má je riyhang hpauđap lhê ga myit sôn yu ri. Haí mù gâ le, yhang gi, yhang é shigyaú chyunghuq lé myit myoqbyu nyi sù nghut ri. ²⁷ Lumjín myit mai, yhang gi, hkohkâm hpó nhikjum yô é lé a gyuq é za, Egutuq ming mai htoq lò byuq bê nghut ri. Yhang gi, myoq èq a wó myang é sù Garai lé wó myang é sù dông, hkam jân é nghut ri. ²⁸ Lumjín myit mai, yhang gi, haú zomún lé sat é maumang lagyô èq Israelaq byu pé é zomún lé a wó záng sháng gaq ga, Lhoqlhai Poí eq sui hpyûn é hkyô le kut hî bê nghut ri.

²⁹ Lumjín myit mai, haú shiwa byu pé gi, Nhông Nè lé kyuq huí é myigùng htoq mai su laí byit bekô nghut ri; nghut kôlhang, Egutuq byu pé le, haú dông laí shikut wú kô é hkûn, yhangmoq gi, myup shi byuq bekô nghut ri.

³⁰ Lumjín myit mai, shiwa byu pé, Yeriho myuq xêwâm lé nyhit nyí sô lhing é htàng má, xêwâm haú leq gyop byuq bê nghut ri.

³¹ Lumjín myit mai, shiwa myhí Rahap gi, haú Israelaq jó wú bang lé nguingón é eq lhom hkulum yu é yanmai, jìno a gyo bang eq rahá sat pyâm é a huí é nghut lhê.

* 11:18 Apûn 21:12 * 11:23 Haú-u lé, hkohkâm hpó gi, Israelaq pé é yuqzo zonú wuí lé sat pyâm rá hkunmó hkyô tô é nghut lhê.

³² Haû htoq lai luî, ngò haî taî jat ra shirâ l hú? Gidon, Barak, Samson, Yephtha, Dawiq, Samuelaq pé eq myiqhtoî pé é hkyô lé taî râ ahkyíng ngò a wó. ³³ Haú bang gi, lumjíng myit mai mingdán pé lé wó zân ung yù bekô, tengmán hkyô lé chung jai bekô, danggidiq byî to bê lé wó hap yù bekô, hkanghkyi pé é nhut lé wó myhî pyám bekô, ³⁴ myiduq myishâm lé wó sat pyám bekô, shamsó mai le wó h pang lut bekô nghut ri. Yhangmoq é wum nyhóm hkyô gi, wum taû bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyè pé lé wó ung pyám kô é nghut lhê. ³⁵ Myiwe wui gi, yhangmoq eq sêng é shi byuq bê bang asak dum lhoq tuî huî é lé, wó yù bekô nghut ri. Góbang gi, je ge é dui toq hkyô wó yû kó sháng gaq ga, lhoq lhut é hui râ lé he-ngik pyám kômù, zing-rî é gyai yhang hui zo bekô nghut ri. ³⁶ Ra-am gi, wuizui kut pyám byî é eq nhuq bat é hui bekô, góbang gi, shamtoq kyum hut huî é eq htóng lhûng é hui bekô nghut ri. ³⁷ Yhangmoq gi, luqgok eq dú sat é, í tím dut shoq yik hpyit é, sham èq sat pyâm é hui bekô nghut ri. Yhangmoq gi, sau-kuq eq bainám-kuq wut mù, htot lhing wún luî, myung kyuq é, zing-rî é eq rhoi pyâm é hui bekô nghut ri. ³⁸ Yhangmoq lhumzui nyi kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqhkyûng pé eq myìdong pé má nyi lhing wún bekô nghut ri.

³⁹ Haú bang banshoq gi, yhangmoq é lumjíng myit é yanmai, owaq é hui bê nghut kôle, yhangmoq ó yuq le, danggidiq byî tô é lé a myang hkam yù kó nghut ri. ⁴⁰ Haî mù gâ le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajâng to byi bê nghut ri.

☆ 12:6 Sânghkyang 3:11-12

12

Garai Gasang, Zo Wuî Lé Mhoqshit É Hkyô

¹ Haû mù luî, nga-nhúng gi, haû myhó é saksé pé mhutdûm su nga-nhúng é lhîngkyuq má joq to bê nghut é yanmai, nga-nhúng lé hkâm tang é hkyô pé jung hkangmó eq, lui za lhoq nhúng byî é yubak mara lé dú pyám mù, nga-nhúng din râ matú tô tô é hkyô lé, hkam jan luî din e ló sháng. ² Nga-nhúng gi, nga-nhúng é lumjíng hkyo é apûn awang lé hî sù eq lhoq gumjup byi sù nghut é Yesuq lé wú tsuq nyî sháng. Yhang gi, Yhâng é hí má joq tô é gabú hkyo é yanmai, hoq hpû é hkyô lé haî su a ngam é za, tapzîng má shî hkâm é hkyô lé jân pyám luî, Garai Gasâng é hkohkâm-tanghkuq é loqyo hkyam shut zung to bê nghut ri. ³ Nungmoq gi, a ngu byuq râ eq myit wum a gyui byuq kó sháng gaq, yubak dap bâng chyáng mai haû su htuq htîng é hkyô lé jân pyâm é Yesuq chyáng mai myit wum yù keq.

⁴ Nungmoq gi, yubak mara lé htuq htîng shikut é hkyô má, nungmoq é sui shun pyám shoq yhang a kut shi kó nghut ri. ⁵ Hau htoq agó, nungmoq gi, zo wuî lé dông Garai Gasang nungmoq lé wum byî é dang lé tô-myhî pyám bekô l hú? Wum byi dang haû gi,

"Ngá zo ê, haû Yhumsîng mhoqshit é hkyô lé agya alhá hkâkut pyám, Yhang, nang lé tân é hkûn, myit wum hkâgyui,

⁶ haî mù gâ le, haû Yhumsîng gi, Yhang chyitdap é bang lé mhoqshit mù, zo rayuq lé dông,

Yhang hap yu é bang yuq hkangmó lé dam byî é nghut lhê."☆

gâ é nghut ri.

⁷ Mhoqshit huî é hkyô má, wuîhkê é lé hkam jan keq. Garai Gasang gi, nungmoq lé, zo wuî lé dông kut é ru nghut lhê. Hkâsu mù gâ le, yhumsîng é yhângwâ èq a mhoq é zo gi, ó wá nyi lhê l hú? ⁸ Nungmoq gi, yuq hkangmó

huí lai é mhoqshit hkyô lé, a hui kô é nghut jáng, dezô pé dông nghut byuq mù, zo sîng wuì a nghut lo kó. ⁹ Nga-nhúng banshoq bang gi, nga-nhúng lé mhoqshit é xângzo îwâ pé wó é bang chyat nghut mù, yhangmoq lé hkunggâ é nghut lhê. Haû nghut jáng, je riyhang, nga-nhúng é woi-nyí eq sêng é Îwâ é a-ô má nyi mù, asak dui râ dut ri myhi-nhung! ¹⁰ Nga-nhúng é xângzo îwâ pé gi, yhangmoq je ge dik bûn é lé, nga-nhúng lé rayoq zo mhoqshit é nghut ri. Nghut kôlháng, Garai Gasang gi, Yhâng é chyoiyúng hkyô má nga-nhúng wó bo lòm shoq, nga-nhúng é gè hkyô é matú, nga-nhúng lé mhoqshit ri. ¹¹ Mhoqshit é hkyô hkangmó gi, mhoqshit u lé ngón hkyô a nghut é za, nò hkâm hkyô nghut nyi ri. Nghut kôle, mhoqshit hkyô haû lé hkam yù bê bâng é matú gi, htâng má, nguingón hkyô eq dingmán hkyô é ashi lhoq htoq byi ri.

¹² Haû mù luí, myûng byuq é nungmoq é loq pé eq wum nyhôm byuq é nungmoq é hkyihput pé lé wum-o lhoq kîng keq. ¹³ Hkyî hten bang a wó sô é a dut shoq, lhoq gè byí é wó hui kó sháng gaq, nungmoq so râ matú, hkyô lhoq nyhang nyi keq.

Garai Lé He-ngik Bang Dàm Byi Hui Râ Hkyô

¹⁴ Byù banshoq bang eq nguingón shoq nyi râ eq chyoiyúng râ matú wó dut é í shikut keq. Hkâsu mù gâ le, ó yuq le, chyoiyúng hkyô a bo é gi, haû Yhumsîng lé myàng râ a nghut. ¹⁵ Ó yuq le, Garai Gasâng jeju lé a tô pyám râ matú, sidiq keq. Haû, yuq htoq lô mù, wuîhke hkyô lhoq htoq é eq byù myo myo lé agot a-û dut nhang é nui hko su, ó yuq lé le hkâdut nhâng kó. ¹⁶ Ó yuq le, ashop é dông gungsho zùm yap é hkyô nghut nghut, zang radún é matú, yhang wó tô é yuqzo zomún muizè ahko ahkáng lé ung zô pyâm é, Garai a lom é Eso su nghut nghut, a

kut râ matú sidiq keq. ¹⁷ Nungmoq sê é eq rajung za, Eso gi, htâng má, shimân jeju haû lé hkam yù nau é hkûn, he-ngik pyâm é hui bê. Yhang gi, shimân jeju haû lé ngaubyi ngau-nhap eq hô kôlháng, yhang kut é hkyô lé a wó htaí byi lo nghut ri.

¹⁸ Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyî dut é eq laidun lo é má le, ¹⁹ tut htê mying é eq, dang taí htê mying é má le, a jé ê kó nghut ri. Dang htê haû lé wó gyô é bang gi, yhangmoq lé, dang a taí jat lo râ matú dung tôngbán akô nghut ri. ²⁰ Haû mù gâ le, yhangmoq gi, "Bùm haû má dusak pé záng jáng lháng, luqgok eq dú sat râ dut lhê."* ga Garai Gasang hkyô tô é hkunmó lé a wó hkâm kô é yanmai nghut ri. ²¹ Haû byu-myàng hkyô gi, lûm wú gyuq hpo dut é yanmai, Mosheq lháng gi, "Ngò, gyuq nán ri."* ga taí é nghut ri.

²² Nghut kôlháng, nungmoq gi, Zi-un Bùm eq rû dui nyi é Garai Gasâng é myuq nghut é mauhkûng Yerusalem má, maumang lagyô pé ajùm ayò gabú ratung zup zîng é jang eq, ²³ mauhkûng htoq má mying kâ to huí é, zomún pé é noqkuq hpúng joq jang má, jé lé bekô nghut ri. Haû mù, nungmoq gi, byù banshoq é tarâ agyì nghut sù Garai Gasâng chyáng le, lhoq gumjup huí é dingmán bâng é woi-nyí pé chyáng le, ²⁴ dangshikaq asik é gyoro so sù Yesuq chyáng le, Abelaq é sui htoq má je ge é danglù taí é, hpyûn gyûn é sui má le, jé lé é nghut bekô.*

²⁵ Nungmoq gi, dang nyô Sû lé a gyo a kut râ matú, sidiq keq. Myidàm htoq má sidiq byí é sù lé he-ngik pyâm é bang, a lut kô é nghut lhê. Haû mù, mauhkûng mai nga-nhúng lé sidiq byí é Su chyáng mai, nga-nhúng lhing ló byuq é ru nghut le gi, je riyhang nga-nhúng a wó lut râ a nghut kó lhí? ²⁶ Haû Garaí dang taí é u má, Yhâng é htê gi, mingkan lé lhoq nhûn kat

* 12:20 Htoq Lô 19:12-13 * 12:21 Tarâ Pun 9:19 * 12:24 Abelaq lé gi, yhangmang Ka-in eq sat é nghut luí, yhâng é sui gi, lató-hpuq râ matú nghut ri; nghut kôlháng, Hkrisduq é sui kúm gi, hkyi yù hkyô lajang byi ri. * 12:26 Hagi 2:6

ri, ahkuî kúm gi, "Ngò, mingkan lé za a nghut, mauhkûng pé lé le radàm dum lhoq nhún râ nghut lhê."* ga Yhang danggidiq byî to bê nghut ri. ²⁷ "Radàm dum" gâ é dang gi, haû a wó lhoq nhún é pé wó myit to sháng gaq ga, hpan to huí é zè pé nghut é, wó lhoq nhún é pé lé huí sêng pyám râ lé gâ é nghut lhê.

²⁸ Haû mù luí, nga-nhúng gi, a wó lhoq nhún é mingdán lé hap yu to bê nghut mù, jeju bun luí, hpautap é eq gyuq hkunggâ é myit mai Garai Gasang hap yù gíng é dông noqkuq sháng. ²⁹ Hkâsu mù gâ le, nga-nhúng é "Garai Gasang gi, nyhê jôm é myi nghut ri".*

13

Ló Htáng Má Lhoq Pun Kyîng É Hkyô

¹ Rayuq eq rayuq, gumang yhangchang dông chyitdap lhûm nyi keq. ² Byù bíng pé lé hkulûm râ hkâtô-myhí kó, hkâsu mù gâ le, ra-am gi, haû su kut nyi kô é yanmai, a sê é za maumang lagyô pé lé hkulum záng bekô nghut ri. ³ Nungmoq gi, htóng lúng bang eq rahá htóng lúng luzúm wuî dông, htóng lúng bang lé le, nungmoq yhang jamjau hui zô nyi é dông, hpuzô é bang lé le, myit bun keq.

⁴ Myiháng hkyô gi, lhunglhang bâng eq hpautap é hui râ dut é nghut mù, myiháng yhuphpú gi, sân-yúng râ dut lhê. Hkâsu mù gâ le, Garai Gasang gi, su-myi sulàng lú é bang eq ashop é dông gungsho zùm yap é bang banshoq lé jéyáng râ nghut lhê. ⁵ Nungmoq é asak duí hkyô má, ngùn lé chyitdap é myit tô pyám mù, nungmoq wó é lé nhik dik nyi keq, haî mù gâ le, Garai Gasang gi,

"Hkâ-nhám le, Ngò, nàng eq a gang râ; hkâ-nhám le, Ngò, nang lé a tô pyám râ."*

ga taî é nghut lhê. ⁶ Haû mù, nga-nhúng gi, hkyak lum é myit mai,

"Haû Yhumsîng gi, ngo lé garúm sù nghut lhê yanmai, ngò, gyuq râ a nghut. Ó yuq wá, ngo lé haî wó kut râ lú?"* nghu taî é nghut lhê.

⁷ Nungmoq lé Garai Gasâng é mungdang taî kyô é, nungmoq é hkyô-u shê bang lé, myit bun keq. Yhangmoq asak htum shoq nyi lai lo é sâmlai lé myit wú mù, yhangmoq é lumjîng myit lé alik kut yù keq. ⁸ Yesuq Hkrisduq gi, a-nyí nap, hkû-nyí, htângnùng pyat dedu rajung za nghut nyi ri.

⁹ Maú nhô zâ é mhoqshit hkyô ajung jung maî eq shuí nghoq huí é bang hkâdut kó. Zo bang lé hai akyû a byî é, htûngli zoshuq eq a nghut é za, Garaî jejú eq nga-nhúng é myit nhiklum lé wum-o lhoq kîng yu é gi, gè hkyô nghut lhê. ¹⁰ Nga-nhúng gi, saksé zúm má dojaú é hkyangjong pé zo râ ahkáng a wó é hkungga gyap ralhum wó é nghut lhê.

¹¹ Haû hkyangjong mó gi, dusak pé é sui lé, yubak mara hkungga dông Chyoiyúng Htâng é Jowò má yu wang ri; nghut kôlhang, gungsho pé lé gi, byù nyi jowò shinggan má nyhê hkyô pyám ri. ¹² Haû eq rajung za, Yesuq le, Yhâng é sui dông mai byu pé lé wó lhoq chyoyúng râ matú, myuq hkum shinggan má jamjau hpuzo mù shî hkám bê nghut ri. ¹³ Haû mù luí, nga-nhúng gi, byù nyi jowò shinggan má Yhâng chyáng é mù, Yhang hui zô é rhoi hkyô lé é bo hui zo sháng. ¹⁴ Hkâsu mù gâ le, nga-nhúng gi, mingkan shî má ru gîng nyi é myuq wó bang a nghut é za, jé lé lô râ myuq lé ho nyi é bang ru nghut lhê.

¹⁵ Haû mù luí, nga-nhúng gi, Garai Gasâng é myîng lé yín yu é nhutwui é ashi nghut é, hkyá-on hkungga lé, Yesuq dông mai, Garai Gasâng chyáng xoq xoq nhông byî nyi sháng. ¹⁶ Ge é hkyô kut râ eq góbang lé shuí gam chûng râ hkyô lé, hkâtô-myhí kó; hkâsu mù gâ le, Garai Gasang gi, haû sù é hkungga pé lé ô ngui nyi ri.

¹⁷ Nungmoq é hkyô-u shê bâng é jìno gyo mù, yhangmoq é ahko ahkáng ô má nyì keq. Yhangmoq gi, jihpán shit râ dut é bang đông mai nungmoq lé upzúng nyi é nghut lhê. Yhangmoq é muzó pé gi, nungmoq é matú akyû a bo é wòlai a dut é za, gabú hkyô ralhum wó dut sháng gaq, yhangmoq é jìno gyô nyì keq.

¹⁸ Ngamoq é matú kyûdung byi kó laq. Ngamoq gi, sân-yúng é myit sôn sê é hkyô wó mù, hkyô hkangmó má ge é đông asak duì râ lé ô nau lhê nghû, hkyak wó myit ri. ¹⁹ Ngò gi, nungmoq chyáng hân za wó dum jé sháng gaq, hau é matú je riyhang kyûdung byi keq nghû wum taì tsuq kat lhê.

²⁰ Sau hpúng pê é sau zúng Sû mó nghut é, nga-nhông é Yhumsing Yesuq lé, haù ahtum abyuq é dangshikaq é sui đông, shî bê mai dum lhoq dui toq é sù, ngingón hkyo é Garai Gasang gi, ²¹ Yhang ô nau é hkyô kut râ matú ge é hkyô jung hkangmó nungmoq lé lhoq gumjup byi mù, Yesuq Hkrisduq đông mai Yhang lé gabú nhang é hkyô lé, nga-nhông chyáng kut nyì sháng gaq. Hpungwup shingkang gi, Yesuq Hkrisduq chyáng pyat dedu ahtum abyuq ru joq nyì sháng gaq. Amen.

²² Gumang wuì ê, ngò lhoq pùn kyîng é dang lé nungmoq wó hkam jan kó sháng gaq nghû, wum taì tsuq kat lhê; hkâsu mù gâ le, ngò gi, nungmoq lé, laiká ratot za kê kat é nghut lhê.

²³ Ngò gi, nga-nhông é gumang Tim-ohti lhoq lhut kat é hui bê hkyô lé, nungmoq lé sé nhâng nau ri. Yhang shî má myap jé lé é nghut le gi, ngò, yhang eq rahá nungmoq lé, lé hui rá nghut lhê.

²⁴ Nungmoq lé shui-u bang ban-shoq eq Garai Gasâng é byu pé ban-shoq lé bo shi-kyâm byi keq. Itali ming mâ é gumang wuì gi, nungmoq lé shi-kyâm kat akò nghut ri.

²⁵ Jeju gi, nungmoq banshoq bâng chyáng ru joq nyì sháng gaq ô.

YAKUQ Hun Kat é Laiká (James)

¹ Garai Gasang eq Yhumsing Yesuq Hkrisduq é jùn, ngò Yakuq gi, byo myín tô é Israelaq raxe í myû lé, ngu-ingón dang shit kyô kat lhê.

Lumjîng Myit Lé Chyam É Hkyô Eq Hpaqchyî Byéng-yá

² Ngá gumang wui ê, nungmoq é lumjîng myit lé chyam wú é hui jáng, shikut shirâng sê é myit jat nyi é lé, nungmoq sê nyi lhê nghut mù, ³ wuîhke jamjau ajung jung lé htung huí é hkûn, gaù jowò mó nghut nyi lhê nghû luí myit yù keq. ⁴ Hau htoq agó, nungmoq banshoq gúm gumjup jup dut mù luí, haí le a langhpyut shoq, shikut shirang é myit gi, yhumsing kut nyi é muzó lé wó lhoq gumjup nyi sháng gaq. ⁵ Nungmoq má rayuq yuq hpaqchyî byéng-yá langhpyut tô é nghut le gi, haù banshoq bang lé, mara a hun é za, agùn agó byi nyi é Garai Gasang chyáng dúng nyi sháng gaq, haù jáng, Garai gi, yhang lé byi rá nghut lhê. ⁶ Nghut kôlhang, lum shut é myit a bo é za, lumjîng é myit èq dúng nyi sháng gaq, hkâsu mù gâ le, lum shut é sù gi, laidûn èq hik luí toq lo é nhông má é wuîhêng eq wui nyi ri. ⁷ Haù yuq gi, Yhumsing Garaí chyáng má é haí le wó yû rá su a ngam nyi sháng gaq. ⁸ Yhang gi, myit-kó xan sù nghut luí, yhang é hkyô hkat hkanmó má, mù htang a nyang é sù nghut nyi ri.

Myùng Sù Eq Wó Sù

⁹ Myung é gumang hpó gi, waq toq huí é má, wó sù gi, lhoq nyhûm huí é má, gabú gumrong nyi sháng gaq. ¹⁰ Hkâsu mù gâ le, wó sù gi, wàhu banbó su woí byuq ló rá nghut lhê. ¹¹ Bui gi, nyé é lai èq toq lô jáng, haù wàhu nyhuí byuq ló mù, abó le yoq gyó byuq é eq, hau é yúng sâm pé

gi, htên byuq é su; wó sù le haù eq rajung za, yhang kut nyi é muzó má woí byuq ló rá nghut lhê.

Gunglaú É Hkyô

¹² Wuîhke jamjau huí le, wó shikut shirang nyi sù gi, hkungsô wó nyi ri; hkâsu mù gâ le, chyam wú é ban hui jáng, yhang gi, Garai Gasang lé chyitdap é bang lé, byi tô é danggidiq asak janmaù lé, wó yû rá nghut lhê.

¹³ Gunglaú huí é sù ó yuq nghut kôlhang, gunglaú huí é hkûn lé, "Garai Gasang, ngo lé gunglaú nyi ri." nghû luí, a taí sháng gaq, hkâsu mù gâ le, agè ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú rá a nghut. ¹⁴ Nghut kôlhang, ó yuq nghut le le, yhumsing é gungsho ô nau é dông, shuí láng nghoq ló é nghut le gi, agúng alaú hui bê. ¹⁵ Gungsho ô nau é hkyô kúm gi, zogûng dut jáng, mara lé hku htoq lo ri. Mara kô dîng jáng, shi é má jé rá nghut lhê.

¹⁶ Ngò chyitdap é gumang wui ê, i-myt hkyô nghoq hkâ-nghoq nyi kó. ¹⁷ Gè réng é eq byíng jup é chyunghuq lhunglhang gi, ahtoq shut má é nghut mù luí, maubó gung pé* é Yhângwa Garaí chyáng mai gyó lo é nghut ri. Yhang gi, ahpuq alik atau ahû dut é buishûm su dut rá a nghut. ¹⁸ Yhang hpan tô é amyú pé má, nga-nhúng gi, sâng-hi myhîng é ashi pé dut lo sháng gaq ga, Yhang gi, Yhang ô nau é hkyô cháng luí, haù tengmán é mungdang mai, nga-nhúng lé hkû to bê nghut ri.

Gyo Yu É Eq Cháng Kut É Hkyô

¹⁹ Ngò chyitdap é gumang wui ê, shí hkyô lé nungmoq sê nyi akô. Byù ó yuq nghut kôlhang, gyô yù rá lé han nyi sháng; dang taí rá lé a hân sháng gaq; nhik-yo rá lé le hkâhân kó. ²⁰ Hkâsu mù gâ le, byù nhik-yô é hkyô gi, Garai Gasang ô nau é dîngmán é dông asak dui hkyô wó lhoq htoq rá a nghut. ²¹ Haù mù luí, achayq achyut é banshoq eq ladu lai agè ashop é pé

* 1:17 Maubó gung pé gâ é gi, bui, kyî, lhamó lé gâ lhê.

lé lhoq san lhoq sêng pyám luí, nungmoq é i-myt lé wó hkyi yù râ matú, i-myt unghkaû má Garai Gasang hô tô é mungdang lé, nú-nhâm é myit eq hkam yu nyi keq.

²² Nungmoq gi, yhumsing gùng lé a mhaû pyám sháng gaq, haû mungdang lé wó gyô yu é bang za a nghut, haû đông châng kut é bang le nghut nyi sháng gaq. ²³ Mungdang haû lé wó gyô yù mù, a châng kut é sù ó yuq le, yhumsing é gungdu lé myoqjàm má wú sù eq wuí ri. ²⁴ Yhang gi, yhang é gungdu lé wú yù mù, myoqdong lhik é eq, yhumsing gungdu hkâsu dut é lé tô-myhî pyâm ri. ²⁵ Nga-nhúng lé wó lhoq lhut yu é gumjup é tarâ má, rago za wú tsuq nyi sù kúm gi, wó gyô yù mù tô-myhî pyâm é sù a nghut, muzó eq tân shit é sù nghut é yanmai, haû yuq gi, yhang châng kut é muzó má shimân jeju wó râ nghut lhê.

²⁶ Byù rayuq yuq, "Ngò gi, noqkuq htông lé lhoq dik sù nghut lhê." ga luí, myit to kôlhang, yhumsing nhut shô lé a wó hkâng mù, yhumsing myit lé mhaû pyâm é nghut le gi, haû yuq é noqkuq htông gi, akôm za nghut nyi ri. ²⁷ Íwa Garai Gasâng é hí má sansêng é eq, râ é hkyô a bo é noqkuq htông gi, wúhke jamjau huí é chuimó chuizó pé lé, châng wú garúm é hkyô eq, mingkan htoq mâ é achâq achyut é hkyô lé koi pyâm é hkyô nghut ri.

2

Myoqdong A Wó Hkyin Lhum

¹ Ngá é gumang wuí ê, hpungwup shing kang bo é nga-nhúng é Yhumsing Yesuq Hkrisduq lé lumjینگ hkyô má, byu é myoqdong lé hkâhkyin lhum kó. ² Dangké, hing loqchyop chyop luí, réng é mebu wut é sù rayuq eq ajeq amyha é mebu wut é asho awuí é sù rayuq gi, nungmoq é tarajong má wang lò kô é nghut le, ³ haû réng é mebu wut é sù lé, nungmoq lhom wú mù je hkunggâ é eq, "Shí aróng wó é jowò má zùng

aq." dum, haû asho awuí é sù lé nghut jáng gi, "Mhó má yap to aq." haû su a nghut jáng, "Ngá é hkyi htông má zùng aq." ga taí kô é nghut le gi, ⁴ nungmoq rayuq eq rayuq gamhkuí lhum luí, a ge é i-myt eq doqdân é bang dut lò bekô a nghut kó lhú?

⁵ Ngò chyitdap é gumang wuí ê, gyô yù keq, lumjینگ hkyô má wó sùt nyi luí, gidiq tô tô é mingdán é silí wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq mâ é asho awuí é bang lé hkyin yù bê a nghut kó lhú?

⁶ Nungmoq kúm gi, asho awuí é sù lé a hpau a yùm kut pyám bekô nhung; wó bang sùt bang kúm gi, nungmoq lé zik zo mù luí, yhumsing é loq eq yhang, tarâ tingnyâng shut she hkyut lò bekô, a nghut kó lhú? ⁷ Nungmoq eq sêng é kô dik é mying lé lhang, yhangmoq yhang rhoi dang taí bum akô, a nghut kó lhú?

⁸ Haû mù luí, Chyúmdang má, "Náng gung lé náng chyitdap é su, náng é chyangnâm mâ é bang lé le chyitdap aq."* ga luí, taí tô é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyi bê. ⁹ Nghut kôlhang, byu é myoqdong lé nungmoq hkyin nyi kô é nghut le gi, nungmoq mara kut nyi gú nghut bê yanmai, haû tarâ lé shut é bang lé su tarâ jéyáng é huí nyi bekô râ nghut lhê. ¹⁰ Byù ó yuq nghut le le tarâ banshoq lé châng kôlhang, haû mâ é ralhum lhum lé shut pyám jáng gi, tarâ banshoq lé shut pyám sù dut byuq râ nghut lhê. ¹¹ Hkâsu mù gâ le, "Su-myi sulàng hkâlú."* ga luí, hkang tô é sù gi, "Byù lé hkâsat."* ga luí le, taí tô ashí. Náng su-myi sulàng a lú kôlhang, byù sat é sù nghut le gi, tarâ lé shut é sù nghut bê.

¹² Haû su mù luí, nungmoq lé lhoq lhut kat é tarâ đông jéyáng doqdân é hui râ bang su, ru taí nyi keq; ru châng kut nyi keq. ¹³ Hkâsu mù gâ le, shogyo myit a bò sù gi, a shogyô é đông jéyáng doqdân é hui râ nghut

lhê. Shogyo nhikmyîn é hkyô kúm gi, jéyáng doqdân é hkyô lé wó ông lut râ nghut lhê.

Lumjǐng Myit Eq Zui Saí É Hkyô

¹⁴ Ngá gumang wui ê, byù rayuq yuq, "Ngò gi, lumjǐng myit bo lhê." ga taí nyi kôlhang, muzó a bo lom é nghut le gi, haí akyû bò râ lhú? Lumjǐng myit haú gi, yhang lé wó hkyi yù râ lhú? ¹⁵ Gumang, gu-nhá rayuq yuq a chîn dut nyi é eq, nyi wui é zoshuq langhpyut tô é nghut le, ¹⁶ nungmoq chyáng má é rayuq yuq gi, yhangmoq é gungsho má râ é hkyô haí le a byí é za, yhangmoq lé, "Nungmoq wut é gùng lúm sháng gaq, zô é ùng gyi sháng gaq, ngui ngui ngón ngón ló keq." ga taí é nghut le gi, hai akyû bò kó râ lhú? ¹⁷ Haú eq rajung za, lumjǐng myit má muzó a bo é nghut le gi, shi é eq rajung za nghut nyi ri.

¹⁸ Dum rahkyô gi, "Nàng gi, lumjǐng myit bo ri, ngò gi, muzo bo lhê. Muzó a bo é náng é lumjǐng myit ngo lé tûn shit wú aq, haú hkûn, ngá muzó èq ngá lumjǐng myit lé, nang lé ngò tûn shit râ nghut lhê." ga luí, rayuq yuq taí râ nghut lhê. ¹⁹ Garai Gasang rayuq za nghut é lé nàng lumjǐng ri-nhung! Nghut bê, haú gi, jô é hkyô nghut nyi ri, nat gâng pé le haú su yhang lumjǐng mù gyuq nán nyi akô nghut ri.

²⁰ Kyoq a bo é byù bam ê, lumjǐng myit má muzó a bo le akôm za nghut é hkyô lé, nàng sé nau lhê a nghut lhú? ²¹ Nga-nhung é Íwa Abraham gi, hkungga gyap htoq má yhangzo Isak lé shigu hkungga kut é hkûn lé, zui saí é muzó mai dingmán é sù gâ é lé wó yû bê a nghut lhú? ²² Haú mù luí, yhang é lumjǐng myit gi, yhang é muzó eq rahá za e ló é yanmai, lumjǐng myit gi, jup byíng lo é lé, nàng wó myâng bê nghut ri. ²³ Haú su mù, "Abraham gi, Garai Gasang lé lumjǐng é nghut mù luí, yhang lé dingmán sù ga són byi bê." ✧ ga luí, kê tô é Chyúmdang gi, dik to bê. Dum, yhang lé Garai Gasâng é

buinùm hpó ga luí le myhíng byi bê. ²⁴ Haú mù luí, byù gi, lumjǐng é myit èq baú za a nghut, zui saí é muzó èq mara hkyut san byi huí é lé, nungmoq bûn sê nyi akô.

²⁵ Haú eq rajung za, Rahap gâ é shiwa myhí gi, jowú su nhik lé lhom te yù mù luí, hkyô gó hkat dông nhang kat pyâm é hkûn le, yhang zui saí é muzó mai dingmán é sù gâ é wó yû bê a nghut lhú? ²⁶ Haú su mù, gungdu má woi-nyí a bo le gi, shi é eq rajung za, haú lumjǐng myit má muzó jizó a bo le gi, shi gû nghut bê nghut ri.

3

Mhé Wuí É Shô

¹ Ngá é gumang wui ê, byù myo myo sará hkâkut naú kó. Hkâsu mù gâ le, ngamoq sê é eq rajung za, sará pé gi, je riyhang htan é dông jéyáng doqdân é hui zo râ nghut lhê. ² Nga-nhung banshoq bang gi, hkyô myo myo má myit lingbat é bang chyat nghut ri. Byù rayuq yuq dâng èq a lingbat é nghut le gi, yhang gi, jup byíng sù eq yhumsing é gùng lé wó hkgang é sù nghut ri.

³ Nga-nhung myang lé nhutkyáng kyáng byi jáng, myang hau é gungdu gón lé, nga-nhung ô nau é dông wó cháng nhang lhê. ⁴ Haú mai gotû, wui-sanghpo pé lé wú wú keq, haú-í kô é sanghpo lé htan é laidûn èq mut é hui kôlhang, sanghpo hkâng sù gi, gyai tiq é sanghpo shap èq za, yhang ô nau é dông, haú pé lé wó hkgang yu ri. ⁵ Haú eq rajung za, shô gi, tiq é gungsho za nghut kôlhang, gyai gumrông nghutbûn nyi ri; wú keq, tiq dik é myizik zo gi, yoso mhanpúng mó lé wó nyé gyó nhang ri-nhung. ⁶ Shô haú gi, myi eq wui nyi ri. Nga-nhung é gungsho má, shô haú gi, agè ashop é mingkan dut lò mù, nga-nhung é gungsho asak lé achaq achyut dut nhâng luí, gungsho asak lé nyhê tuq kat ri. Haú gi, ngaraí myí èq nyhê tuq kat é nghut bê.

⁷ Dusak ajung jung, nghoq ahú hú, myi má yê é jung eq wuì hkaù má nyi jung banshoq gi, wó mhê yu é jung chyat nghut mù, byu pé gi, haú pé lé mhê yu nyi akô. ⁸ Nghut kôlhang, shô lé kúm gi, byù ó le a wó mhê yù kó nghut ri. Haú gi, apyî abat, agè ashop, uphkâng a wó é eq, shi é jung duq èq byíng tô é jung nghut nyi ri.

⁹ Nga-nhúng gi, shô hau èq nga-nhúng é Yhumsing eq Íwa Garai lé hkya-on nyi lhê; hau èq za, Garai Gasâng é gunglhô đông hpan tô é waxâng zo wuì lé le nhing pyâm nyi ri. ¹⁰ Nhut ralhú za mai, hkya-ôn é dang eq nhing é dang htoq lo ri. Ngá é gumang wuì ê, haú su kut é gi, a gè. ¹¹ Wuìbúm radong za mai, chuì nghâm é wuì eq hkô é wuì wó htoq râ lú? ¹² Ngá gumang wuì ê, maihpáng gâm mai tsanlun shi, tsibiyiq nú mai maihpáng shi, wó zui râ lú? Haú eq rajung za, xô ngam é wuì gi, chuì nghâm é wuì lé wó lhoq htoq byi râ a nghut.

Ahtoq Mai Lo É Hpaqchyî

¹³ Nungmoq má, hpaqchyî byéng-yá bo é sú eq sê é dat é sú, ó nghut lhê lú? Haú yuq gi, yhang hpaqchyî bo é hkyô lé, hpaqchyî mai wó yu é, myit lhoq nyhum é hkyo èq, yhumsing zui saí é ge é muzó đông tân shit nyi sháng gaq. ¹⁴ Nghut kôlhang, nungmoq é myit má ladu laí é manon é i-myit eq, lú lhum bat zik é i-myit bo é nghut le gi, hkâ-nghutbun kó, haú tengmán hkyô lé le hkâ-mhaù pyám kó. ¹⁵ Haú sú é hpaqchyî byéng-yá kúm gi, mauhkung htoq mai gyó lo é hpaqchyî byéng-yá a nghut, haú gi, myigùng htoq mâ é, gungsho ô nau é eq, nat é hpaqchyî byéng-yá chyat nghut nyi ri. ¹⁶ Hkâsu mù gâ le, manon é eq lú lhum bat zik é dut nyi le gi, ruk ruk rak rak é hkyô eq agè ashop é mú ajung jung jup hkâm nyi ri.

¹⁷ Mauhkung htoq mâ é hpaqchyî byéng-yá kúm gi, sâng-hi awang má

sansêng nyi ri; hau htâng má gi, ngu-ingón hkyô lé ô nau é, myit nôm é, jino gyô é, shogyo nhikmyin sê é eq ge é ashi zui nyi mù luí, gamhkui a bò, ahpuq alik a dut é eq, kut mhaù a sê é hpaqchyî byéng-yá nghut nyi ri. ¹⁸ Hau htoq agó, nguingón é hkyô dat sô xoq é bang gi, nguingón é shijí lé sâ kat é bang nghut mù, ge é ashi wó yú kó râ nghut lhê.

4

Yhumsing Gùng Lé, Garai Gasâng Chyáng Ap To Râ Hkyô

¹ Nungmoq má gye dut lhúm é eq mabyoq jishúm gi, hkâmai htoq lo é lú? Nungmoq ahkaù má gungsho ô nau é hkyô pé ngón hkyô hô mù, majan zân lhúm é yanmai, dut htoq lo é a nghut kó lú? ² Nungmoq yut yut myit ô nau nyi kôlhang, haí le a wó yú kó. Nungmoq sat nyi é eq manon nyi kôlhang, a wó yú kó. Nungmoq byoq lhúm nyi é eq majan htoq lhúm nyi kôlhang, haí le a wó yú kó; hkâsu mù gâ le, nungmoq, Garai Gasâng lé a dung kô é yanmai nghut ri. ³ Nungmoq dung kôlhang, a myang yú kó nghut ri; hkâsu mù gâ le, nungmoq é ngón kún hkyô má jai chûng langsâ pyám râ matú, shut é đông dúng nyi kô é yanmai nghut ri.

⁴ Su-myi sulàng lú é bang su gidig a gîng é bang ê, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó lú? Haú mù luí, mingkan ô nau é hkyô eq buinùm dù naù sú ó nghut kôlhang, Garai Gasâng é gye nghut nyi ri. ⁵ Dum ralhú, nga-nhúng má Garai Gasâng kat lhung tô é woi-nyí gi, manon é myit lúng nyi ri ga luí, Chyúmdang má taí é gi, akôm nghut ri nghú, nungmoq myit ngam nyi akô lú? ⁶ Nghut kôlhang, Yhang gi, je kô é jeju ru byi nyi lhê. Haú eq rajung za, Chyúmdang má,

"Garai Gasâng gi, nghutbun é bang lé hkâm zing pyám kôlhang, myit

lhoq nyhum é bang lé jeju byi ri."☆
ga taí tô ri.

⁷ Haú mù, Garai uphkang é a-ô má ru nyi nyi keq; Nat Tsadán lé hkûm tang pyám keq; haú hkûn, yhang nungmoq chyáng mai hpang byuq râ nghut lhê. ⁸ Garai Gasâng chyáng huí ê keq, haú hkûn, Yhang, nungmoq chyáng huí lé lô râ nghut lhê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhiklhum lé lhoq chyoí lhoq yúng to keq. Yudaq htûng dông loq lé chí san chí sêng pyám keq gâ é lichyúm gi, i-myt, gungdu lé lhoq san lhoq sêng pyám é lé gâ lhê. ⁹ Nungmoq gi, myit yón é, iyon yôn é eq ngaubyi ngau-nhap é kut nyi keq. Nungmoq é wuihá é hkyô lé gi, iyon dông, nungmoq é gabú é hkyô lé gi, yón kuq é dông htaí pyám keq. ¹⁰ Haú Yhumsing Garaí é hí má i-myt lhoq nyhum nyi keq, haú hkûn, Yhang gi, nungmoq lé lhoq toq râ nghut lhê.

¹¹ Gumang wui ê, nungmoq yhangchang a ge é dông hkâtaí hpoí lhum kó. Yhumsing é yhanggu yhangmang lé a ge é dông taí hpoí nyi é sù, haú a nghut jáng, jéyáng é sù gi, haú tarâ lé a ge é dông taí hpoí nyi mù luí, jéyáng é sù nghut nyi ri. Haú tarâ lé nàng jéyáng nyi é nghut le gi, tarâ lé châng é sù a nghut é za, tarâ jéyáng sù nàng dut nyi ri. ¹² Garai Gasang za tarâ byi tô é eq tarâ dara sù, wó hkyi yu é sù eq, wó lhoq htên é sù nghut nyi lhê. Hau é yanmai, náng é yhumkyo hpó lé jéyáng é sù nàng gi, ó yuq wa nghut lhê lhú?

Gyáng Dang A Tai Râ Hkyô

¹³ "Ngamoq, hkû-nyí napmá ra-nyí nyí, wà rawà wà shut ê mù, haú má razàn kô ê nyí luí, hpugá wuiloq gá mù amyat wó myang yù râ." ga taí nyi é bang ê, gyô wú keq. ¹⁴ Napmá haí dut lô râ lé lhang, nungmoq gi, a sé ko. Nungmoq é asak gi, haí nghut

nyi lhê lhú? Haú gi, razup rahtâng za htoq shit luí dum byuq byuq lô mù é, nghansoq eq rajung za nghut nyi ri. ¹⁵ Haú mù luí, nungmoq haú su ga taí nyi râ malaí gi, "Yhumsing Garai dông é nghut le gi, ngamoq le ru wó dui nyi mù, shí le, mhô le, wó kut râ nghut lhê." nghu luí, wó taí râ nghut lhê. ¹⁶ Ahkuí kúm gi, nungmoq é gyáng é dang dông gumrong nyi akô; haú su gumrong é hkyô banshoq gi, agè ashop é jung chyat nghut nyi ri. ¹⁷ Haú mù luí, ge é mù sê kut to luí, a kut é sù gi, mara kut sù dut bê nghut ri.

5

Sùt Wó Bang Lé Sidiq Byi É Dang

¹ Sùt wó é bang ê, gyo keq, nungmoq chyáng jé lé lô râ é wuihke jamjau hkyo é yanmai, ngau garú nyi keq. ² Nungmoq é sutzè gi, htên bup byuq bê nghut ri; nungmoq é wutbu wutmè le manot eq zô pyám bê nghut ri. ³ Nungmoq é hing eq ngùn má lhang, jogyik zui byuq mù luí, haú jogyik gi, nungmoq é mara hkyam shut saksé dut byi é eq, nungmoq é gungsho lé myi su zô pyám râ nghut lhê. Nungmoq gi, jihtûm buinyi shí pé má, sutzè lé za hkong to bekô chung! ⁴ Wú keq, nungmoq é yohtung dùng yò yam nhâng mù luí, ahpau a byi é za, nungmoq mhaú zô tô é ahpau pé garú nyi é hté pé eq, mù zui bang garú é hté pé lé gi, haú a-tsam dik shoq bo é Garai wó gyo byi bê nghut ri. ⁵ Nungmoq gi, myigùng htoq má hkik hkik hkâm hkâm wó nyi é eq, i-myt ô nau é dông ngón hkyô chyat châng nyi bum akô. Nungmoq gi, sat râ buinyi matú yhumsing é gùng lé tsô myum to bekô nghut ri. ⁶ Haú dingmán é sù* lé, nungmoq mara hân mù, sat pyám bekô. Yhang kúm gi, nungmoq lé a lhom hkûm zing nghut ri.

Myit Hing Hing Hkam Jan Ra Râ Hkyô

* 5:6 Dingmán é sù gâ é danghkun lé, Chyúmlaíka ra-am má gi, dingmán é bang gâ ri.

⁷ Haû mù luî, gumang wuî ê, haû Yhumsîng dum jé lé é buinyî jé shoq myit hing é èq láng nyî keq ô! Hkyâm sai sù lé wú wú keq, yhang gi, myihpún mai ahpau dán é ashi lé wó yû shoq ga mau mún eq wò htáng htáng é mau wo gyûn é jé shoq myit hing hing láng nyi ri. ⁸ Haû eq rajung za, nungmoq le, Yhumsîng Yesuq dum jé lé râ gi, chyâng lo nyi bê nghut é yanmai, myit hing é èq, i-myit lé lhoq ging lhoq tîng to keq. ⁹ Gumang wuî ê, nungmoq jéyáng a hui sháng gaq, nungmoq yhangchang hkâ-nyung nyâng lhûm nyi ko. Wú keq, Tarâ agyî gi, hkúmdong má jé nyi to bê nghut ri.

¹⁰ Gumang wuî ê, haû Yhumsîng Garaî é myîng eq hko kyô é myiqh-toî pé wuîhke jamjau huî é hkûn, jân pyâm é myit lé, nungmoq gi, ge é alik agàn kut yû keq. ¹¹ Wú keq, shikut shirang é bang lé, nganhúng gi, hkungsô wó é bang nghu é nghut lhê. Yobaq hkâm jân é yanmai, Yhumsîng Garaî gi, yhang lé htáng má myo myo dum shimân byî é hkyô lé, nungmoq wó gyô wú bê nghut lhê. Haî mù gâ le, haû Yhumsîng Garaî gi, gyai shogyo nhikmyîn é sù nghut nyi ri.

¹² Ngá é gumang wuî ê, banshoq má ahkyak dik é gi, haî le le hkâdakâm kó. Mauhkûng lé a nghut jáng, myigùng lé lang luî le hkâdakâm kó. Dakam é dang gotû lé le hkâtaî nyi kó. Nungmoq doqdân é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghû za, taí keq.

Lumjîng Myit Eq Kyûdung Râ Hkyô

¹³ Nungmoq má rayuq yuq wuîhke jamjau huî é nghut le gi, kyûdung nyi sháng gaq; rayuq yuq myit ngón nyi é nghut le gi, hkyâ-on mahkôn hkon nyi sháng gaq. ¹⁴ Nungmoq má rayuq yuq nôhpyo huî é nghut le gi, noqkuq hpúng mâ é nhik bô suwún wuî lé ji yû mù, haû bang gi, Yhumsîng Yesuq é myîng mai yhang lé xû but byi luî, kyûdung byi kó sháng gaq. ¹⁵ Haû su

mù, lumjîng myit èq kyûdung é dang gi, haû nô sù lé lhoq gê luî, Yhumsîng Garaî gi, haû yuq lé lhoq toq yû râ nghut lhê. Yhang gi, yubak mara kut shut é nghut kôlhang, hkyut pyâm byî é hui râ nghut lhê. ¹⁶ Haû mù luî, nungmoq lhoq ge é hui kó sháng gaq, nungmoq é yubak mara lé rayuq eq rayuq yín lhum mù, kyûdung byî lhûm nyi keq. Dingmán su é kyûdung dang gi, wó dut nhâng râ a-tsam wum-o myo myo bo nyi ri.

¹⁷ Eliyaq gi, nga-nhúng su i-myit unghkaû bo é xângzo byû za nghut lhê. Nghut kôlhang, yhang gi, mau a wò sháng gaq ga, wum kat o kat kyûdung jáng, sùm zan eq lhamó hkyuq hkyap tup myigùng htoq má mau a wò shoq dut byuq é nghut lhê. ¹⁸ Kyû dum dúng kat jáng, mauhkûng gi, máu wo hkyô kat byi mù, myigùng gi, yhâng é kyô shi mui shi lé lhoq htoq byî wú bê nghut lhê.

¹⁹ Ngá é gumang wuî ê, nungmoq chyáng mâ é rayuq yuq, haû tengmán hkyô mai nghoq ló byuq é hkûn, rayuq yuq gi, yhang lé tengmán hkyô shut dum wó shuî taû lo é nghut le kúm gi, ²⁰ haû shuî taû yû sù gi, yubak mara kut é sù lé, shut shai é hkyô mai tengmán hkyô shut shuî taû yû mù, myit woi-nyí lé shi é mai hkyi yû bê nghut é yanmai, yubak mara myo myo lé shuî nghop pyâm byî é sù dut berâ lé, bûn nyi keq ô!

PETRUQ Hî Dàm Hun Kat é Laiká (1 Peter)

¹ Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jìno gyo râ matú le, Yhâng é suí èq hpyûn gyûn é hui* râ matú le, haû Woi-nyí é lhoq sân-yúng nyí é muzó dông mai, Íwa Garai Gasâng é hî te sê tô é hpaqchyí má cháng luí, hkyin yù huí é bang nghut é, ² Garai Gasâng èq hkyin htoq yù luí, mingkân é byùbing dut bâng chyáng dang kyô kat lhê. Jeju eq nguingón hkyô gi, nungmoq chyáng agùn agó joq nyí sháng gaq.

Dui Nyí É Myit Myoqbyù Hkyô

³ Hkya-on kungtôn hkyô gi, nga-nhúng é Yhumsing Yesuq Hkrisduq é Yhângwa nghut sù Garai Gasang chyáng nghut nyí sháng gaq! Yhang gi, Yesuq Hkrisduq, shi é mai dum dui toq é hkyô dông, Yhâng é gyai shogyo nhikmyín é yanmai, nga-nhúng lé, asik hku é dum hui nhâng mù, rù dui nyí é myit myoqbyù hkyô lé wó nhang é htoq agó, ⁴ nungmoq é matú mauhkûng htoq má tô to byi bê nghut é, hkâ-nhâm le, a hten a byoq é, agot a-û a dut é, a hpoí byuq é muí lé le wó nhang é nghut lhê. ⁵ Nungmoq gi, lumjínng kô é yanmai, ló htâng é ahkyíng má lhoq htoq shit râ rì rì nghut é hkyi yù hkyô jé shoq, Garaí é hpungwup a-tsâm èq upzúng é hui bang nghut akô. ⁶ Haû mù, nungmoq gi, ahkuí razup zo, wuîhke hkyô junghkang jungmó má yón hpuzô é hui kó râ nghut kôlhang, gyai yhang gabú nyí keq. ⁷ Wuîhke hkyô haû pé mai, nungmoq é lumjínng myit gi, jet é hkyô lé wó chyam htoq mù, myi mai jên yù kôlhang htên byoq sê é hîng htoq je gyaú luí, Yesuq Hkrisduq htoq shit é hkûn, hkya-on kungtôn

hkyô, hpungwup shingkang eq aróng sitang lé, nungmoq wó kó râ nghut lhê. ⁸ Nungmoq gi, Yesuq lé a myang wú kôlhang, Yhang lé chyitdap bum akô; Ahkuí, nungmoq, Yhang lé a myàng kôlhang, Yhang lé lumjínng kô é nghut mù, a ung htoq taí é eq hpungwup bo é gabú hkyô gi, nungmoq chyáng byíng jup nyi ri. ⁹ Hkâsu mù gà le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjínng myit é akyû lé wó yu nyi kô é nghut ri.

¹⁰ Hkyi yù hkyô haû eq séng luí, nungmoq chyáng jé bê nghut é jeju hkyô lé taí é myiqhtoí pé gi, gyai yhang sidiq myit èq jí jí chyun chyun ho gon wú bekô nghut ri. ¹¹ Yhangmoq gi, Hkrisduq wuîhke jamjau hui luí, hpungwup shingkang wó râ nghut é hkyô lé, yhangmoq má lúng nyi é, Hkrisduq é Woi-nyí mai te taí é hkûn, hkâ-nhâm nghut râ eq hkasû é u má nghut râ hkyô lé ho gôn wú bekô nghut ri. ¹² Mauhkûng mai nhang kat é Chyoiyúng Woi-nyí èq, nungmoq lé gabú danglù hko kyo bê bang mai, ahkuí nungmoq lé taí kyo bê nghut é hkyô pé lé, yhangmoq taí kô é gi, yhumsing matú dojaú é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyo pé lháng gi, haû hkyô pé lé gyai wú nau bum akô nghut ri.

Chyoiyúng Nyí Râ Hkyô

¹³ Haû mù luí, zui saí râ matú nungmoq é i-myt lé hen to keq; yhumsing gùng yhumsing hkang nyí keq; Yesuq Hkrisduq htoq shit é hkûn, nungmoq lé byi râ nghut é jeju lé, hkyak za myit myoqbyu nyí keq. ¹⁴ Jìno gyô é zoshâng wuì su, myoq a bóng shí é pyat má nungmoq nyí tô é hkûn, nungmoq é agè ashop ô nau hkyô lé a châng kut é za, ¹⁵ haû nungmoq lé ji yu é Sù gi, chyoiyúng é su, nungmoq zui saí é hkyô banshoq má chyoiyúng nyí keq. ¹⁶ Hkâsu mù gà le, "Ngò gi,

* **1:1** Yhâng é suí èq hpyûn gyûn é hui gà é gi, Yhâng é suí èq mara chí sân pyám byí é lé gà lhê. ✨ **1:16** Nhung 11:44-45; 19:2; 20:7

chyoiyúng Sû nghut é yanmai, nungmoq le chyoiyúng nyî keq."✠ ga kê tô ri.

17 Byù yuq hkanmó é muzó lé, myoqdong a hkyin é za tarâ jéyáng é sù Íwa lé, nungmoq wut dung kê é yanmai, byùbínđ đông shî má nyi é u lé, Garai lé gyuq hkanđá é myit mai asak ðui keq. 18 Hkâsu mù gâ le, nungmoq gi, nungmoq é íchyí íwâ pè chyáng mai bo gyó lo é hpau a ðap é asak ðui hkyô mai, htên byoq sê é ngùn, hing èq hkyi yù huí é a nghut é za, 19 gumjup é eq mara a bo é sauzo nghut sù, Hkrisduq é hpau ðik é suí èq sheq hkyi yù huí é ru nghut é lé, nungmoq sê lhê. 20 Yhang gi, mau htoq xâng hkun mai hkyin yu é hui bê nghut kôhang, jhtâm ahkyíng shí pé má sheq, nungmoq é matú htoq shit nhang é hui bê nghut ri. 21 Yhang lé, shi é mai lhoq ðui toq yù mù, hpungwup shinkang bò nhang é Garai Gasang lé, nungmoq gi, Hkrisduq đông mai lumjínđ kê é nghut luí, nungmoq é lumjínđ myit eq myit myoqbyù hkyô gi, Garai Gasang chyáng nghut nyî bekô nghut ri.

22 Ahkuí kúm, nungmoq gi, haù tengmán hkyô lé châng é đông mai, yhumsing gùng yhumsing lhoq sânyúng yù bekô nghut mù, nungmoq é gumang wui lé, lhumzui é đông chyitdap bekô nghut luí, myit nhiklhum mai, rayuq eq rayuq gyai yhang chyitdap lhum keq. 23 Hkâsu mù gâ le, nungmoq gi, htên byoq sê é amyui mai dum hkù huí é a nghut é za, Garai Gasang é, rù ðui nyi é eq ru gíng nyi é mungđang đông, htên byoq a sê é amyui mai dum hku é hui bang ru nghut lhê. 24 Hkâsu mù gâ le, "Byù lhunglhang bang gi, wàhu mhan eq pung ri, yhangmoq banshoq bâng é hpungwup shinkang gi, yò mã é banbó pé eq pung ri; wàhu mhan gi, nyhuí kyuq byuq luí, banbó pé gi, yoq gyó byuq lhê;

25 nghut kôhang, haù Yhumsing é mungđang gi, ahtum abyuq gíng nyi lhê."✠

gâ tô ri. Haù gi, nungmoq lé hko kyo bê mungđang nghut lhê.

2

1 Haù mù luí, i-myit ðu é hkyô banshoq eq mhaù zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkanmó pé lé tô pyám keq. 2 Asik hku é zonú pé naú lé ô naù gadaù é su, woi-nyí eq sêng é jet é naú* lé ô naù gadaù nyí keq, haù jáng, nungmoq gi, hau é yanmai, nungmoq é hkyi yù hkyô má wó kê myhâng kó râ nghut lhê. 3 Hkâsu mù gâ le, haù Yhumsing gi, gè sù nghut é lé, nungmoq chyam wú bekô nghut ri.

Rù ðui Nyi É Luqgok Eq Hkyin Yù Huí É Byù Myù

4 Byu pé mai hkyin htoq pyám kôhang, Garai Gasang é matú hpau-ðap luí, Yhang èq hkyin yù huí é, rù ðui nyi é Luqgok nghut sù, haù Yhumsing chyáng nungmoq jé lé é hkùn, 5 nungmoq le, rù ðui nyi é luqgok pé su, woi-nyí eq sêng é yhùm† saí nyi é hui luí, Yesuq Hkrisduq đông mai, Garai èq hap yù gíng é, woi-nyí eq sêng é hkungga nhông byi râ matú, chyoiyúng é hkyangjong amyù ðut bekô nghut ri. 6 Hkâsu mù gâ le, Chyúmdang má,

"Wú keq, hkyin yù huí é eq hpauðap é htungchyùn luqgok racham lé, Zi-un bùm mã ngò lheq tô é nghut lhê;

Yhang lé lumhkau é sù gi, hkâ-nhám le hoq hpù é hui râ a nghut."✠ ga taí tô ri. 7 Haù mù, lumjínđ bang nungmoq é matú gi, luqgok haù hpauðap é nghut lhê. Nghut kôhang, a lumjínđ bâng é matú gi,

"Haù yhùm saí bang hkyin htoq pyám é luqgok gi, htungchyùn mã é

✠ 1:25 Esai 40:6-8 * 2:2 Woi-nyí eq sêng é jet é naù gâ é gi, Garai Gasang é mungđang lé taí é nghut lhê. † 2:5 Woi-nyí eq sêng é yhùm gâ é gi, noqkuq hpúnđ lé taí nau é nghut lhê. ✠ 2:6 Esai 28:16

ahkyak dik é luqgok† dut bê nghut ri."✧

ga le,

8 "Byu pé lé, htông leng râ luqgok eq myit leqbat nhâng râ luq mó cham dut bê nghut ri."✧

ga le, taí tô ri. Yhangmoq gi, mung-dang lé a cháng kô é yanmai, myit leqbat kô é nghut lhê. Haû dut râ lé, yhangmoq é matú masat to gû nghut bê nghut ri.

9 Nghut kôlhang, nungmoq gi, mauchut hkaû mai Yhâng é mauhpo maubó shut nungmoq lé wut htoq yû Su é mauhpo muzó lé wó taí pyô kó sháng gaq ga, hkyin yû huí é byuhú, hkohkâm hkyangjong amyû, chyoiyúng é byû myû, Garai Gasang eq sêng é byu pé nghut akô nghut ri. 10 Nungmoq gi, hí lé byû ramyû a nghut wú kôlhang, ahkuí gi, Garai Gasâng é byû myû nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yû bekô nghut ri.

11 Chyitdap é luzúm wuí ê, nungmoq é asak woi-nyí lé majan zân nyi é, yubak mara byíng jup é ô nau gadaú hkyô lé koi pyám keq nghû, gó ming byu pé eq byùbíng pé dông mingkan htoq má nyi é bang nungmoq lé, ngò, wum taí tsuq kat lhê.

12 Haû a lumjíng shí é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nga-nhúng lé Garai Gasâng eq lé kúm é buinyi má Garai lé shigyaú kó sháng gaq, a lumjíng shí é byu pé é ahkaû má haû su ge é asak ùi hkyô dông nyi yap keq.

Uphkâng Bang Eq Yhumsíng Wui É A-ô Má Nyi Râ Hkyô

13 Haû Yhumsing é yanmai, byu pé mâ é ahko ahkáng wó bang banshoq é a-ô má nyi keq: kô dik é ahkáng ayá wó é hkosêng é a-ô má nghut kôle, 14 shut é hkyô kut bang lé dam byi râ matú eq jô é hkyô kut bang lé

shigyaú râ matú, hkosêng eq nhang tô é mauzaú pé é a-ô má nghut kôle, nyi nyi keq. 15 Hkâsu mù gâ le, ge é hkyô kut é dông, byû nâ pé é a sé a dat é dang lé nungmoq lhoq zím pyâm é gi, Garai Gasang ô nau é hkyô nghut lhê.

16 Lut bê bang dông nyi keq, nghut kôlhang, agè ashop é hkyô lé nghop pyám râ matú nungmoq é luthkyô lé hkâchúng kó; Garai Gasâng é dui-nhâng zoshâng wui dông nyi keq.

17 Yuq hkanmó lé rago za hkunggâ é hkyô shit keq; lumjíng é gumang wui lé chyitdap keq; Garai Gasang lé gyuq hkunggâ nyi keq; hkoséng lé hkungga keq.

18 Dui-nhâng zoshâng wui ê, hkungga myit banshoq eq, nungmoq é yhumsíng wui é a-ô má nyi keq; ge é eq nú-nhám bâng é a-ô má za a nghut, byuwuí pé é a-ô má le nyi keq. 19 Hkâsu mù gâ le, byû rayuq gi, Garai Gasang lé bûn nyi sù nghut é yanmai, mara dông a nghut kôlhang, wuihke jamjau huí é hkyô lé hpuzô é lé, jân pyâm é nghut le gi, hkya-on gíng é sù nghut lhê.

20 Nghut kôlhang, nungmoq gi, mara kut shut é yanmai, nhuq bat é hkâm zo luí, haû lé jân nyi é nghut le gi, hai aróng wó kó râ lú? Nghut kôlhang, nungmoq gi, ge é hkyô kut luí, wuihke huí zô é lé jân pyâm é nghut jáng, haû gi, Garai Gasâng hí má hkya-on gíng é hkyô nghut lhê.

21 Nungmoq gi, haû hkyo é matú ji yû huí é nghut lhê; haí mù gâ le, Hkrisduq gi, nungmoq é matú wuihke hkyô huí é má, nungmoq lé alik dông tô to byi bê nghut mù, nungmoq gi, Yhâng é hkyi-kám pé lé cháng râ dut lhê.

22 "Yhang gi, hai mara le a kut shut, Yhâng é nhut mai mhaû é lé a myàng."✧

23 Yhang gi, rhoi é huí é hkûn, yhangmoq lé a dum taû rhoi; wuihke hkyô huí é hkûn, kyuq é dang a taí. Haû kut râ malaí, tengmán é dông jéyáng é Su chyáng, Yhânggùng lé ap pyâm

† 2:7 Ahkyak é luqgok gâ é gi, Hkrisduq lé taí é nghut lhê. ✧ 2:7 Hkya-on 118:22 ✧ 2:8 Esai 8:14

✧ 2:22 Esai 53:9

ri. ²⁴ Nga-nhúng gi, yubak mara eq wó shi gang mù, dingmán hkyo é matú asak wó duí kó sháng gaq ga, Yhang gi, sik zîng má, Yhânggùng eq yhang, nga-nhúng é yubak mara lé Yhânggùng má wun pyám byi bê nghut ri; Yhâng é dàm pê é yanmai, nungmoq gi, lhoq gê byí é hui bekô nghut ri. ²⁵ Hkâsu mù gâ le, nungmoq gi, hkyô nghoq byuq é sau pé su dut wú kôlhang, ahkuí, nungmoq gi, haû sau zúng Sú eq nungmoq é asak woi-nyí lé upzúng Su chyáng lhing taû lò bekô nghut ri.

3

Ikun Myhî Pé Eq Ikun Hpô Pé

¹ Ikun myhî pé ê, haû eq rajung za, yhumsing é ikun hpó uphkan é a-ô má nyí keq; haû hkûn, yhangmoq mâ é rayuq yuq, haû mungdang lé a lumjîng kôlhang, ² yhumsing é asak duí hkyô mâ é sansêng é hkyô eq hkunggâ é hkyô lé myàng kôjáng, dang dông a nghut é za, yhâng é yhumsing myhî é nyí yap é sâmlai dông mai yhang lé wó lhoq lhik yû râ nghut lhê. ³ Nungmoq yúng é hkyô gi, ahtoq pyâm za nghut é, xâmban nik é dông, hîng zè mhôn chung é eq réng é mebu wut é dông mai lo é a ge nghut. ⁴ Hau é malaí, haû gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpoí é yúng hkyô nghut é nungmoq é i-myit unghkaû mâ é su é yúng hkyô sheq dut râ lhê. ⁵ Hkâsu mù gâ le, gó hkûn, Garai Gasâng chyáng myit myoqbyù bang nghut é, chyoiyúng é myiwe wuì gi, yhangmoq gùng lé haû dông mhôn yù yù kut kô é nghut lhê. ⁶ Sarah gi, Abraham é jîno gyo luí, yhang lé yhâng é yhumsing ga wut é su, yhangmoq gi, ó le ô é yhumsing é ikun hpó uphkan é a-ô má nyí akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

⁷ Ikun hpô pé ê, haû eq rajung za, yhumsing é ikun myhî eq rahá

nyí yap e ló é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlí wó é bang dông, yhangmoq lé hkungga keq. Haû hkûn, nungmoq é kyûdung dang lé a he-ngik pyám byi râ nghut lhê.

Ge É Kut Luí, Jamjau Hkam É Hkyô

⁸ Dang htâng sat é má, nungmoq banshoq bang gi, rayuq eq rayuq myit huí lhûm nyí keq; myit wú nô mù, gumang nhiktâng wuì su chyt-dap lhûm nyí keq; shogyo nhikmyin myit bò luí, i-myit nyhum nyí keq.

⁹ Agè ashop é lé, agè ashop é dông lató a hpuq é eq rhoi é lé rhoi é dông lató a hpuq é za, shimân byi keq; haí mù gâ le, nungmoq gi, haû pê é matú, shimân jeju muí wó hkam yù kó sháng gaq ga, ji yu é hui kô é ru nghut lhê. ¹⁰ Hkâsu mù gâ le,

"Asak duí râ lé chyt-dap é eq ge é buinyí pé lé myàng nau é sù ó yuq le, yhâng é shô lé, agè ashop é mai, yhâng é nhutwuí lé, mhaú dang taí é mai, lhoq kâng pyám ra râ nghut lhê.

¹¹ Yhang gi, agè ashop hkyô mai lhing tau mù, ge é kut ra râ nghut lhê; yhang gi, nguínón simsaq hkyô lé hô mù, châng hkat nyí ra râ nghut lhê.

¹² Hkâsu mù gâ le, haû Yhumsing é myoqjí gi, dingmán bang lé wú nyí é nghut luí, yhangmoq é kyûdung dang lé, Yhâng é nohkyap eq gyo byí ri;

nghut kôlhang, haû Yhumsing é myoqdong gi, agè ashop hkyô kut bang lé gyè dông myang pyâm ri."*

¹³ Ge é hkyô lé, nungmoq gyai yhang kut nau nyí é nghut le gi, ó yuq wá nungmoq lé wó gunjang râ lhú? ¹⁴ Nghut kôlhang, dingmán hkyo é matú, nungmoq wuîhke jamjau huí le lháng, nungmoq gi, hkungsô wó nyí ri. "Yhangmoq gyuq é hkyô lé hkâgyuq kó; hkâgyuq dân kó."*

15 Nungmoq kúm gi, myit nhiklhú má, Hkrisduq lé, Yhumsing dōng jowò byi keq. Nàng wó é myit myoqbyù hkyô lé myî é sù yuq hkanmó lé, haî mù wó é hkyô tû taî kyo râ matú, ayang hen to aq. Nghut kôlhang, nú-nhâm é eq hkunggâ é dōng haû lé kut nyi aq; 16 nungmoq é unghkaû myit san za dut nyi keq, haû hkûn, Hkrisduq dōng mai nungmoq wó é ge é a-kyang lé rhoî dang taî é bang gi, yhangmoq lumù gansang é yan-mai hoq hpû é hui kó râ nghut lhê. 17 Garai Gasang ô nau é nghut le gi, agè ashop kut luî jamjau hkâm rá htoq má, ge é kut luî jamjau hkam le gi, je ge é nghut lhê. 18 Hkâsu mù gâ le, nungmoq lé Garai Gasang chyáng shuî jé shoq, Hkrisduq gi, byu pé é yubak marâ é yanmai, radâm za shî hkâm pyâm bê nghut ri; haû gi, dingmán Sû, a dingmán bâng é matú shî hkâm byî é nghut lhê. Yhang gi, gungdu shî bê nghut kôlhang, haû Woi-nyí má lhoq dui é hui bê nghut ri. 19 Yhang gi, Woi-nyí dōng, htóng lúng tô é woi-nyí pé lé é hko kyô ri. 20 Woi-nyí haû pé gi, a-nham lé, Noaq é ipyat má wuî-sanghpo lé Noaq tsuq nyi é hkûn Garai Gasang myit hîng hîng lánq nyi é u lé, jìno a gyô é bang nghut akô. Wuî-sanghpo má wàng mù, wuî mai hkyi yù huî é byù shau luî, shit yuq za nghut akô. 21 Wuî haû gi, ahkuî nungmoq lé le hkyi yu é nghut é baptisma é azòng nghut ri; haû gi, gungdu mâ é agot a-û lé huî sêng pyâm byî é a nghut é za, sansêng é unghkaû myit mai Garai Gasang é hí má gidìq tô é ru nghut lhê. Yesuq Hkrisduq é dum dui toq hkyô dōng, nungmoq gi, baptisma hkâm yù luî, hkyi yu é hui kô é nghut lhê. 22 Yesuq Hkrisduq gi, mauhkûng má doq ló luî, Garai Gasang é loqyò hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkang é a-ô má nghut nyi bum akô.

4

Garai Gasang É Matú Asak Dui Râ

Hkyô

1 Haû mù luî, Hkrisduq gi, Yhâng é gungdu má hpuzo bê nghut é yan-mai, nungmoq le, Yhang i-myit sâmlai hau èq yhumsing gùng má gyehking dōng wut to keq, haî mù gâ le, yhâng é gungdu má hpuzo bê sù gi, mara eq gang bê nghut ri. 2 Haû nghut é yanmai, yhang gi, yhang nyi tûm tô é mingkan asak dui hkyô má, agè ashop é xângzo byù ô nau é dōng a nghut é za, Garai Gasang ô nau é dōng asak dui é ru nghut lhê. 3 Hkâsu mù gâ le, nungmoq gi, laî lò bê ahkyíng má, a lumjǐng shî é byu pé hkyin kut nau é hkyô nghut é, shut é dōng nyi zô lhúm nau é i-myit, agè ashop é yut yut ô nau é hkyô, î shuq wut é hkyô, zo yê shuq yê mù achaq achyut kut é hkyô, ye hai râ wut jung zoshuq lé yut yut ô nau é hkyô, achaq achyut é hparà noq hkyô pé má, ahkyíng luq shoq nyi laî lò bê bang nghut akô. 4 Nungmoq gi, ladu lai shoq achaq achyut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maú byuq luî, nungmoq lé lumù gansang pyâm akô nghut ri. 5 Nghut kôlhang, yhangmoq gi, dui nyi é bang eq shî bê bang lé tarâ jéyáng râ rì rì nghut to Sû lé jihpán shit kyo ra kó râ nghut lhê. 6 Hau é yanmai, ahkuî shi byuq bê bang lé lhang gabú danglù hko kyô é hui bekô nghut lhê; haû gi, gungdu eq séng luî ga jang, yhangmoq gi, byù dōng mai tarâ jéyáng é hui râ eq, woi-nyí eq séng luî ga jang, Garai Gasang dōng mai asak wó dúr râ matú nghut lhê.

7 Lhunglhang htum râ ahkyíng gi, chyáng bê nghut ri. Haû mù luî, nungmoq kyù wó dung kó sháng gaq, bûn gyíng luî, yhumsing gùng yhumsing hkanq nyi keq. 8 Banshoq htoq má ahkyak é gi, rayuq eq rayuq gyaî yhang chyitdap lhúm é hkyô nghut lhê, haî mù gâ le, chyitdap myit gi, yubak mara myo myo lé wó nghop pyâm é nghut lhê. 9 Rayuq eq rayuq, taî nyung nyâng é hkyô a bo é za, rago hkulum lhum keq. 10 Yuq

hkanmó gi, yhumsîng wó hkam yù bê chyunghuq eq rajung za, góbang lé dojaú râ lhê; Garai Gasâng jeju chyunghuq ajung jung lé, lhumzui é èq rago chung jai râ lhê. ¹¹ Rayuq yuq taí é nghut jáng, Garai Gasâng é mungdang haú eq yhang rajung za taí ra râ nghut lhê. Garai Gasang gi, lhunglhâng má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byí é wum-ô èq dojaú ra râ nghut lhê. Haú hpungwup shingkang eq a-tsam gi, Yesuq Hkrisduq chyáng pyat dedu ahtum abyuq joq nyí sháng gaq ô. Amen.

Hkristan Dut É Yanmai Jamjau Hui É Hkyô

¹² Chyitdap é luzúm wui ê, wuihke hkyô dông chyam é lé nungmoq hkâm zô nyí é hkûn, nungmoq chyáng maú nhô zâ é hkyô dut htoq bê dông, hkâgyuq dân kó. ¹³ Hkrisduq é jamjau hkyô pé lé bo hui zô é yanmai kúm gi, nungmoq gabú keq, haú hkûn sheq, Yhang é hpungwup shingkang eq rahá Yhang htoq shit é hkûn, nungmoq gi, gabú dik é hui kó râ nghut lhê. ¹⁴ Hkrisduq é mying yanmai, nungmoq gi, rhoi é hui zô é nghut jáng, hkungsô wó nyí ri; hkâsu mù gâ le, hpungwup shingkang bo é Woinyí nghu é, Garai Gasâng é Woinyí gi, nungmoq chyáng nyí nyí ri. ¹⁵ Nungmoq mâ é rayuq yuq jamjau huí é nghut le gi, byù sat sù, hkau sù, gotû agè ashop kut sù, góbâng é mù má châng gunjang sù dông jamjau huí é a dut sháng gaq. ¹⁶ Nghut kôlhâng, Hkristan rayuq dông nungmoq jamjau huí é nghut le gi, hkâhoq nyí kó, Garai Gasang lé kúm gi, mying hau é yanmai hkya-ôn nyí keq. ¹⁷ Hkâsu mù gâ le, tarâ jéyáng râ ahkyíng gi, jé bê nghut luí, Garai Gasâng é ikun byu pé mai hí râ nghut lhê; haú gi, nga-nhúng mai hí é nghut jáng, Garai Gasâng é gabú danglù lé a châng é

bang gi, hkâsu wá dut lò râ nghut lhê lhú?

¹⁸ "Haú dingmán sù, hkyi yù hui râ wui é nghut le gi, tarâ a hkunggâ é eq yubak dap é sù gi, hkâsu wá dut râ nghut lhê lhú?"[☆]

gâ tô ri.

¹⁹ Haú nghut mù luí, Garai Gasang ô nau é dông jamjau huí é bang gi, yhumsing gùng lé, lhumzui é Hpân Su chyáng ap byi mù, ge é lé xoq kut nyi ra râ nghut lhê.

5

Suwún Wui Éq Zorâm Wui

¹ Nungmoq mâ é hpúng suwún wui lé, ngò, nungmoq é byinzùm suwún, Hkrisduq é jamjau hkyô pê é saksé nghut sù eq lhoq htoq shit râ nghut é Yhâng é hpungwup shingkang lé bo hkâm râ nghut sù dông mai sang kat kôlé: ² Nungmoq lé ap to bê nghut é Garai Gasâng é sau hpúng* lé zúng rém bang dut mù, shuí u bang dông dojaú nyí keq; zúng rém é hkûn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsîng kâm é myit mai kut é nghut râ lhê; ngunzè lé a myoqnoq é za, shirông myit mai dojaú râ lhê. ³ Nungmoq é loq má ap byí to bê bang lé a up zô é za, yhangmoq é hí má alik dut nyí keq. ⁴ Haú jáng, Sau zúng Agyi mó† htoq shit é hkûn, nungmoq gi, hpungwup shingkang bo é, hkâ-nhám le a shum a byuq é janmaú lé myang hap yù kó râ nghut lhê.

⁵ Zorâm wui é, nungmoq le, nungmoq htoq ipyat ko bâng é a-ô má nyí keq. Nungmoq lhunglhâng bang gi, myit lhoq nyhum é hkyô lé mebu su wut to mù, rayuq eq rayuq dojaú nyí keq, hkâsu mù gâ le,

"Garai Gasang gi, nghutbùn é bang lé hkûm zing pyám kôlhâng, myit lhoq nyhum é bang lé jeju byí ri."[☆]

[☆] 4:18 Sângkhyang 11:31 * 5:2 Sau hpúng gâ é gi, lumjîng bang lé gâ lhê. † 5:4 Sau zúng Agyi mó gâ é gi, Hkrisduq lé gâ é nghut lhê. [☆] 5:5 Sângkhyang 3:34

ga tô ri. ⁶ Haû mù luî, ahkyíng jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaû má, yhumsing myit lé yhumsíng lhoq nyhum nyi keq. ⁷ Nungmoq é myit chiq hkyô banshoq lé, Yhâng htoq má dú kê pyâm to keq, haî mù gâ le, Yhang gi, nungmoq é matú chiq byî nyi sù nghut lhê.

⁸ Yhumsing gùng lé yhumsíng hkâng mù, machya nyi keq. Nungmoq é gyè nghut é nat Tsadán hpó gi, rayuq yuq lé wó zô myui pyám shoq ga, mying wún é hkanghkyi su hkat gadaú jón wún ri. ⁹ Yhang lé htuoq htíng pyám mù, lumjíng myit má gíngtíng nyi keq, haî mù gâ le, mingkan gón má é nungmoq é gumang wuì le, rajung zâ é jamjau hkyô pé hui zô nyi kô é lé, nungmoq sê lhê.

¹⁰ Haû mù, jeju banshoq é Garai Gasang gi, Hkrisduq má ahtum abyuq joq nyi é Yhâng é hpungwup shíngkâng matú nungmoq lé ji yù bê nghut luî, nungmoq razup zo jamjau huì é htâng má, Yhang yhang nungmoq lé gumjup nhâng mù, wum bô nhâng luî, gíng gíng tíng tíng dut nhâng râ nghut lhê. ¹¹ Haû hpungwup a-tsam banshoq gi, Yhâng chyáng pyat dedu ahtum abyuq rú joq nyi sháng gaq. Amen.

Ló Htâng É Shi-kyám Dang

¹² Lhumzuî é gumang nghû ngò sôn yu é Sila èq garúm luî, ngò gi, nungmoq lé myit wum byi dang eq, myit wum byi dang haú pé gi, Garai Gasâng é tengmán é jeju nghut é lé saksé hkâm é dang pé lé, tot za kê kat é nghut lhê. Tengmán é jeju haú má yap gíng nyi keq.

¹³ Babelon má nyi é, nungmoq eq rahá hkyin yù huì é Hpúng gi, nungmoq lé shi-kyâm kat ri; ngá zo dông nghut sù Markuq le, nungmoq lé shi-kyâm kat ri. ¹⁴ Rayuq eq rayuq, chyitdap bopuq puq é èq shi-kyâm lhum keq.

Nguingón hkyô gi, Hkrisduq má nghut nyi é nungmoq banshoq bâng chyáng ru joq nyi sháng gaq ô.

PETRUQ Htang Dàm Hun Kat é Laiká (2 Peter)

¹ Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhông é Garai Gasang eq hkyi yù Sù nghut é Yesuq Hkrisduq é dingmán hkyô dông, ngamoq su, hpaù dik é lumjìng hkyô lé hap yù bê bâng chyáng dang kyô kat lhê.

² Garai Gasang eq nga-nhông é Yhumsing Yesuq lé, nungmoq sê jat nyi é hkyô má, jeju eq nguingón hkyô gi, nungmoq chyáng agùn agó ru joq nyi sháng gaq.

Ji Yu É Eq Hkyin Yu É Hkyô Lé Lhoq Ging Lhoq Tíng Râ Hkyô

³ Yhông é hpungwup shingkang eq ge é hkyô dông nga-nhông lé ji yù Sù lé nga-nhông sê é dông mai, Garai Gasang é hpungwup a-tsam gi, asak duì hkyô eq tarâ hkungga hkyo é matú nga-nhông râ é jung hkanmó lé byi bê nghut ri. ⁴ Haú pé dông mai, Yhang gi, Yhông é kô dik, hpaù dik é danggidìq pé nga-nhông lé byi bê nghut ri; haú hkùn, nungmoq gi, haú danggidìq pé dông mai, Garaì é myit sâmlai lé wó bo hkam yù râ eq agè ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô râ nghut lhê.

⁵ Hau é yanmai yhang, nungmoq gyai yhang shikut luì, nungmoq é lumjìng hkyô má ge é hkyô lé jat yù keq; ge é hkyô má sumsé hpaqchyì lé, ⁶ sumsé hpaqchyì má yhumsing gùng yhumsing hkan é hkyô lé, yhumsing gùng yhumsing hkan é hkyô má jân shirang é hkyô lé, jân shirang é hkyô má tarâ hkunggá é hkyô lé, ⁷ tarâ hkunggá é hkyô má gumang chyitkâng myit lé, gumang chyitkâng myit má chyitdap myit lé, jat yù keq. ⁸ Hkâsu mù gâ le, hau pé lé nungmoq wó sing myó jat lo é nghut jáng, hau

pé gi, nga-nhông é Yhumsing Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhang râ a nghut. ⁹ Nghut kôlhang, rayuq yuq gi, hau pé lé a wó é nghut jáng, chyâng é lé za myang é eq myoqjit é sù nghut luì, lai lò bê yhông é yubak mara pé mai lhoq sanséng byì é hui bê hkyô lé, tô-myhì pyám bê sù nghut ri.

¹⁰ Haù mù luì, ngá é gumang wuì é, nungmoq lé ji yu é hkyô eq hkyin yu é hkyô lé, je riyhang lhoq gingtìng nyi keq. Hkâsu mù gâ le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kó râ a nghut; ¹¹ hau htoq agó, nga-nhông é Yhumsing eq hkyi yù Sù nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kó râ nghut lhê.

Chyúmdang Mâ É Myiqhtoi Dang

¹² Haù mù luì, nungmoq gi, hau pé lé sé kô é htoq agó, nungmoq wó tô é tengmán hkyô má gingtìng nyi kô é nghut kôlhang, ngò, nungmoq lé hkâ-nhám le hau pé lé ru lhoq pùn nyi râ nghut lhê. ¹³ Shí gungdu má ngò rû dui nyi nyi gi, nungmoq lé lhoq pùn kying byì le ge ri nghù, ngò wó myit ri; ¹⁴ haì mù gâ le, nga-nhông é Yhumsing Yesuq Hkrisduq gi, ngo lé san za sé nhông bê eq rajung za, hkâ-myháng a myáng má, ngò gi, gungdu shi lé tô pyâm to râ nghut é lé sê lhê. ¹⁵ Ngò htoq ló byuq é htâng má, nungmoq, hkâ-nhám le haú pé lé ru wó bân nyi râ lé myàng nau mù, ngò, wó dut é í shikut nyi râ nghut lhê.

¹⁶ Nga-nhông é Yhumsing Yesuq Hkrisduq é a-tsam eq lé lo é hkyô eq séng luì, nungmoq lé ngamoq taì kyô wú é hkùn, ngamoq gi, kut htoq yu é labyoq mhô-myi lé a châng é za, Yhông é kô làm hkikhkâm hkyô lé myoq eq myang é saksé pé nghut lhê. ¹⁷ Hkâsu mù gâ le, haù Kô Làm Hkikhkâm Hkyo é Hpungwup Shingkang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyi

lhê.[✱] ga taí é htê, Yhâng chyáng jé é hkûn, haú Íwa Garai Gasâng chyáng mâ é aróng eq hpungwup shingkang lé Yhang wó hap yù bê nghut ri. ¹⁸Ngamoq yhang, chyoyúng bùm má Yhang eq rahá nyi tô é hkûn, htê haú mauhkûng mai htoq lo é lé wó gyô é nghut lhê.

¹⁹ Haú mù luí, myiqhtoi pé dang lé je lhoq ging bê hkyô, ngamoq wó é nghut lhê; haú mù, maubó lô luí, nungmoq é myit má bó-myhû htoq lo é hkûn jé shoq, mauchut tuq dut é jowò má duq nyi é myibung lé su, myiqhtoi dang haú lé, nungmoq gyo mù rago châng kut râ dut lhê. ²⁰ Banshoq htoq má, Chyúmdang mâ é myiqhtoi dang gi, haú myiqhtoi pé mai ó le ó lichyúm lhoq htoq yu é dông a nghut é lé, nungmoq sê to râ dut lhê. ²¹ Hkâsu mù gâ le, myiqhtoi dang gi, byù ô nau é dông hkâ-nhám lé a htoq wú é za, haú Chyoyúng Woi-nyí eq shuî u huí é bang mai, Garai Gasâng chyáng mâ é dang taí é ru nghut lhê.

2

Sará Apyoq Pé É Hkyô

¹ Nghut kôlhang, myiqhtoi pyoq pé gi, Israelaq byù haú bâng é ahkaú má nyi wú bê nghut lhê, haú eq rajung za, nungmoq é ahkaú má le sará apyoq pé nyi râ za nghut lhê. Yhangmoq gi, htên byoq hkyô nghut é byoq gang râ mhoqshit hkyô pé lé, haq lhoq pyo é htoq agó, yhangmoq lé wuî yu é, Yhumsîng lé lhang he-ngik pyám kó râ nghut lhê. Haú mù, yhangmoq gi, yhumsîng gùng yhumsîng byòdàn tung htên byoq hkyô jé nhâng bekô râ nghut lhê. ² Byù myo myo gi, haú bâng é ahoq ahí hkyô má châng kó râ eq, tengmán hkyô lé taí hpoi pyám nhâng kó râ nghut lhê. ³ Sará apyoq haú bang gi, yhangmoq myoqnoq é hkyô má, yhangmoq kut htoq tô é mhô-myi dông nungmoq lé mhaú zo kó râ nghut lhê. Yhangmoq lé mara dam byi hkyô gi, gohkûn mai yhangmoq ahtoq má lhang to gù bê nghut

é htoq agó, yhangmoq é htên byoq hkyô gi, yhup myhî tô nyi é a nghut.

⁴ Hkâsu mù gâ le, Garai Gasang gi, mara kut shut é maumâng pé lé lhang a ha bûn é za, ngaraî ming má hkyô pyám luí, tarâ jéyáng é hui râ hkûn jé shoq, yhangmoq lé tuq tuq chut é dong hkaú má kat tô é nghut lhê.

⁵ Yhang gi, tarâ a hkunggâ é byu pé lé dowuî tîng é hkûn, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sù Noaq eq gotû nyhit yuq lé hung yu é nghut ri; ⁶ Yhang gi, Sodom eq Gomoraq myuq lé, myi-mhop dut shoq nyhê hkyô pyám é dông mara dam byi luí, tarâ a hkungga bâng chyáng dut lò râ hkyô é azông kut tô é nghut ri;

⁷ nghut kôlhang, tarâ a chûng bâng é achâq achyut asak duí hkyô é yanmai myit wui myit hke huí é, haú dingmán sù Lot lé hkyi htoq yu é nghut ri; ⁸ (hkâsu mù gâ le, dingmán sù haú gi, nyí hkangmó yhangmoq ahkaú má nyi nyi é nghut luí, tarâ a chûng é muzó hkyô lé, yhang wó myâng wó gyô é yanmai, yhâng é dingmán myit má gunjâng é hui sù nghut ri.) ⁹ Haú su nghut é nghut jáng, Yhumsîng gi, tarâ hkunggâ é byu pé lé, wuîhke hkyô mai hkâsu kut hkyi htoq yù râ eq, a dingmán é bang lé, tarâ jéyáng é buinyi jé shoq, dam byi é hkyô lé xoq kut nyi é u má hkâsu kut zuí zing to râ lé sê lhê. ¹⁰ Haú yubak gungshô é htên byoq sê é yut yut ô nau hkyô châng é eq ahko ahkáng lé wú tiq bâng chyáng, haú hkyô hkyak dut râ nghut lhê.

Byù haú bang gi, ngegáng-htu é eq nghutbûn é bang nghut kôluí, mauhkûng bang lé lumù gansâng râ lé a gyuq kó nghut ri; ¹¹ nghut kôlhang, maumang lagyô pé lhang gi, wum je bo é eq a-tsam je bo é nghut kôle, haú Yhumsîng é hí má, haú mauhkûng bang lé mara hun é dông lumù gansâng hkyô a wám kut kó nghut ri. ¹² Nghut kôlhang, haú sará apyoq pé gi, yhumsîng a sê gyô é hkyô pé lé rhoi dang taí akô. Yhangmoq

✱ 1:17 Mht 17:5; Mrk 9:7; Luk 9:35

gi, haù chyup yu é hui luí, lhoq htên pyâm é hui rá matú za hku lé lo é, nhik a bo é tân jung dusak đông nghut akô; dusak haù pé su, yhangmoq le, htên byoq byuq kó rá nghut lhê.

¹³ Yhangmoq gi, nò shoq kut bekô nghut é yanmai, nò shoq kut é hui zo kó rá nghut lhê. Yhangmoq é ngón kún nau é myit gi, nyí mó káng lé lhang gungsho yut yut ô naù hkyô lhoq dik rá matú nghut ri. Yhangmoq gi, nungmoq eq rahá zoshuq poi kut kô é hkún, mhaù é lé yhangmoq é ngón hkyô kut kômù, agè agáu é eq achag achyut é bang nghut akô.

¹⁴ Yhangmoq é myoqjí pé má gi, sumyi sulàng lú hkyô byíng zan to kômù, mara kut é hkyô lé hkâ-nhám le a hkying kó nghut ri; yhangmoq gi, a gingtíng é bang lé mhoq hpyoq yu akô; yhangmoq gi, myoqnoq é hkyô má kúng é bang nghut kômù, nhíng pyâm é hui bang nghut akô. ¹⁵ Yhangmoq gi, haù dítng é hkyô lé tô pyâm to kômù, Beora é yhangzo nghut é, agè ashop hkyo é ahpaù lé chyitdap sù Balam é hkyô má châng yông wún bekô nghut ri. ¹⁶ Nghut kôlhang, Balam gi, yhang kut shut é hkyo é yanmai, logúng eq tân mhoqshit é hui ri; dang a dat nyo é logúng haù gi, byu é htê đông dang taí lò mù, myiqhtoi hpó a gyíng é hkyô lé hkúm tang pyâm ri.

¹⁷ Byù hau bang gi, wuì a bo é wuìhtung eq, laidùn eq mut tâng ló é nghansoq eq púng kômù, yhangmoq é matú gi, tuq tuq chut é mauchut hkaù lé lajang to bê nghut ri. ¹⁸ Hkâsu mù gâ le, yhangmoq gi, asôm gyáng dang lé taí mù, yubak gungshô é yut yut ô nau é hkyô đông mai, haù shut shai é hkyô má asak dui nyi é mai asik za hpang htoq lo é bang lé, mhoq hpyoq yu akô nghut ri. ¹⁹ Yhangmoq gi, haù bang lé luthkyô byi rá gidiq byi kô é nghut kôle, yhangmoq gùng gi, htên byoq hkyô lhoq htoq é gungsho yut yut ô naù hkyo é jùn dut nyi akô; haì mù gâ le, byù rayuq gi, yhumsíng lé

hai eq up sing le, hai é jùn nghut lhê.

²⁰ Byu pé gi, nga-nhùng é Yhumsíng eq hkyi yù Sù nghut é Yesuq Hkrisduq lé sê é đông mai, mingkân é agè ashop hkyô mai wó hpang lut htoq bê nghut kôle, yhangmoq lé hau eq tuí yup tô é dum hui luí, ung pyâm é hui kô é nghut jáng, yhangmoq é matú, hí lhê htoq má je wuì byuq kó rá nghut lhê.

²¹ Haù dítngmán é hkyô lé yhangmoq sé luí, yhangmoq lé ap byi to bê nghut é chyoiyúng hkunmó lé tô pyâm to mù lhing taù ló byuq kô é htoq má, haù hkyô lé a sê é gi, yhangmoq é matú je gè kó rá nghut lhê. ²² "Hkui gi, yhang hpat tô é lé dum taù zô lhê." gâ é eq, "Waq gi, chí pyám byi é htâng, yhâng é galhu htum má dum taù lú lhê." gâ é sanghkyang gi, yhangmoq chyáng dik bê nghut ri.

3

Haù Yhumsíng Jé Lé Râ Buinyi

¹ Chyitdap é luzúm wuì ê, shi gi, nungmoq lé ngò í dá nghu rá dàm ká byi kat é laiká nghut lhê. Laiká shi í lhum má, nungmoq é sansêng é i-myit lé lhoq toq rá matú taí pùn kat é laiká nghut lhê. ² Haù gi, chyoiyúng myiqhtoi pé mai lai lò bê hkún taí tô é dang pé eq, nga-nhùng é Yhumsíng eq hkyi yù Sù mai, nungmoq é lagyô pé đông byi to bê nghut é hkunmó lé, ngò, nungmoq lé bun nhâng naù luí nghut lhê.

³ Sâng-hi má, ló htâng é buinyi pé má yhumsíng é agè ashop ô naù hkyô má cháng luí taí hpoi bang htoq lô rá nghut é lé, nungmoq sê gyô to ra rá nghut lhê. ⁴ Haù bang gi, "Dum jé lé rá' ga Yhang gidiq byi é gi, hkâmá lú? Nga-nhùng é íchyí íwá pé gi, shi byuq ló bekô nghut mù, junghkang jungmó gi, mau htoq xâng hkun mai dut é su roq dut nyi ri." ga taí kó rá nghut lhê. ⁵ Nghut kôlhang, yhangmoq gi, a-nham lé, Garai Gasâng é hkunmó mai, mauhkúng pé joq é eq, myigùng gi, wuì mai dut htoq nhâng mù, wuì đông hpan tô é hkyô lé, a

sé gûn kut pyâm akô nghut ri. ⁶ Wuî hau èq sheq, haú hkun lhê é mingkan lé dowuî tít mù, lhoq htên pyâm é nghut lhê. ⁷ Ahkui lhê é mauhkûng pé eq myigùng lé gi, tarâ a hkungga bang htên byoq hui râ nghut é, tarâ jéyáng é buinyì jé shoq, myi má nyhé râ matú, hkunmó hau èq Yhang hkong to bê nghut ri.

⁸ Nghut kôlhang, chyitdap é luzúm wuî ê, haú Yhumsing é hí má, ranýi gi, zanwut rahkyîng dông, zanwut rahkyîng gi, ra-nyí dông nghut é hkyô shí lé, hkâtô-myhí kó. ⁹ Haú Yhumsing gi, Yhâng é danggidiq lé hân a lhoq dik ga byù ra-am myit ngam pyâm é su, nyhâm é Sû a nghut. Yhang gi, ó yuq le htên byoq byuq râ lé a ô nau é yanmai, yuq hkangmó myit lhîng râ lé za ô nau mù, nungmoq lé myit hîng byí nyi é nghut lhê.

¹⁰ Nghut kôlhang, haú Yhumsing é buinyì gi, hkau sù su a bûn nùng má jé râ nghut lhê. Haú buinyì má, mauhkûng pé gi, mying hum htê eq byuq byuq râ nghut lhê; duqbó-gûng pé gi, myí èq lhoq htên pyâm é hui luí, myigùng eq haú má é joq mijoq gi, nyé gyó byuq râ nghut lhê.

¹¹⁻¹² Joq mijoq gi, haú hkyô dông lhoq htên pyâm é hui râ nghut é yanmai, nungmoq gi, hkasû é byu pé dut ra râ l hú? Nungmoq gi, haú Garai Gasâng é buinyì lé ho nyi é eq buinyì haú hân za jé râ lé ô nau nyi é hkûn, chyoiyúng é eq tarâ hkunggâ é asak duí hkyô dông nyi ra râ nghut lhê. Buinyì haú gi, mauhkûng pé lé, myí èq lhoq htên pyâm luí, duqbó-gûng pé le, lûm nyé luí, nyé yui pyâm é buinyì dut râ nghut lhê. ¹³ Nghut kôlhang, nga-nhúng gi, Garaí é danggidiq nghut é, dîngmán hkyô é yhûm, mauhkûng asik eq myigùng asik lé, myoqbyu nyi é bang nghut lhê.

¹⁴ Haú nghut mù luí, chyitdap é luzúm wuî ê, nungmoq gi, haú hkyô lé myoqbyu é bang nghut kô é yanmai, Yhang é hí má achaq achyut a dut é eq mara hûn râ hkyô a bo é za, Yhang eq nguingón nyi râ hkyô lé gyai yhang

shikut nyi keq. ¹⁵ Nga-nhúng é chyitdap gumang Poluq gi, yhang lé, Garai Gasang byí tô é hpaqchyí byéng-yá èq, nungmoq chyáng ká byi bê eq rajung za, nga-nhúng é Yhumsing é myit hîng hkyô gi, hkyi yù hkyô nghut é lé matsîng to keq. ¹⁶ Poluq gi, yhang kâ é laiká pé banshoq má, haú hkyô pé eq séng luí rajung za kâ shit tô ri. Yhang é laiká hkaú pé má, ra-am gi, sê gyo wuî é hkyô pé bo é yanmai, a mhoq wú é bang eq a gingtîng é bang gi, gotû Chyúmdang pé lé lichyúm htaí lhik pyâm kô é su, yhangmoq lichyúm htaí lhik pyâm kômù, yhumsing htên byoq hkyô kut yu nyi akô nghut ri.

¹⁷ Haú mù luí, chyitdap é luzúm wuî ê, nungmoq gi, shí hkyô lé sê to gù nghut é yanmai, tarâ a chûng bâng é shut shaí hkýo èq nungmoq lé a wó shuí nghoq yù râ eq, nungmoq é gaú é jowò mai a wó byit gyó byuq sháng gaq, yhumsing gùng yhumsing upzúng nyí keq. ¹⁸ Nga-nhúng é Yhumsing eq hkyi yù Sû nghut é Yesuq Hkrisduq é jeju eq hpaqchyí hkyô má, nungmoq kô myhang lò kó sháng gaq. Hpungwup shing kang gi, Yesuq Hkrisduq chyáng, ahkuí le, ah-tum abyuq le, ru joq nyí sháng gaq ô! Amen.

YOHAN Hî Dàm Hun Kat é Laiká (1 John)

Asak Mungdang

¹ Ngò gi, haû sâng-hi mai joq nyi mù, ngamoq wó gyô wú bê é, ngamoq é myoq èq myang wú bê é, ngamoq rago za wú wú bê é, ngamoq é loq eq záng wú bê é, asak mungdang eq sêng é hkyô lé, nungmoq lé taí kyô kat lhê. ² Asak haû gi, htoq shit bê nghut mù, ngamoq gi, haû lé myang wú luí, saksé hkám bê; haû Íwa eq rahá nyi wú é, ngamoq chyáng htoq shit bê nghut è ahtum abyúq é asak haû lé nungmoq lé taí kyô lhê. ³ Ngamoq eq zùm yap é hkyô lé, nungmoq le wó sháng gaq nghû, ngamoq gi, myang wú bê eq wó gyô wú bê hkyô lé, nungmoq lé taí kyô lhê. Ngamoq gi, haû Íwa eq le, Yhâng zo Yesuq Hkrisduq eq le, zùm yap nyi é bang nghut lhê. ⁴ Ngamoq é gabú hkyô byíng jup sháng gaq nghû, ngamoq gi, nungmoq lé shí hkyô ká byí kat lhê.

Maubó Hkaû Má Sô Nyi Râ Hkyô

⁵ Garai Gasang gi, maubó nghut lhê; Yhâng chyáng mauchut ratsuí lháng a bò nghut ri. Shí hkyô gi, Yhangzô chyáng mai ngamoq wó gyô yù luí, nungmoq lé taí kyô é danglù nghut lhê. ⁶ Nga-nhúng gi, Yhang eq zùm yap nyi lhê nghû taí kôlhang, mauchut hkaû má ru sô nyi bum é nghut jáng, nga-nhúng gi, mhaû é bang dut mù, haû tengmán hkyô dông asak a dui é bang nghut ri. ⁷ Nghut kôlhang, Yhang gi, maubó má nghut nyi é eq rajung za, nga-nhúng le haû maubó má sô nyi é nghut le gi, nga-nhúng rayuq eq rayuq zùm yap nyi bê nghut luí, Yhang zo Yesuq é sui gi, nga-nhúng é mara banshoq lé lhoq sân-yúng pyám byi râ nghut lhê.

⁸ Mara a bò nghû nga-nhúng taí é nghut le gi, yhumsing gùng yhumsing mhaû pyám luí, haû tengmán hkyô

gi, nga-nhúng chyáng a bò nghut ri. ⁹ Nghut kôlhang, nga-nhúng gi, yhumsing é mara lé yín yu é nghut jáng, Yhang gi, wó lum é sù eq tengmán é sù nghut é yanmai, nga-nhúng é mara lé hkyut pyám byi luí, a ding a mán é hkyô banshoq mai le, nga-nhúng lé lhoq sân-yúng byi râ nghut lhê. ¹⁰ Nga-nhúng gi, mara a kut shut nghû taí é nghut jáng, nga-nhúng mai Yhang lé mhaû sù nghû chyo pyám é nghut luí, Yhâng é mungdang gi, nga-nhúng má a bò nghut ri.

2

Hkrisduq Gi, Nga-nhúng Lé Garúm Sù

¹ Ngò chyitdap é zo wuí ê, ngò gi, nungmoq mara a kut shut kó sháng gaq nghû, nungmoq lé shí hkyô ká byí kat lhê. Nghut kôlhang, rayuq yuq mara kut shut é nghut le gi, nga-nhúng é matú haû Íwâ chyáng bo taí xoq byí é, Yesuq Hkrisduq gâ é Dingmán Sù lé, nga-nhúng wó lhê. ² Yhang gi, nga-nhúng é yubak marâ é matú, shíhtaí gunlik hkungga nghut nyi ri. Nga-nhúng é yubak marâ é matú baú za a nghut, mingkan gón mâ é byu pè é yubak marâ é matú le nghut nyi ri.

³ Nga-nhúng gi, Yhang hkyô tô é hkunmó pé lé châng kut é nghut jáng, Yhang lé nga-nhúng rago sé bê nghut é hkyô lé, wó sé bê nghut ri. ⁴ Byù rayuq yuq mai, "Ngò gi, Yhang lé rago sê lhê." ga taí kôlhang, Yhang hkyô tô é hkunmó lé a châng kut é nghut jáng, haû yuq gi, byù mhaû nghut luí, tengmán hkyô gi, yhang má a bò nghut ri. ⁵ Ó yuq nghut kôlhang, Garai Gasâng é mungdang lé châng kut nyi é nghut jáng, Yhang lé chyitdap é myit gi, haû yuq má gè gè byíng jup bê nghut ri. ⁶ Yhang má asak dui nyi lhê ga taí é sù ó yuq nghut kôlhang, Yesuq kut bê eq rajung za, châng kut râ lhê. Haû hkún sheq, nga-nhúng gi, Yhang má nghut nyi bê hkyô lé, wó sê lhê.

Hkunmó Asik

⁷ Chyitdap é luzúm wuî ê, ngò gi, nungmoq lé hkunmó asik ká byî kat é a nghut é za, haû sâng-hi mai nungmoq wó to bê hkunmó axau sheq ru nghut lhê. Hkunmó axau shî gi, nungmoq wó gyô wú bê mungdang nghut nyi ri. ⁸ Nghut kôlhang, ngò gi, nungmoq lé hkunmó asik ká byî kat lhê; hau é tengmán hkyô lé, Yhang má le, nungmoq má le, byu myàng ri; hkâsu mù gâ le, haû mauchut gi, laî ló byuq luî, haû tengmán é maubó gi, duq nyi gù bê nghut ri.

⁹ Ngò gi, maubó hkaû má nghut nyi lhê ga luî, yhumsing é gumang lé a jú é sù ó yuq nghut kôlhang, haû mauchut hkaû má ru nghut nyi ashî. ¹⁰ Yhumsing é gumang lé chyitdap é sù ó yuq nghut kôlhang, haû maubó má asak dui nyi é nghut mù luî, yhang má myit leqbat nhâng râ hkyô haî le a bò nghut ri. ¹¹ Nghut kôlhang, yhumsing é gumang lé a jú é sù kúm gi, haû mauchut hkaû má nghut nyi luî, haû má sô lhing jón wún ri; haû mauchut gi, yhang lé myoq lhoq chit to byî é yanmai, yhang gi, hká shut e ló nyi é hkyô lé a sé nghut ri.

¹² Chyitdap é zo wuî ê, Yhâng mying é yanmai, nungmoq é mara pé hkyut pyám byi hui bekô nghut luî, nungmoq lé ngò kâ kat é nghut lhê.

¹³ Îwâ pé ê, nungmoq gi, haû sâng-hi mai nyi é Sù lé sé bekô nghut é yanmai, nungmoq lé ngò kâ kat é nghut lhê.

Zorâm wuî ê, nungmoq gi, haû agè ashop sù lé ùng pyám bekô nghut é yanmai, nungmoq lé ngò kâ kat é nghut lhê.

Chyitdap é zo wuî ê, nungmoq gi, haû Îwâ lé sé bekô nghut é yanmai, nungmoq lé ngò kâ kat é nghut lhê.

¹⁴ Îwâ pé ê, nungmoq gi, haû sâng-hi mai nyi é sù lé sé bekô nghut é yanmai, nungmoq lé ngò kâ kat é nghut lhê.

Zorâm wuî ê, nungmoq gi, wum-o bo é eq, haû Garai Gasâng é mungdang nungmoq chyáng dui nyi é nghut mù, haû agè ashop sù lé ung pyám bekô nghut é yanmai, nungmoq lé ngò kâ kat é nghut lhê.

Mingkan Lé A Chyitdap Râ Hkyô

¹⁵ Mingkan eq mingkan htoq mâ é haî le lé, hkâchyitdap kó. Byù rayuq yuq, mingkan lé chyitdap é nghut le gi, haû Îwâ lé chyitdap é myit, yhâng chyáng a bò nghut ri. ¹⁶ Hkâsu mù gâ le, mingkan htoq má joq é lhunglhang gi, gungsho ô nau é hkyô, myoqjí yut yut ô nau é hkyô, yhumsing wó é eq kut é hkyô lé gumrong é pé chyat nghut ri. Haû gi, Îwâ chyáng mai htoq lo é a nghut, haû mingkan mai htoq lo é ru nghut lhê. ¹⁷ Mingkan eq mingkan ô nau hkyô pé gi, laî ló byuq râ nghut lhê; nghut kôlhang, haû Garai Gasang ô nau é hkyô lé kut é sù gi, ahtum abyuq dui nyi râ nghut lhê.

Hkrisduq É Gye Pé

¹⁸ Chyitdap é zo wuî ê, shî gi, ló htâng é ahkyíng nghut bê; haû anti-hkrisduq* gi, lé lo nyi ri gâ é lé, nungmoq wó gyô wú bê eq rajung za, ahkuî lhang, anti-hkrisduq myo myo gi, jé lé bekô nghut ri. Hau é yanmai, nga-nhúng gi, ló htâng é ahkyíng nghut bê hkyô lé wó sé bê nghut ri. ¹⁹ Yhangmoq gi, nga-nhúng é hpúng mai htoq ló byuq bê bang nghut kôle, gè gè ga jang, nga-nhúng eq a sêng é bang nghut akô. Hkâsu mù gâ le, nga-nhúng eq sêng é nghut jáng, yhangmoq gi, nga-nhúng eq nyi to râ nghut lhê, nghut kôlhang, yhangmoq htoq ló byuq bekô nghut é yanmai, yhangmoq rayuq lhang nga-nhúng eq a sêng é hkyô lé tûn shit bê nghut ri.

²⁰ Nghut kôlhang, nungmoq gi, haû Chyoiyúng Sù mai xû but byî é hui† bekô nghut mù luî, nungmoq ban-shoq bang haû tengmán hkyô lé sé

* **2:18** Anti-hkrisduq nghû é lichyúm gi, Hkrisduq lé gyè kut é sù lé gâ lhê † **2:20** Xû but byî é hui gâ é lichyúm gi, Hkrisduq chyáng mai, Chyoiyúng Woi-nyî lé myang hap yu é lé gâ lhê.

akô nghut ri. ²¹ Haû tengmán hkyô lé nungmoq a sé kôluî, nungmoq lé ngò kê kat é a nghut; haû hkyô lé nungmoq sé gù nghut luî le, haû mhaû é hkyô gi, tengmán hkyô mai lo é a nghut é lé nungmoq sé gù nghut luî le, nungmoq lé ngò kê kat é nghut lhê. ²² Mhaû é sù gi, ó yuq nghut lhê lú? Haû Yesuq gi, Hkrisduq a nghut ga he pyâm é sù nghut ri. Haû Îwa eq Yhangzo lé he-ngik é sù gi, anti-hkrisduq yhang nghut nyi ri. ²³ Haû Yhangzo lé he-ngik sù ó yuq nghut kôle, haû Îwa lé sé sù a nghut. Haû Yhangzo lé hap yu é sù kúm gi, haû Îwa lé le sé bê sù nghut lhê.

²⁴ Haû sâng-hi mai nungmoq wó gyô wú bê é hkyô pé lé, nungmoq i-myt má ru bo nyi keq. Haû nghut jáng, nungmoq gi, haû Yhangzo eq Îwâ chyáng nyi nyi râ nghut lhê. ²⁵ Haû gi, nga-nhung lé Yhang byî tô é ahtum abyuq é asak wó yû râ gâ é danggidiq nghut ri.

²⁶ Ngò gi, nungmoq lé hkyô shuí nghoq shikut nyi bâng é hkyô eq séng luî, nungmoq lé shí gù kê kat é nghut lhê. ²⁷ Nungmoq chyáng kúm gi, Yhâng chyáng mai xú but jeju lé nungmoq wó yù bekô nghut mù luî, mhòqshit râ góyuq a ra lo nghut ri. Nghut kôlhang, haû Yhâng é xú but jeju gi, hkyô hkangmó má nungmoq lé mhòqshit byi mù, haû gi, tengmán nyi é nghut luî, mhaû é hkyô haî le a bo é za, nungmoq lé mhòqshit byi nyi é eq rajung za, Yhâng chyáng nungmoq nyi nyi keq.

²⁸ Chyitdap é zo wuî ê, nga-nhung gi, Yhang jé lé mù htoq shit é hkûn, Yhâng é hí má a gyuq a kyum é, hoq a hpu é, wó dut râ matú Yhâng chyáng ru nyi nyi keq.

²⁹ Yhang gi, dingmán sù nghut é lé, nungmoq sé bê yanmai, dingmán hkyô lé kut é sù ó yuq nghut kôle, Garai Gasang mai hkû kat é sù nghut é hkyô lé, nungmoq sé akô nghut ri.

Garai Gasâng É Yhangzô Pé

¹ Nga-nhung gi, haû Garai Gasâng é yhangzô pé ga wut râ hui bê nghut é yanmai, haû Îwâ é chyitdap myit gi, nga-nhung ahtoq má hkâ-í yhang ko nyi ri myhi-nhung! Nga-nhung gi, yhangzô pé yhang nghut bu-nhung! Mingkan gi, Yhang lé a sê é yanmai, nga-nhung lé le a sé nghut ri. ² Chyitdap é luzúm wuî ê, ahkuî, nga-nhung gi, Garai Gasâng é yhangzô pé nghut nyi to kôlhang, nga-nhung hkâsu dut râ hkyô lé, a tûn shit shi nghut ri. Nghut kôlhang, Hkrisduq htoq shit é hkûn, nga-nhung gi, Yhang su dut râ nghut é hkyô lé, nga-nhung sé lhê; hkâsu mù gâ le, Yhang hkâsu nghut é hkyô lé roq yhang, nga-nhung myàng râ nghut lhê. ³ Myit myoqbyù hkyô shi lé, Yhâng chyáng má wó tô é bang ó yuq nghut kôle, Yhang sânyúng é eq rajung za, yhumsing gùng lé lhoq san lhoq yúng nyi ri.

⁴ Mara kut é sù ó yuq nghut kôle, tarâ lu lai é sù nghut ri; gè gè ga jang, mara gi, tarâ lu lai é hkyô nghut nyi ri.

⁵ Nghut kôlhang, Yhang gi, nga-nhung é yubak mara lé hkyut pyám byi râ matú, pô htoq bê hkyô lé nungmoq sé akô; Yhâng chyáng mara a bô nghut ri. ⁶ Yhang má dui nyi é sù ó yuq nghut kôle, mara a xoq kut nyi nghut ri; mara xoq kut nyi sù ó yuq nghut kôle, Yhang lé a myàng, a sé shi nghut ri.

⁷ Chyitdap é zo wuî ê, nungmoq lé ó yuq eq le hkyô a shuí nghoq kó sháng gaq; Yhang gi, dingmán é eq rajung za, dingmán é hkyô lé kut é sù ó yuq nghut kôle, dingmán nyi ri.

⁸ Mara kut nyi é sù gi, nat Tsadán chyáng mâ é nghut nyi ri; hkâsu mù gâ le, Tsadán haû gi, sâng-hi mai yhang mara kut nyi bê nghut ri. Haû Garai Gasâng é Yhangzo gi, Tsadán é muzó lé lhoq hpyoq lhoq hten râ matú pô htoq le é nghut lhê. ⁹ Garai Gasâng chyáng mai hku kat é sù ó yuq nghut kôle, Yhâng é amyui bo to é nghut é yanmai, mara a xoq kut lo nghut ri; haû yuq gi, Garai Gasang chyáng

mai hku kat é hui bê nghut é yanmai, mara wó xoq kut lo râ a nghut. ¹⁰ Ó yuq nghut kôle, dingmán é hkyô a kut é eq, yhâng gumang lé a chyitdap é sù gi, Garai Gasâng yhangzo a nghut. Hau é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhúng wó sê yu ri.

Rayuq Eq Rayuq Chyitdap Lhum Râ Hkyô

¹¹ Nga-nhúng rayuq eq rayuq chyitdap lhum râ lê gâ é hkyô haù gi, sâng-hi mai nungmoq wó gyô yù bê danglù nghut ri. ¹² Haù agè ashop sù eq le sêng é, yhanggu lé sat pyâm é Ka-in su a ge kut. Yhang gi, haù mù luí yhanggu lé sat pyâm lê lú ga le, yhâng é muzó pé gi, agè ashop hkyô, yhanggu é muzó pé gi, dingmán é hkyô nghut é yanmai nghut ri. ✧ ¹³ Ngá é gumang wui ê, nungmoq lé mingkân èq a ngui a jú kut kôlhang, hkâmaú kó. ¹⁴ Nga-nhúng gi, nga-nhúng é gumang wui lé chyitdap é yanmai, shi byuq é mai wó lut luí asak dui é hkyô lé, wó sê é nghut lê. Chyitdap myit a bò sù gi, shi é hkyô má lúng tô ashí nghut ri. ¹⁵ Yhâng é gumang lé a ngui a jú é sù gi, byù sat sù dut râ nghut lê; byù sat sù ó yuq chyáng nghut kôle, ahtum abyuq é asak a bo é hkyô lé, nungmoq sê nyi akô.

¹⁶ Yesuq Hkrisduq gi, nga-nhúng é matú Yhâng é asak byí pyám bê lé wú jáng, chyitdap myit hkasú é nghut é hkyô lé, nga-nhúng wó sê ri. Nga-nhúng le, gumang wui é matú, nga-nhúng é asak lé byí pyám gíng ri. ¹⁷ Ó yuq nghut kôlhang, mingkan sutzè wó to luí, yhâng gumang hpó asho awui dut nyi é lé myàng kôlhang, a shogyô yu é nghut jáng, haù Garai Gasâng é chyitdap myit gi, yhâng chyáng hkâsu wó bò râ lú? ¹⁸ Chyitdap é zo wui ê, nga-nhúng gi, dang nhut shô mai za a nghut, muzó eq tengmán é đông le chyitdap nyi sháng. ¹⁹ Haù hkun, nga-nhúng gi, tengmán hkyô eq

séng bê bang nghut é lé wó sê é eq, nga-nhúng é i-myt mai nga-nhúng lé mara hun lò hkanmó, Garai Gasâng é hí má nga-nhúng i-myt wó ngón nyi bê nghut ri. ²⁰ Hkâsu mù gâ le, Garai Gasang gi, nga-nhúng myit é htoq má je kô é sù nghut mù, jung hkanmó lé sê nyi ri.

²¹ Chyitdap é luzúm wui ê, nga-nhúng é i-myt mai nga-nhúng lé mara a hun é nghut le gi, Garai Gasâng hí má nga-nhúng gyuq kyâm râ hkyô a joq lo nghut ri. ²² Nga-nhúng gi, Yhang hkyô tô é hkunmó pé lé châng kut é eq Yhang lé gabú nhang é hkyô haù lé le kut é yanmai, nga-nhúng dúng é hkyô lhungháng lé, Yhâng chyáng mai wó yù râ nghut lê. ²³ Yhang hkunmó hkyô tô é eq rajung za, Yhâng zo Yesuq Hkrisduq é mying má lumjíng é eq, rayuq eq rayuq chyitdap lhum é hkyô gi, Yhang hkyô tô é hkunmó yhang nghut bê. ²⁴ Yhang hkyô tô é hkunmó pé lé, châng kut é bang gi, Yhang má dui nyi bê nghut mù, Yhang le haù bang chyáng dui nyi bê nghut ri. Yhang nga-nhúng chyáng dui nyi bê hkyô lé, nga-nhúng lé Yhang byí tô é Woi-nyí đông nga-nhúng wó sê yu é nghut lê.

4

Woi-nyí Pé Lé Gôn Wú Râ Hkyô

¹ Chyitdap é luzúm wui ê, woi-nyí hkanmó lé hkâlumjíng ko, woi-nyí haù pé gi, Garai Gasâng chyáng mâ é nghut é, a nghut e lé gôn wú keq; hkâsu mù gâ le, myiqhtoi pyoq pé myo myo gi, mingkan htoq má jón wún bekô nghut ri. ² Garai Gasâng é Woi-nyí lé nungmoq wó sê yù râ hkyô gi, shí đông nghut lê: haù Yesuq Hkrisduq gi, gungsho đông jé lé bê ga, yín yu é woi-nyí hkanmó gi, Garai Gasâng chyáng mâ é nghut lê. ³ Nghut kôlhang, Yesuq Hkrisduq lé a yín yu é woi-nyí hkanmó gi, Garai Gasâng chyáng mâ é a nghut. Woi-nyí haù gi, lé lo nyi ri ga nungmoq wó gyô wú bê; ahkuí lhang mingkan htoq má

nyi to gù nghut é anti-hkrisduq é woi-nyí nghut ri.

⁴ Chyitdap é zo wuí ê, nungmoq gi, Garai Gasâng chyáng mã é nghut mù luí, yhangmoq lé ung pyám bekô nghut ri. Hkâsu mù gâ le, nungmoq má lúng to Sû gi, mingkan má nyi to su htoq je kô ri. ⁵ Yhangmoq gi, mingkan eq sêng é bang nghut lhê mù luí, mingkan hkyam đông tái bum akô; mingkan zo wuí le yhangmoq é dang lé gyo byí akô nghut ri. ⁶ Nga-nhúng gi, Garai Gasang eq sêng é bang nghut lhê; Garai Gasang lé sê é sù ó yuq nghut kôle, nga-nhúng é dang lé gyô ri; nghut kôlhang, Garai Gasang eq a sêng é sù gi, ngamoq é dang lé a gyo nghut ri. Shí hkyô lé wú jáng, tengmán hkyô é Woi-nyí eq hkyô shuí nghoq é woi-nyí lé, nga-nhúng sê gam hkoq yú bê nghut ri.

Garai Gasang Gi, Chyitdap Myit

⁷ Chyitdap é luzúm wuí ê, nga-nhúng gi, rayuq eq rayuq chyitdap lhúm nyi sháng; hkâsu mù gâ le, chyitdap myit gi, Garai Gasâng chyáng mã é nghut ri. Chyitdap myit bò sù ó yuq nghut kôle, Garai Gasâng chyáng mai hku kat é hui bê sù nghut luí, Garai Gasang lé sé sù nghut ri. ⁸ Chyitdap myit a bo é sù ó yuq nghut kôle, Garai Gasang lé a sé sù nghut ri; hkâsu mù gâ le, Garai Gasang gi, chyitdap myit nghut lhê. ⁹ Garai Gasang gi, Yhang Zô é yanmai nga-nhúng asak wó duí sháng gaq ga, Yhang Zo zote lé mingkan htoq má nhang kat byi bê nghut ri. Haú gi, Garai Gasang mai nga-nhúng lé, Yhâng é chyitdap myit tân shit é hkyô nghut ri. ¹⁰ Nga-nhúng gi, Garai Gasang lé chyitdap é a nghut, Garai Gasang sheq nga-nhúng lé chyitdap luí, nga-nhúng é yubak marâ é matú, shíhtái gunglik hkungga dut sháng gaq ga, Yhang Zo lé nhang kat byí é nghut ri; haú gi, chyitdap myit yhang nghut bê. ¹¹ Chyitdap é luzúm wuí ê, Garai Gasang gi, nga-nhúng lé haú-í yhang chyitdap é nghut jáng, nga-nhúng le rayuq eq rayuq chyitdap lhúm râ dut

lhê. ¹² Garai Gasang lé ó yuq èq le, hkâ-nhám lhang myang wú é a nghut; nghut kôlhang, nga-nhúng rayuq eq rayuq chyitdap lhúm nyi é nghut jáng, Garai Gasang gi, nga-nhúng má nyi nyi bê nghut luí, Yhâng é chyitdap myit gi, nga-nhúng má gumjup râ nghut lhê.

¹³ Garai Gasang gi, nga-nhúng lé, Yhâng é Woi-nyí byí to bê nghut é yanmai, Yhâng chyáng nga-nhúng dui nyi bê hkyô lé le, Yhang nga-nhúng má nyi nyi bê hkyô lé le, nga-nhúng sé bê nghut ri. ¹⁴ Haú Iwa gi, Yhang Zo lé mingkân é hkyi yù Sû dut sháng gaq ga nhang kat é hkyô lé, ngamoq myàng luí, saksé hkâm lhê. ¹⁵ Ó yuq nghut kôlhang, Yesuq gi, Garai Gasâng é Yhangzo nghut ri ga yín yu é nghut le gi, yhang má Garai Gasang nyi nyi bê nghut luí, yhang le Garai Gasâng chyáng dui nyi bê nghut ri. ¹⁶ Nga-nhúng gi, Garai Gasâng èq nga-nhúng lé chyitdap é hkyô lé, sé luí lumjínng nyi lhê; Garai Gasang gi, chyitdap myit nghut lhê; chyitdap myit má nyi nyi é sù ó yuq nghut kôle, Garai Gasâng chyáng dui nyi bê nghut luí, Garai Gasang le haú yuq má nyi nyi bê nghut ri. ¹⁷ Haú đông mai, chyitdap myit gi, nga-nhúng chyáng gumjup bê nghut luí, nga-nhúng gi, tarâ jéyáng é buinyi má a gyuq a kyum é myit wó yú râ nghut lhê; hkâsu mù gâ le, nga-nhúng gi, mingkan shí má Yhang su dut nyi bê nghut ri. ¹⁸ Chyitdap myit má gyuq é hkyô a bò nghut ri; gyuq é hkyô gi, mara dam byí é hkyô eq sêng é nghut mù luí, gumjup é chyitdap myit gi, gyuq é hkyô lé hkat htoq pyâm ri. Haú gyuq é myit bò sù gi, chyitdap myit má gumjup sù a nghut.

¹⁹ Yhang hí nga-nhúng lé chyitdap bê nghut é yanmai, nga-nhúng le chyitdap nyi lhê. ²⁰ Byù rayuq yuq gi, "Ngò, Garai Gasang lé chyitdap lhê." ga tái kôlhang, yhâng é gumang lé a jú é nghut jáng, haú yuq gi, byù mhaú rayuq nghut ri; hkâsu mù gâ le, yhumsîng byu-myang é gumang lé

lháng a chyitdap é sù gi, a byu-myang é Garai Gasang lé wó chyitdap râ a nghut. ²¹ Garai Gasang lé chyitdap é sù ó yuq le, yhumsing gumang lé le chyitdap râ lhê gâ é dang haû gi, nga-nhúng é matú, Yhang mai hkyô tô é hkunmó nghut lhê.

5

Garai Gasâng É Yhangzo Lé Lumjínng Hkyô

¹ Yesuq gi, haû Hkrisduq nghut ri ga lumjínng é sù ó yuq nghut kôle, Garai Gasâng chyáng mai hku kat bê sù nghut ri; íwa lé chyitdap é sù ó yuq nghut kôle, yhang zo lé le chyitdap é nghut bê. ² Garai Gasang lé chyitdap nyi mù, Yhang hkyô tô é hkunmó pé lé châng kut nyi é nghut le gi, Garai Gasâng é yhangzô pé lé le, chyitdap nyi é hkyô lé, nga-nhúng wó sê yu é yanmai, ³ Garai Gasang hkyô tô é hkunmó pé lé châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wòlai mó a nghut. ⁴ Hkâsu mù gâ le, Garai Gasâng chyáng mai hku kat bê sù ó yuq nghut kôle, mingkan lé ung pyám bê nghut ri. Nga-nhúng é lumjínng myit gi, mingkan lé nga-nhúng ung pyâm é ongdang hkyô nghut ri. ⁵ Yesuq gi, Garai Gasâng é Yhangzo nghut é lé lumjínng é sù mai lai luí, mingkan lé wó ung pyâm é sù gi, ó yuq wá nghut lhê lhú?

⁶ Haú yuq gi, wuì eq sui* mai lé é sù, Yesuq Hkrisduq yhang nghut nyi ri. Yhang gi, wuì mai za lé é a nghut, wuì mai le, sui mai le, lé é sù nghut lhê. Woi-nyí gi, tengmán hkyô nghut é yanmai, shí hkyô lé saksé hkâm byí ri. ⁷ Hkâsu mù gâ le, Woi-nyí le, wuì le, sui le, haû sùm lhúm é saksé hkâm akô nghut ri; ⁸ haû sùm lhum gi, rajung za nghut akô. ⁹ Nga-nhúng gi, byu é saksé lé lhom yu lhê; nghut kôlhang, Garai Gasâng é saksé gi, haû htoq je kô nyi ri. Hkâsu mù gâ le, Garai Gasang gi, Yhang Zo eq sêng é hkyô lé

saksé byí é yanmai nghut ri. ¹⁰ Garai Gasâng é Yhangzo lé lumjínng é sù gi, saksé haû lé yhâng é i-myit má wó bê nghut ri; Garai Gasang lé a lumjínng é sù kúm gi, Yhang lé byù mhaú rayuq ga chyo pyám bê nghut ri; hkâsu mù gâ le, Garai Gasang mai Yhang Zo eq sêng é hkyô saksé hkâm é lé, yhang a lumjínng é yanmai nghut ri. ¹¹ Nga-nhúng lé, Garai Gasang byí é ahtum abyuq é asak gi, saksé haû nghut nyi ri. Asak haû gi, Yhang Zô chyáng bo ri. ¹² Garai Gasâng é Yhangzo lé wó sù gi, asak haû lé wó bê; Yhang Zo lé a wó sù gi, asak haû lé le a wó nghut ri.

Ahtum Abyuq Asak

¹³ Garai Gasang é Yhangzô é myìng lé lumjínng é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghú, shí hkyô pé lé ngò ká byí kat é nghut lhê. ¹⁴ Nga-nhúng haí dúng le le, Garai Gasang ô nau é dông nghut jáng gi, Yhang gyo byi râ nghut lhê; haû gi, Yhâng é hí má nga-nhúng a gyuq a kyum wó wâng râ matú nghut ri. ¹⁵ Haû mù, nga-nhúng haí dung kôlhang, Yhang gyo byí é lé nga-nhúng sê é nghut le gi, Yhâng chyáng nga-nhúng dúng é hkyô lé, nga-nhúng wó yu é lé, nga-nhúng sê lhê.

¹⁶ Ó yuq nghut kôle, yhumsing é gumang hpó mai shí a gíng é mara kut shut é lé, myang é nghut le gi, haú yuq é matú kyûdung byi râ lhê. Haú hkûn, Garai Gasang gi, haú yuq lé asak byi râ nghut lhê. Haû gi, shí a gíng é mara wó bâng é matú taí é nghut lhê. Shí gíng é mara le joq lhê; nghut kôlhang, hau é matú dung râ lhê nghú, ngò taí nyi é a nghut. ¹⁷ A dingmán é hkyô lhunglháng gi, mara nghut lhê; nghut kôlhang, shí a gíng é mara le joq lhê.

¹⁸ Garai Gasâng chyáng mai hku kat bê sù ó yuq nghut kôle, mara a xoq kut lô é hkyô lé nga-nhúng sê lhê; hkâsu mù gâ le, haû Garai Gasâng é Yhangzo gi, haú yuq lé wú zúng nyi é nghut mù luí, haú agè ashop sù gi, haú yuq lé wó

* 5:6 Wuì eq sui nghu é gi, Yesuq baptisma hkam yu é hkyô eq shí hkâm é hkyô lé taí nau é nghut ri.

záng htung râ a nghut. ¹⁹ Nga-nhúng gi, Garai Gasâng é yhangzô pé nghut é lé le, mingkan gón lé haû agè ashop su èq up tô é hkyô lé le, sê lhê. ²⁰ Hau htoq agó, Garai Gasâng é Yhangzo jé lé luî, haû tengmán Sû lé sé sháng gaq ga, nga-nhúng lé sê gyô é nyan byi bê hkyô lé le, nga-nhúng sê lhê. Nga-nhúng gi, Yhang Zo Yesuq Hkrisduq má nghut nyî bê eq rajung za, haû tengmán Sû má le nyi nyi bê nghut lhê. Yhang gi, haû tengmán é Garai Gasang eq ahtum abyuq é asak nghut nyi lhê.

²¹ Chyitdap é zo wuî ê, hparà lhó pé lé koi pyâm nyi keq.

YOHAN Htang Dàm Hun Kat é Laiká (2 John)

¹ Ngò suwún hpó gi, tengmán hkyô má ngò chyitdap é, hkyin yù huí é nàng hpô-myhí eq nung zô pé lé, dang kyô kat lhê; ngò baú za a nghut, haú nga-nhúng chyáng lúng to luí, ² nga-nhúng eq ahtum abyuq ru joq nyí râ nghut é tengmán hkyô é yanmai, haú tengmán hkyô lé sê é lhunglhang bang le, nungmoq lé chyitdap nyi lhê.

³ Haú Íwa Garai Gasang eq Íwâ é Yhangzo Yesuq Hkrisduq chyáng mâ é jeju, shogyo nhikmyin hkyô eq ngu-ingón hkyô gi, haú tengmán hkyô eq chyitdap hkyô má, nga-nhúng eq rahá joq nyi sháng gaq.

⁴ Haú Íwa mai nga-nhúng lé hkunmó hkyô tô é eq rajung za, nung zô pé ra-am gi, haú tengmán hkyô má châng nyi é hkyô lé, ngò wó sê é yanmai, gyai yhang gabú nyi lhê.

⁵ Chyitdap é hpô-myhí é, nga-nhúng rayuq eq rayuq chyitdap lhum sháng nghû, ahkuí, ngò, nang lé dúng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byí kat é nghut lhê; hkunmó sik ralhú a nghut. ⁶ Yhang hkyô tô é hkunmó eq rajung za, nga-nhúng cháng kut é nghut jáng gi, chyitdap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chyitdap myit bo nyi râ matú nghut lhê.

⁷ Hkâsu mù gâ le, Yesuq Hkrisduq gi, gungsho dông jé lé é hkyô lé a yín yu é, mhaú zô é byù myo myo gi, mingkan htoq má jón wún bekô nghut ri; haú sù é byù gi, haú mhaú zo sù eq anti-hkrisduq dut râ nghut lhê.

⁸ Nungmoq zui saí bê muzó é akyû lé a lhoq hpyuq é za, gumjup é shigyaú chyunghuq lé, nungmoq wó hkam yù kó sháng gaq, yhumsing gùng sidiq

nyí keq. ⁹ Hkrisduq mhoqshit é dang lé a châng é za, laí chyan é sù ó yuq nghut kôle, Garai Gasang lé a wó é sù nghut ri; haú mhoqshit é dang lé ru châng nyi é sù kúm gi, haú Íwa lé le, Yhangzo lé le, wó bê sù nghut ri. ¹⁰ Mhoqshit é dang haú lé a wun é byù rayuq yuq, nungmoq chyáng jé lé é nghut le gi, haú yuq lé nungmoq é yhúmkaú má hkâwâng nhâng kó; yhang lé hkâlhóm xoq yù kó. ¹¹ Hkâsu mù gâ le, haú yuq lé lhom xoq yu é sù gi, yhâng é agè ashóp é muzó má lóm bê sù nghut ri.

¹² Ngò gi, nungmoq lé ká byí kat râ hkyô myo myo joq kôlhang, laiká hkyap eq kajung-chi lé a kâm chùng naú. Nga-nhúng é gabú hkyô wó gumjup sháng gaq, ngò, nungmoq chyáng tsuq za lé jé mù, nungmoq eq myoqdong hkyûm kut nyo lhum râ lé myit myoqbyu nyi lhê.

¹³ Hkyin yù huí é náng nhâ é yhangzô pé gi, nang lé shi-kyâm kat akô nghut ri.

YOHAN Súm Dam Dàm Hun Kat é Laiká (3 John)

¹ Ngò suwún hpó gi, haù tengmán hkyô má ngò chyitdap é, ngá é chyitdap luzúm Ge-u lé dang kyô kat lhê.

² Chyitdap é luzúm hpó ê, ngò gi, haù náng é asak woi-nyí nyí-ngón yuqyo nyí é eq rajung za, náng nguingón wángzán rá eq hkyô hkat hkangmó má, nyí-ngón yuqyo nyí sháng gaq nghú, kyúdung byí kat lhê.

³ Hkâsu mù gâ le, ngò gi, gumang wui ra-am, ngá chyáng lé jé mù, haù tengmán hkyô má náng lhumzui é hkyô lé le, haù tengmán hkyô má náng hkâsu kut xoq châng nyí é hkyô lé le, lé taí kyo kô é hkûn, gyai yhang gabú é yanmai nghut lhê. ⁴ Haù tengmán hkyô má, ngá zô pé châng nyí é hkyô lé, ngò wó gyô é hkûn gabú é í, gotú gabú hkyô a wó lo nghut ri.

⁵ Chyitdap é luzúm hpó ê, haù gumang wui gi, mau we bíng pé nghut to kôlhang, náng yhangmoq lé lhom garúm yu é hkyô má, náng gi, lhumzui nyí ri. ⁶ Yhangmoq gi, haù noqkuq hpúng má é bang lé, náng é chyitdap myit eq séng luí taí kyo bekô nghut ri. Náng gi, Garai Gasâng hí má gingdán é dông, yhangmoq é hkyowui matú garúm luí, dé kat é nghut jáng, ge é muzó jizó kut é nghut bê. ⁷ Hkâsu mù gâ le, yhangmoq gi, Hkrisduq é myìng hau é matú htoq ló kôluí, a lumjìng bâng chyáng mai haí lháng a hap yù kó nghut ri. ⁸ Haù mù luí, nga-nhúng gi, haù tengmán hkyô é matú rahá za wó chòm zui saí sháng gaq, haù sù é byu pé lé lhom hkûlum yù rá lhê.

⁹ Ngò gi, haù noqkuq hpúng lé laiká ká byí kat bê nghut lhê; nghut kôlhang, haù ushuq kut nau é sù Diotrehpi gi, ngamoq lé a lhom hap yù nghut ri. ¹⁰ Haù mù luí, ngò lé jé jáng gi, ngamoq lé a jo a âng é dang taí é eq lumù gansang é, yhang kut é muzó lé, taí hpyí kyo rá nghut

lhê; yhang gi, haù hkyô lé myit a dik shí é nghut mù luí, yhang yhang le gumang wui lé a lhom hkûlum yù, lhom hkûlum yù naù bang lé le, yhang mai hkûm zing pyám luí, yhangmoq lé haù noqkuq hpúng mai hkat htoq pyám ri.

¹¹ Chyitdap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng má é nghut bê; agè ashop é hkyô kut é sù gi, Garai Gasang lé a myàng shí é sù nghut ri.

¹² Demetri ge é hkyô lé, yuq hkangmó mai le, haù tengmán hkyô eq le, saksé hkám byí akô nghut ri; ngamoq le, yhang ge é hkyô lé saksé hkám byí lhê; haù ngamoq hkám é saksé gi, têng é hkyô nghut é lé, náng sê lhê.

¹³ Ngò gi, nang lé kê kat ra hkyô myo myo joq kôlhang, kâjung eq kâjung-chi dông a kê kat naù lo. ¹⁴ Ngò gi, a myáng má, náng eq myang huí lhum rá lé myit myoqbyu tô lhê. Haù hkûn sheq, ngá-nhik myoqdong hkyûm myang nyo lhum rá nghut lhê.

¹⁵ Náng nguingón yuqyo nyí sháng gaq; shí má é luzúm wui gi, nang lé shi-kyâm kat akô nghut ri. Náng le, haù má é luzúm wui lé, myìng du htau luí bo shi-kyám byi laq.

YUDE Hun Kat é Laiká (Jude)

¹ Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haù Íwa Garai Gasâng eq ji yù mù, chytidap é hui luí, Yesuq Hkrisduq eq upzúng é hui bâng chyáng dang kyô kat lhê.

² Shogyo nhikmyin hkyô, nguingón hkyô eq chytidap hkyô gi, nungmoq chyáng agùn agó joq nyi sháng gaq ô!

Garai A Wó Bâng É Yubak Mara

³ Chytidap é luzúm wuî ê, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kê kat byí nau é nghut lhê wá, haù sân-yúng bang lé, radá dâm jâng ap byí to bê nghut é lumjíng hkyo é matú nungmoq htuq htíng rã dut é lé, myit wum byi rã hkyô ká rã dut é lé, ngò byu-myang ri. ⁴ Hkâsu mù gâ le, haù mara dam byí é hui zo rã hkyô lé, a-nham pyat mai kê matsíng tô é hui bê bang ra-am gi, nungmoq chyáng hkaù wang lò bekô nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, mingkan ngón hkyo eq htaí lhik pyám kô é htoq agó, Yhang za nga-nhúng é Yhumsíng nghut sù eq Ahko ahkáng lhunglháng wó sù, Yesuq Hkrisduq lé he-ngik pyám akô nghut ri.

⁵ Nungmoq kúm gi, shí pé banshoq lé sê to gù nghut kôlhang, ngò mai nungmoq lé taí pún nau é hkyô gi, a-ô mã é pé nghut lhê: Haù gi, Yhumsíng Garai mai, Yhâng é byu pé lé, Egutuq ming mai hkyi htoq yù kôlhang, a lumjíng é bang lé gi, htâng má dum lhoq htên pyám é nghut lhê. ⁶ Hau htoq agó, haù yhumsíng é ayá lé tô pyám luí, yhumsíng é nyi jowò lé pyám tô é maumâng pé lé, Yhang gi,

haù tarâ jéyáng é hui rã Buinyì mó jé shoq, ahtum abyuq é toqjâng tui eq tui luí, mauchut hkaù má lhúng tô é nghut lhê. ⁷ Haù eq rajung za, Sodom eq Gomoraq myuq eq hau é awui ayám mã é wà pé mã é bang gi, ashop é dông gungsho zùm yap é hkyô shut é eq myiwe yhangchang yuqgè yhangchang nyi zô lhùm é hkyô kut kô é nghut mù, yhangmoq gi, ahtum abyuq é myi má dam byí é hpuzo bâng é alik dut bekô nghut ri.

⁸ Haù eq rajung za yhang, yhupmoq moq é byù shí bang gi, yhumsíng é gungsho lé agot a-û kut kômù, ahkáng ayá wó sù lé he-ngik pyám kôluí, mauhkúng bang lé lumù gansang akô nghut ri. ⁹ Nghut kôlhang, haù maumang lagyo agyi Mihkaelaq lháng gi, Mosheq é gùng eq séng luí, haù nat zau eq dang rhâng lhùm é hkùn, yhang lé rhoi é dông mara hùn dang a wám taí é za, "Nang lé, haù Yhumsíng nhik-yo sháng gaq!" ga za taí ri. ¹⁰ Nghut kôlhang, byù haù bang gi, yhangmoq a sê gyô é hkyô pé lé rhoi dang taí pyám akô nghut ri; yhangmoq gi, haù myit woi-nyí a bo é dusak pé su, yhumsíng myit mai sê gyô é hkyô pé má lháng, yhumsíng gùng lé lhoq htên yu akô nghut ri.

¹¹ Yhangmoq gi, dingnyé wó rã! Hkâsu mù gâ le, yhangmoq gi, Ka-in* kut é agè ashop é hkyô dông cháng kô é yanmai le, akyù wó rã matú, Balam† shut é dông bo shut kô é yanmai le, Kora‡ é gumlau toq hkyô kut kômù, yhang su htên byoq byuq é hui kô é yanmai le nghut ri.

¹² Yhangmoq gi, nungmoq é chytidap zoshuq poí má nungmoq lé agot a-û wó dut nhang é bang nghut mù, gyuq hoq a bo é za, nungmoq eq rahá chôm zoshuq kô é hkùn, yhumsíng gùng lé za yhumsíng lhoq gyí yu é sau zúng bang nghut akô; yhangmoq gi, lai eq mut tâng wún é, mau a bo é

* **1:11** Ka-in gi, yhanggu lé sat sù nghut lhê. Apùn 4:1-8 † **1:11** Balam gi, myiqhtoi nghut lhê, nghut kôlhang, ngunzè lé myoqnoq mù, Garai lé shut sù nghut lhê. Gyung So 22:1-35 ‡ **1:11** Kora gi, Garaí byù nghut é hkyô-u shê sù Mosheq lé gumlau toq é hkyangjong nghut lhê. Gyung So 16:1-33

mhut pé su nghut é htoq agó, ashi a zui mù, amyit eq roq hpùn pyám luí, í dâm shi é, xung nám lhê é sikhâm pé su nghut akô. ¹³ Yhangmoq gi, yhumsing é hoq jung lé, tsû-myup su htoq nhang é, haû wuimau má é kô é wuilhêng pé eq, tuq tuq chut é mauchut hkaû má tarâ jéyáng hui rá matú, ahtum abyuq tô to huí é, yông wún é kyí pé su nghut akô.

¹⁴ Byù haû bang eq séng luí, Adam mai byùxik nyhit xik má nyi é Eruk, myiqhtoi htoi tô é gi, "Wú keq, haû Yhumsing gi, Yhâng é chyoiyúng bang mun mun sen sen eq rahá gyó lé lo nyi bê nghut ri. ¹⁵ Yhang gyó lé lo é gi, yuq hkgangmó lé tarâ jéyáng rá matú eq, haû tarâ a hkunggâ é lhunglhâng bang, tarâ a hkunggâ é dông kut é muzó pé banshoq lé le, tarâ a hkunggâ é yubak byu pé, Yhang lé taí shut é dang htân pé banshoq lé le, mara byi rá matú nghut lhê." gâ ri. ¹⁶ Byù haû bang gi, put dang taí é bang eq mara hûn dang taí é bang nghut akô; yhangmoq gi, yhumsing ô nau é agé ashop hkyô cháng kô é htoq agó, yhumsing gùng yhumsing nghutbûn é dang taí é eq yhumsing maiwáng zat é dông, góbang lé owaq é bang nghut akô.

Hkam Jân Râ Hkyô

¹⁷ Nghut kôhang, ngò chyitdap é luzúm wuí ê, nungmoq gi, haû nganhung é Yhumsing Yesuq Hkrisduq é lagyô pé mai te taí tô é dang lé, bûn nyi keq. ¹⁸ Hkâsu mù gâ le, yhangmoq gi, "Haû ló htâng é ahkyíng pé má, tarâ a hkunggâ é yhumsing ô nau é hkyô dông châng é, rhoijap-dap dang taí é byu pé nyi to rá nghut lhê." ga, nungmoq lé taí wú kô é nghut lhê. ¹⁹ Byù haû bang gi, nungmoq lé gam hkoq é bang, mingkan hkyô lé baú za châng é bang, haû Woi-nyí a bo é bang nghut akô.

²⁰ Nghut kôhang, ngò chyitdap é luzúm wuí ê, nungmoq gi, haû Chyoiyúng Woi-nyí má kyûdùng é dông, nungmoq é chyoiyúng é lumjínng hkyô má, yhumsing gùng yhumsing

lhoq kô yu nyi keq. ²¹ Ahtum abyuq é asak lé wó yû rá matú, haû nganhung é Yhumsing Yesuq Hkrisduq é shogyo nhikmyin hkyô lé láng uchyang, nungmoq gi, Garai Gasâng é chyitdap myit má, yhumsing gùng yhumsing nyi nyi keq.

²² Lumjínng hkyô má úng-âng é bang lé, shogyo nhikmyin nyi keq; ²³ góbang lé gi, myi mai she htoq yû mù, hkyi yû keq; dum, góbang lé gi, sidiq myit eq shogyo nhikmyin hkyô tûn shit mù, haû gungshô é achay chuyut dap é yhangmoq é mebu lé chaq nyi keq.

Hkya-on Kungtôn Dang

²⁴⁻²⁵ Nungmoq lé, a lingbat shoq wó upzúng luí, nungmoq lé, mara hûn rá hkyô a bo é za, gabú dik é dông mai Yhang é hpungwup shingkang bo é myoq hí má wó shuít shit é, nganhung é hkyi yû Sû, rayuq za nghut é Garai Gasâng chyáng, hpungwup shingkang, hkikhkam hkyô, hpungwup a-tsam eq ahkáng ayá gi, nganhung é Yhumsing Yesuq Hkrisduq dông mai, laí lò bê ipyat pé má le, ahkuí pyat má le, pyat dedu ahtum abyuq má le, rujoq nyí sháng gaq ô! Amen.

YOHAN É SHING-RÁN Laiká (Revelation)

Dang-hi Hpóng

¹ Yesuq Hkrisduq é shing-rán shí gi, adê myáng má dut lò râ hkyô pé lé, Yhâng é dui-nhâng zoshâng wui lé tún shit nhâng râ matú, Garai Gasâng eq Yesuq Hkrisduq Yhang lé byí tô é nghut lhê. Yhang gi, Yhâng é mau-mang lagyo lé nhang kat luí, Yhâng é dui-nhâng zoshâng Yohan lé, shing-rán haú sé nhang ri. ² Yohan gi, Garai Gasâng é mungdang eq Yesuq Hkrisduq é saksé lé, yhang myang é gû banshoq eq rajung za saksé hkâm kyô é nghut ri. ³ Haú ahkyíng gi, chyâng lò bê nghut é yanmai, myiqhtoi dang shí pé lé, nghap kyô é sù eq, gyô yù luí, haú má kâ tô é gû lé châng kut é bang gi, hkungsô wó nyi akô.

Noqkuq Hpúng Nyhit Lhum Lé Dang Kyô Kat É Hkyô

⁴ Ngò Yohan gi, Asia mau mâ é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rû nyi nyi é Su chyáng mai le, Yhâng é hkohkâm-tanghkuq hí mâ é nyhit woi-nyí chyáng mai le, ⁵ lhumzuí é saksé nghut sù, shi byuq é mai sâng-hi dui toq é zomún dut sù, myidàm htoq mâ é hkohkam pé lé up sù, Yesuq Hkrisduq chyáng mai le, jeju eq nguingón hkyô gi, nungmoq chyáng joq nyí sháng gaq.

Nga-nhúng lé chyitdap luí, Yhâng é suí eq, nga-nhúng lé, nga-nhúng é mara pé mai lhoq lhut byí é eq, ⁶ Yhâng é Garai Gasang eq Íwa lé do-jaú râ matú, nga-nhúng lé, mingdán byu pé eq hkyangjông pé* dut nhang é Su chyáng, duqwup shingkang eq

hpungwup a-tsam gi, pyat dedu ah-tum abyuq ru joq nyí sháng gaq ô! Amen.

⁷ Wú keq, Yhang gi, mhut mai lé lo nyi é nghut luí, myoqjí hkangmó gi, Yhang lé myàng kó râ nghut lhê;

haú Yhang lé htaú rot bang† lháng, myàng kó râ nghut lhê;

haú myidàm htoq mâ é byù lhunglhâng bang gi, Yhâng é yanmai, yón ngau é hui zo kó râ nghut lhê.

Haú dông nghut sháng gaq! Amen.

⁸ "Ngò gi, Alhpa eq Omega‡ nghut lhê. Ahkui pyat le, a-nham pyat le, htang pyat má le rû nyi nyi é, wum-o a-tsam dik shoq bò Sù nghut lhê." ga, haú Yhumsing Garai Gasang taí ri.

Byu Yhangzo Su Dut Su É Hkyô

⁹ Yesuq é, wúhke jamjau hkyô má le, mingdán má le, jân shirang é hkyô má le, nungmoq é byinzùm nghut sù, ngò nungmoq é gumang hpó, Yohan gi, Garai Gasâng é mungdang eq Yesuq é saksé é yanmai, Patmo zínlong má nyi nyi é nghut lhê. ¹⁰ Haú Yhumsing é Buinyi§ má, ngò gi, Woi-nyí eq shuí moq byuq ló é nghut mù, "Nàng myang é eq rajung za, chyúmding ralhú má ká luí, Ehpesu, Samurna, Pergamu, Htuatira, Sardi, Hpiladehpi eq Ladoki wà pé má joq é, ¹¹ noqkuq hpúng nyhit lhúm chyáng hun kat aq." ga, tut htê su gâ é htê mó, ngá é nunghtáng má mying é lé, ngò wó gyô ri.

¹² Haú ngo lé nyo nyi é htê yhumsing lé wú râ matú, ngò, gùng lhing kat é nghut lhê. Ngò gi, gùng lhing kat é hkùn, hîng myi-kok tsungjang nyhit lhum lé le, ¹³ myi-kok tsungjang haú pé é agùng má, byu yhangzo su dut é Sù rayuq nyi tô é lé le, myang kat ri; haú yuq gi, hkyigoq htoq jé é buhîng wut to luí, wànggàng

* **1:6** Htoq Ló 19:6 † **1:7** Htau rot bang gâ é gi, Yesuq tapzîng má jén to huí é hkùn, Yhâng é namcham má lham eq htaú é bang lé gâ lhê. ‡ **1:8** Alhpa eq Omega gi, Grik laiká myhí mâ é sâng-hí cham eq ló htâng cham nghut lhê; haú taí nau é gi, rû dui nyi sù gâ é nghut lhê. § **1:10** Yhumsing é Buinyi gâ é gi, yuban nyí lé gâ lhê.

má hîng wànggò le wut tô ri. ¹⁴ Yhâng é ulhum eq xâm gi, sau hpyû maú eq gyo su hpyu zan tô ri; Yhâng é myoqjî gi, myishâm su duq nyi ri. ¹⁵ Yhâng é hkyî gi, myi bunghkyûng má jên yu é jet é gyi su dut ri; Yhâng é htê gi, wui myo myo mying hûm é htê su gâ ri. ¹⁶ Yhâng é loqyo loq má gi, kyî nyhit cham chung tô ri; Yhâng é nhut mai gi, shamsó í shut dap é shâm htoq lo ri. Yhâng é myoqdong gi, htan dik é nyí gûng bui su tso nyi ri.

¹⁷ Yhang lé myang é hkûn, ngò gi, shî gùng su, Yhâng é hkyî wang má lêng leq tô é nghut lhê. Haú hkûn, Yhang gi, Yhâng é loqyo loq ngá ahtoq má ke byi mù, taí é gi, "Hkâgyuq, Ngò gi, Sâng-hi eq Jihtûm nghut lhê. ¹⁸ Ngò gi, dui nyi Sû le nghut lhê; Ngò gi, shî bê nghut kôle, wú keq, pyat dedu ah-tum abyuq dui nyi é nghut lhê! Hau htoq agó, Ngò gi, shî hkyô eq momîng é zoqshi pé lé chûng Su nghut lhê.

¹⁹ Haú mù, nàng myang é lé le, ahkuí dut é hkyô eq htàngnùng le dut lò rá hkyô lé le, kâ to aq. ²⁰ Nàng myang é, Ngá é loqyo loq mâ é kyî nyhit cham eq hîng myi-kok tsung-jang nyhit lhûm é zaú tô é hkyo é lichyúm gi, isu nghut lhê. Kyî nyhit cham gi, noqkuq hpúng nyhit lhûm é maumang lagyo nyhit yuq nghut ri; myi-kok tsungjang nyhit lhûm gi, noqkuq hpúng nyhit lhûm nghut ri.

2

Ehpesu Myuq Mâ É Noqkuq Hpúng Lé Kâ Kat É Laiká

¹ Ehpesu myuq mâ é noqkuq hpúng é maumang lagyo lé isu nghû kâ kat aq:

Haú yhâng é loqyo loq má kyî nyhit cham chûng luí, hîng myi-kok tsungjang nyhit lhûm é gyoro má sô nyi Su é dang gi, ² 'Ngò gi, náng é a-kyang, nàng shikut é hkyô, nàng hkam jân é hkyô pé lé, sê lhê. Agè ashop é byu pé lé, nàng a jân pyâm é hkyô lé le, haú lagyo a nghut kôlhang, lagyo pé nghut lhê gâ é bang lé, nàng chyam wú mù, yhangmoq lagyo apyoq pé nghut é

lé wó sê yù kô é hkyô lé le, Ngò sê lhê. ³ Nàng gi, shikut shirâng bê nghut é htoq agó, Ngá mying é yanmai, wuîhke hkyô lé hkam jan bê nghut kôle, ngú byuq é hkyô a bò nghut ri.

⁴ Nghut kôlhang, nàng gi, náng é sâng-hi lhê é chytidap myit lé tô pyâm é yanmai, ngò, náng lé mara hûn rá hkyô joq ri. ⁵ Nàng hká mai byit gyó é lé, myit bun aq! Myit lhîng luí, sâng-hi nàng kut é muzó pé lé, kut aq. Nàng myit a lhîng é nghut jáng, ngò, náng chyáng lé jé mù, náng é myi-kok tsungjang lé, hau é jowò mai huí pyám byi rá nghut lhê. ⁶ Nghut kôlhang, Ngò a jú é, Nikola é chángzô pé kut é hkyô lé, nàng le a jú kut é yanmai, náng chyáng ge é hkyô ralhum bo ashí nghut ri.

⁷ Gyo rá nohkyap dap sù gi, haú Woi-nyí mai noqkuq hpúng pé lé taí é hkyô lé, gyô yù sháng gaq. Wó ung é sù lé gi, haú Garai Gasâng é hparadisú má joq é asak sigâm má é ashí zo rá ahkáng, Ngò byi rá nghut lhê.' gâ ri.

Samurna Myuq Mâ É Noqkuq Hpúng Lé Kâ Kat É Laiká

⁸ Samurna myuq mâ é noqkuq hpúng é maumang lagyo lé isu nghû kâ kat aq:

Haú Sâng-hi eq Jihtûm nghut é eq, shi byuq luí, asak dum dui Su é dang gi, ⁹ Nàng hui zô é wuîhke jam-jau hkyô eq nàng myung é hkyô lé, Ngò sê lhê; nghut kôlhang, nàng gi, wó sù nghut ri! Tsadán é tarajong bang nghut to luí, Yudaq byu pé a nghut kôlhang, Yudaq byu nghut lhê gâ é bang taí hpoí é hkyô lé le, Ngò sê lhê. ¹⁰ Nàng hui zo rá nghut é wuîhke hkyô lé, hkâgyuq. Ngò, nungmoq lé taí kyo kôlé, haú nat Tsadán gi, nungmoq lé chyam wú é dông, nungmoq chyáng má é ra-am lé, htóng má hkyô pyám rá nghut lhê; hau htâng, nungmoq gi, raxê nyí tup zing-rí é hui zo kó rá nghut lhê. Shî shoq lhuzuí nyi aq, haú

hkùn, Ngò, nang lé, asak janmaú byi râ nghut lhê.

¹¹ Gyo râ nohkyap dap sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq. Í dâm nghû râ shi é hkyô* gi, wó ung é sù lé, wó záng htung râ a nghut.' gâ ri.

*Pergamu Myuq Mâ É Noqkuq
Hpûng Lé Kâ Kat É Laiká*

¹² Pergamu myuq mâ é noqkuq hpûng é maumang lagyo lé isu nghû kâ kat aq:

Haú shamsó í shut dap é shâm wó Su é dang gi, ¹³ Nàng nyi é jowò lé, Ngò sê lhê; haú gi, Tsadán é hkohkâm-tanghkuq joq é jang nghut ri. Nghut kôlhang, nàng gi, Ngá myîng má lumhkau nyi é nghut luí, Tsadán nyi é jang nghut é nungmoq é myuq má, Ngá é lhumzuí é saksé hpó Antipa sat huí é hkùn lháng, nàng Ngo lé lumjîng é hkyô lé, a hengik pyám nghut ri.

¹⁴ Nghut kôlhang, Ngò, nang lé mara hùn râ hkyô ratsuí joq ashí; hkâsu mù gâ le, hparà lhô pé lé tîng byí é zoshuq zô é eq, ashop é dông gungsho zùm yap é mara kut shut râ matú, Israelaq byu pé lé mhoq hpyoq râ hpaqchyí, Balak lé mhoq byí é Balam é mhoqshit hkyô lé myhik zing é byu pé, náng chyáng nyi ri. ¹⁵ Haú eq rajung za, haú Nikola é chángzô pé mhoqshit é hkyô lé myhik zing é byu pé le, náng chyáng nyi ri. ¹⁶ Haú mù luí, myit lhîng aq! Haú a nghut jáng, Ngò gi, náng chyáng hân jé lé mù, haú Ngá nhut mai htoq é sham èq yhangmoq lé zan râ nghut lhê.

¹⁷ Gyo râ nohkyap dap sù gi, haú Woi-nyí mai noqkuq hpûng pé lé taí é hkyô lé, gyô yù sháng gaq. Wó ung é sù lé gi, haq tô é mannaq muk lé le, myîng asik kâ tô é luqgok hpyû racham lé le, Ngò byi râ nghut lhê, lhom hap yu é sù za sheq, myîng haú lé sé râ nghut lhê.' gâ ri.

*Htuatira Myuq Mâ É Noqkuq
Hpûng Lé Kâ Kat É Laiká*

¹⁸ Htuatira myuq mâ é noqkuq hpûng é maumang lagyo lé isu nghû kâ kat aq:

Haú myishâm su duq nyi é myoqjí eq jet é gyi su dut é hkyî dap é Sù, Garai Gasâng é Yhangzô é dang gi, ¹⁹ Náng é a-kyang, chyitdap myit, lumjîng myit, dojaú é hkyô, hkam jân é hkyô pé lé le, nàng gi, hí lhê htoq má ahkuí je myô zui saí é hkyô lé le, Ngò sê lhê.

²⁰ Nghut kôlhang, yhumsing gùng yhumsîng myiqhtoi myhí nghut lhê gâ é myiwe Yezebulaq lé, nàng nyi nhang tô é yanmai, Ngò, nang lé mara hùn râ hkyô joq ri. Yhang gi, Ngá é dui-nhâng zoshâng wuì lé, ashop é dông gungsho zùm yap râ eq hparà lhô pé lé tîng byí é zoshuq zo râ hkyô lé mhoqshit luí, yhangmoq lé hkyô shuí nghoq ri.

²¹ Ngò gi, yhang lé, ashop é dông gungsho zùm yap é hkyô mai myit lhîng râ ahkyíng byi kôlhang, yhang gi, a myit lhîng nau nghut ri. ²² Haú mù, Ngò gi, yhang lé, jamjau hui râ yhupchong má dú lheq pyám râ nghut é htoq agó, yhang eq su-myi sulàng lú hkyô kut é bang, yhangmoq kut é hkyô lé myit lhîng kô é za a nghut jáng, wuîhke jamjau mó hui zo nhâng râ nghut lhê. ²³ Ngò gi, yhang zô pé lé sat pyám râ nghut lhê; haú hkùn, Ngò gi, myit nhiklhum eq myit é hkyô lé sé Sù nghut é lé le, nungmoq kut é muzó eq rajung za, nungmoq yuq hkangmó lé, Ngò tau byi râ nghut é lé le, haú noqkuq hpûng pé banshoq wó sé kó râ nghut lhê. ²⁴ Mhoqshit hkyô haú lé a châng é eq Tsadán é nik é hkyô lhaq gâ é lé a mhoq yu é, Htuatira myuq má myit gyó tô é bang nungmoq lé, Ngò taí kôlé, nungmoq lé gotú wòlai Ngò jat byi râ a nghut. ²⁵ Ngò jé lé é jé shoq, nungmoq wó tô é lé za myhik zing nyi keq.

²⁶⁻²⁷ Wó ung é eq Ngò ô nau é

* **2:11** Í dâm nghû râ shi é hkyô gâ é gi, ngaraí ming wang é lé gâ lhê.

hkyô lé jìhtûm jé shoq châng é sù lé gi,
 "Yhang gi, yhangmoq lé, shamtoq dumbáng eq up† râ nghut lhê;
 Yhang gi, tso-au hkoq pé lé su, yhangmoq lé bat hkyop pyám râ nghut lhê."[☆]
 gâ tô é eq rajung za, Ngò, Ngá Wâ chyáng mai ahko ahkáng wó yu é su, mingdán pé lé up râ ahko ahkáng, Ngò byi râ nghut lhê.
²⁸Ngò gi, yhang lé, haû bó-myhû byi râ nghut lhê. ²⁹Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

3

Sardi Myuq Mâ É Noqkuq Hpúng Lé Kâ Kat É Laiká

¹ Sardi myuq mâ é noqkuq hpûng é maumang lagyo lé isu nghû kâ kat aq:

Haû Garai Gasâng é woi-nyí nyhit woi-nyí eq kyî nyhit cham lé chûng Su é dang gi, 'Ngò gi, náng é a-kyang lé sê lhê; nàng gi, asak dui nyi sù ga kôlhang, shi byuq sù nghut ri.

² Gyîng lò aq! Myit gyó tô é, shi byuq râ za nghut é pé lé, wum-o lhoq kîng yù aq; hkâsu mù gâ le, Ngá é Garai Gasâng é hí má, náng é a-kyang a gumjup é hkyô lé, Ngò myang ri.

³ Haû mù, nàng hkâsu kut wó hap yu é eq wó gyô yu é hkyô lé, myit bun aq; haû dông cháng luí, myit lhîng aq. Nàng a bûn gyîng é nghut le gi, Ngò hkau sù su lé râ nghut luí, nàng gi, Ngò hká u lé râ lé, sé râ a nghut.

⁴ Nghut kôlhang, Sardi myuq má, yhumsing é mebu lé agot a-û a kut é byù ra-am nyi akô. Haû bang gi, hpyu é mebu wut luí, Ngò eq rahá sô wún kó râ nghut lhê; hkâsu mù gâ le, yhangmoq gi, gingdán é bang nghut akô. ⁵ Wó ung é sù gi, haû bang su, hpyu é mebu myang wut râ nghut lhê. Ngò gi, haû yuq é myîng lé, hkâ-nhâm le, asak jihpán

laiká buk mai yu pyám râ a nghut; hau htoq agó, Ngá Wâ é hí má le, Yhâng é maumang lagyo pê é hí má le, haû yuq é myîng lé, Ngò yín yû râ nghut lhê. ⁶ Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

Hpiladehpi Myuq Mâ É Noqkuq Hpúng Lé Kâ Kat É Laiká

⁷ Hpiladehpi myuq mâ é noqkuq hpûng é maumang lagyo lé isu nghû kâ kat aq:

Haû chyoiyúng é eq tengmán é, Dawiq hkohkam é zoqshi chung é, ó yuq le a wó myhi loshoq hpông é eq, ó yuq le a wó hpông loshoq myhî é Su é dang gi, ⁸ Nàng kut é muzó pé lé, Ngò sê lhê. Wú aq, ó yuq le a wó myhî é hkum ralhum, Ngò náng hí má hpông to byi lhê. Nàng gi, wum-o ratsuí za bò kôlhang, Ngá é dang gyo luí, Ngá é myîng lé a hengik pyám é hkyô lé, Ngò sê lhê.

⁹ Haû tarajong má noqkuq kôlhang, Tsadán lé dojaú bang nghut é, Yudaq byù a nghut kôlhang, nghut lhê gâ é byù mhaû pé lé, Ngò, náng é hkyî wang má, lé paí gop nhâng luí, Ngò, nàng lé chyitdap é hkyô, yhangmoq lé sé nhâng râ nghut lhê.

¹⁰ Nàng gi, myit hîng hîng hkam jan râ é Ngá é hkunmó lé châng nyi bê nghut é yanmai, myidàm htoq má nyi é bang lé chyam lik wú râ matú, mingkan gón má jé râ nghut é wuîhke jamjau ahkyíng mai, Ngò, nang lé lhoq lhut yû râ nghut lhê.

¹¹ Ngò gi, a myáng má jé lé lô râ nghut lhê. Náng é janmaú lé, ó yuq eq le a wó yu pyám byi sháng gaq, nàng wó tô é pé lé myhik zing nyi aq. ¹² Wó ung é sù lé gi, Ngá é Garai Gasâng é noqkuq yhûm mâ é hkungzing mó dut nhâng râ nghut lhê. Haû yuq gi, hkâ-nhâm le haû mai dum htoq ló râ a nghut. Ngò gi, Ngá é Garai Gasâng é myîng lé le, Ngá é Garai Gasâng chyáng mai

† 2:26-27 Shamtoq dumbáng eq up gâ é gi, ahko ahkáng banshoq wó luí, up é lé gâ lhê. ☆ 2:26-27 Hkya-on 2:9

htoq luí, mauhkûng mai gyó lé lo é, Yerusalem wà mó Asik ga é, Ngá é Garai Gasâng é myuq myîng lé le, Ngá é myîng sik lé le, yhâng chyáng kâ tap byi râ nghut lhê. ¹³ Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq.' gâ ri.

Ladoki Myuq Mâ É Noqkuq Hpûng Lé Kâ Kat É Laiká

¹⁴ Ladoki wà mó mâ é noqkuq hpûng é maumang lagyo lé isu nghû kâ kat aq:

Haû lhumzûi é eq tengmán é saksé nghut é, Garai Gasang hpan tô é lé up é, Amen gá Su é dang gi, ¹⁵ 'Ngò gi, nàng kut é muzó lé sê lhê; nàng gi, gú le a nghut, nye le a nghut dut ri. Nàng gi, gú jáng jâng gú, nye jáng jâng nye dut râ lé, Ngò ô nau ri. ¹⁶ Nghut kôlhang, nàng gi, gú le a nghut, nye lé a nghut, lumnye nghut é yanmai, Ngò gi, nang lé, Ngá é nhut mai byé htoq pyám râ za nghut bê. ¹⁷ "Ngò gi, wó sù nghut lhê; ngò gi, sutzè gyai wó bê nghut luí, haí lháng a ra lo." ga nàng taí ri. Nghut kôlhang, nàng gi, wuîhke jam-jau hui sù, asho awui dut sù, myûng sù, myoqjít sù eq achîn dut sù nghut é lé, nàng a sé myhi-nhung. ¹⁸ Haû mù luí, nàng gi, wó sù sùt sù wó dut sháng gaq, myi má jên yu é hîng lé le, nàng achîn dut é hoq hpu hkyô lé, wó nghop pyám sháng gaq, wut râ matú, mebu hpyû lé le, nàng myoq wó myâng sháng gaq, náng é myoqjí má kat râ matú, myoq chí lé le, nàng, Ngá chyáng mai wui yù râ matú, Ngò, nang lé hpaqchyî byí lhê.

¹⁹ Ngò chyitdap é bang lé gi, tan luí, mhoqshit lhê. Haû mù, nàng gi, hân bûn gyîng luí, myit lhîng aq.

²⁰ Wú aq! Ngò gi, hkum yâm má yap to luí, hkum lé kok nyi lhê. Rayuq yuq, Ngá é htê lé wó gyo luí, hkum hpóng byî é nghut jáng, Ngò gi, wàng mù, haú yuq eq rahá zo shuq râ nghut lhê; haú yuq le, Ngò eq rahá zo shuq râ nghut lhê.

²¹ Ngò gi, ûng luí, Ngá Wa eq rahá Yhâng é hkohkâm-tanghkuq má zung é eq rajung za, wó ung é sù lé gi, Ngò eq rahá Ngá é hkohkâm-tanghkuq má zûng râ ahkáng, Ngò byi râ nghut lhê. ²² Gyo râ nohkyap dap é sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq.' gâ é nghut ri." gâ ri.

4

Mauhkûng Htoq Má Hkohkâm-tanghkuq Joq É Hkyô

¹ Hau htâng má, ngò wú kat le, mauhkûng má hkum ralhum bóng tô é lé myang ri. Ngò sâng-hî dàm wó gyô é tut htê su gâ é danghtê ngo lé taí é gi, "Shî má doq lò aq, htàngnùng má dut lò râ hkyô pé lé, Ngò, nang lé tûn shit bá." gâ ri.

² Haú hkûn jáng yhang, ngò gi, Woi-nyí má moq byuq ló luí, mauhkûng htoq má hkohkâm-tanghkuq ralhum joq é lé myàng ri; tanghkuq haú má, byù rayuq zung tô ri. ³ Haû má zung to Su é isâm gi, huhpé eq ne yúng lungsêng su dut ri. Huí nyui lungsêng su dut é woqgan síng-yang gi, haû hkohkâm-tanghkuq má hkông lhîng tô ri. ⁴ Hkohkâm-tanghkuq hau é lhîngkyuq má, hkohkâm-tanghkuq gotú í xe myî lhum le joq to luí, hpyu é mebu wut mù, ulhum má hîng jan-maú tsûng tô é suwún í xe myî yuq gi, haú má zung tô bum akô. ⁵ Haû hkohkâm-tanghkuq mai, lhap hpyat é, mying hûm é eq maugum gûm é pé dut htoq lo ri. Haû hkohkâm-tanghkuq hí má, myi-kok nyhit lhum le duq tô ri; haú pé gi, Garai Gasâng é woi-nyí nyhit woi-nyí nghut ri. ⁶ Hau htoq agó, san zâ é myoqjâm su dut mâ é wui-nhông le, haû hkohkâm-tanghkuq hí má dîng tô ri.

⁷ Haû hkohkâm-tanghkuq agùng má le, lhîngkyuq má le, hî-u nunghtáng lhîngkyuq myoqjí dap é dui é dusak myî du nyi tô ri. ⁷ Dui é dusak sâng-hî du gi, hkanghkyi su dut ri; í du nghû râ du gi, nohtó su dut ri; sùm du nghû râ dú é myoqdong gi, byu

myoqdong su dut ri; myî du nghû râ du gi, dâng wún é zunbung su dut ri. ⁸ Dui é dusak myî du haû gi, du hkgangmó dùng hkyuq lhum lhum dap é htoq agó, lhinghkyuq má myoqjí kôm dap luí, dùng hkaû má lháng dap ri. Yhangmoq, nyí myín hkâ-nhám a no loshoq taí nyi kô é gi,

"A-nham pyat le, ahkuí pyat le, htang pyat má le, rû nyi nyi é, haû wum-o a-tsam dik shoq bò Sû Yhumsîng Garai Gasang gi, chyoiyúng, chyoiyúng, chyoiyúng nyi ri."

gâ akô. ⁹ Haû dui é dusak myî du gi, hkohkâm-tanghkuq má zung é, pyat dedu ahtum abyuq dui nyi Su chyáng, hpungwup shingkang, aróng eq jeju bun hkyô byî é hkgangmó, ¹⁰ haû suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop luí, Yhang lé noqkuq akô. Yhangmoq gi, yhangmoq é hkohkâm-janmaú lé, haû hkohkâm-tanghkuq hí má hkyut to mù, taí kô é gi,

¹¹ "Ngamoq é Yhumsîng eq Garai Gasang é, nyi mi-nyí, joq mijoq lé, Nàng hpan to bê nghut luí, haû pé gi, Nàng ô nau é dông hpan tô é hui bê nghut mù, nyi to joq tô bùm bê nghut é yanmai, Nàng gi, hpungwup shingkang, aróng eq hpungwup a-tsam lé, hap yù gíng Sû nghut ri." gâ akô.

5

Chyúmding Eq Sauzo

¹ Hau htâng, ngò gi, hkohkâm-tanghkuq má zung to Su é loqyo loq má, í shut é laiká kâ to é, dizik nyhit lhum tap tô é chyúmding le myang ri. ² Hau htoq agó, a-tsam mó bo é mau-mang lagyo rayuq gi, "Haû dizik pé lé hí pyám râ eq chyúmding lé hpóng râ gi, ó yuq wá gingdán lhê lhú?" ga luí, htê mó èq wut taí nyi é lé le, ngò myang ri. ³ Nghut kôhang, mauhkûng htoq má le, myigùng htoq má le, myigùng ô má le, haû chyúmding lé

wó hpóng râ eq ahkaû má wó wú râ byù rayuq lháng a nyi nghut ri. ⁴ Haû chyúmding lé hpóng mù, ahkaû má wú râ gingdán é byù rayuq hkâlháng a nyi é yanmai, ngò gyai yhang ngau pyám é nghut lhê. ⁵ Haû hkûn, haû suwún wui mâ é rayuq, ngo lé taí é gi, "Hkâ-ngaû! Wú aq, haû Yudaq byuhú mâ é Hkanghkyi nghu é, haû Dawiq é Amyit nghut Sû gi, ûng bê nghut luí, haû chyúmding eq haû mâ é dizik nyhit lhum lé wó hpóng lhê." gâ ri.

⁶ Hau htâng, haû dui é dusak myî du eq suwún wui é agùng mâ é, hkohkâm-tanghkuq agùng má, sat hui bê su dut é Sauzo radu yap tô é lé, ngò myang ri. Sauzo haû gi, hkyuî nyhit lhum eq myoqjí nyhit lhum dap ri. Myoqjí haû nyhit lhum gi, myidàm htoq gón má nhang htoq kat é, Garai Gasâng é woi-nyí nyhit woi-nyí nghut ri. ⁷ Haû Sauzo gi, lé mù, hkohkâm-tanghkuq má zung to Su é loqyo mâ é chyúmding lé yu ri. ⁸ Haû chyúmding lé yu é hkûn jáng, haû dui é dusak myî du eq suwún í xe myi yuq gi, Sauzo é hí má ngóm gop akô. Yhangmoq yuq hkgangmó gi, tít eq sân-yúng bâng é kyúdung dang gâ é namngón jung byíng mui tô é híng góm pé le chung bum akô nghut ri. ⁹ Yhangmoq gi,

"Nàng gi, haû chyúmding lé yù râ eq hau é dizik pé lé hpóng râ gingdán Sû nghut ri.

Haí mù gâ le, Nàng gi, sat hui bê nghut luí, byuhú hkgangmó mai le, myíng hkgangmó mai le, byù myû hkgangmó mai le, mingdán hkgangmó mai le, Garai Gasâng é matú, Nàng é suí èq byù pé lé wui hpyit yû bê nghut ri.

¹⁰ Nga-nhûng é Garai Gasang lé dojaú râ matú, Nàng gi, yhangmoq lé, mingdán byu pé eq hkyangjông pé dut nhâng bê nghut luí, yhangmoq gi, myidàm htoq má up kó râ nghut lhê." ga luí, mahkôn sik ralhûm hkon akô nghut ri.

¹¹ Haú hkûn, ngò wú kat le, haú hkohkâm-tanghkuq lhîngkhyuq má le, dui é dusak pé eq suwún wui é lhîngkhyuq má le, nyi tô bum é mau-mang lagyo ajùm ayò mun mun sen sên é htê lé wó gyô ri. ¹² Yhangmoq gi,

"Haú sat hui bê Sauzo gi, hpungwup a-tsam, sutzè, hpaqchyî byéng-yá, wum-o, aróng sitang, hpungwup shingkang eq hkya-on kungtôn hkyô lé, hap yù gíng ri."

ga luí, htê mó èq ton bum akô nghut ri.

¹³ Hau htoq agó, mauhkûng htoq má nyi é, myigùng htoq má nyi é, myigùng ô má nyi é, wuiming má nyi é, hpan to huí é lhungháng gi,

"Hkya-on kungtôn hkyô, aróng sitang, hpungwup shingkang eq hpungwup a-tsam gi,

haú hkohkâm-tanghkuq má zung tô é Sû eq Sauzô chyáng,

pyat dedu ahtum abyuq ru joq nyi sháng gaq ô!"

ga luí, ton nyi bùm kô é lé, ngò wó gyô ri. ¹⁴ Haú dui é dusak myí du gi, "Amen" ga taí jang, haú suwún wui gi, ngóm gop luí noqkuq akô nghut ri.

6

Dizik Nyhit Lhûm É Hkyô

¹ Haú Sauzo gi, dizik nyhit lhum mâ é sâng-hî lhum lé hpông kat é hkûn, ngò myang é nghut lhê. Hau htâng, haú dui é dusak myí du mâ é radu gi, maugum su gâ é htê mó èq, "Lé aq." gâ é lé, ngò wó gyô ri. ² Ngò wú kat é hkûn, ngá é myoq hí má myang hpyû radu nyi tô é lé myang ri! Haú má jî to sù gi, lai rahpu chung tô é htoq agó, yhang lé, janmaú ralhum tsùng to byí luí, ùng budang wó râ matú ùng sù rayuq dông htoq ló ri.

³ Haú Sauzo gi, í lhum nghû râ dizik lé hpông kat é hkûn, haú í du nghû râ dui é dusak gi, "Lé aq." ga taí é lé, ngò wó gyô ri. ⁴ Hau htâng, myang nè radu htoq lo ri; haú má jî tô é sù gi, myidàm htoq mâ é nguingón

simsaq hkyô lé wup yù râ eq, byú yhangchang rayuq eq rayuq sat lhum nhâng râ a-tsam byí é hui sù nghut luí, yhang lé shâm mó rahkyam le byí to bê nghut ri.

⁵ Haú Sauzo gi, sùm lhum nghû râ dizik lé hpông kat é hkûn, haú sùm du nghû râ dui é dusak gi, "Lé aq." ga taí é lé, ngò wó gyô ri. Ngò wú kat le, myang noq radu ngá myoq hí má nyi tô é lé myang ri! Haú má jî tô é sù gi, yhâng é loq má jàng rahpu chung to ri. ⁶ Haú hkûn, "Ra-nyí é zuihpau gi, sungso rabyé, ra-nyí é zuihpau gi, muk-yo guq sum byé nghut lhê; haú tsanlun xû eq tsibiyiq wing lé kúm gi, hkâlhoq hten kó." gâ é htê, haú dui é dusak myí du hkaú mai htoq ló é su gâ é lé, ngò wó gyô ri.

⁷ Haú Sauzo gi, myí lhum nghû râ dizik lé hpông kat é hkûn, haú myí du nghû râ dui é dusak gi, "Lé aq." ga taí é lé, ngò wó gyô ri. ⁸ Ngò wú kat é hkûn, ngá é myoq hí má, myang muí radu nyi tô é lé myang ri! Haú má jî to su é mying gi, Shî hkyô gâ ri; Moming le, yhâng é htâng má châng tô ri; yhangnhik gi, sham èq, mutmó gyó é èq, wúm gyó é èq, tân é yosô-ze èq, myidàm htoq myi tú mâ é ratú má nyi é bang lé sat pyám râ ahkáng wó yu to bekô nghut ri.

⁹ Sauzo gi, ngo lhum nghû râ dizik lé hpông kat é hkûn, Garai Gasâng é mungdâng é yanmai le, yhumsîng hkâm é saksê é yanmai le, sat hui bâng é sobyô pé gi, hkungga gyap a-ô má nyi tô bùm kô é lé, ngò myang ri. ¹⁰ Yhangmoq gi, "Chyoiyúng é eq tengmán é, ahko ahkáng lhungháng wó é Yhumsîng ê, myidàm htoq má nyi é byu pé lé, ngamoq é sui manglat dam a byí é eq tarâ a jéyáng é za, hkâ-myháng jé shoq nyi nyi râ lhú?" ga, htê mó èq garu bum akô. ¹¹ Haú hkûn, yhangmoq yuq hkangmó gi, bu hpyû hîng radung dung hut é hui luí, yhangmoq su sat hui râ bang, yhangmoq é byinzùm dui-nhâng zoshâng wui nghut é gumang wui sat huí ngap é hkûn jé shoq, razup zim za nyi shi

keq ga taí é lé wó gyô akô nghut ri.

¹² Hkyuq lhum nghû râ dizik lé, Yhang hpông kat é hkûn, ngò myang ri; haú u lé, layàng mó le nún lo ri; haú bui gi, saumaú noq eq woq é pán su noq byuq ri; haú lhamó lhum gón gi, sui su ne byuq ri; ¹³ maihpáng gâm lé, lài mó eq lo mut nhûn kat é hkûn, a myhíng shî é maihpáng-shi yoq gyó é su, mauhkûng mâ é kyí pé gi, myidàm htoq má byit gyó lo bum ri. ¹⁴ Haú mauhkûng gi, laiká lé dîng lhûm é su htot pyâm é hui luí, bùm hkgang bùm mó eq zinlóng lhumjup pé gi, yhâng é jowò mai huí pyâm é huí ri.

¹⁵ Haú hkûn, haú myidàm htoq mâ é hkohkam pé, uphkang bang, gyezaú pé, sut wó bang, wum-o a-tsam bò bang, jun pé eq luthkyô wó é lhunglhâng bang gi, bùm dong pé eq bùm pé mâ é luqgok gyoro pé má haq tô bùm uchyang, ¹⁶ haú bùm pé eq luqgok pé lé, "Ngamoq é gùng htoq má gyó ke kó laq! Haú hkohkâm-tanghkuq má zung to Su é myoq hí mai le, haú Sauzô é nhikmo-yô é hkyô mai le, ngamoq lé haq pyám kó laq. ¹⁷ Hkâsu mù gâ le, haú Yhangnhik nhikmo-yô é buinyi mó gi, jé bê nghut ri; ó yuq wá wó jân yap nyi râ lhú?" ga garú taí bum akô nghut ri.

7

144,000 Yuq Masat Lhô Tap Hui Kô É Hkyô

¹ Hau htâng má, maumang lagyo myi yuq gi, maumyî myi chyûn má yap to mù, myigùng htoq má le, wui ming htoq má le, sikhâm pé má le, lài a hik sháng gaq ga, myi shut mâ é lài lé zuí zing to kô é lé, ngò myang ri. ² Haú hkûn, haú dui nyi é Garai Gasâng é masat lhô chung é maumang lagyo gotû rayuq gi, buihtoq hkyam mai htoq lé lo é lé, ngò dum myang ri. Yhang gi, haú myigùng eq wui ming lé lhoq hten râ ahkáng wó tô é maumang lagyo myi yuq haú lé, ³ "Nga-nhûng é Garai Gasâng dui-nhâng zoshâng wui é ngelang má, ngamoq mai masat lhô a tap byi byi gi,

haú myigùng, wui ming eq sikhâm pé lé hkâlhoq hten shi kó." ga htê mó eq wut taí kat ri. ⁴ Haú hkûn, masat lhô tap huí é bang byù hkâ-myhó yuq nghut é lé, ngò wó gyô ri. Israelaq byuhú banshoq mâ é 144,000 yuq nghut ri.

⁵ Masat lhô tap huí yu é, Yudaq up mâ é bang gi, 12,000 yuq, Rubin up mâ é bang gi, 12,000 yuq, Gat up mâ é bang gi, 12,000 yuq, ⁶ Ashe up mâ é bang gi, 12,000 yuq, Nahtali up mâ é bang gi, 12,000 yuq, Manase up mâ é bang gi, 12,000 yuq, ⁷ Simeon up mâ é bang gi, 12,000 yuq, Lewiq up mâ é bang gi, 12,000 yuq, Yishahka up mâ é bang gi, 12,000 yuq, ⁸ Zebulun up mâ é bang gi, 12,000 yuq, Yosep up mâ é bang gi, 12,000 yuq, Ben-yamyin up mâ é bang gi, 12,000 yuq, nghut bum akô.

Bu Hpyû Hîng Wut Bâng É Hkyô

⁹ Hau htâng, ngò wú kat é hkûn, mingdán hkgangmó mai le, byuhú hkgangmó mai le, byù myû hkgangmó mai le, myíng chângjup mai le, lé é bang, ó yuq lhang a ung nghap é byù moq mó gi, haú hkohkâm-tanghkuq é hí má le, Sauzô é hí má le, yap nyi bùm kô é lé myang ri; yhangmoq gi, bu hpyû hîng wut luí, yhangmoq é loq má byùm-haq chung tô bùm kômù,

¹⁰ "Hkyi yù hkyô gi, haú hkohkâm-tanghkuq má zung tô é ngan-nhûng é Garai Gasang eq Sauzo chyáng mâ é nghut ri ô!"

ga luí, htê mó eq garú bum akô nghut ri. ¹¹ Haú maumang lagyo lhunglhâng bang gi, haú hkohkâm-tanghkuq é lhînghkyuq má le, suwún wui eq dui é dusak myî du é lhînghkyuq má le, yap tô akô nghut ri. Yhangmoq gi, hkohkâm-tanghkuq hí má myoqdong ngóm gop mù, Garai Gasang lé noqkuq uchyang,

¹² "Amen! Hkya-on kungton hkyô eq hpungwup shingkang, hpaqchyí byéng-yá eq jeju bun hkyô,

aróng, hpungwup a-tsam eq wum-o gi,
nga-nhông é Garai Gasâng chyáng pyat dedu ahtum abyuq ru joq nyí sháng gaq ô!

Amen!"
ga tai bum akô.

¹³ Haú hkûn, suwún wui má é rayuq gi, "Shí bu hpyû hîng wut é bang gi, ô pé lú? Yhangmoq gi, hkâmai lé é bang nghut akô lú?" ga ngo lé myí ri.

¹⁴ Ngò gi, "Suwún hpó ê, nang sê lhê." nghú tú tai jáng, yhang gi, "Shí bang gi, haú wuihke jamjau mó mai wó lut htoq lô lui, yhangmoq é bu hîng lé, haú Sauzô é sui má chí hpyû yù bê bang nghut akô. ¹⁵ Haú mù, yhangmoq gi, Garai Gasâng é hkohkâm-tanghkuq hí má nyí mù, Yhâng é noqkuq yhûm má, nyí, myín Yhang lé dojaú nyí kô é nghut lhê; haú hkohkâm-tanghkuq má zùng Sú gi, Yhâng é jonghpang lé, yhangmoq é ahtoq má nghop byi râ* nghut lhê.

¹⁶ Yhangmoq gi, hkâ-nhám le, zòmut wuìshit hui râ a nghut lo; buì lhap é le, hkyíng hkyíng nyé é le, yhangmoq lé wó záng râ a nghut. ¹⁷ Hkâsu mù gâ le, haú hkohkâm-tanghkuq agùng má é Sauzo gi, yhangmoq é sau-rém sù dut râ nghut lui, Yhang gi, yhangmoq lé, asak wuìbúm jé shoq shuí ê râ nghut lhê. Hau htoq agó, Garai Gasang gi, yhangmoq é ngaubyi sháng shoq sut pyám byi râ nghut lhê." ga tai ri.

8

Nyhit Lhum Nghú Râ Dizik Eq Namngón Jung Nyhê É Hîng Góm

¹ Haú Sauzo gi, nyhit lhum nghú râ dizik lé hpông kat é hkûn, mauhkûng htoq má hkyíng hkum rawuí kô zîm byuq ri.

² Haú hkûn, Garai Gasâng é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byi tô ri.

³ Namngón jung nyhê é hîng góm chung é maumang lagyo gotú rayuq

gi, haú hkungga gyap yàm má lé yap tô ri. Haú hkohkâm-tanghkuq hí má é hîng hkungga gyap má, sân-yúng bang banshoq é kyûdung dang eq rahá nhông byi râ matú, namngón jung gyai myo shoq, yhang lé byi tô ri. ⁴ Haú namngón jûng é myihkau gi, sân-yúng bâng é kyûdung danghtê eq rahá, maumang lagyo haú yuq é loq mai Garai Gasâng chyáng hkyang rot lô bê nghut ri. ⁵ Hau htâng, maumang lagyo haú yuq gi, góm lé yù mù, hkungga gyap má é myi lhoq pyîng yù lui, myidàm htoq má dú hkyô kat é hkûn, maugum mó gûm é, mying hûm é, lhap hpyat é eq layàng nún é pé dut htoq lo ri.

Tut Mut É Hkyô

⁶ Hau htâng, tut nyhit lhum wó é maumang lagyo nyhit yuq gi, tut mut râ hen akô nghut ri.

⁷ Sâng-hî yuq nghú râ maumang lagyo gi, yhâng é tut lé mut kat ri; haú hkûn, sui nyó é likwò eq myi htoq lô mù, haú lé myidàm htoq má lhoq hkyô kat jáng, maumyí sum tú má é ratú eq sîkgâm sum tú má é ratú nyé gyó byuq é htoq agó, wàhu mhanzo banshoq le nyé gyó byuq bê nghut ri.

⁸ Í yuq nghú râ maumang lagyo gi, yhâng é tut lé mut kat ri; haú hkûn, myi dap tô é bùm mó su é lé, wuìshuq lung-aú má dú hkyô kat ri. Wuìshuq lung-aú sum tú má é ratú gi, sui dut byuq bê nghut ri; ⁹ wuìshuq lung-aú má é dui jung sum tú má é ratú gi, shi byuq lui, wuì-sanghpo pé sum tú má é ratú gi, htên byuq bê nghut ri.

¹⁰ Sum yuq nghú râ maumang lagyo gi, yhâng é tut lé mut kat ri; haú hkûn, myihu dùm su duq é kyí mó racham gi, mauhkûng mai byit gyó lô mù, wuìlàng sum tú má é ratú eq wuìbúm pè htoq má lo gyó záng ri. ¹¹ Kyí hau é myìng gi, Kyí Kyí Hko gâ é nghut ri. Wuìlàng sum tú má é ratú hkô byuq lui, wuì haú hkô byuq

* 7:15 Yhâng é jonghpang lé, yhangmoq é ahtoq má nghop byi râ, gâ é gi, yhangmoq eq rahá nyí mù, yhangmoq lé upzúng nyí râ gâ é nghut lhê.

é yanmai byù myo myo shi byuq bekò nghut ri.

¹² Myi yuq nghû râ maumang lagyo gi, yhâng é tut lé mut kat ri; haú hkûn, bui sum tú ratú, lhamó sum tú ratú, kyî sum tú ratú gi, hten luî, haú pé é sum tú ratú gi, mauchut byuq bê nghut ri. Hau htoq agó, nyí sum tú mâ é ratú le, myín sum tú mâ é ratú le, maubó a joq dut byuq ri.

¹³ Ngò wú nyi le, zunbung radu gi, maulat má dâng wún mù, "Gotû maumang lagyo sum yuq èq mut râ nghut é, tut hte é yanmai, myidàm htoq má nyi bâng é matú, dingnyé, dingnyé, dingnyé nghut ri." ga luî, htê mó èq garû taî ri.

9

¹ Ngo yuq nghû râ maumang lagyo gi, yhâng é tut mut kat é hkûn, mauhkûng mai myidàm htoq má byit gyó tô é kyî racham lé, ngò myang ri. Haú nik dik htûm é Lasang-dông é zoqshi gi, kyî haú lé byî tô ri. ² Kyî haú gi, nik dik htûm é Lasang-dong lé hpông kat é hkûn, myi bungghkyûng mó mai htoq lo é myihkau dùm sù é myihkau gi, dong haú mai htoq lo ri. Nik dik htûm é Lasang-dong haú mâ é myihkau dum é yanmai, bui eq maulat gi, mauchut byuq bê nghut ri. ³ Myihkau dùm haú mai dinggám pé htoq lô mù, myidàm htoq má gyó lé akô; myidàm htoq mâ é gogok é a-tsam sù é a-tsam le, yhangmoq lé byî to bê nghut ri. ⁴ Myidàm htoq mâ é wàhu pé lé le, mhan-haq hpoqnoq pé lé le, sigâm pé lé le a lhoq htên é za, yhumsing é ngelang má Garai Gasâng é masat lhô a dap é byu pé lé baú zing-ri râ matú, yhangmoq lé taî tô ri. ⁵ Nghut kôlhang, haú bang lé sat pyám râ ahkáng kúm gi, yhangmoq a wó e za, lhamó ngo hkyap tup haú bang lé zing-ri râ ahkáng za ru wó akô nghut ri. Haú bang hui zô é shî-nò jamjau gi, gogok èq pat hkûn no hpû é su yhang nghut ri. ⁶ Haú buinyi pé má, byu pé gi, shî hkyô hô kôlhang, myàng kó

râ a nghut; shî nau dik kôlhang, haú shî hkyô gi, yhangmoq chyáng mai hpang byuq râ nghut lhê.

⁷ Dinggám haú pé gi, majan zan râ matú buí tô é myang pé su dut akô. Yhangmoq é ulhum má gi, hîng janmaú sù é tsûng tô é htoq agó, yhangmoq é myoqdong gi, byu myoqdong su dut bum akô nghut ri. ⁸ Yhangmoq é xâm gi, myiwe wui é xâm su dut luî, yhangmoq é zuì gi, hkanghkyi zuì su dut ri. ⁹ Yhangmoq é wànggò-long gi, joqtoq wànggò-long su dut ri; yhangmoq é dùng mying é htê gi, majan pá shut din yán wang ló é myang jùm eq myanglhêng pé mying hûm é htê su gâ ri. ¹⁰ Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri râ a-tsam bo ri. ¹¹ Yhangmoq é hkohkâm gi, nik dik htûm é Lasang-dong mâ é maumang nghut ri; haú é mying gi, Hebre myíng dong Abadon ga, Grik myíng dông Apolion* gâ ri.

¹² Sâng-hî lhum dingnyé gi, laî ló byuq bê nghut ri; nghut kôlhang, dingnyé í lhum jé lô shirâ nghut lhê.

¹³ Haú hkyuq yuq nghû râ maumang lagyo gi, yhâng é tut mut kat ri. Haú hkûn, Garai Gasâng é hí má joq é hîng hkungga gyap é hkyuî myí lhum mai htê htoq lo é gi, ¹⁴ "Uhprat wui mó lêng má tuî lhûng tô é maumang myi yuq lé, nhang pyám aq." ga tut chung tô é hkyuq yuq nghû râ maumang lagyo lé taî é lé, ngò wó gyô ri. ¹⁵ Haú hkûn, xângzo byù sum tú mâ é ratú lé sat pyám râ matú, ahkyíng, buinyi, lhôhkyap, zanwut lé, rì rì hen to bê nghut é haú maumang myi yuq lé nhang kat bê nghut ri. ¹⁶ Myang ji jî é gyè jum gi, byù du sen í hkyíng bo é hkyô lé, ngò wó gyô ri.

¹⁷ Ngò, shing-rán myang é má, myang jùm eq haú pé má ji bâng é wànggò-long pé gi, myi su ne é, shing shing nyui é eq hang su hui é nghut ri. Myáng jum é ulhum gi, hkanghkyi pé é ulhum su dut luî, yhangmoq é nhut

* **9:11** Apolion gâ é lichyúm gi, lhoq hten lhoq hpyoq sù gâ é nghut ri.

mai, myi, myihkau eq hang pé htoq lo ri. ¹⁸ Haû yhangmoq é nhut mai htoq lo é myi, myihkau eq hang gâ é wúm ihkyup sùm jûng é yanmai, xângzo byù sum tú ratú gi, sat hui bekô nghut ri. ¹⁹ Myang haû jum é sho-myi gi, lhangmuì su dut luì, ulhum dap mù, hte sê é yanmai, yhangmoq é a-tsam gi, nhut eq sho-myi pé má nghut ri.

²⁰ Wúm ihkyup haû sùm jung mai wó lut luì, myit gyó tô é xângzo byu pé gi, yhangmoq é loq pê èq zui saì é muzó mai, myit a lêng shi kô é htoq agó, nat gâng pé lé le, a wó myâng, a wó gyo, a wó sô é, hîng, ngùn, gyi, luggok, sik pê é alhô lé le, noqkuq é hkyô lé a tô pyám shi kó nghut ri.

²¹ Hau htoq agó, yhangmoq gi, byù sat é mù mai le, myoqheq hpaqchyî mù mai le, ashop é dông gungsho zùm yap é hkyô mai le, hkaû é mai le, myit a lêng shi kó nghut ri.

10

Maumang Eq Laiká Ding É Hkyô

¹ Hau htâng, ngò gi, wum-o bo é maumang lagyo gotû rayuq, mauhkûng mai gyó lé lo é lé myang é nghut lhê. Yhang lé gi, mhut èq htup yup to luì, yhâng é u htoq má woqgan síng-yang gyân tô ri; yhâng é myoqdong gi, buì su dut luì, yhâng é hkyî gi, myi zîng su dut ri. ² Yhâng é loq má gi, hpông tô é laiká ding zo ralhum chung tô ri; yhâng é loqyo hkyî gi, wuìshuq lung-aû má nang, yhâng é loqpaì hkyî gi, myigùng htoq má nang to luì, ³ hkanghkyi mying é htê su ga, htê mó èq garû kat ri. Yhang garu kat jáng, maugum htê nyhit lhum tû gûm kat ri. ⁴ Haû maugum htê nyhit lhum tû gûm kat é hkûn, ngò ká râ da jáng, "Haû maugum htê nyhit lhum tû gûm é hkyô lé zaú pyám aq; haû pé lé hkákâ to." ga, mauhkûng mai danghtê htoq lo é lé ngò wó gyô kat ri.

⁵ Haû hkûn, wuìshuq lung-aû eq myigùng htoq má nang yap tô é lé, ngò myang é maumang lagyo haû gi, yhâng é loqyo loq lé mauhkûng

shut tu toq kat ri. ⁶ Haû mù, yhang gi, mauhkûng eq haû má nyi é lhunglháng lé le, myidàm htoq eq haû má nyi é lhunglháng lé le, wuìshuq lung-aû eq haû má nyi é lhunglháng lé le, hpan tô é, pyat dedu ahtum abyuq dui nyi Su é mying lé lang luì, dakam é gi, "Ahkyíng ratsuí le, lhoq myáng nyi lo râ a nghut! ⁷ Nghut kôlhang, Garai Gasang mai Yhâng é dui-nhâng zoshâng wuì nghut é myiqhtoì pé lé taì to bê é danglù eq rajung za, Yhâng é zaú tô é hkyô gi, nyhit yuq nghû râ maumang lagyo èq yhâng é tut lé mut myhîng é buinyi pé má, shit râ nghut lhê." gâ ri.

⁸ Hau htoq agó, ngò wó gyô wú bê mauhkûng mâ é htê, ngo lé dum taì é gi, "Haû wuìshuq lung-aû eq myidàm htoq má nang yap tô é maumang lagyo loq má hpông tô é laiká ding lé, è yù aq." gâ ri.

⁹ Haû mù, ngò gi, è luì, laiká ding zo haû, ngo lé byi râ matú maumang lagyo haû lé è dung le, yhang gi, "Shi lé yù mù, zo kat aq. Náng é wam má hko râ nghut lhê; nghut kôle, náng é nhut má gi, byo-î su yhang chui râ nghut lhê." gâ ri. ¹⁰ Haû mù, ngò gi, laiká ding zo haû lé, maumang lagyo é loq mai yù mù, zô é nghut lhê; haû hkûn, ngá é nhut má gi, byo-î su yhang chui nghâm ri; nghut kôle, bàn zô kat é hkûn, ngá é wam hkaû má hkô bê nghut ri. ¹¹ Haû hkûn, "Nàng gi, byù myû myo myo eq séng luì le, mingdán myo myo eq séng luì le, myíng ahú hú eq séng luì le, hkohkam pé myo myo eq séng luì le, myiqhtoì dum htoi ra râ nghut lhê." ga, ngo lé taì kyô ri.

11

Saksé Í Yuq É Hkyô

¹ Ké râ jung dumbáng su dut é jàm-yang rahkat ngo lé byi luì, ngo lé taì é gi, "È mù, haû Garai Gasâng é noqkuq yhûm lé le, hkungga gyap lé le, kê wú luì, haû má noqkuq é bang lé nghap wú aq. ² Nghut kôlhang, shinggan mâ é wâng lé gi, a kê é za lhai pyâm to

aq; hkâsu mù gâ le, haû gi, tûngbaù pé lé byî to bê nghut lhê. Yhangmoq gi, haû chyoiyúng myuq lé, lhamó myixe í hkyap tup chôm nang kó râ nghut lhê. ³ Hau htoq agó, ngò gi, ngá é saksé í yuq lé a-tsam byi râ nghut luí, yhangnhik gi, ji mebu wut* mù, buinyi 1260 nyí tup myiqhtoi htoi kó râ nghut lhê." gâ ri. ⁴ Yhangnhik gi, haû myidàm Yhumsing é hí má yuq tô é tsanlun gàm í gâm eq myibung tsungjang í lhum nghut ri. ⁵ Byù rayuq yuq, yhangnhik lé zing-ri nau é nghut jáng, yhangnhik é nhut mai myi htoq lô mù, yhangnhik é gye pé lé nyhê hkyô pyám râ nghut lhê. Yhangnhik lé kâm zing-ri é sù gi, haû su kut sat pyám é hui zo râ nghut lhê. ⁶ Yhangnhik gi, yhangnhik myiqhtoi htoi nyi é buinyi pé má mau a wò râ matú, mauhkûng lé myhî pyám râ a-tsam wó akô; hau htoq agó, wuì pé lé sui dut nhâng râ eq, nau é hkûn, wúm ajung jûng eq myidàm htoq lé ihkyup hkyó byi râ a-tsam le, wó akô nghut ri.

⁷ Yhangnhik gi, saksé ban hkâm é hkûn, haû nik dik htûm é Lasang-dong mai htoq lo é tân jung dusak gi, yhangnhik lé htim mù, ûng luí, sat pyám râ nghut lhê. ⁸ Yhangnhik é mâng lé gi, danghîng dông Sodom eq Egutuq gâ é, yhangnhik é Yhumsing lé le, tapzîng má jén sat pyám é myuq mó é hkyô gûng má, leq to râ nghut lhê. ⁹ Haú hkûn, byù myû hkangmó mâ é bang, byuhú hkangmó mâ é bang, myíng hkangmó mâ é bang, mingdán hkangmó mâ é bang gi, yhangnhik é mâng lé myhup pyám râ matú a gyo kô é za, sum nyí eq rahkyuí tup chôm wú nyí kó râ nghut lhê. ¹⁰ Myidàm htoq má nyi é bang gi, yhangnhik shi byuq é yanmai gabú nguínón luí, rayuq eq rayuq chyunghuq byî lhûm é dông ngón poì kut kó râ nghut lhê. Hkâsu mù gâ le, myiqhtoi haú nhik gi, myidàm htoq má nyi nyi é bang lé, wuîhke jamjau byî lai bê su nhik nghut akô.

* 11:3 Ji mebu wut gâ é gi, iyon yôn é lé gâ lhê.

¹¹ Nghut kôlhang, sum nyí eq rahkyuí tup lai é htâng má, Garai Gasâng chyáng mâ é asak soq gi, yhangnhik chyáng wàng mù, yhangnhik gi, toq yap tô kô é nghut luí, yhangnhik lé myang é bang gi, gyai yhang gyuq nán bûm bekô nghut ri. ¹² Haú hkûn, "Shî má doq lò keq." ga, mauhkûng mai yhangnhik lé wut é htê mó lé wó gyo kômù, yhangnhik é gye pé wú tô é u lé, mhut ji mù mauhkûng shut doq ló bekô nghut ri.

¹³ Haú u lé yhang, layàng mó nún lô luí, myuq hkaú raxê tú mâ é ratú gi, htên gyop byuq bê nghut ri. Hau htoq agó, byù nyhit hkyîng yuq shi byuq bê nghut luí, myit gyó tô é bang gi, gyai yhang gyuq nán bûm kômù, mauhkûng mâ é Garai Gasang lé hkya-on shigyaú bum akô nghut ri.

¹⁴ Í lhum nghû râ dingnyé gi, lai byuq bê nghut ri; sûm lhum nghû râ dingnyé gi, jé râ za nghut bê.

Nyhit Lhum Nghû Râ Tut Mut É Hkyô

¹⁵ Nyhit yuq nghû râ maumang lagyo gi, yhâng é tut mut kat ri; haú hkûn, mauhkûng htoq má htê mó pé htoq lo é gi,

"Mingkan htoq mâ é mingdán gi, nganhûng é Yhumsing eq Yhâng é Hkrisduq é mingdán dut bê nghut luí,

Yhang gi, pyat dedu ahtum abyuq up nyi râ nghut lhê."

gâ ri. ¹⁶ Haú hkûn, yhumsing é hkohkâm-tanghkuq má zûng mù, Garai Gasâng é hí má nyi tô é suwún í xe myi yuq gi, yhangmoq é myoqdong ngóm gop mù, Garai Gasang lé noqkuq uchyang taí kô é gi,

¹⁷ "Ahkuí pyat, a-nham pyat rû dui nyi é, wum-o a-tsam dik shoq bò Sû Yhumsing Garai Gasang è! Nàng gi, hpungwup a-tsam mó chûng mù, up nyi bê nghut é yanmai, ngamoq, Nang lé jeju hkya-on lhê.

18 Byù myû pé gi, nhikjum yo bùm kôluí, Náng é nhikmo-yo hkyô gi, jé bê nghut ri.
 Shî bê bang lé, tarâ jéyáng râ eq, Náng é dui-nhâng zoshâng myiqhtoí pé lé le,
 Náng é sân-yúng bang lé le, Náng é myìng lé gyuq hkunggâ é tiq ko lé le,
 shigyau chyunghuq byi râ eq, myidàm htoq lé lhoq hten bang lé lhoq hten râ, ahkyíng gi, jé bê nghut ri."
 gâ akô.

19 Haú hkûn, mauhkûng htoq má, Garai Gasâng é noqkuq yhûm hpông to luí, Yhâng é noqkuq yhúmhaú má, Yhâng é dangshikaq eq sêng é saksé sidek lé byu-myang ri. Haú hkûn jáng, lhap hpyat é, myìng hûm é, maugum gûm é, layàng nún é, likwò mó gyó é pé dut htoq lo ri.

12

Myiwe Myhí Eq Manjung É Hkyô

1 Hau htoq agó, mauhkûng má limik kumlhá mó htoq shit é gi: myiwe myhí rayuq gi, bùi lé wut chûng mù, lhamó má hkyí ke luí, kyí raxe í cham dap é janmaú lé, yhâng é ulhum má tsûng tô ri. 2 Yhang gi, zogûng dut tô é nghut luí, zo hkû râ matú, zohkû-nò no nyi é yanmai, gyai yhang ngau garû nyi ri. 3 Hau htâng, mauhkûng má gotû kumlhá dum htoq shit é gi: gyai kô é manjung nè mó* radu gi, ulhum nyhit lhum eq hkyuí raxê lhum dap luí, yhâng é ulhum hkangmó má janmaú tsûng tô ri. 4 Yhâng é sho-myi gi, mauhkûng mâ é kyí sum tú mâ é ratú lé shûm tsîng yù mù, myidàm htoq má he hpyit hkyô kat ri. Manjung haú gi, zoshâng hku htoq kat eq wó myui hâng kat shoq ga, haú myiwe myhí é hí má láng yap tô ri. 5 Myiwe myhí haú gi, mingdán banshoq lé shamtoq dumbáng eq up râ nghut é yuqzo rayuq lé hkû bê nghut ri; yhâng é zoshâng lé gi, Garai

Gasâng é hí má le, Yhâng é hkohkâm-tanghkuq hí má le bún toq yû bê nghut ri. 6 Myiwe myhí haú gi, yhâng é matú Garai Gasâng lajâng to byí é yoso hkaú má hpang wang ê bê nghut ri; haú jowò má, yhang gi, 1260 nyí tup lhom baú é hui râ nghut lê.

7 Mauhkûng htoq má majan htoq bê nghut ri. Mihkaelaq eq yhâng é maumang lagyô pé gi, manjung lé majan é zan kôluí, haú manjung eq yhâng é maumâng pé le, tau zân akô.

8 Nghut kôlhang, yhangmoq gi, a ûng kômù, mauhkûng mâ é yhangmoq nyi jowò lhoq hpyuq pyám bekô nghut ri. 9 Haú mingkan gón lé hkyô shuí nghoq é, natzau eq Tsadán ga é, a-nham lê é lhangmuí nghut é manjung mó haú gi, yhâng é maumang pé eq rahá myidàm htoq má dú hkyô pyám é hui bê nghut ri.

10 Haú hkûn, mauhkûng htoq má htê mó dông taí é lé, ngò wó gyô é gi, "Ahkuí gi, nga-nhûng é Garai Gasâng é hkyí yù hkyô, hpungwup a-tsam eq mingdán le,

Yhâng é Hkrisduq é ahko ahkáng le, jé bê nghut ri.

Hkâsu mù gâ le, nga-nhûng é Garai Gasâng é hí má, nga-nhûng é gumang wuì lé, nyí, myín mara hun nyi é sù gi, dú hkyô pyám é hui bê nghut ri.

11 Yhangmoq gi, haú Sauzô é suí é yanmai le, yhangmoq saksé hkâm é mungdâng é yanmai le, yhang lé ung pyám bekô nghut luí, shi byuq é jé shoq yhumsing asak lé a ha kó nghut ri.

12 Haú mù luí, mauhkûng eq haú má nyi é bang ê, gabú nyí keq!

Nghut kôlhang, myidàm htoq eq wuìshuq lung-aû gi, dingnyé wó ri;

hkâsu mù gâ le, haú natzau gi, yhâng é ahkyíng yàm-yoq tot za ru joq alô nghut é lé sê é yanmai, nhikmo-yô é eq, nungnhik chyáng gyó lé lô bê nghut ri."

gâ ri.

* 12:3 Manjung nè mó gâ é gi, Tsadán lé taí nau é nghut lê.

13 Haû manjung gi, myidàm htoq má dú hkyô kat huí é lé myàng luí, haû yuqzo hku é myiwe myhí lé zing-rí ri. 14 Myiwe myhí haû gi, lhang-muì chyáng mai wó lut luí, yhang é matú lajâng tô é yoso má wó dang jé mù, ahkyíng ralhùm, ahkyíng í lhum, ahkyíng rawuí hkup† lhom baú nyi é huì sháng gaq ga, zùn mó é dùng í lhum byí é huí ri. 15 Haú hkûn, haû lhangmuì gi, myiwe myhí haû lé wó lhoq myhú pyám shoq ga, myiwe myhí é nunghtáng má, yhâng é nhut mai wuì mó lêng í é wuì lhoq htoq kat ri. 16 Nghut kôlhang, manjung nhut mai lhoq htoq kat é wuì mó lêng haû lé, myigùng gi, yhâng é nhut há mù myuì pyám byí é dông, myiwe myhí haû lé garúm yu ri. 17 Haú mù, manjung haû gi, myiwe myhí hau é yan-mai, gyai yhang nhikmo-yo luí, Garai Gasâng é jep é tarâ lé châng é bang eq Yesuq é saksé lé myhik zing nyi é bang nghut é, myit gyó tô é, myiwe myhí é awut ashín pé lé, majan zan rá matú htoq e ri. 18 Manjung haû gi, wuìshuq lung-aû yàm má yap tô ri.

13

Tân Jung Dusak Radu Wuìshuq Lung-aû Mai Htoq Lo É Hkyô

1 Haú hkûn, haû wuìshuq lung-aû mai tân jung dusak radu htoq lo é lé, ngò myàng ri. Dusak haû má, hkyuí raxê lhum eq ulhum nyhit lhum dap to luí, yhâng é hkyuí pé má gi, janmaú raxê lhum tsùng to mù, ulhum hkangmó má gi, Garaí aróng lhoq hpoi é myìng dap tô bum ri. 2 Ngò myang é tân jung dusak haû gi, bauze-lo su dut ri; nghut kôlhang, hkyí gi, wàm hkyí su dut luí, nhut gi, hkanghkyí nhut su dut ri. Haû manjung gi, yhâng é a-tsam eq yhâng é hkohkâm-tanghkuq lé le, ahko ahkáng mó lé le, tân jung dusak haû lé ap byí ri. 3 Tân jung dusak hau é ulhum

ralhum gi, shí rá í é dàm dap huí é su dut kôlhang, damhkô haû gi, yâ ge pyám bê nghut luí, mingkan gón gi, mauhong byuq kômù, yhâng htâng châng bùm bekô nghut ri. 4 Manjung gi, tân jung dusak lé ahko ahkáng ap byí é yanmai, byu pé gi, manjung haû lé noqkuq é htoq agó, tân jung dusak haû lé le, noqkuq kômù, "Ó yuq wá, tân jung dusak shí du su dut ri lú? Ó yuq wá, yhang lé wó zan ùng rá lú?" ga bum akô.

5 Gyáng dang taí rá eq Garaí aróng lhoq hpoi dang taí rá nhut gi, tân jung dusak haû lé byi to bê nghut é htoq agó, lhamó myí xe í hkyap tup, yhâng é ahko ahkáng lé chùng rá ahkáng wó bê nghut ri. 6 Yhang gi, yhâng nhut hpóng mù, Garaí Gasâng aróng lé lhoq hpoi dang taí é htoq agó, Garaí Gasâng é myìng eq nyì jowò lé le, mauhkûng htoq má nyi é bang lé le, lumù gansang é sù nghut ri. 7 Haû sân-yúng bang lé majan zân ung yù rá a-tsam, yhang lé byi bê nghut ri. Hau htoq agó, byuhú hkangmó lé le, byù myú hkangmó lé le, myíng hkangmó lé le, mingdán hkangmó lé le, up rá ahkáng, yhang lé byi bê nghut ri. 8 Haû sat hui bê Sauzo eq sêng é asak jihpán laiká buk má, mau htoq xâng hkun mai, myìng a kâ lhôm é, myidàm htoq má nyi é lhunglhâng bang gi, haû tân jung dusak lé noqkuq kó rá nghut lhê.

9 Gyo rá nohkyap dap sù gi, gyó yù sháng gaq.

10 Shúm zung é hui rá sù gi, shúm zung é hui rá za nghut lhê.

Sham eq sat é hui rá sù gi, sham eq sat é hui rá za nghut lhê.*

Haû mù, sân-yúng bang gi, hkam jân é hkyô eq lhumzui hkyô bò kó rá nghut lhê.

Tân Jung Dusak Radu Myigùng Mai Htoq Lo É Hkyô

† 12:14 Ahkyíng ralhùm, ahkyíng í lhum, ahkyíng rawuí hkup gâ é gi, "razàn, í zân, lhamó hkyuq hkyap" lé gâ é nghut lhê; haû gi, 1260 nyi nghut ri. * 13:10 Chyúmding ra-am má gi, Byù rayuq yuq lé, shúm kut é sù gi, shúm zung é hui rá nghut lhê. Sham eq byù sat é sù gi, sham eq sat é hui rá nghut lhê, ga bo tô ri.

¹¹ Hau htâng, ngò gi, tân jung dusak gotû radu† myigùng mai htoq lo é lé myang ri. Yhang gi, sauzô é hkyuî su dut é hkyuî í lhum yuq ri; nghut kôlhang, yhang gi, manjung su ga dang nyo ri. ¹² Yhang gi, tân jung dusak hí lhê dû é ahko ahkáng lhungháng lé, haú du é hí má chùng mù, shî rá í é damhkô ge byuq é tân jung dusak haú lé, haú mingkan eq mingkan htoq má nyi é bang lé noqkuq nhang ri. ¹³ Hau htoq agó, yhang gi, byu pé é myoq hí má, mauhkûng mai myigùng shut myi lé lháng wó lhoq hkyô é, limik kumlhá mó kut shit ri. ¹⁴ Yhang gi, tân jung dusak hí lhê dû é hí má, kumlhá haú pé kut rá ahkáng wó é yanmai, myidàm htoq má nyi é bang lé mhoq hpyoq yú luí, haú shâm damhkô dap kôlhang, dui nyi é tân jung dusak haú lé, hkunggâ é dông, yhangmoq lé, yhâng é alhô saí nhang ri. ¹⁵ Yhang gi, haú tân jung dusak hí lhê dû é alhô lé, soq wó mut kat byí é a-tsam lé wó yú sù nghut ri; haú mù, alhô haú gi, dang wó taí luí, yhang lé a noqkuq é bang lé, sat hui nhang ri. ¹⁶ Hau htoq agó, yhang gi, byù mó byù zo, wó sù myùng sù, luthkyô wó bang eq jùn pé, yuq hkangmó lé, yhumsing é loqyo loq má nghut nghut, ngelang má nghut nghut, masat lhô zik tap yú nhang ri. ¹⁷ Haú hkûn, haú tân jung dusak é myìng, a nghut jáng, yhâng mying é masat námbat dap sù mai lai luí, ùng é, wui é hkyô, ó yuq le wó kut rá a nghut.

¹⁸ Hpaqchyî byéng-yá gi, shî má bo rá ri. Hpaqchyî bò sù gi, haú tân jung dusak é námbat lé sôn wú sháng gaq; hkâsu mù gâ le, haú gi, byù rayuq é námbat nghut lhê. Yhâng é námbat gi, 666 nghut ri.

14

Sauzo Eq 144,000 Yuq É Hkyô

¹ Hau htâng, ngò wú kat le, haú Sauzo gi, Zi-un bùm má yap tô é lé

myang ri; Yhâng myìng eq Yhâng Wâ é myìng lé, yhumsing é ngelang má kâ tap tô é byù 144,000 yuq le, Yhang eq rahá yap tô bùm ri. ² Haú hkûn, ngò gi, wui pé mying hùm é htê eq maugum mó gûm é htê su gâ é htê, mauhkûng mai htoq lo é lé wó gyô ri. Ngò wó gyô é htê haú gi, tít bat bang, yhangmoq é tít lé bat myhîng é htê su gâ ri. ³ Yhangmoq gi, haú hkohkâm-tanghkuq é hí má le, dui é dusak myí du eq suwún wui pé hí má le, mahkôn sik lé hkon akô nghut ri. Haú myidàm htoq mai hkyi yú huí é byù 144,000 yuq mai lai luí, ó yuq le, mahkôn haú lé a wó mhoq sê yù kó nghut ri. ⁴ Haú bang gi, myiwe wui eq gungsho a zum é bang nghut luí, yhangmoq gi, zorâm jet pé nghut bum akô. Yhangmoq gi, haú Sauzo hká shut é le hká shut châng é bang nghut akô. Yhangmoq gi, byu pé chyáng mai wui yu é hui luí, sâng-hi myhîng é ashi lé su, haú Garai Gasang eq Sauzo lé ap byí é hui akô nghut ri. ⁵ Yhangmoq é nhut má, mhaú é hkyô haí le a taí kó; yhangmoq chyáng mara hùn rá hkyô le a bò kó nghut ri.

Maumang Sum Yuq É Hkyô

⁶ Hau htâng, maumang lagyo gotû rayuq gi, maulat má dang wún é lé ngò myang ri; yhang gi, haú mingkan htoq má nyi é, mingdán hkangmó mâ é bang, byuhú hkangmó mâ é bang, myíng hkangmó mâ é bang, byù myú hkangmó mâ é bang lé, hko kyo rá ahtum abyuq é gabú danglù wó ri. ⁷ Yhang gi, "Garai Gasang, tarâ jéyáng rá ahkyíng jé bê nghut é yanmai, Yhang lé gyuq hkungga luí, Yhâng é hpungwup a-tsam lé shigyaú keq. Haú mauhkûng eq myigùng, wuìshuq lung-aú eq wuìbúm pé hpan tô é Sù lé, noqkuq keq." ga luí, htê mó èq taí ri.

⁸ Í yuq nghû rá maumang lagyo gi, htâng má châng lé mù, "Haú mingdán pé* lhungháng lé, yhang kut shut é ashop é dông gungsho zùm yap é

† 13:11 Tân jung dusak gotû radu gâ é shî gi, myiqhtoi pyoq lé gâ nau é nghut lhê. * 14:8 Mingdán pé gâ é gi, a lumjîng bang lé gâ é nghut lhê.

hkyô, nhik lhoq yô é tsibiyiq wing shuq nhang é, Babelon myuq mó gi, lêng gyop bê! Lêng gyop bê!" ga taí ri.

⁹ Sum yuq nghû râ maumang lagyo gi, yhangnhik é htâng má châng lé mù, "Haû tân jung dusak eq yhâng é alhô lé, noqkuq luí, yhumsing é ngelang má nghut nghut, loq má nghut nghut, yhâng é masat lhô lé tap yu é sù, ó yuq nghut kôle, ¹⁰ Garai Gasâng é nhikmo-yo nghu é góm má hut kat tô é, nhik-yô é tsibiyiq wing jet lé shuq râ nghut lhê. Hau htoq agó, haû chyoyúng maumang lagyo pé hí má le, Sauzô é hí má le, yhang gi, duq nyi é myi eq hang eq zing-rî é hui zo râ nghut lhê.

¹¹ Yhangmoq zing-ri huí é myihkau gi, pyat dedu ahtum abyuq htoq nyi râ nghut lhê. Haû tân jung dusak eq yhâng é alhô lé, noqkuq é bang eq yhâng mying é masat lhô tap yû sù é matú gi, nyí, myín, no râ ahkyíng wó râ a nghut." ga luí, htê mó eq taí ri.

¹² Garai Gasâng é jep é tarâ châng luí, Yesuq lé lhumzúi nyi é bang nghut é, sân-yúng bang gi, hkam shirang é hkyô bò râ lhê.

¹³ Hau htâng, "Ahkuí mai gi, haû Yhumsing má shí é sù, hkungsô wó nyi ri nghû kê to aq." gâ é htê, mauhkúng mai htoq lo é lé, ngò wó gyô ri.

Haú hkún, haû Woi-nyí gi, "Nghut rô, yhangmoq kut é muzó é akyú gi, yhangmoq htâng châng râ nghut é yanmai, yhangmoq gi, yhumsing zúi ngu é muzó mai myang hkying bekò râ nghut lhê." ga taí ri.

Myidàm Htoq Mâ É Kyôshi Shû É Hkyô

¹⁴ Ngò dum wú kat le, mhut hpyû rahtui ngá hí má joq tô é lé myang ri; mhut hpyû htoq haú má Byu Yhangzo su dut é byù rayuq zung tô ri; Yhâng é ulhum má gi, hîng janmaú tsúng to luí, Yhâng é loq má gi, htoq é zaiyik ralhum chung tô ri. ¹⁵ Haú hkún, gotû maumang lagyo gi, noqkuq yhûm mai htoq lô mù, "Haû

myidàm htoq mâ é kyôshi gi, myhîng zan to bê nghut luí, kyôshu yoq jé bê nghut é yanmai, náng é zaiyik chûng mù, yik shû yù aq." ga, haû mhut htoq má zung tô é Sù lé, htê mó eq taí garû kat ri. ¹⁶ Haû mù, mhut htoq má zung tô é Sù gi, Yhâng é zaiyik lé, myigùng htoq má dú hkyô kat luí, myidàm htoq mâ é kyôshi lé, ban shû yù bê nghut ri.

¹⁷ Maumang lagyo gotû rayuq gi, mauhkúng htoq mâ é noqkuq yhûm mai htoq lo ri; haú yuq le, htoq é zaiyik ralhum chung tô ri. ¹⁸ Haû, myi lé up é maumang lagyo gotû rayuq gi, hkungga gyap mai htoq lô mù, htoq é zaiyik chûng sù lé, "Myidàm htoq mâ é tsibiyiq shi gi, myhîng bê nghut é yanmai, náng é htoq é zaiyik yù mù, tsibiyiq shipaû haú pé lé, yâm tsîng yù aq." ga, htê mó eq taí garû kat ri. ¹⁹ Maumang lagyo haú gi, yhâng é zaiyik lé, myidàm htoq má dú hkyô kat mù, haú mâ é tsibiyiq shi pé lé yâm tsîng yù luí, Garai Gasang nhikmo-yô é tsibiyiq wing pyik jang mó má hut kat bê nghut ri. ²⁰ Myuq shinggan mâ é tsibiyiq wing pyik jang haú má, tsibiyiq shi haú pé lé nâng nyhoq luí, tsibiyiq wing pyik jang haú mai suí yui htoq lo é gi, myang lunghtúng myhâng jé shoq jé lô mù, 180 déng† kô we shoq yui lô bê nghut ri.

15

Ló Htâng É Wúm Nyhit Lhum Chung É Maumang Lagyo Nyhit Yuq É Hkyô

¹ Ngò gi, mauhkúng má gotû limik kumlhá joq é lé, dum byu-myang ri; haú gi, wúm nyhit lhum chung é maumang lagyo nyhit yuq nghut ri; wúm haú pé gi, lô htâng é wúm pé nghut ri; hkâsu mù gâ le, Garai Gasang nhikmo-yô é hkyô gi, haú gû mai bàn râ nghut lhê. ² Hau htoq agó, myi eq nyhô tô é myoqjâm wuì-nhông su dut é lé le, ngò myang ri; haû tân jung dusak eq yhâng é alhô lé le, yhâng mying é námbat lé le, wó ung pyám

† 14:20 180 déng gi, Grik pé é stadia 1600 kô bo ri.

bê bang gi, wuì-nhông yàm haú má yap tô bum akô; yhangmoq gi, Garai Gasang byî é tíng pé lé chung to kôluí,
³ Garai Gasâng é dui-nhâng zoshâng Mosheq é mahkôn eq haú Sauzô é mahkôn lé hkôn kô é gi,

"Wum-o a-tsam dik shoq bò Sû Yhumsîng Garai Gasang ê, Nàng kut é muzó gi, hkik é eq mauhpo yhang nghut ri.

Pyat pyat zaí zaí é Hkohkâm ê, Náng é hkyô gi, dingmán é eq tengmán é nghut ri.

⁴ Yhumsîng ê, Nàng lé a gyuq a hkungga râ eq Náng myîng lé a lhoq gyaú râ gi, ó yuq wá nyi râ lúhú?

Hkâsu mù gâ le, Nàng za choyiyúng é Sû nghut ri.

Nàng kut é dingmán hkyô gi, tân shit bê nghut é yanmai,

byù myû lhunglhang gi, Náng hí má lé noqkuq kó râ nghut lhê."

gâ akô nghut ri.

⁵ Hau htâng, ngò wú kat le, mauhkung má, saksé zúm joq é noqkuq yhûm bóng tô é lé, myang ri.

⁶ Haú wúm nyhit jung chung é maumang lagyo nyhit yuq gi, noqkuq yhûm haú mai htoq lo ri; yhangmoq gi, sân-yúng duqbó é nú nhám mebu wut luí, yhangmoq é wànggàng má hîng hpyihit baíyup tô akô nghut ri.

⁷ Haú hkûn, haú dui é dusak myî du mâ é radu gi, pyat dedu ahtum abyuq dui nyi é Garai Gasâng é nhikmo-yo hkyô byíng tô é hîng góm nyhit lhum, haú maumang lagyo nyhit yuq lé byî ri. ⁸ Garai Gasâng é hpungwup shingkang eq hpungwup a-tsâm é yanmai, haú noqkuq yhûm gi, myihkau byíng zan to bê nghut luí, haú maumang lagyo nyhit yuq é wúm nyhit jung za a bàn bàn gi, noqkuq yhûm haú má ó yuq le a wó wâng kó nghut ri.

16

Garai Gasâng É Nhikmo-yo Hkyô Bo É Góm Nyhit Lhum

¹ Hau htâng, maumang lagyo nyhit yuq lé, "Htoq ê mù, haú Garai Gasâng é nhikmo-yo hkyô bo é góm nyhit lhum lé, myigùng htoq má hut hkyô kat keq." ga, noqkuq yhûm mai htê mó eq taí é lé, ngò wó gyô ri.

² Haú hkûn, sân-hí yuq nghû râ maumang lagyo gi, htoq ê mù, yhâng é góm lé, myigùng htoq má hut hkyô kat jáng, haú tân jung dusak é masat lhô dap é eq yhâng é alhô lé noqkuq é bâng chyáng, achay achyut é eq hkê-nho dik é, yapjeq ana dap tô bum bê nghut ri.

³ Í yuq nghû râ maumang lagyo gi, yhâng é góm lé, wuìshuq lung-aú má hut hkyô kat ri; haú gi, shí bê byù rayuq é sui su dut byuq é htoq agó, haú má lúng é dui jung lhunglhang gi, shi byuq bê nghut ri.

⁴ Sum yuq nghû râ maumang lagyo gi, yhâng é góm lé, wuìlàng pé eq wuìbúm pé má hut hkyô kat jáng, haú pé gi, sui dut byuq bê nghut ri. ⁵ Haú hkûn, haú wuì lé upzúng é maumang lagyo taí é lé, ngò wó gyô é gi,

"A-nham pyat le, ahkui pyat le, rû nyi nyi é Choyiyúng Sû ê,

Nàng haú su kut jéyáng bê nghut é yanmai, Nàng gi, tengmán Sû nghut ri;

⁶ hkâsu mù gâ le, yhangmoq gi, Náng é sân-yúng bang eq myiqhtoí pé é sui lé, lhoq htoq pyám bekô nghut luí,

Nàng gi, yhangmoq lé sui shuq nhang é nghut ri; haú gi, yhangmoq hui zo gíng é hkyô nghut ri."

gâ ri. ⁷ Haú hkûn, haú hkungga gyap mai,

"Nghut rô! Wum-o a-tsam dik shoq bò Sû Yhumsîng Garai Gasang ê, Nàng jéyáng é hkyô pé gi, tengmán é eq dingmán é nghut ri."

ga le, taí kat é htê lé, ngò dum wó gyô ri.

⁸ Myi yuq nghû râ maumang lagyo gi, yhâng é góm lé, bui é ahtoq má hut hkyô kat é hkûn, bui gi, byu pé lé myî eq nyhê kyuq râ ahkáng wó

bê nghut ri. ⁹ Haû mù, yhangmoq gi, nyé dik é èq nyhê kyuq é hui zo luí, wúm shí pé lé up nyi é Garai Gasâng é myìng lé nhing akô; haû-í yhang hpuzo kôlhang, yhangmoq gi, myit le a lêng kó, Garai Gasang lé le a shigyaú kó nghut ri.

¹⁰ Ngo yuq nghû râ maumang lagyo gi, yhang é góm lé, tân jung dusak é hkohkâm-tanghkuq htoq má hut hkyô kat jáng, yhang é mingdán gi, mauchut tuq dut byuq bê nghut ri. Mingbyû wuì gi, yhumsing é shô lé lhang, ngat tân bùm shoq shí-nò jamjau hui zo kôluí, ¹¹ yhangmoq no hpû é eq jeq é ana dap é yan-mai, mauhkûng mâ é Garai Gasang lé nhing akô; haû-í yhang hpuzo kôlhang, yhangmoq gi, yhangmoq kut é hkyô mai myit a lêng shi kó nghut ri.

¹² Hkyuq yuq nghû râ maumang lagyo gi, yhang é góm lé, Uhprat wuì mó lhang má hut hkyô kat jáng, wuìlàng haû gi, kân byuq luí, haû buihotoq hkyam mâ é hkohkam pé, lé lô râ hkyô dong bê nghut ri. ¹³ Haú hkûn, po su dut é, agè ashop é byò sum woi-nyí lé, ngò myang ri; haú pé gi, man-jung, tân jung dusak, myiqhtoi pyoq pé é nhut mai htoq lô kô é bang nghut akô. ¹⁴ Woi-nyí haú pé gi, nat gâng pé é woi-nyí nghut luí, limik kumlhá pé kut shit kômù, haû wum-o a-tsam dik shoq bò Sû Garai Gasâng é buinyì mó má majan zan râ matú, mingkan gón mâ é hkohkam pé lé lhoq tsing yù râ ga, htoq e ló akô nghut ri.

¹⁵ "Wú keq, Ngò gi, hkau sù su jé lé é nghut lhê! Su hí má gungchîn a so râ eq hoq hpu hkyô a lhoq htoq shit sháng gaq ga, yhumsing é wutbu wutmè lé, zúng nyí luí, gyìng gyìng kut nyi é sù gi, hkungsô wó nyi ri."*

¹⁶ Haû mù, nat haú bang gi, hkohkam pé lé, Hebre myíng dông Armagedon gâ é jowò má, rahá ji tsing tô akô nghut ri.

¹⁷ Nyhit yuq nghû râ maumang lagyo gi, yhang é góm lé, maulat má

hut hkyô kat ri; haú hkûn, haû no-qkuq yhûm mâ é hkohkâm-tanghkuq mai, "Bàn bê!" gâ é htê mó htoq lo ri.

¹⁸ Hau htoq agó, lhap hpyat é, mying hûm é, maugum gûm é eq layàng mó nún é pé dut htoq lo ri. Myidàm htoq má, xângzo byù lé nyi é hkûn mai, layàng haû su nún é eq haû-í htan é gi, a joq wú shí é nghut lhê. ¹⁹ Haû mù, haû myuq mó gi, sùm hkyam byak goq byuq luí, mingdán pé mâ é myuq pé le, gyop byuq bê nghut ri. Garai Gasang gi, Babelon myuq mó lé le myit bun luí, Yhang é nhikmo-yô é tsibiyiq wing byíng shoq bo é góm lé shuq nhâng bê nghut ri. ²⁰ Zinlóng hkangmó gi, hpanq byuq bê nghut luí, bùm pé le byuq byuq bê nghut ri. ²¹ Haú hkûn, myi xê joí kô laí é likwò mó gi, mauhkûng mai byu pé htoq má wo gyó gyûn ri; likwò wúm gi, gyai yhang wuìhke jamjaû é wúm nghut é yanmai, byu pé gi, Garai Gasang lé nhing bum akô nghut ri.

17

Shiwa Myhí Mó É Hkyô

¹ Haû góm nyhit lhum chung tô é maumang lagyo nyhit yuq mâ é rayuq gi, lé lô mù, "Lé aq, haû wuì myo myô pé htoq má zung tô é shiwa myhí mó lé dam byi râ hkyô, ngò, nang lé tân shit bá. ² Myidàm htoq mâ é hkohkam pé gi, yhang eq rahá ashop é dông gungsho zùm yap é hkyô kut shut kôluí, myidàm htoq má nyi é bang gi, yhang kut shut é myiwe yuqgè nyi zô lhum hkyo é tsibiyiq wing lé shuq wut bùm bekô nghut ri." ga luí, ngo lé taí ri.

³ Haû mù, maumang lagyo haû gi, Woi-nyí má, ngo lé yoso shut shuí wang e ló ri. Haû ulhum nyhit lhum eq hkyuì raxê lhum dap luí, taí hpoí é myìng kôm dap tô é, zam zam ne é tân jung dusak htoq má zung tô é myiwe myhí rayuq lé, ngò myang ri.

⁴ Myiwe myhí haû gi, me me dut é eq zam zam ne é mebu wut luí, hîng, lungsêng, palhé pé èq mhôn chung ri;

* **16:15** Dang shí hkun gi, Yesuq taí é dang nghut lhê.

yhâng é loq má gi, yhâng é myiwe yuqgè nyì zô lhúm hkyo é agot a-û hkyô eq achay achyut é zè pé byíng tô é hîng góm ralhum chung tô ri.

⁵ NIK DIK É HKYÔ, MYIDÀM HTOQ MÂ É ACHAQ ACHYUT HKYÔ PÉ EQ SHIWA MYHÎ PÊ É YHÂNGNU, BABELON MYUQ MÓ.

gâ é myîng gi, yhâng é ngelang má kâ tap tô ri. ⁶ Myiwe myhî haû gi, sân-yúng bâng é sui eq Yesuq é saksé hkâm bâng é sui shuq wut tô é lé, ngò myang ri.

Haû mù, ngò gi, gyai yhang maú byuq é nghut lhê. ⁷ Haú hkûn, mau-mang lagyo haû ngo lé taí é gi, "Nàng, haí mù maú lhê lhú? Myiwe myhî haû eq, yhang jî tô é, ulhum nyhit lhum eq hkyuî raxê lhum dap é tân jung dusak é zaú tô é hkyô lé, ngò, nàng lé taí kyo râ nghut lhê. ⁸ Nàng myàng é tân jung dusak haû gi, hí hkûn nyi wú bê, ahkuî a nyì lo, nghut kôhang, nik dik htûm é Lasang-dong mai htoq lô mù, htên byoq é hui râ nghut lhê. Mau htoq xâng hkun mai, asak jihpán laiká buk má myîng a kâ tô é, myidàm htoq má nyi é bang gi, tân jung dusak haû lé myàng kô é hkûn, maú byuq bùm kó râ nghut lhê. Hkâsu mù gâ le, haû gi, nyì wú bê, ahkuî a nyì lo, nghut kôhang, dum lé râ nghut é yanmai nghut ri.

⁹ Hpaqchyî byéng-yá bo é nyan gi, shî má râ ri. Haû ulhum nyhit lhum gi, myiwe myhî zung é bùm nyhit lhum nghut ri; hau htoq agó, hkohkâm nyhit yuq le nghut ri. ¹⁰ Ngo yuq gi, byit gyó byuq bê; rayuq gi, ahkuî nyi to ashî; myit tô é rayuq gi, a jé lé shi nghut ri; haú yuq jé lé é hkûn, yhang gi, ahkyíng razup zo za wó nyì râ nghut lhê. ¹¹ Hí hkûn nyi wú bê, ahkuî a nyì lo dut é tân jung dusak haû gi, shit yuq nghû râ hkohkâm nghut ri. Yhang gi, haû nyhit yuq eq sêng é yanmai, yhâng é htên byoq hkyô shut e ló râ nghut lhê.

¹² Haû nàng myàng é hkyuî raxê lhum gi, mingdán a myang yù shî é hkohkâm raxê yuq nghut ri; nghut

kôhang, yhangmoq gi, haû tân jung dusak eq rahá za, hkyíng hkum rahkum kô hkohkâm ayá lé wó yù kó râ nghut lhê. ¹³ Yhangmoq gi, myit myoqbyù hkyô ralhum za nghut kômù, yhangmoq é a-tsam eq ahko ahkáng lé, haû tân jung dusak lé byi kó râ nghut lhê. ¹⁴ Yhangmoq gi, haû Sauzo lé majan chôm zan kó râ nghut lhê; nghut kôhang, Sauzo haû gi, yhumsing pé é Yhumsîng eq hkohkam pé é Hkohkâm nghut é yanmai, yhangmoq lé ung pyám râ nghut lhê. Haû Sauzo eq rahá nghut é bang gi, jì yù huí é bang, hkyin yù huí é bang eq lhumzuí é bang nghut akô." gâ ri.

¹⁵ Hau htâng, maumang lagyo haû ngo lé dum taí é gi, "Nàng myang é, shiwa myhî zung tô é wuì pé gi, byù myû pé, byù ajùm ayò pé, mingdán pé eq myíng lhumjup nghut ri. ¹⁶ Haû nàng myang é tân jung dusak eq hkyuî raxê lhum gi, shiwa myhî haû lé a jú kut kó râ nghut luí, yhâng é sutzè banshoq shang yu pyám byi mù, mebu lháng a dap loshoq achîndum kut to kó râ nghut lhê; hau htoq agó, yhâng é sho lé zo luí, myí eq nyhê hkyô pyám kó râ nghut lhê. ¹⁷ Hkâsu mù gâ le, Garai Gasang gi, haú bang mai, i-myit rahkat zâ eq, yhumsing é a-tsam, haû tân jung dusak lé byi râ myit, yhangmoq lé kat byi Sû nghut ri. Haû mù, yhangmoq gi, Garai Gasâng é mungdang lhoq dik é hkûn jé shoq, haû su kut kó râ nghut lhê. ¹⁸ Nàng myang é myiwe myhî haû gi, myidàm htoq mâ é hkohkam pé lé up zô é myuq mó nghut ri." gâ ri.

18

Babelon Lêng Gyop É Hkyô

¹ Hau htâng, maumang lagyo gotú rayuq mauhkûng mai gyó lo é lé, ngò myang ri. Yhang gi, ahko ahkáng mó wó é nghut luí, haû myidàm htoq lé, yhâng é hpungwup eq duqbó to byî ri. ² Yhang, htê mó o mó eq garû taí kat é gi,

"Babelon myuq mó gi, lêng gyop bê,
lêng gyop bê!

Myuq haú gi, nat gâng pê é yhâm
eq agè ashop é nat hkangmó é
hkyûng dut byuq é htoq agó,
a sansêng é eq achag achyut é nghoq
pé nyi é sùt dut byuq bê nghut
ri.

³ Hkâsu mù gâ le, haú byù myû
lhunglháng gi, yhang kut shut
é ashop é dông gungsho zùm
yap é hkyo é nhik lhoq yô é tsi-
byiq wing shuq wut bùm bekô
nghut ri.

Haú myidàm htoq mâ é hkohkam pé
gi, yhang eq myi shut làng shut
hkyô kut bekô nghut é htoq
agó,

myidàm htoq mâ é hpugá wuiloq gá
bang gi, yhâng é ladu lai shoq
ngón kún é hkyo é yanmai,
sutzè wó bôm bekô nghut ri."

gâ ri.

⁴ Hau htâng, mauhkûng mai htoq lo
é htê gotû lé ngò dum wó gyô é gi,

"Ngá é byu pé ê, myuq hau é mara pé
má nungmoq a bo lòm râ matú
le,

yhâng é wúm pé lé nungmoq a hui
zo kó râ matú le, haú mai hân
hphang htoq lò keq;

⁵ hkâsu mù gâ le, yhâng é mara
gi, mauhkûng htung shoq bum
zang to bê nghut luí,

Garai Gasang gi, Yhâng é a
dingmán é hkyô lé myit bun bê
nghut ri.

⁶ Yhang kut byí é eq rajung za, yhang
lé tau kut byi keq; Yhang kut bê
muzó eq rajung za, yhang lé í
tú taú kut keq.

Yhang nyhó byí é góm má, í tú taú
nyhó byi keq.

⁷ Yhang gi, yhumsing gùng lé
yhumsîng lhoq gyaú yû luí,
ladu lai shoq ngón kún nhang
é í,

wuîhke jamjau hkyô eq iyon
hkyô myo myo, yhang lé taú
byi keq.

Hkâsu mù gâ le, yhang gi, yhâng é
myit má,

'Ngò gi, hkohkâm myhí nghut lhê;
ngò gi, chuimó a nghut;

hkâ-nhám le iyon hui râ a nghut.'
ga gumrong nyi ri.

⁸ Haú mù luí, yhâng é wúm nghu é shí
hkyô, iyon hkyô eq mutmó gyó
hkyô gi,

ra-nyí bui má za, yhâng chyáng jé
râ nghut lhê.

Hau htoq agó, yhang gi, myí eq nyhê
hkyô pyâm é lé hui râ nghut
lhê;

hkâsu mù gâ le, yhang lé jéyáng é,
haú Yhumsîng Garai Gasang gi,
wum-o a-tsam bò Sû nghut ri.

⁹ Haú yhang eq rahá myiwe yuggè
nyí zô lhum hkyô kut shut é eq yhâng
é ladu lai shoq ngón kún hkyô má
bo lom é, haú myidàm htoq mâ é
hkohkam pé gi, yhang lé nyhê hkyô

é myihkau lé myàng kôjáng, ngaubyi
ngau-nhap eq iyon yôn é hui bùm kó
râ nghut lhê. ¹⁰ Yhangmoq gi, yhang
no jamjaú nyi é lé wú gyuq kôluí, we
we má yap to kômù,

'Hkik é myuq mó, a-tsam bo é Babe-
lon gi, dingnyé wó ri-nhung!

Dingnyé wó ri-nhung! Hkyíng hkum
ralhum má za, dam byí é hkyô
gi, náng chyáng jé bu-nhung!'

ga luí, taí garu kó râ nghut lhê.

¹¹ Myidàm htoq mâ é hpugá byu pé
gi, yhang é yanmai, ngaubyi ngau-
nhap é eq iyon yôn é hui kó râ nghut
lhê; hkâsu mù gâ le, yhangmoq é gài
zè lé, ó yuq le a wui byi lo kô é yanmai
nghut ri. ¹² Gài zè haú pé gi, hîng,
ngùn, lungsêng eq palhé, nú-nhâm é
pán, me me dut é pán, láí hkyîng eq
zam zam ne é pán; namngón jung sik
ajung jung, maguí zuí lé saí é, guloq
hpaú jung sik lé saí é, gyí lé saí é,
shamtoq lé saí é, luq hpyû lé saí é
jung ajà jà nghut ri. ¹³ Hau htoq agó,
changhpyik gâm, xunmân, namngón
jung, mura, loban, tsibiyiq wing, tsan-
lun xû, mún eq sungso, nojûng eq
sau, myang eq myanglhêng pé; byù é
gungdu eq asak pé nghut ri.

¹⁴ Yhangmoq gi, 'Nàng myit ô nau
nyí é hkyô pé gi, náng chyáng mai

gâng ló byuq bê nghut ri. Nàng wó é sùt é hkyô eq hkikhkam é hkyô pé banshoq gi, byuq byuq bê nghut luí, hkâ-nhám le dum wó taú yù râ a nghut.' ga taí kó râ nghut lhê. ¹⁵ Gai zè haú pé lé ung luí, yhâng chyáng mai sutzè wó yu é byù pé gi, yhang hpuzô é jamjau hkyô lé wú gyuq kô é yanmai, we we má yap to kômù, ngaubyi ngau-nhap eq iyon yon uchyang,

¹⁶ 'Nú-nhâm é pán, me me dut é pán eq zam zam ne é mebu wut luí, hîng, lungsêng eq palhé pé lé mhôn tô é myuq mó gi, dingnyé wó ri-nhung! Dingnyé wó ri-nhung!

¹⁷ Hkyíng hkum rahkum má za, haú-í yhang wó é sutzè pé htên byoq byuq bu-nhung!'

ga taí kó râ nghut lhê.

Wuì-sanghpo agyi yuq hkanmó eq wuì-sanghpo mai jón wún é bang banshoq, wuì-sanghpo hkâng bang eq wuìshuq lung-aú mai wam baú hkyô wó yu é bang banshoq gi, we we má yap to kômù, ¹⁸ myuq haú nyé gyó nyí é myihkau lé myàng kôjáng, 'Myuq mó shí eq pûng é myuq gi, hkâmá joq shirâ lúh?' ga taí garu kó râ nghut lhê.

¹⁹ Yhangmoq gi, yhumsing é ulhum má hpuilhup kyaq gyun mù, ngaubyi ngau-nhap eq iyon yon uchyang, 'Myuq mó gi, dingnyé wó ri-nhung! Dingnyé wó ri-nhung!

Wuìshuq lung-aú má wuì-sanghpo pé wó é bang gi, yhâng é sutzè pé é yanmai, sutzè wó bum akô.

Nghut kôlhang, hkyíng hkum rahkum má za, htên byoq hkyô gi, yhâng chyáng jé bu-nhung!

²⁰ Mauhkûng ê, yhang é yanmai hkye gabú aq! Sân-yúng bang, lagyô pé eq myiqhtoí pé ê, hkye gabú keq!

Hkâsu mù gâ le, yhang, nungmoq lé kut é eq rajung za, Garai Gasang gi, yhang lé jéyáng bê nghut ri.'

ga taí kó râ nghut lhê." gâ ri.

²¹ Hau htâng, wum-o a-tsam mó bo é maumang lagyo rayuq gi, luqluí long mó sù é luqgok racham waq toq yù mù, wuìshuq lung-aú má dú hkyô kat luí, taí é gi,

"Haú Babelon myuq mó gi, haú su kut wum kat dú hkyô pyâm é hui râ nghut luí, hkâ-nhám le dum myàng râ a nghut lo.

²² Haú tíng bat é bang, dat gó dat ye é bang, sampyí mut é bang eq tut mut é bâng é htê lé, náng chyáng hkâ-nhám le dum wó gyo lo râ a nghut.

Loq hpaqchyí ajung jung kûng é byù lé, náng chyáng hkâ-nhám le dum myàng lo râ a nghut.

Luqluí luí é htê lé, náng chyáng hkâ-nhám le dum wó gyo lo râ a nghut.

²³ Haú myibung duq é myishâm lé, náng chyáng hkâ-nhám le dum wó duq lo râ a nghut.

Myisik lusik é htê lé, náng chyáng hkâ-nhám le dum wó gyo lo râ a nghut.

Náng é hpugá byù pé gi, mingkân é byù mó pé nghut ri.

Náng é myoqheq hpaqchyí èq mingdán banshoq mâ é bang lé, hkyô shuí nghoq bê nghut ri.

²⁴ Haú myiqhtoí pé é sui, sân-yúng bâng é sui eq myidâm htoq má sat hui bang banshoq é sui pé gi,

yhâng chyáng chyat byu-myàng bê nghut ri."

gâ ri.

19

Haleluya!

¹ Hau htâng, mauhkûng htoq má, byù ajùm ayò garú é htê mó su gâ é lé, ngò wó gyô é gi,

"Haleluya!*

* **19:1** Haleluya gâ é gi, Hebre myíng dòng, "Yhumsing Garai Gasang lé hkya-on kungton lhê" gâ é dang nghut ri.

Hkyi yù hkyô eq hpungwup shingkan, a-tsam gi, nga-nhông é Garai Gasang eq sêng é nghut lê.

² Hkâsu mù gâ le, Yhang tarâ jéyáng é hkyô gi, tengmán é eq dingmán é yanmai nghut ri.

Yhang gi, myidàm htoq mâ é bang lé, haù yhâng é ashop é đông gungsho zùm yap é hkyo eq mara kut shut nhang é shiwa myhí mó lé, mara byi luí,

Yhâng é dui-nhâng zoshâng wuì é sui yuichyîn dam byi bu-nhung ô!"

gâ ri.

³ Dum radàm, yhangmoq taí garu kô é gi,

"Haleluya!

Myuq hau é myihkau gi, pyat dedu ahtum abyuq ru íng doq nyí sháng gaq ô!"

gâ bum akô nghut ri.

⁴ Haù suwún í xe myi yuq eq dui é dusak myí du gi, haù hkohkâm-tanghkuq má zung tô é Garai Gasang lé paí gop luí, noqkuq uchyang, "Amen, Haleluya!"

ga, taí garû bum akô.

⁵ Haù hkûn, "Garai Gasâng é dui-nhâng zoshâng wuì nghut é, yhang lé gyuq hkunggâ é tiq ko banshoq bang ê!

Nga-nhông é Garai Gasang lé, hkya-on kungtôn keq ô."

gâ é htê, haù hkohkâm-tanghkuq mai htoq lo ri.

⁶ Hau htâng, byù ajùm ayo é htê su ga, wuì myo myo mying hùm é htê su ga, maugum mó é htê su ga, taí garû é htê lé ngò wó gyô é gi,

"Haleluya!

Hkâsu mù gâ le, wum-o a-tsam dik shoq bò Sû nga-nhông é Yhumsîng Garai Gasang gi, up nyi ri.

⁷ Nga-nhông gi, ngón gabú luí, Yhâng é hpungwup shingkan lé lhoq gyaú sháng ô!

Hkâsu mù gâ le, haù Sauzo myiháng poí gi, jé bê nghut luí, Yhâng

é myisik gi, rì rì mhôn to bê nghut ri.

⁸ Sâ-n-yúng duq wik nú-nhâm é mebu le, wut râ matú, Yhang lé byi to bê nghut ri."

gâ ri. (Nú-nhâm é mebu haù gi, sâ-n-yúng bang kut é dingmán é muzô nghut ri.)

⁹ Hau htâng, maumang lagyo gi, ngo lé, "Haù Sauzô é myiháng zoshuq poí má ji yu é hui bang gi, hkungsô wó nyi ri." nghû ká aq." ga taí luí, "Dang shí pé gi, Garai Gasâng é tengmán mungdang yhang nghut lê." ga xoq taí ri.

¹⁰ Haù hkûn, ngò gi, yhang lé noqkuq râ nghû, yhâng é hkyi wang má paí gop kat é nghut lê. Nghut kôlhâng, yhang gi, "Haù su hkâkut! Ngò gi, nàng eq haù Yesuq é saksé lé hkâm é náng gumang wuì eq rahá, byinzùm dui-nhâng zoshâng ru nghut lê. Garai Gasang lé noqkuq aq! Hkâsu mù gâ le, Yesuq é hkyô lé saksé hkâm é gi, myiqhtoí htoí é Woi-nyí é myit đông nghut ri." ga, ngo lé taí hkûm ri.

Myang Hpyû Jî To Su É Hkyô

¹¹ Hau htâng, ngò gi, mauhkûng bóng tô é lé le, ngá é myoq hí má myang hpyû radu nyi tô é lé le, myang ri. Myang hpyû haù má jî tô é gi, Lhumzui eq Tengmán gâ é Sû nghut ri. Yhang gi, tengmán é đông tarâ jéyáng luí, majan zan Sû nghut ri.

¹² Yhâng é myoqjí gi, myishâm su dut mù, Yhâng é ulhum má gi, janmaú myo myo tsûng tô ri. Yhang mai lai luí, ó yuq le a bo sê é myìng, Yhâng chyáng ká tap tô ri.

¹³ Yhang gi, sui má jum yù bê nghut é buhâng radung wut to luí, Yhâng é myìng gi, Garai Gasâng é mungdang gâ ri.

¹⁴ Haù mauhkûng gyè pé gi, hpyu é eq sanséng nú-nhâm é mebu wut mù, myang hpyû jî kôluí, Yhâng htâng má châng bum akô nghut ri.

¹⁵ Byù myû haù pé lé zan râ matú, htoq é shâm gi, Yhâng é nhut mai htoq lo ri. Yhang gi, yhangmoq lé, shamtoq dumbáng eq up râ nghut lê. Yhang gi, wum-o

a-tsam dik shoq bò Sû Garai Gasâng é nhikmo-yô é tsibiyiq shi pyik jang má, yhangmoq lé pyik râ nghut lhê. ¹⁶ Hkohkam pé é Hkohkâm eq yhum-sing pé é Yhumsing gâ é mying gi, Yhâng é buhîng eq Yhâng é tangbau má kê tap tô ri.

¹⁷ Dum, maumang lagyo rayuq gi, bui má yap tô é lé ngò myang ri; yhang gi, maulat mâ é nghoqzô pé banshoq lé, "Lé keq, Garai Gasâng é zoshuq poi mó matú, lé zup zing keq; ¹⁸ haú hkûn, nungmoq gi, hkohkam pé é, gyezaú pé é, wum-o a-tsam mó bò bâng é, myang jûm eq ji bâng é gungsho, luthkyô wó bang eq jùn pé é, byù mó byù zo pé lhunglhâng é gungsho pé lé, myàng zo kó râ nghut lhê." ga, htê mó èq wut garû taî ri.

¹⁹ Hau htâng, haú tân jung dusak eq myidàm htoq mâ é hkohkâm eq yhangmoq é gyezô pé gi, haú myang htoq má jî to Sû eq Yhâng é gyezô pé lé, majan zan râ matú chôm zîng bùm kô é lé, ngò myang ri. ²⁰ Nghut kôlhang, haú tân jung dusak gi, chyup yu é hui bekô nghut ri; hau htoq agó, haú tân jung dusak é masat lô lé hkam yù luí, yhâng é alhô lé no-qkuq é bang lé, mhaú zo râ matú, tân jung dusak hau é gunglik dông limik kumlhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông má duì gù dú hkyô kat é hui bekô nghut ri. ²¹ Haú myit gyó tô é bang gi, myang gûng má jî to Su é nhut mai htoq lo é sham èq sat pyâm é hui bekô nghut luí, nghoq pé lhunglhâng gi, haú bâng é gungsho lé, gyi gyi dau dau myàng zô bùm bekô nghut ri.

20

Rahkyîng Zàn

¹ Dum, maumang lagyo rayuq gi, nik dik htûm é Lasang-dông é zoqshi eq joqtoq tui mó lé, yhâng é loq má chûng mù, mauhkûng mai gyó lé lo é lé, ngò myang ri. ² Yhang gi, natzau eq Tsadán nghut é, a-nham lhê é lhangmuì gâ é manjung lé, zanwut

rahkyîng lhûng to râ matú, chyup tui yù bê nghut ri. ³ Haú mù, maumang lagyo haú gi, rahkyîng zàn a byíng shî é gyoro má, manjung haú, byù myû pé lé a wó mhaú zo sháng gaq ga, nik dik htûm é Lasang-dong má yhang lé dú hkyô hâng kat luí, zoq myhî to mù, hau é ahtoq má dizik htûng tô ri. Haú rahkyîng zàn lai eq, yhang lé, ra yoq zo hpông htoq kat ra râ nghut lhê.

⁴ Ngò gi, haú tarâ jéyáng râ ahko ahkáng wó é bang zung tô bum é hkohkâm-tanghkuq pé lé, dum myang ri. Hau htoq agó, haú Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bâng é sobyô pé lé, ngò myang ri. Haú bang gi, haú tân jung dusak eq yhâng é alhô lé a noqkuq é htoq agó, yhumsing é ngelang eq loq má hau é masat lô lé a htûng tap yù bâng é sobyo pé nghut ri. Yhangmoq gi, dum dui toq mù, zanwut rahkyîng tup Hkrisduq eq rahá up nyi bekô nghut ri. ⁵ Haú gi, sâng-hî dàm dum dui toq é hkyô nghut ri. (Shi byuq bê myit gyó tô bang gi, rahkyîng zàn haú a byíng byíng wó dum dui toq kó râ a nghut.) ⁶ Sâng-hî dàm dum dui toq é hkyô má lom é bang gi, hkungsô wó bang eq chyoiyúng bang nghut ri. Í dâm nghû râ shi é hkyô gi, haú bang lé up râ ahkáng wó é a nghut; haú bang gi, Garai Gasang eq Hkrisduq é hkyangjông pé dut râ nghut é htoq agó, Hkrisduq eq rahá zanwut rahkyîng tup up kó râ nghut lhê.

Tsadán Htên Byoq Huí É Hkyô

⁷ Rahkyîng zàn haú lai jáng, Tsadán gi, htóng mai nhang htoq kat é hui luí, ⁸ majan zan râ matú, myidàm htoq myi chyûn má nyi é, Goga eq Magoga gâ é byù myû pé lé mhaú shuî tsíng yù râ ga, htoq é râ nghut lhê. Byù haú bang gi, wuishuq lung-aú yàm mâ é semuì myhó myo kó râ nghut lhê. ⁹ Yhangmoq gi, maumyî htunghtáng hkap shoq chôm yán doq lò kômù, haú Garai Gasâng é byu pé

nyi é dap nghut é, Garai Gasang chy-
itdap é myuq lhîngkhyuq má, lé lóm tô
bùm bekô. Nghut kôhang, mauhkûng
mai myi gyó lô luí, yhangmoq lé nyhê
hkyô pyám bê nghut ri. ¹⁰ Haû tân
jung dusak eq myiqhtoi pyoq pé lé dú
hkyô kat jang nghut é, hang myi duq
nyi é nhông má, yhangmoq lé mhoq
hpyoq yu é natzau haû le dú hkyô
pyám é hui bê nghut ri. Yhangmoq
gi, nyí, myín, pyat dedu ahtum abyuq
wuîhke jamjau hui zô nyi kó râ nghut
lhê.

Ló Htâng É Tarâ Doqdan Hkyô

¹¹ Hau htâng, hkohkâm-tanghkuq
hpyû mó ralhum eq haû má zung tô
é Sû lé, ngò myang ri. Haû mauhkûng
eq myigùng gi, Yhâng é hí mai hpang
lô bê nghut mù, yhangnhik é matú
jowò a joq lo nghut ri. ¹² Hau htoq
agó, shi byuq bê nghut é, tiq é kô é
bang gi, hkohkâm-tanghkuq hí má yap
tô bum é eq laiká buk pé hpông é lé,
ngò myang ri. Asak jihpán laiká buk
gá é gotû laiká buk le, hpông tô ri. Haû
shi byuq bê bang gi, yhumsîng kut é
eq rajung za, laiká buk pé má kâ tô
é dông, tarâ doqdan é huî bùm bekô
nghut ri. ¹³ Haû hkûn, wuîshuq lung-
aû gi, yhang má lúng tô é, shi byuq bê
bang lé ap byi luí, haû shi é hkyô eq
Moming le, yhangnhik chyáng lúng
tô é, shi byuq bê bang lé ap byi akô
nghut ri; yuq hkangmó gi, yhumsîng
kut é eq rajung za tarâ doqdan é hui
bekô nghut ri. ¹⁴ Hau htâng, shi é
hkyô eq Moming gi, myi nhông má
dú hkyô kat é hui bekô nghut ri. Myi
nhông haû gi, í dâm nghû râ shi é hkyô
nghut lhê. ¹⁵ Asak jihpán laiká buk
má, myìng a bo é sù ó yuq nghut kôle,
myi nhông haû má dú hkyô kat é hui
bekô nghut ri.

21

Yerusalem Asik

¹ Hau htâng, mauhkûng asik eq
myigùng asik lé, ngò myang ri; hkâsu
mù gâ le, hí lhê é mauhkûng eq
myigùng gi, laí ló byuq bê nghut luí,
wuîshuq lung-aû le, dum joq râ a

nghut lo. ² Haû hkûn, Chyoiyúng
Myuq gâ é Yerusalem asik gi, lusik é
matú mhôn yúng tô é myisik su, hen
lajâng yù luí, Garai Gasâng chyáng mâ
é nghut mù, mauhkûng mai gyó lé lo
é lé, ngò myang ri. ³ Hau htoq agó,
hkohkâm-tanghkuq mai htoq lo é dan-
ghtê mó lé, ngò wó gyô é gi, "Ahkuí,
Garai Gasâng é nyi jowò gi, xângzo
byu pé eq rahá nghut luí, Yhang gi,
yhangmoq eq rahá nyi nyi râ nghut
lhê. Yhangmoq gi, Yhâng é byu pé
dut râ nghut luí, Garai Gasang yhang,
yhangmoq eq rahá nyi mù, yhang-
moq é Garai Gasang dut râ nghut
lhê. ⁴ Garai Gasang gi, yhangmoq é
myoq mâ é ngaubyi lhunglhang lé, sut
pyám byi râ nghut lhê. Htângnùng má
gi, shî-nò hkyô, iyon hkyô, ngaubyi
ngau-nhap hkyô eq no hpu hkyô
nghû é joq râ a nghut lo; hkâsu mù gâ
le, hí lhê é hkyô pé gi, laí ló byuq bê
nghut ri." gâ ri.

⁵ Haû hkohkâm-tanghkuq má zung
to Sû gi, "Wú aq, jung hkangmó lé,
Ngò asik kut nyi bê nghut lhê." ga
taí luí, "Shî lé kâ to aq, hkâsu mù gâ
le, dang shí pé gi, lumjîng é dang eq
tengmán é dang nghut lhê." ga taí ri.

⁶ Hau htoq agó, Yhang gi, "Haû pé
gi, ban kut bê. Ngò gi, Alhpa eq
Omega nghut lhê; Sâng-hi Awang eq
Ló Htáng Sû le nghut lhê. Wuî shit sù
lé gi, ahpa a dúng é za, asak wuîbúm
mâ é uchyam lé, Ngò byi huq râ nghut
lhê. ⁷ Wó ung é sù ó yuq nghut kôle,
Garaí é silí wunlí haû pé banshoq
lé sîng râ nghut mù, Ngò gi, yhâng é
Garai Gasang dut luí, yhang gi, Ngá
zo dut râ nghut lhê. ⁸ Nghut kôhang,
gyuq myit bò bang, a lumjîng bang,
achaq achyut dut bang, byù sat bang,
ashop é dông gungsho zùm yap é hkyô
shut é bang, myoqheq hpaqchyí kut
é bang, hparà noq é bang eq mhaû
bang lhunglhang é jowò gi, haû hang
myi duq nyi é nhông nghut râ nghut
lhê. Haû gi, í dâm nghû râ shi é hkyô
nghut ri." ga ngo lé taí ri.

⁹ Ló htâng é wúm nyhit jung byíng
tô é góm nyhit lhum chung tô é mau-

mang lagyo nyhit yuq mâ é rayuq gi, lé mù, "Lé aq, haû Sauzô é yhangmyi gâ é myisik lé, ngò tûn shit râ nghut lhê." ga ngo lé taî ri. ¹⁰ Hau htâng, yhang gi, ngo lé Woi-nyí mai bùm myhâng mó ralhum má shuí jé luí, Garai Gasâng chyáng mâ é nghut mù, mauhkûng mai gyó lé lo é, haû Chyoiyúng Myuq gâ é Yerusalem lé tûn shit ri. ¹¹ Myuq haû gi, Garai Gasâng é hpungwup shingkang hû é htoq agó, haû maubó gi, hpaû dik é huhpé lungsêng su dut luí, myoqjâm su sân-yúng ri. ¹² Myuq xêwâm gi, kô myhang é htoq agó, hkum raxe í lhum hpông tô ri; hkum haû pé má, maumang lagyo raxe í yuq zúng tô ri. Hau htoq agó, Israelaq byù myû raxe í hu é mying lé, hkum haû pé má kê tap to bum ri. ¹³ Hkum haû pé gi, buih-toq hkyam shut sùm lhum, buiwàng hkyam shut sùm lhum, maupyí shut sùm lhum, mautsûng shut sùm lhum kut hpông tô ri. ¹⁴ Myuq xêwâm haû gi, awang raxe í lhûm èq hi tô é nghut luí, awang haû pé má, Sauzô é lagyo raxe í yuq é mying dap tô bum ri.

¹⁵ Haû ngo lé nyo é maumang lagyo gi, myuq lé le, hau é hkum pé lé le, xêwâm pé lé le, ké râ matú, kê é jung hîng jâm-yang ralhum chung tô ri. ¹⁶ Myuq haû gi, myi chyûn dut mâ é nghut luí, hîng hpyang làm hpyang rawuí wuí za dut mâ é nghut ri. Maumang haû gi, myuq lé jâm-yang hau èq kê wú é hkûn, hîng hpyang, làm hpyang, myhâng hpyang banshoq 1400 déng* kô bo ri; ¹⁷ yhang gi, haû byù kê é jung eq wuí é maumang lagyo é kê jung lé chûng mù, myuq xêwâm lé kê wú é hkûn, rasho myí xê myi dúng bo ri. ¹⁸ Myuq xêwâm haû gi, huhpé lungseng èq saî é nghut ri; myuq gi, hîng gyíng èq saî é nghut mù, myoqjâm su yhang sân-yúng ri. ¹⁹ Myuq xêwâm haû é awang pé gi, hpau jung lungsêng ajung jûng èq mhôn tô é nghut ri. Sâng-hí lhum gi, huhpé lungseng èq, í lhum nghû râ gi, nila (mauhkûng

nyuì su dut jung) lungseng èq, sùm lhum nghû râ gi, mahuya (noq é isâm myo jung) lungseng èq, myí lhum nghû râ gi, myaq (huí nyuì nyuì é jung) lungseng èq, ²⁰ ngo lhum nghû râ gi, nyhaû myoqjí su dut jung lungseng èq, hkyuq lhum nghû râ gi, pate-mya (nè é jung) lungseng èq, nyhit lhum nghû râ gi, huí muí muí é su dut jung lungseng èq, shit lhum nghû râ gi, myek-yoi (wuimau nyuì su dut jung) lungseng èq, gaû lhum nghû râ gi, utohpaya (bó huí hui é jung) lungseng èq, raxê lhum nghû râ gi, mahuya nyuì lungsêng èq, raxe ralhum nghû râ gi, wakintu (mhan-haq nyuì eq mauhkûng nyuì nyhò tô é su dut é jung) lungsêng èq, raxe í lhum nghû râ gi, (me me dut é jung) htihtunila lungseng èq mhôn tô ri. ²¹ Haû myuq hkum raxe í lhum gi, palhé raxe í cham nghut ri; hkum ralhum gi, palhé rachâm èq saî é nghut ri. Haû myuq é hkyô mó gi, hîng jet èq saî é nghut luí, myoqjâm su duq san é hkyô nghut ri.

²² Ngò gi, myuq haû má noqkuq yhûm joq é lé a myàng, hkâsu mù gâ le, haû wum-o a-tsam dik shoq bò Sú Yhumsîng Garai Gasang eq Sauzo gi, myuq hau é noqkuq yhûm nghut nyi é yanmai nghut ri. ²³ Haû Garai Gasâng é hpungwup shingkang gi, myuq haû má duqbó byí é htoq agó, Sauzo gi, myuq hau é myibung nghut é yanmai, myuq haû má gi, bui eq lhamó tsô byi a ra nghut ri. ²⁴ Haû byù myû pé gi, myuq haû duqbó é hkaû má hkyô wó so kó râ nghut lhê; haû myidàm htoq mâ é hkohkam pé gi, yhangmoq é hkikhkâm hkyô lé, myuq haû má yù lé kó râ nghut lhê. ²⁵ Myuq haû má gi, myín nghû é a joq é yanmai, myuq hkum myhî é le joq râ a nghut lo. ²⁶ Haû byù myû pé é hpungwup shingkang eq aróng lé, myuq haû má yu lé kó râ nghut lhê. ²⁷ Myuq haû má, a sansêng é hkyô haî le wó wàng râ a nghut é htoq agó, hoq hpu hkyô eq mhaû zô é hkyô kut

* **21:16** 1400 déng gi, Grik pé é stadia 12000 kô nghut ri.

é sù ó yuq le wó wâng râ a nghut; haù Sauzô é asak jihpán laiká buk má myìng bo é bang za wó wâng râ nghut lhê.

22

Asak Wuì Mó Lâng

¹ Hau htâng, Garai Gasang eq Sauzô é hkohkâm-tanghkuq mai yui htoq lô luí, myuq hkaù mâ é hkyô mó gùng dông yui lô é, myoqjàm su sân-yúng é asak wuì mó lâng lé, maumang lagyo haù, ngo lé tân shit ri. ² Wuilàng í hpoq é má, ashi raxe í myû zuí é asak shigâm yuq tô é nghut luí, lhohkyap hkangmó ashi zuí ri. Hau htoq agó, shigâm haù pé mâ é ahaq pé gi, byù myû pé lé yâ gè râ matú nghut ri. ³ Nhîng é haí le a joq lo râ nghut lhê. Garai Gasang eq Sauzô é hkohkâm-tanghkuq gi, myuq hkaù haù má joq nyì râ nghut mù, Yhâng é dui-nhâng zoshâng wuì gi, Yhang lé noqkuq do-jaú kó râ nghut lhê. ⁴ Yhangmoq gi, Yhâng é myoqdong lé myàng kó rá nghut é htoq agó, yhangmoq é nge-lang má, Yhâng é myìng kê tap é hui kó râ nghut lhê. ⁵ Myín nghû é le joq râ a nghut lo. Myibung duqbó byí é le, buì tsô byí é le, yhangmoq ra kó râ a nghut lo, hkâsu mù gâ le, haù Yhumsîng Garai Gasang gi, yhangmoq lé duqbó byí nyì râ nghut lhê. Hau htoq agó, yhangmoq gi, pyat dedu ahtum abyuq up nyì kó râ nghut lhê.

⁶ Maumang haù gi, ngo lé, "Dang shí pé gi, lumgíng é dang eq tengmán é dang nghut lhê. Myiqhtoí pé é woi-nyí lé up é Yhumsîng Garai Gasang gi, adê myáng má dut lò râ hkyô pé lé, Yhâng é dui-nhâng zoshâng wuì lé tân shit râ matú, Yhâng é maumang lagyo lé nhang kat é nghut ri." ga taí ri.

Yesuq Jé Lé Lô Râ Hkyô

⁷ "Wú keq, Ngò gi, a myáng má jé lé lô râ nghut lhê! Laiká shí má bo é myiqhtoí dang pé lé châng kut é sù gi,

hkungsô wó nyi ri."* gâ é lé, ngò wó gyô ri.

⁸ Haù hkyô pé lé wó myâng wó gyô é sù gi, ngò Yohan nghut lhê. Ngò gi, haù hkyô pé lé wó myâng wó gyô é hkûn, ngo lé, shí hkyô pé tân shit é maumang lagyo é hkyí wang má noqkuq râ matú paí gop é nghut lhê. ⁹ Nghut kôlhang, yhang gi, ngo lé, "Haù su hkâkut! Ngò gi, nâng eq le, nâng é gumang myiqhtoí pé eq le, laiká shí mâ é mungdang pé lé châng kut é lhunglhang bang eq le rahá, byinzùm dui-nhâng zoshâng ru nghut lhê. Garai Gasang lé noqkuq aq!" ga taí ri.

¹⁰ Hau htâng, yhang gi, "Laiká shí má bo é myiqhtoí dang pé lé, hkâzaú to lo, hkâsu mù gâ le, haù ahkyíng gi, chyâng lò bê nghut ri. ¹¹ A dingmán é sù gi, a dingmán é dông xoq kut nyí sháng gaq; a sansêng é sù gi, a sansêng é dông xoq dut nyí sháng gaq; dingmán é sù gi, dingmán é dông xoq kut nyí sháng gaq; chyoiyúng é sù gi, xoq chyoiyúng nyí sháng gaq." ga ngo lé taí kyô ri.

¹² "Wú keq, ngò gi, a myáng má jé lé lô râ nghut lhê! Ngò gi, yuq hkangmó lé, yhumsîng kut é eq rajung za byi râ shigyaú chyunghuq chung tô lhê. ¹³ Ngò gi, Alhpa eq Omega nghut lhê, Sâng-hi eq Jihtûm nghut lhê, Sâng-hi Awang eq Lô Htáng Sû le nghut lhê.

¹⁴ Asak shigâm má jé râ eq myuq hkaù shut hkúmdong mai wó wang jé râ ahkáng wó yû shoq, yhumsîng é buhîng lé chí sân é bang gi, hkungsô wó nyi ri. ¹⁵ Shinggan má gi, hkui dông nyi é bang, myoqheq hpaqchyí kut é bang, ashop é dông gungsho zùm yap é hkyô shut é bang, byù sat é bang, hparà noq é bang eq mhaù é hkyô lé ô nàù luí châng kut é bang lhunglhang nyi bum akô nghut ri.

¹⁶ Ngò, Yesuq gi, haù noqkuq hpûng pé lé, shí hkyô pé saksé hkâm shit sháng gaq nghû, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit

* 22:7 Dang shí hkun gi, Yesuq taí é nghut lhê. † 22:16 Dang shí hkun gi, Yesuq taí é nghut lhê.

eq Awut Ashín le, haû duqbó é Bó-myhû le nghut lhê."† gâ é lé, ngò wó gyô ri.

¹⁷ Haû Woi-nyí eq myisik gi, "Lé aq!" gâ akô. Haû wó gyô é sù gi, "Lé aq!" ga sháng gaq. Wùi shit sù ó yuq nghut kôle, lé sháng gaq; shuq nau é sù ó yuq nghut kôle, ahpaû byi a ra é asak wùi lé, shuq sháng gaq.

¹⁸ Laiká shî má bo é myiqhtoi dang pé lé wó gyô é bang yuq hkangmó lé, ngò sidiq byi é gi: dang haú pé má, rajung jung kat jat é sù ó yuq chyáng nghut kôle, Garai Gasang gi, laiká shî

má kê tô é wúm pé lé jé nhâng râ nghut lhê. ¹⁹ Myiqhtoi laiká shî má bo é dang pé lé, yu pyâm é sù ó yuq lé nghut kôle, Garai Gasang gi, laiká shî má kê tô é asak shigâm eq chyoiyúng myuq mâ é yhang eq sêng é gû lé, yu pyâm byi râ nghut lhê.

²⁰ Shí hkyô pé lé saksé hkám byi é Sù gi, "Nghut bê, Ngò gi, a myáng má jé lé lô râ nghut lhê." ga taí ri.

Amen. Yhumsîng Yesuq ê, lé lô aq ô!

²¹ Haû Yhumsîng Yesuq é jeju gi, Garai Gasâng é byu pê chyáng joq nyí sháng gaq ô! Amen.